


Vari Verenama



The New Testament in the Dawawa Language of Papua New Guinea

**Vari Verenama
The New Testament in the Dawawa Language of Papua
New Guinea
Nupela Testamen long tokples Dawawa long Niugini**

copyright © 2002 Wycliffe Bible Translators, Inc.

Language: Dawawa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 21 Feb 2024 from source files dated 31 Aug 2023

9b8bda32-db42-5be3-9d24-4e4a5d5f65b2

Contents

Metiu	1
Mak	85
Luk	135
Jon	220
Apasol	283
Rom	359
1 Korint	395
2 Korint	429
Galesia	453
Epeses	466
Pilipi	478
Kolosia	487
1 Tesalonaika	495
2 Tesalonaika	502
1 Timoti	506
2 Timoti	517
Taitos	525
Pirimon	530
Hibru	532
Jeims	561
1 Pita	571
2 Pita	582
1 Jon	589
2 Jon	599
3 Jon	601
Jiud	603
Waimaḡatara	607

Metiu

*Yesu yatayatanama wağewağedima isedima
(Lk 3:23-38)*

¹ Yesu Keriso tauna guyau Deivid na damma nopone ya tubuğana, be guyau Deivid tauna Eibraham na damma nopone ya tubuğana. ² Be Eibraham natunama Aisik, be Aisik natunama Jeikob. Be Jeikob natunatunama taudi Juda be tasitasinama. ³ Be Juda natunatunama taudi Peres be Sera, be tinedima tauna Temar. Be Peres natunama Hesron, be Hesron natunama Ram, ⁴ be Ram natunama Aminadap, be Aminadap natunama Nason, be Nason natunama Salmon ⁵ be Salmon natunama Boas, be Boas tinanama Reiheb. Be Boas natunama Obed, be Obed tinanama Rut. Be Obed natunama Jesi. ⁶ Be Jesi natunama guyau Deivid.

Be Deivid natunama Solomon be Solomon tinanama Uria na waivima. ⁷ Be Solomon natunama Rehoboam, be Rehoboam natunama Abaija, be Abaija natunama Asa. ⁸ Be Asa natunama Jehosafet, be Jehosafet natunama Joram, be Joram natunama Usaia. ⁹ Be Usaia natunama Jotam, be Jotam natunama Eihas, be Eihas natuama Hesekaia. ¹⁰ Be Hesekaia natunama Manase, be Manase natunama Amon, be Amon natunama Josaia. ¹¹ Be Josaia natunama Jehoiakin be tasitasinama. Taudi adi rağanine Israel banegidima matabudi a nawedina Babilonma be dabudine a miana.

¹² Be Babilon a mianana murine Jehoiakin natunama Sealtiel ya tubuğana. Be Sealtiel natunama Serubabel. ¹³ Be Serubabel natunama Abiut, be Abiut natunama Elaiakim, be Elaiakim natunama Asor. ¹⁴ Be Asor natunama Sadok, be Sadok natunama Akim, be Akim natunama Eliut. ¹⁵ Be Eliut natunama Eleasar, be Eleasar natunama Matan, be Matan natunama Jeikob. ¹⁶ Be Jeikob natunama Jousep. Be Jousep tauna Meri na badama. Be Meri, tauna vutuna Yesu Tauwai yawasana ya tikana.

¹⁷ Yodi tà kita da Eibraham ġarone be ya nađo da guyau Deivid ġarone ya tavana, kimta matabudi 14. Be guyau Deivid ġarone da ya nađo da Babilon na rağanie ya tavana, kimta matabudi 14. Be Babilonma rağanine be ya nađo da Keriso na rağanie ya tavana, kimta matabudi 14.

*Keriso na kaba tubuğama
(Lk 2:1-7)*

¹⁸ Yesu Keriso muriğā da ya tubuğana nogone, kaua umanama ya tubuğana, Yesu tinanama Meri tauna Jousep na ġoapaparama. Taudi muriğā da sibo ai nađi be ai

rawategeina, Meri mayanama ya pa gó da kaiteka ya bogana Arua Babaue.¹⁹ Be Meri na badama Jousep tauna didimana baneginama. Vutuna aubainama ra gánine kaua nama ya kitakitana tauna nam i góe goena da patara matedie sibo Meri ya gose be ya kawa tunimayağı. Vutuna aubainama tauna ya góe goena da moisirie sibo Meri ya gosena.

²⁰ Jousep inam kauidima yawai nuano gó onogó tedina maika, Bada na aneama raubonie Jousep garone ya ma gá tará be ya riuna, "Jousep, guyau Deivid natunama, nam kwa naira, Meri kwa pa gó da tam am waivima be nam kwa gose pore, baninama Meri Arua Babau na rewapanae gomana ya bogena. ²¹ Tauna tokare gomana tau gó minama e tika be tam kwai isana Yesu, baninama tauna tokare na banagama adi gewagewae ei yawasanidina."

²² Uma kauidima matabudi Bada boni peroveta garone ya giugiuena ruvane, nama a tubu gó ana. ²³ Peroveta boni umanama ya riuna,

"Tokare Matatapu e boga be gomana tau gó minama e tikana, be taudi inam gomeninama tai isana Imanuel."

Isa Imanuel inam baninama "Mama itua tauda garode."

²⁴ Jousep ya kenakena midisú guna murine, aba Bada na aneama ya riuriuena nama ya voiena, tauna Meri ya pa gó da naumeki na waivima. ²⁵ Be Jousep Meri mate nam tunidima ti rawategei rubudina naumeki da Meri gomana tau gó mina ya tikana. Dabudine Jousep inam gomeninama yai isana "Yesu".

2

Nuauyauya banegidima Yesu a vikitana

¹ Guyau Herod na ra gánine, Yesu Judia nopone Betliem meagaine ya tubutubu gó ana murine, nuauyauya banegidima suara na kaba tavama yauwane nama be a verauna Jerusalemma. ² Be taudi guyau ai taravirena, "Gomana gó aubonama de gó dobudine ya tubu gó, Jius adi guyau? Tauma suara na kaba tavae gomana na kiporama kë kita be kë verauna rauduneenama aubainama."

³ Ra gánine guyau Herod inam giunama nama ya vaivaiena, nuanama ya rovona. Be banaga matabudi Jerusalem nopone, taudi mate nuedima ya rovona.

⁴ Inam ra gánine tauna pirisi babadidima be tarawatu tauwai katakataidima matabudi ya rawategeidina be, Tauwai yawasana de gó dabudine e tubu gó vutuna yai taraviredina. ⁵ Be taudi a paribee be a riuna, "Tauwai yawasana tokare Judia nopone Betliem meagaine e

tubuğana, baninama peroveta ya giruma be umanama ya riuna,

⁶ “Tam Betliem Judia provins nopone, tam nam meagai yababa Judia guyaguyaudima ġarodie.

Ibewa, baninama tam nopome tokare guyau dosinama e tubuğā be tauna yau banagama Israel banegidima e rabedina.”

⁷ Dabudine Herod nuauyauya banegidima moisirie ya rawateğeidi be yai taravira yağeyağedina da taudi aba rağanine kipora ya mağatara be a kita. ⁸ Naumeki da guyau nuauyauya banegidima ya riupore nawedi Betliemma be umanama ya riuedina, “Koi wanawana kaua da inam gomeninama ko banavina. Be gomeninama ko kitana rağanine, ko verau munağā da taugu ko riuegu be taugu mate ya nağō da gomeninama ya rauduneena.”

⁹ Naumeki da guyau na giumenta a vaie ya kovikovina murine, taudi nağō ai karena. Be kiporinama a kitakitana vutuna a kita watani be a vawatanina, naumeki da değō gomana ya tubutubuğana debane kipora ya midi kwasana.

¹⁰ Be taudi nama a kitakitana, taudi ai nuavere kauana.

¹¹ Rağanine vadae a tavatavana, taudi gomana a kitana, tinanama Meri mate. Naumeki da taudi tuapikedie a raupari be gomana a rauduneena. Dabudine taudi adi puyoma a kaiporağā be gomana a puyona, gold, piupiu be kai bodi-

nama ġabuğabunama maesinama dosinama isanama ‘Mera’.

¹² Inam kauinama murine Mamaitua raubonie nuauyauya banegidima nuedima ya boru be ya riuedina da nam sibo a munağā Herod ġarone. Vutuna aubainama taudi wari keda a pağō da a munağana adi dobue.

Jousep be Meri gomana a tika be naira Ijiptma a nağona

¹³ Nuauyauya banegidima a nağonağona muridie, Bada na aneama Jousep ġarone raubonie ya mağatara be umanama ya riuena, “Kwa midisügu, gomana kwa tika be tinanama mate naira ko nağona Ijiptma. Be dobudine ko miana naumeki da taugu ya riuem da ko verau munağana, bani-

nama guyau Herod tauna gomana e wanewanena ei gurina aubainama.” ¹⁴ Naumeki da Jousep ya midisügu, da gomana ya tika be tinanama mate yai dokedi da kupie meagai a gose da a nağona Ijiptma. ¹⁵ Be taudi Ijiptma a miana naumeki da Herod e gurina. Uma kauidima inam peroveta aba boni yawai perovetaena nama yodi a tubuğana. Peroveta umanama ya riuna, “Natuguma Ijiptma ya miamiana be è riue da ya dobina.”

¹⁶ Be rağanine guyau Herod ya kita da nuauyauya banegidima tauna ġarone nam ti tava munağana, vutuna

aubainama tauna nuanama yai medi kauana. Inam rağanine tauna nuauyauya banegidima aba a giugiuena ya noğota wairovedi be na tauigarama ya riuporedi be ya riuna, "Ko nağō Betliem meagaine, be diane meagaidima mate nopodie be seda tautauğomidima adi suarama rabui be uma ya yovo munağana matabudi koi guri rovodina." Tauna nuauyauya banegidima adi giuma ya noğota wairovedi be nama ya giuna. ¹⁷ Be inam peroveta Jeremaia boni aba ya giugiuena nama ya tubuğana. Tauna umanama ya riuna,

¹⁸ "Banaga ġaba be nuaboya dosinama a vaiena Rama meagainama nopone.

Reichel na sedama ya ġabeğabedina, be taudi nam teneteneğina da sibo a riuwai nuasubasuba, baninama na sedama matabudi a guri rovona."

Jousep, Meri be adi gomana mate a munağana Israelma

¹⁹ Rağanine Herod ya gurigurina murine, Bada na aneama raubonie Jousep ġarone Ijiptma ya mağatara ²⁰ be umanama ya riuena, "Kwa midisuğu, gomana be tinanama mate kwai dokedi be ko munağana Israelma. Baninama taudi aitaüğa gomana waigurinama a riuriuena, inam banegidima yodi a gurina."

²¹ Naumeki da Jousep ya midisuğu be gomana be tinanama mate yai dokedi be a munağana Israelma. ²² Be tauna e vaiena, be Herod natunama Arikelas tamanama gabunama ya paño be Judia provins nopone yai badana. Vutuna aubainama Jousep dabudi nağonama ya nairana. Be anea raubonie Jousep ya riue be tauna ya nağona Galili provins nopone. ²³ Naumeki da taudi a nağona Nasaret meagaine be dabudine a miana. Be inam aba peroperoveta boni a giugiuena nama ya tubuğana. Peroperoveta umanama a riuna: "Banaga tokare Yesu tai isana Nasaret baneginama."

3

Jon tauwai babataito Yesu na kedama ya sepana

(Mk 1:1-8; Lk 3:1-18; Jn 1:19-28)

¹ Inam rağandie Jon tauwai babataito Judia provins nopone ya tava be dobu kavakavane ya rarauguguyana.

² Be tauna umanama ya riuriuna, "Noğota vitara ko paño be ami noğotama ko vitaredina, baninama Mamaitua na waiguyauma kaiteka maida e tavatavana." ³ Jon tauwai babataito tauna vutuna peroveta Aisaia ya giugiuena. Aisaia umanama ya riuna,

"Banaga dobu kavakavane e yokoyokona,

Bada na kedama ko sepa, be keda ko kawa didimanidina na kaba verauma aubainama.”

⁴ Jon na garama kamel vuvuğinama voivoienama ya kotekeotena. Be musara kopinama kwarikwarinama yai boretaiena, be tauna na kanima inam kapau be iwavi. ⁵ Banaga toitoi Jerusalemga, Judia provinsne be upa Jodan banegidima matabudi Jon ġarone a tavana. ⁶ Dabudine taudi adi gewagewama matabudi a kuvesidi be tauna yai babataitodina upa Jodan nopone.

⁷ Raġanine tauna e kitana be Parisi be Sadisi banegidima toitoi a veraverauna ġarone dego banaga yawai babataitodie, dabudi Jon taudi umanama ya riuedina, “Taumi maika mota sarama natunatudima! Taumi aitau ya riuemi da tokare Mamaitua na kovoġama ko vora pore? ⁸ Ami yawasanama ko vitaredi be yawasana veredima banidima koi maġataridi da banaga ta kitedina, ⁹ be nam ko noġoti be ko riuna, ‘Tauda Eibrāham natunatunama, aubainama nam tokare aba gewagewanama ġarode e tubuġa.’ Yà riuriuemina, deġoda Mamaitua sibo i ġoena, tauna tokare teneteneġinama kaua yekudie seda yai tubuġidina Eibrāham aubainama. ¹⁰ Bada tamiyoko kaite kai bogane ya boruna, be dego kaidima banidima nam veredi, matabudi tokare e tarāġa be e gabu gorudina.

¹¹ “Taugu upa kavakavae yāwai babataitomina, ami noġotama ko vitaredina aubainama. Be banaga murigue e veraverauna, tauna banaga wairewapana vavasaġinama nam maika taugu. Be taugu nam veregu da na kaġasumama yà ragaudi. Tauna tokare Arua Babaue be kaie ei babataitomina. ¹² Tauna banaga veredi be gewegewedima e daridariġedina maika raisi. Tauna raisi e tutu, be sive nopone e ġini be sive mui e suve da ġavoe e naġonāġona, be banidima ġavoe ta dobidobina. Be tauna raisi banidima e ragaudi be na vadae e biribiridina. Be muinama kai karakaratine ei poraġa be ta kara nonoġedina.”

Jon Yesu yai babataitona

(Mk 1:9-11; Lk 3:21-22; Jn 1:29-34)

¹³ Naumeiki da Yesu Galilima be ya verauna upa Jodanma, da Jon sibo tauna yai babataitona. ¹⁴ Be Jon ya riutuaġiae be ya riuna, “Tam aba aubainama taugu ġarogue kuya verau? Tam sibo taugu kuyai babataitoguna.” ¹⁵ Be Yesu ya paribee be ya riuna, “Ibewa, inam naumeiki. Uma inam Mamaitua na ġoanama naumeiki da tà voienna.” Inam raġanine Jon yai aninana.

¹⁶ Naumeiki da Yesu ya babataito ya kovi da tauna upae be ya tavatavana raġanine, mara ya nuaporaġa be tauna

Arua Babau ya kitana ya yovoyovona ġarone kiu gabubu maika.¹⁷ Be marae bona yadobi be ya riuna, “Inam tauna taugu natuguma nuaguma e paġopaġona, be taugu yàwai nuaverena tauna ġarone.”

4

Yesu na raurubuma (Mk 1:12-13; Lk 4:1-13)

¹ Dabudine Arua Babau Yesu yai doka nawena dobu kavakavane da Diaboro sibo Yesu ya raurubuna. ² Yesu dabudine ya widinana, kupy da suara raġan 40 a kovikovina, murine tauna kani ya kara kauena. ³ Inam raġanine tauraurubu Yesu ġarone ya tava be ya riuna, “Deġoda tam Mamaitua Natunama, naumeki da uma yekudima kwa riuedi da tai rawaburedi.” ⁴ Be Yesu ya paribee be ya riuna, “Girugiruminama porane girugiruminama umanama ya riuna,

‘Banaga nam tokare burediġa na yawasanae tà mia, ibewa da Mamaitua riunama matabuna na yawasanae tà miana.’”

⁵ Dabudine Diaboro Yesu yai doka nawena Jerusalemma meagai babaune be Tempol debane a midi be ya riuena, ⁶ “Deġoda tam Mamaitua Natunama, naumeki da uma dobudine kwa kuruva, baninama Girugiruminama porane girugiruminama umanama ya riuna,

‘Mamaitua na aneama e riuporedi da tam ta rabemna. Be nimedie ta kaisuġum da nam yekue kaġamma kwai riġedi.’”

⁷ Be Yesu ya paribee be ya riuna, “Be girugiruminama porane girugiruminama mate umanama ya riuna, ‘Bada, am Mamaituama nam kwa raurubu.’”

⁸ Dabudine Diaboro Yesu yai doka nawena oya daudau kwatikwatinama debane, be dobu na waiguyauma waimata veraveraudima matabudi Yesu yai katai ⁹ be ya riuna, “Deġoda tam kwa rauduneeguna, uma yabedima matabudi tam yà utemna.”

¹⁰ Be Yesu ya paribee be ya riuna, “Kwa naġo ġavoe, Seitan. Baninama girugiruminama porane girugiruminama umanama ya riuna,

‘Bada, am Mamaituama taunaġa kwa raudunee be ġarone kwa noyana.’”

¹¹ Dabudine Diaboro Yesu ya gose be anea a dobi da Yesu a saguna.

Yesu na noyama yai karena (Mk 1:14-15; Lk 4:14-15)

¹² Rağanine Jon dibure a boru be varinama Yesu ya vaivaiena, tauna ya munağana Galilima. ¹³ Naumeki da tauna Nasaret ya gose be ya nağona Kabeniamma ya miana. Kabeniam inam yawawa dosinama diane, dobu Sebulun be Naptali nopolie. ¹⁴ Uma kauinama peroveta Aisaia aba ya riuriuena, nama ya tubuğana. Tauna umanama ya riuna, ¹⁵ “Dobu Sebulun be Naptali yawawa diane, upa Jodan murine. Tam dobumma tawai isamna Galili, be inam dabudi banaga ta miamiana taudi eteni, nam Jius.

¹⁶ Banaga aitaüğa kupie a miamiana, taudi yana dosinama a kitana.

Taudi aitaüğa guri na waikupikupie a miamiana, yodi yana rağan maika e senesenerina a kitana.”

¹⁷ Inam rağanine be nokoi ya nağona Yesu rauguguya yai kare be ya riuna, “Noğota vitara ko pa gó be ami noğotama ko vitaredi, baninama Mamaitua na waiguyauma kaiteka maida e tavatavana.”

*Yesu na tauwai muriwatanama 4 ya vine dokedina
(Mk 1:16-20; Lk 5:1-11)*

¹⁸ Yesu Galili yawawinama dianağ'a ya nağona gó rağanine, tauna tautaugoma rabui ya kitedina, Saemon awai isana Pita be tasinama Endru. Taudi tauwai sagida, aubainama adi sagidama topae a poraporağana iyana vunuğidima aubainama. ¹⁹ Dabudine Yesu ya riuedina, “Ko verau koi muriwatanegu be taugu yá voiemi da taumi banaga ko konedina.” ²⁰ Inam rağanine taudi waiğapa adi sagidama a gosağ'a be Yesu ai muriwatanena.

²¹ Naumeki da na gó yai kare munağ'e be ya nağona gó da tautaugoma ġesaudima rabui ya kitedina, Jeims be tasinama Jon taudi Sebedi natunatunama. Taudi wagae a miamiana tamedima Sebedi mate be adi sagidama a kawakawa batebatedina. Be Yesu taudi ya riuedina, “Ko verau be koi muriwatanegu.” ²² Inam rağanine taudi waiğapa waga be tamedima a gosedi be Yesu ai muriwatanena.

*Yesu banaga sidesidedima yawai yawasanidina
(Mk 1:32-39; Lk 4:40-44)*

²³ Yesu Galili nopenağ'a ya babara na gó be sinagog nopolid'a yawai katakatai, be Mamaitua na waiguyauma varinama verenama ya rarauguguya. Be tauna banaga adi sidama tabu be tabu a ragaragaudina yawai yawasanidina. ²⁴ Be Yesu varinama Siria nopena ya dabera be banaga adi sidama tabu be tabu a veraugedina Yesu ġarone. Banaga ġesaudima muya dosidima ragaragaudima, ġesaudima penama kokukokudima be banaga gağarua kokukokudima, be ġesaudima tuera ragaragaudima,

matabudi yai yawasanidina. ²⁵ Be patara dosinama Galiliġā veraveraudima, Dekapolisġa, Jerusalemġa, Judiaġa be upa Jodanma noaġo nevane dobunama banegidima mate Yesu awai muriwatanena.

5

*Yesu oya debane ya rauguguyana
(Lk 6:20-23)*

¹ Raġanine Yesu patara nama ya kitakitana, tauna ya saġa ya naġona oya debane be ya miana. Dabudine na tauwai muriwatanama ġarone a tava ² be Yesu patara waikatakataidima yai kare be ya riuna,

³ “Taumi nuemima e verena, aitaugħa nuemima tabutabune Mamaitua na saguma ko ġoeġoena, baninama taumi tokare Mamaitua na waiguyauma ko paġona.

⁴ Taumi nuemima e verena, aitaugħa ami gewagewama aubaidima ko ġabaġabana, baninama taumi tokare Mamaitua ei nuasubemina.

⁵ Taumi nuemima e verena, aitaugħa voyaġota banegimima, baninama taumi tokare dobu matabuna koi bude-riena.

⁶ Taumi nuemima e verena, aitaugħa Mamaitua matane didi-mana ko ġoeġoe be ko wanewane guratena, baninama taumi tokare ami ġoanama Mamaitua e utemina.

⁷ Taumi nuemima e verena, aitaugħa banaga taurau nuatoied-ima, baninama taumi tokare Mamaitua e raunuatoiemina.

⁸ Taumi nuemima e verena, aitaugħa nopolimma didimanidima be nam mira mate, baninama taumi tokare Mamaitua ko kitana.

⁹ Taumi nuemima e verena, aitaugħa suba tauvoienama, baninama taumi tokare Mamaitua ei kawa natunemina.

¹⁰ Taumi nuemima e verena, aitaugħa banaga ta rraukivi gewgewemina ami yawasana didimanidima aubaidima, baninama taumi tokare Mamaitua na waiguyauma ko paġona.

¹¹ “Taumi nuemima e verena, degħoda banaga ta kunuremi, ta rraukivi gewgewemi be giu tabu be tabu kaikaiyovudie tai wavumina, baninama taumi taugu kowai muriwatane-guna aubainama. ¹² Raġanine inam kauidima nama ġaromie ta tubutubuġħana, taumi koi nuavere be ko taukaina, baninama ami maesama dosinama marae e kenakenana. Banaga gesaudima boni peroveta ġarodie inam kauidima teneġidima nama a voivoiedina.

*Buta be yana wainasidima
(Mk 9:50; Lk 14:34-35)*

¹³ “Banaga adi butama inam taumi. Be deḡoda buta* dininama e gewagewana, nema kwa voia bake da e dini munaḡa? Inam butanama kaite ya gewagewana, be banaga tokare inam butanama ta porekaiyati be ta vagudagudana.

(Mk 4:21; Lk 11:33)

¹⁴ “Banaga adi kodamma inam taumi. Be uma ko noḡoti, meagai oya debane nam ei moisiri be teneteneḡina, ¹⁵ be banaga nam kodam ei rageti be gurewa dibune e boru ibewa, tauna kodam ġavoe e boru da vada nopone banaga matabudi ei yanedina. ¹⁶ Inam kauinama teneġinama nama, taumi banaga ġarodie nama sibo koya yanana. Inam raġanine taudi ami voiama veredima ta kitedi, be Tamemima marae isanama ta kawa saġena.

Tarawatu na giuma

¹⁷ “Taugu è verauna nam ko noḡoti da Mousis na tarawatuma be peroveta adi waikatakataima yà kawa gewegewedi, ibewa. Taugu nam yabedima kawa gewegewedima aubaidima è verauna, ibewa. Taugu è verauna tarawatu banidima yai maġtaridina aubainama. ¹⁸ Yà riuriu kauemina da nam ai tarawatu tenaġa maika e samoa yababa, ibewa da noġone tarawatu aba ya giuguedina, matabudi ta tubuġana. Yodibe mara be dobu ta samoana. ¹⁹ Tam aitau deḡoda tarawatu avedi da ġauba kokonama kwa kita tuatuaġiae be kwawai kati kotovina, be inam kedane nama am banagama kwawai katakataidina, tam tokare Mamaitua na waiguyauma nopone ta kita poremna. Be tam aitau tarawatu kwa voteyeteyedi be inam kedane nama banaga kwawai katakataidina, tam tokare Mamaitua na waiguyauma nopone ta kita saġemna. ²⁰ Be yà riuriuemina, ami yawasanama Mamaitua matane ko kawa didimana kauedina, be taumi nam Parisi be tarawatu tauwai katakataidina maika ko voia. Taudi adi yawasanama tà kitekitedina da kabe banaga veredi be nopolima gewagewa ya moġavu. Deḡoda taudi maika ko voiana, taumi tokare nam Mamaitua na waiguyauma nopone ko saġa.

Rauvunuġa na giuma

²¹ “Taumi koya vaie da boni Mamaitua ya riuna, ‘Nam kwa rauvunuġa. Be aitau da banaga ei gurina, tauna tokare ta etarena.’ ²² Be taugu yodi yà riuriuemina da tam aitau turamma ġarone nuama ei medina tam tokare ta etaremna. Be tam aitau da turamma kuya riuwai gewana tam tokare etara dosine kwa midina. Be deḡoda tam aitau

* **5:13:** Buta inam soriti.

turamma kuyai tara tautauena, tam inam gienae kai matane nāgonama kwawai rabena.

²³ “Vutuna aubainama tam dēgoda am puyoma oltae kuya veraugēna Mamaitua puyonama aubainama, be dabudine kuya nōgoti da turamma mate poumie gewagewa e kenakenana, ²⁴ naumeki da am puyoma olta diane kwa gose, be kwa munāga da nōgone turamma mate inam gewagewanama ko kawa didimani dokena. Yodibe kwa verau munāga da am puyoma Mamaitua kwa utena. ²⁵ Dēgoda banaga aitau tam e nawemna etara aubainama, naumeki da kedae dabudine am gewagewama kwa kawa didimana makaiena, da nam etara tauwai badenama nimane e borum. Baninama etara tauwai badenama tauna tokare porisiman nimane e borum be porisiman tauna tokare e nawemna dibure. ²⁶ Be yà riuriu kauemna da tam dibure kwa miana, naumeki da mane damodamonama kwai maesa āvutina.

Monāgemma debane nam mui kwa pore

²⁷ “Taumi koya vaie da boni Mamaitua ya riuna, ‘Nam monāgemma debane mui kwa pore.’ ²⁸ Be taugu yodi yà riuriuemina, tam aitau da aba waivinama kuya kita waidinidinina, tam inam kaite nuamma nopone gewagewa kwa voivoiena, be monāgemma debane mui kwa poreporena. ²⁹ Dēgoda matamma kasaunama e kauem da gewagewa kwa voivoiena, naumeki da kwa kunavai be kwa porekaiyatina. Verenama da matamma tenāga mate mara nopone kwa sāgana, be nam matamma rabui mate, da Mamaitua gienae e pore nawemna. ³⁰ Be dēgoda nimamma kasaunama e kauem da gewagewa kwa voienna, naumeki da kwa tom pore be kwa porekaiyatina. Verenama da nimamma tenāga mate mara nopone kwa sāgana, be nam nimamma rabui mate, da Mamaitua gienae e pore nawemna.

Waigosāga na giuma

³¹ “Taumi koya vaie da boni Mamaitua ya riuna, ‘Aitau na visarama gosenama e āgoena, naumeki da tauna waigosāga pepanama na visarama sibo ya utena.’ ³² Be taugu yodi yà riuriuemina dēgoda tam aitau am visarama kwa gose yababena, avedi da tauna nam ai taūgomā mate gewagewa ti voienna, tam inam am visarama kwa voivoiena da tauna tokare gewagewa ei tubugi, be tam debame mui e porena. Be tam aitau da inam waivinama gosegosenama kwa nāgina, tam inam kwa raraū waivina.

Saugawapa na giuma

³³ “Be mate koya vaie da boni Mamaitua ya riuna, ‘Dēgoda Bada isane kuya sauga wapana, naumeki da kwa voienna.’

³⁴ Be taugu yodi yà riuriuemina, nam aiyaba isane ko sauga wapa. Nam mara isane, baninama inam Mamaitua na kaba miama, ³⁵ be nam dobu isane, baninama inam Mamaitua na kaba waivutuğama, be nam Jerusalem isane, baninama inam guyau dosinama na meagaima. ³⁶ Be mate nam iwakidumie ko sauga wapa, baninama tam nam teneteneğina da deba vuvuğimma kwa kawa duba bo kwa kawa yaguni. ³⁷ Vutuna aubainama tam değoda waianina, naumeki da kwai anina ġomana. Be tam değoda tuağai, naumeki da kwa tuağai ġomana. Be değoda giu ġesaudima nama kitedima mate kwa vatodina, inam gewagewa bani-nama inam Seitan na voiama nama.

*Raubiwa na giuma
(Lk 6:27-36)*

³⁸ “Taumi koya vaie da boni Mamaitua ya riuna, ‘Değoda turamma matamma e kunavaina, naumeki da tam mate tauna matanama kwa kunavaina. Be turamma mokamma ei mia kotovina, naumeki da tam mate tauna mokanama kwai mia kotovina.’ ³⁹ Be taugu yodi yà riuriuemina, gewagewa baneginama aba ġarome ya voia waigewana, nam kwai ġare. Değoda aitau nevakaumma e riğana, kwa gose da nevakauma ġesaunama mate e riğana. ⁴⁰ Değoda aitau e etaetarem be am kwamama e pağona, naumeki da am rupuma mate kwa utena! ⁴¹ Değoda aitau e segerim da na taragaima sibo kuya kiroğla da koya nağó değ parata ya boruborue sibo kuya tavana,[†] be tam inam paratinama ya boruboruna, kwai muri be tauna mate ko nağó be wari madanie kwa gosena. ⁴² Aitau aiyaba ġarome ei bağena, naumeki da kwa utena be nam kwa riutuağae.

Ami ġaviamma koi nuapağgoedina

⁴³ “Taumi koya vaie da boni Mamaitua ya riuna, ‘Turamma turamma nuamma e pağona.’ Be banaga ġesaudima a riuriuna, am ġaviamma kwa tuağaiena. ⁴⁴ Be taugu yodi yà riuriuemina da ami ġaviamma mate nuemima e pağona, be aitaüğla ta raraukivi gewegewemina aubaidima ko moiragina, ⁴⁵ inam kedane taumi riukaua Tamemima marae natunatunama. Baninama tauna suara be kusana e riuriupore yovoğena banaga veredi be gewegewedima matabudi aubaidima. ⁴⁶ Değoda taumi aitaüğla tawai nuapağoemina taudiğla koi nuapağgoedina, tokare maesa ko banavi, bo? Ibewa, inam damone nam aba. Baninama gewagewa banegidima taudi mate nama ta voivoiana. ⁴⁷ Be değoda am damma banegidima taudiğla kwai kaiwedina, inam kwa

[†] 5:41: Gurik bonane ya riuna: ‘One mile’ kwa gose be ‘two miles’ kwa pağona.

voivoiena na verema aba? Banaga nam waisumeğidi mate nama ta voivoiana.⁴⁸ Taumi ami yawasanama verene be didimanine ko miana maika tamemima marae.

6

Pairu na giuma

¹ “Ko kita kaua da voia veredima ko voivoiedina, nam patara matedie ko voiedi da taudi sibo a kitemi. Değoda nama ko voiana, tokare nam maesa tamemima marae ġarone ko paġo. ² Vutuna aubainama değoda waikaruwaġawaġa baneginama ko pairuena, nam bogigi ko suve da banaga ta kataie be isamma ta kawa saġe. Inam banaga kaikaiyovudima adi voiama, taudi sinagog nopolie be doġae patara matedie nama ta voivoiana. Taugu ya riu kauemina da inam nama banegidima taudi adi maesama naumeki ta paġopaqona. ³ Be tam değoda banaga waikaruwaġawaġanama kwa paipairuena, naumeki da nam aitau diame e kataie.* ⁴ Be am pairuma moisirie kwa voienna. Inam raġanine Tamamma marae e kitam da tam aba moisirie kwa voivoiena, naumeki da tauna tokare am maesama e utemna.

Moiragi na waikatakataima

(Lk 11:1-4)

⁵ “Raġanine kwa moimoiragina, nam banaga kaikaiyovudima maika kwa moiragi, baninama taudi adi ġoana kauama inam sinagog nopolie ta midi bo keda poudie dego banaga toitoi adi kaba babare, dabudine ta midi be ta moimoiragina da banaga kabe ta kitedi. Taugu ya riu kauemina da inam nama banegidima taudi adi maesama naumeki ta paġopaqona. ⁶ Be tam raġanine moiragi kwa ġoena, naumeki da kwa naġo am vadae, matakedha kwa gudu be Tamamma Mamaitua miamia moisirinama ġarone kwa moiragina. Inam raġanine Tamamma Mamaitua aba moisirie kwa voivoiena e kitana, be tauna tokare am maesama e utemna.

⁷ “Be ko moimoiragina raġanine, nam giu kavekavedie ami moiragima debane koi poto yababedi, banaga nam waisumeğidima adi voiama maika. Taudi tawai noġotona da kabe adi moiragie giu tai potodi be Mamaitua adi moiragima kabe e paġo. ⁸ Nam inam banegidima maika ko voia, baninama taumi Tamemima Mamaitua ami ġoanama kaite ya katai dokedina, muriġa da kowai baġana.

⁹ “Taumi sibo umanama koya moiragina:

* **6:3:** Gurik bonane ya riuna: Nimamma kasaunama e paipairuna, nima seninama nam e kataie da nima kasaunama aba e voivoiena.

Tamamaima marae miemienimma, dobu matabuna isamma babaunama sibo a vivirena.

¹⁰ Tam am waibadama sibo ya verau. Be kwa sagumai da am ġoanama dobue ka voie, maika marae ta voivoiana nama.

¹¹ Ama kanima raġan patapatanama sibo kuya utemai.

¹² Be ama gewagewama kwa noġota poredi, nema tauma ama banagama adi gewagewama kè noġota poredina nama.

¹³ Be nam raurubue kwai dokemai. Tauma gewagewa nopone be tam kwai yawasanimaina.[†]

¹⁴ “Be deġoda taumi ami banagama adi gewagewama ko noġota poredina, naumeki da Tamemima marae taumi mate ami gewagewama e noġota poredina. ¹⁵ Be deġoda taumi ami banagama adi gewagewama nam ko noġota poredi, naumeki da Tamemima marae mate ami gewagewama nam e noġota poredi.

Widina na giuma

¹⁶ “Raġanine ko widiwidinana, nam banaga kaikaiyovudima maika ami widinama patare koi maġataridi da banaga ta kitemi da taumi ko widiwidinana. Taudi ta raugari be ta midimidi naġona kabe banaga ta kitedi. Taugu yà riuriu kauemina da inam nama banegidima taudi adi maesama naumeki ta paġopāġona. ¹⁷ Be taumi ko widiwidinana raġanine, ko sigu be noġomima ko buyodi ¹⁸ be ko voie da banaga matedie taumi kabe nam ko widiwidina. Be Tamemima miamia moisirinama taunaġa e kitemi da taumi ko widiwidinana. Inam raġanine Tamemima Mamaitua aba moisirie ko voivoiena e kitana, be tauna tokare ami maesama e utemina.

Marae sibo koyai taragaina

(Lk 12:33-34)

¹⁹ “Nam ami taragaima dobue kowai damdi, baninama deġoda kwarikwari ta kanidi, bo ta raibusabusaġa bo banaga vadae ta sonaġa ta saġa be ta danenedina. ²⁰ Vutuna aubainama marae koi taragaina, baninama inam dabudine tokare nam ami taragaima kwarikwari ta kanidi bo ta raibusabusaġa bo banaga vadae ta sonaġa ta saġa be ta danenedi. ²¹ Baninama ami taragaima deġo dabudine ta kenakenana, taumi tokare ami noġota be nuemima tabutabunama dabudine e kenana.

(Lk 11:34-36)

[†] **6:13:** Gurik baibol ġesaudimä nopolie umanama a girumina: Baninama tam vutuna ġarome waiguyau, rewapani be neneġara ta kena nonoġana. Inam riukaua.

²² “Matamma inam tunimma na kodamma. Değoda matamma verenama, naumeki tunimma matabuna yanayananama. ²³ Be değoda matamma e gewagewana, naumeki da tunimma matabuna ei kupikupina. Be değoda yana nopome ei kupikupina, o ebom, inam tadiwanawana ya moraba kauana.

²⁴ “Nam aitau babada rabui ġarodie ei yaraga. Değoda nama e voiana, naumeki da noğone badanama e tuağαιe be muriğä badanama e ġoena; bo noğone badanama e ġoe be muriğä badanama e tuağaiena. Taumi nam mane be Mamaitua ġarodie koi yaraga be teneteneğina, ibewa!

Nam koi nuaboya

(Lk 12:22-31)

²⁵ “Taugu yà riuriuemina da yawasana tubuğe aubainama nam koi nuaboya da aba sibo koya kani bo koya tego. Be nam koi nuaboya da aba sibo koya kote tunimima aubainama. Baninama yawasana noğotinama ya moraba vavasağana, nam maika kani. Be tunimima noğotinama ya moraba vavasağana, nam maika gara. ²⁶ Kiu gunume ta rovorovona ko noğotidi! Taudi nam tima sipisipina, be nam kani timawai damna. Be yağoro tamemima marae ewai kanidina. Be taumi noğotimima ya moraba vavasağana, nam maika kiu. ²⁷ Taumi inam yabedima kowai nuaboyedina, tokare tai yawasanimi, bo?

²⁸ “Aba aubainama gara kowai nuaboyedi? Nanari ko kitedi dobire ta gogogogona. Taudi nam tima noyanoyana, be gara nam tima voivoiedina. ²⁹ Be taugu yà riuriuemina, avedi da guyau Solomon na garama veredima waimatakanikanidima, be nam ai gara tenağä i vere vavasağana maika nanari. ³⁰ Mamaitua berana e voiedi be ta busobusona kitedima a vere kauana. Be inam beranidima pomai tokare kai e kara gorudina. Be taumi noğotimima inam ya moraba kauana Mamaitua ġarone, nam maika berana. Vutuna aubainama Mamaitua tokare teneteneğinama ei garemina, be taumi naumeki da koi sumağana be nam ami noğotama e vobekubeku.

³¹ “Be nam koi nuaboya be ko riuna, ‘Aiyaba tà kani?’, bo ‘Aiyaba tà tego?’, bo ‘Aiyaba tà kote?’ ³² Banaga nam waisumeğidi taudi inam yabedima tawai nuaboya kauedina. Be taumi Tamemima marae ya kataie da inam yabedima ko ġoegoedina. ³³ Be taumi ko kita da noğone Mamaitua na waiguyauma be didimana kededima ko wana dokedi. Yodibe tauna inam yabedima matabudi tokare e utemina.

³⁴ Vutuna aubainama nam pomai na kauama yodi koi nu-aboye. Pomai ko gose da taunağɑ ei nuaboya munağena. Rağan tenatenağɑğɑ adi nuaboyama nama ta kenakenana.

7

Nam koi wavu (Lk 6:37-42)

¹ “Nam turamma na yawasanama kwa kita wairuva be kwa riutuatuğae da Mamaitua tokare teneğinama nama ġarome e voiena. ² Baninama tam nema banaga kwa kitakita wairuvana, teneğinama nama Mamaitua tam tokare e kita wairuvamna. Tam aba ruvane turamma kwa ruvaruvana, ruvanama teneğine Mamaitua tokare tam e ruvamna. ³ Aba aubainama turamma matane vunavuna kwa kitakita be tam matame kaitupo nam kuma kitakita? ⁴ Bo aba aubainama tam matame kaitupo nam ku kaipore, be turamma matane vunavuna kaiporenama kwa riuriue? ⁵ Tam banaga kaikaiyovumma! Nogone tam matame kaitupo kwa kaipore doke da kwai kita kaua, yodibe turamma matane vunavuna kwa kaiporena.

⁶ “Yaba babaudima ġaromie nam dağadağası ko utedi. Be ami posaruma nam bawa ko utedi, değoda taudi inam yabedima ta vagudegudedi be tai tauvitaredi da taumi bogemie ta dawena.

Aba ko ġoena, Mamaitua koi bağana (Lk 11:5-13)

⁷ “Koi bağɑ be e utemina, ko wane be ko banavina, ko raupewapewa be e kaiporena ġaromie. ⁸ Değoda aitau ewai bağana, tokare e pağona, be aitau e wanewanena, tokare e banavina, be aitau e raraу pewapewana, tokare ġarone e kaiporena. ⁹ Nam aitau tam natumma kani ewai bağe be tokare yeku kwa ute. ¹⁰ Be nam aitau tam natumma iyana ewai bağe be tokare mota kwa ute. ¹¹ Yodi avedi da taumi banaga gewegewemima, be yağoro yaba veredima natatumima ko uteutedina. Naumeki da tamemima marae tauna teneteneğinama taumi aitauğɑ kowai bağana, tokare yaba veredima e utemina. Baninama tauna kivinama ya vere vavasağana, nam maika taumi.

¹² “Taumi aba ko ġoeğoenɑ banaga sibo ġaromie a voiena, nama taumi banaga ġarodie ko voiana. Değoda nama ko voiana, taumi inam tarawatu be peroveta adi waikatakataima ko vovo teyeteyedina.

Keda rabui

¹³ “Keda matakedanama ġuririne ko sonağana, baninama gewagewa kedanama inam nuasabunama

be matakedanama dosinama, be banaga toitoi inam matakedane ta sağɑ be kedanama ta watawatanina. ¹⁴ Be yawasana kedanama ya ġaubo be matakedanama ya ġuriri kauana, be banaga raubisağɑ inam matakedanama ta banavi be ta watawatanina.

Peroveta kaikaiyovudima

(Lk 6:43-45)

¹⁵ “Peroveta kaikaiyovudima ko kita kauedina. Taudi ġaromie ta tavana kitedima kabe banaga vovoyaġotidi, be ibewa da taudi nopolidima inam tabei maika. ¹⁶ Peroveta adi yawasanama ko kita wairuvedi da taudi peroveta veredi, bo gewegewedi. Baninama banaga nam tokare damaya votanama yaguru bogane e ragaudi be teneteneğina. Be nam aitau mabeko votanama gedara bogane e ragaudi be teneteneğina. ¹⁷ Be teneğinama nama kai vere-nama votanama inam verenama, be kai gewagewanama votanama inam gewagewanama. ¹⁸ Kai verenama votanama nam gewegewedi, be kai gewagewanama votanama nam veredi. ¹⁹ Be ai kaiğɑ banidima nam veredi, taudi matabudi tokare Mamaitua e tarāğɑ be e gabu gorudina. ²⁰ Inam kauinama teneğine peroveta adi yawasanama ko kita wairuvedi be ko kataiedi da taudi peroveta veredi bo peroveta kaikaiyovudi.

(Lk 6:46-49)

²¹ “Banaga toitoi ta riuriueguna, ‘Bada, Bada’, be nam tokare matabudi Mamaitua na waiguyaue ta sağɑ. Ibewa da aitaüğɑ Tamaguma marae na ġoanama ta voivoiena, taudi vutudi tokare Mamaitua na waiguyaue ta sağɑna. ²² Inam rağanine banaga toitoi tokare ta riueguna, ‘Bada, tauma tam isame kè rarauguguya, be tam isame penama kè tavutavu dobiğedi be mataira dosidima toitoi kè voivoedina.’ ²³ Be taugu tokare ya riuedina, ‘Taugu taumi nam airağan e kataiemina. Taumi tarawatu tauwai katikotovidima, ko nağō ġavoe.’

Vada taukeridima rabui

(Lk 6:47-49)

²⁴ Vutuna aubainama, değoda aitau e verau be riuguma e vaie be e voivoiena, tauna noğota kaua baneginama maika. Tauna na vadama kerinama aubainama dom ya keri gurate da yeku debane na tuatuama yai midiri, be na vadama ya kerina. ²⁵ Be kusana dosinama kabaita mate a dobidobina rağanine, gimori a karuedina, be sive dosinama ya suve da vada ya riğɑ rereğe, be vada nam i bekuna, baninama tuatua a yovo guratana, yeku debane aubainama. ²⁶ Be aitau da e verau be riuguma e vaivaiena, be nam ima

voivoiena, tauna banaga buabuanama maika. Tauna na vadama kerinama aubainama nam dom i keri guratena, tauna na tuatuama gimori debane yai midiridi be na vadama ya kerina.²⁷ Be kusana dosinama kabaita mate a dobidobina rağanine, gimori a karuedina, be sive dosinama ya suve da vada ya riğarığana, yai mia kamogi be ya nuarikarikana.”

²⁸ Yesu na giuma ya kovikovina rağanine, patara Yesu na waikatakataima a base kauena,²⁹ baninama taudi mayanama a pa gó da tauna rewapano mate yawai katakataidina, nam tarawatu tauwai katakataidima maika.

8

*Yesu tauğoma kito pağopagónama yai yawasanina
(Mk 1:40-45; Lk 5:12-16)*

¹ Rağanine Yesu oya debane be ya yovoyovo munağana, patara dosinama ai muriwatanena. ² Dabudine tauğoma tenağ a kito pağopagónama ya verau Yesu noğone da tu-apikane ya raupari be ya riuna, “Bada değoda kwa ġoena, naumeki da kwai yawasaniguna.”

³ Naumeki da Yesu nimanama yai yoyo, da tauğoma ya taukonı be ya riuna, “Naumeki, ya ġoeğöena, kwa yawasanana.” Be inam dabudine yai rağantenağe da tauğoma kito pağopagónama ya yawasanana. ⁴ Dabudine Yesu inam tauğominama ya riuena, “Aba ġarome ya tubuğana, nam aitau kwa riue, be kwa nağō pirisi ġarone da tauna e kaiviramma. Yodibe Mamaitua kwa puyona, Mousis na tarawatuma e riuriuna nama. Dabudine banaga ta kitam be ta kataie da tam kuya yawasanana.”

*Yesu tori matanama na taunoyama yai yawasanina
(Lk 7:1-10)*

⁵ Be Yesu rağanine Kabeniamma ya tavatavana, dabudine tori matanama Yesu ġarone ya tava da yai bağ a be ya riuna, ⁶ “Bada, yau taunoyama vadae e kenakenana be tauna tuninama ai kaukudukudu be muya dosinama e kenakenana.” ⁷ Be Yesu tauna ya riuena, “Taugu mate tà nağō be yai yawasanina.” ⁸ Be dabudi tori matanama Yesu ya paribee be ya riuna, “Bada taugu nam veregu da tam yau vadae sibo kuya verau. Be bonamğ a kwa riu da yau taunoyama e yawasanana. ⁹ Taugu mate waibada dibudie ya miamiana, be mate banaga iğeigeridima yau waibadama dibune ta miamiana. Be rağanine tauığara ya riuena, ‘Kwa nağō’, be tauna e nağonağona. Bo ya riuena, ‘Kwa verau’, be tauna e veraverauna. Be yau taunoyama ya riuena, ‘Uma kwa voie’, be tauna e voivoiena.”

¹⁰ Rağanine Yesu nama ya vaivaiena, tauna tori matanama ya basena, be dabudine yai tautinamuri da patara awai muriwatanena ya riuedina, “Yà riuriu kauemina, taugu nam airağan Israelma umanama baneginama na waisumağama dosinama değō e banavi rubuna. ¹¹ Taugu yà riuemi, tokare banaga toitoi dobu matabuna nopone ta verauna, Mamaitua na waiguyauma nopone. Dabudine taudi Eibraham, Aisik be Jeikob mate ta mia be ta soi tenağana. ¹² Be banaga aitauğā noğone Mamaitua ya vinedina da na waiguyauma nopone sibo a sağana, be tokare inam banegidima ei porağā dobığedina tadiwanawana nopone. Be inam dabudine taudi tokare ta yakei be gadigadidima ta sanadididina.”

¹³ Dabudine Yesu tori matanama ya riuena, “Naumeki kwa nağō, be am waisumağama ruvane nama e tubuğana.” Inam nama ya riuriuna, tori matanama na taunoyama ya yawasana munağana.

*Yesu banaga toitoi yai yawasanidina
(Mk 1:29-34; Lk 4:38-41)*

¹⁴ Rağanine Yesu Pita na vadae ya sağasağana, dabudine Pita rawanama sida poyapoya ya pağō be ya kenakenana ya kitana. ¹⁵ Naumeki da Yesu Pita rawanama nimanama ya taukonı ġome be poyapoya yai kavena, be waivinama ya midisuğu be adi kanima ya vokaukauedina.

¹⁶ Be ravi ya tavatavana rağanine, banaga toitoi penama kokukokudima a verauğedina Yesu ġarone, be tauna bonane inam aruidima gewegewedima ya tavu dobığedina, be banaga sidesidedima mate matabudi yai yawasanidina. ¹⁷ Uma kauidima Bada boni peroveta Aisaia ġarone ya giugiuena ruvane nama ya tubuğana. Peroveta boni umanama ya riuna, “Tauna dà nuaboyama ya ragaudi be dà sidama matabudi vitanama ya kiroğidina.”

*Yesu waimuriwatanenama na piripirima
(Lk 9:57-62)*

¹⁸ Yesu patara dosinama ya kitekitedina, tauna na tauwai muriwatanama ya riuedina da wagae sibo yawawa a davu be noağō nevane a nağona. ¹⁹ Dabudine tarawatu tauwai katakatainama tenağā Yesu ġarone ya tava be ya riuena, “Tauwai katakatai, tam değō kwa nağona taugu yài muriwatanemna.” ²⁰ Be Yesu ya paribeena, “Inam naumeki be kwa noğoti da, kiudobo* adi gabuma gaure ta miamiana, be kiu adi gabuma noğie ta miamiana, be Banaga Natunama nam değō na gabu da tauna e kena.”

* **8:20:** Yesu ya riuna: ‘Fox’. Tauna dobira muserinama be gaure ta miamiana maika kiudobo.

²¹ Dabudine Yesu na tauwai muriwatanama ġesau ya tava be ya riuena, “Bada, taugu yà muriwatanemna, be noġone kwa gosegu da yà naġo tamaguma yà dobo dokena.” ²² Be Yesu ya paribeena, “Tam taugu kwai muriwataneguna, be banaga guriguridima kwa gosedi da taudiġa adi gurima ta dobodina.”

*Yesu kaibitibiti ewai badena
(Mk 4:35-41; Lk 8:22-25)*

²³ Dabudine Yesu na tauwai muriwatanama mate wagae a saġa da a naġona, ²⁴ be yawawa poune yai raġantenaġe da kaibitibiti dosinama ya tavana. Be rabama dosidima waga a riġa be upa waga nopone a saġasaġana. Be Yesu tauna ya kenakenana. ²⁵ Dabudine na tauwai muriwatanama Yesu a rawaġosori be a riuna, “Bada kwai yawasanimai, kaiteka tà monuna.” ²⁶ Be tauna ya paribeedi be ya riuna, “Aba aubainama ko nainaira? Ami waisumaġama ya ġaubo ġaġa.” Dabudine tauna ya midisuġu da sive be rabama ya riutuaġaiedi be daumora ya kena munaġana. ²⁷ Inam raġanine taudi Yesu a base be a riuna, “Uma ai banaga nama kitana? Tauna sive be rabama ta vovo teyeteyena.”

Yesu banaga rabui penama kokukokudima yai yawasanidina

(Mk 5:1-20; Lk 8:26-39)

²⁸ Raġanine taudi noaġo nevane Gerasi banegidima adi dobue a tavatavana, banaga rabui penama kokukokudima, taudi kokoagae be Yesu ġarone a dobina. Taudi ai nuanainaira kauana. ²⁹ Be taudi bonedima dosine Yesu a riuena, “Mamaitua Natunama! Tam aba ġaromiae kwa ġoeġoe? Kovoġa na raġanima tokare e tavana, be tam uma dabudine kuya verauna kwa kovoġa dokemai, bo?”

³⁰ Taudi deġo a midimidina diedie bawa netarinama dosinama a yababayabana. ³¹ Naumeki da penama Yesu ai baġa be a riuna, “Deġoda kwa tavu dobiġemaina, naumeki da kwa riupore nawemainna bawa nopolie.” ³² Dabudine Yesu penama ya riuedina, “Ko dobi ko naġo!” Dabudine penama tautaugħoma a dobi poredi da a naġona bawa nopolie. Be bawa matabudi oya boganaġa a manini yovo be yawawa nopone a naġo, be dabudine upa nopone a tonedi be a gurina. ³³ Be bawa tauyosidima taudi naira a naġo meagaie a tava, be dabudine yaba matabuna a tubutubuġana adi banagama a riuedina. ³⁴ Naumeki be banaga matabudi inam meagaine miemienidima a dobi a naġona Yesu ġarone, be taudi Yesu a riu vavasaġena da tauna inam dobunama sibo ya gose be ya naġona.

9

*Yesu banaga tuera paḡopaḡonama yai yawasanina
(Mk 2:1-12; Lk 5:16-26)*

¹ Naumeki be Yesu waga nōpone ya saḡa munaḡa da yawawa ya davu be noaḡo nevane ya naḡona Kabeniamma, na kaba miae. ² Be dabudine tautauḡoma ġesaudima turedima tuera paḡopaḡonama ma ratiratina a kiroḡa verauḡena Yesu ġarone. Be raḡanine Yesu inam tautauḡomidima adi waisumaḡama nama ya kitakitana, tauna tauḡoma tuera paḡopaḡonama ya riuena, “Taukui, nam kwai nuaboya, am gewagewama taugu è noḡota porena.”

³ Raḡanine tarawatu tauwai katakataidima inam riunama nama a vaivaiena, taudi nuedie ai nuanoḡonoḡota be a riuna, “Uma baneginama Mamaitua ewai diboḡina.” ⁴ Be Yesu inam banegidima aba awai nuanoḡonoḡotedina, ya kataiena, aubainama ya riuedina, “Aba aubainama inam noḡotidima gewegewedima nopomie ta saḡasaḡa? ⁵ Aba riunama ya tekateka, ‘Am gewagewama è noḡota porena’, bo ‘Kwa midisuḡu be kwa naḡo?’ ⁶ Yodi tokare yài kataimi be ko kataie da dobue Banaga Natunama ġarone rewapanana e kenakenana da gewagewa e noḡota poredina.” Naumeki da Yesu inam tauḡominama tuera paḡopaḡonama ya riuena, “Kwa midisuḡu, am gunima kwa paḡo be kwa naḡona am vadae.”

⁷ Inam raḡanine tauḡoma ya midisuḡu be ya munaḡana na vadae. ⁸ Dabudine patara inam kauinama a kitakitana, taudi a basena, baninama Mamaitua inam nama rewapaninama banaga ya utena, vutuna aubainama taudi Mamaitua isanama a kaisuḡusuḡuna.

*Yesu Metiu ya vinena
(Mk 2:13-17; Lk 5:27-32)*

⁹ Yesu inam gabunama ya gose da ya naḡonaḡo be tauḡoma isanama Metiu ya kitana. Metiu tauna teks na kaba tamima gabune ya miamiana. Be Yesu tauna ya riuena, “Kwai muriwatanegu!” Dabudine Metiu ya midisuḡu be Yesu yai muriwatanena.

¹⁰ Naumeki da inam kupine Yesu na tauwai muriwatanama mate a naḡona Metiu na vadae kani aubainama. Be inam vadane gewagewa banegidi be teks tautaminama toitoi a tava be matabudi a kani tenaḡana. ¹¹ Dabudine Parisi ta kitana be Yesu gewagewa banegidima mate a kanikanina, naumeki da taudi Yesu na tauwai muriwatanama a riuedina, “Aba aubainama ami tauwai katakataima teks tautamidima be gewagewa banegidima mate ta kanikani tenaḡa?”

¹² Rağanine Yesu nama ya vaivaiena, tauna ya riuna, “Banaga yawayawasanidima taudi nam dogeta tima ġoeġoena, be banaga sidesidedima taudi dogeta ta ġoeġoena. ¹³ Be ko naġo da giu uma baninama ko wanena aba ya giue, ‘Taugu raunuatoi kitanama yà ġoeġoena, be taumi musare ko tipatipana taugu nam ama ġoeġoena.’ Baninama taugu è yovona banaga gewegewedima waiyawasanidima aubainama. Be aitaūga ta noġonogoti da taudi banaga veredima, taugu nam taudi aubaidima e yovona.”

Widina waitaravirana
(Mk 2:18-22; Lk 5:33-39)

¹⁴ Raġan tenaġa Jon tauwai babataito na tauwai muriwatanama Yesu ġarone a tava be a riuena, “Aba aubainama tasma be Parisi ka widiwidina, be tam am tauwai muriwatanama nam tima widiwidinana?” ¹⁵ Be Yesu ya paribeedi be ya riuedina, “Raġanine naġivau tauġominama yaġoro naġi soine e miāmiana, nam ko voie da na banagama ta widina yababa. Be raġan e tavana da naġivau tauġominama ta nawena. Inam raġanine na banagama tokare tai nuaboya be ta widinana.”

¹⁶ Nam aitau gara vaunama e paġo be e naġo gara poranama mate e popo tenaġedi. Baninama gara vaunama tokare gara poranama e sorusika be e kawa gewagewana. ¹⁷ Be mate banaga nam tokare waen vaunama ta paġo, be waen koukounama porane ta ġini. Deġoda nama ta voiana, waen vaunama tokare koukou poranama e surasari be waen e rauġinina. Be waen koukounama tokare e gewagewana. Waen vaunama tauna naumeki da waen koukounama vaune ta ġinina. Inam raġanine waen vauna be waen koukounama vaunama tokare veredima nama ta kenana.

Yesu gomana waivinama gurigurinama yai yawasanina
(Mk 5:21-43; Lk 8:40-56)

¹⁸ Yesu inam yabedima ya giuguedina maika, sinagog tauwai badenama tenaġa ya verauna tauna ġarone. Tauna ya verau Yesu noġone be tuapikane doġae ya raupari be ya riuna, “Taugu natuguma waivinama yodi ya gurina. Vutuna aubainama tam sibo kuya verau da nimamma tauna debane kuya boru be tauna ya yawasana munaġana.” ¹⁹ Naumeki da Yesu na tauwai muriwatanama mate a midisuġu be inam tauġominama mate a naġona tauna na vadae.

²⁰⁻²¹ Taudi a naġonaġo kedae be waivi waikosinavutuvutu paġopaġonama Yesu murine ya tava be Yesu na garama ya taukonni be yai nuanoġonogota be ya riuna, “Deġoda Yesu na garaġama isunaġa yà taukonina, taugu tokare yà yawasana

munağana.” Uma waivinama tauna waikosinavutuvutu ya pağona, naumeki da modi 12 a kovina. ²² Dabudine Yesu yai tauvitare da waivinama ya kita be ya riuena, “Moumou, nam kwai nuaboya, am waisumağama yai yawasanima.” Naumeki da inam dabudine waivinama ya yawasanana. ²³ Be rağanine Yesu sinagog tauwai badenama na vadae ya sağasağana, dabudine banaga saree a ġabağaba nuanuaina, be patara dosinama ya kitedina.

²⁴ Be Yesu ya riuedina, “Ko dobi doğae matabumi. Gomana nam i gurina, tauna e kenakena ġomana.” Dabudine patara nama a vaivaiena, taudi Yesu ai kwatekwatevena. ²⁵ Be rağanine ya riuedi da doğae a dobidozirovona murine, Yesu ya sağā vada nopone da gomana nimane ya pağō be gomana ya midisuguna. ²⁶ Inam kauinama ya tubutubuğana, vari-nama ya daberara be inam dobunama matabuna ya pağō rovona.

*Yesu banaga matapotepeṭedima rabui be gumgum tenağā
yai yawasanidina*

(Mk 8:22-26; 10:46-52; Lk 18:35-43)

²⁷ Naumeki da Yesu inam vadana ya gose pore da ya nağonağō be tautauğoma rabui matapotepeṭedima tauna ai muriwatane, a yogo be a riuriuna, “Guyau Deivid natunama, kwa raunuatoiemai!” ²⁸ Rağanine Yesu ya nağō vada nopone ya sağasağana, inam tautauğomidima mate a sağana. Dabudine Yesu yai taraviredina, “Taumi naumeki kowai sumağā bo, da taugu tokare yà voiemi da koi kita munağā?” Be taudi a paribee be a riuna, “Bada, tauma kawai sumağana.” ²⁹ Naumeki da Yesu inam tautauğomidima matedima ya taukonidi be ya riuna, “Taumi ami waisumağama ruvane, yodi tokare koi kitana.” ³⁰ Inam rağanine taudi ai kitana. Be Yesu ya riu vavasağedi be ya riuna, “Aba ġaromie yodi ya tubuğana nam aitau ko riue!” ³¹ Be you, taudi yağoro a nağō be Yesu varinama inam dobunama matabuna nopone ai daberarina.

³² Rağanine inam tautauğomidima Yesu a gose be a nağonağona maika, banaga ġesaudima tauğoma penama kokukokunama ai doke tavaitena Yesu ġarone, be inam tauğominama tauna gumgum. ³³ Be rağanine Yesu inam tauğominama nopone penama ya tavutavu dobiğena murine, tauğoma giu yai kare munağena. Be patara dabudine inam kauinama a kitakitana, taudi a base be a riuna, “Uma kauinama Israel nopone nam nama dà kaba kita, be yodi tè kitana.” ³⁴ Be Parisi a riuna, “Inam penama adi badama tauna rewapani Yesu ya utena. Vutuna aubainama tauna penama e tavutavu dobiğedina.”

Taunoya a rabuina

³⁵ Yesu ya naōo taoniā, be meagai matabudi nōpodiā ba-naga adi sinagogma nōpodie, be Mamaitua na waiguyauma varinama verenama ya rarauguguyena, be banaga yawai katakataidina. Be mate banaga adi sidama tabu be tabu a veraveraugedina tauna ġarone, be matabudi yawai yawasandina.

³⁶ Be raġanine Yesu patara nama ya kitekitedina, tauna ya raunuatoi kauedina. Baninama taudi adi nuaboyama inam a toi rereġena be nam ti kataiena aikedae sibo a naōo be sagu a paōo. Taudi inam maika kabe sipu nam taurabedima mate ti miamia. ³⁷ Dabudine Yesu na tauwai muriwatanama ya riuedina, “Sipi nōpone maura dosinama ya nonoā be e kenakenana, be taunoya a rabuina. ³⁸ Vutuna aubainama Bada, tauna vutuna sipi taupakinama koi baāa da taunoya e riuporaġa be tauna na sipie ta noyana.”

10

Yesu na apasolma 12 ya riuporedina

(Mk 3:13-19; Lk 6:12-16)

¹ Inam raġanine Yesu na tauwai muriwatanama 12 ya rawateġeidi be rewapanan ya utedina da taudi arua gewegewedima ta tavu dobiġedi be sida tabu be tabu tai yawasanidina. ² Apasol 12 isedima inam umanama,

Saemon, tauna vutuna ya vine dokena, awai isana ‘Pita’,
be tasinama Endru,

da Jeims, Sebedi natunama

be tasinama Jon,

³ da Pilip

be Batolomiu,

da Tomas

be Metiu teks tautaminama,

da Jeims, tauna Alpius natunama,

be Tadeas,

⁴ da Saemon tauna awai isana ‘Selot’,

be Judas Iskariot, tauna vutuna Yesu tauboru dobiġenama.

⁵⁻⁶ Inam tautaugomidima 12 Yesu ya riuporedi be umanama ya riuedina, “Israel banegidima ġarodiā ko naġona, baninama taudi sipu kwakokwakodima maika ta miamiana. Be nam banaga ġesaudima ġarodie ko naōo maika Samaria adi meagaie, bo dobu ġesaudie. ⁷ Ko naġonaġona raġanine taumi uma varinama ko rauguguyena, ‘Mamaitua na waiguyauma kaiteka maida.’ ⁸ Be banaga sidesidedima koi yawasanidi, guriguridima ko kawa midisuġudi, banaga kito ragaragaudima koi yawasanidi, be penama banaga a kokukokudina ko tavu dobiġedina. Uma rewapanidima yà

uteute yababemina, aubainama taumi banaga koi yawasana yababedina. ⁹ Ami vaḡaie nam mane ko paḡo, ¹⁰ nam tana, nam rupu ġesau mate ko paḡo, nam kaḡasuma, be nam dīgona. Taumi yau taunoyama aubainama banaga tokare yaba matabudi ta voiedina aubaimima.

¹¹ “Raḡanine taumi meagaie ko tavatavana, dabudine ko kita da banaga kaua ġarone ko miana, naumeki da inam meagainama ko gosena. ¹² Raḡanine taumi vadae ko saḡana, koi kaiwa be ko riuna, ‘Suba ġaromie e kenana’. ¹³ Be banaga dabudine tai aninemina, naumeki da ami subama ġarodie e kenana. Be deḡoda ibewa, ami subama ko paḡo munaḡena. ¹⁴ Be deḡoda banaga nam tai aninemi be ami giūma nam ta vaie, naumeki da kaḡemima popokaudima ko rawakurukuruvidi be inam vadana bo meagainama ko gosena. ¹⁵ Taugu yà riuriu kauemina da maraetara raḡanine Mamaitua tokare inam banegidima e kovoḡa vavasaḡedina, nam maika Sodom be Gomora.

Piripiri raḡandie ami waisumäge ko midi da bagibaginaḡa (Mk 13:9-13; Lk 21:12-17)

¹⁶ “Taugu yà riuriupore nawemina maika sипу, musara ḡasiḡasidima nopolie. Vutuna aubainama ko vora kaua da gewagewa nam e taukonimi be mate ko voyaḡota kaua da yawasana miremiredima nam ko voiedi. ¹⁷ Be banaga ko kita kauedina, baninama taudi tokare tauetara nimedie ta biri nawemi be sinagog nopolie ta kwapumina. ¹⁸ Taudi tokare ta soru nawemina gabegabeman be guyaguyau dosidima noḡodie taugu kau taiye. Be dabudine taudi ġarodie be banaga matabudi ġarodie taumi taugu aubaiguma koi matamatana. ¹⁹ Be ta panimina raḡanine, nam koi nuaboya da nema sibo koya giu bako. Mamaitua tauna tokare giu ei kataimi da nema ko giu bakona. ²⁰ Baninama inam raḡanine tokare nam taumi ko giu, ibewa da Tamemima marae Aruinama tauna giu e utemi be ko giuna.

²¹ “Inam raḡanine tautauḡoma tasitasidima bo tuatuaḡedima ta biri dobiḡedi da banaga taudi tai guridina, be dosi kauinama teneḡinama adi sedama ġarodie ta kauena, be seda nama adi dosima tai ġaviedi be ta voiedi da gurie ta biridina. ²² Be banaga matabudi ta tuaḡaiemina, baninama taumi taugu kowai sumaḡeguna aubainama. Be aitau na waisumäge e midi bagibagi be e raudamoena, tauna tokare e yawasanana. ²³ Deḡo meagaine ta raukivi gewegewemina, naumeki da inam meagainama ko gose, be warī meagaie ko naḡona. Be yà riuriu kauemina da taumi muriḡa da sibo Israel meagaidima nopolie ami noyama sibo koyai kovina, be Banaga Natunama tokare e verauna.

²⁴ “Banaga aitaūgā ta girugirumana nam adi tauwai katakataima ta saḡā pore, be nama taunoya na badama nam e saḡā pore. ²⁵ Be banaga girugiruminama na tauwai katakataima e ruvana, inam naumeki. Be kauinama teneğinama nama taunoya, tauna na badama e ruvana, inam naumeki. Vutuna aubainama, deḡoda banaga vada taupakinama tai wavu be ta riuna da tauna penama adi guyuma Belsebul, naumeki da taumi vadanaama banegimima tokare inam riunama teneğinama nama ta riuemina. ²⁶ Be inam banegidima nam ko nairedi. Be raḡan e veraverauna e tavana raḡanine, yaba matabudi semosemodina tokare ta maḡatarana. Be yaba waimoisirie kenekenedima matabudi tokare patare tai maḡataridina. ²⁷ Be aiyaba kupie yà riuriuemina, taumi tokare suare ko giuedina, be taugu aiyaba waimoisirie beemie yà kasavena, tokare bonemima dosine patare ko giue be banaga matabudi ta vaiena.

²⁸ “Banaga tubuḡā taunaḡā tauwai gurinama nam ko nairedi, baninama taudi tokare nam teneteneḡina da aruimima tai guridi. Mamaitua tauna vutuna ko nairena, baninama tauna deḡoda e ḡoena, tokare teneğinama da tubuḡimima be aruimima ei guri tenaḡedina gienae. ²⁹ Uma ko noḡoti, kiu ḡauḡaubodima rabui maesidima 10 Toea, be Tamemima Mamaitua tokare nam ai kiu tenaḡā e kitapore be e guri yababa. ³⁰ Be taumi deba vuvuḡimima mate e siasiava waibatena. ³¹ Vutuna aubainama nam ko naira, baninama taumi noḡotimima ya moraba kauana, nam kiu ḡauḡaubodima maika.

³² “Aitau taugu isaguma banaga matedie e kawa saḡena, naumeki da taugu tauna isanama tokare Tamaguma marae ḡarone yà kawa saḡena. ³³ Be aitau taugu e bovieguna banaga matedie, naumeki da taugu tauna tokare Tamaguma marae ḡarone yà boviena. ³⁴ Nam ko noḡoti da taugu dobue suba è verauḡena, ibewa. Taugu kea e verauḡena. ³⁵ Taugu è yovona, yà voiemi da tauḡoma natunama tauḡominama mate tai saḡasaḡana, be gomana waivinama tinanama mate tai saḡasaḡana, be visara rawanama mate tai saḡasaḡana. ³⁶ Taumi ami ḡaviamma tokare ami vadae ta tubuḡana.

³⁷ “Tam aitau da taugu kwawai nuapaḡoeguna, be yaḡoro tam tamamma be tinamma kwawai nuapaḡo guratedina, naumeki da tam nam teneteneḡina da taugu yau tauwai muriwatana. Be tam aitau da taugu kwawai nuapaḡoeguna, be am sedama kwawai nuapaḡo guratedina, naumeki da tam nam teneteneḡina da taugu yau tauwai muriwatana. ³⁸ Be

değoda aitau nam na korosima e kiroğī* be ei muriwatanegu, tauna nam teneteneğina da taugu yau tauwai muriwatana. ³⁹ Tam aitau tame am yawasanama kwa kaididi be kwa raberabena, tam tokare am yawasanama kwa kawa gewagewana, be tam aitau da taugu kautaiye am yawasanama kuyai utaena, am yawasanama tokare kwa banavina.

⁴⁰ “Aitau da taumi ewai aninemina, taugu mate ewai anineguna. Be aitau da taugu ewai anineguna, tauriuporeguma mate ewai aninena. ⁴¹ Tam aitau da peroveta kuyai aninena, baninama tauna peroveta aubainama, tam tokare peroveta adi maesama ta pağopağona ruvanama, nama tam kwa pağona. Be tam aitau da didimana baneginama kuyai aninena, baninama tauna didimana baneginama aubainama, tam tokare didimana banegidima adi maesama ta pağopağona ruvanama, nama tam kwa pağona. ⁴² Be aitau da umanama banegidima taudi banaga yababayaba, be upa kwa ute be e tegona, baninama tauna yau tauwai muriwatanama, taugu yà riuriu kauemna da tam tokare am maesama kwa pağona.”

11

Yesu be Jon tauwai babataito

(Lk 7:18-35)

¹ Rağanine Yesu na tauwai muriwatanama ¹² yawai katakatai kovidina, murine tauna inam dobunama ya gose be ya nağona Galili meagaidima nopodie waikatakatai be rauguguya aubaidima. ² Be Jon tauna dibure ya miamia be Yesu yaba ya voivoiedina varidima ya vaivaiena, naumeiki be tauna na tauwai muriwatanama ya riuporedi ³ da Yesu umanama sibo a riuena, “Tam vutuna Tauwai yawasana a riuriuemna kuya tava bo banaga ġesau ka rabe?” Be Yesu ya paribeedi be ya riuna, “Ko munaga be aba koya vaivaiedi be koya kitekitedina, vutudi Jon koi varina.

⁴ “Banaga matapotepotedima tawai kita munaga, be banaga tuera ragaragaudima ta nağonağó munaga, be banaga kito ragaragaudima ta verevere munaga, ⁵ be banaga beapotepotedima tawai beavaia munaga, be banaga guriguridima ta midimidisuğu munaga, be banaga waikaruwağewağedima vari verenama ta vaivaiena. ⁶ Be nuavere tauna aitau nam ġarogue ima noğonogota bekubekuna.”

⁷ Taudi a munamunağana rağanine, Yesu patara nopone Jon na kauama ya giuedina, “Boni dobu kavakavane koya

* **10:38:** Korosi kiroğinama inam kwai nuatoitoina, maika Yesu korosie yai nuatoitoina nama.

nāgona Jon ġarone, be aiyaba koya nōgonoġotina sibo koya kita? Banaga na waisumaġama gwaġanama maika vagara sive ya kwadikwadiena, vutuna kitanama aubainama koya nāgo? ⁸ Bo aiyaba koya nōgonoġotina sibo koya kita? Banaga gara verenama koteotenama sibo koya kita? Ibewa, banaga gara veredima kotekotedima taudi guyau na vadae ta miamiana. ⁹ Bo aiyaba koya nōgonoġotina sibo koya kita? Peroveta, bo? Ee, be yā riuriuemina, taumi peroveta dosinama koya kitana, nam peroveta ġesaudima maika. ¹⁰ Tauna vutuna girugiruminama porane girugiruminama umanama ya riuna,

'Taugu yau taunoyama yā riupore doke da am kedama e sepana, be muriġa tam.'

¹¹ "Yā riuriu kauemina da dobue nam aitau tenaġa Jon e saġa pore. Be banaga aitau Mamaitua na waiguyauma nopone e miamiana, avedi da tauna banaga yababa, be yaġoro tauna Jon ya saġa porena. ¹² Jon tauwai babataito na raġanie da yodi, banaga Mamaitua na waiguyauma awai ġavien. Be taudi a rara rubuna da taudi adi rewapanae Mamaitua na waiguyauma sibo ai badena. ¹³ Peroveta be Mousis na tarawatuma taudi matabudi awai perovetana naumeki da Jon na raġanima ya tavana. ¹⁴ Be Elaija tè raberabena, tauna vutuna yodi Jon ya tavana. ¹⁵ Deġoda beemima ta kenana, naumeki da koi beavaiana.

¹⁶ "Naumeki da, uma kimtinama yodi nema yāi ruvaruva bakedi? Taudi aiyaba maika? Taudi seda debadebae tawai digirina maika. Be taudi adi banagama mate tawai riusingaġaya be ta riuriuna, ¹⁷ 'Tauma naġi sarenama kē sare be taumi nam ko bigana, be tauma guri ġabanama kē ġaba sinasinayona, be taumi nam ko ġabana.' ¹⁸ Be banaga raġan matabuna teneġinama nama a riuriu tuatuaġaiena. Raġanine Jon ya tavana, banaga kauinama teneġinama a voivoiena. Tauna kani ya widiwidinedi be waen nam i tegotegona raġanine, banaga a riuriuna, 'Tauna nopone penama e miamiana.' ¹⁹ Be Banaga Natunama ya tava be ya kanikani, be ya tegotegona raġanine, banaga a riuriuna, 'Ko kita, tauna banaga kanikani dobidoġinama be waen tegotego dobidoġinama. Be teks tautamidima, be gewagewa tauvoiedima tauna ewai turanedina.'

"Mamaitua na noyama didimanidie tà kita be tai kawa riukaue da na nuauyauyama inam riukaua."

*Banaga nam waisumeġidi, taudi tokare kovoġa dosinama ta banavina
(Lk 10:13-16)*

²⁰ Meagai ġesaudie Yesu mataira dosidima ya voiedina be yaġoro banaga adi noġotama nam ti vitaredina. Vutuna aubainama Yesu inam meagaidima banegidima ya riuvireviredi be ya riuna,²¹ “Korasin be Betsaida meagaimima, ko kita kauana! Baninama taugu ġaromie mataira dosidima è voiedina, be taumi nam koi sumāġana. Deġoda taugu sibo meagai Taia be Saidon nopolidie uma matairidima nama dosidima sibo è voiedina, naumeki da taudi bonika sibo noġota viravira a paġo, be adi gewagewama nuaboyanama sibo a moguredina.²² Taugu yà riu kauemina da mara etara raġanine Taia be Saidon tokare kovoġa ta paġona, be taumi tokare kovoġa dosi vavasaġinama ko paġona.²³ Be taumi Kapeniam banegimima ko noġonoġotina tokare ko naġo marae, bo? Ibewa, taumi tokare Mamaitua gienae e kidipore nawemina, baninama taugu ġaromie mataira dosidima è voiedina be taumi nam koi sumāġana. Deġoda taugu Sodom meagainama nophone uma matairidima nama dosidima sibo è voiedina, taudi tokare noġota viravira a paġona, inam yodi Sodom yaġoro sibo ya kenakenana.²⁴ Taugu yà riu kauemina da mara etara raġanine Sodom banegidima tokare kovoġa ta paġona, be taumi tokare kovoġa dosi vavasaġinama ko paġona.”

*Ko verau ġarogue be ko siperena
(Lk 10:21-22)*

²⁵ Inam raġanine Yesu ya riuna, “Mamai, tam mara be dobu Badanama, yà kaisuġusuġumna baninama tam uma kauidima banaga aitauġa ta noġonoġotina da taudi kabe nuauyauya be katai banegidi, taudi ġarodie nam kui maġataridina. Be tam banaga koekoedima kitedima seda maika ġarodie kuyai maġataridina.²⁶ Naumeki Mamai, inam vutuna tam am ġoanama.

²⁷ “Tamaguma yaba matabuna ya uteguna. Be nam aitau Mamaitua Natunama i kataiena, be Tamanama taunaġa ya kataiena. Be nam aitau Tamanama i kataiena be natunama taunaġa Tamanama ya kataiena. Be natunama aitauġa ya vinevinidina, taudi ġarodie ewai maġatarana da Tamanama aitau.

²⁸ “Taumi matabumi aitauġa nuaboya be vita ko kirokiroġana, ko verau ġarogue be ko siperena.²⁹ Yau kewama isune ko kirogi be yau kedama ko kataiena, baninama taugu voyaġota be ġaubo munaġa banegiguma. Vutuna aubainama taugu ġarogue tokare sipere ko banavi, be yài nuasubemina.³⁰ Baninama yau kewama inam tekatekanama, be yau vitama nam i morabana.”

12

*Yesu tauna Sabat ewai badena
(Mk 2:23-3:6; Lk 6:1-11)*

¹ Sabat tenāga Yesu na tauwai muriwatanama mate yāgoda sipinama nopodīga a nāgonaḡona. Be na tauwai muriwatanama kani ya karatidi be taudi yāgoda a ragaudina be a kanidina. ² Be Parisi nama a kitakitana, taudi Yesu a riuenā, “Yodi kuya kita, uma yabedima Sabat nopone nam sibo koya voivoiedi, be tam am tauwai muriwatanama ta voivoiedi.” ³ Be Yesu ya paribeedi be ya riuna, “Guyau Deivid na banagama mate kani ya karatidi, be aba Deivid ya voivoiena, vutuna taumi koya sievi bo ibewa? ⁴ Tauna Mamaitua na vadae ya nāgo be buredi waiaiainidima ya ragaudi be na banagama mate a kanidina. Be tarawatu e riuriuna da inam buredidima pirisi taudīga sibo a kanikanna. ⁵ Be mate taumi tarawatu koya sievi bo ibewa da Sabat rāganine pirisi tempol nopone Sabat na tarawatuma tawai kati kotovina,* be inam nam gewagewa ti voivoiena. ⁶ Taugu yà riuriuemina banaga tenāga uma nopode tauna ya sāga vavasāḡana, nam maika tempol. ⁷ Mamaitua boni umanama ya riuna,

‘Taugu raunuatoi kitanama yà ḡoēgoena, be taumi musare ko tipatipana taugu nam ama ḡoēgoena.’

Taumi dēgoda inam giudima banidima ko kataiedina, taumi didimana banegidima tokare nam koyai wavu yababedi.

⁸ Banaga Natunama tauna Sabat ewai badena.”

⁹ Yesu nāgo yai kare munāge be banaga adi sinagogma tenāga nopone ya sāḡana. ¹⁰ Be dabudine taūgom̄a nimanama tuera pāgopaḡonama ya miamiana ya kitana. Be inam dabudine Parisi taudi Yesu waiwavunama kedanama a wanewanena da aiyabae tauna sibo Yesu ai wavuna. Vutuna aubainama taudi Yesu ai taravire be a riuna, “Tarawatu nema e riuriu bako? Sabat rāganine banaga kwai yawasanina tokare naumeki bo ibewa?” ¹¹ Be Yesu ya paribeedi be ya riuna, “Dēgoda tam aitau tenāga am sipuma Sabat rāganine dome i bekuna, tam tokare nam kuya nāgo be kuya tika tavaite, bo? ¹² Be banaga tauna nōgotinama ya moraba kauana, nam maika sipu. Vutuna aubainama Sabat rāganine naumeki da vere tà voienna.”

¹³ Dabudine Yesu inam taūgominama ya riuenā, “Nimamma kwa kawa didimani.” Naumeki da taūgom̄a nimanama ya kawa didimani be nimanama ya vere mu-

* **12:5:** Pirisi taudi Sabat na tarawatuma tawai kati kotovina, baninama taudi Sabat rāganine tempol nopone ta noyanoyana.

nağana, nimanama ġesau maika. ¹⁴ Be Parisi a dobi a na gó be Yesu kana kasirama a tomtomna da sibo ai gurina.

*Yesu tauna Mamaitua na taunoyama vinevinenama
(Mk 3:7-12; Lk 6:17-19)*

¹⁵ Be Yesu ya kataie da Parisi taudi aba a voivoiena, vutuna aubainama tauna inam gabunama ya gose be wari kedae ya nağona. Be banaga toitoi Yesu ai muriwatane be tauna banaga sidesidedima matabudi yai yawasanidina ¹⁶ be ya riu vavasağedina da taudi nam aitau sibo a riue da tauna aba banegina. ¹⁷ Uma kauidima matabudi Bada boni peroveta Aisaia ġarone aba ya giuguedina, ruvane nama a tubuğana.

Aisaia boni umanama ya riuna,

¹⁸ “Uma tauna inam taugu yau taunoyama, vutuna è vinena. Tauna vutuna nuaguma e pağopağona, be taugu yàwai nuaverena tauna ġarone.

Taugu Aruiguma nopone yà boru be tauna tokare yau wait-arapirima banaga matabuna ġarodie e rauguguyena.

¹⁹ Tauna tokare nam aitau mate tai sağasağā be e rasedi.

Tauna nam tokare kedāğā e yogoyogo babara be bonanama ta vaie.

²⁰ Be vagara viriviri kusewinama nam tokare e kotova pore.

Be kai punanama nopone e raraу karakaratana, tauna tokare nam ei tiriri gaba. Tauna nama e voiana naumeki da rağan damone dobu matabuna nopone banaga e kawa didimana rovodina.

²¹ Inam rağanine banaga dobu matabuna taudi tokare adi waisumağama tauna ġarone ta boruna.”

*Penama adi guyauma be Yesu
(Mk 3:20-30; Lk 11:14-23; 12:10)*

²² Dabudine tauğoma penama kokukokunama a verauğena Yesu ġarone. Inam tauğominama tauna gumgum be mat-apotapotanama. Be Yesu inam tauğominama yai yawasani be tauna matanama yai kita be giu yai karena. ²³ Be banaga matabudi Yesu a base be a riuna, “Agunai uma tauna guyau Deivid natuna, bo?”

²⁴ Rağanine Parisi umanama a vaivaiena, taudi a riuna, “Inam penama adi guyauma isanama Belsebul, tauna Yesu ya koku be na rewapanama Yesu ya ute da penama ġesaudima e tavutavu dobiğedina.” ²⁵ Be Yesu taudi adi noğotama ya kataiena aubainama ya riuedina, “Değoda aba waiguyaunama tauname e dariğā munağena, tokare taunağā e kawa gewagewa munağena. Be ai meagai nopone taudiğā tai kawa ġasiğası be ta dariğā munağedina, taudi tokare ta kawa gewagewa munağedina. Be ai vada nopone taudiğā tai kawa ġasiğası be ta dariğā munağedina, taudi

tokare ta kawa gewagewa munağedina.²⁶ Inam kauinama teneğinama nama, değoda Seitan tauname na penamama sibo i tavutavu dobiğedina, inam tokare tauname e dariğä munağena, be na waiguyauma nam tokare e kena watana.²⁷ Vutuna aubainama değoda taugu sibo Belsebul na rewapanae penama e tavutavu dobiğedina, naumeki da taumi Parisi ami tauwai muriwatanama taudi aitau na rewapanae penama ta tavutavu dobiğedi? Taudi koi taraviredi, aitau isane penama ta tavutavu dobiğedi. Taudi ġarodie tokare ko banavi da ami giuma inam kaikaiyovunama.²⁸ Be taugu Mamaitua Aruinama na rewapanae penama yà tavutavu dobiğedina. Inam kauine taumi ko kataie da Mamaitua na waiguyauma kaiteka ġaromie ya tavana.

²⁹ “Nam aitau tauğoma wairewapaninama na vadama e gigi da e sağä, be na purapurama e danene rovodi. Ibewa da noğone inam tauğominama wairewapaninama e vunuğü da e pani dokena, muriğä be e sağä da na purapurama e danenedina.³⁰ Değoda tauna aitau nam taugu ġarogu, naumeki da tauna taugu ewai ġavieguna. Be tauna aitau nam taugu mate kama noyanoya tenağħana, inam tauna yau noyama e kawakawa gewagewana.

³¹ “Vutuna aubainama yà riuriuemina da gewagewa be waidibogo matabudi Mamaitua tokare e noğota poredina. Be aitau da Arua Babau ewai diboğina, inam gewagewanama Mamaitua tokare nam e noğota pore.³² Değoda aitau Banaga Natunama ġarone e riuriu viravirana, naumeki da tauna na gewagewama tokare Mamaitua e noğota porena. Be aitau da Arua Babau ġarone e riuriu viravirana, naumeki da tauna na gewagewama yodi be nokoi ya nağona, tokare Mamaitua nam airaġan e noğota poredi.

Kai gewagewanama votanama gewagewanama

³³ “Kai ko kawa batebatena, tokare votanama ta verena. Be kai ko kawa gewagewanama, tokare votanama ta gewagewanama. Baninama kai votane tokare ko kita be ko kataie da inam kai verena bo kai gewagewanama.³⁴ Taumi mota sarama natunatudima, taumi gewagewa banegimima, nema tokare vere ko giu bake? Baninama aba banaga nopone ya moğavu be e kenakenana, vutuna mudune e dobidoberina.³⁵ Banaga verenama noponama vere ya moğavuna aubainama, yaba veredima ewai tubuğidina. Be banaga gewagewanama noponama gewagewa ya moğavuna aubainama, yaba gewegewedīga ewai tubuğidina.³⁶ Taugu yà riuriuemina da etara na raġanie banaga dobue adi

giu yababayababama aubainama, taudi matabudi tokare Mamaitua e etaredina. ³⁷ Baninama am giuma ruvane Mamaitua tam tokare e kovoğimna. Be nama am giuma ruvane Mamaitua tam tokare ei yawasanimna.”

Jona na matairama

(Lk 11:29-32)

³⁸ Naumeki da Parisi be tarawatu tauwai katakataidima Yesu a riuena, “Tauwai katakatai, tauma ka ġoeġoena mataira kwa voie be ka kitana.”

³⁹ Be tauna ya riuedina, “Uma kimtinama taumi gewagewa be badara banegimima be yodi mataira kitanama ko ġoeġoena. Be taumi nam tokare mataira ko kita, ibewa da peroveta Jona ġarone aba ya tubuġħana, vutunaġa tokare ko kitana. ⁴⁰ Jona tauna iyana nopone ya miana raġan rabuiteġa be kupi rabuiteġa. Inam kauinama teneġinama nama Banaga Natunama tokare doġa nopone e kenana raġan rabuiteġa be kupi rabuiteġa. ⁴¹ Be maraetara raġanine Ninive banegidima be taumi uma kimtinama mate gurie be ko midisuġu munaġħana raġanine, taudi tokare ta riuemina da taumi sibo gienae koya naġona. Baninama boni Jona ya rarauguguyana raġanine, Ninive banegidima taudi na giumenta a vaie be noġota vitara a paġona. Be yodi uma dobudine banaga tenaġa tauna Jona ya saġa porena, be tauna na giumenta taumi nam koma vaie be noġota vitara koma paġopaġona. ⁴² Be mate maraetara raġanine dobu Saba guyaunama waivinama taumi uma kimtinama mate gurie be ko midisuġu munaġħana. Be tauna mate tokare e riuemina da taumi sibo gienae koya naġona. Baninama boni inam guyaunama waivinama tauna dobu damone, be ya tavana, Solomon na nuauyauyama vaienama aubainama, be yodi uma dobudine banaga tenaġa tauna Solomon ya saġa porena, be tauna na giumenta taumi nam komawai beavaiena.

Penama na kaba tava munaġama

(Lk 11:24-26)

⁴³ “Be penama banaga e dobi porena raġanine, tauna e naġona dobu pokine na kaba siperema gabunama wane-nama aubainama. Be gabu nam i banavina aubainama, ⁴⁴ tauna tokare e riuna, ‘Taugu yau vadama dego è gose be è veraverauna, dabudi ya munaġħana.’ Be tauna raġanine vadae e tava da e kitana be vada nomenclatura kavakavanama. Be vada kawakawa verena be waiwaisianama e kenakenana. ⁴⁵ Naumeki da tauna e munaġa be penama ġesaudima, matabudi 7, ei dokedina. Be inam aruidima taudi a gewagewa vavasaġħana nam maika tauna. Taudi matabudi ta saġa vadanama nopone be ta miana.

Inam rağanine banaga tokare na yawasanama e gewagewa da e gewagewa vavasağana, nam noğone maika. Inam kauinama teneğinama nama tokare uma kimtinama ġarodie e tubuğana.”

*Yesu tinanama be tasitasinama
(Mk 3:31-35; Lk 8:19-21)*

⁴⁶ Be rağanine Yesu yağoro patara ġarodie ya giugiuna maika, tinanama be tasitasinama a tava be doğae a midina, be taudi a ġoeğoenä da Yesu mate sibo ai giuna. ⁴⁷ Naumeki da banaga tenağä Yesu ya riuena, “Tinam be tasitasimma doğae ta midimidina, be taudi ta ġoeğoenä tam mate koi giuna.” ⁴⁸ Dabudine Yesu tauna ya paribee be ya riuna, “Aitau tinagu be aitau tasitasigu?” ⁴⁹ Be tauna na tauwai muriwatanama ġarodie yai nimayoyo be ya riuna, “Uma taudi taugu tinagu be tasitasiguma. ⁵⁰ Baninama aitau da Tamaguma marae na ġoanama e voivoiedina, tauna vutuna taugu tasiğomigu, nuvuğomigu, be tinağomiguma.”

13

*Taukuma wainasinama
(Mk 4:1-20; Lk 8:4-15)*

¹ Inam rağaninama teneğine Yesu vada ya dobi pore, be ya nağó yawawa diane ya miana. ² Be yağoro patara dosinama ġarone a rawateğeidina, aubainama tauna topae waga debane ya sağä be ya miana. Be patara matabudi taudi barabarae topa diane a miana.

³ Inam dabudine tauna yaba toitoi wainasie yai katakataidi be ya riuedina, “Rağan tenağä taukuma ya nağona na pesima kumedima aubainama. ⁴ Tauna pesi yawai yaraiedina rağanine, pesi ya kara gabedi da a pokina, baninama taudi waramidima nam doğa nopone ti yovo guratana. ⁵ Be pesi ġesaudima yeku debedie a ravusedina, dabudine doğa nam dosina, vutuna aubainama pesi a gogo makaina. ⁶ Be suara ya rarararanana rağanine, pesi ya kara gabedi da a pokina, baninama taudi waramidima nam doğa nopone ti yovo guratana. ⁷ Be pesi ġesaudima gedara nopodie a ravusedina, be inam gedaridima pesi a gogogogona, a yavanidina. Vutuna aubainama taudi nam ti banina. ⁸ Be pesi ġesaudima taudi doğa verene a ravusedi be a gogona. Naumeki da a moraba be a banina. Banidima ġesaudima 100, ġesaudima 60, be ġesaudima 30. ⁹ Değoda beemima ta kenana, naumeki da koi beavaiana.”

¹⁰ Naumeki da tauwai muriwatana a verau be Yesu ai taravirena, “Aba aubainama banaga wainasie kwa giugiedi?” ¹¹ Be tauna ya paribeedi be ya riuna, “Taugu è vinemina

da taumi Mamaitua na waiguyauma semosemonama ko kataienai. Be banaga ġesaudima tokare nam ta kataie. ¹² Aitau da uma yabedima e katakataiedina, Mamaitua tokare inam katainama debane e taipotodina. Be deġoda aitau uma yabedima nam ku kataiedina, avedi da katai ġaubonama ġarome, be yaġoro Mamaitua tokare kataidima matabudi e kaiporaġana. ¹³ Vutuna aubainama taugu banaga ġarodie wainasie yà giuguna. Baninama taudi ta kitakitana be nam tima kitakita kauena, be vaienama ta vaivaiena be nam tima katakataienai.

¹⁴ “Boni aba peroveta Aisaia ya giugiuena, yodi taudi ġarodie e tubutubuġana. Tauna umanama ya riuna, ‘Taumi ko vaivaiena be tokare nam ko kataie, taumi ko kitakitana be tokare nam ko kita kaue.

¹⁵ Uma banegidima nuedima gudugudunama. Be taudi beedima nam timawai beavaia kauana, be taudi matedima a potana.

Taudi nama a voiana da matedie nam aba ta kita, bo beedie nam aba ta vaie, bo nuedie nam aba ta kataie, baninama taudi nuedima vitarenama a tuaġaie, be nam tima ġoēgoena da taugu yài yawasanidi.”

¹⁶ “Be taumi matemima ewai kitana, be beemima ewai beavaiana aubainama koi nuaverena. ¹⁷ Taugu yà riuriu kauemina da boni peroveta toitoi be didimana banegidima a ġoēgoena da sibo uma kauidima a kitedina, maika taumi yodi ko kitekitedina nama, be nam ti kitedina. Be taudi a ġoēgoena da sibo uma giudima a vaiedina, maika taumi yodi ko vaivaiedina nama, be nam ti vaiedina.

¹⁸ Yodi taukuma wainasinama ġaromie yà giu waibate da ko vaiena. ¹⁹ Pesi keda debane ravuravusenama na giuma inam umanama. Banaga Mamaitua na waiguyauma varinama e vaivaiena, be nam ima katakataiena raġanine, Seitan e tava be Mamaitua riunama banaga nopone kumakumanama e kaikai poraġana. ²⁰ Be banaga ġesaunama tauna maika pesi yeku debedie ravuravusedima. Tauna riu e vaivaiena, waiġapa ma nuaverena e paġopaġona. ²¹ Be tauna nam waramina aubainama tauna nam tokare e midi gurata. Raġanine piripiri bo raukivigewagewa ta tavatavana Mamaitua riunama kana taiye, tauna tokare waiġapa e bekuna. ²² Be banaga ġesaunama tauna maika pesi gedara nopodie ravuravusedima. Tauna riu e vaivaiena, be dobu yawasani-dima nuaboyedi be dobu waiguyaudima wainuapaġoedima mate ta saġa be Mamaitua riunama ta yavanidi, da nam tima banibanina. ²³ Be banaga ġesaunama tauna maika pesi doġa verene kumakumanama, tauna riu e vaivaie, e paġopaġo, be e vovo teyeteyedina, tauna votanama 100 bo 60 bo 30.”

Pesi gewegewedima wainasidima

²⁴ Yesu wainasi ġesaunama ya riuedina, “Mamaitua na waiguyaunama inam maika banaga tenaġa na sipie pesi veredima ya kumedina. ²⁵ Be tauna kupie ya kenakenana raġanine, na ġaviamma ya tava da pesi gewegewedima inam sipine pesi veredima noppodīga ya kuma nawedi be ya naġona. ²⁶ Be pesi veredima a gogo be buso awai karena raġanine, pesi gewegewedima mate a gogo tenaġana.

²⁷ “Naumeki be sipi taupakinama na taunoyama tauna ġarone a tava be a riuna, ‘Bada, tam pesi veredima sipie kuya kumedina, be uma pesidima gewegewedima aikedae a tava be ta gogogogo?’ ²⁸ Be tauna ya paribeedi be ya riuna, ‘Inam ġavia tenaġa ya tava be nama ya voiana.’ Be na taunoyama a riuna, ‘Nema kwa noġonōġota bake, tauma ka naġo ka kamoġa poraġa bo avedi?’ ²⁹ Be tauna ya riuna, ‘Avedi! Baninama deġoda pesi gewegewedima ko kamoġana, taumi tokare pesi veredima mate ko kamoġa tenaġedina. ³⁰ Nakarua, ko gosedi da matabudi ta gogo tenaġana naumeki da dariġa raġanine tokare tā kitedina. Inam raġanine tokare taudariġa ya riuedi da taudi tokare pesi gewegewedima a gogogogona, ta kamoġa poraġa da ta pani boinidi be kai matane ta gabu gorudina. Muriġa pesi veredima a gogogogona, ta kamoġa da ta ragau saġedina yau vadae.’”

Yauġana pesinama be yist wainasidima*

(Mk 4:30-34; Lk 13:18-21)

³¹ Be Yesu wainasi ġesaunama ya riuedina, “Mamaitua na waiguyauma inam kai yauġana pesinama maika, banaga ya paġo be na sipie ya kumana. ³² Inam pesinama ya ġaubo kauana be banaga ya paġo da na sipie ya kumana, be ya gogogogona raġanine kai matabudi ya saġa poredi, be kaibada ya tubuġana. Be kiu ta tava be kainama ragane ta noġinoġina.”

³³ Be wainasi ġesaunama mate ya riuedina, “Mamaitua na waiguyauma inam maika yist[†] waivi ya paġo, parawa noppone ya biridi, be ya gwada da parawa ya sasana be ya morabana.”

³⁴ Yesu uma yabedima matabudi patara ġarodie wainasie ya giuedina. Tauna yaba matabudi wainasie ya giuedina, be nam i giugiu ġomana. ³⁵ Inam kauidima peroveta boni ya

* **13:30:** Gurik bonane ya riuna: Gaga pesinama. Be inam gaga ġesau, tauna kai dosinama maika yauġana, be nam taitai. † **13:33:** Yist inam maika tuva. Ĝaubonama kwa riġa be topae kwa boruna, inam e daberarana. Be yist ġaubonama parawa noppone kwa boruna, inam e daberarana.

riuriuedina nama yodi a tubuğana. Peroveta boni umanama ya riuna,

“Taugu muduguma yà kaipore be wainasie yà giuna. Boni dobu ya tubutubuğe da yodi, giu semosemodima a kenakenana, be yodi giudima semosemodima vutudi yà giuedina.”

Mui wainasidima ya giu waibatedina

³⁶ Dabudine Yesu patara ya gosedi be ya nağona vadae. Be na tauwai muriwatanama tauna ġarone a tava be a riuena, “Bada, mui sipie a gogogogona wainasidima sibo kuya giu waibate be kè vaie.”

³⁷ Be Yesu ya paribeedi be ya riuna, “Pesi veredima taukumedima, tauna inam Banaga Natunama. ³⁸ Sipi inam uma dobunama, be pesi veredima inam tauwai sumaġa, taudi vutudi Mamaitua na waiguyauma natunatunama. Be pesi gewegewedima taudi inam Diaboro natunatunama. ³⁹ Be ġavia tauna aitau pesi gewegewedima ya kumekumedina, tauna inam Diaboro. Be dariġa raġaninama inam raġan damonama, be taudaridariġa inam taudi anea.

⁴⁰ “Be dariġa raġanine pesi gewegewedima ta kamoġa poraġa da ta pani boinidi, be kai matane ta gabu gorudina. Be raġan damone inam kauinama nama tokare e tubuğana. ⁴¹ Banaga Natunama tokare na aneama e riuporaġa be taudi gewagewa tauwai tubuğidima be raukosogaīgai banegidima matabudi ta kamoġa poraġana maika pesi, ⁴² be kai matane ta pore nawedina. Be inam dabudine taudi tokare ta yakei be gadigadidima ta sanadididina. ⁴³ Inam raġanine tokare didimana banegidima tamedima na waiguyauma nopone ta mia be ta yana guratana, suara maika. Deġoda beemima ta kenana, naumeki da koi beavaiana.

Taragai semosemodima wainasidima

⁴⁴ “Mamaitua na waiguyauma, inam doğa nopone mane dosinama semosemonama maika. Be banaga tenaġa inam manenama ya vabanavi be ya rupu porena, be tauna ma nuaverena ya munaġa ya naġo da na taragaima matabudi ya raugimaredi, be mane ya paġona. Yodibe ya munaġa be inam doğanama ya gimerina. ⁴⁵ Be mate, Mamaitua na waiguyauma inam taugimara tenaġa maika, tauna posaru verenama ya wanewanena da sibo ya gimerina. ⁴⁶ Raġan tenaġa tauna posaru vere vavasaġinama ya banavina, be maesinama dosinama. Dabudine tauna ya munaġa ya naġo da na taragaima matabudi ya raugimaredi, be mane ya paġo, yodibe inam posarunama ya gimerina.

Sagida wainasinama

⁴⁷ “Be mate, Mamaitua na waiguyauma inam sagida maika, banaga topae ta pore, be iyana tabutabu ta konekone-dina. ⁴⁸ Rağanine sagida e moğamoğavuna, taudi sagida ta soru tavaite barabarae ta mia be ta dariğedi da iyana veredima posa nopone tawai ikwedina, be gewegewedima tawai porağana. ⁴⁹ Uma kauinama nama tokare rağan damone e tubuğana. Inam rağanine anea tokare ta yovo be didimana banegidima, be gewagewa banegidima ta dariğedina. ⁵⁰ Be gewagewa banegidima kai matane ta porağā nawedi, be dabudine taudi tokare ta yakei be gadigadidima ta sanadididina.” ⁵¹ Be Yesu na tauwai muriwatanama yai taraviredi be ya riuna, “Uma giudima matabudi koya kataiedi, bo ibewa?” Be taudi a paribee be a riuna, “Ee, kè kataiedina.” ⁵² Be Yesu ya riuedina, “Tarawatu tauwai katakataidima taudi Mamaitua na waiguyauma a katakataienrağanine, taudi vada taupakinama maika a tubuğana. Vutuna aubainama taudi vada nopone ta sağā be taragai[‡] vaudi da poredima sivusivudima ta ragaragau dobiğedina.”

Nasaret banegidima Yesu a tuağaiena

(Mk 6:1-6; Lk 4:16-30)

⁵³ Rağanine Yesu wainasi giunama yawai kovidina, tauna inam dobunama ya gose pore, be ya nağona wari kedae. ⁵⁴ Tauna ya munığana na meagai ġomae, be dabudine tauna sinagog nopone ya sağā, be banaga yawai katakataidina rağanine, taudi a basa kaue be a riuna, “Uma baneginama dego dabudine nuauyauya, be mataira rewapanidima ya ragaudi be uma yabedima e voivoiedi? ⁵⁵ Tauna kabe tauwai kamda natuna, be tinanama Meri tauma kè kataienra. Be tasitasinama inam Jeims, Jousep, Saemon be Judas. ⁵⁶ Be nuvunuvunama matabudi kauanema diade ta miamiana. Tauna uma rewapanidima dego dabudi ya ragaudi?” ⁵⁷ Inam dabudine taudi Yesu a tuağaiena.

Be Yesu ya riuedina, “Peroveta na meagai ġomae, be na vada ġomoma banegidima tauna nam ti vivirena.” ⁵⁸ Vutuna aubainama inam meagaine Yesu mataira nam toitoi i voiedina, baninama taudi nam ti sumağena aubainama.

14

Jon tauwai babataito nema ya guri bakona

(Mk 6:14-29; Lk 3:19-20; 9:7-9)

¹ Inam rağanine guyau Herod tauna Yesu varinama ya vaivaiena, ² tauna na taunoyama ya riuedina, “Uma baneginama agunai Jon tauwai babataito, tauna gurie be ya

[‡] 13:52: ‘Taragai’ inam waikatakatai.

midisūgu munağana, vutuna aubainama rewapanā ġarone ta kenakenana da mataira e voivoiedina.”³ Herod umanama ya giugiuna, baninama tauna noğone Jon yai gurina. Jon umanama ya gurina: Herod tuağanama Pilip na waivima isanama Herodias ya kwayana, be inam kauinama debane Jon Herod ya riuriuena da nam nama sibo ya voie, vutuna aubainama Herod na tauīgarama ya riuedi be Jon a vunuġi da a pani be dibure a boruna.⁴ Be Jon tauna yağoro da Herod umanama ya riuriuena, “Inam nam i verena da Herodias kwa naġi, baninama inam tuağamma na waivima.”

⁵ Inam riunama aubainama Herod ya ġoena da Jon sibo yai gurina. Be tauna banaga ya nairedina, baninama banaga taudi a noğonoġotina da Jon tauna peroveta.

⁶ Be Herod na kaba tubuğama soinama ya voivoiena nōpone, Herodias natunama waivinama ya biga be Herod yai nuavere kauena. ⁷ Vutuna aubainama guyau Herod ya sauga wapa be umanama ya riuena, “Aba kwai baġena ya utemna.”⁸ Naumeki da gomana tinanama na ġoanama aubainama guyau Herod ya riuena, “Taugu ya ġoeġoena yodi Jon debanama dabire kwa boru, be kwa uteguna.”⁹ Be inam giunama guyau ya kawa nuaboya kauena, be tauna nam teneteneġina da gomana sibo ya rawaġaiġaie, baninama Herod noğone na warema matedie ya sauga wapana. Naumeki da guyau yai aninana da gomana na ġoanama tokare e utena.¹⁰ Be na tauīgarama ya riue da ya naġo dibure, be Jon gadonama ya tomna.¹¹ Naumeki da tauīgara Jon debanama dabire ya boru, be gomana guguininama ya ute, da ya kiroġi nawe be tinanama ya utena.¹² Naumeki da Jon na tauwai muriwatanama a verau be Jon tubuġinama a kiroġa nawe, be a dobona. Yodibe a naġo da Yesu ai varina.

*Yesu banaga sievinama 5 tausand yai kanidina
(Mk 6:30-44; Lk 9:10-17; Jn 6:1-14)*

¹³ Yesu Jon varinama ya vaivaiena raġanine, tauna wagae ya geru be ya naġona gabu wainuatugħune. Be patara ta vaienas be Yesu gabu wainuatugħne ya naġona. Naumeki da banaga taudi adi meagaima a gosaġa be a doka ġomedi be kaġediga geresaġa a naġona.¹⁴ Raġanine Yesu gerese ya ġotaqotana, dabudine e kitana be patara dosinama a miamiana. Naumeki da Yesu taudi ya raunuatoiedi be banaga sidesidedima yai yawasanidina.

¹⁵ Be suara ya yovoyovona raġanine, na tauwai muriwatanama Yesu ġarone a verau be a riuna, “Bada, uma inam mutuyuae tà miamiana, be kaiteka ravi e tavatavana. Banaga kwa riupore nawedi da meagaie ta naġo da adi kanima ta gimarana.”

¹⁶ Be Yesu ya paribeedi be ya riuna, “Taudi nam ta naōgo. Taumi kani ko utedina.” ¹⁷ Be taudi a riuena, “Be tauda buredi 5 be iyana rabui kavakava ta kenakenana.” ¹⁸ Be Yesu ya riuedina, “Ko veraūgēdi īgarogue.” ¹⁹ Naumeki da banaga ya riuedi be mui debedie a miana. Yodibe tauna buredi 5 be iyana rabui ya ragaudi, gunume yai kita saāga da yai kaiwa be buredi ya givana. Yodibe na tauwai muriwatanama ya utedi, be taudi banaga a ute nawedina. ²⁰ Dabudine banaga matabudi a kani da a kani siauana. Naumeki da tauwai muriwatana banaga kani a kanikani gosedina, taudi a rawategētegēidi be posa matabudi 12 ai moğavudina. ²¹ Banaga dabudine a kanina, tautauğoma sievinama 5 tausand be waiwaivi seda mate nam ti sievidina.

*Yesu topa debanağā ya nağona
(Mk 6:45-52; Jn 6:15-21)*

²² Inam kauinama murine Yesu na tauwai muriwatanama wagae ya riuporedi da taudi a doka be yawawa a davu da noaōgo nevane a nağona. Muriğā Yesu banaga ya riuporedi be a nağona adi meagaie. ²³ Be banaga a nağonəğona muridie, tauna ya nağona oya debane, moiragi aubainama. Be ravi ya tavatavana rağanine, Yesu taunağā dabudine ya miamiana, ²⁴ be waga kaiteka yawawa poune ya nağonəğona, be sive dosinama aubainama, rabama waga ya katikati vitarena.

²⁵ Be rağan tomtom Yesu topa debane ya babara be ya nağonəğona taudi īgarodie. ²⁶ Be dabudine na tauwai muriwatanama ta kitana be tauna topa debanağā ya veraverauna īgarodie. Inam rağanine taudi a naira kaua, a rasa be a riuna, “Gağarua e veraverauna.” ²⁷ Be Yesu waiğapa ya riu makai be ya riuedina, “Nam ko naira, taugu.”

²⁸ Dabudine Pita ya riuenas, “Bada, değoda riukaua tam, naumeki da kwa riu be taugu topa debanağā īgarome ya verau.” ²⁹ Dabudine Yesu ya paribee be ya riuna, “Kwa verau.” Naumeki da Pita waga ya dobi pore be topa debanağā ya babara be Yesu īgarone nağonəğona yai karena. ³⁰ Be tauna sive be rabama ya kitedi be ya nainairana rağanine, tauna daururu yai karena, inam rağanine tauna ya yogona, “Bada, kwai yawasanigu!” ³¹ Be Yesu waiğapa nimanama yai yoyo be Pita nimane ya kaididi da ya sorusağē be ya riuna, “Am waisumağama ya īgaubo īgağā, aba aubainama kuya noğota bekubeku?” ³² Be taudi wagae a sağasağana rağanine, sive be rabama ai kavena. ³³ Dabudine taudi aitauğā wagae a gerugeruna, matabudi Yesu a raudunee be a riuna, “Tam riukaua Mamaitua Natunama.”

³⁴ Dabudine taudi yawawa a davu be a nağona naumeki da Genesaretma a īgotana. ³⁵ Be tautauğoma dabudine

Yesu a kitakitana, taudi Yesu varinama inam dobunama matabuna nopone ai daberarina, be banaga sidesidedima a veraugedina Yesu ġarone.³⁶ Be Yesu ai baġaġa da tauna sibo yai aninedi, be taudi na garama isunaġa sibo a taukonina. Be banaga aitauġa na garama a tautaukonina, taudi matabudi a yawasanana.

15

*Abaġa nopalama tawai miredina na waikatakataima
(Mk 7:1-23)*

¹ Dabudine Parisi be tarawatu tauwai katakataidima gesaudima Jerusalemma be Yesu ġarone a tava be ai taravirena, ² “Aba aubainama tam am tauwai muriwatanama dà babadama adi vaivaima tawai kati kotovidi? Taudi kani raġanine, nam nimedima tima koġedi be ta kanikani ybabana.”

³ Be Yesu ya paribeedi be ya riuna, “Be taumi aba aubainama ami vaivaima kowai muriwatanedi, be Mamaitua na riuvavasaġġoma kowai kati kotovidi?⁴ Baninama Mamaitua umanama ya riuna, ‘Tamamma be tinamma kwa viviredina!’ be ‘Aitau tamanama bo tinanama ei tara tautauena, tauna gurie ta boruna.’⁵ Banaga aitau na dosima sagudima aubainama yaba ġarone a kenakenana sibo ya ragaudi be na dosima ya sagudina. Be taumi ami waikatakataima kana taiye tauna inam yabedima ya ragaudi be na dosima ya riuedina, ‘Uma yabedima taumi sibo è sagumina, be yodi Mamaitua puyonama aubainama taumi nam yà utemi.’⁶ Inam raġanine taumi ko riuriuna, ‘Tam ya verena da Mamaitua kwa puyona, be am dosima nam kwa sagudi.’ Inam waikatakataidie taumi Mamaitua na riuvavasaġġoma ko kawakawa koakoana, be taumi ami vaivaima ko kawakawa saġena.⁷ Taumi banaga kaikaiyovumima. Aisaia na waiperovetama inam ya riu kauana. Mamaitua umanama ami kauama ya giuena,

⁸ ‘Uma banegidima mududiġa e riuriuna, “Mamaitua, isamma ka kaikai suġusuġuna” be taudi nopalima madanie.

⁹ Taudi adi raudunema ġarogue nam baniboruboruna. Baninama taudi adi waikatakataima inam banaga tarawatu a voivoiedina, vutudi banaga tawai katakataidina.”

¹⁰ Dabudine Yesu patara ya rawateġeidi be ya riuedina, “Koi beavaia be ko kataiena.¹¹ Yaba aba banaga gayane e saġasāġa, tokare nponama nam ei mira, ibewa, be aba banaga nopone be gayane e dobidobina, inam vutuna taunaġa nponama ewai mirana.”

¹² Dabudine na tauwai muriwatanama ġarone a tava be a riuena, “Bada tam kuya kataie bo ibewa da Parisi am giuma a vaivaiena, taudi nuedima ai medi kauana?” ¹³ Yesu ya paribeedi be ya riuna, “Tamaguma marae tauna dego kaidima nam i kumedina, inam kaidima tokare ma waramidi e kamogā poraġana. ¹⁴ Vutuna aubainama inam banegidima ko gose poredina. Taudi tauwai dokadokana matapotepotedima. Be deġoda banaga matapotapotanama turanama matapotapotanama ewai dokena, taudi rabuidi tokare dakie ta bekuna.”

¹⁵ Be Pita ya riuna, “Bada, uma wainasinama kwa giu waibate be ka vaie.” ¹⁶ Be Yesu taudi ya riuedina, “Taumi yaġoro ko nuanua babaġa, bo? ¹⁷ Koya kataie bo ibewa da yaba aba banaga gayane e saġasāġana, tokare kapone e naġo da noveġo e dobi munaġa? ¹⁸ Be aba banaga nua-poune be e saġa da gayane e dobidoġina, inam vutuna tau-name ewai mirana. ¹⁹ Baninama banaga nuapoune noġota gewegewedima ta tavatavana, maika rauvunuġa, badara, waisoġa yababayababa, danene, kaiyovu, waikarakarakutu bo waidiboga. ²⁰ Inam kauidima vutudi banaga nopo-nama tawai mirana. Be deġoda nimamma nam kwa koġa be kwa kanina, inam nam nopo-nama kumawai mirana, ibewa.”

*Dobu Keinan waivinama na waisumaġama
(Mk 7:24-30)*

²¹ Dabudine Yesu inam gabunama ya gose be ya naġona Taia be Saidonma. ²² Be dobudine Keinan waivinama ya verau tauna ġarone be bonanama dosine ya riuna, “Bada, tam guyau Deivid natunama, kwa raunuatoiegħi! Penama natuguma waivinama ya koku be ewai nuatoit kauana.” ²³ Be Yesu nam aba i riuena. Vutuna aubainama Yesu na tauwai muriwatanama Yesu a riuena, “Kwa riue be ġavoe e naġo, tauna muridaġa e naġo be ya yogo makamakai be nam i verena.”

²⁴ Dabudine Yesu inam waivinama ya paribee be ya riuna, “Israel banegidima taudi sипу kwakokwakodima maika. Be Mamaitua ya riuporeguna da taudiġa sibo ē sagudina.” ²⁵ Be waivi Yesu noġone tuapikane ya raupari be ya riuna, “Bada, kwa sagugu!” ²⁶ Be Yesu ya paribee be ya riuna, “Inam nam i verena da seda adi kanima yà paġo be daġadāġasi yà utedi.” ²⁷ Be waivi ya riuna, “Bada, inam riukaua! Be kwa noġoti da guni debane seda kani kurekuredima ta tatai kuruvidina, yaġoro daġadāġasi ta tava be ta kanikanina.” ²⁸ Be Yesu ya paribee be ya riuna, “Tam waivimma, am waisumaġama ya moraba kauana, vutuna aubainama naumeiki da aba

kwawai baġena, nama e tubuġana.” Yesu ya giugiuna raġanine, waivi natunama ya yawasana munaġana.

*Yesu banaga 4 tausand yai kanidina
(Mk 8:1-9; Lk 9:10-17; Jn 6:1-14)*

²⁹ Yesu inam dobunama ya gose be Galili yawawinama dianaġa ya naġona. Naumeki da tauna ya saġa ya naġo oya babedie, be dabudine ya miana. ³⁰ Dabudine patara dosinama adi banagama tuera ragaragaudima da matapotepledima da nuakudukududima da gumgum be sida ġesaudima ragaragaudima mate ai doka tavaitedina. Da Yesu noġone ai mienidi be tauna banaga sidesidedima matabudi yai yawasanidina. ³¹ Inam raġanine gumgum giu ai karena, be banaga nuakudukududima a vere munaġana, be tuera ragaragaudima babara ai karena, be matapotepledima ai kitana. Uma kauinama banaga a kitakitana, taudi a base kaue, be Israel adi Mamaituama isanama a kaisuġusuġuna.

³² Yesu na tauwai muriwatanama ya rawateġeidi be ya riuedina, “Taugu uma banegidima yà rarau nuatoiedina, baninama taudi raġan rabuiteġa nopolie tauda mate uma dabudi tè mia be taudi nam aiyaba ti kani rubuna da yodi. Be taugu nam ama ġoegoena da taudi ma kaniguridi yà riuporedi, deġoda kedae ta raumoyaġasuna.”

³³ Be na tauwai muriwatanama a riuna, “Tauda mutuyuae tà miamiana, be yodi deġo kani tà paġo be umanama patarinama tài kanidi?” ³⁴ Dabudine Yesu yai taraviredina, “Taumi buredi bisa ġaromie ta kenakena?” Be taudi a riuna, “Buredi 7 be iyana ġauġaubodima raubisaġa.” ³⁵ Naumeki da Yesu banaga ya riuedi da doġae a miana. ³⁶ Yodibe tauna buredi 7 be iyana ya ragaudi, Mamaitua yai kaiwe, be buredi ya giva da na tauwai muriwatanama ya utedi, be taudi banaga a ute nawedina.

³⁷ Dabudine banaga matabudi a kani da a kani siauana. Be kani murine tauwai muriwatana banaga kani a kanikani gosedina, taudi a rawateġeġeidi be posa matabudi 7 ai moġavudina. ³⁸ Banaga dabudine a kanina tautauġoma sievinama 4 tausand be waiwaivi seda mate nam ti sievidina. ³⁹ Naumeki da Yesu patara ya riuedi da a naġona adi meagaie, be tauna wagae ya saġa be ya naġona Magadanma.

16

*Banaga mataira kitanama ai baġena
(Mk 8:11-21)*

¹ Parisi be Sadisi taudi Yesu ġarone a tavana, raurubunama aubainama, taudi Yesu ai baġana da sibo mara matairinama ya voie be a kitana.

² Be tauna ya riuna, “Değoda kupi e tava be gunuma ei siana rağanine, taumi ko riuriuna, ‘Pomai inam komra.’ ³ Be rağanboiboi değoda dobu e ġuva be gunuma e dubadubana rağanine, taumi ko riuriuna, ‘Manaka tokare kusana e dobina.’ Taumi gunume yaba ta tubutubuğana kita wairovedima koya kataiena, be yodi rağandima matairidima kita wairovedima nam koma katakataiedina. ⁴ Taumi kimtimima gewagewa be badara banegimima, taumi yodi mataira kitanama ko ġoēgoena. Be nam tokare mataira ko kita, ibewa da taumi peroveta Jona ġarone aba ya tubuğana, vutunaġa tokare ko kitana.” Dabudine Yesu taudi ya gosedi be ya naġo poredina.

*Waikatakatai kaikaiyovudima ko kita kauedina
(Mk 8:14-21)*

⁵ Taudi yawawa a davu be a naġonāġona rağanine, Yesu na tauwai muriwatanama nuedima ya koana da buredi nam ti ragaudina. ⁶ Be Yesu ya riuedina, “Parisi be Sadisi adi yistma ko kita kauedina.” ⁷ Naumeki da tauwai muriwatana uma kauinama ai giu vivivire be a riuna, “Tauda nam buredi te ragaudina, vutuna aubainama tauna nama ya riuna.”

⁸ Be Yesu ya kataie da taudi aba a giugiuena, vutuna aubainama tauna umanama ya riuedina, “Taumi ami waisumaġama ya ġaubo ġaġa. Aba aubainama ko riuriuna da taumi ġaromie nam buredi? ⁹ Taumi aba koya kitakitana yaġoro nam ko kataie, bo? Taugu buredi 5 be banaga 5 tausand èi kanidina, be posa bisa koyai moġavudina, vutudi nam koma noġonoġoti, bo? ¹⁰ Be taugu buredi 7 be banaga 4 tausand èi kanidina, be posa bisa koyai moġavudina, vutudi nam koma noġonoġoti, bo? ¹¹ Taugu yaba yà giuguedina aba aubainama taumi nam koma katakataiedi, taugu nam buredi ama giugiuena, ibewa. Taugu Parisi be Sadisi adi yistma ko kita kauedina, vutuna taugu yà giugiuena.”

¹² Inam rağanine taudi a kataie da tauna nam buredi kana yistma i giugiuena, ibewa da Parisi be Sadisi adi waikatakataima kaikaiyovudima ya giugiuena.

*Pita yai maġatarana da Yesu tauna vutuna Keriso
(Mk 8:27-30; Lk 9:18-21)*

¹³ Rağanine Yesu Seseria-Pilipai meagaine ya tavatavana, tauna na tauwai muriwatanama yai taraviredi be ya riuna, “Banaga nema ta riuriu bako? Banaga Natunama tauna aitau?”

¹⁴ Be taudi a paribee be a riuna, “Banaga ġesaudima ta riuriuna da Elaija, be ġesaudima ta riuriuna da kabe Jerimaia bo ai peroveta tenaġa kabe i tavatava.” ¹⁵ Be tauna yai

taraviredi be ya riuna, “Be taumi nema ko nōgonōgōta bako, da taugu aitau?”

¹⁶ Dabudine Pita ya paribee be ya riuna, “Tam Tauwai yawasana, Mamaitua yawayawasaninama natūgominama.”

¹⁷ Be Yesu Pita ya riuena, “Saemon Jona natunama, tam Mamaitua ei aiainimna, baninama uma nōgotinama nam banaga ti kataimna, ibewa da Tamaguma marae tauna vutuna ġarome yai māgatarina. ¹⁸ Be taugu yà riuemna da tam Pita* inam yeku. Be inam yekunama debane taugu yau ekalesiama yà kerina, be guri tokare nam inam ekalesianama e vaisuba be teneteneğina. ¹⁹ Taugu mara waiguyaunama kiğinama tam tokare yà utemna. Vutuna aubainama tam aba dobue kwa panipanina, nama marae e panina. Be aba dobue kwa kuvekuvesina, nama marae e kuvesina.”

²⁰ Inam dabudine na tauwai muriwatanama ya riuedina da nam aitau sibo a riue, da tauna vutuna Keriso.

*Yesu nema ei nuatoitoi bako be e gurina ya giuedina
(Mk 8:31-9:1; Lk 9:22-27)*

²¹ Inam rāganine da nokoi ya nāgona Yesu tauna na tauwai muriwatanama ya giu waibatedina, da tauna tokare e nāgona Jerusalemma. Be dabudine babada dosidima, be pirisi adi babadama, be tarawatu tauwai katakataidima, matabudi taudi Yesu ta raukivi gewegewe, be tai gurina. Be rāgan aniwai rabuiteğane tauna tokare e midisugū munāğana.

²² Inam rāganine Pita Yesu yai doke ġavoe ya nawe be yai ġake be ya riuna, “Avedi Bada, Mamaitua na sague inam kauinama nam ġarome e tubuğā!” ²³ Dabudine Yesu yai tautinamuri be Pita ya riuena, “Kwa nāgo ġavoe Seitan! Tam yau kedama kwa guduguduna, tam am nōgotama nam Mamaitua ġarone be tima yovoyovona. Tam inam banaga adi nōgotama kwa giugiuena.”

²⁴ Inam rāganine Yesu na tauwai muriwatanama ya riuedina, “Değoda aitau waimuriwataneguma e ġoena, naumeiki da na ġoanama matabuna e gosed, be na korosima e kirogi da ei muriwataneguna. ²⁵ Tam aitau tame am yawasanama kwa kaididi be kwa raberabena, tokare am yawasanama kwa kawa gewagewana, be tam aitau da taugu kautaiye am yawasanama kuyai utaena, naumeiki da am yawasanama tokare kwa banavina. ²⁶ Be değoda aitau dobu yabedima matabudi e ragaragaudina, be e gurina rāganine, inam yabedima tauna nema ta sagu bake, da yawasanana kenakena nonōginama e pāgo? Bo aba ei utae da na yawasanama

* **16:18:** Gurik bonane ‘Pita’ inam yeku isanama.

e paǵo munaǵe? ²⁷ Baninama Banaga Natunama tokare Tamanama neneǵarine na aneama mate ta yovona. Yodibe banaga tenatenaǵaǵa aba a voivoiedina ruvane nama tokare ei maesidina. ²⁸ Taugu yà riuriu kauemina da taumi ǵesaumima yodi uma dabudi ko midimidina tokare nam ko guri, naumeki da Banaga Natunama ei rawaguyau be e verauna ko kitana.”

17

Yesu kitanama ya boru vitarena

(Mk 9:2-13; Lk 9:28-36)

¹ Raǵan 6 muridie Yesu na tauwai muriwatanama Pita, Jeims be tasinama Jon yai dokedi be taudiǵa oya daudau-nama debane a naǵona.

² Taudi oya debane a tavatavana, dabudi ta kitana be Yesu kitanama ya boru vitarena. Tauna noǵonama yai matakikanikanina maika suara, be na garama a ǵavorana maika suara boruminama. ³ Inam kauinama ya tubu-tubuǵana nopone, ta kitana be Mousis be Elaija Yesu mate awai giuna a kitedina. ⁴ Naumeki be Pita Yesu ya riuena, “Bada, ya vere kauana da tauma mate uma dabudine. Deǵoda tam kwa ǵoena, taugu kape rabuiteǵa yà voiedina, tenaǵa tam aubaimma, tenaǵa Mousis be tenaǵa Elaija.”

⁵ Pita yaǵoro ya giugiu be giyou ǵavoǵavora tunutununama ya yovoyovona ya suma tawedina. Dabudine bona giyou no-pone ya dobi be ya riuna, “Uma inam taugu natuǵomiguma, tauna ewai nuavereguna, bonanama ko vaiena!” ⁶ Be tauwai muriwatana nama giunama a vaivaiena, taudi a naira kaua, be noǵodie a beku be doğae a ravusedina. ⁷ Naumeki be Yesu ya verau da ya taukonidi be ya riuna, “Ko midisuǵu, nam ko naira.” ⁸ Inam raǵanine taudi a tausuǵudi be ai kita da Yesu taunaǵa a kitana, be nam aitau ǵesau dabudi ti kitana.

⁹ Naumeki da taudi oyae be a dobi a munamunaǵana raǵanine, Yesu taudi umanama ya riuedina, “Taumi aba koya kitakitana nam aitau tenaǵa ko riue, naumeki da Banaga Natunama gurie be e kawa midisuǵu munaǵena.”

¹⁰ Dabudine tauwai muriwatana Yesu ai taravire be a riuna, “Aba aubainama tarawatu tauwai katakataidima ta riuriuna da Elaija tauna noǵone e yovo doka?” ¹¹ Dabudine Yesu ya paribeedi be ya riuna, “Inam riukaua, Elaija tauna tokare e yovo doka be yaba matabudi e kawa nonoǵidina. ¹² Be uma yà riuemina, Elaija tauna kaite ya yovona, be banaga tauna a nuababaǵena, vutuna aubainama taudi adi ǵoanama nama tauna ǵarone a voivoiedina. Inam

banegidima tokare kauinama teneğine nama Banaga Natunama ta raukivi gewegewe be ei nuatoitoina.”¹³ Inam rağanine na tauwai muriwatanama a kataiena, da tauna taudi ġarodie Jon tauwai babataito ya giuguena.

*Yesu gomana penama kokukokunama yai yawasanina
(Mk 9:14-28; Lk 9:37-42)*

¹⁴ Rağanine taudi patara ġarodie a dobidobina, dabudine tauğoma tenaġa ġarodie ya tava be Yesu noġone tuapikane ya raupari¹⁵ be ya riuna, “Bada, natuguma kwa raunuatoie! Tauna muya e kawakawa guri, be e raraugurera. Tauna kana rağanie e beku be kai matane e naġonāġona, be warirağanie upa nopone e naġonāġona.¹⁶ Taugu è verauġena am tauwai muriwatanama ġarodie, da taudi a raurubuna, be nam ti yawasanina.”

¹⁷ Be Yesu ya paribee be ya riuna, “O banaga nam waisumegimi, ami nuababaġama ya moraba ġaġa. Taumi mate tà mia ġaġa be ya noya ġaġaemi? Gomana ko verauġe uma ġarogue.”¹⁸ Inam dabudine Yesu penama ya riutuāġiae be penama gomana ya dobi porena. Naumeki da inam rağanine gomana ya yawasana munaġana.

¹⁹ Be tauwai muriwatana taudiġa muriġa a verau Yesu ġarone da ai taravire be a riuna, “Aba aubainama tauma penama kè tavu be nam i naġo?”²⁰ Be tauna ya paribeedi be ya riuna, “Inam baninama taumi nam ami waisumaġama i morabana. Ya riuriu kauemina taumi ami waisumaġama i morabana kai yauġana pesinama maika, taumi tokare kaua oyanama koya riuenas, kwa midisūgu be noa dabudi kwa naġo, be oya tokare ya naġona. Be nam aiyaba tokare ġaromie ya piripiri.²¹ Penama inam nama kitedima tokare nam aiyaba e tauriedi, ibewa da widina be moiragie tokare e tauriana.”*

Yesu nema e guri bakona, rağan aniwai rabuinama ya giu munaġena

(Mk 9:30-32; Lk 9:43-45)

²² Be tauwai muriwatana matabudi Galilima awai rawategeidina rağanine, Yesu umanama ya riuedina, “Banaga Natunama kaiteka banaga nimedie ta boru nawena.²³ Be taudi tokare tai gurina, be rağan wairabuiteġane Mamaitua tokare tauna ei yawasani, be e kawa midisūgu munaġena.” Dabudine tauwai muriwatana nama a vaivaiena, taudi ai nuaboya kauana.

Tempol teksnama

* **17:21:** Gurik baibol ġesaudima nopolie uma versnama 21 nam ima kenakenana.

²⁴ Be Yesu na tauwai muriwatanama mate Kapaniamma a tavatavana rağanine, tempol teksnama tautaminama baneginama ya tava da Pita yai taravire be ya riuna, “Ami tauwai katakataima tauna tempol teksnama ewai maesi bo ibewa?” ²⁵ Naumeiki da Pita ya paribee be ya riuna, “Ee, ewai maesina!” Be rağanine Pita vadae ya sağasağana, Yesu Pita yai taravira doke be ya riuna, “Saemon, tam aba kwa noğononoğoti, guyaguyau dobue aitau ġarodie teks ta tamatama? Natunatuğomidima ġarodie bo banaga ġesaudima ġarodie?”

²⁶ Dabudine Pita ya paribee be ya riuna, “Banaga ġesaudima ġarodie.” Dabudine Yesu Pita ya riuena, “Naumeiki da tauda adi sedama aubainama nam tài maesa. ²⁷ Be değoda tama kawa nopogewegegewedi aubainama, kwa nağó da topae kwa dobi da am kaimoma kwa porena. Be aba iyeninama kwa kaimo dokena, inam iyeninama gayane kwa kitana mane e kenakenana. Inam vutuna kwa pağó da teks tautaminama kwa utena, taugu be tam aubaidama kwai teksna.”

18

Mamaitua na waiguyauma nöpone, aitau ya sağä gurata?
(Mk 9:33-37; Lk 9:46-48)

¹ Inam rağanine tauwai muriwatana Yesu ġarone a verau be ai taravirena, “Bada, Mamaitua na waiguyauma nöpone aitau ya sağä gurata?”

² Dabudine Yesu gomana ġaubonama ya riue da ya verau be poudie ya midina. ³ Yodibe ya riuna, “Taugu ya riuriu kauemina, değoda tam aitau am yawasanama nam kwa vitare seda adi yawasanama maika, tam nam tokare Mamaitua na waiguyauma nöpone kwa sağä. ⁴ Vutuna aubainama değoda tam aitau am yawasanama kwa vitare be kwa ġaubo munağana uma gomeninama maika, tam tokare Mamaitua na waiguyaue am banagama poudie kwa sağä guratana. ⁵ Be aitau da gomana ġaubonama maika uma gomeninama taugu isague ewai aninena, tauna taugu ewai anineguna.

⁶ “Be değoda ai banaga ewai sumağeguna gomana ġaubonama maika, be banaga ġesau e verau be e voie da inam baneginama aitau ewai sumağeguna gewagewa ei tubuğina, ya verena da inam baneginama gewagewa tauwai karenama gadone yeku dosinama ta pani be egasie tai daururuna.

7 “Taumi aitaūga dobue ami banagama adi waisumağe kowai kedadoka waigewedina, taumi ko kita kauana! Raurubu riukaua tokare ta tavana, be aitaūga da tauraurubu, taumi ko kita kauana!

8 “Değoda nimamma bo kağamma e voiem da gewagewa kwa voivoiena, naumeki da kwa douraka be kwa porekaiyatina. Ya verena da kağamma tenağā be nimamma tenağā mate yawasana nopone kwa sağana, be nam rabui mate da tam kai karakarata nonoğine ta pore nawemna.

9 “Be değoda matamma e voiem be gewagewa kwa voivoiena, naumeki da kwa kunavai be kwa porekaiyatina. Ya verena da matamma tenağā mate yawasana nopone kwa sağana, be nam rabui mate da gienae kai karakaratine ta pore nawemna.

10 “Ko kita kaua da uma tauwai sumeğidima ġauğaubodima nam ko kita waiyovoğedi, baninama taudi adi aneama rağan matabuna marae Tamaguma noğone ta midimidina. 11 Banaga Natunama ya yovona, banaga kwakokwakodima waiyawasanidima aubainama.*

Sipu kwakokwakonama wainasinama

12 “Değoda banaga tenağā ġarone sipu 100 a miamiana, be tenağā i kwakona, tauna tokare aiyaba ya voie, taumi aba ko noğonoğoti? Tauna tokare na sipuma 99 oya babane ya gosedi, be ya nağona na sipuma kwakokwakonama wanenama aubainama. 13 Be ya riuriu kauemina, rağanine na sipuma i banavina, tauna inam sipunama kwakokwakonama aubainama tokare yai nuavere kauana, nam na sipuma ġesaudima maika. 14 Be inam kauinama teneğinama nama Tamemima marae, tauna nam ima ġoeğöena da tauwai sumağā ġaubonama tenağā e kwako.

Ai turamma gewagewa ġarome e voiena, tam aba kwa voie tauna ġarone?

15 “Değoda turamma tauwai sumağā ġesau be gewagewa ġarome ya voiena, naumeki da tamğā kwa nağō ġarone, be taumiğā inam piripirinama ko kawa didimanina. Be değoda am giumenta e vaie be e pağona, inam naumeki da turamma kuya pağō munağena. 16 Be değoda am giumenta nam e pağō, naumeki da banaga tenağā bo rabui mate kwa ragaudi, be ġarone ko nağō da inam piripirinama ko kawa didimanina. Be inam banegidima rabui bo rabuiteğā taudi aba ko giuedina tai matematena. 17 Be tauna değoda inam banegidima bonedima yağoro nam e pağō, naumeki da inam kauinama Mamaitua na damma ġarodie ko giuena. Be tauna

* 18:11: Gurik baibol ġesaudima nopodie uma versnama 11 nam ima kenakenana.

Mamaitua na damma adi raukurama yaḡoro nam e vaie, naumeki da tauna ekalesiae be ko boru dobiġena ġavoe. Be taumi tauna ko voie da banaga danedanenena maika, bo banaga isanama gewagewanama maika. ¹⁸ Yà riuriu kauemina da taumi aba dobue ko panipanina, nama marae e panina. Be dobue ko kuvekuvesina, nama marae e kuvesina.

¹⁹ “Be mate uma yà riuemina, deġoda taumi rabui uma dobue koi anina tenaġa be aiyaba koi baġena, tokare Tam-aguma marae ami waibaġama e voiena. ²⁰ Baninama deġo dabudi banaga rabui bo rabuiteġa isague tai rawateġeidina, taugu taudi mate dabudine.”

Taunoya kivikorokoronama wainasinama

²¹ Dabudine Pita Yesu ġarone ya verau be yai taravirena, “Bada, deġoda turaguma gewagewa ġarogue e voiena, raġan bisa tokare na gewagewama yà noġota pore, raġan 7, bo?”

²² Be Yesu ya riuena, “Nam 7, ibewa, be raġan 7 be 70 be debane debane turamma na gewagewama kwa noġota porena.

²³ “Vutuna aubainama mara waiguyaunama inam maika umanama, guyau dosinama tenaġa ya tava be na taunoyanama ya rawateġeidina, baninama ya ġoegoena da sibo ya kataien, da na taunoyama na manema a rabe kauedi bo ibewa. ²⁴ Taudi awai rawateġeina raġanine, taudi tauġoma tenaġa guyau na manema 10 tausand Talent[†] ya paġopaqona, tauna a verauġena guyau ġarone. ²⁵ Be inam baneginama nam teneteneġina da sibo guyau na manema yai maesa munaġe. Vutuna aubainama guyau ya riuna da sibo inam tauġominama tauname, be na visarama, na sedama be na taragaima matabudi sibo ya gimaredi, da mane sibo ya pagona. Yodibe guyau na manema sibo ya ute munaġena. ²⁶ Dabudine taunoya guyau noġone tuapikane e raupari be yai baġa gurate be ya riuna, ‘Ae, guyau kwa raunuatoieg! Taugu am manema maesinama matabuna tokare yà ute munaġemna.’ ²⁷ Naumeki da guyau na taunoyama ya raunuatoiena, aubainama na manema maesinama matabuna ya noġota poredi, be ya riue da ya naġona.

²⁸ “Raġanine tauġominama doġae ya dobidobina, dabudi boni tauna ġarone turanama ġesau mane 100 Denari[‡] ya paġopaqona, vutuna ya banavina, naumeki da turanama gadonama ya kiki be ya riuna, ‘Yau manema kwai maesa makaie.’ ²⁹ Dabudine turanama tauna noġone tuapikane ya raupari be yai baġa gurate be ya riuna, ‘Ae, yau tura kwa

[†] **18:24:** Gurik bonane ya riuna: 10 tausand Talents. Inam 480-million Kina (K480,000,000). [‡] **18:28:** Gurik bonane ya riuna: 100 Denari. Inam raġan 100 adi maesama.

raunuatoiegu! Taugu am manema maesinama matabuna tokare yà ute munaġemna.³⁰ Be tauna turanama na riuma ya vaia tuaġaie, be dibure ya boru nawena. Be dabudi ya miana naumeki da turanama na manema sibo yai maesa rovona.

³¹ “Inam raġanine taunoya ġesaudima nama a kitakitana, taudi nuedima yai medi kauana. Vutuna aubainama taudi yaba matabudi a tubutubuġana, a naġo be guyau ai varina. ³² Naumeki da guyau inam tauġominama ya riue da ġarone ya saġa, be ya riuena, ‘Tam taunoya gewagewama! Taugu yau manema maesinama ġarome matabuna è noġota porena, baninama tam tuapikame kuya raupari, be kuyai baġaguna aubainama. ³³ Be tam turamma nama sibo kuya raunuatoiena, taugu tam è raunuatoiemna maika.’ ³⁴ Dabudine guyau nuanama yai medi kaua, be inam tauġominama kivikorokoronama dibure ya boru nawena tauraukivigewagewa banegidima nimedie. Be dabudine ya miana naumeki da guyau na manema sibo yai maesa rovona.

³⁵ “Taumi deġoda ami banagama adi gewagewama nam nuemima tabutabune ko noġota poredi, naumeki da Tam-aguma marae tokare taumi ġaromie kauinama teneġinama nama e voiem be gienae e pore nawemna.”

19

*Yesu waigosaġa na kauama ya giuena
(Mk 10:1-12)*

¹ Be Yesu inam giudima yawai kovina raġanine, tauna Galili ya gose be ya naġona Judia adi dobue, upa Jodanma be noaġo nevane. ² Be patara dosinama tauna ai muriwatane be dabudine yai yawasanidina.

³ Dabudi Parisi ġesaudima Yesu raurubunama aubainama ġarone a tava be a riuna, “Deġoda tauġoma na noġotama ruvane na waivima i gosena, inam tokare naumeki bo ibewa?”

⁴ Dabudine Yesu ya paribeedi be ya riuna, “Taumi giru-giruminama porane koya sievi bo ibewa, boni pakane tauwai tubuġa tauna tauġoma be waivi ya voiedi, ⁵ be ya riuna, ‘Tauġoma tamanama be tinanama ya gosedi be na waivima mate tai rawateġeidina, da boni taudi rabui be yodi taudi inam tubuġa tenaġa.’ ⁶ Vutuna aubainama taudi yodi nam rabui, ibewa da taudi tenaġa. Taudi noġone rabui be yodi Mamaitua ya rawateġeidina, nam aitau ei yamonedi.”

⁷ Dabudine Parisi Yesu ai taravira munaġe be a riuna, “Be aba aubainama Mousis riuvavasaġa tautaugħoma ya utedi da taudi waigosaġa pepanama adi waiwaivima ta utedi be ta

gosedi?" ⁸ Be Yesu dabudi ya paribeedi be ya riuna, "Mousis yai aninemina da taumi ami waiwaivima ko gosedina, baninama taumi nam ami raunuatoima ami waiwaivima ġarodie ima kenakenana. Be pakane Mamaitua waigosāga nam i aninena. ⁹ Taugu yà riuriuemina deġoda tam aitau am visarama kwa gose yababena, avedi da tauna nam ai tauġoma mate gewagewa ti voiena, be waivi ġesaunama kwa naġina, tam inam gewagewa dosinama kuya voiena, baninama monaġemma debane mui kuya porena. Be waivi na tauġomama debane mui e porena, inam raġanine tauġoma na waivima deġoda e gose porena inam nam aiyaba."

¹⁰ Naumeki da tauwai muriwatana Yesu a riuena, "Deġoda waigosāga nam kwai anine, ya verena da banaga nam sibo ai naġi." ¹¹ Yesu ya paribeedi be ya riuna, "Nam banaga matabudi uma giunama tokare ta paġo, ibewa da taudi aitaūga Mamaitua noġota ya uteutedina, taudiġa ta paġona. ¹² Banaga ġesaudima nam timawai naġina, baninama taudi a tubuġena nama, be tautauġoma ġesaudima banaga a kaivaidina aubainama nam timawai naġina. Be tautauġoma ġesaudima taudi Mamaitua na waiguyauma aubainama naġi a tuaġaienā. Be banaga aitau inam giudima banidima e kataiedina, tauna sibo ya ragaudina."*

Banaga adi sedama a verauġedi Yesu ġarone be tauna yai aninedina

(Mk 10:13-16; Lk 18:15-17)

¹³ Be banaga ġesaudima seda a verauġedina Yesu ġarone, da tauna nimanama debodie sibo ya boru be aubaidima ya moiragina. Be tauwai muriwatana inam banegidima a riutuaġaiedina. ¹⁴ Dabudine Yesu ya riuna, "Seda ġauġaubodima ko gosedi da ġarogue ta verauna, be nam koi ġakedi, baninama mara waiguyaunama banaga maika uma sededima nama aubaidima." ¹⁵ Naumeki da Yesu seda debodie nimanama ya biridi ya kovikovina, tauna ya naġona.

Taragai baneginama na waitaravirama

(Mk 10:17-31; Lk 18:18-30)

¹⁶ Raġan tenaġa tauġoma tenaġa Yesu ġarone ya tava da yai taravire be ya riuna, "Tauwai katakatai, taugu aiyaba verenama yà voie be yawasana kenakena nonoġinama yà paġo?" ¹⁷ Be Yesu ya paribee be ya riuna, "Vere aba verenama aubainama tam taugu kwawai taraviregu? Mamaitua taunaġa verenama. Be tam deġoda yawasana kenakena nonoġinama kwa ġoena, naumeki da riuvavasaġa kwa voteyeteyedina."

* **19:12:** Gurik bonane ya riuna da banaga ġesaudima Mamaitua na waiguyauma aubainama, taudime a kaivai munaġedina.

¹⁸ Be taragai baneginama yai taravira munaḡa be ya riuna, “Abaḡa riuvavasağıdi?” Dabudine Yesu ya paribee be ya riuna, “Nam kwa rauvunuḡa, nam kwa rauwaivi bo kwa rautaugoma, nam kwa danene, nam kwa kaiyovu,¹⁹ tamam be tinamma kwa viviredina be turamma nuanuamma e paḡona maika nema tamḡa kwawai nuapaḡo munaḡemna nama.”

²⁰ Be taragai baneginama ya riuna, “Taugu inam giudima matabudi è voia rovodina. Be yodi aiyaba ġesau yà voie?”

²¹ Naumeki da Yesu tauḡoma umanama ya riueno, “Tam deḡoda yawasana didimaninama kwa ġoena, naumeki da kwa naḡo be am purapurama matabudi kwa raugimaredi, be mane banaga waikaruwaġewaġedima kwa utedina. Deḡoda nama kwa voiana, tam am waiguyauma tokare marae kwa paḡona. Yodibe tam taugu kwai muriwataneguna.”

²² Inam tauḡominama nama giunama ya vaivaiena tauna yai nuaboya kaua be ya naḡona, baninama tauna yai pura-pura guratana aubainama.

²³ “Dabudine Yesu na tauwai muriwatanama umanama ya riuedina, Yà riuriu kauemina da purapura baneginama tauna marae saġanama ġarone ya piripiri kauana. ²⁴ Be ko noġoti da Kamel ya bagibagi kauana da seyau gavogavone e sonaġona, be nama taragai baneginama ya bagibagi da ya bagibagi kauana, tokare nam teneteneġina da Mamaitua na waiguyauma nopone e saġa.”

²⁵ Be Yesu na tauwai muriwatanama nama a vaivaiena taudi a naira kaua be a riuna, “Deḡoda nama, aitau tokare e yawasana?” ²⁶ Naumeki da Yesu taudi ya kitadididi be ya riuna, “Inam kauidima matabudi banaga ġarodie tokare nam teneteneġina, be Mamaitua ġarone yaba matabuna teneteneġinama e voiedina.” ²⁷ Be Pita dabudine Yesu ya riueno, “Tauma yaba matabudi kè gosaġana tam waimuriwatanema aubainama, be tauma tokare aiyaba ama mae-sama ka paḡo?”

²⁸ Dabudine Yesu taudi umanama ya riuedina, “Rawavau raġaninama e tavana raġanine, Banaga Natunama waiguyau gabunama boruborume e miana, be inam raġanine taumi tauwai muriwatanama 12 mate diague ko mia be Israel damdima matabudi 12 koi tarapiriedina. ²⁹ Be aitau da adi vadama bo tamedima bo tinedima, tasitasidima bo nuvunuvudima, adi sedama bo adi sipima a gosaġana taugu waimuriwataneguma aubainama, taudi tokare ya toi vavasaġana ta banavidina, nam a gosegosedina maika. Be taudi yawasana kenakena nonoġinama mate ta paḡona. ³⁰ Be banaga toitoi aitauḡa ta dokadokana, taudi tokare tai

murina. Be aitaugā yodi taiwai murina, taudi tokare ta dokana.”

20

Taunoya gureipi sipinama nopone ta noyana wainasidima

¹ Be Yesu na giuma ya kaiwatani be ya riuna, “Mara na waiguyauma inam umanama:

Rağan tenaḡa sıpi taupakinama rağanboiboi kupinaḡa ya naḡo be banaga ya kokonedina, da na sıpie sibo a noyana. ² Be taudi matabudi ai anina tenaḡa da taudi matabudi adi noyama damone ravie taudi tenatenaḡaḡa Denari tenaḡaḡa ei maesidina. Naumeki be ya riu poredina na sıpie.

³ “Be rağanboiboi suara ya tavatavana nama, tauna ya dobi ya munaḡa be banaga ġesaudima anikune gabune a midimidi yababayababana ya banavidina. ⁴ Dabudine ya riuedina, ‘Taumi ko naḡo be yau sıpie ko noyana, be taugu tokare taumi yai maesimina.’ ⁵ Naumeki da taudi a naḡona na sıpie noya aubainama.

“Naumeki da suaratopu be tauḡominama ya dobi ya mu-naḡana, be kauinama teneḡinama ya voiena. Be ravie kauinama teneḡinama ya voiena.

⁶ “Be suara ya yovoyovona rağanine, tauna ya dobi ya munaḡa be yaḡoro banaga a midimidi yababayababana ya banavidina. Dabudine ya riuedina, ‘Taumi suara daudau aba uma dabudi ko midi yababayaba be ko voivoie?’ ⁷ Be taudi a riuna, ‘Tauma nam aitau i kokonemainda da aba sibo kè voie.’ Be tauna ya riuedina, ‘Naumeki, taumi mate ko naḡo yau sıpie ko noyana.’

⁸ “Be ravi ġomae noya ya kovikovina, sıpi taupakinama taunoya adi badama ya yokoe be ya riuena, ‘Taunoya matabudi kwa rawateġeidi be adi maesama kwa utedina. Aitaugā muriḡa a tava be noya awai karena, taudi ġarodie waimaia kwai karena naumeki da banaga noya awai kare dokena ġarodie kwa tavana.’ ⁹ Naumeki da taudi aitau da suara ya yovoyovona rağanine noya aubainama a tavatavana, taudi tenatenaḡaḡa a verau be Denari tenatenaḡaḡa a ragaudina. ¹⁰ Be aitaugā noya aubainama a tavatava dokana, taudi awai noḡotana kabe mane dosinama ta paḡo. Be ibewa da taudi matabudi Denari tenaḡaḡa a ragaudina. ¹¹ Taudi mane a paḡopaḡona rağanine, sıpi taupakinama ġarone momodu ai kare be a riuna, ¹² ‘Tauma noya dosinama kè voie be suara debamaie ya kara kuruvana. Be inam banegidima taudi muriḡa ġoma a tava be nam noya dosinama ti voiena. Be tam maesa teneḡinama kuya utedina.’

13 “Be sipi taupakinama ya paribeedi be ya riuna, ‘Badam, taugu nam gewagewa ġarome e voiena, baninama noġone tam kuyai aninana da Denari tenaġa sibo è utemina noya murine. 14 Vutuna aubainama am manema kwa paġo be kwa naġona. Be taugu yà ġoeġoena da banaga muriġa è kokokokonedina maesa teneġinama yà utedina maika tam. 15 Taugu yau pairuma aubainama tam kuya unura, bo? Uma inam taugu yau manema, vutuna aubainama taugu yà ġoeġoena nama banaga yà utena.’

16 “Naumeki da aitau da tawai murina, taudi tokare ta dokana, be aitau da ta dokadokana, taudi tokare tai murina.”

Yesu nema e guri bakona raġan aniwai rabuiteġanama ya giu munaġena

(Mk 10:32-34; Lk 18:31-34)

17 Yesu na tauwai muriwatanama mate Jerusalemma a naġonaġona raġanine, kadae na tauwai muriwatanama ya riuedi da ġavoe taudīga be ya riuedina, 18 “Tauda tà naġonaġona Jerusalemma be dabudine Banaga Natunama tokare banaga ta boru dobiġena pirisi adi babadama be tarawatu tauwai katakataidima nimedie. Be taudi adi ogama a taraġina da tauna tokare tai gurina. 19 Be taudi tokare Banaga Natunama ta paġo be banaga aitauġa nam Jius taudi nimedie ta boru nawe da taudi tai diboġi, ta kwapu be korosie ta tuparatuna. Be raġan wairabuiteġane tauna e midisuġu munaġana.”

Jeims be Jon tinedima na waibaġama

(Mk 10:35-45)

20 Dabudine Sebedi natunatunama tinedima mate Yesu ġarone a tava be tinedima tuapikane ya raupari be na ġoanama Yesu yai baġana. 21 Be Yesu ya riuna, “Tam am ġoanama aba?” Dabudine waivi ya riuna, “Kwai anina da am waiguyaumanopone yau sedama uma rabui, be tenaġa sibo kasaumma yauwane ya miana, be tenaġa sibo senimma yauwane ya miana.”

22 Be Yesu ya riuenas, “Tam nam ku kataiena aba kwawai baġena. Taumi teneteneġina da taugu ġoraġoranama yà tegona nama tokare ko tego, bo?” Dabudine seda a riuna, “Ee, tokare ka tegona teneteneġinama.” 23 Be Yesu ya riuedina, “Taumi riukaua tokare yau redue ko tegona, be kasaugue be senigue mieninama inam nam taugu amawai badena. Inam gabudima Tamaguma ya vokaukauedina, taudi banaga vinevinedima aubaidima.”

24 Tauwai muriwatana ġesaudima matabudi 10-nama a vaivaiena raġanine, taudi nuedima yai medina adi banagama rabui ġarodie. 25 Vutuna aubainama Yesu taudi

matabudi ya rawategeidi be ya riuedina, “Taumi koya kataien da eteni babadidima tawai badabadana. Be babadidima ai rewapanava vavasağana aubainama, taudi eteni tawai badedina.²⁶ Uma kauinama taumi ġaromie nam nama e tubuğan! Be değoda aitau tenağan nopomie moraba e ġoena, naumeki da tauna e kaue da matabumi ami taunoyama e tubuğana.²⁷ Be aitau sağan gurata e ġoena, naumeki da ei taunoyana ġaromie.²⁸ Maika Banaga Natunama ya yovona, nam banaga tauna aubainama ti noyana, ibewa da tauna banaga aubaidima ya noyana, be na yawasanama yai utaena, da banaga toitoi e kuvesidina.”

Yesu tautaugoma matapotepotedima rabui yai yawasanidina

(Mk 10:46-52; Lk 18:35-43)

²⁹ Yesu na tauwai muriwatanama mate Jeriko a gosegosena rağanine, patara dosinama tauna ai muriwatanena. ³⁰ Dabudine tautaugoma rabui matapotepotedima keda diane a miamiana. Be rağanine ta vaiena be Yesu inam kedanağan ya nağonagona, naumeki da taudi bonedima dosine a riuna, “Bada, guyau Deivid natunama, kwa raunuatoiemai!” ³¹ Be dabudine patara taudi a riutuağaniedina da sibo ai nuatuğuna. Be taudi yağoro a riu guratana, “Bada, guyau Deivid natunama, kwa raunuatoiemai!”

³² Dabudine Yesu ya midi kwasa, be yai taraviredina, “Aba ko ġoeğoenaya voie?” ³³ Be taudi a paribee be a riuna, “Bada, tauma ka ġoeğoenaya kai kitana.” ³⁴ Be Yesu ya raunuatoiedi be matedima ya taukonidina. Be dabudine yai rağantenağan da taudi ai kita be tauna ai muriwatanena.

21

Yesu Jerusalemma ya sağana

(Mk 11:1-10; Lk 19:29-39; Jn 12:12-15)

¹ Rağanine Jerusalem diane a tavatavana taudi a verauna oya Olipma Betpage meagaine. Dabudine Yesu na tauwai muriwatanama rabui ya riupore nawe dokedi, ² be ya riuedina, “Ko nağanoğomie meagaine, be rağanine meagaie ko sağasağana, dabudine ko kitana donki natunama mate a nigoridina. Ko kuvesidi be ko yovoğedina taugu ġarogue!³ Be değoda aitau ei taraviremina, taumi ko riuena, ‘Bada e ġoeğedina, rağan ġaubonağan be ka sage munağedina.’”

⁴ Uma kauinama Mamaitua na giuma boni peroveta ya giugiuena nama ya tubuğana,

⁵ “Jerusalem banegidima ko riuedina, ko kitana ami guyaua

vovoyağotinama donki natunama ya gerue be ġaromie e veraverauna.”

⁶ Naumeki da tauwai muriwatana a na gó be Yesu aba ya riuriuedina, nama a voiedina. ⁷ Taudi donki natunama mate Yesu ġarone a dobiġedi be taudi adi garama donki natunama debane a yesidi, be Yesu debane ya miana. ⁸ Banaga toitoi adi garama kedaġa a yesiyesidina maika, banaga ġesaudima kai ma rugurugudi a taraġa, a tavaitedi, be kedaġa a yesidina. ⁹ Banaga aitauġa a dokadokana be aitauġa Yesu murine a saġasaġana, a yogo be a riuriuna,

“Hosana guyau Deivid natunama ġarone! Waiaiaininama, tauna vutuna Bada isane e veraverauna! Mamaitua saġasaġa vavasaginama isanama tà kaisuġusuġuna.”

¹⁰ Raġanine Yesu Jerusalem nopone ya saġasaġana banaga matabudi a mosari, ai paparana be a riuriuna, “Uma tauna aitau?” ¹¹ Be patara a riuna, “Uma tauna Yesu, tauna peroveta, Nasaretma Galili provins nopone be ya verauna.”

*Yesu taukune tempol nopone ya tavu dobiġedina
(Mk 11:15-19; Lk 19:45-48; Jn 2:13-17)*

¹² Be Yesu tempol nopone ya saġa be dabudine banaga aitauġa a kunekune be a gimagimarana, matabudi ya tavu dobiġedina. Be tauna mane taurabedima adi vatarama yai tauviredi be aitauġa kiu gabubu taurau gimaredima adi kaba miama mate yai tauviredina. ¹³ Be Yesu taudi ya riuedina, “Girugiruminama porane Mamaitua ya riuna, ‘Taugu yau vadama inam moiragi kana vadama.’ Be taumi ko voivoiena da kabe taudanedanene adi gabu.

¹⁴ Be banaga matapotepotedi be tuera ragaragaudima tempol nopone Yesu ġarone a tava be tauna yai yawasanidina. ¹⁵ Dabudine pirisi adi babadama be tarawatu tauwai katakataidima Yesu yaba veredima ya voivoiedina a kitedi be seda tempol nopone a yogo be a riuriuna, “Hosana, guyau Deivid natunama!” Vutuna aubainama inam babadidima nuedima yai medi ¹⁶ be Yesu a riuena, “Tam seda aba ta riuriuena kwa vaivaie bo ibewa?” Be Yesu taudi ya riuedina, “Ee, yà vaivaledina. Taumi girugiruminama porane koya sievi bo ibewa da umanama ya riuna, ‘Tam seda raubanidima, be seda wawaiidima kuya voiedi da taudi isamma ta kaisuġusuġuna.’” ¹⁷ Dabudine tauna ya gosedi be inam meagainama ya dobi pore be ya naġona Betenima, be dabudine ya kenana.

*Yesu damaya ya riutuaġiae da nam e vota munāġa
(Mk 11:12-14; 14:20-24)*

¹⁸ Pomainama raġanboiboi kupinaġa Yesu ya munamu-naġana Jerusalemma, be kedae tauna kani ya karatina.

19 Dabudine e kitana be damaya kainama keda diane ya midimidina. Naumeki da tauna kai diane ya na gó be dabudi damaya rugudi a ya kitedina, be banidima nam i banavidina. Vutuna aubainama tauna damaya ya riuena, "Nam air  an kwa vota muna  !" Tauna nama ya riuriuna mudune, damaya kainama ya pokina.

20 Be tauwai muriwatana nama a kitakitana, taudi a base be a riuna, "Damaya nemanama da ya poki makai?"

21 Be Yesu ya riuedina, "Y   riuriu kauemina taumi de  oda koi sum  ga be nam ko no  ota bekubeku, taumi tokare kauinama tene  inama nama ko voiana, be nam inam vutuna  ga be mate taumi tokare kaua oyanama ko riuena, 'Kwa nuakamo  ga be kwa na  o egasie.' Be nama tokare e tubu  ana. 22 De  oda taumi koi sum  gana, taumi tokare ami  goanama aiyaba koi ba  gena moiragie, tokare ko banavina."

*Yesu de  go rewapanaya pagona waitaraviranama
(Mk 11:27-33; Lk 20:1-8)*

23 Yesu tempol nopone ya sa  ga be yawai katakataina ra  ganine, pirisi adi babadama be babada   gesaudima mate tauna   garone a tava, be ai taravirena, "Tam aba waibadana, be aitau waibada ya utem be uma kauidima kwa voivoiedi?"

24 Be Yesu ya riuedina, "Taugu mate yau waitaravirama tena  ga taumi y  i taraviremina, be de  oda taumi ko paribee-guna, naumeki da y   riuem da taugu aba waibadane uma yabedima y   voivoiedi. 25 Ko riuegu! Jon de  go dabudi waibada ya pa  go da yawai babataito, Mamaitua   garone bo banaga   garodie?"

Dabudine taudi  ga ai sa  gas  ga be a riuna, "Nema t   riu bako? De  oda t   riuna Mamaitua   garone, tauna tokare e riuedana, aba aubainama taumi Jon nam koi sum  ge?"

26 Be de  oda tauda t   riuna, banage, tauda mate banaga t   nairedina, baninama taudi matabudi ta no  gonogotina da Jon tauna peroveta." 27 Vutuna aubainama taudi Yesu a paribee be a riuna, "Tauma nam ke kataien." Dabudine Yesu ya riuedina, "Naumeki, taugu mate nam y   riuem da taugu aba waibadane uma yabedima y   voivoiedi.

Seda tautaugomidima rabui wainasinama

28 "Uma wainasinama y   riuem be nema ko no  ota bake? Tau  oma tena  ga be natunatunama rabui. Be tauna ya na  o da natunama tautue  inama   garone be ya riuena, 'Taukui, manaka kwa na  o d   sipie be kwa noyana.' 29 Be natunama ya tua  gi be ya riuna, 'Taugu    kayo tua  aina.' Be you, muri  ga nuanama ya vitara be ya na  ona sipie noya aubainama.

³⁰ “Naumeki be tauḡoma ya naḡona natunama tautasina-
nama ḡarone be riunama teneḡinama natunama ya riuena.
Be dabudine natunama ya riuna, ‘Naumeki mamai, taugu yà
naḡona.’ Be tauna nam i naḡona sipie.

³¹ “Yodi aitau tamanama ya voteyeteye be na ḡoanama
ya voie?” Be banaga Yesu a paribee be a riuna, “Gomana
tautueḡinama.” Dabudine Yesu ya riuedina, “Taugu yà riuriu
kauemina da teks tautamidima kaikaiyovudima, be toretore
waiwaividima taudi tokare Mamaitua na waiguyaue ta saḡa
dokana. Be taumi ibewa, ³² baninama Jon ya tava be tauna
didimana kedanama yai kataimina, be taumi nam tauna
koi sumaḡena. Be teks tautamidima kaikaiyovudima, be
toretore waiwaividima taudi Jon ai sumaḡena. Be taumi
uma kauinama koya kitana, be yaḡoro nam ami noḡotama
ko vitaredi be koi sumaḡena.

Gureipi sipinama taurabenama wainasinama
(Mk 12:1-12; Lk 20:9-19)

³³ “Be yodi wainasi ḡesaunama yà riuemi be ko vaiena.
Sipi taupakinama tenaḡa gureipi sipinama ya voie be ya
ganakukuna. Yodibe waen anibuyonama domnama be
kweyaḡa vadana-
ma ya keridina. Yodibe gureipi sipinama
tausipi ḡesaudima nimedie ya boru da a raberabe be
tauna vaḡaie ya naḡona. ³⁴ Raḡanine gureipi taminama na
raḡanima ya tavatavana, tauna na taunoyama ya riupore
nawedina sipi taurabenama ḡarodie, da tauna na sikerema
sibo a paḡona.

³⁵ “Be sipi taurabedima taudi taunoya a vunuḡidi, be
tenaḡa a riḡa yababayababena, be ḡesau ai gurina, be
ḡesaunama a rauyeku be ya gurina. ³⁶ Naumeki da sipi
taupakinama na taunoyama ḡesaudima rautoitoi ya riupo-
raḡana. Be sipi taurabedima inam kauinama teneḡinama
nama ḡarodie a voienna. ³⁷ Taunoya a vunuunuḡa rovodina
murine, tauna natuḡominama ya riupore nawena ḡarodie
be ya riuna, ‘Taugu yà noḡonoḡotina da taudi yodi tokare
natuguma ta vivirena!’

³⁸ “Be raḡanine sipi taurabenama tauna a kitakitana,
taudiḡa ai giu vivivira be a riuna, ‘Uma tauna sipi tokare ei
buderiena. Vutuna aubainama tài guri be inam buderinama
tauda tài buderiena.’ ³⁹ Naumeki da taudi sipie be a vunuḡa
dobiḡena ḡavoe, be dabudine ai gurina.

⁴⁰ “Yodi nemanama? Sipi taupakinama e tavana raḡanine,
tokare sipi taurabedima nema e bakedi?” ⁴¹ Taudi Yesu a
riuena, “Tauna inam banegidima gewegewedima tokare e
kawa gewegewedidi, be murine na sipima banaga ḡesaudima

nimedie e boruna. Be gureipi taminama na rağanie taudi tokare tauna na sikerema ta utena.”

⁴² Be Yesu taudi ya riuedina, “Taumi girugiruminama porane koya sievi bo ibewa? Inam umanama ya riuna, ‘Vada taukerinama yekue vada a kerikeri be yeku tenağ a a porekaiyatina, baninama inam yekunama taudi nam ti ġoena.

Be Mamaitua yekunama poreporenama ya paġo be ya voie da na vadama e kerikerina yasinama ya tubuġana. Be inam kauinama Bada ya voiena tauda ġarode anikitanama ya vere kauana.’

⁴³ “Vutuna aubainama ya riuriuemina da Mamaitua na waiguyauma taumi ġaromie tokare e kaipore, be banaga ġesaudima e utedina. Be inam dabudine taudi tokare ta vota be Mamaitua na sikerema ta utena. ⁴⁴ Be aitau e beku be uma yekunama debane e ravusena, tauna tokare ei mia gorugoruna. Be yekunama aitau debane e ravusena, tauna tokare ei mia mutumutuna.”*

⁴⁵ Dabudine pirisi adi babadama be Parisi Yesu na wainasima matabudi a vaivaiedina, taudi a kataiena da tauna taudi ya giuguedina. ⁴⁶ Vutuna aubainama taudi keda a wanewanena da Yesu sibo a vunuġina, be taudi banaga a nairedina, baninama banaga a noġonogötina da Yesu inam peroveta.

22

Wainagi soinama wainasinama

(Lk 14:16-24)

¹ Be Yesu wainasi ġesau ya riuedina, ² “Mamaitua na waiguyauma inam maika umanama:

Guyau tenağ a natunama tauġominama yawai naġina. Vutuna aubainama tauna soi ya vokaukauena. ³ Be tauna na taunoyama ya riuporedina da banaga ya kokokokonedina, vutudi sibo a riuedi da a verauna soie. Be inam banegidima taudi a tuaġaina. ⁴ Naumeki da tauna na taunoyama ġesaudima rautoitoi ya riupore nawedi be ya riuna, ‘Ko naġo inam banegidima ē kokokokonedina ġarodie be umanama ko riuedina, “Ko verauna soie! Taugu kaite yau kani be yau musarama ē vokaukauedi, be taumi ya raberabemina.”

⁵ Be inam banegidima yaġoro taunoya bonedima a vaia tuaġaiedi, be taudi ai naġo teġateġana. Waria na sipie ya naġona, be waria na noyae ya naġona. ⁶ Be ġesaudima taunoya a vunuġidi, a raukivi gewegewedi be ai guridina.

* **21:44:** Yeku tauna Yesu. Be aitau Yesu e tuaġaienā, taunağ a tokare e vunuġa munaġenā, be guri murine Yesu tokare inam baneginama aruinama e doumutuna.

⁷ “Vutuna aubainama guyau nopenama yai ġora kaua be na tauigarama ya riuporedina da inam banegidima taurau vunuġa tai guridi be adi meagaima mate ta gabu gorudina. ⁸ Dabudine guyau na taunoyama ya riuedina, ‘Naġi soinama kaite e kawa nonoġi be e kenakenana. Be banaga è kokokokedina, taudi nam veredi da sibo a verau. ⁹ Vutuna aubainama taumi ko naġo kedāġa be aitaūġa ko banabanavidina, ko riuedi be matabudi ta verauna soie.’

¹⁰ “Naumeki da taunoya a naġo kedāġa be banaga aitaūġa a banabanavidina, veredi bo gewegewedi, matabudi a tavaitedi, be soi vadanama ya moġavu taritarina. ¹¹ Be guyau vadae ya saġħana, na warema kitedima aubainama. Be dabudine e kitana be banaga tenaġa nam naġi garedima i kotedina. ¹² Dabudine guyau inam baneginama ya riuena, ‘Badam, tam nam naġi garedima ku kotedina, be nemanama da uma dabudine kuya saġa?’ Be tauġoma dabudine nam aiyaba i riuena. ¹³ Dabudine guyau na taunoyama ya riuedina, ‘Inam tauġominama nimanama, kaġanama ko panidi be ko pore dobiġena tadiwanawanae. Be dabudine e ġaba be gadigadinama e sanadididina.’

¹⁴ “Ko kataie da Mamaitua banaga toitoi ya kokonedina be bisaġa ya vinedina.”

Tài teks bo ibewa?
(Mk 12:13-17; Lk 20:27-40)

¹⁵ Dabudine Parisi a naġo da adi ogama a taraġina da tauna sibo giue Yesu ai sinasina be aiyaba sibo ya vato waigewana. ¹⁶ Be Parisi adi tauwai muriwatanama be Herod na tauwai muriwatanama a riupore nawe tenaġedi, be Yesu ai taravirena, “Tauwai katakatai, tauma kē kataiena da tam riukaue kwa giugiuna, be Mamaitua na ġoanama riukaue kwawai katakataina. Be am giue tam nam banaga kuma nainairedina, avedi da banaga nema maika kitedima, tam nam kuma siesievidina. ¹⁷ Kwa riuemai, tam nema kwa noġonogota bake, tauma Sisa ġarone kai teks bo avedi?”

¹⁸ Dabudine Yesu taudi adi noġotama gewegewedima ya kataiedi be ya riuna, “Taumi banaga kaikaiyovumima! Aba aubainama taumi ko rara rubugu? ¹⁹ Sirin teks aniwai maesinama ko verauġe be ya kita.” Naumeki da Denari tenaġa a paġo verauġe ġarone ²⁰ be Yesu taudi yai taraviredina, “Aitau noġona be isanama Sirin bogane ta kenakena?” ²¹ Be taudi a paribee be a riuna, “Uma Sisa noġonama.” Be Yesu ya riuedina, “Naumeki da Sisa ġaronama Sisa ko utena, be Mamaitua ġaronama naumeki da Mamaitua ko utena!”

²² Raġanine nama giunama a vaivaiena, taudi Yesu a base be a naġona.

*Gurie be midisuğu munağā waitaraviranama
(Mk 12:18-27; Lk 20:27-40)*

²³ Sadisi taudi a riuriuna da banaga e guri be nam e midisuğu munağā. Inam rağaninama teneğine taudi vutudi Yesu ġarone a tava da ai taravire ²⁴ be a riuna, “Tauwai katakatai, Mousis umanama ya riuna, ‘Değoda tauğoma yai nağı be nam seda i tikedi da ya gurina, be na visarama ya gosena, naumeki da tasinama bo tuağanama inam kaiyababinama e nağı be seda ei tubuğidina tuağanama gurigurinama aubainama.’

²⁵ “Tauma ġaromiae tautauğoma 7 a tubuğana tina tenağā ġarone, be tauğoma tautuağā waivi ya nağı da nam ti natunatuna, be tauğominama ya gurina be tasinama tuağanama kaiyababinama ya naġina. ²⁶ Be tauna mate seda nam i tikedi be ya gurina. Be kauinama teneğinama tauğoma wairabuiteğanama ġarone ya tubuğana. Namağā da tauğoma aniwai 7-nama ġarone ya dobina. Be inam tauğominama mate nam i natunatuna be ya gurina. ²⁷ Naumeki da inam tautauğomidima a gurigurina damone inam waivinama ya guri ġavutana. ²⁸ Yodi nemanama? Midisuğu munağā na rağanie uma waivinama tautauğoma 7 a naġinajna, tauna tokare aitau na waivi?”

²⁹ Yesu ya paribeedi be ya riuna, “Taumi koya giu waige-wana, baninama taumi girugiruminama porane nam ko katai kauena, be Mamaitua na rewapanama mate nam ko kataienia. ³⁰ Midisuğu munağā rağanine, banaga taudi tokare anea maika ta tubuğana marae, be tokare nam tai nağı. ³¹ Be guri ta midisuğu munağāna na waikatakataima taumi koya sievi bo ibewa? Mamaitua boni umanama ya riuna, ³² ‘Taugu inam Eibrahim, Aisik be Jeikob adi Mamaituama.’ Mamaitua, nam banaga guriguridima adi Mamaitua, ibewa da tauna banaga yawayawasanidima adi Mamaituama.”

³³ Patara umanama giudima a vaivaiena, taudi Yesu na waikatakataima a base kauena.

*Riuvavasağā dosinama
(Mk 12:28-34; Lk 10:25-28)*

³⁴ Inam rağanine Parisi ta vaiena be Yesu Sadisi adi giuma matabudi ya gududina, vutuna aubainama Parisi a rawateğeidina. ³⁵ Be adi badama, tarawatu tauwai katakatainama tenağā Yesu ya raurubu be ya riuen, ³⁶ “Tauwai katakatai, tarawatu nopone, değō riuvavasağinama ya sağā vavasağā?”

³⁷ Be Yesu ya paribeena, ‘Bada am Mamaituama nuanuamma e paġona, nuanuamma tabutabune, aruimma tabutabune be am noğotama tabutabune.’ ³⁸ Inam riuvavasağinama ya sağā guratana, be tauna e dokadokana.

39 Be aniwai rabuinama inam nama kitanama, ‘Turamma nuanuamma e paǵona, nema tam kwawai nuapaǵo munaǵemna nama.’⁴⁰ Tarawatu be peroveta adi waikatakataima matabudi inam riuvavasaǵidima rabui nopolie ta kenakenana.’

Keriso tauna aitau natuna?

(Mk 12:35-37; Lk 20:41-44)

41 Be Parisi ai rawateǵeidi da a miamia be Yesu yai taraviredina, 42 “Taumi Keriso nema ko noǵonoǵota bake, tauna aitau natuna?” Be taudi a paribee be a riuna, “Tauna guyau Deivid natunama.”

43 Be Yesu ya riuedina, “Be nemanama da Arua Babau guyau Deivid nopone ya yovo be tauna umanama ya riuna,

44 ‘Mamaitua yau Badama ya riuena, Kasaugue kwa miana, naumeki da taugu am ǵaviamma kaǵamma dibudie yà biridina.’

45 Guyau Deivid Keriso ǵarone ya riuna, ‘Yau Badama!’ Be yodi nemanama da Keriso tauna guyau Deivid natuna?’

46 Inam dabudine nam aitau Bada na giuma i paribeena. Inam raǵanine be nokoi ya naǵona nam aitau Yesu waitaravira munaǵenama i ǵoena, baninama taudi a nairana.

23

Tauwai katakatai kaikaiyovudima nam koi muriwatanedi

1 Dabudine Yesu tauna na tauwai muriwatanama be patara ya riuedina, 2 “Tarawatu tauwai katakataidima be Parisi taudi Mousis gabunama a paǵo be banaga tawai katakataidina. 3 Vutuna aubainama taumi yaba matabuna ta riuriuemina, naumeki da ko voteyeteyedina. Be adi yawasanama nam i verena aubainama, nam koi muriwatanedi. Taudi ta riuemi da taumi yaba ko voivoiedina, be taudi ǵomidima inam yabedima ta giugiuuedina nam tima voivoiedina. 4 Taudi tarawatu tabu be tabu bagibagidima ta voiedi, be banaga ta segesegeridina da tarawatu tai muriwatanedina, be banaga inam tarawatudima waimuriwatanedima ta voivoia rereǵedina, be taudi nimediǵa a tikidi be ta miamiana.

5 “Taudi adi voiama matabudi ta voivoiedina da banaga kabe ta kitedi be ta basedina. Taudi Mamaitua riunama pepae ta girumidi be noǵodie be nimedie ta panipanidina, be gara rarauperoperodima ta kotekotedina. Be gara peroperodima tawai dau guratedina da kabe banaga ta kitedi be ta basedi. 6 Soi raǵanine taudi guni poune mieninama ta ǵoeǵoedina, be taparoro raǵandie taudi gabu verediǵa ta vinevinedina. 7 Taudi adi ǵoana kauama da banaga

aniwai boru gabudie taudi ġarodie ta verau, be kawasaġe na waikaiwe tai kaiwedi be ta riuna, 'O bada dosimma.'

⁸ "Be taumi ko kita da nam aitau ġaromie e riuna, 'Bada dosimma', avedi. Baninama taumi inam ami badama dosinama tenaġa, be taumi matabumi inam tauna tasitasinama.

⁹ Be dobue nam aitau ġarone ko riuna, 'Mamai', avedi. Baninama taumi tamemima tenaġa, tauna vutuna marae e miamiana.

¹⁰ Be taumi ko kita da nam aitau ġaromie e riuna, 'Tauwai katakatai', avedi. Baninama taumi inam ami tauwai katakataima tenaġa, tauna vutuna Keriso.

¹¹ Aitau da nopolie ya saġa guratana, naumeki da tauna aubaimima ei taunoyana.

¹² Be aitau da e kawakawa saġe munaġena, Mamaitua tokare tauna e boru dobiġena. Be aitau da e boruboru dobiġa munaġena, Mamaitua tokare tauna e kawa saġena.

Banaga kaikaiyovumima ko kita kauana

(Lk 11:38-52)

¹³ "Taumi tarawatu tauwai katakataidima be Parisi taumi banaga kaikaiyovumima. Gewagewa vavasaġinama tokare ko banavina. Baninama banaga Mamaitua na waiguyaumanopone saġanama ta ġoegoena be taumi adi kedama ko guduguduna. Be mate tokare nam Mamaitua na waiguyauma nopone ko saġa. Be mate banaga Mamaitua na waiguyauma nopone saġanama aubainama ta rara rubuna, be taumi adi kedama ko guduguduna.

¹⁴ (-)*

¹⁵ "Taumi tarawatu tauwai katakataidima be Parisi taumi banaga kaikaiyovumima. Gewagewa vavasaġinama tokare ko banavina. Baninama taumi dobu ko naġo popoe be banaga ko voiedi da tawai muriwatanemi be kowai katakataidina. Be inam kedane taumi inam banegidima ko voiedi da taudi gienatnatudima ta tubutubuġana maika taumi. Be mate ko voiedi da adi kaiyovuma tawai moraba kauena, nam maika taumi. Vutuna aubainama taumi inam gienatnatudima.

¹⁶ "Taumi tauwai dokadoka matapotepotemima, taumi gewagewa vavasaġinama tokare ko banavina. Baninama taumi ko riuriuna, 'Deġoda aitau tempol isane e sauga wapana, inam saugawapanama nam bani boruboruna. Be deġoda tempol nopone gold isane e sauga wapana, naumeki da inam saugawapanama nam kwai kati kotovi.'

¹⁷ Taumi

* **23:14:** Gurik baibol bisaġa nopolie vers 14 e kenakenana. Vers 14 inam umanama: Taumi tarawatu tauwai katakataidima be Parisi ko kita kauana. Taumi banaga kaikaiyovumima. Taumi kaiyababa waikaruwaġewaġedima adi vadama, be adi purapurama ko kwayekwayedina, be moiragi daudaudima kaikaiyovudima ko voivoiedina. Vutuna aubainama taumi tokare kovoġa dosinama ko banavina.

matapotepotemi, be buebuemima! Deō tauna yaba dosina, Gold bo tempol? Tempol tauna vutuna gold e kawakawa babauna. ¹⁸ Be mate ko riuriuna, ‘Değoda aitau olta isane e sauga wapana, inam saugawapanama nam bani boruboruna. Be değoda puyo olta debane e kenakenana, be inam puyonama isane e sauga wapana, naumeki da inam saugawapanama nam kwai kati kotovi.’ ¹⁹ Taumi matapotepotemima. Deō tauna yaba dosina, puyo bo olta? Olta tauna vutuna puyo e kawakawa babauna. ²⁰ Vutuna aubainama aitau da olta isane e sauga wapana, naumeki da tauna yaba matabuna olta debane mate isedie e sausauga wapana. ²¹ Be aitau da tempol isane e sauga wapana, tauna inam tempol isane be aitau da tempol nopone e miamiana mate isane e sausauga wapana. ²² Be aitau da mara isane e sauga wapana, naumeki da tauna Mamaitua na kaba miama be Mamaitua ġominama mate isane e sausauga wapana.

²³ “Taumi tarawatu tauwai katakataidima be Parisi taumi banaga kaikaiyovumima. Tokare gewagewa vavasaġinama ko banavina. Baninama taumi kani anitai dinidima yabedima koi rawadamdamdi da matabudi 10 be dam tenaġa Mamaitua ko uteutena. Inam kaua ġaubaġonama. Be kaua dosidima tarawatue ta kenakenana inam didimana, raunuatoi be waipatutu taumi nam koma voivoiedina. Inam ya gewagewa kaua. Taumi noġone kaua dosidima sibo koya voiedina, muriġa da kaua ġaubaġubodima sibo koya voivoiedina. ²⁴ Taumi tauwai dokadoka matapotepotemima. Taumi kaua ġaubaġubodima ko kitakita yaġeyaġedina, be kaua dosidima ko vava gudegudedina.†

²⁵ “Taumi tarawatu tauwai katakataidima be Parisi taumi banaga kaikaiyovumima. Gewagewa vavasaġinama tokare ko banavina. Baninama taumi keyaka be tebo tauridima ko koġekoġedina, be nopomima danene be kanitoku ya moġavuna, inam vutudi mira. ²⁶ Taumi Parisi matapotepotemima. Taumi noġone keyaka be tebo nopodima ko koġa dokedina, yodibe tauridima mate tokare ta verena.

²⁷ “Taumi tarawatu tauwai katakataidima be Parisi taumi banaga kaikaiyovumima. Gewagewa vavasaġinama tokare ko banavina. Baninama taumi kokoaga waiwaisianama maika. Kokoaga debanama kitanama ya vere kauana, be nponama turiġa be mira ya moġavuna. ²⁸ Be taumi ami yawasanama inam kokoaga maika. Banaga ta kitekitemina da taumi kabe didimana banegimi, be nopomima inam kaiyovu be gewagewa ya moġavuna.

† **23:24:** Gurik baibol nopone umanama ya riuna: Taumi inam maika banaga nabugara ġaubaġonama na kapue ya kenakenana, ya kita be ya kaiporena. Be na kapuma nopone kamel nam i kita be mate ya tego be ya tonogina.

²⁹ “Taumi tarawatu tauwai katakataidima be Parisi taumi banaga kaikaiyovumima. Gewagewa vavasağinama tokare ko banavina. Baninama taumi peroveta be didimana banegidima kokoagidima koi sia yağeyağedi, ³⁰ be ko riuriuna, ‘Değoda tauda wağawağadama adi rağanie sibo tè miana, tauda tokare nam te sagudi be peroveta tei guridi.’

³¹ Inam giudie kowai mağatara munağemina da taumi vutuna peroveta tauvunuğidima natunatudima. ³² Be taumi ami dosima gewagewa a voivoia gosena, tokare taumi ko kaiğavutidina. ³³ Taumi mota, sarama natunatudima! Taumi tokare riukaua da ko nağona gienae, be nam tokare koi moisiri be teneteneğina. ³⁴ Vutuna aubainama taugu yodi uma ya riuemina da peroveta, nuauyauya banegidima be tauwai katakatai ya riuriuporedina ġaromie. Be ġesaudima taumi tokare koi guridi, be ġesaudima ko tuparatudi, be ġesaudima ami sinagogma nopolie kwapue ko riğedi, be ġesaudima koi tarapiriedi be ko tavu waibabaridina meagai da meagai nopolidīga. ³⁵ Vutuna aubainama aitaüğa banaga veredima a vunuvunuğidina adi kovoğama taumi tokare ko pağona. Boni pakane da yodi, didimana banegidima a vunuğidi be kosinidima a darorona. Inam Eibol na parate ya nağda Berekia natunama Sakaraias ġarone ya tavana. Sakaraias tauna olta be tempol poudie koya vunuğina. Inam banegidima matabudi ami dosima a vunuvunuğidina mate kosinidima taumi nimemie ta kenakenana. Vutuna aubainama taumi tokare kovoğa ko pağona. ³⁶ Ya riuri kauemina, da uma kauidima matabudi taumi kimtimima ġaromie ta tubuğana.

*Yesu Jerusalem yai nuaboyena
(Lk 13:34-35)*

³⁷ “O Jerusalem, Jerusalem! Taumi peroveta kowai guridina. Mamaitua banaga e riuriuporağana ġaromie, be taumi ko raraу yekudina! Rağan yatoi kauana taugu è raurubu da sibo è rawateğeimina, kamkam natunatunama mapenama dibune e rawarawa teğeidina maika, be taumi koya tuağaina. ³⁸ Vutuna aubainama Mamaitua ami tempolma tokare e gose be e kena yababana. ³⁹ Be yodi ya riuriuemina da taumi nam ko kita munağegu, naumeki da tokare rağan e tavana, dabudine taumi umanama ko riuna, ‘Tam vutuña Bada isane kwa veraverauna, isamma ka kaisuğusuğuna.’ ”

24

*Rağan damonama matairidima
(Mk 13:1-23; Lk 21:5-12, 16-23)*

¹ Yesu tempol ya gose da ya nāgonāgo be na tauwai muri-watanama ġarone a tavana. Dabudine taudi tempol a kita virevire, Yesu ai katai be a basebasena. ² Be dabudine Yesu taudi ya riuedina, “Yà riuriu kauemina da uma yabedima matabudi yodi ko kitekitedina, tokare nam nama ta kena nonōga ibewa, be matabudi tokare ta rawadabu ririġidina.”

³ Yesu oya Olip debane ya miamia be na tauwai muri-watanama taudiġa Yesu ġarone a tava da ai taravire, be a riuna, “Kwa riuemai, uma kauidima aba raġanine ta tubuġa? Be abaġa matairidima ta tubuġa da ka kitedi be ka kataie da raġan damonama kaiteka maida, be mate nema ka katai bake da tam am kaba verauma raġaninama e tavatava?”

⁴ Be Yesu ya riuna, “Koi kita kaua da nam aitau ei kedadoka waigewemi. ⁵ Baninama banaga toitoi tokare isague ta tava be ta riuna, ‘Taugu vutuna Keriso!’ Be taudi tokare banaga toitoi tai kedadoka waigewedina. ⁶ Be raġanine iġara maida guguridima ko vaie bo madanie varidima ko vaiedina, nam ko naira! Uma kauidima nama tokare ta tubuġana, be inam nam raġan damona, ibewa! ⁷ Dobu da dobu tai kawa ġasigasina, be waiguyau turanama waiguyau mate tai kawa ġasigasina. Be dobu toitoi nopolie meiġora be yoyo tai verautatena. ⁸ Inam kauidima maika kaipakara gomana kaevounama e tepeṭepena tunimuyanama maika, inam tepe pakanama.

⁹ “Inam raġanine taumi tokare ta panimi be babada nime-die ta biri nawemi da taudi ta raukivi gewegewemi be tai gurimina. Be taumi taugu kowai sumaqeguna aubainama, banaga dobu matabuna tokare ta tuaġaiemina. ¹⁰ Inam raġanine banaga toitoi adi waisumaġama ta gosedi be adi banagama adi banagama ta tuaġaiedi be tai kawa biri dobīġana, ¹¹ be peroveta kaikaiyovudima toitoi inam raġanine ta maġatara, be banaga toitoi tai kedadoka waigewedina. ¹² Be gewagewa e moraba, be banaga toitoi adi wainua-paġoma tokare ei kavena. ¹³ Be aitauġa adi waisumaġe ta midi bagibagi be ta raudamoena, taudi tokare ta yawasanana. ¹⁴ Be Mamaitua na waiguyauma varinama verenama tokare dobue banaga matabudi ġarodie ta rau-guguya nawe da banaga ta vaie, muriġa da raġan damonama e tavana.

¹⁵ “Taumi tausiava, uma giunama baninama ko katai kauena, Peroveta Daniel ya riuna da tokare ko kitana gewagewa waimatawarawara vavasaġinama dego nam sibo ya midi, be tokare e midina. Inam kauinama e tubuġana raġanine, ¹⁶ taudi aitauġa Judiama miemienidima naumeiki da naira oyae sibo a naġona. ¹⁷ Inam raġanine, aitau da na

wagapatae* e miamiana, nam vadama nopone e saḡa be na purapurama e ragaudi. ¹⁸ Be nam aitau sipie be na garama ragaudima aubaidima e munaḡa vadae. ¹⁹ Inam raḡandie waiwaivi bogebogedima be waitatau vaudima, taudi tokare piripiri dosidima ta banavidina. ²⁰ Be Mamaitua ġarone ko moiragi da inam raḡandima, nam bodubodue† bo Sabat raḡandie ta tubuḡa, baninama taumi tokare nema naira ko naḡo bako? ²¹ Baninama nuaboya inam raḡandie e gewagewa vavasaḡana tokare ta tubuḡana. Mamaitua dobu yawai tubuḡie da yodi, nam airaḡan uma piripiridima ti tubuḡa rubuna naumeki da yodi. Be uma piripiridima murine nam airaḡan e tubuḡa munaḡa. ²² Be deḡoda Mamaitua inam piripiri raḡandima tai tupodima ibewa, nam aitau tenaḡa tokare ya yawasana. Be na banagama vinevinedima kadi taiye, tauna uma raḡandima tokare e taitupodina. ²³ Be inam raḡandie deḡoda aitau e riuemina, ‘Keriso umanema!’ bo e riuna, ‘Keriso noanema!’ Inam baneginama nam koi sumaḡe! ²⁴ Baninama Keriso kaikaiyovudima, be peroveta kaikaiyovudima tokare ta maḡatara be mataira be anibasa kauidima ta voiedina, be ta raurubu da Mamaitua na vinevinema banegidima mate sibo ai kedadoka waigewedina. ²⁵ Vutuna aubainama ko kita kauana, yaba matabuna kaite è riu wainonoḡimina, muriḡa da inam raḡandima ta tavana.

²⁶ “Vutuna aubainama deḡoda aitau e riuemina, ‘Noanema Keriso, dobu kavakavane.’ Nam ko dobi ko naḡo! Bo deḡoda e riuemina, ‘Keriso umanema vadae.’ Nam koi sumaḡe! ²⁷ Baninama Banaga Natunama na raḡanima ei raḡantenaḡe be keyama maika e kidi, be gunuma matabuna e yana porena. ²⁸ Deḡo musara gurinama e kenakenana, dabudine naboduba‡ ta rawarawa tegeidina.

(Mk 13:24-27; Lk 21:25-27)

²⁹ “Be inam piripiridima raḡandima muridie, suara ei kupi, be nawaravi tokare nam e yana munaḡa. Be gunuma rewapanidima matabudi e gusu waidaberaridi be kipora gunume ta kuruvana.

³⁰ Inam raḡanine nogone Banaga Natunama tokare gunume e maḡatara, da banaga ta kita be ta kataie da inam Banaga Natunama e yovoyovona. Be dobue banaga

* **24:17:** Jius banegidima adi vadama debanama inam ‘wagapata’ maika tabatabanama. Dabudine adi kaba waimiamama. † **24:20:** Gurik baibol nopone nam ‘bodubodu’ ima kenakenana. Be ‘winter’ e kenakenana, inam nam maika bodubodu, be inam tururu ya moraba kauana, tokare teneteneḡinama ei gurimna. ‡ **24:28:** ‘Naboduba’ inam maika kiu isanama ‘vulture’. Taudi musara deḡo e gurina, waiḡapa dabudi ta tavana. Be matabudi a kataienā da musara deḡo dabudi e kenakenana.

matabudi tai sosori be ta ġabana. Be tokare taudi Banaga Natunama rewapanā be neneġara dosinama mate giyou nopone be e yovoyovona ta kitana. ³¹ Dabudine bogigi dosinama e riuriuna raġanina, tauna na aneama e riuporedi da na banagama vinevinedima matabudi dobu isune da isune, be gunuma isune da isune, da ta rawateġeteġeidina.

*Bada na kaba verauma raġanima nam aitau i kataiena
(Mk 13:28-37; Lk 21:29-33)*

³² “Naumeki da damaya kainama ko kita be ġarone ko kataina. Raġanina damaya ragedima ta kini, be rugudima ta gidagidavana, inam raġanina ko kataie da inam bodubodu raġaninama maida e tavatavana. ³³ Inam kauinama teneġinama nama, raġanina taumi inam kauidima gewegewedima ta tubutubuġana ko kitedina, dabudine taumi ko kataie da Bada na kaba verauma raġaninama kaiteka maida. ³⁴ Taugu ya riuriu kauemina, da uma kimtinama nam ei kave, naumeki da inam kauidima tokare matabudi ta tubuġa dokana. ³⁵ Mara be dobu tokare ta samoana, be taugu riuguma nam airaġan e samoan. ³⁶ Nam aitau tenaġa raġan i kataiena da airaġan inam raġaninama e tava. Nam anea marae, Mamaitua Natunama mate nam i kataiena, be Tamanama marae taunaġa ya kataiena.

(Lk 17:26-35)

³⁷ “Banaga Natunama na raġanima maika Noa na raġanie yawasana a tubutubuġana maika. ³⁸ Muriġa da kabaita ya tubuġana, banaga a kanikani, a tegotego, ai naġi be awai naġidina. Nama a voivoia be Noa waga ak nopone ya saġana. ³⁹ Be banaga tokare aba ġarodie e tubuġana, taudi nam ti kataiena. Naumeki da kabaita ya tubutubuġana, taudi matabudi ya karuedi be upa nopone a tonedina. Inam kauinama nama tokare Banaga Natunama na kaba veraue e tubuġana. ⁴⁰ Inam raġanina tautauġoma rabui ta sipisipi be tenaġa tokare anea ta nawena, be tenaġa ta gosena. ⁴¹ Be waiwaivi rabui kani ta rarau suvi, be tenaġa tokare anea ta nawena, be tenaġa ta gosena.

(Lk 12:39-40)

⁴² “Vutuna aubainama raġan matabuna koi neneġanana, baninama ami Badama na kaba verauma raġanima nam ko kataiena. ⁴³ Uma ko noġoti, deġoda vada taupakinama sibo taudanedanene na kaba tavama raġaninama i kataiena, naumeki da tauna tokare na gaburama ya bodame, be baneginama nam na vadae ya saġa be ya danene. ⁴⁴ Vutuna

aubainama taumi mate ko vokaukaua be ko miamia, bani-nama Banaga Natunama na kaba verauma, taumi tokare ko miamia nuababağā be e tavana.

(Lk 12:41-46)

⁴⁵ “Ai taunoya tauna waisumeğina be nuanuauyauyana, da Bada sibo tauna ya vine? Inam taunoyanama na banagama e rabedi be adi kanima e soiedina, taudi ta ġoeğoenä rağanine.

⁴⁶ “Rağanine na Badama e tava munağā be e kitana da na taunoyama na noyama e voivoiena, naumeki da nuavere dosinama inam taunoyanama ġarone. ⁴⁷ Yà riuriu kauemina da Bada na purapurama matabudi tokare inam taunoyanama e ute, be tauna ei badedina. ⁴⁸ Be taunoya değoda e gewagewa be e riuna, ‘Bada bonideğō ya nağō be e miamia watanana.’ ⁴⁹ Be dabudine tauna na banagama e riğedi be tegobua banegidima mate ta kanikani, ta tegotego buana. ⁵⁰ Nama e voivoia nuababağā be na badama e tavanaugh. ⁵¹ Inam rağanine Bada inam taunoya gewagewanama e dourakaraka be banaga kaikaiyovudima adi gabue e boru nawena. Be dabudine tokare ta yakei be gadigadidima ta sanadidi watanedina.

25

Matatapu 10 wainasidima

¹ “Inam rağanine tokare mara na waiguyauma inam maika umanama:

Matatapu matabudi 10 adi rampama a ragaudi be a dobi da nağivau tauğominama verau bodebodenama a nağona. ² Matatapu 5 buebuedima be 5 nuanuauyeuyedima. ³ Matatapu buebuedima adi rampama a ragaudina be karesin nam ti ragauna. ⁴ Be nuanuauyeuyedima taudi rampa be karesin ġesaudima mate a ragaudina. ⁵ Be nağivau tauğominama nam i tava makaina, vutuna aubainama taudi matedima a yado da a kenana.

⁶ “Naumeki da kupi poune be banaga a yogo be a riuna, ‘Nağivau tauğominama kaiteka e tavana! Ko dobi be ko verau beena.’ ⁷ Dabudine matatapu matabudi a midisuğū be adi rampama a vokaukauedina. ⁸ Be matatapu buebuedima adi banagama nuanuauyeuyedima a riuedina, ‘Karesin ko utemai, ama rampama ta gurigurina.’ ⁹ Be taudi a paribeedi be a riuna, ‘Ibewa, karesin nam ruvana da taumi mate tà soie be teneteneğina. Taumi ko nağō da aitauğā karesin ta raraugimaredina taudi ġarodie, be mabimie ami karesinma ko gimarana.’

¹⁰ “Naumeki da taudi karesin gimerinama aubainama keda a nağonağona maika, muridie nağivau tauğominama ya

tavanaugh. Be matatapu aitaugā kaite a vovo kaukauana, taudi naīgivau taugomina^{mā} mate vada nopone wainaī soine a saīga, be matakedya ya guduna.¹¹ Be matatapu buebuedima taudi muriīa a tava be a riuna, ‘Bada, Bada, matakedya kwa kaipore aubaimaima!’¹² Dabudine Bada ya paribeedi be ya riuna, ‘Yà riuriu kauemina da taugu taumi nam e kataiemina.’

¹³ “Vutuna aubainama taumi raīgan matabuna koi neneīganana, baninama Banaga Natunama na kaba verauma raīganinama be na awama taumi nam ko kataienia.

Taunoya sibo ai patutu be noya verenama a voiena Bada aubainama

¹⁴ “Be mate mara na waiguyauma inam maika umanama: Banaga tenaīga muriīa da sibo vaīgai aubainama ya naīgona, be noīgona tauna na taunoyama ya riuedina da tauna na manema ta rabedina.¹⁵ Naumeki da na taunoyama adi noyama ruvane nama mane ya utedina. Taunoya tenaīga 5 tausand Kina ya utena, be īgesaunama 2 tausand Kina ya utena, be īgesaunama 1 tausand Kina ya utena. Yodibe tauna ya naīgona vaīgai aubainama.¹⁶ Be taunoya aitau da 5 tausand ya paīgopāīgona, tauna ya naīgo da manenama ya noye da yai morebi be 5 tausand īgesau ya paīgona.¹⁷ Be nama taunoya aitau da 2 tausand ya paīgopāīgona, tauna mate manenama ya noye da yai morebi be 2 tausand īgesau ya paīgona.¹⁸ Be taunoya aitau da 1 tausand ya paīgopāīgona, tauna ya naīgo da dom ya keri be na badama na manema dome ya semona.

¹⁹ “Taunoya adi badama ya mia gurata da tokare deīgo, be ya tava munaīgana. Be na taunoyama ya rawateīeidina, baninama ya īgoēgoena da sibo ya kataienia, da na taunoyama tauna na manema ai morebidi bo ibewa.²⁰ Dabudine taunoya aitau da 5 tausand Kina paīgopāīgonama, tauna ya tavana 5 tausand īgesaunama mate be ya riuna, ‘Bada, taugu 5 tausand Kina kuya uteguna, be yodi kwa kita 5 tausand Kina īgesaunama mate è tavaitena.’²¹ Dabudine Bada ya riuna, ‘O, tam taunoya veremma! Taugu yaba īgaubonama è utehma be tam kuyai patutu be kuya noye da ya morabana. Vutuna aubainama taugu tam tokare yaba toitoi yà utehm, be kwai badedina. Naumeki da yodi kwa verau be taugu mate tài nuaverena.’

²² “Dabudine taunoya aitau da 2 tausand Kina paīgopāīgonama tauna ya tava be ya riuna, ‘Bada, taugu 2 tausand Kina kuya uteguna, be yodi kwa kita 2 tausand Kina īgesaunama mate è tavaitena.’²³ Dabudine Bada ya riuna, ‘O, tam taunoya veremma! Taugu yaba īgaubonama è

utemna be tam kuyai patutu be kuya noye da ya morabana. Vutuna aubainama taugu tam tokare yaba toitoi yà utem be kwai badedina. Naumeki da yodi kwa verau be taugu mate tài nuaverena.'

²⁴ "Dabudine taunoya aitau da 1 tausand Kina pāgopāgonama tauna ya tava be ya riuna, 'Bada, taugu è kataiena da tam banaga medimedimma. Tam nam pesi ku kumedina be kwa ragaragau yababedina. Tam nam ku sipina be kwa raraу yaba yababana.' ²⁵ Vutuna aubainama taugu tam è nairemna aubainama dom è keri, be am manema dome è semona. Yodi kuya kita umanema am manema ya uteute munağemna.' ²⁶ Dabudine Bada ya riuna, 'Tam taunoya gewagewamma, matagayagayawimma. Tam kuya kataiena da taugu nam pesi è kumedina be yà ragaragau yababedina, be taugu nam e sipina be yà raraу yaba yababana.' ²⁷ Inam naumeki, tam yau manema banike sibo kuya boru be ya noyana. Be taugu è tavana rağanine debane anitai potonama mate sibo è pağona.

²⁸ "Inam taunoyanama gewagewanama ġarone mane ko pağo, be taunoya 10 tausand Kina ya voivoiena, tauna ko utena. ²⁹ Baninama aitau da na noyae ei patutu be e voivoia kauena, tauna tokare yaba ġesaudima mate debane yà taipoto be yà utena. Be aitau na noyama e voivoia waigewagewana, avedi da tauna yaba ġaubonama ġarone e kenakenana, be yağoro taugu tokare ġarone yà kaiporena. ³⁰ Be inam taunoyanama matagayagayawinama ko pore dobige tadiwanawanae, be dabudine e yakei be gadigadinama e sanadididina.'

Mara etara rağaninama

³¹ "Banaga Natunama tokare na kaba waiguyauma boruborumine e mia be ma neneğarina na aneama matabudi mate marae be ta yovona. ³² Be banaga dobu matabuna tauna noğone ta rawateğeidi be tauna e dariğedina, maika tauyosi sipu be gote e daridariğedina nama. ³³ Tauna sipu kasaunama yauwane e biridina, be gote seninama yauwane e biridina.

³⁴ "Dabudine guyau banaga kasaunama yauwane tokare e riuedina, 'Taumi aitaugā Tamaguma yawai aiainimina, ko verau be ami buderima ko pağona. Baninama Tamaguma muriğā da dobu ya voienna, noğone tauna aubaimima mara waiguyaunama ya vokaukaue be ya kenakenana, vutuna yodi koi buderiena. ³⁵ Baninama kani ya karakaraguna rağanine, taumi kani koya utegu be è kanikanina. Be nuaguma ya raraу kasakasana rağanine, taumi upa koya utegu be è tegotegona. Be taugu è vağavavağaina rağanine,

taumi koya riuegu da ami vadae è sağasağana.³⁶ Be gara èwai karuwağewağena rağanine, taumi koyawai garaguna. Be taugu è sidasidana rağanine, taumi koya raberabe kauguna. Taugu dibure è miamiana rağanine, taumi koya vava kitakitaguna.'

³⁷ "Inam rağanine didimana banegidima tauna ta paribee be ta riuna, 'Bada, airağan kani ya karakaratim be tauma kani kè utem? Be airağan nuamma ya rarau kasakasa be tauma upa kè utem?³⁸ Be airağan tauma kè riuem da vadae kuya sağa? Bo airağan gara kuyawai karuwağewağe be tauma gara kè utem?³⁹ Be airağan tam kuya sida bo dibure kuya miamia, be tauma kè vava kitakitam?' ⁴⁰ Dabudine guyau taudi ya paribeedi be ya riuna, 'Yà riuriu kauemina, da aitau tenağga turaguma ġaubonama ġarone vere kuya voiena, inam taugu ġarogue kuya voiena.'

⁴¹ "Dabudine guyau banaga seninama yauwane tokare umanama e riuedina, 'Ko naġo ġavoe, taumi Mamaitua yai tara tautauemina tokare kai karakarata nonoġinama nopone ko naġona. Inam gabunama Mamaitua ya vovo kaukauena, Diaboro be na aneama mate aubaidima. Be taumi mate inam dabudi ko naġona.⁴² Baninama taugu kani ya karakaraguna rağanine, taumi nam kani ko uteguna. Be nuaguma ya rarau kasakasana rağanine, taumi nam upa ko uteguna.⁴³ Be taugu è vaġavavaġaina rağanine, taumi nam ko riuegu da ami vadae è sağana. Be taugu gara èwai karuwağewağena rağanine, taumi nam koi garaguna. Be taugu è sidasida bo dibure è miamiana rağandie, taumi nam ko vakitakitaguna.'

⁴⁴ "Inam rağanine taudi mate ta paribee be ta riuna, 'Bada, airağan kani ya karakaratim, be nuamma ya rarau kasakasa, bo kuya vaġavavaġai, bo gara kuyawai karuwağewağe, bo kuya sida bo dibure kuya miamia, be tauma nam ke sagum?' ⁴⁵ Dabudine guyau taudi tokare e paribeedi be e riuna, 'Yà riuriu kauemina, da aitau tenağga turaguma ġaubonama ġarone nam vere ko voiena, inam taugu mate ġarogue nam ko voiena.'⁴⁶ Inam rağanine taudi tokare ta naġona kovoġa kenakena nonoġine, be didimana banegidima tokare ta naġona yawasana kenakena nonoġine."

26

*Yesu kana kasirama a tomtomna
(Mk 14:1-2; Lk 22:1-2)*

¹ Yesu na giumenta ya kovikovina murine, tauna na tauwai muriwatanama ya riuedina, ² "Taumi koya kataiena da yodi rağan rabui ta kenakenana, da Naġopore soinama e tavana,

be Banaga Natunama banaga nimedie ta boru nawe be ta tuparatuna.”

³ Dabudine pirisi adi babadama be babada ġesaudima mate, taudi pirisi adi badama isanama Kaiyapas na vadae a rawategeidina. ⁴ Be taudi Yesu kana kasirama a tomtomna da waimoisirie dego sibo a vunuġi be ai gurina. ⁵ Be taudi a riuna da uma kauinama nam soi nopone sibo ya tubuġa, baninama deġoda iġara e nuasarina.

*Waivi upa ġabuġabunama Yesu debane ya ġinina
(Mk 14:3-9; Lk 7:37-38; Jn 12:1-8)*

⁶ Yesu tauna Betenima, tauġoma Saemon awai isana Kito, tauna na vadae Yesu ya miamiana. ⁷ Dabudine Yesu ya kanikani be waivi upa ġabuġabunama maesinama dosinama duginama* ya kiroġi be ya tavana. Naumeki da waivi dugi vikinama ya kaipore be upa ġabuġabunama Yesu debane ya ġinina. ⁸ Be na tauwai muriwatanama nama kauinama a kitakitana, taudi nuedima ya karati be a riuna, “Aba aubainama upa ġabuġabunama ewai yakare? ⁹ Uma upanama ġabuġabunama sibo ya raugimare da mane dosinama ya paġo, be manenama banaga waikaruwaġewaġedima sibo ya utedina.”

¹⁰ Dabudine Yesu ya kataie da taudi aba a giugiuena, aubainama tauna ya riuedina, “Aba aubainama uma waivinama ko kawakawa nuaboya? Tauna kaua verenama ya voiena ġarogue. ¹¹ Taumi raġan ya toi kauana banaga waikaruwaġewaġedima mate ko miana. Be taugu nam uma dabudi taumi mate tà mia nonoġa. ¹² Tauna upa ġabuġabunama tunigue ya ġini wainonoġi, be ya kawa nonoġiguna tai kokoagiguna aubainama. ¹³ Taugu yà riuriu kauemina, Deġo da dego dobu matabuna vari verenama ta rarauguguyena raġanine, uma waivinama aba ya voivoiena noġotinama mate tokare ta giu watanena.”

*Judas yai aninana da tauna Yesu e boru dobiġena
(Mk 14:10-11; Lk 22:3-6)*

¹⁴ Dabudine Judas Iskariot, tauna tenaġa tauwai muriwatana 12 nopođie, tauna ya naġo pirisi adi badama ġarone, ¹⁵ be yai taravirena, “Deġoda taugu Yesu nimemie yà boruna, taumi aiyaba tokare taugu ko utegu?” Naumeki da taudi mane a sievi da sirin matabudi 30 be a utena. ¹⁶ Inam raġanine be nokoi ya naġona, Judas tauna keda ya wanewanena, da Yesu taudi nimedie sibo ya boru nawena.

* **26:7:** Taudi yeku isanama ‘Alabasta’ a voie da inam duginama ya tubuġana.

Yesu na tauwai muriwatanama mate Nāgopore soinama a kanina
(Mk 14:12-16; Lk 22:7-13)

¹⁷ Naumeki da Buredi-Nam-Sasasanina soinama rāganinama yawai karena rāganine, tauwai muriwatanama Yesu āgarone a tava da ai taravire be a riuna, “Dēgo dabudi kwa āgoēgoena tauma ka nāgo be Nāgopore soinama ka vokaukaue tam aubaimma da kwa kani?” ¹⁸ Be tauna ya paribeedi be ya riuna, “Ko nāgo meagaie taūgoma tenāga āgarone be ko riuena, ‘Tauwai katakatai umanama ya riuna: Taugu yau rāgania boruborunama kaiteka maida ya tavana. Taugu am vadae yau tauwai muriwatanama mate Nāgopore soinama ka voiena.’” ¹⁹ Naumeki da tauwai muriwatanama aba Yesu ya riuriuedina nama a voiena. Taudi a nāgo be Nāgopore soinama a vokaukauena.

(Mk 14:17-21; Lk 22:14, 21-23; Jn 13:18-30)

²⁰ Be ravi ya tavatavana rāganine, Yesu na tauwai muriwatanama 12 mate a mia gogona be a kanina. ²¹ Taudi a kanikani be Yesu taudi ya riuedina, “Yà riuriu kauemina da nopomie tenāga tokare taugu e boru dobīgeguna.” ²² Dabudine taudi ai nuaboya kaua be tenatenāga a riuna, “Bada, agunai nam taugu, bo?” ²³ Be Yesu ya riuna, “Tauna aitau da rabuigu nimamaima teboe e yovo tenāgana, inam tauna tokare taugu e boru dobīgeguna.” ²⁴ Be Banaga Natunama tokare e gurina girugiruminama porane e riuriuna maika, be gewagewa vavasāginama tauna aitau Banaga Natunama e boruboru dobīgena āgarone e tubūgana. Ya verena da inam baneginama avedi da sibo ya tubūgana.”

²⁵ Be Judas tauna vutuna tokare Yesu e boru dobīgena, tauna mate ya riuna, “Tauwai katakatai, nam taugu, bo?” Be Yesu tauna ya riuena, “Tam āgomimma vutuna kwa riuriuna.”

(Mk 14:22-26; Lk 22:15-20; 1Ko 11:23-25)

²⁶ Taudi yāgoro a kanikani be Yesu buredi ya pāgo da yai kaiwa da ya giva be na tauwai muriwatanama ya utedi be ya riuna, “Ko pāgo be ko kanina, uma inam taugu tubūgiguma.” ²⁷ Inam kauinama murine tauna keyaka ya pāgo, yai kaiwa da ya utedi be ya riuna, “Taumi matabumi uma keyekine ko tegona.” ²⁸ Uma inam kosiniguma waianina aubainama, e raraū āginina banaga toitoi adi gewagewama aninōgota porenama aubainama. ²⁹ Taugu yà riuriuemina da nam waen yà tego munāge, naumeki da Tamaguma na waiguyauma nopone, taumi mate tokare tà tego tenāgana.” ³⁰ Dabudine taudi a saresare kovina murine, taudi a nāgona oya Olip debane.

Yesu ya riuna da Pita tokare tauna e bovienna

(Mk 14:27-31; Lk 22:31-34; Jn 13:36-38)

³¹ Dabudine Yesu na tauwai muriwatanama ya riuedina, “Manaka kupine taumi matabumi tokare ko goseguna, binama girugiruminama porane ya riuna, ‘Taugu tokare tauyosi yà guri be sipu adi kaba miama ta gosedi, be ta daberarana.’

³² Be taugu gurie be yà midisuğu munağana murine, taugu yà gosemi be yà doka da yà nağona Galilima.” ³³ Dabudine Pita ya paribee be ya riuna, “Banaga matabudi tokare ġarome aba e tubutubuğana ta kita be naira ta nağona, be taugu tokare nam yà gosem.” ³⁴ Dabudine Yesu ya riuna, “Yà riuriu kauemna, manaka kupine muriğā da kamkam e riuna, tam tokare rağan rabuiteğā kwa riuna da tam taugu nam ku kataieguna.” ³⁵ Be Pita ya riuna, “Taugu nam airağan tokare yà riuna, Taugu nam tam e kataiemna, be tam kwa gurigurina rağanine, taugu tam mate tà guri tenağana. Be tauwai muriwatanana ġesaudima taudi mate riunama teneğinama nama a vatona.

Yesu Getsemenima ya moimoiragina

(Mk 14:32-34; Lk 22:39-46)

³⁶ Naumeki da Yesu na tauwai muriwatanama mate a nağona dobu isanama Getsemenima, be dabudine taudi ya riuedina, “Taumi uma dabudine ko miamia be taugu yà nağno noa dabudine yà moiragina.” ³⁷ Dabudine tauna Pita be Sebedi natunatunama rabui yai dokedi, be mate a nağona. Inam rağanine tauna nuaboya yai kare, be nuanama ya gewagewa kauana. ³⁸ Be ya riuedina, “Taugu nopoguma nuaboya ya moğavuna, be kaiteka nuaboya ei guriguna. Uma dabudi ko mia be tai neneğanana.”

³⁹ Inam rağanine Yesu ya gosedi be tauna ya taunağō ġavoe da doğae ya raupari be umanama ya moiragina, “Mamai, değoda teneteneğina bo ibewa, da ġorağoranama yodi e tavana nam sibo è sigue. Be avedi, nam taugu yau ġoanama kwa voie, be tam am ġoanama kwa voien.” ⁴⁰ Dabudine tauna ya tava munağā na tauwai muriwatanama ġarodie, da e kitedina be taudi a kenakenana, dabudine Pita ya riuena, “Taumi tokare suara rovanama tenağā nopone koya mia be koyai neneğana bo ibewa? ⁴¹ Ko mia be koi neneğana, be ko moiragi da nam raurubue ko beku! Aruimima moiragi e ġoeğöena, be tubuğimima e vovo gwağagwağana.”

⁴² Naumeki da Bada rağan aniwai rabuinama ya munağā be ya moiragina, “Mamai, değoda uma ġorağoranama kai porenama nam kwa ġoe, naumeki da tam am ġoanama kwa voien.” ⁴³ Rağanine tauna ya tava munağana na

tauwai muriwatanama ġarodie, da e kitedina be taudi a kena munaġana, baninama matedima a yado kauana.

⁴⁴ Naumeki da tauna ya gosedi da ya munaġa, be raġan aniwai rabuiteġanama ya moiragi be giudima teneġidima ya vatodina. ⁴⁵ Be tauna na tauwai muriwatanama ġarodie ya tava munaġa be ya riuedina, “Taumi yaġoro ko kena be ko sipesipere, bo? Ko kita, Banaga Natunama ta boru dobiġena, gewagewa banegidima nimedie raġaninama kaiteka ya tavana. ⁴⁶ Ko midisūgu be tà naġona, tauboru dobiġeguma kaiteka umanema ya tavana.”

*Yesu banaga nimedie a boru nawena
(Mk 14:43-50; Lk 22:47-53; Jn 18:2-12)*

⁴⁷ Yesu yaġoro ya giugiu be Judas tauna tenaġa tauwai muriwatana matabudi 12 nopolie, tauna ya tavana. Be banaga patara ġesaudima mate a tavana, taudi nimedie kwatikwati be kwaibubu a ragaudina. Taudi inam pirisi adi babadama, be babada dosidima a riuporedina. ⁴⁸ Be tauborudobiġa mataira aba e voiena, patara ya riuedina, “Deġo baneginama yàwai suruvena, tauna vutuna ami ġoanama, tauna ko pani be koi doka nawena!” ⁴⁹ Naumeki da Judas tauna didimaninama ya naġo ġomana Yesu ġarone, be ya riuna, “Ebom tauwai katakatai.” Naumeki da yai suruvena. ⁵⁰ Be Yesu ya riuna, “Yau tura, uma dabudine kuya tavana, naumeki da am ġoama kwa voiena.” Dabudine tautauġoma Yesu a vunuġi be a kaididina. ⁵¹ Inam raġanine Yesu na tauwai muriwatanama tenaġa, kwatikwati ya kaikai suġuna, pirisi adi badama na taunoyama beanama ya dourakana.

⁵² Be Yesu ya riuen, “Am kwatikwatima kwa kaididi, baninama aitau da kwatikwatie ta iġaġarana, inam banegidima taudi tokare kwatikwatie tai guridina. ⁵³ Deġoda taugu sibo ē ġoena, tokare Tamaguma ēi baġa be tauna waīgħap anea toitoi ya riuporaġħa saguguma aubainama. ⁵⁴ Be deġoda nama yà voiana, tokare girugiruminama porane aba ya riuriuen sibo a tubuġħana, be tokare nam a tubuġħa.”

⁵⁵ Inam dabudine Yesu patara ya riuedina, “Taumi kwaibubu be kwatikwati mate koya tavana taugu ko vunuġigu, banaga danedanenena maika, bo? Taugu raġan patapatanama tempol nopone ē mia be ēwai katakataina, be taumi nam ko vunuġiguna. ⁵⁶ Be uma kauidima matabudi ta tubutubuġħana, baninama boni peroveta a girugirumidina ruvane.” Dabudine tauwai muriwatana matabudi Yesu a gose, be taudi naira a naġona.

*Yesu tauwai tarapiri babadidima nōgodie ya midina
(Mk 14:53-65; Lk 22:54-71; Jn 18:12-24)*

⁵⁷ Be taudi aitaugā Yesu a panipanina, naumeki da ai doka nawena pirisi adi badama Kaiyapas ġarone. Inam dabudine tarawatu tauwai katakataidima be babada ġesaudima mate matabudi ai rawategeidina. ⁵⁸ Be Pita Yesu yai muriwatane be madanie muriġa ya veraverauna, naumeki da ya saġa ya naġona anikaba etara gabune, pirisi adi badama na vadae. Dabudine tauna taubodama mate a mia be yawai rabana da nema sibo Yesu a etara bakena ya kitana.

⁵⁹ Be pirisi adi babadama be etara babadidima matabudi, a rara rubuna da giu kaikaiyovudima dego sibo a banavidi, be inam giudie Yesu sibo ai gurina. ⁶⁰ Be matamata kaikaiyovudima toitoi dabudine a tavana, be yaġoro taudi nam dego keda ti banavina da Yesu sibo ai guri. Dabudine banaga rabui a verau ⁶¹ be a riuna, “Uma tauġominama umanama ya riuna, ‘Taugu teneġinama da Mamaitua na tempolma ya katiwei be raġan rabuitegħa nopolie ya keri munaġena.’”

⁶² Dabudine pirisi adi badama ya midisuġu be ya riuna, “Uma banegidima tawai wavumna tokare kwa paribeedi bo ibewa?” ⁶³ Be Yesu tauna nam aiyaba i riuena. Naumeki da pirisi adi badama Yesu ya riuena, “Mamaitua yawayawasaninama isane ya riuriu vavasaġemna, kwa riuemai: Tam vutuna Keriso, Mamaitua Natuna, bo?” ⁶⁴ Be Yesu ya riuna, “Ee, inam vutuna kuya vatona. Be ya riuemina: Tokare taumi Banaga Natunama Mamaitua wairewapaninama kasaunama yauwane e mia, be ma giyouna marae be e yovoyovona ko kitana.”

⁶⁵ Dabudine pirisi adi badama tauname na garama ya sika be ya riuna, “Yodi koya vaie, tauna ewai diboġana. Yodi nam matamata ġesaudima tà wanedi. ⁶⁶ Taumi nema kowai noġota bako?” Be taudi a paribee be a riuna, “Tauna naumeki da e gurina.”

⁶⁷ Dabudine taudi Yesu noġonama a kaviso be a paitina. Be ġesaudima a raunevanevakau ⁶⁸ be a riuna, “Keriso kwai nasi, aitau kabe ya riġam?”

*Pita Yesu ya boviena
(Mk 14:66-72; Lk 22:56-62; Jn 18:25-27)*

⁶⁹ Be Pita tauna anikaba etara gabunama diane ya miamia be taunoya waivinama ġarone ya tava, be ya riuena, “Tam mate Galili Yesunama mate koya naġonaġona.” ⁷⁰ Be Pita taudi matabudi noġodie ya bovi be ya riuna, “Tam aba kwa giugiuena, taugu nam e kataieno.” ⁷¹ Dabudine tauna ġavoe ya dobi ya naġonaġo be waivi ġesaunama tauna ya kita, be

na banagama ya riuedina, “Noa tauğominama mate Nasaret Yesunama mate a nağonağona.”⁷² Be Pita ya bovi munağɑ, da ya rauseri be ya riuna, “Taugu inam tauğominama nam e kataiena.”⁷³ Naumeki da a mia rağan ġaubonağɑ be banaga aitauğɑ diane a midimidina Pita a riuena, “Inam riukaua, tam mate turedima. Tam bonapakamma ewai mağatarana ka vaivaiena.”⁷⁴ Be Pita ya riu vavasağɑ be ya riuna, “Taugu yà riuriu kauana! Inam tauğominama taugu nam e kataiena. Değoda taugu yà kaiyovuna, naumeki da Mamaitua tokare gewagewa ġarogue e voienna.”

Pita nama ya giugiuna inam rağanine kamkam ya riuna.⁷⁵ Dabudine Yesu aba Pita ya riuriuena ya noğotina, “Muriğɑ da kamkam e riuna, tam tokare rağan rabuiteğɑ kwa bovieguna.” Dabudine Pita ya dobi ya nağō be ya ġaba guratana.

27

*Yesu a verauğena Paelat ġarone
(Mk 15:1; Lk 22:66; 23:1; Jn 18:28)*

¹ Rağanboiboi kupinağɑ pirisi adi babadama matabudi, be babada ġesaudima adi ogama a taragine, da Yesu tai gurina. ² Dabudine taudi Yesu nimanama a panidi be ai doka nawena, be gabeman isanama Paelat nimane a boruna.

*Judas taunağayai guri munağena
(Ap 1:16-19)*

³ Be Judas tauborudobiğɑ tauna e vaiena be Yesu waigurinama a giugiuena, inam rağanine tauna yai sosori, be yai nuaboya kauana. Naumeki da Judas ya munağana pirisi adi babadama, be babada ġesaudima ġarodie be sirin 30 taudi ya ute munağedi, ⁴ be ya riuna, “Taugu gewagewa è voienna. Taugu banaga verenama è boru dobiğɑ yababe be tokare tai guri, be kosininama e darorona.” Be taudi a paribeena, “Inam tam am vitama, be nam tauma ama nuaboya.” ⁵ Naumeki da Judas mane tempol nopone ya yaraiedi, be tauna ya nağō be ya sopana.

⁶ Dabudine pirisi adi badama manedima ya tama be ya riuna, “Tarawatu nam ima waianinana, da uma manedima tempol manenama nopone tà biridi, baninama uma inam vunuğɑ manenama.”⁷ Dabudine taudi ai oga da inam manene, gurewa tauvoienama na doğama ta gimeri be dabudine vağavağai adi kokoagama tai tubuğina.⁸ Vutuna aubainama inam dobunama yodi tawai isana ‘Kosina Dobunama’. ⁹ Inam kauidima peroveta Jeremaia boni aba ya riuriuena, ruvane nama ya tubuğana, inam umanama,

Israel banegidima tauna na maesama a boruna, inam sirin matabudi 30. Be inam sirindima 30 ta ragaudi
 10 be gurewa tauvoienama na *doğama* ta gimerina, Bada ya riuriuna nama.

Paelat Yesu ya etarena

(Mk 15:2-15; Lk 23:2-25; Jn 18:29-40)

11 Naumeki da Yesu gabeman *ñoñone* ya midi be tauna Yesu yai taravirena, “Tam Jius adi guyau, bo?” Be Yesu ya riuna, “Ee, inam vutuna kuya vatona.”

12 Dabudine pirisi adi babadama be babada *gesaudima* taudi Yesu awai wavuna, be tauna nam aiyaba i giuena.
 13 Naumeki da Paelat Yesu yai taravirena, “Tam banaga tawai wavumna, kwa vaivaiedi bo ibewa?” 14 Be Yesu nam aba i paribe a rubudina. Vutuna aubainama gabeman tauna ya basena.

15 Be gabeman tauna na vaivaima da soi nopolie banaga adi *ñoñana* aitau dibure ta vinevinena, vutuna e kaikaiporena. 16 Be inam *rañanine* gewagewa baneginama isanama Barabas, tauna *isanañonagonama* dibure ya miamiana. 17 Be patara awai rawategeidina *rañanine*, Paelat yai taraviredi be ya riuna, “Taumi dego tauna ko *goeñena* ya kaipore? Barabas bo Yesu, tawai isana Keriso?” 18 Paelat nama ya riuna, baninama tauna ya kataie da pirisi Yesu a unurena aubainama tauna nimane a boruna.

19 Naumeki da Paelat etara gabune ya miamia, be na visarama vari ya riuporena tauna *garone* be ya riuna, “Inam baneginama *garone* nam tam aiyaba kwa voie, tauna banaga verenama. Baninama inam baneginama kana taiye taugu kupie rauboni gewagewa kaukauinama è kitana.” 20 Be pirisi adi babadama be babada *gesaudima* patara a riuedina da taudi sibo Barabas kaiporenama aubainama Paelat sibo ai *bañana*, be Yesu sibo yai gurina.

21 Be Paelat patara yai taraviredi be ya riuna, “Uma banegidima rabui be taumi dego tauna ko *goeñena* ya kaipore?” Be taudi a riuna, “Barabas kwa kaiporena.” 22 Dabudine Paelat ya riuna, “Be Yesu tawai isana ‘Keriso’, nema ya bake?” Be taudi matabudi a riuna, “Kwa tuparatuna!” 23 Be Paelat ya riuna, “Aba aubainama ya tuparatu? Tauna aiyaba gewagewanama ya voie?” Be taudi a rasa gurata be a riuna, “Kwa tuparatuna!”

24 Be Paelat ya raurubu be ya kita da nam keda dego i banavina, vutuna aubainama tauna patara matedie ni manama upae ya *koñä* be ya riuna, “Taugu uma baneginama e gurina, wavunama nam taugu ya paño. Inam taumiña ami wavuma.” 25 Dabudine banaga matabudi a riuna, “Naumeki

da tauna kosininama e rauğini, be wavunama tauma ama sedama mate ka kiroğina.”

²⁶ Inam rağanine Paelat tauna Barabas ya kaipore da ya nağona, be Yesu inam na tauiğarama nimedie ya boruna da taudi ta riğā be ta tuparatuna.

Tauiğara Yesu ai varavarana
(Mk 15:16-20; Jn 19:2-5)

²⁷ Naumeki da tauiğara Yesu ai doka sağena Paelat na kaba miae. Be dabudine tauiğara matabudi ai rawateğeidina Yesu noğone. ²⁸ Be taudi na garama a ġigi pore, be gara ġesau sabasabanama ai kotena. ²⁹ Yodibe taudi gedara a pinou be Yesu debane ai mieni be a virididina, be diğona nimanama kasaune ai pağona. Yodibe taudi Yesu noğone tuapikedie a raupari, da ai varavara be a riuna, “Ebom, Jius adi guyauma.” ³⁰ Naumeki da Yesu a kaviso be diğona nimane a paño, be debanama a riğā yababayababena. ³¹ Be taudi ai varavara ya kovikovina, gara sabasabanama a kaipore, be tauna na garama ai kote munağena. Yodibe ai doka nawena tuparatunama aubainama.

Yesu a tuparatuna
(Mk 15:21-31; Lk 23:26-43; Jn 19:16-27)

³² Be kedae tauğoma tenağā a banavina, isanama Saemon, tauna Sairin meagainama baneginama. Dabudine tauiğara inam tauğominama a segeri da Yesu na korosima ya kiroğina. ³³ Naumeki da taudi dobu isanama ‘Golgotama’ a tavana. Riu ‘Golgota’ baninama inam ‘debagarere’. ³⁴ Dabudine taudi waen be musara kavisonama mate a gwada tenağē, be Yesu a utena da sibo ya tegona. Be tauna ya remorubu da ei damina be tegonama ya tuağaiena. ³⁵ Naumeki da taudi Yesu korosie a tuparatu be na garama ai kasiedina. Be aitau kasie yawai rewapanana, tauna değō garanama ya ġoeğöena, nama ya pağona. ³⁶ Be dabudine taudi a mia be Yesu a rabe be a kitakita watanina. ³⁷ Be aba aubainama Yesu a tuparatuna, vutuna kai ġaübónama bogane umanama a girumana

UMA TAUNA YESU, JIUS ADI GUYAUMA

Yodibe Yesu debane korosi bogane kainama a tutuna. ³⁸ Be inam dabudine taudi banaga danedanenedima rabui mate a tuparatudina, tenağā Yesu kasaune be tenağā senine. ³⁹ Be banaga aitauğā kedağā a nağonağona, taudi debedima a kwadiedi da Yesu ai dibogi, ⁴⁰ be a riuriuna, “Iyo! Tam dokane kuya riuna da tempol kwa katiwei be rağan rabuiteğā nopodie kwa keri munağena. Yodi kwai yawasana munağem. Değoda tam Mamaitua Natunama, naumeki da yodi korosi boganağā kwa yovo be ka kitam.”

⁴¹ Inam kauinama teneğine pirisi adi babadama be tarawatu tauwai katakataidima, be babada ġesaudima mate taudi Yesu ai varavara, be a riuna, ⁴² “Tauna banaga ġesaudima yawai yawasanidina, be yodi taunaġa nam tokare ei yawasana munaġe! Deġoda tauna Israel guyaunama, naumeki da korosi boganaġa e yovo be tauma kai sumaġena. ⁴³ Tauna Mamaitua ewai sumaġe be ya riuriuna, ‘Taugu Mamaitua Natunama.’ Yodi kabe tà kita Mamaitua tauna waiyawasaninama e ġoeġoe bo ibewa.” ⁴⁴ Be banaga danedanenedima rabui Yesu mate a tupatuparatudina, taudi mate Yesu ai dibogħina.

Yesu ya gurina

(Mk 15:33-41; Lk 23:44-49; Jn 19:28-30)

⁴⁵ Be suaratopu dobu yai kupikupina naumeki da ravie 3-okoroki paratinama. ⁴⁶ Be ravie 3-okoroki nama Yesu bonanama dosine umanama ya riuna, “*Eli, Eli, lema sabaktani?*” Uma giunama baninama inam umanama, “Yau Mamaituama, yau Mamaituama, aba aubainama kuya gose poregu?”

⁴⁷ Be banaga ġesaudima dabudine diane a midimidina nama a vaivaiena, taudi a riuna, “Koi beavaia! Tauna Elaija e yokoyokoena!” ⁴⁸ Be dabudine tauġoma tenaġa anitaiyo ya paġo, be ya manini ya saġa ya naġo da waen ġoraġorane yai sonom da kai isune ya pani be Yesu sibo yai tegona, ⁴⁹ be banaga ġesaudima a riuna, “Nakarua, kwa gose! Elaija e yovoyovona ei yawasanina tà kitana.”

⁵⁰ Be Yesu bonanama dosine ya yogona, naumeki da tauname aruinama ya raukaigosena. ⁵¹ Inam kauinama ya tubutubuġana raġanine, gara tempol nopone matakedwa waisaurinama, ya nuasika poraġa da ma nevana a kenana. Be doġa ya gusu be yeku a nuasenana. ⁵² Be inam raġanine kokoaga gayedima a nuaporaġa be banaga babaudima guriguridima toitoi a midisuġu munaġana. ⁵³ Be tauna na kaba midisuġu munaġama murine, taudi kokoaga a dobi pore be a naġona meagai babaune, be banaga toitoi ġarodie a maġatarana.

⁵⁴ Be tori matanama na tauiġarama mate Yesu a rabe be a kitakita watanina, taudi yoyo be yaba matabudi a tubutubuġana, nama a kitekitedina, taudi a naira kaua be a riuna, “Uma tauna inam riukaua Mamaitua Natunama!”

⁵⁵ Be dabudine waiwaivi mate, taudi madanie a midi be awai kitana. Inam waiwaividima taudi Galilima Yesu waimuriwatanenama ai karena, be aba tauna ya ġoeġoena nama a sagusaguna. ⁵⁶ Be inam waiwaividima matabudi

nopodie inam Meri Magdalin, Meri Jeims be Jousep tinedima, be Sebedi natunatunama tinedima.

Yesu ai kokoagina

(Mk 15:42-47; Lk 23:50-56; Jn 19:38-42)

⁵⁷ Be ravi ya tavatavana paratine, waiguyau baneginama Arimatia meagaine be ya tavana, isanama Jousep. Inam baneginama tauna mate Yesu tauwai muriwatane-nama. ⁵⁸ Tauna ya na o Paelat  arone be yai ba ana da Yesu tubu inama sibo ya pa ona. Naumeki da Paelat na taui arama ya riuedi, da Yesu tubu inama Jousep a utena. ⁵⁹ Naumeki da Jousep Yesu tubu inama ya pa o, be gara  avogavoridie ya sumana. ⁶⁰ Be Jousep tauname na kokoagama vaunama yeku vasivasi wainono inama nopone, Yesu tubu inama ya boruna. Yodibe yeku dosinama yai rawakui da kokoaga matakedanama yai miditom, be ya na ona. ⁶¹ Be Meri Magdalin be Meri  esaunama taudi kokoaga no one no o a miamiana.

Kokoaga taurabenama

⁶² Ra an ya tom da pomainama Sabat ra anine, be pirisi adi babadama be Parisi a na o Paelat  arone be a riuna, ⁶³ “Bada, tauma ya oro ka no onogotina da uma baneginama kaikaiyovunama dokane yawai yawasanana umanama ya riuna, ‘Taugu tokare ra an aniwai rabuite ane y a midis gu muna ana.’” ⁶⁴ Vutuna aubainama kawai ba amna da kokoaga kwa gudu kaue be taubodama kokoaga ta rabena naumeki da ra an wairabuite anama e kovina. De oda na tauwai muriwatanama ta tava be tubu inama ta danene, be ta na o da banaga ta riuedina, ‘Yesu kaite ya midis gu muna ana.’” De oda inam nama e tubu ana, naumeki da inam kaiyovunama tokare kaiyovu dokanama ei moraba guratena.”

⁶⁵ Dabudine Paelat taudi ya riuedina, “Naumeki, taui ara y a riuporedi da taumi mate ko na o be kokoaga ta rabena, be ami no otama ruvane nama ko gudu waikaikaina.” ⁶⁶ Naumeki da taudi a na o da kokoaga a gudu waikaikai ya kovi, yodibe taui ara kokoaga matakedanama a midi  ag ari be kokoaga a rabena.

28

Yesu ya midis gu muna ana

(Mk 16:1-11; Lk 24:1-12; Jn 20:1-18)

¹ Sabat ra aninama murine, pomainama Sande ra antotom, Meri Magdalin be Meri  esau mate a na ona kokoaga kivunama aubainama. ² Inam ra anine anea ya

yovoyovona, yoyo dosinama ya tubuğana. Be anea ya na gó kokoagae be yeku dosinama kokoaga matakedenama waimiditomnama yai rawakui ǵavoe ya na gó, be tauna yekunama debane ya miana.³ Be anea kitannama maika keama, be na garama ǵavoǵavora tunutununama.⁴ Dabudine tauiǵara taudi a naira kauana, be naira ya kawa gusugusudi be a guri gidavana.

⁵ Naumeki da anea waiwaivi ya riuedina, “Nam ko naira! Taugu è kataiena da taumi Yesu a tuparatuna, vutuna ko wanewanena.⁶ Tauna nam uma dabudine. Tauna kaite ya midisuǵu munaǵana, boni ya riuriuna maika. Ko verau be na kaba kenama gabunama ko kita.⁷ Be waiǵapa ko na gó da na tauwai muriwatanama umanama ko riuedina, ‘Yesu ya guri be ya midisuǵu munaǵana, be yodi ya doka be e na gónaǵóna Galilima, be dabudine taumi tokare tauna ko kitana.’ Inam vutunaǵa è riuemina.”

⁸ Naumeki da waiwaivi kokoaga a gosena, nopolima naira be mosari ya moǵavuna, be a manini a na góna tauwai muriwatanama riuedima aubainama.⁹ Taudi a na gónaǵó be Yesu yai raǵantenaǵe da ǵarodie ya tava be ya riuna, “Ebom.” Be waiwaivi tauna ǵarone a na gó da tuapikedie a raupari, be kaǵanama a kaididi be a rauduneena.¹⁰ Dabudine Yesu taudi ya riuedina, “Nam ko naira! Ko na gó be tasitasiguma ko riuedi da ta na góna Galilima. Be dabudine taudi taugu ta kitaguna.”

Tauiǵara pirisi adi babadama ai varidina

¹¹ Naumeki da waiwaivi keda a na gónaǵóna maika, tauiǵara a na góna meagaie pirisi adi babadama ǵarodie, be yaba matabudi a tubutubuğana ai varidina.¹² Dabudine pirisi adi babadama be babada ǵesaudima mate ai boru be adi ogama a taraginá. Yodibe tauiǵara mane dosinama a utedi¹³ be a riuedina, “Ko na gó be banaga umanama koi varidina, ‘Tauma kupie kè kena nuakoa, be debamaie Yesu na tauwai muriwatanama a tava be Yesu tubuğinama a danenena.’¹⁴ Be deǵoda gabeman uma giunama ima vaie, tokare tauma ka gwayedı da nam aba gewagewanama ko banavi.”¹⁵ Naumeki da tauiǵara mane a ragaudi be aba pirisi be babada ǵesaudima a riuriuedina nama a voiedina. Be inam gututunama Jius nopone ya daberarana, naumeki da yodi.

Yesu na tauwai muriwatanama ya riupore nawedina dobu matabuna nopolie

¹⁶ Inam raǵanine tauwai muriwatana matabudi 11 a na góna Galilima. Dabudine taudi a na góna oyae deǵo Yesu

dokane ya riuriuedina dabudine.¹⁷ Be rağanine taudi Yesu a kitakitana, dabudine a rauduneena, be ġesaudima taudi a noğota bekubekuna.¹⁸ Naumeki da Yesu taudi ġarodie ya tava be ya riuna, “Rewapana marae, be dobue matabudi Mamaitua taugu ya uteguna.¹⁹ Vutuna aubainama ko nağó be banaga dobu matabuna nopone ko voiedi da yau tauwai muriwatanama ta tubuğana. Be koi babataitodina Tamanama, Natunama be Arua Babau isedie.²⁰ Be aba è riuriu vavasağemina, yabedima matabudi taudi koi katakataidi da ta voteyeteyedina. Be yà riuriu kauemina da taugu rağan matabuna taumi mate, naumeki da rağan damone.”

Mak

*Jon tauwai babataito na rauuguguyama
(Mt 3:1-12; Lk 3:1-18; Jn 1:19-28)*

¹ Mamaitua Natunama, Yesu Tauwai yawasana varinama verenama umanama yai karena. ² Maika nema peroveta Aisaia ya girugirumiña nama, Mamaitua ya riuna, “Taugu tokare tauwai noyanoya yà riupore dokena da tauna am kedama e sepana.

³ “Banaga dobu kavakavane e yokoyokona, ‘Keda ko kawa vereveredi be ko kawa didimanidi be Bada e veraver-auna.’ ”

⁴ Naumeki da Jon dobu kavakavane ya mağatara be yawai babataito be noğota viravira ya rarauguguyama da Mamaitua banaga adi gewagewama sibo ya noğota poredina.

⁵ Banaga toitoi Juda provins nopone be Jerusalem meagaine matabudi a dobi a nağona Jon ġarone. Dabudine taudi adi gewagewama ai mağataridi be Jon Jodan upane yai babataitodina. ⁶ Jon na garama kamel vuvuġine voivoienama ya koteotena. Be musara kopinama kwarikwarinama yai boretaie be na kanima kapau be dobira iwavinama.

⁷ Tauna banaga umanama yai varidina, “Banaga murigue e veraveraura tauna yai rewapanava vavasaġħana, nam maika taugu. Taugu nam veregu da yà raudune be na kaġasumama yà kaiporedi. ⁸ Taugu upakavakavae yàwai babataitomina, be tauna tokare Arua Babaue ei babataitomina.”

*Yesu na babataito be na raurubuma
(Mt 3:13-4:11; Lk 3:21-22; 4:1-13)*

⁹ Inam raġandie Yesu Nasaret meagaine Galili provins nopone be ya verauna, da Jon Jodan upane Yesu yai babataiton. ¹⁰ Raġanine Yesu upae be ya potipoti tavana, tauna e kitana be mara yai raġantenäġe da ya nuaporaġa be arua ya yovoyovona ġarone maika kiu gabubu. ¹¹ Dabudine bona marae ya riuna, “Tam taugu natuġomiguma be taugu yàwai nuaverena ġarome.”

¹² Naumeki da Arua Yesu yai doka nawena dobu kavakavane. ¹³ Be inam dabudine tauna ya miana raġan matabudi 40 be Seitan Yesu ya raurubuna. Be inam dabudine dobira museridima mate be anea a dobi be a saguna.

*Yesu tauwai sagida 4 ya yokoedina
(Mt 4:12-22; Lk 4:14-15; 5:1-11)*

¹⁴ Raġanine Jon dibure a boruboru nawena, murine Yesu ya nağona Galilima be Mamaitua varinama verenama ya

rauguguyena. ¹⁵ Yesu ya riuna, “Raḡan kaua ya tavana be Mamaitua na waiguyauma kaiteka e tavatavana da Mamaitua na waibadama ei karena. Vutuna aubainama ami gewagewama ko kuvesidi be vari verenama koi sumaḡena.”

¹⁶ Raḡanine Yesu Galilima yawawa dianaḡa ya naḡonaḡo be tauwai sagida rabui ya kitedina, Saemon be tasinama Endru taudi sagide iyana a konekonedina. ¹⁷ Be Yesu ya riuedina, “Koi muriwatanegu be taugu yāi katakataimi da banaga ko konedina.” ¹⁸ Raḡanine Yesu nama ya riuriuedina, taudi waīgāpa adi sagidama a gosaḡa be tauna ai muriwatanena.

¹⁹ Dabudine tauna ya taunaḡo ġaubonāḡa be Sebedi natunama Jeims tasinama Jon mate wagae ya kitedina, adi sagidama a kawakawa batebatedina. ²⁰ Raḡanine Yesu taudi ya kitekitedina, tauna ya yokoedi be taudi tamedima Sebedi be na yarayaragama mate wagae a gosedi be Yesu ai muriwatanena.

*Tauḡoma penama kokukokunama
(Lk 4:31-37)*

²¹ Yesu be na tauwai muriwatanama a verauna Kabeniam meagaine, be Sabat raḡanine Yesu ya naḡona sinagog nopone be waikatakatai yai karena. ²² Dabudine banaga aitaūga na waikatakataima nama a vaivaiena, taudi a basena, binama tauna nam maika tarawatu tauwai katakataidi be tauna na waikatakataima rewapana mate.

²³ Dabudine penama tauḡoma kokukokunama ya saḡa sinagog nopone ya yogo be ya riuna, ²⁴ “Nasaret Yesumma, tam am noyama aba tauma ġaromaie? Tam uma dabudine kuya tavana kwa kawa gewagewamai, bo? Taugu ē kataiena tam aitau. Tam Mamaitua na Taunoya babauma.” ²⁵ Yesu arua gewagewanama ya riutuaḡaie be ya riuna, “Kwai nuatuḡu be tauḡominama kwa dobi pore!” ²⁶ Dabudine arua gewagewanama tauḡoma ya kawa gusugusu, ya kawa yogoyogo be ya dobi porena.

²⁷ Banaga matabudi a base be ai taraviravira be a riuna, “Uma aba kauina? Inam waikatakatai vauna, bo? Rewapana mate tauna arua gewegewedima mate e riuedi be ta vovo teyeteyena.” ²⁸ Naumeki da dabudine Yesu varinama ya daberara makaina Galili provinsnama nopone.

*Yesu Saemon Pita rawanama yai yawasanina
(Mt 8:14-15; Lk 4:38-39)*

²⁹ Yesu na tauwai muriwatanama mate be Jeims da Jon sinagog a gose be didimaninama a naḡona Saemon be Endru adi vadae. ³⁰ Saemon rawanama sida poyapoya ya paḡo be gunie ya kenakenana. Be raḡanine Yesu ya tavatavana, tauna inam sidanama ai varina. ³¹ Yesu ya naḡo waivinama ġorone

da nimane ya kaididi be ya kawa midisuġuna. Dabudine poyapoya waivi ya gose be tauna adi kanima soienama yai karena.

Yesu banaga toitoi yai yawasanidi be dobu wainuatuġune ya moimoiragina

(Mt 4:23-25; 8:16-17; Lk 4:40-44)

³² Inam ravine suara ya yovoyovona murine banaga adi banagama sidesidedima be aitaūga penama kokukokudima a verauġedina Yesu ġarone. ³³ Banaga matabudi meagaie miemienidima vada matakedane ai rawateġeidina. ³⁴ Be Yesu banaga aitaūga sida tabu be tabu ragaragaudima yai yawasanidi be penama toitoi ya tavu dobiġedina. Be Yesu penama ya kauedi da nam aba ti giuena, baninama taudi a kataie da Yesu tauna aitau.

³⁵ Raġanboiboi kupinaġa muriġa da raġan ya yanana, Yesu ya midisuġu da vada be meagai ya gosedi be ya naġona dobu wainuatoitoine dabudine ya moiragina. ³⁶ Be Saemon na varoroma ġesaudima mate a naġona Yesu wanenama aubainama. ³⁷ Be raġanine Yesu a banabanavina, taudi a riuna, “Banaga matabudi tam ta wanewanemna.” ³⁸ Yesu ya paribeedi be ya riuna, “Tà naġo wari kedāġa be uma meagainama diane meagaidima ġarodiġa mate yà rauguguyana, baninama taugu vutuna aubainama ē yovona.” ³⁹ Naumeki da Yesu Galili nponaġa ya babara naġo be sinagog noppodīga ya rarauguguya be penama ya tavutavu dobiġedina.

Yesu tauġoma kito paġopaġonama yai yawasanina

(Mt 8:1-4; Lk 5:12-16)

⁴⁰ Tauġoma kito paġopaġonama ya verau Yesu noġone be doġae ya raupari da sagu yai baġe be ya riuna, “Deġoda tam kwa ġoena, taugu kwai yawasanigu.”

⁴¹ Dabudine Yesu nponama raunuatoi ya moġavu be nimanama yai yoyo da tauġoma ya taukonni be ya riuna, “Naumeki, taugu yà ġoegħoena, kwa yawasana!” ⁴² Dabudine sida kito yai raġantenaġe da tauġoma ya gose be tauna ya yawasanana. ⁴³ Naumeki da Yesu tauġoma ya riupore be umanama ya riu vavasaġena, ⁴⁴ “Kwa kita kaua da uma kauinama nam aitau kwai vari be didimaninama kwa naġo da pirisi ġarone kwai maġatara munaġem be Mamaitua kwa tipana Mousis na tarawatuma e riuriuna nama. Kwa voie da banaga ta kita da tam kuya yawasana munaġana.” ⁴⁵ Be yaġoro tauġoma ya raukosogħajnej da ya naġo be Yesu varinama meagai matabuna nponaġa ya giu gurate be yai dabberarina. Vutuna aubainama Yesu meagaie debaġa nam i naġona be dobu wainuatuġtuġudie ya miamiana. Be yaġoro banaga deġo deġo miemienidima ġarone a tavatavana.

2

*Yesu rewapana ġarone da gewagewa e noġota porena
(Mt 9:1-8; Lk 5:17-26)*

¹ Raġan bisanama a kovikovina murine Yesu ya munaġana Kabeniamma be banaga varinama a vaie da tauna inam dabudine ya tavana. ² Dabudine banaga totoi ai rawateġeidi da nam gabu deġo i kena rubuna be mataked a noġonama mate ya moġavuna. Be Yesu vari verenama ya rauguguyena ġarodie. ³ Dabudine tautauġoma ⁴ tauġoma tuera paġopaġonama a kiroġi tavaitena Yesu ġarone. ⁴ Be taudi nam teneteneġina da Yesu ġarone a verauġe, baninama patara ya morabana. Vutuna aubainama taudi vada debane gaura a voiena, deġo Yesu ya midimidie. Naumeki da tauġoma tuera paġopaġonama kebana debane ma ratiratina ai dawe yovoġena. ⁵ Raġanine Yesu adi waisumaġama nama ya kitakitana, tauna tauġoma tuera paġopaġonama ya riuena, “Taukui, am gewagewama è noġota porena.”

⁶ Dabudine aitauġa tarawatu tauwai katakataidima a miamiana, taudiġa nopolie ai nuanoġonogħot be a riuna, ⁷ “Aba aubainama uma tauġominama nama e giugiu? Tauna Mamaitua ewai diboġina. Nam aitau gewagewa e noġota pore, be Mamaitua taunaġa.” ⁸ Dabudine Yesu waiġapa aruine ya kataie da taudi nopolie aba awai nuanoġonogħotena be ya riuedina, “Aba aubaina uma kauidima kowai nuanoġonogħotedi? ⁹ Deġo tauna ya tekateka tauġoma tuera paġopaġonama tà riuena, ‘Am gewagewama è noġota porena,’ bo tà riuna, ‘Kwa midisūg, am gunima kwa paġo be kwa naġo?’ ¹⁰ Be yodi yài kataimi be ko kataie da Banaga Natunama dobue rewapana ġarone da gewagewa e noġota porena.” Naumeki da Yesu tauġoma tuera paġopaġonama ya riuena, ¹¹ “Yà riuriuemna, kwa midisūg, am gunima kwa paġo be kwa naġo am vadae!” ¹² Dabudine tauġoma waiġapa ya midisūg, na gunima ya paġo be patara matedie be ya naġona. Uma kauinama banaga matabudi a base be Mamaitua isanama a kaisuġu be a riuna, “Tauma uma kauinama nam ama kaba kita.”

*Yesu Livai ya yokoena
(Mt 9:9-13; Lk 5:27-32)*

¹³ Dabudine Yesu ya munaġana yawawa dosinama diane be patara dosinama ġarone a verau be waikatakataidima yai karena. ¹⁴ Raġanine tauna ya naġonaġo da kedae e kitana be Alpias natunama Livai teks tautaminama tauna na kaba noyae ya miamia be Yesu tauna ya riuena, “Kwai muriwatanegu!” Dabudine Livai ya midisūg be Yesu yai muriwatanena.

¹⁵ Muriā nama Livai na vadae Yesu ya kanikani be teks tautamidi, gewagewa banegidima, be na tauwai muriwatanama mate ai rawategeidi be a kanikani tenaāgana. Baninama taudi matabudi Yesu awai muriwatanena. ¹⁶ Raāganine tarawatu tauwai katakataidima, taudi vutuna Parisi, nama ta kitana be Yesu gewagewa banegidima be teks tautamidima mate a kanikanina, taudi na tauwai muriwatanama a riuedina, “Aba aubainama tauna umanama banegidima mate ta kanikani?” ¹⁷ Raāganine Yesu nama ya vaivaiena, tauna ya riuedina, “Banaga yawayawasanidima taudi nam dogeta tima āgoēgoena be banaga sidesidedima taudi dogeta ta āgoēgoena. Taugu nam e yovona banaga veredima aubaidi, taugu banaga gewegewedima aubaidima è yovona.”

*Widina na waitaravirama
(Mt 9:14-17; Lk 5:33-39)*

¹⁸ Naumeki da Jon na tauwai muriwatanama be Parisi a widiwidina be banaga āgesaudima a tava Yesu āgarone be ai taravirena, “Nemanama da Jon na tauwai muriwatanama be Parisi adi tauwai muriwatanama taudi ta widiwidina, be tam am tauwai muriwatanama ibewa?”

¹⁹ Yesu ya paribeedina, “Nemanama da naāgivau tauāgominama na warema ta widina raāganine yaāgoro tauna taudi mate? Raāganine naāgivau tauāgominama yaāgoro taudi mate taudi nam tokare ta widina. ²⁰ Be raāgan e tavana da naāgivau tauāgominama āgavoe ta nawena, yodibe inam raāganine ta widinana. ²¹ Nam aitau gara nuasikanama poranama e paāgo be gara vaunama mate e popo tenaāge. Deāgoda nama e voiana, gara nuasikanama vaunama tokare gara poranama e sika pore be gaura e moraba guratana. ²² Be nam aitau waen vaunama e paāgo be waen koukounama poranama nopone e āgini. Deāgoda nama e voiana, tokare koukou e nuagoru da waen e nuāgini be rabuidi ta gewagewana.* Ibewa! Tauna waen vaunama koukou vaunama nopone e āginina.”

*Sabat waitaraviraviranama
(Mt 12:1-8; Lk 6:1-5)*

²³ Sabat tenaāga Yesu be na tauwai muriwatanama mate yaāgoda sipinama nopodiāga a naāgonāgona, be na tauwai muriwatanama yaāgoda ragaudima ai karena. ²⁴ Be Parisi Yesu a riuena, “Tauma ama tarawatuma e riuriuna da Sabat raāganine nam nama sibo am tauwai muriwatanama a voia, be taudi ta voivoiana.”

* **2:22:** Footnote ko kitana, Luk 5:37 nopone.

²⁵ Be Yesu ya paribeedi be ya riuna, “Taumi Deivid aba ya voivoieno koya sievi bo ibewa? Rağanine tauna na varoroma mate kani a ġoe kauena,²⁶ tauna Mamaitua na vadae ya naġo be buredi Mamaitua waikatainama ya paġo be ya kanina. Be na varoroma mate ya utedi be a kanina avedi da pirisi taudiġa sibo a kanikanina, baninama tarawatu e riuriuna nama. Inam raġandie pirisi adi badama isanama Abiata na raġanie.”²⁷ Naumeki da Yesu taudi ya riuedina, “Sabat e kenakenana banaga Aubainama be nam Sabat banaga ei bade.²⁸ Vutuna Aubainama Banaga Natunama yaġoro Sabat ewai badena.”

3

*Yesu Sabat raġanine yai yawasanana
(Mt 12:9-14; Lk 6:6-11)*

¹ Raġan ġesaune Yesu ya naġo sinagog vadanama nōpone be dabudine tauġoma nimanama tuera poġopaqonama ya miamiana. ² Inam dabudi banaga ġesaudima mate Yesu a kitakita watanina deġoda tauna Sabat raġanine banaga sibo i yawasanina, dabudine taudi tokare ai samanina. ³ Be Yesu tauġoma nimanama tuera poġopaqonama ya riuena, “Kwa saġa be banaga matabudi nōpodie kwa midi!” ⁴ Dabudine Yesu banaga yai taraviredina, “Aba dà tarawatuma e riuredana da tà voie: Sabat raġanine yaba veredima tà voiedi bo yaba gewegewedima tà voiedi, banaga tài yawasani bo tài guri?” Be taudi nam aba ti riuena. ⁵ Yesu nuanama yai medi da ya kita vireviredina be ya raunuatoi kauedina, baninama taudi adi nōpobadoma be adi voia waigewama Aubainama. Dabudine Yesu tauġoma ya riuena, “Nimamma kwai yoyo!” Be tauġoma nama ya voia be nimanama ya vere munaġana. ⁶ Dabudine Parisi sinagog a gose pore be a naġona Herod na damma mate ai rawateġeidi be Yesu na kasirama tomnama ai karea, da tauna sibo ai gurina.

*Banaga patara Yesu ai muriwatanena
(Mt 12:15-21; Lk 6:17-19)*

⁷ Yesu be na tauwai muriwatanama mate a naġona Galili yawawine be dabudine banaga patara ai muriwatanedina. ⁸ Raġanine ta vaiena be Yesu yaba matabudi ya voivoiedina, banaga toitoi ġarone a tavana. Taudi Judiġa, Jerusalemġa, Idumeaġa be Jodan be nuaġo nevane Taia be Saidon banegidima mate a tavana.

⁹ Baninama patara ya morabana Aubainama, Yesu na tauwai muriwatanama ya riuedi da waga ġaubaonama ta kawa nonoġina tauna Aubainama, da patara nam tauna ta midi ġuruvi be ta tauporepore. ¹⁰ Baninama banaga toitoi

yawai yawasanidina, vutuna aubainama banaga sidesidedima toitoi a raraubu guratana da sibo Yesu a taukonina. ¹¹ Rağanine aitaugā arua gewegewedima kokukokudima Yesu a kitakitana, taudi kağapakane a raudune be bonedima dosine a riuna, “Tam Mamaitua Natunama.” ¹² Be taudi ya riu vavasağedi da nam sibo aitau a riue da tauna aitau.

Yesu apasol 12 ya vinedina

(Mt 10:1-4; Lk 6:12-16)

¹³ Yesu ya nađo oya debane be aitaugā tautauğomidima ya góeđoedina, nama ya yokoedina. ¹⁴ Rağanine taudi tauna ġarone a tavatavana, taudi 12 ya vinedi be yai isedina ‘Apasol’, da taudi tauna mate be tauna ya riupore nawedi da ta rauguguyana. ¹⁵ Be rewapanan a pađo da penama ta tavu dobiğedina. ¹⁶ Uma banegidima 12 Yesu ya vinedina inam

Saemon, Yesu yai isana Pita.

¹⁷ Jeims, Sebedi natunama be tasinama Jon, taudi yai isedina ‘Boaneges’, inam riunama baninama ‘parere natunatunama’.

¹⁸ Endru,

Pilip,

Batolomiu,

Metiu,

Tomas

be Jeims, tauna Alpius natunama,

Tadeas,

Saemon tauna Selot.

¹⁹ Be Judas Iskariot, tauna Yesu tauwai karakarakutuenama.

Penama adi guyau be Yesu

(Mt 12:22-32; Lk 11:14-23; 12:10)

²⁰ Dabudine Yesu ya munağana vadae, you, yağoro patara Yesu ġarone ai rawateğeidina, be nam kaisavo deđo, da sibo Yesu na tauwai muriwatanama mate a mia be a kani.

²¹ Rağanine na damma uma kauinama nama a vaivaiena, taudi a nađona Yesu waidokenama aubainama. Baninama taudi a riuna, “Tauna ya buana.”

²² Be tarawatu tauwai katakataidima ġesaudima, aitaugā Jerusalemğā veraveraudima, a riuna, “Penama adi guyuma Yesu ya kokuna. Tauna vutuna rewapanan Yesu e ute be penama ewai dobidina.” ²³ Vutuna aubainama Yesu ya yokoedi ġarone be wainasie ya giugiuedina, “Nemanama da Seitan tauname e tavu dobiğā munağē? ²⁴ Deđo dobunama banegidima tai kawa ġasiğası be ta dariğā munağedina, inam dobunama tokare e kawa gewagewa munağena. ²⁵ Be deđo damnama tai kawa ġasiğası be ta dariğā munağedina, inam damnama tokare ta kawa gewagewa munağedina. ²⁶ Be

nama teneğinama, değoda Seitan na waiguyauma e dariğā munağena be dam ei tubuğana, inam damdima tokare nam ta kena nonoğā, da ta kawa gewagewa munağedi be tai kavena. ²⁷ Tauğoma wairewapaninama na vadama nam aitau e gigi da e sağā be na purapurama e ragaudi, değoda noğone tauğominama wairewapaninama e pani doke be muriğā e sağā da inam tauğominama na purapurama e ragaudina.

²⁸ “Yà riuriu kauemina, banaga adi voia waigewa be adi waidibogama tokare Mamaitua e noğota poredina. ²⁹ Be değoda aitau Arua Babau ğarone e riuriu viravirana, tokare Mamaitua nam e noğota pore, baninama tauna gewagewa kenakena nonoğinama ya voiena.” ³⁰ Yesu nama ya riuna, baninama banaga ġesaudima umanama a riuriuna, “Tauna arua gewagewanama nopone.”

*Yesu tinana be tasitasinama
(Mt 12:36-50; Lk 8:19-21)*

³¹ Naumeki da Yesu tinana be tasitasinama a tavana. Taudi doğae a midi kwasa be Yesu a riuwanena. ³² Be patara Yesu a miamia kwavivirona, taudi Yesu a riuena, “Kwa kita! Tinam be tasitasimma a tava be gabure ta midimidi be taudi tam ta ġoeğodemna.” ³³ Yesu ya paribeedi be ya riuna, “Aitau tinagu be aitau tasitasigu?” ³⁴ Dabudine banaga Yesu a miamia kwaviviroena ya kitedi be ya riuna, “Ko kita! Umanema tinatinagu be tasatasiguma. ³⁵ Aitau da Mamaitua na ġoanama e voivoiena, tauna vutuna tasigu, nuvugu be tinaguma.”

4

*Taukuma wainasinama
(Mt 13:1-23; Lk 8:4-15)*

¹ Yesu Galili yawawinama diane waikatakatai yai kare munağena. Be patara dosinama a rawateğeidina aubainama, tauna topae waga debane ya sağā be ya miana. Be patara matabudi taudi barabarae upa diane a miana. ² Tauna wainasie yaba toitoi yai katakataidi be ya riuedina,

³ “Koi beavaia! Rağan tenağā taukuma ya nağona pesi kumanama aubainama. ⁴ Rağanine pesi yawai yaraiedina, ġesaudima keda poune a ravusedina be kiu a tava be a kanidina. ⁵ Be ġesaudima yeku debedie a ravusedina, dabudine nam doğa dosina aubainama pesi a gogo makaina, baninama doğa nam i potopoto guratana. ⁶ Be rağanine suara ya tavatavana, pesi ya kara gabedi be a pokina, baninama taudi waramidima nam ti yovo guratana. ⁷ Be pesi ġesaudima gedara nopolie a ravusedi be gedara pesi

a gogogona a yavanidina. Vutuna aubainama taudi nam ti banina. ⁸ Be yaḡoro pesi ġesaudima doğa verene a gogona. Naumeki da a gogotava, a moraba be a banina, ġesaudima banidima 30, ġesaudima 60, bo 100.” ⁹ Dabudine Yesu ya riuna, “Deḡoda beemima ta kenana, koi beavaia!”

¹⁰ Raġanine Yesu taunaġa, be banaga aitauġa tauna a vaivaiena, tauwai muriwatana 12 mate a tava be tauna ai baġa da tauna na wainasima baninama aba. ¹¹ Naumeki da Yesu ya paribeedi be ya riuna, “Taumi Mamaitua na waiguyauma semosemonama ya utemina. Be banaga ġesaudima ġavoe miemienidima, taudi yaba matabudi wainasie ya riuedina:

¹² ‘Vutuna aubainama taudi ta kitakitana be nam tima kitakita kauena,
be vaienama ta vaivaiena be nam tima vaivaiena,
vutuna aubainama taudi nam Mamaitua ġarone tima tavatava be adi gewagewama ima noġonogota pore-dina.’

¹³ Dabudine Yesu yai taraviredina, “Taumi uma wainasina-ma nam ko kataie, bo? Be nema wainasi ġesaudima ko katai bakedi? ¹⁴ Taukuma Mamaitua riunama ewai yaraiedina. ¹⁵ Be banaga ġesaudima maika pesi keda debane ravuravusedima, deġo Mamaitua riunama ya kumakummae. Raġanine riu ta vaivaiena, Seitan waiġapa e tava be Mamaitua riunama nopolie kumakumanama e kaikaiporaġana. ¹⁶ Be banaga ġesaudima maika pesi yeku debedie ravuravusedima. Taudi riu ta vaie be raġan tenaġa ma nuaveredi ta paġopaġona, ¹⁷ baninama taudi nam waramidi aubainama taudi nam ta midi gurata. Raġanine gewagewa bo raukivigewagewa e tavana, baninama Mamaitua riunama aubainama, taudi waiġapa tai daberaridina. ¹⁸ Be mate ġesaudima maika pesi gedara nopolie ravuravusedima, riu ta vaivaiena, ¹⁹ be dobu yawasanidima nuaboyedi, dobu waiguyaudima be yaba ġesaudima adi wainuapaġoma mate ta saġa be Mamaitua riunama ta yavanidi be nam tima banibanina. ²⁰ Be banaga ġesaudima taudi maika pesi doğa verene kumakumanama, taudi riu ta vaie, ta paġopaġo, ta vovo teyeteyedi, be votedima ġesaudima 30, ġesaudima 60 bo 100.”

*Kodam wainasinama
(Lk 8:16-18)*

²¹ Yesu ya riuedina, “Nam aitau kodam ya saġe be gurewa dibune bo vatara dibune ya boru. Bo tokare ġavoe koyai midiri bo ibewa? ²² Aba da moimoisirinama tokare e neganegana be aba rupurupunama tokare e maġatarana. ²³ Aitauġa da beemima e kenakenana, koi beavaia kauana!

²⁴ Aba yà riuriuemina, koi beavaia kaua!” Mate ya riuedina, “Ruvanama ko rarau ruvena teneğine nama Mamaitua taumi e ruvemina bo e tausağena. ²⁵ Aitau uma yabedima kwa katakataiedina, tam tokare Mamaitua debane e taipotodina. Değoda aitau uma yabedima nam ku kataiedina, tam tokare avedi da ġaubonama ġarome be Mamaitua matabudi e kaiporağana.”

Pesi mabine gogogonama wainasinama

²⁶ Be mate Yesu ya riuedina, “Mamaitua na waiguyauma maika umanama: Tauğoma pesi na sipie yai yaraiedina. ²⁷ Be kupi da suara tauna e kenakena bo e miamia nu-ababağana, be nam ima katakataiena nema pesi ta gogogogo bakona. ²⁸ Be doğa taunağā e voie da pesi ta gogo be ta banibanina, noğone rugudima ta biridina, murine ta rovena, yodibe banidima nopodie ta biridina. ²⁹ Rağanine yağoda ta ġouğouna, tauğoma na biriukoma e paço be tarağıdima ei karena, baninama dariğā na rağanima ya tavana.”

Gaga pesinama wainasinama

(Mt 13:31-34; Lk 13:18-19)

³⁰ Yesu yai taravirana, “Mamaitua na waiguyauma nema tà giu bake, bo aba wainasinama tà voie da e kawa didimani? ³¹ Inam maika gaga pesinama, nito ġominama doğa nopone ko kumakumana nama.* ³² Rağanine e gogogona, tauna e moraba guratana, nam maika pesi ġesaudima sipie ta gogogona nama. Be tauna raga yaveyaveğinama vagurune kiu ġavoğā rovorovodima ta verau be ta raunoğina.”

³³ Yesu wainasi totoi banaga ġarodie ya rauguguyena, maika uma wainasinama nama ya giu guratedi da banaga ta kataiedina. ³⁴ Tauna nam airağan wainasi i gose be ġarodie i giu ġomana, be rağanine na tauwai muriwatanama mate taudiğā be tauna matabuna ġarodie ya giu waibatena.

Yesu kaibitibiti ewai badena

(Mt 8:23-27; Lk 8:22-25)

³⁵ Inam rağaninama teneğine ravie, Yesu na tauwai muriwatanama ya riuedina, “Yawawa tà davu be tà nağō noağō nevane.” ³⁶ Naumeki da patara a gosedı be Yesu değō wagane ya miamiae dabudine tauwai muriwatana a geru be tauna mate a nağona. Be waga ġesaudima dabudi mate. ³⁷ Yai rağantenağē da sive bagibaginama ya tava be rabama ya nuayemra da ġaubonağā sibo waga nopone upa ya moğavuna.

³⁸ Be Yesu tauna waga murine, debanama kunuane ya

* **4:31:** Gurik bonane ya riuna: Gaga pesinama. Be inam gaga ġesau, tauna kai, nam taitai. Inam gaganama pesinama nito ġominama, nam maika pesi ġesaudima doğa nopone tà kumekumedina nama.

boru be ya kenakenana. Be na tauwai muriwatanama a rawaḡosori be a riuna, “Tauwai katakatai kwa kitakita bo ibewa da kaiteka tà gurina. Tam nam kumawai nuaboyeda, bo?”

³⁹ Yesu ya midisuḡu da sive ya riutuaḡaie be ya riuna, “Kwai nuatuḡu!” Be rabama ya riuedina, “Ko rautamtamḡota!” Dabudine sive yai nuatuḡu be daumora dosinama ya kenana. ⁴⁰ Naumeki da Yesu na tauwai muriwatanama ya riuedina, “Aba aubainama ko nainaira? Taumi nam ġaromie waisumaḡa, bo?” ⁴¹ Taudi a ḡosoridi, a base be adi banagama adi banagama a riuedina, “Uma baneginama aitau? Tauna sive be rabama e riuedi be ta vovo teyeteyena.”

5

Penama tauḡoma a kokuna

(Mt 8:28-34; Lk 8:26-39)

¹ Yesu na tauwai muriwatanama mate a naḡona Galili yawawinama nuaḡo nevane, Gerasi banegidima adi dobue.

² Raḡanine Yesu wagae ya dobidobina, inam dabudi tauḡoma guri adi gubae miemieninama ya verauna Yesu ġarone. Inam tauḡominama arua gewagewanama nopone. ³ Tauna guri adi gubaḡa ya miamia naḡona. Be nam aitau teneteneḡina da tokare ya vunuḡi be ya rauseini, ⁴ baninama raḡan patapatanama tauna kaḡanama be nimanama seinie a panipanidina, be ya rakerakedina. Be kaḡane irama ya vava kotovidina. Tauna yai rewapanan kauana, nam aitau teneteneḡina da ya taiparapara. ⁵ Kupi da suara tauna oya debediḡa be guri adi gubaḡa ya yogo naḡo da sabira ya ragau be ya nigonigo munaḡena.

⁶ Tauna madanie be raḡanine Yesu ya kitakitana, tauna ya manini ya naḡo da Yesu noḡone tuapikanama doḡae yai tutumidiri ⁷ be bonanama dosine ya riuna, “Yesu, Mamaitua saḡasaḡa vavasaḡinama natunama! Tam aba ġarogue kwa ḡoeḡoe? Mamaitua isane yàwai baḡamna, nam kwa kovoḡigu!” ⁸ Tauḡoma nama ya riuna, baninama noḡone Yesu ya riuna da arua gewagewanama uma tauḡominama sibo ya dobi porena.

⁹ Dabudine Yesu tauḡoma yai taravirevirena, “Tam isamma nema?” Be tauna ya paribeena, “Taugu isaguma ‘patara’ be kètoi kauana.” ¹⁰ Be arua gewegewedima yaḡoro Yesu awai baḡana da nam wari dobue sibo ya riupore nawedina. ¹¹ Dabudine bawa netarinama dosinama maida oya babane a yababayana. ¹² Naumeki da penama Yesu ai baḡana, “Kwa riupore nawemai bawa ġarodie be kwai aninemai da nopolie ka saḡa.” ¹³ Naumeki da Yesu arua

gewegewedima yai aninedi da tauḡoma a dobi pore be a naḡona bawa nopolie. Netari tabutabunama bawa sievinama 2 tausand nama dere boganaḡa a manini yovo be dakie a beku be yawawa nophone a tonedina.

¹⁴ Dabudine tauyosi aitaugā bawa a raberabedina, a manini ḡoma meagaie be meagai diane, be uma varinama ai daberarina. Dabudine banaga a dobi a naḡona aba ya tubutubuḡana kitanama aubainama. ¹⁵ Be ḥaganine taudi Yesu ḡarone a tavatavana, taudi tauḡoma penama ḡumnama tauna nophone miemienidima a kitana. Tauna yai gara be na noḡotama didimanine ya miamiana. Be taudi matabudi a nairana. ¹⁶ Taudi aitaugā nama a kitakitana, banaga a riuedi da tauḡoma penama kokukokunama be bawa mate ḡarodie aba ya tubuḡana. ¹⁷ Vutuna aubainama taudi Yesu ai baḡa da adi dobuma sibo ya gosena.

¹⁸ Ḥaganine Yesu waga nophone ya saḡasaḡana maika, tauḡoma penama a gosegose porena, tauna Yesu yai baḡana da sibo mate a naḡona. ¹⁹ Be Yesu nam i aninena, be ya riuna, “Kwa naḡo vadae, am damma ḡarodie be bada na raukiviverema be abaḡa ḡarome ya voivoiedina, nama kwa riuedina!” ²⁰ Dabudine tauḡoma ya midisugu be ya naḡona Dekapolis nopenaḡa, be Yesu aba tauna ḡarone ya voivoiena giuedima yai karea. Be banaga aitaugā nama a vaivaiena, taudi a basena.

Jaeras natunama waivinama be waivi aitau Yesu na garama ya taukonī

(Mt 9:18-26; Lk 8:40-56)

²¹ Yesu wagae yawawa ya davu be ya naḡona noaḡo nevane, dabudi yawawa diane patara dosinama tauna a midi ḡuruvina. Inam dabudine ²² sinagog taurabenama tenaḡa isanama Jaeras ya tava da e kitana be Yesu, naumeiki da Yesu noḡone tuapikane ya raupari ²³ be nuanama tabutabune yai baḡe be ya riuna, “Taugu natuguma waivinama ḡaubonama e gurigurina. Yawai baḡamna da nimamma debane kwa boru da e yawasana be e mianana.”

²⁴ Naumeiki da Yesu tauna mate naḡo ai karea. Be patara mate a naḡo be Yesu a tauporeporena. ²⁵ Be dabudine waivi tenaḡa waikosina vutuvutu ya paḡona na modima 12 a kovina. ²⁶ Tauna yai nuatoitoi kauana, be na purapurama matabudi dogeta ḡarodie yawai yakaredina deḡo e yawasana kabe da yaḡoro ya kaikai guratena. ²⁷ Ḥaganine tauna Yesu varinama ya vaivaiena, tauna patara nopolie Yesu na garama ya taukonina, ²⁸ baninama tauna ya noḡotina, “Deḡoda taugu Yesu na garama yà taukonī ḡomena, taugu tokare yà yawasanana.” ²⁹ Ḥaganine tauna Yesu na garama

ya tautaukonina, dabudine yai rağantenağe da kosina man-imanininama yai kave be tuninama mayanama ya dami da tauna na wainuatoitoie ya yawasanana.

³⁰ Inam dabudine Yesu mayanama ya dami da rewapanā ġarone ya dobi porena. Naumeki da tauna yai tauvitare patara ġarodie yai taravira be ya riuna, “Aitau yau garama ya taukonidi?” ³¹ Be na tauwai muriwatanama a paribee da a riuna, “Kwa kita da patara ta midimidi ġuruvim be ta tatau poreporemna. Be nemanama da kwa riuriuna, ‘Aitau ya taukonigu?’” ³² Yesu yağoro ya waitau kitakitana da aitau ya voiana sibo ya kitana. ³³ Dabudine waivi ya katai munağe da ġarone aba ya tubuğana, vutuna aubainama tauna ġarone ya verau be naira ma gusuna Yesu kağapakane tuapikane ya raupari be yaba matabuna yai mağataridina. ³⁴ Yesu waivi ya riuena, “Moumou, am waisumağama yai yawasan-imna. Ma nuasubam kwa nağona, be am wainuatoitoie kwa yawasanana!”

³⁵ Dabudine Yesu yağoro ya giugiu be tautauğoma gesaudima Jaeras tauna sinagog taurabenama na vadae be a tava da Jaeras a riuena, “Natumma waivinama ya gurina. Aba aubainama tauwai katakatai kwa tatai nuarağarağā?” ³⁶ Yesu taudi aba a giuguedina ya vaia yababedi be tauna Jaeras ya riuena, “Nam am noğotama e beku be kwai sumağāğoma!” ³⁷ Naumeki da Yesu nam aitau i anine da tauna mate ti nağō, be tauna Pita, Jeims tasinama Jon taudiğā mate a nağona.

³⁸ Rağanine taudi sinagog taurabenama na vadae a tavatavana, dabudine Yesu e vaiena be banaga patara ai nuaboya be bonedima ġavoğā a ġabağabana ya kitedina. ³⁹ Yesu vada nopone ya sağā be ya riuna, “Aba aubainama kowai nuaboya be ko ġabağaba? Gomana nam i gurina, tauna e kenakena ġomana.” ⁴⁰ Be taudi Yesu ai kwatekwatevena, vutuna aubainama tauna banegidima ya riupore dobiğedi be tauna gomana tamana, tinana be na tauwai muriwatanama rabuiteğā mate a nağona değō gomana ya kenakenae.

⁴¹ Naumeki da Yesu gomana waivinama nimane ya kaididi be Hibru bonane ya riuena, “Talita kum!” Uma riunama baninama inam, ‘Moumou, yà riuriuemna, kwa midisuğu!’

⁴² Dabudine gomana waivinama yai rağantenağe da ya midisuğu be nağō yai karena. Inam gomeninama na modima 12. Rağanine uma kauinama nama ya tubutubuğana, taudi matabudi a base kauena. ⁴³ Be Yesu ya riu vavasağedi da uma kauinama nam aitau tenağā sibo ai vari, be tauna ya riuedi da aiyaba sibo gomana a ute da ya kanina.

6

*Yesu Nasaretma a tuağaiena
(Mt 13:53-58; Lk 4:16-30)*

¹ Yesu inam dobunama ya gose be ya munağana na vadae na meagaie, be na tauwai muriwatanama mate ai muriwatanena. ² Be Sabat ya tavatavana rağanine, tauna sinagog nopone waikatakatai yai kare be banaga a riuna, “Uma tauğominama uma kauidima değō ya ragaudi? Uma nuauyauyanama değō ya pa gó da tauna mataira mate e voivoiedi! ³ Tauna kabe Meri natuna tauwai kamda, be Jeims, Jousep, Judas be Saemon tuağedi? Be nuvunuvunama mate yodi ġarode.” Vutuna aubainama taudi a tuağaiena.

⁴ Be Yesu taudi ya riuedina, “Peroveta dobu ġesaudie ta vovo teyeteyena, be na meagaima banegidi be na banaga ġomama be na vadama banegidima ta tuatuağaiena.”

⁵ Vutuna aubainama tauna inam dabudi nam aba matairidima i voiedina. Be nimane banaga raubisaġġa sidesidediġġa ya taukonidi be yai yawasanidina. ⁶ Be Yesu ya basedina, baninama taudi adi waisumaġġama ibewa.

*Yesu na tauwai muriwatanama 12 ya riuporedina
(Mt 10:5-15; Lk 9:1-6)*

⁷ Tauna tauwai muriwatana 12 ya yokoedi be ma turana ma turana ya riuporedina. Be tauna rewapana ya utedi da taudi arua gewegewedima ta tavu dobiğedina.

⁸ Dabudine ya riu vavasağedi be ya riuna, “Ami vaġiae nam aba ko ragaudi, nam kani, nam tana, nam mane bogemie. Be diġona taunaġa ko pa gó. ⁹ Be mate kaġasuma ko kotedina, be nam kwama ġidoidima mate ko ragaudi!” ¹⁰ Be mate ya riuedina, “Rağanine değō vadane tai aninem be ko saġana, inam dabudine ko miana, naumeki da inam meagainama ko gose porena. ¹¹ Be değoda banaga nam ta ġoemi, naumeki da kaġemima popokaudima ko rawakurukuruvidi, be inam meagainama ko gose porena, da dabudi taudi ta kita be ta kataie da taudime adi wavuma.”

¹² Dabudine taudi a dobi a na gó be a rauguguyana da banaga adi gewagewama sibo a kuvesidina. ¹³ Be mate banaga ġarodie penama toitoi a tavu dobiğedi, be oerie banaga sidesidedima toitoi tunidima a viredi be ai yawasanidina.

*Jon tauwai babataito nema ya guri bakona
(Mt 14:1-12; Lk 9:7-9)*

¹⁴ Guyau Herod uma kauinama nama ya vaiena, bani-nama Yesu a katai vavasäge be varinama ya moramorabana. Vutuna aubainama tauna ya riuna, “Jon tauwai babataito ya guri be ya midisuġġu munağana. Vutuna aubainama tauna

rewapanaya paǵo da uma matairidima e voivoiedina.”¹⁵ Be ǵesaudima a riuriuna, “Tauna Elaija.” Be yaǵoro banaga ǵesaudima a noǵonoǵoti da, tauna maika bonideǵo perovetedima nama.¹⁶ Raǵanine Herod nama ya vaivaiena, tauna ya riuna, “Tauna inam Jon tauwai babataito, gadonama è tomna be gurie ya midisuǵu munaǵana.”

¹⁷ Be boni Herod tauiǵara ya ruedi da Jon a vunuǵi da seinie a pani be dibure a boruna. Herod nama ya voiana, baninama tauna tuaǵa ǵominama Pilip na waivima isanama Herodias ya naǵina.¹⁸ Vutuna aubainama Jon Herod umanama ya riuriuena, “Inam nam i verena da tuaǵama na waivima kwa naǵi!”¹⁹ Vutuna aubainama Herodias nuanama yai medina Jon ǵarone da ya ǵoeǵoena sibo yai gurina. Be tauna nam teneteneǵina da nama sibo ya voiana,²⁰ baninama Herod tauna Jon ya naire be ya raberabe kauena, baninama ya kataie da Jon tauna banaga didimanina be tauǵoma babaunama. Be Herod tauna Jon na giumenta vaienama ya ǵoeǵoe kauena, avedi da tauna ya tatai nuaraǵaraǵana, be yaǵoro na giumenta vaienama ya ǵoeǵoena.

²¹ Dabudine Herodias keda ya banavina da Jon ei gurina. Inam raǵanine Herod na kaba tubuǵama soine. Tauna soi ya voienna gabegabeman adi babadama, iǵeígeridima adi babadama be Galili babadidima mate aubaidima.²² Dabudine Herodias natunama guguininama ya saǵa da ya bigana, be Herod na warema mate nuedima ya paǵo kauena. Dabudine Guyau Herod gomeninama ya riuena, “Aba kwa ǵoeǵoena kwa paǵo? Taugu aiyaba kwa ǵoeǵoena nama yà utemna.”²³ Ya sauga wape be ya riuna, “Aba kwai baǵena yà utemna, avedi da yau waiguyauma be nevanama tokare yà utemna.”

²⁴ Dabudine gomana waivinama ya dobi ya naǵo be tinanama yai taravire be ya riuna, “Dudua, aiyaba yài baǵe?” Dabudine tinanama ya pribee be ya riuna, “Jon tauwai babataito debanama yà ǵoeǵoena.”²⁵ Inam gomeninama guguininama yai raǵantenaǵe da ya manini ya naǵona guyau ǵarone be na ǵoanama ya riuena. “Taugu yà ǵoeǵoena tam yodi uma dabudi Jon debanama teboe kwa boru be kwa uteguna.”

²⁶ Be uma giunama guyau ya kawa nuaboya kauena, be tauna nam teneteneǵina da gomana ya rawaǵaiǵaiena, baninama tauna noǵone na warema matedie ya sauga wapana.²⁷ Vutuna aubainama guyau na taubodamama ya giu yaǵe be ya riupore da Jon debanama e verauǵena. Naumeki da taubodamama ya naǵo dibure be Jon gadonama ya tom,²⁸ da

teboe ya boru be gomana guguininama ya ute da ya kiroğī be tinanama ya utena.

²⁹ Rağanine Jon na tauwai muriwatanama uma giunama a vaivaiena, taudi a verau be tubuğinama a kiroğā nawe be a dobona.

Yesu tautaugōma 5 tausand yai kanidina
(Mt 14:13-21; Lk 9:10-17; Jn 6:1-14)*

³⁰ Apasol Yesu ġarone a tava munağā be yaba matabuna a voivoiedi be awai katakataina tauna ai varina. ³¹ Dabudine banaga toitoi a sagasaga be a yovoyovona, be Yesu na tauwai muriwatanama nam teneteneğina da sibo a mia be a kani. Vutuna aubainama tauna ya riuedina, “Taumiğā muriguğā ko verau gabu wainuatugune be rağan ġaubonağā ko siperena!”

³² Dabudine taudiğā wagae a nağona gabu wainuatugune. ³³ Be dabudine patara ta kitana be Yesu da na tauwai muriwatanama mate a nağonağona, taudi a kitedi be a kataiedina aubainama taudi meagai matabuna a gosedi da noğodima a tom be a tava dokana. ³⁴ Rağanine Yesu wagae ya ġotağotana, tauna patara dosinama ya kitedi be ya raunuatoiedina, baninama taudi maika sipu be nam taurabedi. Naumeki da tauna yaba matabuna waikatakataidima yai karena.

³⁵ Rağanine ravi ya tavatavana, tauna na tauwai muriwatanama ġarone a tava be a riuna, “Uma dobu wainuatoitoinama be kaiteka suara e kovikovina. ³⁶ Banaga kwa riupore nawedi meagaiğā be meagai murisairidie be mabidie adi kanima ta gimara be ta kanidi.” ³⁷ Be Yesu ya riuedina, “Taumi koi kanidi!” Be tauwai muriwatanama tauna a riuena, “Tam kwa ġoegoena tauma ka nağō be Denari 200 vutuna ruvanama buredi ka gimara be banaga kai kani bagibagidi, bo?”

³⁸ Be Yesu na tauwai muriwatanama ya riuedina, “Taumi buredi bisa ġaromie? Ko nağō be ko kitedi!” Dabudine a noğota banavi be tauna a riuena, “Buredi 5 be iyana rabui.” ³⁹ Dabudine Yesu na tauwai muriwatanama ya riuedi da banaga ta dariğedina, naumeki da taudi banaga a dariğedi be mui gidegidevidima debedie a miana. ⁴⁰ Naumeki da banaga a daridariğana, dariğidima nopolie banaga ġesaudima 100 be ġesaudima 50-nama a miana.

⁴¹ Dabudine Yesu buredi 5 be iyana rabui ya ragaudi da gunuma yai kita sağā be Mamaitua yai kaiwe, be buredi ya givedina, yodibe na tauwai muriwatanama ya utedi da

* **6:29:** Uma dabudine taudi tautaugōma taudiğā a siesievidina.

taudi a soiedi be banaga a utedina. Be iyana rabui mate ya soiedina.⁴² Banaga matabudi a kani da a kani siauana.⁴³ Be tauwai muriwatana buredi be iyana kanikani gosedima a tama be posa matabudi 12 ai moğavudina.⁴⁴ Tautaugoma aitaugā a kanikanina sievidima 5 tausand.

*Yesu topa debanağā ya nağonağona
(Mt 14:22-33; Jn 6:15-21)*

⁴⁵ Naumeiki da Yesu waiğapa na tauwai muriwatanama ya riuedi da waga nopone a sağā da Yesu a gose be taudi a nağonağō dokana Betsaidama maika, tauna patara ya riuporedina. ⁴⁶ Murine tauna ya nağona oyaе moiragi aubainama.

⁴⁷ Rağanine ravi na parate be waga yawawa poune ya midimidina, be Yesu taunağā gerese ya midimidina. ⁴⁸ Tauna e kitana be na tauwai muriwatanama ma nu-aboyedi a yareyarena, baninama sive dosinama ya kirogidi be a wewewesana. Rağantomtom suara 3 be 6-nama poudie be Yesu topa debanağā ya nağō be ġarodie ya tavana. Tauna sibo ġaubonağā yai muridina,⁴⁹ be taudi a kita be ai noğotana kabe ġağarua. ⁵⁰ Be bonedima dosine a rasana, baninama taudi a naira kauana. Dabudine Yesu yai rağantenäge be ya riuedina, “Nam nuemima e rovo! Inam taugu. Nam ko naira!”⁵¹ Dabudine Yesu ya sağana waga nopone taudi ġarodie be sive yai nuatuguna. Be taudi a base kauena,⁵² baninama taudi tautaugoma 5 tausand awai kanidina na banimanam ti kataiena, be debedima ya buana.

*Yesu Genesaretma banaga sidesidedima yai yawasanidina
(Mt 14:34-36)*

⁵³ Taudi yawawa a davu be a verauna Genesaret geresine a ġota be ai anikana. ⁵⁴ Rağanine taudi waga a dobidozi porena, banaga Yesu a kita be a katai ġomena. ⁵⁵ Taudi Genesaret dobunama matabuna a nağō popoe be banaga sidesidedima ma ratiratidi a kiroğā be değō değō Yesu ya nağonağona nama sida a kirokiroğā tavaitedina. ⁵⁶ Be Yesu değō meagai murisairidiğā ya nağonağona, nama taudi banaga sidesidedima anikune gabudie a tavatavaitedina. Be taudi Yesu ai bağā da tauna sibo yai aninedi da na garama isunama sibo a taukonina, be aitaugā a tautaukonina, taudi a yawasanana.

¹ Parisi be tarawatu tauwai katakatai ġesaudima aitaugā Jerusalemġa a tavatavana, matabudi Yesu ġarone a rawatēgeidi da ² ta kitana be Yesu na tauwai muriwatanama ġesaudima ma nimamiredi a kanikanina, inam waikatakatai dosi poredie saġasaġanama adi tarawatumma nam ti kaiwatanina. ³ Parisi be Jius matabudi nam tima kanikani yababana, noġone nimedima ta koġedina, adi dosima adi waikatakataima poredie a paġopaġona nama. ⁴ Raġanine anikune gabune be ta tavana, taudi nam ta kani be noġone nimedima ta raukoġana. Be taudi tarawatu poredima ġesaudima toitoi ta kaikai watanedina, maika redu, tebo be gurewa koġedima. ⁵ Vutuna aubainama Parisi be tarawatu tauwai katakataidima Yesu ai taravirena, “Aba aubainama tam am tauwai muriwatanama uma waikatakatainama dosi poredie ya yovoyovona nam timawai muriwatane, be taudi ma nimamiredi ta kanikanina?”

⁶ Yesu ya paribeedi be ya riuna, “Taumi waikaikaiyovu banegimima. Aisaia tauna na waiperovetae ya riu kauana, tauna umanama ya girugirumina, ‘Uma banegidima mududiġa ta riuriuna, ‘Mamaitua’, be nopodima madanie.

⁷ Taudi nam teneteneġina da taugu ta rauduneegu, baniama taudi tarawatu banaga a voivoiedina tawai katakataidina, da inam kabe vutudi Mamaitua na tarawatu.’

⁸ Taumi Mamaitua na riuvavasaġama ġavoe koya taurie be banaga ġoma adi waikatakataima ko vovo teyeteyedina.”

⁹ Be ya riuedina, “Taumi koya katai ġaġa be Mamaitua na tarawatumma koya varie be taumiġa ami vaivaie kowai muriwatanedina. ¹⁰ Baninama Mousis ya riuna, ‘Tamamma be tinamma kwa viviredi! be ‘Aitau tamanama bo tinanama e kunukunurena tauna gurie e miana.’ ¹¹ Be taumi ko riuriuna, deġoda banaga yaba ya paġona maika kani bo yaba ġesaudima da tamanama bo tinanama sibo ya sagudina, be tauna e riuriuedina, ‘Uma Korban’ - inam riunama baniama: Puyo Mamaitua taunaġa aubainama. ¹² Taumi ami waikatakataima kadi taiye tauna nam tamana bo tinanama ima sagusagudina. ¹³ Inam kediedie waikatakatai ewai raudavudavuna, banaga ġesaudima ġarodie be Mamaitua riunama e kawakawa koakoana. Be yaba ġesaudima a toi rereġedina mate ko voivoiedina maika uma taudi.”

*Degħo yabediġa banaga nopodima tawai mira
(Mt 15:10-20)*

¹⁴ Dabudine Yesu patara ya yoko munaġedi ġarone be ya riuedina, “Koi beavaiegu matabumi, be uma yabedima yodi ya giuedina ko noġotidi! ¹⁵ Nam aiyaba ġavoe tokare e saġa

banaga nopone be ei mira, ibewa da aba banaga nopone e dobidobina, inam vutuna taunağā ewai mirana.”¹⁶ (-)*

¹⁷ Rağanine Yesu patara ya gosedi be vada nopone ya sağasağana, tauna na tauwai muriwatanama ai bağda uma wainasinama baninama sibo ya giu yağedina. ¹⁸ Be Yesu ya riuedina, “Taumi nam ko kataie, bo? Taumi sibo koya kataie da yaba ğavoe be banaga nopone e sağasağana tokare nam ei mira. ¹⁹ Baninama inam nam nuapoune ima yovoyovona, ibewa da kapone da noveğō e dobidobina.” Uma riunama nama Yesu ewai mağtarana da kani matabudi anikani. ²⁰ Na giuma ya kaiwatani be ya riuna, “Aba banaga nopone e dobidobina, inam vutuna tauna ewai mirana. ²¹ Baninama banaga nopone nuapoune noğota gewegewedima ta tavatava, maika badara, danene, vunuğā, turanama debane mui e porena, ²² waigogo be noğota ğesaudima gewegewedima tabu be tabu e voivoiedina, maika waikaikaiyovu, kaua waimata warewaredi bo waideba subesubedima, unura, boruwaideğā, moraba be bua kauidima e voivoiedina. ²³ Uma kauidima gewegewedima banaga nopone ta tavatava, taudi vutudi banaga tawai mirana.”

Waivi na waisumağama
(Mt 15:21-28)

²⁴ Dabudine Yesu inam meagainama ya gose be ya nağona dobu dosine Taiya meagainama diane. Tauna vada nopone ya sağā be ya ğoegoena da banaga nam sibo a kataie da tauna inam dabudine, be yağoro tauna nam i mia moisirina. ²⁵ Gomana waivinama arua gewagewanama kokukokunama tinanama, Yesu varinama ya vaivaiena, yai rağantenağā ya verau Yesu noğone be tuapikane ya rauparina. ²⁶ Waivi tauna eteni Gurik nama be meagai dosinama Ponitia nopone ya tubuğana Siriama, waivi Yesu yai bağā da tauna natunama nopone penama sibo ya tavu dobiğena. ²⁷ Be Yesu ya paribee be ya riuna, “Kwa gose da noğone seda ta kani doka. Nam i verena da seda adi kanima tà pağō be dağdağası ğarodie tà pore nawe.”† ²⁸ Waivi ya paribee be ya riuna, “Bada! Be yağoro dağdağası vatara dibune miemienidima seda adi kanima kurekuredima tokare mate ta kanidina.” ²⁹ Dabudine Yesu waivi ya riuenä, “Nama kuya giuna aubainama, yodi tam kwa munağā am vadae, be dabudine tokare kwa kita da penama natumma waivinama ya dobi porena.” ³⁰ Naumeki da waivi ya munağā vadae

* **7:16:** Vers 16 inam umanama: Değoda beemima ta kenakenana, koi beavaia!

† **7:27:** ‘Seda’ inam Israel banegidima, be ‘dağdağası’ inam eteni banegidima.

da e kitana be penama gomana waivinama ya dobi pore be gomeninama tauna na kaba kenaе ya kenakenana ya kitana.

Yesu gumgum beanama potapotanama yai yawasanina

³¹ Dabudine Yesu Taiama be Saidon a ya dobi ya na ona Dekapolis nopone Galili yawawinama paratine. ³² Dabudine banaga  esa dima tau oma beanama potapotanama be nam giugiuna a vera gena Yesu  arone be ai ba a da nimanama sibo tau oma tunine ya boruna. ³³ Naumeki da patara nopolie be Yesu tau ominama tauna a yai doka dobi e  avoe be nimarakurakunama tau oma beane ya sivudi, da nimanama kavisone yai vira be tau oma menanama ya taukonina. ³⁴ Naumeki da Yesu gunume yai kita sa a da yavutu bagibaginama ya taupore, be tau oma ya riueno, “Epata!” Inam riunama baninama ‘Kwa nuapora a’. ³⁵ Inam ra ganine tau oma beanama ya raunu ari be mudune ya giu ya ana.

³⁶ Be Yesu banaga ya riu vavasa edi da nam aitau tena a ta riue, be ya riuriu nono edina, be taudi ya oro a giugiu watanena. ³⁷ Be taudi aitau a a vaivaiena a base kaue be a riuna, “Tauna yaba matabuna ya voia kauedina. Tauna e voie da avedi beapotapotanama be ei beavaiana, be avedi gumgum be e giuna.”

8

Yesu banaga 4 tausand yai kanidi

(Mt 15:32-39)

¹ Nam dauna inam ra ganine, patara  esa unama dosinama mate ai rawate eidina. Be dabudine nam aiyaba i ke akenana da taudi sibo a kani, dabudine Yesu na tauwai muriwatanama ya yokoedi  arone be ya riuna, ² “Taugu uma banegidima  a raunuatoiedina, baninama ra an rabuite a nopolie taudi taugu mate, be yodi nam aiyaba da ta kani. ³ Be de oda taudi ma kaniguridi y a riuporedina, tokare kedae ta raugurerena. Baninama banaga  esa dima madanie be a verauna.”

⁴ Dabudine na tauwai muriwatanama a paribee be a riuna, “Uma mutuyua dobunama. De o kani t a pa o be uma banegidima t ai kani bagibagidi?” ⁵ Yesu ya paribe edi be ya riuna, “Taumi  arome buredi bisa?” Be taudi a riuna, “Buredi 7.” ⁶ Naumeki da Yesu patara ya riuedi da do ae a miana. Be dabudine tauna buredi matabudi 7 ya ragaudi, Mamaitua yai kaiwe, ya givedi be na tauwai muriwatanama ya utedi da taudi sibo a soiedina patara  arodie, be taudi nama a voiena. ⁷ Be taudi iyana  au aubodima bisa a mate a ragaudina. Be Yesu inam iyenidima aubaidima yai kaiwa

be na tauwai muriwatanama ya riuedi da uma taudi mate ta soiedina.

⁸⁻⁹ Dabudine banaga sievinama 4 tausand nama a kani da a kani siauana. Naumeki da na tauwai muriwatanama kani kanikani gosedima posa matabudi 7 ai moğavudina. Be dabudine Yesu banaga ya riuriupore nawedina, ¹⁰ tauna waiğapa na tauwai muriwatanama mate wagae a sağ a be a nağona Dalmatia distrik nopone.

Parisi mataira ai bağena

(Mt 16:1-4)

¹¹ Be Parisi ġesaudima a tava Yesu ġarone be waitar-avirevirenama ai karea. Taudi a ġoegoena sibo Yesu a raurubuna, vutuna aubainama mara matairinama ai bağe da sibo ya voie be dabudi a kita be a kataie da Yesu tauna Mamaitua ġaronama. ¹² Dabudine Yesu yavutu bagibaginama ya taupore be ya riuna, “Aba aubainama yodi rağaninama banegidima mataira tawai bağedi? Ibewa! Ya riuriu kauemina da nam tokare mataira uma banegidima ġarodie e tubutubuğ a.” ¹³ Naumeki da tauna ya gose poredi da waga nopone ya sağ a munağ a be yawawa a davu da noağ o nevane a nağona.

Tauwai muriwatana Yesu aba ya giugiuena nam ti kataienia

(Mt 16:5-12)

¹⁴ Tauwai muriwatana nuedima ya koana, buredi toitoi kabe ti ragaragau da tenağ a kavakava a pağona ġarodie wagae. ¹⁵ Dabudine Yesu nuedima ya boru be ya riuedina, “Parisi be Herod adi waikaikaiyovuma maika yist. Koi kita kauana!” ¹⁶ Naumeki da tauwai muriwatana uma kauinama ai giu vivivire be a riuna, “Tauna nama ya riuna, baninama tauda ġarode nam buredi.” ¹⁷ Yesu ya kataiedi da taudi aba a giugiuena, vutuna aubainama tauna yai taraviredi, “Aba aubainama ko riuriuna da taumi ġaromie nam buredi? Taumi yağoro nam ko kita be ko kataie, bo? Taumi koya nuababağ a, bo? ¹⁸ Taumi matemima e kenakenana be nam komawai kita, beemima e kenakenana be nam komawai beavaia, bo? Be ko noğonogoti bo ibewa ¹⁹ da rağanine taugu buredidima matabudi 5 è givedina banaga 5 tausand aubaidima, be kani kanikani gosedima posedima moğamoğavudima bisa koya ragau?” Be tauwai muriwatana a paribee be a riuna, “Matabudi 12.” ²⁰ “Rağanine taugu buredidima matabudi 7 è givedina banaga 4 tausand aubaidima be kani kanikani gosedima posedima moğamoğavudima bisa koya ragau?” Be taudi a paribee be a riuna, “Matabudi 7.” ²¹ Be Yesu na tauwai

muriwatanama ya riuedina, “Taumi yaḡoro nam koma katakataie, bo?”

*Yesu tauḡoma matapotapotanama yai yawasanina
(Mt 9:27-31; 20:29-34; Lk 18:35-43)*

²² Raḡanine taudi Betsaidama a tavatavana banaga ġesaudima tauḡoma matapotapotanama ai doka verauġe Yesu ġarone be ai baġana da sibo ya taukonina. ²³ Naumeki da tauna tauḡoma matapotapotanama nimane ya kaididi da meagai a dobi pore be ġavoe a naġona. Dabudine Yesu tauḡoma matanama ya kavisodi be nimanama tauḡoma matane ya sivudi da yai taravire be ya riuna, “Aba kwa kitakita bo ibewa?” ²⁴ Be tauna ya tausuġu be ya riuna, “Taugu banaga yà kitekitedina be kitedima maika kai kabe ti naġonāġo.” ²⁵ Naumeki da Yesu nimanama tauḡoma matane ya sivu munaġedina. Dabudine tauḡoma matanama ya vere be yai kita munaġana, be yaba matabudi ya kita kauedina. ²⁶ Be Yesu tauḡoma ya riupore da ya naġona na vadae be ya riuna, “Nam meagai banegidima kwa riuedi da aba ya tubuġana.”

*Pita Yesu yai maġatarina
(Mt 16:13-20; Lk 9:18-21)*

²⁷ Yesu be na tauwai muriwatanama mate Seseria-Pilipai diane meagaidiġa nama a naġona. Da kedae be yai taraviredi da ya riuna, “Banaga ta riuriu da taugu aitau?” ²⁸ Be taudi a paribeena, “Banaga ġesaudima ta riuriuna da tam kabe Jon tauwai babataito, be ġesaudima ta riuriuna da tam kabe peroveta Elaija, be ġesaudima ta riuriu da tam kabe boni perovetedima.” ²⁹ Be tauna ya riuedina, “Be taumi nemanama ko noġonoġoti bake da taugu aitau?” Be Pita ya paribeena, “Tam Keriso, vutuna Mamaitua ya sausaugena ya riupore yovoġena.” ³⁰ Dabudine Yesu na tauwai muriwatanama ya riu vavasaġedi da nam aitau tenaġa tai vari.

*Yesu na wainuatoitoi be nema e guri bakona ya giuedina
(Mt 16:21-28; Lk 9:22-27)*

³¹ Dabudine Yesu na tauwai muriwatanama waikatakataidima yai kare be ya riuedina, “Banaga Natunama tokare ei nuatoitoina yaba toitoi ġarodie be babada dosidima, Parisi adi babadama be tarawatu tauwai katakataidima, taudi matabudi ta tuaġaie be tai gurina. Be raġan wairabuiteġane tauna tokare e midisuġu munaġana.” ³² Tauna uma kauidima ya giu kauedina, vutuna aubainama Pita Yesu yai doka nawe ġavoe be riutuaġaienāma yai karena. ³³ Be raġanine Yesu yai tauvitare da na tauwai

muriwatanama ya kitedi be Pita ya riutuāgai be ya riuna, “Seitan! Murigue kwa naōo, tam am noōotama nam Mamaitua īarone tima yovoyovona be banaga īomae.”

³⁴ Naumeki da Yesu na tauwai muriwatanama be patara ya yokoedi īarone be ya riuedina, “Aitau waimuriwataneguma e īoena, naumeki da na īoanama matabuna e gosedi, be na korosima e kirogi da ei muriwataneguna. ³⁵ Baninama deōoda aitau tame am yawasanama kwa kaididi be kwa raberabena, tokare am yawasanama kwa kawa gewagewana, be tam aitau am yawasanama kuyai utaena taugu be vari verenama kama taiye, tam tokare am yawasanama kwa banavina. ³⁶ Be deōoda aitau dobu yabedima matabudi e ragaragaudi be rāganine e gurina, inam yabedima nema tauna ta sagu bake da tauna yawasana kennakena nonoīnana e paōo? ³⁷ Bo aba banaga ei utae da na yawasanama e paōo munāge? ³⁸ Deōoda banaga aitau taugu be riuguma giuenama e tunitunimayaēna, uma kimtinama nam waisumeēdi be gewagewa tauvoiedima nopolie, naumeki da tokare, rāganine Banaga Natunama Tamanama neneīgarine be anea babau mate ta verauna, tauna mate e tuaīaiena, baninama noōone ya tunimayaēgun aubainama.”

9

¹ Be Yesu na giuma ya kaiwatani da ya riuna, “Taugu yà riuriu kauemina da taumi īesaumima yodi uma dabudi ko midimidina, tokare nam ko guri naumeki da Mamaitua na waiguyauma rewapana mate e verauna ko kitana.”

Yesu kitanama ya boru vitarena

(Mt 17:1-13; Lk 9:28-36)

² Raōan 6 a kovikovina murine Yesu Pita, Jeims be Jon yai dokedi be a naōona oya daudaunama debane, taudiāa dabudine a tavana. Be dabudine taudi noōodie matedie Yesu kitanama ya boru vitarena. ³ Be na garama a rawarawa keyekeyemidi be a īavora da a īavora kauana, nam aitau dobue teneteneīna da nama e kawa īavori. ⁴ Dabudine tauwai muriwatanana rabuiteēa noōodie be Elaija da Mousis a maōatara be Yesu mate awai giuna.

⁵ Be Pita ya riuna, “Tauwai katakatai, ya vere kaua da tauda mate uma dabudi. Be agunai tauma kape rabuiteēa ka keridi, da tenaīa tam aubaimma, tenaīa Mousis aubaina be tenaīa Elaija aubainama.” ⁶ Pita nama ya riuna, baninama tauna na banagama rabui mate a naira kauana, be Pita nam i kataie da aba sibo ya giue, vutuna aubainama ya giu yababayababana.

⁷ Dabudine giyou ya dobi be ya ruputawedina. Be inam giyounama nopone bona ya yovo be ya riuna, “Uma tauna taugu natuğomiguma, tauna vutuna taugu nuaguma e pağopağona, koi beavaie!” ⁸ Taudi ai rağantenağe da aitau kitakita be nam aitau tenağā ti kitana, be ġarodie Yesu taunağā. ⁹ Rağanine taudi oya debane be a yovoyovona rağanine, Yesu na tauwai muriwatanama ya riu vavasağedi da matedie aba a kitakitana nam aitau tenağā tai vari, naumeki da Banaga Natunama gurie e midisuğu munağana. ¹⁰ Taudi inam giudima a nuevidi be taudığā ai giu vivivira da, gurie midimidisuğunama na banima aba.

¹¹ Be taudi Yesu ai taravirena, “Aba aubainama tarawatu tauwai katakataidima ta riuriuna da, Elaija tokare e tava doka?” ¹² Yesu ya paribeedi be ya riuna, “Inam riukaua, Elaija tauna tokare e tava dokana, be tauna tokare yaba matabudi e kawa didimanidina. Be you, aba aubainama girugiruminama porane e riuriuna da Banaga Natunama tokare ei nuatoitoi kaua be ta tuağaiena? ¹³ Be yà riuriuemina da Elaija maiğone ya tavana, be aba banaga a noğonoğotina, nama ġarone a voiena, maika girugiruminama porane ya riuriuena nama.”

*Penama gomana tauğominama ya kokuna
(Mt 17:14-21; Lk 9:37-43)*

¹⁴ Rağanine taudi a dobidobi munağana, tauwai muriwatanaya ġidoidima mate ai rawateğeidi be ta kitana be patara dosinama a midi ġuruvidi be tarawatu tauwai katakataidima mate awai sağasağana. ¹⁵ Dabudine banaga matabudi Yesu a kitakitana, taudi a ġosoridi da a manini ġarone a nağ be ai kaiwena. ¹⁶ Be Yesu yai taraviredi be ya riuna, “Taumi aba aubainama taudi mate kowai sağasağā?” ¹⁷ Naumeki da tauğoma tenağā patara poune ya paribee be ya riuna, “Tauwai katakatai, taugu natuguma è veraüğena ġarome. Tauna penama ya koku be ya kaue da nam ima giugiuna. ¹⁸ Kana rağanie penama gomana e vunuvunuğina rağanine, tauna gomana doğae ewai bekuna. Be tauna kasampuropuro gayane ta dobidobina, da mokanama e gidedi be tuninama ta badobadona. Be taugu am tauwai muriwatanama èi bağedina da sibo peneminama a tavu dobiğena, be taudi nam teneteneğina.”

¹⁹ Be Yesu ya riuedina, “Taumi kimta nam waisumeğimi! Taugu taumi mate tà mia ġağā be ami vitama yà kiroğā ġağae? Gomana ko veraüğe ġarogue.” ²⁰ Naumeki da gomana a veraüğena Yesu ġarone. Be rağanine penama Yesu ya kitakitana, tauna yai rağantenağe da gomana ya

kawa kokeri be doğae yai bekuna. Dabudine gomana yai kunukunuvira be gayane kasampuropuro a tavatavana.

²¹ Be Yesu gomana tamanama yai taravirena, “Rağan bisa tauna umanama ya voia?” Be gomana tamanama Yesu ya paribee be ya riuna, “Rağanine tauna ġaubone da yodi. ²² Be penama rağan matabuna gomana kai matane bo upae yawai bekuna waigurinama aubainama. Be değoda tam teneteneğinama aba kwa voiena, naumeiki da kwa raunuatoiemai da kwa sagumai!” ²³ Be Yesu ya riuna, “Aba aubainama kuya riuna, ‘Değoda tam teneteneğina’? Tauna aitau ewai sumağana, ġarone yaba matabuna teneteneğinama.” ²⁴ Naumeiki da gomeninama tamanama yai rağantenağe da bonanama dosine ya riuna, “Taugu nam amawai sumağä kauana, be kwa kaisagugu da yài sumağä guratana.”

²⁵ Rağanine Yesu e kitana be patara ya moramorabana, vutuna aubainama tauna penama ya riutuağai be ya riuna, “Penama beapotapota be gumgum penemima, yà riuriu vavasağem da gomana kwa dobi pore be nam nopone kwa sağä munağä!” ²⁶ Dabudine penama gomana ya kawa yogoyogo, ya kawa kokeri gurate be gomana ya dobi porena. Be gomeninama kitana maika guri kabe i kenakena. Vutuna aubainama banaga gesaudima a riuna, “Tauna ya gurina!” ²⁷ Naumeiki da Yesu gomana nimane ya kaididi da ya soruwai midisügu be ya midina.

²⁸ Rağanine Yesu vada nopone ya sağasağana murine, be na tauwai muriwatanama taudiğä ai taravire be a riuna, “Aba aubainama tauma penama nam ke tavu dobiğe?” ²⁹ Be Yesu ya paribeedi da ya riuna, “Nam aiyabae tokare uma peneminama nama e tavu dobiğe, ibewa da moiragi* taunağä.”

*Yesu nema ya guri bakona ya giu munağena
(Mt 17:22-23; Lk 9:43-45)*

³⁰ Naumeiki da Yesu na tauwai muriwatanama mate inam dobunama a gose pore be Galili noponağä a nağona. Be Yesu nam i ġoegoena da aitau tenağä sibo ya kataiedi da taudi aikedae, ³¹ baninama tauna na tauwai muriwatanama yawai katakataidina. Be ya riuedina, “Banaga Natunama tokare ta boru dobiğena banaga nimedie. Taudi tai guri be rağan rabuiteğä murine tauna e midisügu munağä.” ³² Dabudine na tauwai muriwatanama nam ti kataiena da uma giunama baninama aba, be taudi waitaravirevirenama a nairena uma giunama aubainama.

* 9:29: Giruma gesaudima a riuna: Moiragi be widina

*Aitau ya sāga gurata
(Mt 18:1-5; Lk 9:46-48)*

³³ Naumeki da taudi Kapeniamma a tava da vada nopone a sāga a mia be Yesu na tauwai muriwatanama ya riuedina, “Taumi kedae aba koyawai sāgasagae?” ³⁴ Be taudi ai nuatuğutuğuna, baninama kedae taudi awai sāgasagana da aitau poudie ya sāga gurata. ³⁵ Dabudine tauna ya mia yovo da na tauwai muriwatanama 12 ya yokoedi be ya riuedina, “Değoda aitau moraba e ġoena, naumeki e kaue da e ġaubo be banaga matabudi adi taunoyama e tubuğana.” ³⁶ Dabudine tauna gomana ġaubonama nimane ya kaididi be na tauwai muriwatanama poudie yai midirina. Be gomeninama yai yaubabe, be ya riuedina, ³⁷ “Aitau seda umanama maika kitedima tenağā isague ewai turanena, tauna taugu ewai turaneguna, be aitau taugu ewai turaneguna, tauna tauriuporeguma ewai turanena.”

*Aitau nam dà ġavia tauna ġarodama
(Lk 9:49-50)*

³⁸ Jon ya riuna, “Tauwai katakatai, tauma tauğoma tenağā kè kitana isame penama ya tavutavu dobigedi be tauma kè riutuağien, baninama tauna nam tauda mate tama noyanoya tenağana.” ³⁹ Be Yesu ya riuna, “Nam ko riutuağie! Baninama aitau da isague mataira e voivoiedina, tauna nam teneğina da mainokomgo rağandie isaguma e kawa gewagewa, ⁴⁰ baninama banaga aitau nam imawai ġaviedana, tauna inam tauda turadama. ⁴¹ Taugu yà riuriu kauemina, değoda aitau isague upa e uteutemina, baninama taumi Keriso ġaronama, tauna teneteneğinama na maesama tokare e pağona.

*Raurubue dà gewagewama e tubutubuğana
(Mt 18:6-9; Lk 17:1-2)*

⁴² “Be değoda aitau uma sededima tenağā ewai sumağegu be e kaue da gewagewa e voienna, ya verena da tauna yeku dosinama gadone ta pani be egasie ta pore nawena. ⁴³ Değoda nimamma e kauem da gewagewa kwa voienna, naumeki da kwa douraka pore! Ya verena da nimamma tenağā mate yawasana nopone kwa sāga be nam nimamma rabui mate da gienae kwa nağō, dabudine kai karakarata watanine. ⁴⁴ (-)† ⁴⁵ Be değoda kağamma e kauem da gewagewa kwa voienna, naumeki da kwa douraka pore. Ya verena da kağamma tenağā mate yawasana nopone

† 9:44: (Vers 44 inam banaga muriğā babil nopone a boru sağena, noğone nam i kenakenana. Vers 44 inam umanama: Inam dabudine motamota taudi ta kanikanidina nam ta guri, be kai e karakaratidina nam e guri.)

kwa sağana be nam kağamma rabui mate da gienae ta pore nawem. ⁴⁶ (-)‡ ⁴⁷ Değoda matamma e kauem da gewagewa kwa voienna, naumeki da kwa kaipore. Ya verena da matamma tenağɑ kwa kunavai be Mamaitua na waiguyauma nopone kwa sağana, be nam matamma rabui mate da gienae ta pore nawemna. ⁴⁸ Inam dabudine motamota taudi ta kanikanidina nam ta guri, be kai e karakaratidina nam e guri. ⁴⁹ Be nama kai karakaratidima banaga matabudi tunidie ta yaraiedina.

⁵⁰ “Buta inam yaba verenama, be değoda buta dininama e gewagewana, nema kwa voia bake da e dini munağɑ? Buta ko pağō nopomie be ami banagama mate subae ko miana.”

10

Waigosağɑ waitaraviranama

(Mt 19:1-12; Lk 16:18)

¹ Naumeki da Yesu inam dobunama ya gose pore be ya nağona Judia provinsnama nopone be upa Jodan ya davuna. Dabudine patara ğarone a tava munağɑ be yai katakataidina tauna na vaivae nama.

² Be Parisi ğesaudima Yesu ğarone a tava be tauna rau-rubuna aubainama ai taravirena, “Kwa riuemai, tarawatu ewai anina bo ibewa da tauğoma na waivima e riupore?”

³ Be Yesu ya paribeedi be ya riuna, “Mousis na tarawatuma nopone nema ya riu bakemi?” ⁴ Be taudi a riuna, “Mousis yai anina da tauğoma waigosağɑ pepanama e girumi be waivi e riuporena.” ⁵ Dabudine Yesu ya paribeedi be ya riuna, “Mousis inam tarawatunama ya girumina, baninama taumi noğota porağɑ ğarone debemima ya bado kauana.

⁶ Be pakane Mamaitua yaba matabuna yawai tubugidina rağanine, tauna tauğoma be waivi ya voiedina. ⁷ Vutuna aubainama tauğoma tamanama be tinanama e gosedi be na waivima mate tai rawateğeidina ⁸ da taudi tubuğɑ tenağɑ ta tubuğana. Vutuna aubainama taudi yodi nam tubuğɑ rabui, ibewa da tenağɑ. ⁹ Naumeki da aba Mamaitua yawai rawateğeidina nam aitau ei yamonedi!”

¹⁰ Rağanine taudi a munağɑ vadae a tava be na tauwai muriwatanauma uma giunama aubainama Yesu ai taravirena. ¹¹ Be Yesu ya paribeedi be ya riuna, “Ai tauğoma na waivima e gose be waivi ğesauṇama e nağina, tauna na waivima debane mui e poreporena. ¹² Be kauinama tenegiṇama, değoda ai waivi na tauğomama e gose be

‡ 9:46: (Vers 46 inam banaga muriğɑ baibol nopone a boru sağena, noğone nam i kenakenana. Vers 46 inam umanama: Inam dabudine motamota taudi ta kanikanidina nam ta guri, be kai e karakaratidina nam e guri.)

taūgomā ġesaunama e nāgina, tauna na taūgomama debane mui e poreporena.”

*Yesu be seda
(Mt 19:13-15; Lk 18:15-17)*

¹³ Banaga ġesaudima seda ġaūgaubodima Yesu ġarone a veraugedi da tauna sibo ya taukonidina, be na tauwai muriwatanama inam banegidima a riutuaġaiedina. ¹⁴ Be raġanine Yesu nama ya kitakitana, tauna nuanama yai medi be na tauwai muriwatanama ya riuedina, “Seda ġaūgaubodima ko gosedi da ġarogue ta verau be nam ko riutuaġaiedi, bani-nama Mamaitua na waiguyauma inam banaga maika uma sededima nama aubaidima. ¹⁵ Taugu yà riuriu kauemina da aitau nam Mamaitua na waiguyauma i paġona, maika go-mana ġauba-nama nama, tauna tokare nam waiguyaunama nopone e saġa.” ¹⁶ Naumeki da Yesu seda ya tikedi da nimanama debedie ya sivudi be yai aiainidina.

*Waiguyau taūgominama
(Mt 19:16-30; Lk 18:18-30)*

¹⁷ Dabudine Yesu na nāgoma yai kare munaġe be taūgomā tenaġa ya manini tava da Yesu noġone be tuapikane ya raupari be yai taravirena, “Tauwai katakatai veremma, aba yà voie be yawasana kenakena nonoġinama yà paġo?”

¹⁸ Be Yesu ya riuena, “Aba aubainama kwawai isaguna veregu? Nam aitau verena be Mamaitua taunaġa. ¹⁹ Tam tarawatu poranama girugiruminama kuya kataiedina, Nam kwa vunuġa! Nam am visarama bo am taūgomama debane mui kwa pore! Nam kwa danene! Nam kwa kaiyovu! Nam kwa uta gigibu! Tamamma be tinamma kwa viviredi!”

²⁰ Dabudine taūgominama ya riuna, “Tauwai katakatai, taugu ġaubogue da yodi uma tarawatudima matabudi è voteyeteyedina.”

²¹ Yesu taūgominama ya kita da nuanama ya paġo be ya riuna, “Yaba tenaġa sibo kuya voiena. Kwa naġo be yaba matabudi ġarome kwa raugimaredi be inam manedima banaga waikaruwaġewaġedima kwa utedi, be tam tokare marae kwai guyauna. Yodibe kwa verau be kwai muriwatanegu!” ²² Be raġanine uma riunama ya vaivaiena taūgominama yai nuaboya be ma nuaboyana ya naġona, bani-nama tauna yai purapura kauana.

²³ Yesu yai kita kwaviviro be na tauwai muriwatanama ya riuedina, “Waiguyau banegidima ġarodie ya piripiri kaua da tokare Mamaitua na waiguyauma nopone ta saġa.”

²⁴ Tauwai muriwatana uma riunama nama a vaivaiena, taudi a ġosoridina. Be Yesu ya riu munaġana, “Seda,

Mamaitua na waiguyauma nōpone saṅanāma ya piripiri kauana.²⁵ Kamel ya bagibagi kauana da seyau gavogavone e sonaṅa, be maika nama waiguyau baneginama ya bagibagi da ya bagibagi kauana da Mamaitua na waiguyauma nōpone e saṅa.”²⁶ Dabudine tauwai muriwatana a ḡosori kauedi be adi noḡotama ya kovina. Be adi banagama adi banagama a riuedina, “Yodi aitau tokare e yawasana?”²⁷ Yesu na tauwai muriwatana nama ya kita dididi, ya paribeedi be ya riuna, “Banaga ḡarone nam teneteneṅgina be Mamaitua ḡarone tauna teneteneṅgina da waiguyau banegidima e voiedi da tokare Mamaitua na waiguyauma nōpone ta saṅana.”

²⁸ Dabudine Pita ya riuna, “Be tauma yaba matabudi kè gosa poraṅa be tam kèi muriwatanemna!”²⁹ Be Yesu ya paribeedi be ya riuna, “Taugu yà riuriu kauemina, aitau na vadama bo tuatuaṅanama, bo novunovunama, bo tinana, bo tamana, bo seda, bo sipi e gosedina taugu isague be vari verenama aubainama,³⁰ tauna yaba veredima toitoi yodi raṅanine e banavidina. Tauna tokare na vadama, tuatuaṅanama, novunovunama, tinatinanama, na sedama, be na sipima ta toi vavasaṅa, 100 be ei murina. Be raukivigewagewa mate be raṅan e tavana, tauna tokare yawasana kenakena nonoṅinama e paṅona.³¹ Be toitoi yodi ta dokadokana tokare ta murina, be aitauṅa yodi ta murimurina tokare ta dokana.”

Yesu nema e guri bakona raṅan wairabuiteṅanama ya giu munaṅena

(Mt 20:17-19; Lk 18:31-34)

³² Yesu na tauwai muriwatana nama mate taudi kedaṅa a saṅa a naṅonaṅona Jerusalemma, Yesu ya dokadokana be na tauwai muriwatana nama muriṅa a saṅasaṅana nuedima ya karatina, be banaga aitauṅa awai muriwatanedina taudi a naira kauana. Dabudine Yesu na tauwai muriwatana nama 12 yai doka nawedi ḡavoe be ya riuedina da tauna ḡarone abaṅa ta tubuṅana,³³ “Koi beavaia! Tauda tà saṅa tà naṅona Jerusalemma, dabudine Banaga Natunama tokare ta boru dobiṅena pirisi adi babadama be tarawatu tauwai katakataidima ḡarodie, taudi tokare ta etare be eteni banegidima nimedie ta boru nawena waigurinama aubainama.³⁴ Be taudi tokare tai varavara, ta kaviso, ta kwapu be tai gurina. Be raṅan wairabuiteṅane tauna tokare e midisuṅu munaṅana.”

Jeims be Jon adi waibaṅama

(Mt 20:20-28)

³⁵ Naumeki da Sebedi natunama Jeims be Jon Yesu ḡarone a tava be a riuna, “Tauwai katakatai, tauma ka ḡoeṅoena

aubaimaima yaba tenaḡa kwa voienna.”³⁶ Be Yesu ya riuna, “Aba ko ġoegħoena aubaimima yà voie?”³⁷ Taudi a paribee be a riuna, “Am waiguyauma na raġanie kwai aninemai da tenaḡa kasaume e mia be tenaḡa senime.”

³⁸ Be Yesu ya riuedina, “Taumi nam ko kataiena aba kowai baġena. Taumi teneteneġina da taugu ġoraġoranama yà tegona nama ko tego bo babataitonama* yà paġona nama ko paġo, bo?”³⁹ Taudi a paribee be a riuna, “Tauma teneteneġinama!” Dabudine Yesu ya riuedina, “Taumi tokare ġoraġoranama ko tegona be yà babataitona nama tokare ko babataitona.⁴⁰ Be kasaugue be senigue mieninama, inam tokare nam taugu yài anina. Inam gabunama taudi aitaūga vinevinedima aubaidima Maitiu ya vokaukauena.”

⁴¹ Raġanine tauwai muriwatana ġesaudima 10-nama a vaivaiena, taudi nuedima yai medina Jeims be Jon ġarodie. ⁴² Vutuna aubainama taudi matabudi Yesu ya yokoedi ġarone be ya riuedina, “Taumi koya kataiena da eteni banegidima adi babadama eteni ġarodie tawai badabadana. Be babadidima ai rewapano vavasaġana aubainama da taudi matabudi tawai bagedina.⁴³ Uma kauinama nama taumi ġaromie nam e tubuġa! Be deġoda aitau tenaḡa nopomie moraba e ġoena, naumeki tauna e kaue da matabumi ami taunoyama e tubuġana.⁴⁴ Be aitau saġa gurata e ġoena, naumeki da ei taunoyana ġaromie.⁴⁵ Baninama avedi da Banaga Natunama ya verauna nam banaga tauna aubainama ta noya, be tauna taudi aubaidima e noyana, be na yawasanama ei utae da banaga toitoi e kuvesidina.”

*Yesu Batimeus matapotapotanama yai yawasanina
(Mt 20:29-34; Lk 18:35-43)*

⁴⁶ Naumeki da Yesu be na tauwai muriwatanama a tavana Jerikoma. Dabudine taudi be patara dosinama meagainama a gose be tauġoma matapotapotanama isanama Batimeus keda diane ya mia be ya kiġikiġina, tauna inam Timias natunama.⁴⁷ Raġaninetu aitau tenaḡa e vaiena be Nasaret Yesunama, tauna ya yoko be ya riuna, “Yesu, Deivid natunama kwa raunuatoiegu!”⁴⁸ Banaga toitoi a riupasakare be a riutuaġaiena da sibo yai nuatūguna. Be dabudine tauna ya yoko gurata be ya riuna, “Deivid natunama kwa raunuatoiegu!”⁴⁹ Dabudine Yesu ya midi kwasa be ya riuna, “Ko riue be e verau!” Naumeki da taudi tauġoma matapotapotanama a yokoe be a riuena, “Nam kwai nuaboya! Kwa midisugu! Tauna e yokoyokoemna.”⁵⁰ Dabudine tauġoma ya midisugu,

* **10:38:** Uma babataitonama inam Yesu ya gurigurina ya giuena.

na garama ya gose pore be ya verauna Yesu ġarone. ⁵¹ Yesu tauġoma yai taravire be ya riuna, “Aba kwa ġoeġoena aubaimma yà voie?” Dabudine tauġoma matapotapotanama ya riuna, “Tauwai katakatai, taugu yà ġoeġoena yài kitana.” ⁵² Dabudine Yesu ya riuna, “Kwa naġo, am waisumaġħama yai yawasanimna.” Naumeki be yai raġontenage da matanama yai kita munaġa be Yesu yai muriwatanena kedaġa.

11

Yesu Jerusalemma ya saġana

(Mt 21:1-11; Lk 19:28-40; Jn 12:12-19)

¹ Raġanine Jerusalem diane a tavatavana, taudi a verauna Betpage be Beteni meagaidie oya isanama ‘Olip’ yauwane. Dabudine Yesu na tauwai muriwatanama rabui ya riupore nawe dokedi ² be ya riuedina, “Ko naġona noġomie meagaine, be raġanine meagaine ko saġasaġana, dabudine ko kitana donki natunama a nigorina. Inam nam aitau i geru rubuena. Ko kuvesi be ko verauġena uma! ³ Be deġoda aitau ei taraviremina, ‘Aba aubainama umanama ko voivoie?’ da ko riuena, ‘Bada e ġoeġoena, raġan ġaubaonaġa be ka verauġa munaġena.’”

⁴ Naumeki da taudi a naġona, kedae be vada noġone donki natunama nigonigorinama a kitana. Raġanine taudi a kuvekuvesina, ⁵ banaga ġesaudima inam dabudine midimididima taudi ai taraviredina, “Aba aubainama donki natunama ko kuvekuvesi?” ⁶ Be taudi Yesu ya riuriuedina nama a paribeedina, vutuna aubainama taudi ai aninedi be a naġona. ⁷ Taudi donki natunama Yesu ġarone a tavaite be adi garama donki natunama debane a yesidi be Yesu debane ya miana. ⁸ Banaga toitoi adi garama a yesiyesidina maika banaga ġesaudima kairugurugu wapue a taraġa a tavaitedi be kedaġa a yesidina. ⁹ Banaga aitauġa a dokadokana be aitauġa Yesu murine a saġasaġana a yogo be a riuna, “Hosana! Waiaiaininama, tauna vutuna Bada isane e veraveravauna! ¹⁰ Mamaitua, tauma tamamaima guyau Deivid na waiguyauma e veraveravauna kwai aiaini! Mamaitua ka kaisuġum!”

¹¹ Naumeki da Yesu Jerusalem nopone ya saġa be ya naġona tempol nopone, dabudine yaba matabudi ya kita rovodina, be kaiteka ravi aubainama, tauna na tauwai muriwatanama 12 mate a dobi a naġona Betenima.

Yesu damaya ya riutuāġiae da nam e vota

(Mt 21:18-19)

¹² Pomainama taudi Beteni a gose be a munamunaġħana, be Yesu kani ya karatina. ¹³ Dabudine tauna ei kita naġona be

damaya ya kitana, ya kinikini. Naumeki da tauna ya naḡona kitanama aubainama deḡoda banidima tima kenakena. Be raḡanine damaya pakane e tavana be damayinama nam i banina be rugukavanaḡa ya kitana. Baninama damaya nam yodi na iri kaua da damayinama sibo ya bani.¹⁴ Naumeki da Yesu damayinama ya riutuaḡaie be ya riuna, “Tam damayimma nam airaḡan kwa bani munaḡa!” Dabudine nama ya riuriuna na tauwai muriwatanama a vaiena.

*Yesu taukune tempol nopone ya tavu dobiġedina
(Mt 21:12-17; Lk 19:45-48; Jn 2:13-22)*

¹⁵ Raḡanine taudi Jerusalemma a tavatavana, tauna tempol nopone ya saḡa be banaga aitaugā a kunkune be a gimag-imarana ya tavu dobiġedina. Tauna mane taurabedima adi vatarama yai tauviredi be aitaugā kiu gabubu taurau gimaredima adi kaba miama mate yai tauviredina,¹⁶ be nam aitau tenaḡa i anine da na taragaima e kiroḡa be tempol nponaḡa e naḡo. ¹⁷ Taudi yai katakataidi be dabudine ya riuedina, “Giruma porane Mamaitua ya riuna, ‘Taugu yau tempolma tai isana moiragi kana vadama dobu matabuna aubaidima.’

Be taumi koya voie da kabe ‘taudanedanene adi gabu.’ ”

¹⁸ Naumeki da pirisi adi babadama be tarawatu tauwai katakataidima uma kauinama a vaiena, vutuna aubainama taudi keda a wanewanena da nema sibo Yesu ai guri bakena, be taudi a nairena, baninama patara matabudi na waikatakataima a basebasena. ¹⁹ Naumeki da ravi ya tava be Yesu na tauwai muriwatanama mate meagainama a dobi pore be a naḡona.

*Waikatakatai damaya ġarone
(Mt 21:20-22)*

²⁰ Pomainama raḡanboiboi taudi a naḡonaḡona maika, kedae damaya waramine da damone matabuna ya pokina a kitana. ²¹ Dabudine aba ya tubutubuḡana Pita ya noḡoti be Yesu ya riuena, “Tauwai katakatai, damaya kuya riuri-utuāḡaiena kwa kita, ya pokina!” ²² Naumeki da Yesu ya paribeedi be ya riuna, “Koi sumaḡa Mamaitua ġarone! ²³ Yà riuriu kauemina deḡoda aitau uma oyanama e riuena, ‘Kwa midisuḡu be kwa pore nawem egasie!’ Be tauna nopone nam e noḡota bekubeku be ei sumaḡa da aba ya riuriena e tubuḡana, tokare teneteneġinama aubainama e tubuḡana. ²⁴ Vutuna aubainama yà riuemina aba moiragie koi baḡena, koi sumaḡa da taumi kaite koya paḡo. Da inam tokare taumi ġaromima.

²⁵ Raḡanine ko midi da ko moiragi be ko noḡoti da aitau aba ġaromie ya voia waigewana, naumeki da ko noḡota

porena, yodibe tamemima marae tokare taumi mate ami gewagewama e noğota porena.”²⁶ (-)*

*Yesu na waibadama waitaraviranama
(Mt 21:23-27; Lk 20:1-8)*

²⁷ Yesu na tauwai muriwatanama mate Jerusalemma a tava munağɑ be rağanine tauna tempol noponağɑ ya nağonağona, dabudine pirisi adi babadama, tarawatu tauwai katakataidima be babada ġesaudima Yesu ġarone a tava,²⁸ da ai taravire be a riuna, “Tam aba waibadane umanama yabedima kwa voivoiedi? Bo aitau uma waibadanama ya utem?”

²⁹ Dabudine Yesu ya paribeedi be ya riuna, “Taugu yau waitaravirama tenağɑ yà taraviremi da ko paribeegu be muriğɑ da taugu yà riuemi da taugu aba waibadane uma yabedima yà voivoiedi.³⁰ Ko riuegu! Jon dego dabudi waibada ya pağɑ da yawai babataito, Mamaitua ġarone bo banaga ġarodie?”

³¹ Dabudine taudiğɑ ai sağasağɑ be a riuna, “Nema tà riu bako? Değoda tà riuna Mamaitua ġarone, tauna tokare umanama ei taraviredana, ‘Be aba aubainama da taumi Jon nam koi sumağe?’³² Be değoda taudi tà riuna ‘banage’ taudi banaga a nairedina, baninama banaga matabudi a noğonoğotina da Jon tauna peroveta.”³³ Vutuna aubainama taudi Yesu a paribee be a riuna, “Tauma nam ke kataiena.” Dabudine Yesu ya riuedina, “Taugu mate nam yà riuemi da taugu aba waibadane uma yabedima yà voivoiedi.”

12

*Gureipi sipinama taurabenama wainasinama
(Mt 21:33-46; Lk 20:9-19)*

¹ Naumeki da Yesu wainasie banaga umanama ya riuedina, “Tauğoma tenağɑ gureipi sipinama ya voie be ya gana kukuna. Naumeki da waen anibuyonama domnama ya keri be kweyağɑ vadanama mate ya kerina. Yodibe gureipi sipinama tausipi ġesaudima nimedie ya boru da a raberabe be tauna vağiae ya nağona.² Rağanine gureipi taminama na rağaninama ya tavatavana, tauna na taunoyama ya riupore nawena sipi taurabenama ġarodie da na dariğama sibo ya pağona.³ Be taudi a vunuğî, a riğɑ be nimakavakavanama a riupore nawena.⁴ Naumeki da taupaka na taunoyama

* **11:26:** (Giruma ġesaudima vers 26 baibol nopone a boru sağena. Vers 26 inam umanama: Değoda taumi ami banagama adi gewagewama nam ko noğota pore, naumeki da Mamaitua marae nam ami gewagewama e noğota pore. (Metiu 6:15 ko kitana))

ḡesaunama ya riupore nawena ḡarodie, dabudine sipi taurabenama inam tauḡominama debanama a riḡa be a kae da a kawa tunimayaḡina. ⁵ Be taupaka yaḡoro na taunoyama ḡesaunama ya riupore, be sipi taurabenama inam tauna a katigabana. Be taupaka banaga ḡesaudima mate toitoi ya riuporedi be ḡidoidima a riḡedi, be ḡidoidima a kati gabedina. ⁶ Be yodi tenaḡa kavakava a taugosena. Be inam tauna, taupaka natunama tauḡominama, tauna vutuna ewai nuapaḡoena. Naumeiki da na damone tauna natunama ya riupore be ya riuna, ‘Yà noḡonogötina da taudi tokare natuguma ta vivirena!’ ⁷ Be sipi taurabenama taudiḡa ai giu vivivira be a riuna, ‘Uma tauna tokare tamanama na buderima e paḡona, vutuna aubainama tài guri be buderinama tài buderie!’ ⁸ Naumeiki da taudi a vunuḡi be ai guri da gureipi sipinama nopone, be a pore dobīgena.”

⁹ Dabudine Yesu yai taraviredi be ya riuna, “Sipi taupakinama tokare e verau be aba e voie? Tauna tokare e verau be sipi taurabedima ei guridi be gureipi sipinama banaga ḡesaudima e utedina. ¹⁰ Taumi riuwai noḡota poranama nopone girugiruminama koya sievi bo ibewa, da ‘Vada taukerinama yekue vada a kerikeri be yeku tenaḡa a pore kaiyatina, baninama inam yekunama taudi nam ti ḡoena.

Be Mamaitua yekunama poreporenama ya paḡo be ya voie da na vadama e kerikerina yasinama ya tubuḡana.

¹¹ Be inam kauinama Bada ya voie da uma kauinama anikitanama ḡarode ya vere kauana.’”

¹² Dabudine pirisi adi babadama, Jius babadidima be tarawatu tauwai katakataidima a ḡoeḡoena da Yesu sibo a vunuḡina, baninama mayedima a paḡo da Yesu taudi yawai nasiedina. Be taudi patara a nairedina, vutuna aubainama tauna a gose be a naḡo porena.

Teks tautaminama wainasinama (Mt 22:15-22; Lk 20:20-26)

¹³ Muriġanama taudi Parisi be Herod na tauwai muriwatanama ḡesaudima mate a riupore nawedi Yesu ḡarone be waitaravirae Yesu a raurubu be a vaia kae da Yesu aba sibo ya vato waigewana. ¹⁴ Taudi Yesu ḡarone a tava be a riuna, “Tauwai katakatai, tauma kè kataie da tam riukaue kwa giugiu. Am giue tam nam banaga kuma nainairedina, baninama tam banaga nam kuma siesievidi da taudi nema maika kitedi, be Mamaitua na ḡoanama riukaue kwai katakataidina. Kwa riuemai, inam naumeiki bo ibewa da tauma Sisa ḡarone kai teks bo avedi? Tauma kai maesa bo ibewa?” ¹⁵ Be dabudine Yesu adi noḡotāma kaikaiyovudima ya kataie be ya riuna, “Aba aubainama taumi ko rarau

rubugu? Sirinnama ko verauğe be ya kita!”¹⁶ Naumeki da Sirin a pağō verauğe ġarone be Yesu yai taraviredina, “Aitau noğona be isanama Sirin bogane ta kenakena?” Be a paribee be a riuna, “Uma Sisa noğonama.”¹⁷ Be Yesu ya riuedina, “Naumeki da Sisa ġaronama Sisa ko ute, be Mamaitua ġaronama Mamaitua ko ute!” Be dabudine taudi Yesu a basena.

*Gurie be midimidisuğu muneğinama waitaraviranama
(Mt 22:23-33; Lk 20:27-40)*

¹⁸ Jius nopolie dam ġaubonama isanama Sadisi, a riuria una da banaga e guri be nam e midisuğu munağā, taudi a verau Yesu ġarone, ai taravire be a riuna,¹⁹ “Tauwai katakatai, Mousis uma tarawatunama aubaimaima ya girumina, değoda banaga tauğominama ya guri be na visarama e gose porena nam waisedasedana, naumeki da tasinama bo tuağanama sibo kaiyababinama ya nağı be seda sibo yai tubuğana tuağanama gurigurinama aubainama.

²⁰ “Naumeki da tautauğoma 7 a tubuğana tina tenağā ġarone, be tauğoma tautuağā waivi ya nağı da nam ti natunatuna be tauğominama ya gurina.²¹ Be tauğoma wairabuinama inam kaiyababinama ya nağina, be tauna mate seda nam i tikedi be ya gurina, kauinama teneğinama tauğoma wairabuiteğanama ġarone ya tubuğana.²² Naumeki da tautauğoma 7 kauinama namağā nam ti natunatuna da a guri rovona. Naumeki da a gurigurina damone inam waivinama ya guri ġavutana.²³ Be rağanine midisuğu munağā na rağanie uma waivinama tautauğoma 7 a nağinağina, be inam waivinama tokare aitau na waivi?”

²⁴ Yesu ya paribeedi be ya riuna, “Taumi koya riu waigewana, baninama taumi girugiruminama porane nam ko katai kauena be Mamaitua na rewapanama mate nam ko kataienai.²⁵ Rağanine guri ta midisuğu munağā, be taudi tokare maika anea marae be tokare nam tai nağı.²⁶ Be yodi guri kawakawa midisuğunama na giuma taumi Mousis na bukama koya sievi bo ibewa? Değō ya riuna gedara rageragettinama nopone Mamaitua Mousis ya riuena umanama, ‘Taugu inam Eibrahim, Aisik be Jeikob adi Mamaituuma’.²⁷ Mamaitua, nam banaga guriguridima adi Mamaitua, be tauna banaga yawayawasanidima adi Mamaituuma. Taumi naumeki koya bua kauana.”

*Riuvavasağā dosinama
(Mt 22:34-40; Lk 10:25-28)*

²⁸ Tarawatu tauwai katakataidima tenağā dabudine mate adi giuma yawai beavaiena. Dabudine tauna e vaiena be

Yesu na giuma didimanine Sadisi adi giuma ya pariparibeedinna. Vutuna aubainama tauna Yesu yai taravire be ya riuna, “Riuvavasağɑ matabudi namağɑ, be değɑ tauna ya sağɑ vavasağɑ?”²⁹ Yesu ya paribee be ya riuna, “Riuvavasağɑ dosinama tenağɑ inam umanama, ‘Israel koi beavaia! Bada da Mamaituama, tauna taunağɑ Bada.³⁰ Bada Mamaitua nuanuamma e pağɑ, nuanuamma tabutabune, aruimma tabutabune, am noğotama tabutabune be am rewapanama tabutabune.’³¹ Be riuvavasağɑ dosinama aniwai rabuinama inam umanama, ‘Turamma nuanuamma e pağona maika tam kwa ġoeğoe munağemna nama.’ Nam değɑ aba riuvavasağıdima ti sağɑ vavasağana maika uma taudi.”

³² Tarawatu tauwai katakatainama Yesu ya riuena, “Inam riukaua tauwai katakatai, kuya riuna maika da Bada tauñağɑ Mamaitua be nam değɑ mamaitua ġesəudi, ibewa da tauna, taunağɑ.³³ Be banaga nuanama tabutabune, na noğotama tabutabune, be na rewapanama tabutabune Mamaitua ei nuapağoe, be turanama ei nuapağoenə maika tauname ewai nuapağō munağenə nama. Uma riudima riuvavasağɑ rabui dosidima tà voteyeteyedina, taudi nam maika musara be puyo ġesəudima tà gabudi be Mamaitua tà uteutena nama.”³⁴ Rağanine Yesu ya kataie da tauna na paribeama ya vere kauana, aubainama tauna tarawatu tauwai katakatainama ya riuena, “Tam kaiteka Mamaitua na waiguyauma diane kwa tavatavana.” Inam dabudine nam aitau Yesu waitaravira munağenəma i ġoena, baninama taudi a nairana.

Keriso aitau natuna?
(Mt 22:41-46; Lk 20:41-44)

³⁵ Rağanine Yesu tempol nopone yawai katakataina maika, tauna yai taravira be ya riuna, “Nemanama da tarawatu tauwai katakataidima ta riuriuna da Keriso tauna Deivid natunama?³⁶ Be Arua Babau Deivid nopone ya yovo be tauna ġominama umanama ya riuena,

‘Mamaitua yau Badama ya riuena,
Kasaugue kwa miana naumeki da taugu am ġaviam
kağamma dibudie yà biridina’.

³⁷ Deivid ġominama Keriso yawai isana: Bada! Be yodi nemanama da Keriso tauna Deivid natuna?” Dabudine patara dosinama ma nuaveredi Yesu awai beavaienā.

Yesu banaga nuedima ya boru da tarawatu tauwai katakataidima ġarodie tai kita kauana
(Mt 23:1-36; Lk 20:45-47)

³⁸ Be rağanine Yesu yawai katakataidi be ya riuna, “Koi kita kauana tarawatu tauwai katakataidima ġarodie! Taudi

ta ġoeġoena gara veredima ta kotedi be debaġa ta rau-guyaguyau naġona be banaga taudi tai kaiwedina vivira mate.³⁹ Be taudi sinagog nopolie be soi nopolie gabu verediġa be gabu dosidiġa ta ragaragaudina.⁴⁰ Be taudi kaiyababa waikaruwaġewaġedima adi vadama be adi purapura ta kwayekwayedina be moiragi daudaudima kaikaiyovudima ta voivoiedina. Taudi tokare kovoġa dosinama ta banavina.”

Kaiyababa na puyoma

(Lk 21:1-4)

⁴¹ Yesu tempol nophone mane adi kaba boruma diane ya mia be patara mane a boruboruna ya kitekitedina. Be banaga waimanedima toitoi a saġa be mane toitoi a biribiridina. ⁴² Be kaiyababa waikaruwaġawāġanama ya saġa be mane dubedima ġaġaubađidima rabui ya biridina, inam peni tenaġa na ruvama. ⁴³ Yesu na tauwai muriwatanama ya yokoedi da ġarone be ya riuedina, “Yà riuriu kauemina da uma kayababinama waikaruwaġawāġanama tauna puyo ya moraba kauana mane tanane ya suvekina, nam maika banaga ġesaudima nama. ⁴⁴ Baninama banaga ġesaudima mane ai maure be ragisidima a saġa be a rarau puyoedi. Be kaiyababa waikaruwaġawāġanama, tauna na manema ġaubađonama sibo na kanima ya gimerina be ya raupuyoena.”

13

Yesu tempol kawa gewagewanama be raġan damonama adi matairama ya giuedina

(Mt 24:1-14; Lk 21:5-6)

¹ Raġanine Yesu tempol ya gosegosena, na tauwai muriwatanama tenaġa ya riuna, “Tauwai katakatai, kwa kita! Vada yekue kerikeridima kitedima a vere ġaġa.”² Be Yesu ya paribee be ya riuna, “Uma vadedima dosidima ko kitekitedina. Nam ai yeku tenaġa dabudine tokare na gabue e kena. Matabudi tokare ta rawadabuririġidina.”

³ Yesu oya Olip debane ya mia be tempol yauwanine yawai kitanaġo be Pita, Jeims, Jon be Endru moisirie be ġarone a tava da Yesu ai taravire be a riuna,⁴ “Kwa riuemai, uma kauidima aba raġanine ta tubuġa be abaqata matairidima ta tubuġa be ka kitedi da uma kauidima ta tubutubuġana?”⁵ Be Yesu ya riuna, “Koi kita kaua da nam aitau ei kedaduka waigewemi.⁶ Banaga toitoi tokare isague ta tava be ta riuna, ‘Taugu vutuna Keriso!’ Be taudi tokare banaga toitoi tai kedaduka waigewedina.⁷ Be raġanine iġara guguridima maida ko vaie be madanie varidima ko vaiedina, nam koi nuaboya! Uma kauidima nama tokare ta

tubuğana, be nam ko noğoti da inam rağan damona, ibewa!
⁸ Dobu da dobu tai kawa ġasiġasina, be waiguyau turanama waiguyau mate tai kawa ġasiġasina. Be dobu matabuna yoyo be meiġara tai verau tatena. Uma kauidima matabudi ta tubuğana maika gomana kaevounama e tubutubuğana tunimuyanama nama, inam tepe pakanama.

(Mt 10:17-22)

⁹ “Taumiġa ko kita kauemina. Taumi tokare tapanimina etara aubainama, taumi tokare sinagog nopolie ta riġemina, taumi tokare babada dosidima be guyaguyau noğodie ko midi be isague vari verenama ko riuedina. ¹⁰ Muriġa da rağan damonama e tavana, be noğone vari verenama ta rauguguyena dobu matabuna banaga ġarodie. ¹¹ Rağanine ta panimi be etara aubainama ta nawemina, nam koi nuaboya dokadoka da nema sibo koya giu bako. Rağanine inam rağaninama e tavana giu aba da e uteutemina ko giuena, baninama giu aba da ko giuena inam nam nuemie tokare ko giu, ibewa da Arua Babau e giuna.

¹² “Tautauğoma tasitasidi bo tuatuağedima ta biri dobīgedi da tai guridina, be seda tametamedima kauinama teneğinama adi sedama ġarodie ta kauena, be seda nama adi dosima mate tai kawa ġasiġasi be tai guridina. ¹³ Be banaga matabudi ta tuaġaiemina, baninama taumi taugu kowai sumağeguna aubainama. Be aitau e midi bagibagi be e raudamoena, tauna tokare e yawasanana.

Yaba gewagewanama waimatatuağainama e tubuğā

(Mt 24:15-28; Lk 21:20-24)

¹⁴ “Tausiava, uma giunama baninama ko katai kauena: Taumi tokare ko kita da gewagewa waimatawarawara vavasağinama dego nam sibo ya midi, be tokare e midina. Be taudi aitauğā Judiama miemienidima oyae sibo a nağona. ¹⁵ Be aitau da na vadama debane, be nam tauna teneteneğina da tokare e dobi e nağ na vadama nōpone be na purapurama e ragaudi. ¹⁶ Be nam aitau sipie be e munağā vadae na garama ragaudima aubaina. ¹⁷ Inam rağandie waiwaivi bogebogedi be waitatau vaudima ġarodie e gewagewa kauana. ¹⁸ Mamaitua ġarone ko moiragi da uma kauidima nam bodubodue* ta tubuğā, ¹⁹ baninama nuaboya inam rağandie ta tubuğana e gewagewa vavasağana, nam maika Mamaitua dobu pakane yawai tubuğie nama i tubuğā rubuna, naumeki da yodi rağandie ta tubuğana. Tokare uma kauinama nama nam e tubuğā munağā. ²⁰ Be değoda

* **13:18:** Gurik baibol nōpone nam ‘bodubodu’ ima kenakenana. Be ‘winter’ e kenakenana, inam nam maika bodubodu be inam tururu ya moraba kauana, tokare teneteneğinama ei gurimna.

Bada inam rağandima nam sibo i taitupodi, tokare nam aitau tenağā ya yawasana. Be baninama tauna na banagama vinevinedima kadi taiye, tauna uma rağandima ya taitupodina.

²¹ “Be inam rağandie değoda aitau e riuemina, Keriso umanema! Bo noanema! Nam koi sumağē! ²² Baninama Keriso kaikaiyovudi be peroveta kaikaiyovudima tokare ta mağatara be mataira be anibasa kauidima ta voiedina, be değoda Mamaitua na vinevinema banegidima mate tai kedadoka waigewedina. ²³ Vutuna aubainama ko kita kaua, yaba matabuna è riu wainonoğimina, muriğā da inam rağandima ta tavana.

Yesu na kaba yovoma rağaninama

(Mt 24:29-31; Lk 21:25-28)

²⁴ “Be inam nuaboyedima rağandima muridie, suara ei kupi, be nawaravi tokare nam e yana munağā.

²⁵ Be kipora gunume ta kuruva be gunuma rewapanidima matabudi e gusu waidaberaridina.

²⁶ Be dabudine Banaga Natunama ta kitana giyou nophone e mağatara be e yovona ma rewapanina be neneğarinama dosinama mate. ²⁷ Dabudine tauna na aneama e riuporağā da dobu kawa susunama 4, be dabudine Mamaitua na banagama vinevinedima ta rawateğeteğeidina dobu isudie da isudie be gunuma isudie da isudie.

(Mt 24:32-44; Lk 21:29-33)

²⁸ “Naumeki ko gose da damaya kainama ei katakataimi! Rağanine damaya ragedima ta kini be rugudima ta gidagidavana, inam rağanine ko kataie da inam bodubodu rağaninama maida e tavatavana. ²⁹ Uma kauinama teneğinama nama, rağanine taumi uma kauidima gewegewedima ko kitedi be ta tubutubuğāna, dabudine taumi ko kataie da Bada na kaba verauma rağaninama kaiteka maida. ³⁰ Taugu yà riuriu kauemina, da uma kimtinama nam ei kave naumeki da uma kauidima tokare matabudi ta tubuğā dokana. ³¹ Mara be dobu tokare tai kavena be taugu riuguma nam airağān tai kave.

Bada na kaba verauma rağaninama nam aitau i kataiena

³² “Nam aitau tenağā rağān be awa i kataie rubuna da airağān inam rağaninama e tava. Nam ai anea marae bo Natunama tauğominama, be ibewa Tamaguma taunağā ya kataiena. ³³ Be koi kita kaua be koi neneğāna, baninama nam ko kataiena da airağān inam rağaninama e tava. ³⁴ Inam maika tauğoma na taunoyama ya gosedi da na vadama a raberabe be tauna ya nağō poredina vağāi aubainama. Tauna na taunoyama tenağāga adi noyama ya utedina, be

matakeda taurabenama ya riue da ei neneğāna kauana.
³⁵ Vutuna aubainama taumi rağān matabuna koi neneğāna, baninama taumi vada taupakinama na kaba verauma nam ko kataiena da airağān e verau munağā, değoda ravie bo nubautuae bo rağantotom kamkam ta riuriue nama bo rağanboiboi suara e tavatavana rağanine! ³⁶ Baninama değoda ei rağantenäge be e tavana, nam ko kenakena be e kitemi. ³⁷ Taugu aba yà riuriuemina, nama banaga matabudi yà riuriuedina, koi neneğāna!”

14

Yesu kana kasirama a tomtomna
(Mt 26:1-5; Lk 22:1-2)

¹ Rağān rabui muridie, da sibo Nağopore be Buredi-Nam-Sasasanina soinama, be pirisi adi babada be tarawatu tauwai katakataidima taudi keda a wanewanena, be semoe Yesu kana kasirama a tomtomna da sibo a vunuğī be ai gurina. ² Be taudi a riuna, “Nam soi nopone be nama tà voia, değoda banaga tokare kada iğarama ta suruena.”

Waivi upa ġabuğabunama Yesu debane ya ġinina
(Mt 26:6-13; Jn 12:1-8)

³ Yesu tauna Betenima, tauğoma isanama Saemon Kito, tauna na vadae Yesu ya miamicana. Dabudine Yesu ya kanikani be waivi upa ġabuğabunama maesinama dosinama duginama ya kiroğī be ya tavana. Inam upanama yaba isanama Nad a voiena. Naumeki da waivi dugi vikinama ya kaipore be upa ġabuğabunama Yesu debane ya ġinina. ⁴ Dabudine banaga ġesaudima nama a kitakitana, taudi adi banagama adi banagama a riuedina, “Aba aubainama upa ġabuğabunama ewai yakare? ⁵ Inam sibo a raugimare da mane Denari 300 be mainokoigo nama sibo a pağō, be manenama banaga waikaruwağewağedima sibo a utedina.” Be taudi bonedima bagibagine waivi a riu virevirena.

⁶ Be Yesu ya riuna, “Ko gosepore! Aba aubainama ko kawakawa nuaboya? Tauna kaua verenama ya voiena ġarogue. ⁷ Taumi rağān yatoi kauana banaga waikaruwağewağedima mate ko miana, kana rağanie ko ġoeğoen, nama ko sagudina. Be taugu nam uma dabudi taumi mate tà mia nonoğā. ⁸ Tauna aba verenama ya noğonoğotina nama, yodi ya voiena aubaiguma. Tauna upa ġabuğabunama tunigue ya ġini wainonoğina waikokoagiguma aubainama. ⁹ Taugu yà riuriu kauemina, değō değō dobu matabuna vari verenama ta rarau guguyena, be uma waivinama aba ya voivoiena noğotinama tokare mate ta giu watanena.”

*Judas tauna Yesu ġavia ġarodie ya boru nawena
(Mt 26:14-16; Lk 22:3-6)*

¹⁰ Be dabudine Judas Iskariot tauna tenaġa tauwai muriwatana 12 nopedie, be tauna ya dobi ya naġo pirisi adi babadama ġarodie da Yesu sibo nimedie ya boru nawena.
¹¹ Taudi nuedima ya vere kauana da Judas aba e vatona ta vaiena, be taudi a sauga da mane tauna ta utena. Vutuna aubainama Judas keda ya wanewanena da Yesu sibo taudi nimedie ya boru nawena.

Yesu na tauwai muriwatanama mate Naġopore soinama a kanina

(Mt 26:17-25; Lk 22:7-14, 21-23; Jn 13:21-30)

¹² Naumeki da Buredi-Nam-Sassasanina soinama raġaninama yawai karena. Inam raġanine sipu natunatudima Naġopore soinama aubainama a vunuvunuġana, be tauwai muriwatana Yesu ai taravire be a riuna, “Deġo dabudi kwa ġoegoemaina ka naġo be Naġopore soinama ka vokaukaue tam aubaimma da kwa kani?”

¹³ Naumeki da na tauwai muriwatanama rabui ya riuporedi be umanama ya riuedina, “Ko naġo meagai nophone be tauġoma upa duginama e kirokiroġina ko banavina, tauna vutuna koi muriwatane ¹⁴ da deġo vadanama nophone e saġana. Inam dabudine vada taupakinama umanama ko riuena, ‘Tauwai katakatai umanama ya riuna: Deġo gabunama taugu ware yau gabu da taugu be yau tauwai muriwatanama mate dabudi Naġopore soinama ka kani?’ ¹⁵ Be tauna vada nophone vatavatara rabui, be debane vatarine dabudine gabu dosinama yaba matabudi kawakawa nonoġidima ei katamina, be inam dabudine aubaidama ko vokaukauana.” ¹⁶ Naumeki da tauwai muriwatana a naġona, raġanine taudi meagaie a tavatavana yaba matabuna Yesu ya riuriuedina nama a banavidina, dabudine taudi Naġopore soinama a vokaukauena.

¹⁷ Naumeki da ravi ya tavatavana, Yesu na tauwai muriwatanama 12 mate a tavana. ¹⁸ Be raġanine taudi vatara debane a kanikani be Yesu ya riuedina, “Taugu yà riuri kauemina, aitau tenaġa poumie tokare taugu e boru dobigeġġuna. Tauna aitau taugu mate ka kanikanina, tauna vutuna.” ¹⁹ Dabudine tauwai muriwatana nuedima yai poya be tenatenāġa Yesu ai taravirena, “Bada, taugu teika?” ²⁰ Yesu ya paribeedi be ya riuna, “Taumi 12 nopolomie, aitau tenaġa na buredima taugu mate teboe kai gayo tenaġedina, tauna vutuna. ²¹ Be girugiruminama poranama e riuriuna maika nama tokare Banaga Natunama e gurina, be ya

gewagewa kauana tauna baneginama ġarone aitau Banaga Natunama e boru dobiġena! Ya verena da inam baneginama avedi sibo ya tubuġa!”

Bada na soima (Turiya)

(Mt 26:26-30; Lk 22:14-20; 1Ko 11:23-25)

²² Naumeki da taudi a kanikanina maika, Yesu buredi tenaġa ya paġo be moiragie yai kaiwana, ya giva da na tauwai muriwatanama ya utedi be ya riuna, “Ko paġo! Uma tauna taugu tubuġiguma.” ²³ Naumeki da Yesu keyaka ya paġo Mamaitua ġarone yai kaiwa, be na tauwai muriwatanama ya utedi da keyekine a rautegona. ²⁴ Be Yesu ya riuna, “Uma tauna taugu kosiniguma e rauginina wianina vaunama aubainama. Yodibe Mamaitua banaga ei yawasanidina. ²⁵ Taugu yà riuriu kauemina da taugu tokare nam waen yà tego munaġe, naumeki da Mamaitua na waiguyaumanopone waen tegonama yà kare munaġena.” ²⁶ Naumeki da taudi kaisuġu sarenama a sare be a naġona oya olipma.

Yesu ya riuna da tokare Pita tauna e boviena

(Mt 26:31-35; Lk 22:31-34; Jn 13:36-38)

²⁷ Yesu ya riuedina, “Taumi matabumi tokare ko gosegħu be koi naġo teġateġana, baninama girugiruminama porane ya riuna da,

‘Mamaitua tokare tauyosi ei guri, be sipu matabudi tai daberaridina.’

²⁸ Be raġanine gurie be yà midisuġu munaġana, taugu tokare yà naġo dokana Galilima, be muriġa taumi.” ²⁹ Pita ya riuna, “Avedi da ġesaudima tokare ta gosemna, be taugu tokare nam yà gosem.” ³⁰ Dabudine Yesu Pita ya riuenā, “Taugu yà riuriu kauemna da manaka kupine muriġa da kamkam raġan aniwai rabuinama e riuna, be tam tokare raġan rabuiteġa kwa bovieguna da tam nam taugu ku kataieguna.” ³¹ Be Pita bonanama bagibagine ya riuna, “Taugu tokare nam yà boviem, teneteneġinama deġoda tam mate tā gurina!” Be tauwai muriwatanama ġesaudima mate giunama teneġinama nama a giuna.

Yesu Getsemenima ya moimoiragina

(Mt 26:36-46; Lk 22:39-46)

³² Naumeki da Yesu na tauwai muriwatanama mate a naġo dobu isanama Getsemenima a tava be tauna ya riuedina, “Uma dabudi ko miamia be taugu yà naġo yà moiragina.”

³³ Tauna na tauwai muriwatanama rabuiteġa Pita, Jeims be Jon yai dokedina. Dabudine tauna nuanama yai poya

be nuaboya nopenama ya kukutomna, ³⁴ be taudi ya riuedina, "Nuaboya nopenoge ya moraba kaua da ġaubonaġa ēi guriguna. Be taumi uma dabudi ko mia be ko taibaban-abanagigu be kowai neneġana!" ³⁵ Naumeki da tauna ya taunaġo ġaubonaġa da moiragi aubainama ya beku yovo doġae be ya moiragina, deġoda teneteneġina bo ibewa da tauna nam sibo ġoragoranama e veraverauna nopena ya naġo. ³⁶ Dabudine tauna ya moiragi be ya riuna, "Mamai, Tamaguma, yaba matabuna tam ġarome teneteneġinama. Be ġoragoranama uma ya siguena ġarogue kwa kaipore! Naumeki da nam taugu yau ġoanama ya voie be am ġoanama nama e tubuġana!"

³⁷ Dabudine tauna ya munaġa na tauwai muriwatanama ġarodie, da e kitana be taudi a kenakenana. Naumeki da Yesu Pita ya riuena, "Saemon, tam kwa kenakena, bo? Tam nam tokare kuya mia da suara rovanama tenaġa, bo?" ³⁸ Be tauna taudi ya riuedina, "Koi neneġana be ko moiragi da nam raurubue ko beku! Arua e ġoeġoena, be tubuġa e vovo gwaġagwaġana."

³⁹ Naumeki da Yesu ya munaġa be moiraginama teneġinama ya moiragina. ⁴⁰ Raġanine tauna na tauwai muriwatanama ġarodie ya tava munaġa da e kitana be taudi yaġoro a kenakenana, baninama taudi yaġoro matedima ya guri kauana. Be taudi nam ti kataiena da aba sibo Yesu ġarone a vato.

⁴¹ Be raġan aniwai rabuiteġane tauna ya tava munaġa be ya riuedina, "Taumi yaġoro ko kenakena be ko sipesipere, bo? Naumeki koya kenana! Raġaninama kaiteka ya tavana, ko kita, Banaga Natunama a boru dobiġena gewagewa banegidima nimedie. ⁴² Ko midisuġu be tà naġo, tauboru dobiġeguma kaiteka umanema ya tavana."

Banaga Yesu a panina

(Mt 26:47-56; Lk 22:47-53; Jn 18:3-12)

⁴³ Dabudine Yesu yaġoro ya giugiu be Judas tauna tenaġa tauwai muriwatana matabudi 12 nopedie, be ya tavana. Dabudine banaga patara ġesaudima mate nimedie kwatikwati be kwapu mate, taudi pirisi adi babadama, tarawatu tauwai katakataidima be babada dosidosidima a riuporedina. ⁴⁴ Be tauborudobiġa patara umanama ya riuedi da tauna tokare waimatarara aba e voiena, "Deġo baneginama yàwai suruvena, tauna vutuna ami ġoanama, tauna ko pani be koi doka nawena!"

⁴⁵ Raġanine Judas ya tavatavana, tauna waiġopa didimaninama ya saġa, ya naġona Yesu ġarone be ya riuna, "Tauwai katakatai!" da yai suruvena. ⁴⁶ Dabudine taudi Yesu a

vunuğि be a kaididi guratena. ⁴⁷ Dabudine banaga tenaṅga diedie ya midimidina, na kwatikwatima ya kaisuṅgu be pirisi adi badama na taunoyama beanama yai miarakana.

⁴⁸ Dabudine Yesu ya riuedina, “Taumi kwapu be kwatikwati mate koya tavana taugu ko vunuḡigu, maika kabe banaga taudanedanene, bo? ⁴⁹ Taugu raḡan matabuna taumi mate tempol nopone ḫwai katakataina, be taumi nam taugu ko vunuḡiguna. Be girugiruminama porane e riuriuna naumeki da nama e tubuḡana.”

⁵⁰ Dabudine tauwai muriwatana matabudi Yesu a gose-pore be a naḡona. ⁵¹ Be inam raḡanine tauḡoma yaraginama tenaṅga nam aba ḫesaunama i kotena, be gara ḫavoḡavorinama ya kote be Yesu yawai muriwatanena. Raḡanine taudi tauna a kaikaididina, ⁵² tauna na garama ya gosaṅga be ma kavakavana naira ya manini be ya naḡona.

Yesu tauwai tarapiri babadidima ḫarodie

(Mt 26:57-68; Lk 22:54-55, 63-71; Jn 18:13-14, 19-24)

⁵³ Naumeki da Yesu ai doka nawena pirisi saḡasaṅga vavasaḡinama na vadae, be dabudine pirisi adi babadama, tauwai tarapiri babadidima be tarawatu tauwai katakataidima matabudi ai rawateḡeidina. ⁵⁴ Be Pita Yesu yawai muriwatane be muriṅga ya veraverauna, naumeki da ya saṅga ya naḡona anikaba etara gabuna pirisi saḡasaṅga vavasaḡinama na vadae. Dabudine tauna taubodama mate kai diane a mia be yawai kaimaririna.

⁵⁵ Be pirisi adi babadama be waibabada matabudi riukaua a wanewanena da nema sibo Yesu ai gurina, be nam aitau ḫarone riukaua ti banavina. ⁵⁶ Baninama banaga toitoi kaiyovue Yesu na kauama a giugiuena, be adi giuma matabudi nam teneḡidi. ⁵⁷ Be mate dabudine banaga ḫesaudima a midisuṅgu be kaiyovue Yesu na kauama umanama a giuena, ⁵⁸ “Tauma kè vaiena umanama ya riuna, ‘Taugu tokare uma tempolnama banaga nimedie a kerikerina yà katiweina, be raḡan rabuiteṅga nopodie natabu yà keri munaṅgena, nam maika banaga nimedie a kerikerina nama.’” ⁵⁹ Be yaḡoro adi giuma matabudi nam teneḡidi.

⁶⁰ Naumeki da pirisi saḡasaṅga vavasaḡinama banaga noḡodie ya midisuṅgu be Yesu yai taravirena, “Tam uma banegidima adi giuma ta saḡesaḡedina ḫarome nam am paribea, bo?” ⁶¹ Be Yesu naumeki da yai nuatuṅgu be nam aba i giuena.

Dabudine pirisi saḡasaṅga vavasaḡinama Yesu yai taravira munaṅgena, “Tam Keriso, Mamaitua Natuna, bo?”

⁶² Dabudine Yesu ya paribeedi be ya riuna, “Taugu vutuna! Be taumi matabumi tokare Banaga Natunama Mamaitua

wairewapana vavasağinama nimanama kasaune e mia be marae ma giyouna e veraverauna ko kitana.”⁶³ Naumeki da pirisi sağasağā vavasağinama na garama ya sikedī* be ya riuna, “Tauma yodi nam matamata ġesaudima kama ġoeġoedina! ⁶⁴ Yodi tauna na waidibōgħoma koya vaiena. Be nema kowai noġotā bako?” Be taudi matabudi ai anine da Yesu sibo gurie a boruna. ⁶⁵ Dabudine banaga ġesaudima Yesu a kaviso be matanama a suma da a riġā be a riuna, “Yodi kwai peroveta kabe aitau ya riġam?” Naumeki da taubodama Yesu ai doka nawe be a raunevaneva kauna.

Pita Yesu ya boviena

(Mt 26:69-75; Lk 22:56-62; Jn 18:15-18, 25-27)

⁶⁶ Pita tauna yaġoro anikaba etara gabunama dibune ya miamiana, be pirisi sağasağā vavasağinama na taunoyama waivinama tenaġħa ġarone ya tavana. ⁶⁷ Raġħanine waivinama Pita e kitana be yawai kaimaririna, tauna Pita ya kitadidi be ya riuna, “Tam mate Nasaret Yesunama mate koya naġonāġona.” ⁶⁸ Be Pita ya bovie be ya riuna, “Taugu nam e kataienam tam aba kwa giugue.” Be tauna matakedae be ya dobina doġae. ⁶⁹ Raġħanine taunoyanama waivinama ya kitakitana, taudi aitauġā dabudi midimididima ya riu munaġedina, “Tauna mate Yesu na tauwai muriwatanama!” ⁷⁰ Be Pita ya bovi munaġana, dabudine aitauġā diedie midimididima Pita a riuena, “Inam riukaua, tam mate turedima, baninama tam mate Galili banagimma.” ⁷¹ Be Pita taudi ġarodie ya sauga wapa be ya riuna, “Taugu yà riuriu kauana! Deġoda taugu ama kaiyovu, naumeki da Mamaitua sibo ya kovoġigu. Taumi aba tauġominama ko giugue, taugu nam e kataienam!”

⁷² Naumeki da yai raġantenāġe da kamkam raġan aniwai rabuinama ya riuna. Dabudine Yesu nema ya giugiu bakona Pita ya noġotina: “Muriġa da kamkam raġan aniwai rabuinama e riuna be tam tokare raġan rabuiteġa kwa boviegu da tam taugu nam ku kataieguna.” Dabudine Pita yai nuaboya kaua be ya ġaba guratana.

15

Yesu Paelat ġarone a veraugħena

(Mt 27:1-2, 11-14; Lk 23:1-5; Jn 18:28-38)

¹ Naumeki da raġanboiboi kupinaġā, pirisi adi babadama, tauwai tarapiri babadidima mate, tarawatu tauwai katakataidima be waibabada matabudi ai rawateġeidi

* **14:63:** Jius adi vaivaie gara sikasikanama, inam nuaboya be medi adi matairama, maika tauda boni dosi poredima a mogumogurana.

be ai giu da aba ta voiena. Dabudine Yesu a pani be ai doka nawena Paelat ġarone.² Naumeki da Paelat Yesu yai taravire be ya riuna, “Tam Jius adi guyau, bo?” Be tauna ya riuna, “Ee! Vutuna kuya vatona.”³ Dabudine pirisi adi babadama yaba matabuna ġarone Yesu ai wavuna.⁴ Vutuna aubainama Paelat umanama Yesu yai taravirena, “Tam nam aba tokare kwa paribeedi, bo? Kuya vaie da yaba matabuna ġarone tawai wavumna.”⁵ Be yaġoro Yesu nam aba giunama tenaġa maika i vato rubuna. Vutuna aubainama Paelat ya basena.

Paelat ya riuna da Yesu tai gurina

(Mt 27:15-26; Lk 23:13-25; Jn 18:39-40; 19:1, 16)

⁶ Be Nagopore soinama modi matabuna nopolie Paelat tauna na vaivaima da banaga dibure miemienidima tenaġa nama e kaikaiporena, deġo baneginama ta ġoeġoena nama.⁷ Be inam raġanine tauġoma isanama Barabas be banaga medimedidima ġesaudima iġara nophone a rauvunuġana mate dibure a miamiana.⁸ Naumeki da patara a rawateġeidi be Paelat ai baġana da noġone tauna nema ya voivoia bakona, nama sibo taudi aubaidima ya voiana.⁹ Be Paelat taudi yai taraviredi be ya riuna, “Taumi ko ġoeġoena Jius guyaunama taumi aubaimima yà kaipore, bo?”¹⁰ Be Paelat ya katai kauena da pirisi adi babadama Yesu a verauġena tauna ġarone, baninama taudi a unurana.¹¹ Dabudine pirisi adi babadama patara a kawa nuaġoreġoredi be Paelat ai baġana da Barabas sibo ya kaiporena, be nam Yesu.

¹² Naumeki da Paelat patara yai taravira munaġedi be ya riuna, “Uma tauna kowai isana Jius guyaunama, yodi nema yà bake?”¹³ Taudi a rasa be a riuna, “Kwa tuparatu!”¹⁴ Be Paelat ya riuna, “Aba aubaina? Tauna aba gewagewanama ya voie?” Be taudi matabudi a rasa gurata be a riuna, “Kwa tuparatu!”¹⁵ Naumeki da Paelat patara adi nuasubama aubainama Barabas ya kaiporena, be Yesu kwapue a riġa be taudi nimedie ya boruna tuparatunama aubainama.

Tauiġara Yesu ai kwatekwatevena

(Mt 27:27-31; Jn 19:2-3)

¹⁶ Naumeki da tauiġara Yesu ai doka saġena vadae, deġo Paelat na kaba miae be tauiġara ġesaudima a riuedi da a rawateġeidina.¹⁷ Dabudine taudi gara gatugatunama Yesu ai kotena, be gedara a pipini be pinounama Yesu debane ai kunuboboena.¹⁸ Be taudi Yesu waivaravarae ai kaiwe be a riuna, “Ebom, Jius guyauma!”¹⁹ Naumeki da taudi kwapue Yesu debanama a riġa yababayabe, a kaviso, tuapikedie a raupari be a rauduneena.²⁰ Raġanine taudi ai kwatekwateve

ya kovikovina, taudi gara gatugatunama a kaipore, be tauna na garagomama ai kote munağena. Dabudine taudi ai doka dobiğā nawena tuparatunama aubainama.

Yesu korosie a tuparatuna

(Mt 27:32-34; Lk 23:26-43; Jn 19:17-27)

²¹ Be kedae tauğoma tenağā isanama Saemon, tauna na sipie be ya sağasağana a banavina. Dabudine tauiğaiğara inam tauğominama a segeri da Yesu na korosima e kiroğina. Saemon tauna Sairin tauğominama, tauna inam Alexandra be Rupas tamedima. ²² Naumeki da patara Yesu ai doka nawena gabu isanama ‘Golgota’, inam riunama baninama ‘debagarere’. ²³ Dabudine taudi a ġoegoena da waen be bunama muya anibosonama isanama ‘Maera’ mate wairawateğeinama Yesu sibo ai tegona, be tauna nam i tegona. ²⁴ Naumeki da tauiğara Yesu korosie a tuparatu be na garama ai kasiedina,* be aitau kasie yawai rewapanana, tauna na ġoanama garanama nama ya pağopağona.

²⁵ Be rağanboiboi suara rovanama 9-okorokinama Yesu a tuparatuna. ²⁶ Dabudine Yesu debane kai ġaubonama bogane a giruma da aba aubainama Yesu a tuparatu. Taudi umanama a girumana

JIUS ADI GUYAUMA!

²⁷ Inam dabudine taudi taudanedanene rabui mate a tuparatudina, tenağā Yesu kasaune be tenağā senine. ²⁸ (-)†

²⁹ Be banaga ġesaudima noğodiğā a sağasağā be a yovoyovona, taudi debedima a kwadiedi da Yesu ai dibogi be a riuna, “Iyo! Tam godekai kuya riuna, ‘Tempol kwa katiwei be rağan rabuiteğā nopolie kwa keri munağena.’ ³⁰ Yodi korosie kwa dobi be kwai yawasana munağem!” ³¹ Inam kauinama teneğine pirisi adi babadama be tarawatu tauwai katakataidima Yesu ai kwatekwateve be adi banagama adi banagama a riuedina, “Tauna banaga ġesaudima yawai yawasanidina be yodi tauna nam tokare ei yawasana munağe! ³² Yodi Keriso, Israel guyaunama, tà kita korosi bogane e dobi be tài sumağe!” Be taudi aitauğā taudanedanene rabui Yesu mate a tupatuparatudina, taudi mate Yesu ai dibogiña.

Yesu ya gurina

(Mt 27:45-56; Lk 23:44-49; Jn 19:28-30)

* **15:24:** Inam nam maika kasiğoma. † **15:28:** (Giruma ġesaudima vers 28 baibol nophone a boru sağena. Vers 28 inam umanama: Dabudine riuwai noğota poranama girugiruminama nama ya mağatarana: Banaga Yesu a voiena maika kabe tarawatu tauwai kati kotovidima.)

³³ Dabudine suaratopu, be dobu yai kupikupina, naumeki da ravi. ³⁴ Be ravie 3-okoroki Yesu bonanama dosine umanama ya riuna, “*Eli, Eli, lema sabaktani?*” Uma giunama barinama inam umanama, “Yau Mamaituama, yau Mamaituama, aba aubainama kuya gose poregu?” ³⁵ Be banaga ġesaudima dabudine diane a midimidina nama a vaie be a riuna, “Koi beavaia! Tauna Elaija e yokoyokoena!” ³⁶ Be dabudine tauġoma tenaġa anitaiyo ya paġo, be ya manini, ya saġa ya naġo da waen ġoraġorane yai sonom da kai isune ya pani be Yesu sibo yai tegona, be dabudine a riuna, “Nakarua! Deġoda Elaija e yovoyovona Yesu korosie be e dobiġena tà kitana.”

³⁷ Naumeki da Yesu bonanama dosine ya riuriuna, naumeki da ya gurina. ³⁸ Be gara tempol nopone matakedae waisaurinama ya nuasika poraġa da ma nevana a kenana. ³⁹ Be raġanine tauiġara adi badama dabudine Yesu noġone ya midimidina, tauna Yesu bonanama ya vaie be ya kita da Yesu nema ya guri bakona, dabudine tauna ya riuna, “Riukaua, uma tauġominama naumeki da tauna Mamaitua Natunama!”

⁴⁰ Be dabudine waiwaiwi ġesaudima mate, taudi madanie be awai kitana, be taudi nopodie Meri Megdalin, Meri Jeims ġaubonama be Joses tinedima be Salome. ⁴¹ Raġanine Yesu tauna Galilima ya miamiana, uma waiwaividima matabudi Yesu awai muriwatane be tauna na ġoanama nama a sagusaguna. Be waiwaiwi toitoi ġesaudima Yesu mate Jerusalemma a saġasaġana, taudi mate dabudine.

Yesu waikokoaginama

(Mt 27:57-61; Lk 23:50-56; Jn 19:38-42)

⁴²⁻⁴³ Naumeki da ravi ya tavatava be Jousep tauna Arimattia tauġominama ya tavana tauwai tarapiri nopodie, tauna mate tenaġa be a vivivirena. Tauna Mamaitua na waiguyauma ya veraverauna ya raberabena. Be inam raġanine Sabat na vokaukauama raġaninama, be pomai inam Sabat na raġanima. Vutuna aubainama Jousep ma raudebatorana ya naġona Paelat ġarone be yai baġana Yesu tubuġinama aubainama. ⁴⁴ Be Paelat nama ya vaie be ya base da Yesu tauna kaite ya gurina. Vutuna aubainama Paelat tauiġara adi badama ya yokoe be yai taravirena, deġoda Yesu kaite ya guri bo ibewa. ⁴⁵ Be raġanine Paelat tauiġara adi badama na giuma ya vaie ya kovikovina, Jousep ya riuporena da tauna Yesu tubuġinama e paġona. ⁴⁶ Naumeki da Jousep gara ġavoġavoridima ya gimara, yodibe Yesu tubuġinama korosie ya kiroġa dobiġe be gara ġavoġavoridie ya sumana. Naumeki da guba yeku yeku nopone voivoienama, dabudine Yesu yai kenana. Yodibe Jousep yeku yai raurie be

guba matakedanama yai kenatomna. ⁴⁷ Meri Megdalin be Meri Jousep tinanama taudi Jousep dego Yesu tubuginama yai kenana a kitana.

16

Yesu ya midisuğu munağana
(Mt 28:1-8; Lk 24:1-12; Jn 20:1-10)

¹ Naumeki da Sabat ya kovi be murine, Meri Megdalin, Salome, be Meri, Jeims tinanama, taudi bunama a gimarana Yesu tubugine ġinianama aubainama.

² Pomainama Sande raġanboiboi suara ya tavatavana nama, taudi a naġona kokoagae. ³ Be kedae taudi adi banagama adi banagama mate ai giu vivivira be a riuna, “Aitau tokare yeku kokoaga matakedane e taurie aubaidama?” ⁴ Raġanine taudi a tausuğudi da ta kitana be yekunama dosinama kaite ya raunuariana. ⁵ Raġanine taudi kokoaga nopone a saġasaġana, kasaudima yauwanine tauġoma yaraginama gara ġavogħavorinama ya kote be ya miamiana, a kita be a nairana. ⁶ Dabudine tauġoma ya riuna, “Nam ko naira! Taugu è kataiena taumi Nasaret Yesunama a tupatuparatuna ko wanewanena. Tauna nam uma dabudi, tauna ya midisuğu munağana! Ko kita, umanema awai kenana gabunama. ⁷ Yodi ko naġo be na tauwai muriwatanama be Pita mate uma varinama ko riuedina: Bada Yesu kaite ya doka be e naġonaġona Galilima, dabudine taumi tokare ko kitana, noġone ya riuriuemina nama.” ⁸ Naumeki da waiwaivi kokoaga a dobi pore be a base be ma nuagusugsudi a manini be a naġona. Taudi nam aitau ġarone aba ti giuena, baninama taudi a naira kauana.

*Yesu ya maġatarana**

(Mt 28:9-19; Lk 24:13-43; Jn 20:13-29; 21:1-23)

⁹ Raġanine Sande raġanboiboi Yesu gurie be ya midimidisuğu munağana, tauna Meri Megdalin ġarone penama matabudi ⁷ ya tavu dobiedina, tauna vutuna ġarone ya maġataradokana. ¹⁰ Naumeki da inam waivinama ya munaġa be na banagama, aitauġa ai nuaboya be a ġabaġabana ya riuedina. ¹¹ Dabudine taudi ta vaiena be Meri ya riuna da Yesu ya yawasana munağana, be tauna ya kitana, be yaġoro taudi nam ti sumaqena.

¹² Be uma kauinama murine, tauwai muriwatana rabui kedaġa a naġonago be Yesu kitanama ya boru vitare be ġarodie ya maġatarana. ¹³ Dabudine taudi a munaġa be adi banagama a riuedina, be taudi yaġoro nam ti sumaqena.

* **16:8:** Giruma ġesaudima noppodie vers 9-20 nam tima kenakenana.

¹⁴ Muriġanama tauwai muriwatana matabudi 11 a kanikani be Yesu ġarodie ya maġatarana. Tauna ya ġasiedina, baninama taudi nam nopolie waisumaġa. Taudi adi nopoladoma aubainama banaga ġesaudima Yesu ya midisuġu munaġana a giugiuena, be taudi yaġoro nam ti sumaqedina.

Yesu tauwai muriwatana noya ya utedi be ya riuporedina dobu matabuna

(Mt 28:18-20; Lk 24:44-49)

¹⁵ Dabudine Yesu taudi umanama ya riuedina, “Ko naġo dobu matabuna nopolidiga be riu verenama ko rauguguyena banaga ġarodie! ¹⁶ Be aitau ei sumaqä be e babataiton, tauna tokare e yawasanana. Be aitau nam ei sumaqä, Mamaitua tokare tauna e kovoġina. ¹⁷ Tauwai sumaqä taudi tokare rewapani è utedi da mataira ta voiedina. Taudi tokare isague penama ta tavu dobigeđi, be bona vaudima tabu be tabu ta giuedina. ¹⁸ Deġoda taudi mota gewegewedima nimedie ta ragaudi bo aniwai guri upedima ta tegodina, taudi tokare nam nema ta bako. Be nimedima banaga sidesidedima tunidie ta biridina, inam banegidima tokare ta yawasanana.”

Mamaitua Yesu e nawena marae
(Lk 24:50-53; Ap 1:9-11)

¹⁹ Dabudine Bada Yesu na tauwai muriwatana mate a giugiu kovina murine, Mamaitua Yesu ya nawena marae be Mamaitua kasaunama yauwane ya miana. ²⁰ Naumeki da tauwai muriwatana dobu matabuna a naġo be a rauguguyana, be Bada tauna taudi mate a noyanoya be mataira a voivoiedina. Be banaga taudi a kitedi da taudi adi rauguguyama naumeki riukaua.

Luk

Luk ya girumana Tiopilas ġarone

¹ Kapore Tiopilas!* Banaga toitoi kaite a raurubu da voia nopus a tubutubuġana a girumidina. ² Taudi voia pakane matedie a kitakitana be beedie a vaivaiena a riuriuedina nama a girumidina. ³ Vutuna aubainama taugu uma voiedima è kita yaġedi da adi didimanae yà girugirumina tam aubaimma, ⁴ baninama tam sibo kuya kataie da aba awai katakataimna inam matabudi riukaua.

Jon tau babataito na kaba tubuġama

⁵ Yau giuma pakanama yai karena, inam Herod tauna Ju-dia provins guyaunama. Inam raġandie pirisi ya miamiana isanama Sakaraias. Tauna Abia na waipirisima damnama[†] nupone be na visarama Elisabet tauna Eron na waipirisima damnama nupone ya tubuġana. ⁶ Sakaraias be Elisabet taudi rabuidi yawasana didimanine a mianana Mamaitua noġone, be Mamaitua na riuvavasaġama matabudi a voteyeteyedina, be nam aba tenaġa ti voia waigewana. ⁷ Be taudi nam ti natunana, baninama Elisabet tauna yai kaikaipokina, be taudi rabuidi ai rawadosina.

⁸ Raġan tenaġa Sakaraias Jerusalemma tempol nupone[‡] ya noyanoyana, baninama Abia na waipirisima damnama adi noyama na raġanima. ⁹ Inam damnama nupone Sakaraias a vinena[§] da tauna Bada na tempolma nupone e saġa be piupiu e gabuna. ¹⁰ Naumeki da Sakaraias tempol nupone piupiu ya gabugabuna maika, banaga ġesaudima gabure a mia kwasa, be a moimoiragina.

¹¹ Sakaraias tempol nupone piupiu ya gabugabuna maika, Bada na aneama piupiu oltanama diane ya maġatarana, Sakaraias kasaunama yauwane. ¹² Sakaraias anea ya kitikitana, tauna ya ġosori be ya naira kauana. ¹³ Be anea ya riuena, “Sakaraias, nam kwa naira! Mamaitua am moiragima ya paribeena, da am visarama Elisabet gomana tauġominama tokare e tikana, be tam inam gomeninama

* **1:1:** Luk na Gospel matabuna inam leta ya girugirumina Tiopilas aubainama.

† **1:5:** Inam raġandie pirisi damdima matabudi 24. Taparoro tenaġa nupone dam tenaġa a noyanoyana, be taparoro ġesaudie dam ġesaudie a noyanoyana. Dam 24 nupodie dam tenaġa Abia na damma. (1 Stori 24:10, 19)

‡ **1:8:** Jius ġarodie tempol inam Mamaitua na vadama, anikaba taparoro be anikaba moiragi aubainama, maika sinagog. Be tempol taunaġa nupone a rarau puyona, nam sinagog nupone. § **1:9:** ‘Vine’ inam umanama: Koukou nupone yeku a biridina, be tenaġa ġavogavorina. Be aba pirisinama yeku ġavogavorinama ya pagona, naumeki tauna piupiu ya gabuna. (Wainasi)

kwai isana Jon. ¹⁴ Inam gomeninama tam ei nuaverem be banaga toitoi tai nuaverena inam gomeninama ya tubuğana aubainama. ¹⁵ Baninama Bada matane tauna tokare banaga dosinama e tubuğana. Tauna tokare nam waen bo upa bagibagidima e tegodi, ibewa. Be tauna tinanama kapone da nokoi ya nağona Arua Babau nophonama e moğavuna. ¹⁶ Tauna Israel banegidima toitoi e veraugā munağedina Bada adi Mamaituama ġarone. ¹⁷ Be tauna Bada na kedadokadokama be tauna Elaija na aruama be na wairewapanama maika e noyana. Be tauna dosi nuedima e vitaredi da adi sedama nuedima ta pağona.** Be banaga rawarawa ġaiğaidima nuedima e vitaredi da Mamaitua na nuauyauyama ta kataie be yawasana didimanine ta miana. Inam yabedima matabudi e voiedi, da banaga e vokaukaudina Bada na kaba verauma aubainama.”

¹⁸ Be Sakaraias anea ya riuena, “Nemanama yà kataie bake da tam kwa riuriu kaua? Baninama taugu yau visarama mate kaiteka kèi rawadosina.” ¹⁹ Dabudine anea Sakaraias ya paribee be ya riuna, “Taugu Geibriel. Taugu Mamaitua noğone yà midimidina, tauna ya riuporeguna da uma riunama verenama yà riuriuemna, ²⁰ be tam nam kui sumağeguna, aubainama yodi tam gumgum kwa miana naumeki da uma yabedima matabudi adi rağan kaue ta tubuğana.”

²¹ Banaga yağoro doğae awai rabana da Sakaraias sibo ya dobina, be taudi a nuababağana aba aubainama Sakaraias tempol nopone e miamia gurata. ²² Tauna doğae ya dobidobina rağanine, nam aba i giuena, be matairağä ya voiena. Dabudi banaga a kataie da tauna matağomine rauboni ya kitana, be Sakaraias tauna naumeki da gumgum ya mianana.

²³ Naumeki da tauna na noyama taparoronama ya kovikovina, tauna ya munağana na vadae. ²⁴ Inam kauidima muridie tauna na visarama Elisabet ya boga be semoe ya miana naumeki da nawaravi 5 a kovina. Be Elisabet ya riuna, ²⁵ “Bada na raukiviveree ya raunuatoiegu be yau tunimayağama ya kaiporena.”

Anea Yesu na kaba tubuğama ya giuena

26-27 Rağanine Elisabet na nawaravima aniwai 6-nama murine, Mamaitua anea Geibriel ya riupore da ya nağona matatapu isanama Meri ġarone, tauna Jousep mate ai ġoapaparana. Jousep tauna guyau Deivid na damma nopone.

** **1:17:** Bo: Dosi nuedima e vitaredina da maika seda adi noğotama.

Taudi rabuidi Nasaret meagaine a mianana Galili provinsnama nopone.²⁸ Dabudine anea ya sağə da Meri ya riuena, "Ebom tam waivima waiaiainimma, Bada ġarome."

²⁹ Inam rağanine Meri ya nuababağana be anea aba ya giugiuena tauna nam i kataieno, be tauna yawai nuanoğongoğotana da inam giudima banidima aba.³⁰ Be anea ya riuena, "Meri nam kwa naira! Tam Mamaitua kwawai nuavaina.³¹ Tam tokare kwa boga be gomana tauğominama kwa tikana, be inam gomeninama kwai isana Yesu.³² Tauna tokare banaga dosinama be Mamaitua sağasağə vavasağinama natunama e tubuğana. Be Yesu guyau Deivid na dame e tubuğana aubainama Mamaitua Deivid na waiguyauma natunama Yesu e utena.³³ Be tauna Israel ġarodie ei bada nonoğana, be na waiguyauma nam e kovi."

³⁴ Be Meri anea yai taravirena, "Inam nemanama? Taugu tauğoma nam mayanama e paġona."

³⁵ Be anea ya paribee be ya riuna, "Arua Babau tokare e tava ġarome be sağasağə vavasağinama na rewapanama vagurunama e rupumna. Inam vutuna aubainama tam tokare gomana babaunama kwa tikana, tauna Mamaitua Natunama.³⁶ Kwa noğoti da am dame Elisabet avedi yai rawadosina be gomana tauğominama tokare e tikana. Banaga a riuna da tauna kaikaipoki be yodi Elisabet tauna kaite na nawaravima 6 a kovina,³⁷ baninama Mamaitua aba ya riuedina tokare matabudi ta tubuğana."³⁸ Be Meri ya riuna, "Taugu Bada na taunoyama, be aba kuya riueguna tokare naumeiki da e tubuğana." Naumeiki da anea Meri ya gose be ya nağona.

Meri Elisabet ya vakitana

³⁹ Inam kauinama murine Meri ya midisuğu be ya nağona oyae Judia provins nopone⁴⁰ Sakaraias na meagaie, Elisabet kitanama be waikaiwenama aubainama.⁴¹ Be Elisabet Meri na waikaiwama ya vaivaiena rağanine, tauna kapone gomana yai dagudagu be Elisabet nophonama Arua Babau ya moğavuna.⁴² Be bonanama dosine ya riuna, "Waiwaiivi nopolie tam Mamaitua yai aiaina vavasağemna, tam be votamma mate!⁴³ Aina, taugu kamai banabanaga be aba aubainama kitaguma kuya tava? Tam Bada tinanama be.⁴⁴ Taugu am waikaiwama è vaievaiena rağanine, kapogue gomana nuanama ya vere be ya potina.⁴⁵ Tam Mamaitua yai aiainimna, baninama kuyai sumağə da Bada riunama ġarome e tubuğana."

Meri na kaisuğusuğuma sarenama

- ⁴⁶ Meri ya riuna,
“Taugu Bada yà kaisuğu
- ⁴⁷ be nuaguma ya verena, baninama Mamaitua tauwai yawasaniguma.
- ⁴⁸ Taugu waivi kavakava be yağoro tauna ya noğotiguna.
Be yodi da nokoi ya nağona kimta da kimta tokare ta riuna da riukaua taugu Mamaitua yai aiainiguna,
- ⁴⁹ baninama Mamaitua tauna vutuna babau be wairewapanama vavasağınama tauna aubaiguma yaba dosinama ya voiena.
- ⁵⁰ Tauna na raunuatoima kimta be kimta aitaüğa tauna ta vivivivirena e utedina.
- ⁵¹ Tauna nimanama wairewapanine yaba dosidima ya voiedina be banaga raurau guyaguyaudima yai daberaridina.
- ⁵² Tauna banaga wairewapanidima adi waibadae ya biri doğedina, be banaga wainuatoitoidima ya biri tavaitedina.
- ⁵³ Tauna banaga kanikaniguridima vere ya utedina, be banaga waimauridima nimakavekavedima ya riuporedina.
- ⁵⁴ Tauna na taunoyama Israel e saguda, e noğotida be e raunuatoi nonoğedana,
- ⁵⁵ maika boni Eibraham be na damma ya riuedina nama.”
⁵⁶ Meri Elisabet mate a miana nawaravi rabuiteğä, be muriğä ya munağana na vadae.

Jon tauwai babataito na kaba tubuğama

⁵⁷ Yodi Elisabet na wainatunama rağaninama ya tavana da gomana tauğominama ya tubuğana. ⁵⁸ Elisabet na banagma be na damma inam varinama a vaię be matabudi nuesidima ya vere kauana, baninama Mamaitua tauna Elisabet ya raunuatoi kauena.

⁵⁹ Be gomana na rağanima aniwai 8-nama, inam rağanine taudi matabudi a tavana kopitom aubainama. Be taudi a ġoeġoena da gomana sibo tamanama isane ai isana Sakaraias. ⁶⁰ Be tinanama ya riuna, “Ibewa! Tauna isanama Jon.” ⁶¹ Be taudi a riuna, “Aba aubaina? Tam am dame inam nama isanama nam ima kenakenana.” ⁶² Dabudine taudi gomana tamanama waibuae ai taravire da gomana isanama nema. ⁶³ Dabudine Sakaraias anigiruma ya ġoena da a ute be bogane umanama ya girumana, “Tauna isanama Jon”, be taudi inam isanama a basena. ⁶⁴ Be yai rağantenağe da Sakaraias ya giu munağä be Mamaitua isanama ya kaisuğusuğuna. ⁶⁵ Be na banagma inam kauidima a kitekitedina, taudi Mamaitua na rewapanama a base be Judia provins matabuna nopone inam yabedima banaga ai giuguedina. ⁶⁶ Banaga

matabudi aitauḡa nama giudima a vaivaiedina, taudi ai nuanoḡonoḡote be a riuna, “Uma gomeninama tokare aba e tubuḡa, baninama yodi tà kitakitana da Mamaitua tauna mate.”

Sakaraias ei perovetana

⁶⁷ Be Jon tamanama Sakaraias nopenama Arua Babau yai moḡavu be Mamaitua riunama yawai perovetaena.

⁶⁸ “Bada Israel Mamaituanama yà kaikai suḡusuḡuna. Tauna ya verauna na banagama kuvesidima be waiyawasanidima aubainama.

⁶⁹ Tauna na taunoyama Deivid na dame Tauwai yawasana wairewapaninama ya riuporena tauda aubaidama,

⁷⁰ maika boni Mamaitua peroveta ḡarodie ya giugiuna nama,
⁷¹ da tauna banaga aitau ta tuatuaḡaiedana bo dà ḡaviamanimedie be tauna ei yawasanidana.

⁷² Tauna e raraу nuatoina waḡawaḡadama waḡewaḡedima ḡarodie be riuwainoḡota babaunama e noḡotina

⁷³ vutuna tauna tamadama Eibrahim ḡarone boni ya sausaugana nama.

⁷⁴⁻⁷⁵ Tauna dà ḡaviaman adi rewapanae be ei yawasanidana da tauda babaudama tà tubuḡa be nuadama torane be didimana mate Mamaitua tai yaragena raḡan matabuna.

⁷⁶ Be tam yau gomanama tam tokare Mamaitua saḡasaḡa vavasaḡinama na perovetama. Baninama tam tokare kwa doka be Bada na kedama kwa sepana.

⁷⁷ Tam banaga kwa riuedina da Mamaitua taudi ei yawasanidina, baninama yodi raḡon ya tavana da Mamaitua adi gewagewama e noḡota poredina.

⁷⁸ Baninama Mamaitua na raunuatoima dosinama kapoyaninama marae be ḡarode yovonama ewai karena,

⁷⁹ da yana e yovoḡena aitauḡa guri na waikupikupie ta miamiana ḡarodie. Be tauna ei dokeda be suba kedanama ei kataidana.”

⁸⁰ Naumeki da gomana ya moraba da arue yai rewapana. Be tauna dobu kavakavane ya miana naumeki da na raḡan kauama ya tavana, yodibe patara nopolie na noyama yai karena Israel banegidima ḡarodie.

2

Yesu na kaba tubuḡama

(Mt 1:18-25)

¹ Inam raḡandie Sisa Augastas na riuma ya boru da dobu matabuna deḡo banaga ta miamiana, nama sensus ta voiena. ² Noḡone nam sensus i kenakenana, be uma

rağandie yodi sensus ai karena. Inam rağanine Kvirinias tauna Siria provins nopone yawai primiana.³ Vutuna aubainama banaga matabudi a munağana adi meagaie sensus aubaina. ⁴ Naumeki da Jousep mate tauna Nasaret meagainama Galili provins nopone ya gose be ya nağona Betliemma, guyau Deivid na meagaie Judia provins nopone, baninama Jousep tauna Deivid na damma nopone. ⁵ Be Jousep na ġoapaparama Meri ma bogana, taudi a nağona sensus aubainama.

⁶ Be taudi Betliemma be gomana na kaba tubuğama rağaninama ya tavana, ⁷ naumeki da Meri gomana kaevounama tauğominama ya tikana. Be barekie nam dego gabu i kenakenana aubainama, tauna gomana garae ya paiwi be musara adi ġobee yai kenana.

Tauyosi be anea

⁸ Inam kupine sipu taurabedima wapue a miana be adi sipuma a kitakita watanidina. ⁹ Be Bada na aneama ġarodie ya dobi be Bada neneğarinama yai yanedi be taudi a naira kauana. ¹⁰ Dabudine anea ya riuedina, “Nam ko naira! Taugu vari verenama yà yovoyovoğena ġaromie da tokare banaga matabuna tai nuaverena, ¹¹ baninama manaka Deivid na meagaie Tauwai yawasana ya tubuğana taumi aubaimima. Tauna Bada Keriso. ¹² Taumi gomana umanama ko kitana, tauna a paiwi be musara adi ġobee e kenakenana, be inam nama ko kataiena da inam tauna.”

¹³ Be yai rağantenağe da anea damnama dosinama a mağatara be inam aneanama mate Mamaitua a kaisuğusuğu be a riuriuna, ¹⁴ “Kawasağe be kaisuğusuğu Mamaitua ġarone ta kena, baninama tauna sağasäga vavasağinama aubainama. Be aitauğā dobue didimanağā ta nağonąğona, Mamaitua taudi na subama e uteutedina.”

¹⁵ Rağanine anea tauyosi a gosedi be a munamunağana marae, dabudine tauyosi adi banagama adi banagama a riuedina, “Tà nağō Betliemma be Bada ya riuriuedana ya tubuğana tà kitana.” ¹⁶ Naumeki da a nağō makamakai da Jousep, Meri be gomana musara adi ġobee ya kenakenana a banavidina.

¹⁷ Taudi inam kauinama a kitakita kovina, murine anea gomana varinama ya riuriuedina, inam dabudi ai daberarina. ¹⁸ Be banaga matabudi aitauğā tauyosi adi giuma a vaivaiena, taudi a basena. ¹⁹ Be Meri tauna inam riudima nuane ya tauditididi be yawai nuanoğonogotedina. ²⁰ Naumeki da tauyosi a munağā be Mamaitua a kawa sağe be a kaisuğuna yaba matabuna a kitakita be a vaivaiena

aubainama. Yaba matabuna anea ya riuriuedina, nama a tubuğana.

Yesu ai isa be a veraugēna tempol nopone

²¹ Yodi gomana na rağanima aniwai 8-nama, inam kopitom rağaninama ya tavana, be dabudine taudi gomana ai isana 'Yesu'. Inam isanama anea Meri ya riu dokena, muriğā da Meri ya bogana.

²² Rağanine Meri gomana tauğominama ya tikana murine, Mousis na tarawatuma e riuriuna ruvane Meri nam waigapa i nağona Mamaitua na vadae. Ibewa da ya miana da na rağanima 40 a kovina. Be murine Jousep be Meri Yesu a tika sağena Jerusalemma Bada waikatainama aubainama, ²³ baninama Bada na tarawatuma umanama ya riuna, "Banaga be musara tautauğomidima kayevoudima matabudi ko sağedi be Bada ko utena." ²⁴ Be puyo bunebune rabui bo gabubu natunatudima rabui mate a sağedina Bada na tarawatuma ya girugirumina nama.

Simeon na kaisuğusuğuma sarenama

²⁵ Inam rağanine banaga tenağā Jerusalemma ya miamicana, isanama Simeon. Tauna yawasana didimanine ya mia be Mamaitua ya vivivivirena be Arua Babau tauna nophonama ya moğavu, be Israel tauwai yawasaninama ya raberabena. ²⁶ Be Arua Babau Simeon ya riuena da tauna nam sibo ya guri naumeiki da noğone Bada na Kerisoma e kitana. ²⁷ Naumeiki da Meri be Jousep gomana Yesu a sağena tempol nopone da tarawatu aba ya riuriuedina voiedima aubainama. Inam rağanine Arua Simeon yai doka nawena tempol nopone. ²⁸ Be dabudine Simeon nimane gomana ya tika be Mamaitua ya kaisuğusuğuna be umanama ya riuna,

²⁹ "Naumeiki Bada, yodi taugu am taunoyama nuasubae yà gurina kuya riuriueguna nama,

³⁰ baninama Tauwai yawasana kuya riuriuporena, yodi matague è kitana.

³¹ Tauna dobu matabuna aubainama kuya riuporena.

³² Tauna dam matabudi e rawayanedi be tam ta kataiemna. Be mate tauna e voie da am banagama Israel ta kawa sağedina."

³³ Be Simeon gomana nema ya giugiu bakena, gomana na dosima inam giudima a basedina. ³⁴ Dabudine Simeon taudi yai aiainidi be gomana tinanama Meri ya riuena, "Israel banegidima toitoi adi yawasanae ta bekuna be toitoi adi yawasanae ta midisüğuna, uma gomeninama kana taiye. Tauna Mamaitua ewai matairena aubainama banaga toitoi ta riuvirevirena ³⁵ be adi wainua noğonoğotama tauna ei

mağataridina. Inam voiedima matabudi aubaidima tam tokare ta voiem da kwai nuaboya kauana, maika kea gamgamnama kabe nuapoume i midimidi.”

³⁶ Be peroveta waivinama poranama isanama Hana, tauna mate dobudi tempol nopone. Tauna Panuel natunama be Aser na damma nopone. Hana na badama mate ai nağī be a mianana modi 7 ³⁷ murine tauna yai kaiyababana. Be yodi tauna na suarama 84 be kupi da suara tempol nopone ya miamiana. Be nam airağān tempol i gose rubuna. Tauna na noyama ya widiwidina be ya moimoiragina. ³⁸ Naumeki da Simeon gomana na dosima mate a giugiuna rağānine, Hana ya sağā da Mamaitua ya kaisuğusuğu be banaga aitaüğā Jerusalem na Tauwai yawasanama a raberabena ġarodie gomana na kauama ya giuedina.

A munağāna Nasaretma

³⁹ Rağānine Jousep be Meri yaba matabuna Bada na tarawatuma ya riuriuena a voia rovodina, murine taudi a munağāna adi meagaie Nasaretma, Galili provins nopone. ⁴⁰ Dabudine gomana ya moraba be yai rewapanana, be nuauyauya nopenama ya moğavu be Mamaitua na rauki-viverema tauna ġarone ya kenana.

Gomana Yesu tempol nopone

⁴¹⁻⁴² Naumeki da Yesu na suarama 12, be na dosima mate a nağona Jerusalemma Nağopore soinama aubainama. Inam taudi adi vaivaima aubainama, taudi modi matabuna ta nağonağona Jerusalemma, inam soinama aubainama.

⁴³ Rağānine inam soinama ya kovikovina murine, taudi nağō munağā meagaie ai karena, be gomana Yesu ya mia kwasana Jerusalemma, be na dosima taudi nam ti kataiena. ⁴⁴ Taudi ai noğotana kabe na banagama mate ti nağonağō naumeki da a nağō ravina. Be ravie gomana wanenama ai karena na dosima be na banagama ġesaudima ġarodie. ⁴⁵ Be taudi gomana nam ti banavina aubainama waiwanawana a munağāna Jerusalemma.

⁴⁶ Rağān aniwai rabuiteğane taudi gomana tempol nopone a banavina. Yesu tauna tauwai katakatai poudie ya mia be tauna taudi mate awai giuna be yawai beavaiedina. ⁴⁷ Be banaga matabudi aitaüğā gomana a vaivaiena, na kataima be na paribeama a base kauena. ⁴⁸ Rağānine na dosima a banavina, nuedima yai medi be tinanama ya riuena, “Taukui, aba aubainama umanama kuya voia ġaromaie? Tamamma rabuigu ma nuaboyamai kè wanewanemna.” ⁴⁹ Be tauna ya riuedina, “Aba aubainama koya wanewanegu? Taumi sibo koya kataie da taugu Tamağomiguma na vadae yà

miamiana.”⁵⁰ Be gomana aba ya riuriuena, taudi na giuma baninama nam ti kataiena.

⁵¹ Naumeki da tauna na dosima ya voteyeteyedi be taudi mate a nāgona Nasaretma, be tinanama inam giudima matabudi nuane ya taudididina. ⁵² Be Yesu tauna na nuauyauyama be na suarama a moraba tenāgana, be na wainuapāgoma Mamaitua ġarone be banaga ġarodie mate.

3

*Jon tauwai babataito na giuma
(Mt 3:1-12; Mk 1:1-8; Jn 1:19-28)*

¹ Rāganine Sisa Tiberius tauna na waibadae ya miana na modima 15, be inam rāganine Pontis Paelat tauna Judia provins primianama, be Herod tauna Galili provins na guyauma be tasinama Pilip, tauna Ituraia be Trakontis adi guyauma, be Lisanias tauna Abilene guyaunama. ² Be Hanas be Kaiyapas taudi pirisi dosidima.

Inam banegidima adi waibadama rāganine, Jon tauna dobu kavakavane ya miamiana be Mamaitua na riuma ya yovona, Sakaraias natunama Jon ġarone. ³ Jon ya nāgona upa Jodan dianama matabuna nopolie be banaga ġarodie ya rauguguya be ya riuriuna, “Ami gewagewama ko gosedi be ko babataito da Mamaitua ami gewagewama e nōgota poredina.” ⁴ Jon yaba matabuna nema peroveta Aisaia na bukae ya girugirumidina, nama ya voiedina. Peroveta Aisaia umanama ya riuna,

“Banaga dobu kavakavane e yokoyokona,
‘Bada na kedama ko sepa, keda ko kawa didimanidina Bada
na kaba verauma aubainama.

⁵ Gaugauba matabudi ko ġuruvidi be oya matabudi debedima
ko keri waiwapudina.

Be yawasana barebaredima ko kawa didimanidi be keda
pikepikedima ko keri yāgoyāgotidina.

⁶ Yodibe banaga* matabudi Mamaitua nema ei yawasana
bakedina ta kitana.”

⁷ Banaga ġummāma a dobina Jon ġarone babataito aubainama, be tauna ya riuedina, “Taumi maika mota sarama natunatudima! Taumi aitau ami wainua nōgonogotāma ya voie da Mamaitua na kovoġāma ko nāgo pore, wa? ⁸ Nōgone ko munaġa da ami yawasanama ko vitaredi be yawasana banidima veredima koi maġtaridi da banaga ta kitedina, be nam ko nōgota munaġemi be ko riuna, ‘Tauda Eibrahim natunatunama aubainama ġarode nam tokare gewagewa aba e tubuġa.’ Yà riuriuemina da

* **3:6:** Bo: Banaga be musara

Mamaitua sibo i ġoena, tokare teneteneġinama kaua yekudie seda yai tubuġidina Eibraham aubainama.⁹ Bada tamiyoko kaite kai bogane ya boruna, be ai kaiġa nam banidima veredi matabudi e taraġa poraġa be e gabugorudina.”

¹⁰ Dabudine banaga ġumnama a riuna, “Yodi aba tà voie?”
¹¹ Be Jon ya paribeedina, “Aitauġa ġaromie kwama rabui, tenaġa turamma nam waikwamana kwa utena, be kani mate nama ko voiena.”¹² Teks tautaminama mate a verauna babataito aubainama be ai taravirena, “Tauwai katakatai, tauma aba ka voie?”¹³ Be Jon ya riuedina, “Teks a riuriuema na ruvae nama ko ragauna be nam ko tausaġe.”¹⁴ Be banaga iġe ġeridima mate ai taravirena, “Tauma nema ka voie bako?” Be tauna ya riuedina, “Nam banaga ko raukivi gewegewedi be nam ko riu waigusudi be adi waiyabama ko paġo avedi, taumi ami maesama inam naumeki ewai nuasubemina.”

¹⁵ Dabudine banaga matabudi Tauwai yawasana a raber-abena, be awai noġotana da kabe Jon tauna vutuna Tauwai yawasana.¹⁶ Be tauna umanama ya riuedina, “Taugu upakavakavae yàwai babataitomina be banaga murigue e veraverauna, tauna banaga dosinama be wairewapana vavasaġinama, be taugu nam veregu da na kaġasumama yà kaipore. Tauna tokare Arua Babaue be kaie ei babataitomina.¹⁷ Tauna banaga vere be gewagewa e vinevinedina maika raisi. Raisi tauna e tutu, be sive nopone e ġini be sive mui e suve be ġavoe e dobidoħina be baninama ġavoe e dobidoħina. Muriġa tauna banidima e ragaragaudina, be muinama kai karakaratine e gabu gorudi be ta karakara nonoġana.”¹⁸ Be giu ġesaudima mate Jon na rauguguyae banaga ya sagudi da adi yawasanama a vitaredina. Nama tauna riu verenama ya rauguguyena.

(Mt 14:3-5; Mk 6:17-20)

¹⁹ Jon patara nopolie guyau Herod ya riuvirevirena, baninama tasinama na visarama Herodias ya kwayana be na gewagewama ġesaudima mate aubainama.²⁰ Vutuna aubainama Herod Jon dibure ya boru be you, na gewagewama ya taipotona.

Yesu na babataitoma raġaninama

(Mt 3:13-17; Mk 1:9-11; Jn 1:32-34)

²¹ Muriġa da Herod Jon dibure ya boruna, noġone Jon banaga matabudi yai babataito rovodi be Yesu mate yai babataitona. Be Yesu ya moimoiragina raġanine, mara ya nuaporaġa²² be Arua Babau ya yovona Yesu ġarone maika kiu gabubu. Be marae bona ya dobina, “Tam taugu

natuguma nuaguma kwa paḡopaḡona, be taugu yawai nuaverena tam ḡarome.”

*Yesu tamanama reresinama
(Mt 1:1-17)*

²³ Yesu tauna na suarama 30 be patara nopolie na noyama yai karena. Banaga ai noḡotana Yesu kabe Jousep natuna, be Jousep tauna Eli natunama, ²⁴ be Eli tauna Matat natunama, be Matat tauna Livai natunama, be Livai tauna Melki natunama, be Melki tauna Janai natunama, be Janai tauna Jousep natunama, ²⁵ be Jousep tauna Matatias natunama, be Matatias tauna Amos natunama, be Amos tauna Naum natunama, be Naum tauna Esli natunama, be Esli tauna Nagai natunama, ²⁶ be Nagai tauna Mat natunama, be Mat tauna Matatias natunama, be Matatias tauna Simei natunama, be Simei tauna Josek natunama, be Josek tauna Joda natunama, ²⁷ be Joda tauna Joanan natunama, be Joanan tauna Resa natunama, be Resa tauna Serubabel natunama, be Serubabel tauna Sealtiel natunama, be Sealtiel tauna Neri natunama, ²⁸ be Neri tauna Melki natunama, be Melki tauna Adi natunama, be Adi tauna Kosam natunama, be Kosam tauna Elmadam natunama, be Elmadam tauna Er natunama, ²⁹ be Er tauna Josua natunama, be Josua tauna Elieser natunama, be Elieser tauna Jorim natunama, be Jorim tauna Matat natunama, be Matat tauna Livai natunama, ³⁰ be Livai tauna Simeon natunama, be Simeon tauna Juda natunama, be Juda tauna Jousep natunama, be Jousep tauna Jonam natunama, be Jonam tauna Elaiakim natunama, ³¹ be Elaiakim tauna Melea natunama, be Melea tauna Mena natunama, be Mena tauna Matata natunama, be Matata tauna Natan natunama, be Natan tauna Deivid natunama, ³² be Deivid tauna Jese natunama, be Jese tauna Obed natunama, be Obed tauna Boas natunama, be Boas tauna Salmon natunama, be Salmon tauna Nason natunama, ³³ be Nason tauna Aminadab natunama, be Aminadab tauna Admin natunama, be Admin tauna Arni natunama, be Arni tauna Esron natunama, be Esron tauna Peres natunama, be Peres tauna Juda natunama, ³⁴ be Juda tauna Jeikob natunama, be Jeikob tauna Aisik natunama, be Aisik tauna Eibrahim natunama, be Eibrahim tauna Tara natunama, be Tara tauna Nahor natunama, ³⁵ be Nahor tauna Seruk natunama, be Seruk tauna Ragu natunama, be Ragu tauna Palek natunama, be Palek tauna Eber natunama, be Eber tauna Sala natunama, ³⁶ be Sala tauna Kainam natunama, be Kainam tauna Arpaksad natunama, be Arpaksad tauna Sem natunama, be Sem tauna Noa natunama, be Noa tauna Lamek natunama, ³⁷ be Lamek tauna Metusala natunama, be Metusala tauna Inok natunama, be Inok tauna Jaret

natunama, be Jaret tauna Malaleel natunama, be Malaleel tauna Kainan natunama,³⁸ be Kainan tauna Enos natunama, be Enos tauna Set natunama, be Set tauna Adam natunama, be Adam tauna Mamaitua natunama.

4

Seitan Yesu ya raurubuna

(Mt 4:1-11; Mk 1:12-13)

¹ Yesu Arua Babau nopenama ya moğavu be Jodan ya gose porena. Arua tauna yai doke be a nağona dobu kavakavane na rağanima 40. ² Inam dabudine Diaboro Yesu ya raurubuna.

Inam rağandie Yesu tauna nam aiyaba i kani rubuna, naumeki da rağan 40 a kovikovina, Yesu tauna kani ya karatina. ³ Be Diaboro Yesu ya riuena, “Değoda tam Mamaitua Natunama, naumeki da uma yekunama kwa riue da ei rawaburedi.” ⁴ Be Yesu ya paribee be ya riuna, “Girugiruminama poranama umanama ya riuna, ‘Banaga nam buredi ġomae e mia.’ ”

⁵ Dabudine Diaboro yai doka nawena oya daudaunama debane, be dobu matabuna na waiguyauma yai kataina. ⁶ Be Diaboro Yesu ya riuena, “Uma rewapanidima be uma yabedima waimatakanikanidima matabudi Mamaitua taugu ya uteguna. Vutuna aubainama aitau yà ġoeġoena nama yà utena. ⁷ Be değoda tam taugu kwa rauduneeguna, inam yabedima matabudi tam yà utemna.” ⁸ Be Yesu ya paribee be ya riuna, “Girugiruminama poranama umanama ya riuna, ‘Bada, am Mamaituama taunağā kwa raudunee, be ġarone kwa noyana.’ ”

⁹ Dabudine Diaboro Yesu yai doka nawena Jerusalemma tempol daudaunama debane, be ya riuena, “Değoda tam riukaua Mamaitua Natunama, naumeki da uma dobudine kwa potina, ¹⁰ baninama girugiruminama poranama umanama ya riuna,

‘Mamaitua na aneama e riuporedi da tam ta rabemna.

¹¹ Be nimedie ta kaisuğum da nam yekue kağamma kwai tutu.’ ”

¹² Be Yesu ya paribeena, “Girugiruminama poranama mate umanama ya riuna, ‘Bada, am Mamaituama nam kwa raurubu.’ ”

¹³ Rağanine Diaboro na raurubuma ya kovikovina, naumeki da tauna Yesu ya taugosena rağan ġaubonağā.

Yesu Galili provins nopena na noyama yai karena

(Mt 4:12-17; Mk 1:14-15)

¹⁴ Arua Babau na wairewapanae Yesu ya munağona Galili provins nopone, be banaga matabudi inam dabudi tauna a giugiuena. ¹⁵ Be tauna taudi sinagog nopone yai katakataidi be taudi tauna isanama a kaisuğusuğuna.

Yesu Nasaretma a tuağaiena

(Mt 13:53-58; Mk 6:1-6)

¹⁶ Be Yesu ya nağona Nasaretma değó ya moramorabe. Be Sabat rağanine ya nağona sinagog nopone maika nema Sabat matabuna ya voivoiana nama. Be tauna ya midisuğ da girugiruminama sievinama aubainama. ¹⁷ Peroveta Aisaia na bukama tauna a ute be ya tapa da değó giruma ya riuna, ¹⁸ “Bada Aruinama nopogue, baninama tauna ya vineguna da riukaua yà rarauguguyena banaga waikaruwağewağedima ġarodie.

Be tauna ya riuporeguna da banaga panipanidima yà riuedi da ta kuvesidina. Be banaga matapotepotedima tai kita munağá. Taugu è yovona banaga adi banagama ta rarauguguyena yài ġakedina.

¹⁹ Be tauna ya riuporegu da yà giugiuna, yodi rağan ya tavana da Bada na banagama ei yawasanidina.”

²⁰ Dabudine Yesu buka ya gudu be taunoya ya ute munağé da ya miana, be sinagog nopone banaga matabudi matedima Yesu ġarone. ²¹ Dabudi Yesu giu yai kare be ya riuedina, “Manaka inam riudima koya vaivaledina, baninama ya tubuğana.”

²² Be banaga matabudi Yesu isanama a kaisuğusuğú, be taudi Yesu na giuma veredima aubainama a basena. Be taudi a riuna, “Tauna Jousep natunama! Be nemanama da umanama e giugiu?” ²³ Be Yesu ya riuedina, “Taugu è kataiena da uma riunama tokare ko riueguna, ‘Dogeta kwai yawasana munağem!’ Be mate ko riueguna, ‘Tauma kè vaiem be Kapeniamma yaba kuya voivoiedina, nama uma dabudine am meagaie kwa voiedi.’” ²⁴ Be tauna ya riuna, “Taugu yà riuriu kauemina, peroveta na dobue banaga na giuma vaienama nam tima ġoeğøena. ²⁵ Taugu yà riukauemina, peroveta Elaija na rağanie banaga nam ti sipisipina, baninama modi $3 \frac{1}{2}$ marakapo ya karatana. Be inam rağanine Israel nopone kaiyababa toitoi a miamiana. ²⁶ Be Bada nam Elaija i riupore i nağona inam kaiyababidima ġarodie, ibewa be ya riupore ya nağona kaiyababa ġesau ġarone. Inam kaiyababinama tauna Sarepama miemieninama dobu isanama Saidon nopone. ²⁷ Be peroveta Elisa na rağanie Israel nopone banaga toitoi sida kito ragaragaudima be inam dobudine Bada nam aitau tenağá i yawasanina be Naeman Siriağá tavatavanama taunağá yai yawasanina.”

²⁸ Sinagog nopone banaga matabudi inam riunama nama a vaivaiena rağanine, taudi nuedima yai medi kauana. ²⁹ Dabudine taudi a midisuğu da Yesu a soru dobiğe da a nawena daki debane meagai diane. Dabudine kabe tauna dakie ta kiroğā pore. ³⁰ Be Yesu patara nopodiğā ya dobi be ya nağona.

*Yesu na rewapanama yai mağatarina
(Mk 1:21-28)*

³¹ Dabudine Yesu ya dobi ya nağona Kabeniam meagaine Galili provins nopone. Be Sabat rağandie tauna banaga yawai katakataidina. ³² Be banaga na waikatakataima a basena, baninama na waikatakataima yai rewapan kauana.

³³ Be sinagog nopone banaga penama kokukokunama, tauna bonanama dosine ya yogo be ya riuna, ³⁴ “Ei! Nasaret Yesumma, tam aba ġaromaie kwa ġoeğoe? Tam kuya ver-auna kwa kawa gewagewamai, bo? Taugu è kataiena tam aitau. Tam Babaumma Mamaitua ġaronama.”

³⁵ Be Yesu ya riutuağae be ya riuna, “Kwai nuatuğu be inam baneginama kwa dobi pore!” Dabudine penama banaga ya dobi pore be ya gosena, be nam banaga i kawa gewagewana. ³⁶ Banaga matabudi a ġosoridi be adi banagama mate a giu yababayaba be a riuna, “Uma aba giudima nama? Tauna na rewapanae penama e riuedi be ta dobidoberina.” ³⁷ Be inam dobunama matabuna Yesu varinama a vaiena.

*Yesu Saemon Pita rawanama yai yawasanina
(Mt 8:14-15; Mk 1:29-31)*

³⁸ Yesu tauna sinagog ya gose be ya nağona Saemon na vadae. Be inam dabudine Saemon rawanama tauna poyapoya dosinama ya pağona be taudi Yesu ai bağā da tauna e saguna. ³⁹ Dabudine tauna diane ya midi be poyapoya ya riutuağaiena, be poyapoya visara ya gose porena. Be yai rağantenağē da visara ya midisuğu be taudi adi kanima ya vokaukauena.

*Yesu banaga toitoi yai yawasanidina
(Mt 8:16-17; Mk 1:32-39)*

⁴⁰ Be ravi ya tavatavana rağanine, banaga toitoi adi banagama sida tabu be tabu ragaragaudima a verauğedina Yesu ġarone, be tauna banaga tenatenağā nimane ya taikonidi be yai yawasanidina. ⁴¹ Be mate penama toitoi ma yogoyogodi banaga a dobi poredi be a riuriuna, “Tam Mamaitua Natunama!” Be Yesu taudi ya riutuağaiedina da nam ta giu, baninama taudi a kataiena da tauna Keriso. ⁴² Rağan ya tomna da Yesu inam dobunama ya gose pore

be dobu wainuatugune ya naġona. Be banaga tauna a wanewanena, be a banavina raġanine, taudi a ġoeġoe da tauna nam sibo ya gose poredi.⁴³ Be Yesu taudi ya riuedina, “Taugu meagai ġesaudie mate yà naġo be Mamaitua na waiguyauma yà rauguguyena. Baninama Mamaitua ya riuporeguna vutuna aubainama.”⁴⁴ Be tauna Galili be Judia sinagog nōpodiġa ya rarauguguya naġona.

5

*Yesu na tauwai muriwatanama yokoedima yai karena
(Mt 4:18-22; Mk 1:16-20)*

¹ Raġan tenaġa Yesu tauna Genesaretma yawawa* diane ya midimidina. Be banaga tauna a midi ġuruvi be Mamaitua riunama a vaibeavaiena. ² Be tauna waga rabui ya kitedina gerese a midimidina, be tauwai sagida adi wagama a gosedi da adi sagidama a koġekokoġedina. ³ Yesu Saemon na wagae ya saġa be yai baġana da waga sibo ya tauriena topae, yodibe tauna ya mia yovo wagae be banaga yai katakataidina.

⁴ Raġanine na giuma ya kovikovina, tauna Saemon ya riuena, “Waga kwa dobiġe topa poune be ami sagidama koi dawe dobiġedi be iyana ko konedi!”⁵ Be Saemon ya paribeeda, “Bada, tauma kupi daudaunama sagida kë raurubu rereġa da nam aba ke kona rubuna, be tam am riuma aubainama da yà raurubu munaġana.”⁶ Raġanine a rarauguguya munaġana, iyana toitoi a konedi be sagida ġaubonaġa sibo a nuagigina. ⁷ Be taudi adi banagama waga ġesaune a raumataġuedina da taudi sibo a verau be a sagudina. Naumeiki da adi banagama a verau a sagudi da iyana waga rabui ai moġavudina, be waga ġaubonaġa sibo a monuna.

⁸ Be Saemon Pita uma kauinama ya kitakitana tauna tuapikane ya raupari Yesu noġone be ya riuna, “Bada, kwa gosegħi be ġavoe kwa naġo, baninama taugu banaga gewagewaguma!”⁹ Tauna nama ya giuna, baninama tauna na banagama mate a base be a nairana iyana toitoi a vunuġana aubainama. ¹⁰ Be nama Saemon na banagama Jeims be Jon, Sebedi natunatunama. Be Yesu Saemon ya riuena, “Nam kwa naira! Yodibe nokoi ya naġona tam banaga toitoi kwa konedina.”¹¹ Raġanine barabarae adi wagama a sorusoru tavaitedina, taudi yaba matabuna a goseporedi be Yesu ai muriwatanina.

*Yesu tauġoma kito paġopaġonama yai yawasanina
(Mt 8:1-4; Mk 1:40-45)*

* **5:1:** ‘Yawawa’ inam topa dosinama maika egasi.

¹² Rağan tenağā Yesu tauna meagai tenağā nopone ya miamiana be tauğoma tenağā ya verauna tuninama kito ya moğavuna. Inam tauğominama Yesu ya kitakitana, tauna Yesu noğone ya raupari be yai bağana, “Bada, tam değoda kwa ġoena, naumeki da kwai yawasanigu.” ¹³ Be Yesu ya riuena, “Naumeki, taugu ya ġoeğöena, kwa yawasana!” Dabudine Yesu nimanama yai yoyo be ya taukonina. Be yai rağantenağē da sida kito tauğoma ya gosena. ¹⁴ Be Yesu inam tauğominama ya riu vavasağena, “Nam aitau kwa riue. Be kwa nağō da pirisi ġarone be tauna e kaiviramma. Be murine Mamaitua kwa tipana Mousis na tarawatuma e riuriuna nama. Inam kedane banaga tokare ta kitam be ta kataiena da tam kuya yawasana munağana.” ¹⁵ Be yağoro da Yesu varinama ya moraba be ya daberarana. Be banaga toitoi Yesu waibeavaienama be ei yawasanidina aubainama a tavatavana. ¹⁶ Be Yesu banaga ya gosedi be ya nağona dobu wainuatoitoine moiragi aubainama.

*Yesu tauğoma tuera pağopağonama yai yawasanina
(Mt 9:1-8; Mk 2:1-12)*

¹⁷ Rağan tenağā Yesu yawai katakataina be Parisi be tarawatu tauwai katakataidima[†] taudi mate a mia be awai beavaiena. Inam banegidima meagai matabudi Galili provins be Judia provins nopodiğā be Jerusalemğā a verau be awai beavaiena. Be Bada na rewapanama Yesu ġarone vutuna aubainama tauna sida yawai yawasanidina. ¹⁸ Naumeki da banaga ġesaudima tauğoma tuera pağopağonama ratiratinama a kiroğā verauğē da kabe vadae ta sağē be Yesu noğone tai kena. ¹⁹ Be taudi nam teneteneğina da vadae sibo a sağā, baninama patara ya moraba kauana. Vutuna aubainama taudi vada debane a sağā be vada debane gaura a voie da tauğoma ma ratiratina ai dawe dobiğena patara poudie Yesu noğone. ²⁰ Rağanine Yesu adi waisumağama ya kitakitana, tauna ya riuna, “Tauğoma, am gewagewama è noğota porena.”

²¹ Dabudine Parisi be tarawatu tauwai katakataidima umanama wainua noğonoğota ai karena, “Uma aitau baneginama nama ewai diboğā, wa? Tauna e ġoeğöena da Mamaitua gabunama e pağō, bo? Mamaitua taunağā tokare gewagewa e noğota poredina, be nam aitau ġesau.” ²² Be Yesu taudi adi wainua noğonoğotama ya kataiedina aubainama yai taraviredina, “Aba aubainama taumi inam yabedima nuemie kowai nuanoğonoğotedi? ²³ Aba riunama ya tekateka, ‘Am gewagewama è noğota porena’ bo ‘Kwa

[†] 5:17: Tarawatu tauwai katakataidima taudi nam Yesu na tauwai muriwatana.

midisuğu be kwa na gó?’²⁴ Be yodi yáí kataimi be ko kita da Banaga Natunama dobue rewapana ġarone e kenakenana da gewagewa e no góta poredina.” Naumeiki da Yesu tau góma tuera pa gópa gónama ya riuena, “Yá riuriuemna, kwa midisuğu, am gunima kwa pa gó be kwa na góna am vadae.”²⁵ Yai ra góantenáge tau góma no gódie ya midisuğu da na gunima ya pa gó be ya na góna na vadae, Mamaitua isanama ya kaisúgu su góuna.²⁶ Dabudi banaga matabudi a base be taudi mate Mamaitua isanama a kaisúgu su góuna. Be matabudi a góso ridi be a riuna, “Manaka tauda kaua dosinama té kitana.”

*Yesu Livai ya yokoena
(Mt 9:9-13; Mk 2:13-17)*

²⁷ Uma kauinama murine Yesu ya dobi be ya na góna gó da teks tautaminama isanama Livai ya kitana. Livai tauna na kaba noyae ya miamiana, be Yesu tauna ya riuena, “Kwai muriwatanegu!”²⁸ Naumeiki da Livai ya midisuğu be yaba matabuna ya gosedi be Yesu yai muriwatanena.

²⁹ Dabudine Livai na vadae soi dosinama ya voiena Yesu aubaina, be teks tautamidima toitoi be banaga ġesaudima mate dabudine a kanikanina.³⁰ Vutuna aubainama Parisi be tarawatu tauwai katakataidima taudi Yesu na tauwai muriwatanama a riusingá gayedi be a riuna, “Aba aubainama taumi teks tautamidima be gewagewa banegidima mate ko kanikani be ko tegotego?”³¹ Dabudine Yesu ya paribeedi be ya riuna, “Banaga yawayawasanidima taudi nam dogeta tima góe góena, be banaga sidesidedima taudi dogeta ta góe góena.³² Taugu nam e yovona banaga veredima aubaidi, ibewa da banaga gewegewedima yá riuedi da adi no gótamata ta vitaredina.”

*Widina waitaraviraviranama
(Mt 9:14-17; Mk 2:18-22)*

³³ Be taudi Yesu a riuena, “Jon na tauwai muriwatanama be Parisi adi tauwai muriwatanama matabudi kana ra góanie ta widiwidina be ta moimoiragina, be tam am tauwai muriwatanama taudi ta kanikani be ta tegotego yababayababana.”³⁴ Be Yesu ya riuedina, “Na góivau tau góminama[‡] taumi mate ko miamiana ra góanine, taumi nam ko voie da na góinági kadi warema ta widina.³⁵ Be ra góan e tavana da na góivau tau góminama góvoe ta nawena, inam ra góanine taudi ta widinana.”

³⁶ Yesu uma wainasinama mate ya riuedina, “Nam aitau gara vaunama e sika be e na gó gara poranama mate e popo tenáge. Be dégoda nama sibo i voiana, gara vaunama tokare

[‡] 5:34: ‘Na góivau tau góminama’ inam Yesu.

e kawa gewagewana, be gara vaunama nam gara poranama mate tai rawategeidi be teneteneğina.³⁷ Be nam aitau waen§ vaunama waen poranama koukounama nopone e ġini. Baninama değoda nama e voiana, inam tokare waen vaunama koukou e surasari be waen e rauğinina. Be koukou ta gewagewana.³⁸ Ibewa da waen vaunama koukou vaudie ko ġinidina.³⁹ Be aitau waen poranama ya tegotegona, waen vaunama nam ima ġoegoena, baninama tauna e riuriuna, ‘Waen poranama ya vere kauana, nam waen vaunama maika.’”

6

Sabat waitaraviraviranama (Mt 12:1-8; Mk 2:23-3:6)

¹ Sabat tenaġa Yesu be na tauwai muriwatanama mate a naġona wapue yaġoda sipine be na tauwai muriwatanama yaġoda a ragaudi da a vukudi be a kanikanidina. ² Be Parisi ġesaudima nama a kitakitana taudi a riuna, “Taumi Sabat raġanine inam yabedima nam sibo koya voivoiedi, be aba aubainama taumi yodi ko voivoiedi?” ³ Be Yesu ya paribeedi be ya riuna, “Taumi koya kataie bo ibewa da boni Deivid na banagama mate kani ya karatidi be aba a voie? ⁴ Tauna ya naġona Mamaitua na vadama nopone be buredi Mamaitua waikatainama ya ragaudi be na banagama mate ya utedi be a kanidina. Be tarawatu e riuriu da pirisi taudiġa inam buredinama ta kanina be nam banaga ġoma.” ⁵ Dabudine Yesu Parisi ya riuedina, “Banaga Natunama Sabat ewai badena.”

Yesu Sabat raġanine banaga yai yawasanina (Mt 12:9-14; Mk 3:1-6)

⁶ Sabat ġesaune Yesu ya naġona sinagog nopone be yawai katakataina. Be tauġoma tenaġa dabudine mate, tauna nimanama kasaunama tuera paġopaqonama. ⁷ Be Parisi be tarawatu tauwai katakataidima maida a tava be keda a wanewanena da aiyabae be Yesu sibo ai wavuna. Vutuna aubainama taudi Yesu a kitakita watanina da tauna Sabat raġanine banaga sibo yai yawasani bo ibewa, yodibe taudi sibo a samanina.

⁸ Be Yesu tauna ya kataiena da taudi aba awai nuanoġonoġotena, be tauna tauġoma nimanama tuera paġopaqonama ya riuena, “Kwa midisuġu be patara noġodie kwa midi!” Dabudi tauġoma ya midisuġu be ya midina. ⁹ Be dabudine Yesu taudi ya riuedina, “Taugu taumi

§ 5:37: Waen vaunama tauna ya raupuropuro kauana, vutuna aubainama tokare koukou poranama e sura sarina.

yài taraviremina, dà tarawatuma aba e riuriuedana tà voie Sabat rağanine? Yaba veredima tà voiedi bo yaba gewegewedima tà voiedi, banaga tài yawasanidi bo tà kawa gewegewedi?"¹⁰ Be Yesu banaga matabudi ya kita vireviredi be tauğoma patara noğodie midimidinama ya riuena, "Nimamma kwai yoyo!" Be tauğoma nama ya voiena be nimanama matabuna ya vere munağana.¹¹ Be taudi nuedima yai medi kaua be adi banagama mate ai giuna da aba sibo a voiena Yesu ġarone.

Yesu apasol 12 ya vinedina

(Mt 10:1-4; Mk 3:13-19; Ap 1:13)

¹² Inam kauidima muridie rağan ġesaune Yesu ya sağya nağona oya debane moiragi aubainama, be Mamaitua ġarone kupi ya moiragi rağanina.¹³ Be rağanboiboi tauna na tauwai muriwatanama ya riu gogonidi da ġarone a tavana, be taudi nopolie tautauğoma matabudi 12 ya vinedina. Be uma banegidima 12 tauna yai isedina 'Apasol'.¹⁴ Umanama banegidima ya vinedina:

Saemon (yai isana 'Pita')

be tasinama Endru,

be Jeims,

Jon,

Pilip,

Batolomiu,

¹⁵ Metiu,

Tomas

be Jeims (tauna Alpius natunama)

be Saemon ġesau tauna awai isana 'Selot',

¹⁶ be Judas (tauna Jeims natunama),

be Judas Iskariot, tauna vutuna muriġa Yesu ya boru dobiġena.

Yesu yawai katakatai be banaga yawai yawasanidina

(Mt 4:23-25)

¹⁷ Yesu na apasolma mate a yovoyovo munağana rağanine, taudi dobu wapuwapune a midina, be tauwai muriwatanatoitoi be banaga toitoi Judiaġa be Jerusalemġa a tavana, be Taia be Saidon geresinama banegidima mate¹⁸ a tavana Yesu vaienama be adi sidama ei yawasanidina aubainama. Be banaga aitauġa penama kokukokudima, taudi mate yai yawasanidina.¹⁹ Be banaga matabudi a rara rubuna da Yesu sibo a taukonina, baninama rewapano tauna ġarone ya dobi be banaga matabudi yawai yawasanidina.

Wainuavere be wainuatoitoi giudima

(Mt 5:1-12)

²⁰ Yesu na tauwai muriwatanama ya kitedi be ya riuna,

“Taumi nuemima e verena waikaruwağewäğemima, baninama Mamaitua na waiguyauma inam taumi ġaromima.

21 Taumi nuemima e verena aitaugā yodi kani ko gurigurina, baninama tokare ko kani siauana.

Taumi nuemima e verena aitaugā yodi ko ġabağabana, baninama tokare ko kwatevana.

22 Taumi nuemima e verena değoda banaga ta tuağaiemi, ta boru dobiğemi, ta kunuremi be isemima ta kawa gewagewana, baninama Banaga Natunama kana taiye.

23 “Inam kauidima ta tubutubuğana rağanine, taumi koi nuavere be ko taukaina, baninama ami maesama dosinama marae e kenakenana. Be inam banegidima tametamedima boni nama peroveta ġarodie a voivoiana.

24 “Ko kita kauana taumi aitaugā yodi kowai guyauna, baninama taumi ami nuasubama inam naumeki koya pağona.

25 Be taumi aitaugā yodi ko kanikani siauana, ko kita kauana, baninama taumi tokare kani e karemina.

Be aitaugā yodi ko kwatekwatevana, ko kita kauana, baninama taumi tokare koi nuaboya be ko ġabana.

26 Ko kita kauana değoda banaga matabudi taumi isemima ta kaikai suğuna, baninama inam banegidima tametamedima nama boni peroveta kaikaiyovudima isedima a kaikai suğusuğudina.

Am ġaviamka kwai nuapağoeđina

(Mt 5:38-48; 7:12a)

27 “Be taumi aitaugā ko vaivaieguna ya riuemina, ami ġaviamka nuemima e pağona. Be aitaugā ta tuatuağaiemina, ġarodie vere ko voienna. 28 Aitaugā tawai tara tau-tauemina, naumeki da koi aiainidina! Be aitaugā ta raukivi gewegewemina aubaidima ko moiragina! 29 Değoda aitau nevakaumma e riğana, kwa gose da nevakaumma ġesaunama mate e riğā. Değoda aitau am rupuma e kaiporena, naumeki da am kwamama mate kwa utena!

30 Aitau aba yai bağena, naumeki da kwa ute! Be aitau am waiyabama e pağona, nam kwa riue be e ute munağem.

31 Taumi aba ko ġoegoena banaga ġaromie sibo a voienna, taumi nama taudi ġarodie ko voienna!

32 “Banaga ġesaudima tawai nuapağoeđina, be taumi değoda taudiğā koi nuapağoeđina, inam nam i verena, tokare nam maesa ko banavi, inam banaga gewegewedima nama adi voiama. 33 Be banaga ġesaudima vere ġaromie ta voivoie, be taumi değoda taudiğā vere ġarodie ko voienna,

inam nam i verena, tokare nam maesa ko banavi, inam banaga gewegewedima nama adi voiama. ³⁴ Be aitauāga aba koya utedi be taumi ko nōgonōgotina da tai ġare mu-naġemina, inam naumeki be tokare nam maesa ko banavi! Baninama inam kauinama teneġinama nama gewagewa banegidima ta voivoiana.

³⁵ “Be taumi ami ġaviam sibo koyai nuapaġoedina, be yaba verediġa ġarodie ko voiedina, be banaga yaba ko utedi be nam murine ko nōgonōgoti da ta ute munaġemi. Deġoda nama ko voiana, tokare ami maesama dosinama ko paġona, be taumi Mamaitua saġasaġa vavasaġinama natunatunama ko tubuġana. Baninama avedi da banaga kanikanitokudima be gewegewedima be Mamaitua yaġoro e raraу kiviverena ġarodie. ³⁶ Vutuna aubainama taumi ko raunuatoina maika tamemima marae e raraу nuatoina nama.

Nam koi wavy

(Mt 7:1-5)

³⁷ “Nam turamma kwai wavu da tokare Mamaitua nam tam ei wavum. Be nam turamma kwai tara tautaue, da tam tokare Mamaitua nam ei tara tautauem. Ami banagama adi gewagewama ko nōgota poredina, be nama taumi tokare ami gewagewama Mamaitua e nōgota porena. ³⁸ Ko pairu be Mamaitua e pairuemina. Tauna moġamoġavunama e utemina be e nuagiġinina. Vutuna aubainama ruva dosine ko rauruvana, baninama Mamaitua inam ruvanama teneġine e ruvemina.”

³⁹ Be Yesu tauna uma wainasinama mate ya riuedina, “Tauġoma matapotapotanama banaga ġesau matapotapotanama nam ei doke. Deġoda, rabuidi dome ta bekuna. ⁴⁰ Tauwai muriwatana nam aitau e saġa gurata da na tauwai katakataima ei muri, be raġanine tauna ai katakatai be ya kovina, inam raġanine tauna na tauwai katakataima maika e tubuġana.

⁴¹ “Aba aubainama turamġa matane vunavuna kwa kitakita, be tam matame kaitupo nam kuma kitakita? ⁴² Tam matame kaitupo nam kuma kitakitana, be nema turamma kwa riu bake be matane vunavuna kwa kaipore, wa? Tam banaga kaikaiyovumma! Nōgone tam matame kaitupo kwa kaipore da kwai kita kaua, yodibe turamma matane vunavuna kwa kaiporena.

Kai be votanama

(Mt 7:16-20; 12:33-35)

⁴³ “Kai verenama votanama nam gewegewedi be kai gewagewanama votanama nam veredi. ⁴⁴ Kai votane kwa kita be kwa kataie da inam kai verena bo kai gewagewana.

Nam aitau tokare damaya votanama yaguru bogane e ragau. Be nam aitau tokare mabeko votanama gedara nopone e ragau. ⁴⁵ Inam kauinama teneğinama nama banaga vere-nama, nuanama verenama aubainama, yaba veredima ewai tubugidina. Be banaga gewagewanama yaba gewegewediña ewai tubugidina. Baninama banegidima nopodima nogota ya moğavu da mududie ta giugiuna.

*Vada taukeridima rabui
(Mt 7:24-27)*

⁴⁶ “Aba aubainama ko riuriueguna, ‘Bada, Bada’, be taugu yà riuriuemina ko vaivaiena be nam koma voivoie? ⁴⁷ Değoda aitau e verau be riuguma e vaie be e voivoiena, taugu yài kataimi da tauna umanama: ⁴⁸ Tauna maika banaga na vadama e kerikerina. Tauna dom ya keri ya yovo gurata da yeku debane tuatua yai midirina. Be rağanine kabaita ya dobi be upa vada ya kamoğā rereğe be vadanama nam i dagudaguna, baninama tuatua doğa nopone a yovo guratana, yeku debane. ⁴⁹ Be aitau riuguma ya vaie be nam i voiena, tauna maika banaga na vadama e kerikerina, be tauna tuatua doğa debane yai midirina. Be rağanine kabaita vada ya kamokamoğina, yai rağantenağe da vada doğae ya ravuse be ya gewagewana.”

7

Yesu Rom adi torima matanama na taunoyama yai yawasanina

(Mt 8:5-13; Jn 4:43-54)

¹ Rağanine Yesu inam banegidima ġarodie ya giugiu rovona, naumeki da tauna ya nağona Kapeniamma. ² Dobudine Rom banegidima iğeigeridima matabudi 100 be taudi adi torima matanama na taunoyama, nuanama taupağonama ya sida kauana, be ġaubonağā sibo ya guri. ³ Rağanine Rom adi torima matanama Yesu varinama ya vaivaiena, dabudine tauna Jius babadidima ya riuporedina da taudi sibo Yesu ai bağā da ya verau be na taunoyama sibo yai yawasanina. ⁴ Be taudi Yesu ġarone a tavatavana rağanine, tauna ai bağā gurate be a riuna, “Tori matanama sibo kuya saguna, tauna banaga vere kaukauinama, ⁵ baninama ama banagama nuedima e pağopağona, be tauna taunağā dà sinagogma ya kerina.” ⁶ Naumeki da Yesu taudi mate a nağona.

Yesu tauna kaiteka vada diane ya tavatava be Rom adi torima matanama na banagama ya riuporedi da Yesu sibo umanama a riuena, “Bada nakarua, nam aubaiguma kwa noya gurata, taugu nam veregu da yau vadae kwa sağā.

⁷ Be yau banagaġa è riuporedina, baninama taugu nam veregu da tam ġarome sibo è verau. Riūga kwa riu be yau taunoyama e yawasanana. ⁸ Taugu è kataiena tam tokare riūga kwa riu be e tubuġana, baninama taugu mate waibada dibune yà miamiana be ġarogue banaga iġeīgeridima ta miamiana. Be raġanine yau tauiġarama tenaġa yà riuenen, ‘Kwa naġo’, be tauna e naġonaġona. Be ġesau yà riuenen, ‘Kwa verau’, be tauna e veraverauna. Be yau taunoyama yà riuenen, ‘Uma kwa voie’, be tauna e voivoienen.”

⁹ Raġanine Yesu nama ya vaivaiena, tauna Rom adi torima matanama ya basena, be dabudine yai tautinamuri da patara awai muriwatanena ya riuedina, “Yà riuriuemina da nam airaġan Israelma aitau na waisumaġama dosinama umanama maika deġo e banavi rubuna.” ¹⁰ Dabudine tori matanama na banagama a munaġana vadae, be a kita da taunoya ya yawasana munaġana.

Kaiyababa natunama tauġominama ya gurina be Yesu ya kawa midisuġu munaġena

¹¹ Naumeki da Yesu ya mia raġan ġaubonaġa be ya naġona meagai isanama Nain, be na tauwai muriwatanama be patara dosinama mate a naġona. ¹² Raġanine taudi meagai kedanama matane a tavatavana, dabudine patara dosinama inam meagaine kaiyababa natunama tenaġa ġominama gurigurinama a kiroġi be a dobina. ¹³ Raġanine Bada inam kaiyababa ya kitakitana, tauna ya raunuatoie be ya riuenen, “Nam kwa ġaba!” ¹⁴ Naumeki da Yesu maida ya tava da guri kebeninama ya taukonina, be guri taukiroġinama dabudi a midina. Be Yesu ya riuna, “Yaraga, yà riuriuemna, kwa midisuġu!” ¹⁵ Inam raġanine tauġoma gurigurinama ya midisuġu be giu yai karena. Be Yesu inam tauġominama tinanama ya ute munaġena. ¹⁶ Be banaga matabudi a ġosoridi be Mamaitua isanama a kaisuġu be a riuna, “Peroveta dosinama poude ya maġatarana be Mamaitua ya tavana sagudama aubainama.” ¹⁷ Be Yesu varinama ya daberarana Judia provins nopone be dianama mate.

Yesu be Jon tauwai babataito (Mt 11:2-19)

¹⁸ Jon na tauwai muriwatanama inam yabedima matabudi a tubutubuġana Jon ai varina. ¹⁹ Be Jon na tauwai muriwatanama rabui ya riuedi da a tava ġarone be ya riuporedina, da taudi Yesu sibo umanama ai taravirena, “Tam vutuna Keriso a riuriuemna kuya tava bo banaga ġesau ka rabe?” ²⁰ Raġanine Yesu ġarone a tavana taudi a riuenen, “Jon tauwai babataito ya riuporemaina da uma waitaraviranama tam

kai taravirem, ‘Tam vutuna Keriso a riuriuemna kuya tava bo banaga ġesau ka rabe?’ ”

²¹ Inam raġanine Yesu tauna banaga toitoi adi sidama dosidie da ġaġaubaodie yai yawasanidi be penama banaga nopolie ya tavu dobīġedina be banaga matapotepeṭedima ai kita munaġana. ²² Be Yesu Jon na tauwai muriwatanama ya paribeedina, “Ko munaġa be aba koya kitakitana, be koya vaivaiena, vutuna Jon koi varina: Banaga matapotepeṭedima ai kitana, banaga tuera ragaragaudima a noġona, banaga kito ragaragaudima a verena, banaga beapotepeṭedima ai beavaiana, banaga guriguridima a midisuġu munaġana, be vari verenama banaga waikaruwaġeġedima ġarodie yà rarauguguyedina. ²³ Nuavere tauna aitau nam ġarogue ima noġonoġota bekubekuna.”

²⁴ Jon na tauwai muriwatanama a naġona, be muri-die Yesu patara nophone Jon na kauama ya giuena, “Boni dobu kavakavane koya naġona Jon ġarone, be aiyaba koya noġonoġotina sibo koya kita? Banaga na noġotama gwaġanama maika vagara sive ya kwadikwadiena kitana aubainama koya naġo, bo? ²⁵ Bo aiyaba koya noġonoġotina sibo koya kita? Banaga gara verenama kote kotenama sibo koya kita, bo? Ibewa, banaga gara veredima kote kotedima be purapura vereveredima ġarodie, taudi guyau na vadae miemienidima. ²⁶ Bo aiyaba koya noġonoġotina sibo koya kita, peroveta, bo? Ee, be yà riuriuemna, taumi peroveta dosinama koya kitana, nam maika peroveta ġesaudima. ²⁷ Inam tauna vutuna girugiruminama porane umanama e riuriuna,

‘Taugu tauwai noyanoya yà riupore dokena muriġa tam, be tauna am kedama e sepana.’

²⁸ Be yà riuriuemna, Waiwaivi banaga a tiketikedina nopolie nam aitau Jon e saġapore. Be kamai banabanaga Mamaitua na waiguyauma nophone, tauna vutuna Jon ya saġaporenna.”

²⁹ Be raġanine banaga matabudi be teks tautaminama Jon na rauguguyama a vaivaiena, taudi matabudi a noġotina da Mamaitua na giuma riukaua, vutuna aubainama Jon taudi yai babataitodina. ³⁰ Be Parisi be tarawatu tauwai katakataidima taudi Mamaitua na ġoanama na kedama a tuaġaiena, aubainama Jon na waibabataitoma a tuaġaiena.

³¹ Be Yesu yaġoro ya giugiuna, “Yodi taumi kimtimima nema yài ruvaruva bakemi? Taumi aiyaba maika? ³² Taumi maika seda debadebae tawai digirina. Be taudi adi banagama mate tawai riu singaġayana. ‘Tauma naġi digirinama këi digirie be taumi nam ko bigana, be tauma guri-

digirinama kèi digirie be taumi nam ko ġabana.’ Taumi raġan matabuna nama ko riuriu tuatuaġaina.³³ Be raġanine Jon ya tavana, taumi kauinama teneġinama koya voivoiena. Tauna ya widiwidina be waen nam i tegotegona, be taumi ko riuriuna, ‘Tauna penama ġarone.’³⁴ Be Banaga Natunama ya tava da e kanikani be e tegotegona da taumi ko riuriuna, ‘Ko kita, tauna banaga kanikani dobidobinama be waen tegotego dobidobinama. Be teks tautamina be gewagewa tauvoiedima taudi tauna na banagama.’³⁵ Mamaitua na nuauyauyama natunatunama ġarodie, tokare tà kitana dego tauna riukaua. Banaga tauriu singāgayena, bo taugu be Jon.”

Yesu waivi na gewagewama ya noġota porena

³⁶ Parisi tenaġa Yesu ya kokonena na vadae kani aubainama. Naumeki da Yesu Parisi na vadae ya naġo be ya kena girigirina* kani aubainama.³⁷ Be uma meagaine waivi na yawasanama gewagewanama ya miamiana. Be raġanine Yesu Parisi na vadae a kanikanina, varinama tauna ya vaivaiena, naumeki da upa ġabuġabunama duginama maesinama dosinama ya kiroġi verauġena.³⁸ Be tauna ma ġabaġabana Yesu kaġanama diane ya midi be matsurune Yesu kaġanama yai butedi, be debavuvuġine Yesu kaġanama ya ravusidina, be kaġanama yai suruvedi be upa ġabuġabunama kaġane ya ġinina.

³⁹ Be Yesu taukokonenama uma kauinama nama ya kitakitana, tauna yai nuanoġonogotana, “Deġoda uma banaginama tauna riukaua peroveta, naumeki da tauna tokare sibo ya kataie da uma aba waivinama tauna e tautaukon, be tauna sibo ya kataie da uma waivinama tauna waivi gewagewanama.”

⁴⁰ Be Yesu tauna ya riuena, “Saemon, taugu yà ġoeġoena aba yà riuemna.” Be tauna ya riuna, “Naumeki, tauwai katakatai, kwa giu!”⁴¹ “Mane taupakinama tenaġa banaga rabui loun ya utedina. Banaga tenaġa Denari 500 be gesau tauna Denari 50.⁴² Be taudi rabuidi nam mane da mane taupakinama sibo a ute munage, vutuna aubainama mane taupakinama taudi adi bukinma ya boaporen. Yodi tam kwa noġonogotina dego tauna nuanama ya vere kaua?”

⁴³ Be Saemon ya paribeena, “Taugu è noġotina agunai banaga aitau 500 Denari boaboaporenama.” Be Yesu ya riuna, “Tam kuya riukauana.”

⁴⁴ Dabudine Yesu yai tautinamuri waivi ġarone be Saemon ya riuena, “Uma waivinama kuya kita? Taugu am vadae è saġa be nam upa ku utegu da kaġaguma sibo è koġana, dà

* **7:36:** Jius adi kastamma ta kenagirigiri be ta kanikanina.

vaivaima e riuriuna nama, be tauna matasurune kağaguma ya koğedi be debavuvugine kağaguma ya ravusidina.⁴⁵ Tam nam kui suruveguna waikaiwa aubainama, dà vaivaima e riuriuna nama, be tauna rağanine è sağasağana kağaguma waisuruvenama yai kare be nam i gosena.⁴⁶ Tam nam debague oeri ku ġinina, dà vaivaima e riuriuna nama, be tauna kağague upa ġabuğabunama ya ġinina.⁴⁷ Vutuna aubainama yà riuriuemna da tauna na gewagewama matabudi Mamaitua ya noğota poredina. Vutuna aubainama taugu nuanama yà pağopağō kauena. Be aitau da na gewagewama ġaubonama Mamaitua ya noğota porena, vutuna aubainama tauna na wainuapağoma ġaubonama taugu ġarogue.”

⁴⁸ Dabudine Yesu waivi ya riuena, “Am gewagewama è noğota poredina.” ⁴⁹ Be banaga ġesaudima taudime ai taraviravira munağedi be a riuriuna, “Uma tauna aitau, banaga adi gewagewama e noğonoğota poredi?” ⁵⁰ Be Yesu waivi ya riuena, “Am waisumağama yai yawasanimna. Ma nuasubam kwa nağona.”

8

Yesu na tauwai muriwatanama waiwaividima

¹ Dabudine a miana rağan bisanama be Yesu na apsolma 12 mate a nağona meagai dosidie be ġauğaubodie da Mamaitua na waiguyauma riunama verenama ya rarauguguyena. ² Be Yesu waiwaivi ġesaudima penama be sida ragaragaudima yai yawasanidina. Inam waiwaividima taudi mate Yesu ai muriwatane be a nağonağona. Taudi isedima Meri awai isana Megdalin,* penama matabudi 7 tauna a dobi porena, ³ be Joana, tauna Kusa na visarama, be tauna guyau Herod na bisnisma taurabenama, be Susana be waiwaivi ġesaudima mate. Inam waiwaividima adi kanie be adi manee Yesu be na tauwai muriwatanama a sagusagudina.

Taukuma wainasinama (Mt 13:1-9; Mk 4:1-9)

⁴ Rağan tenağā patara dosinama meagai da meagai a verau be Yesu ġarone ai rawateğeidina, be tauna uma wainasinama ya riuedina,

⁵ “Taugoma tenağā ya dobi ya nağō da pesi yai yaraiedina. Rağanine pesi yawai yaraiedina, ġesaudima keda poune a ravusedina, be banaga a vagudegudedi be kiu a kanidina.

⁶ Be ġesaudima yeku debedie a ravusedina. Be rağanine a gogo tavana, matabudi a pokina, baninama doğa noponama nam subasubana. ⁷ Be ġesaudima gedara nopodie a ravusedi

* **8:2:** ‘Megdalin’ inam meagai isanama.

da gedara mate a gogo tenağana be gedara pesi ya yavanidi da pesi nam ti gogona. ⁸ Be ġesaudima doğa verenama debane a ravusedi be a gogo kauana be banidima a biridina ya toi kauana, be pesi tenağaga banidima 100.” Be Yesu bonanama dosine ya riuna, “Değoda beemima ta kenakenana, koi beavaia!”

⁹ Be tauwai muriwatana Yesu ai taravirena, “Bada, inam wainasinama baninama aba?” ¹⁰ Be tauna ya paribeedi be ya riuna, “Mamaitua na waiguyauma semosemodima yàwai kataimina da na waiguyauma yodi nema e veraverau bakona ko kataiena. Be banaga ġesaudima taudi wainasi taunağga ta vaivaiena,

aubainama taudi matedie ta kitakitana be nam tima kitakita kauena,

ta vaivaiena be nam tima katakataiena.

¹¹ “Be wainasi baninama inam umanama: Pesi inam Mamaitua riunama. ¹² Pesi keda debane ravuravusedima, inam maika banaga Mamaitua riunama ta vaivaiena, be muriğga Diaboro e tava be Mamaitua riunama nopodie e kaikaiporağana, da taudi nam tai sumağga be ta yawasana. ¹³ Pesi yeku debane ravuravusedima, inam maika banaga rağanine Mamaitua riunama ta vaivaiena, taudi ma nuavereveredi inam riunama ta pağopağona. Be taudi nam waramidi, vutuna aubainama rağan ġaubonağga tai sumağana, be rağanine raurubu e tavatavana taudi adi waisumağe ta bekuna. ¹⁴ Be pesi gedara nopodie ravuravusedima, inam maika banaga Mamaitua riunama ta vaivaiena, be muriğga nuaboya be waiguyau be tubuğga na wainuaverema adi waisumağama ta yavayavanidina da taudi tokare nam ta bani. ¹⁵ Be pesi doğa verenama debane ravuravusedima, inam maika banaga nopodima veredima be didimanidima, be rağanine taudi giu ta vaivaiena, taudi ta kaididi be ta rabe da e votavotana.”

Kodam wainasinama (Mk 4:21-25)

¹⁶ “Nam aitau kodam e gabu be e ruputawa bo anikaba kena dibune e boru. Tauna kodam ġavoe ei midiri da banaga ta sağasağana ta kitana. ¹⁷ Değoda yaba matabuna yodi ko ruputawedina, be tokare ta mağatara munağana. Am noğota be am kauama semosemodima mate tokare banaga matabudi ta kataiedina. ¹⁸ Vutuna aubainama koi beavaia kauana, baninama değoda aitau yau giuma ya pağopağona, ġesau debane mate tokare e utena. Be değoda aitau yau giuma nam i pağona be e noğonogötina da ya pağona, be ibewa da tokare matabudi e kaiporağana.”

*Yesu tinanama be tasitasinama
(Mt 12:46-50; Mk 3:31-35)*

¹⁹ Yesu tinanama be tasitasinama taudi a verauna Yesu ġarone be nam ġarone ti tavana, baninama patara ya morabana. ²⁰ Dabudine banaga tenaġa Yesu ya riuena, “Tinamma be tasitasimma doġae ta midimidi be ta ġoegoena da ta kitamna.” ²¹ Be Yesu ya riuna, “Tinaguma be tasitasiguma taudi aitaugħa Mamaitua riunama ta vaivaiet be ta voivoiena.”

*Yesu kaibitibiti ewai badena
(Mt 8:23-27; Mk 4:35-41)*

²² Raġan tenaġa Yesu na tauwai muriwatanama mate wagae a saġa be ya riuedina, “Yawawa dosinama tà davu be tà naġo noaġo nevane.” Naumeiki da a naġona. ²³ Taudi yawawa a davudavuna maika Yesu ya kenana, be kaibitibiti yai raġantenaġe da ya tavana be waga nponama upa ya moġavu be waga ġaubonaġa da sibo ya monuna.

²⁴ Be tauwai muriwatanama a naġo be Yesu a taiġosori be a riuedina, “Bada, Bada ġaubonaġa da tà gurina!” Be tauna ya midisuġu be sive be rabama ya riutuāġiedi, da taudi ai nuatuġtuġu be daumora ya kenana. ²⁵ Be Yesu na tauwai muriwatanama ya riuedina, “Taumi ami waisumaġa bo ibewa?” Be taudi a ġosoridi be a basena be adi banagama adi banagama a riuedina, “Uma baneginama aitau? Tauna sive be upa e riuedi be ta vovo teyeteyena.”

*Penama banaga a kokuna
(Mt 8:28-34; Mk 5:1-20)*

²⁶ Be taudi wagae a naġona Geresin adi dobue. Umaġo Galili provins be noaġo nevane. ²⁷ Be Yesu kaġanama gerese ya boruboru dobijena raġanine, meagaie tauġoma tenaġa ya verauna Yesu ġarone. Be tauġominama penama bonidego a kokuna, be tauna ma kovakovana ya naġonaġona be nam vadae i miamiana. Be tauna guri adi gubae[†] ya miamiana. ²⁸⁻²⁹ Be inam tauġoma Yesu ya kitakitana raġanine, tauna ya yogo be Yesu noġone ya bekuna. Dabudine Yesu penama ya riue da tauġoma ya dobi porena. Be tauna bonanama dosine ya riuna, “Yesu, Mamaitua saġasaġa vavasaġinama Natunama, aba ġarogue kwa ġoegħoe? Yawai baġamna da nam gewagewa ġarogue kwa voie.”

Raġan toitoi penama tauġoma yai babari be na ġoane nama ya nawenawena. Be banaga tauna nimanama be kaġanama a rauseini be a raberabena. Be yaġoro tauna ya rakedi be penama tauġoma ya nawena dobu wainuatoitoine.

[†] **8:27:** Israel taudi nam guri ti dobodobodina, be taudi gubae a sivusivudina, maika Yesu.

³⁰ Yesu yai taravirena, “Tam isamma nema?” Be tauna ya paribeena, “Taugu isaguma Patara”, baninama penama toitoi nopone a sağana. ³¹ Be penama awai bağana da Yesu nam taudi sibo ya riuedi da dom nam dibuboruborune sibo a nađo.

³² Inam dabudine bawa netarinama oya babane a yababana. Be penama Yesu ai bağda tauna sibo yai aninedi da bawa nopodie sibo a nađona. Be Yesu yai aininedina. ³³ Dabudine penama banaga a dobi pore be bawa nopodie a nađona da bawa netarinama dere boganağaa manini yovo da a nađona yawawa dosine be a tonedina.

³⁴ Bawa tauyosidima inam kauinama nama a kitakitana, taudi a manini a nađona. Be taudi banaga matabudi ai varidina adi meagaie be meagai diane mate.

³⁵ Dabudine banaga a dobi a nađo da kaua aba ya tubutubuğana sibo a kitana. Be rağanine Yesu ġarone a tavatavana, taudi tauğoma penama dobidozi porenama Yesu kağane ya miamiana a kitana. Be tauğoma yai gara kaua be na noğotama verene ya miamiana, be taudi nama a kitakitana a nairana. ³⁶ Be banaga aitaüğa kauinama a kitakitana, taudi banaga ġesaudima ai varidina da tauğoma penama kokukokunama ya yawasana munağana. ³⁷ Dabudine Geresin banegidima Yesu ai bağana da tauna sibo inam dobunama ya gose be ya nađo poredina, baninama taudi a naira da a naira kauana. Naumeki da Yesu waga nopone ya sağaa be ya munağana.

³⁸ Tauğoma penama dobidozi porenama Yesu yawai bağana da mate sibo a nađona. Be Yesu ya riupore be umanama ya riuena, ³⁹ “Kwa munağaa am vadae da Maimaitua aba ġarome ya voivoiena banaga kwai varidina!” Dabudine tauğoma ya nađo be meagai nopone banaga matabudi ya riuedina da Yesu aba tauna ġarone ya voienia.

Jaeras natunama waivinama

(Mt 9:18-26; Mk 5:21-43)

⁴⁰ Be Yesu ya tavatava munağana rağanine, banaga patara tauna ai kaiwena, baninama taudi matabudi tauna a raberabena. ⁴¹ Dabudine tauğoma isanama Jaeras, tauna sinagog taurabenama. Tauna ya tava be Yesu noğone tuapikane ya raupari be yai bağaa guratena da sibo na vadae ya sağana, ⁴² baninama natunama waivinama tenağaa ġominama na suarama 12 be tauna ġaubonağaa da e gurina.

Be Yesu ya nađonağona rağanine, patara tauna a midimidi ġuruğurvina. ⁴³⁻⁴⁴ Dabudine waivi tenağaa Yesu murine ya tava be na garama isunama ya taukonina, baninama tauna waikosina vutuvutu ya pağona modi 12 a kovina.

Be tauna bonika na purapurama matabudi dogeta ġarodie yawai yakaredina, be nam aitau i yawasanina. Be raġanine Yesu na garama isunama ya tautaukonina, yai raġantenaġe da waikosina vutuvutu yai kavena.

⁴⁵ Dabudine Yesu yai taravirana, “Aitau ya taukonigu?” Be matabudi a bovina, vutuna aubainama Pita ya riuna, “Bada, banaga a midi ġuruvim be ta biubiu suriġimna. Be nemanama da kwa riuriuna ‘Aitau ya taukonigu?’” ⁴⁶ Be Yesu ya riuna, “Taugu è kataiena da aitau ya taukoniguna, baninama rewapana ya dobi poreguna.” ⁴⁷ Raġanine waivi mayanama ya paġo da nam teneteneġina da sibo yai moisiri, vutuna aubainama tauna ma tunigusugusuna Yesu noġone ya bekuna. Be patara noġodie waivi Yesu ya riuena da aba aubainama Yesu ya tauconi, yodi tauna ya yawasana munaġana. ⁴⁸ Be Yesu tauna ya riuena, “Moumou, am waisumaġama yai yawasanimna. Ma nuasubam kwa naġona.”

⁴⁹ Yesu yaġoro ya giugiu be sinagog taurabenama na vadae banaga miemieninama ya tava da Jaeras ya riuena, “Natumma ya gurina, tauwai katakatai nam kwai sinasina.”

⁵⁰ Be Yesu nama ya vaivaiena, tauna Jaeras ya riuena, “Nam kwai nuaboya, kwai sumaġa be tauna tokare e yawasanana.”

⁵¹ Be taudi Jaeras na vadae a tavana raġanine, Yesu banaga ya riuedina da nam aitau tauna mate vadae ta saġa. Pita, Jon, Jeims be gomana na dosima taudiġa Yesu mate vadae a saġana. ⁵² Be banaga matabudi gomana ai nuaboye be a ġabegħabena. Be Yesu ya riuedina, “Nam ko ġaba, tauna nam i gurina, e kenakena ġomana.” ⁵³ Dabudine banaga matabudi Yesu ai kwatekwatevena, baninama taudi a kataie da gomana ya gurina. ⁵⁴ Raġanine ya tavutavu dobiġedina, tauna gomana nimane ya kaididi be ya riuna, “Gomana, kwa midisuġu!” ⁵⁵ Dabudine gomana aruinama ya tava munaġa be ya midisuġuna. Be Yesu taudi ya riuedina, “Yodi kani ko ute be e kani!” ⁵⁶ Be tauna na dosima nuedima ya mosari kauana. Be aba ya tubutubuġana Yesu taudi ya riuedina da nam aitau sibo a riue.

9

*Yesu apasol 12 ya riuporaġana
(Mt 10:5-15; Mk 6:7-13)*

¹ Yesu apasol 12 ya riuedi da a rawateġeidi be tauna rewapana be waibada ya utedina, da taudi penama ta tavu dobiġedi be banaga sidesidedima tai yawasanidina. ² Yodibe ya riuporedina da taudi Mamaitua na waiguyauma ta rauguguye, be banaga sidesidedima tai yawasanidina.

³ Be tauna ya riuedina, “Ami naḡoe nam aba ko paḡo. Nam diḡona, nam tana, nam kani, nam mane be nam kwama ġesaunama mate ko paḡo. ⁴ Be raḡanine ai meagaie ko saḡasaḡana taumi vada tenaḡa nopone ko miana, naumeki da ami kaba naḡoma raḡanine inam meagainama ko gosena. ⁵ Be deḡoda banaga taumi nam tai aninemi, naumeki da kaġemima popokaudima ko rawakurukuruvidi be inam meagainama ko goseporena. Dabudine taudi ta kataie da taudi tokare Mamaitua matane inam wavunama taudime ta paḡo munaḡena.”

⁶ Naumeki da tauwai muriwatana meagai da meagai nōpodiḡa a naḡo be vari verenama a rarauguguye, be banaga dobu matabuna awai yawasanidina.

Herod na nuababaḡama

(Mt 14:1-12; Mk 6:14-29)

⁷ Inam raḡanine Herod, tauna Galili provins guyaunama, be uma kauidima nama a tubutubuḡana, tauna ya vaiedi be ya nuababaḡana, baninama banaga ġesaudima a riuriuna da Jon tauwai babataito ya guri be ya midisūgu munaḡana. ⁸ Be banaga ġesaudima a riuriuna da peroveta Elaija ya maḡatara munaḡana, be banaga ġesaudima a riuriuna da bonideḡo perovetedima tenaḡa ya guri be ya midisūgu munaḡana. ⁹ Be Herod ya riuna, “Jon gadonama è tomna, be inam yodi aitau baneginama varinama ya vaiviae?” Be tauna ya ḡoeḡoena da sibo Yesu ya kitana.

Yesu tautaugoma 5 tausand yai kanidina

(Mt 14:13-21; Mk 6:30-44; Jn 6:1-14)

¹⁰ Be apasol a tavatava munaḡana raḡanine, taudi yaba matabuna a voivoiedina Yesu ai varina. Tauna wainuuatuḡune yai dokedi be a naḡona meagai isanama Bet-saidama. ¹¹ Raḡanine patara nama a vaivaiena taudi ai muriwatanedina. Be Yesu taudi yai aninedina, be Mamaitua na waiguyauma taudi ya giuedina, be aitaugā yawasana a ḡoeḡoena naumeki da yai yawasanidina.

¹² Raviravi Yesu na apasolma 12 a tava be a riuena, “Banaga kwa riuporaḡa da ta naḡo meagaiḡa be meagai murisairine da taudi kani be ḡaravu ta banavidina, baninama uma dobunama wainuatoitoinama.” ¹³ Be Yesu ya riuedina, “Taumi koi kanidi!” Be taudi a paribeena, “Nema kai kani bakedi? Tauma buredi 5 kavakava be iyana rabui ḡaromae, bo nema kwa noḡonoḡota bake? Tauma ka naḡo be kani ka gimara uma banegidima aubaidima, bo?”

¹⁴ Dabudine tautaugoma a kitarurvedi da 5 tausand. Be Yesu na tauwai muriwatanama ya riuedina, “Banaga ko

dariğedi da 50 50 ta miana.”¹⁵ Naumeki da taudi nama a voia be banaga matabudi a miana.¹⁶ Yesu buredi 5 be iyana rabui ya ragaudi da gunume yai kitasağā be Mamaitua yai kaiwe da ya givedi be na tauwai muriwatanama ya utedina, be taudi a soiedi da banaga a utedina.¹⁷ Be banaga matabudi a kani da a kani siauana. Be tauwai muriwatana kani kanikanigosedima a tama da posa 12 ai moğavudina.

*Pita yai mağatarana da Yesu tauna Tauwai yawasana
(Mt 16:13-21; Mk 8:27-31)*

¹⁸ Rağan tenağā Yesu taunağā ya moimoiragi be na tauwai muriwatanama taudi tauna mate. Be tauna taudi yai taraviredina, “Banaga ta riuriu da taugu aitau?”¹⁹ Be taudi a paribeena, “Banaga ġesaudima ta riuriuna da tam kabe Jon tauwai babataito, be ġesaudima ta riuriuna da tam kabe peroveta Elaija, be banaga ġesaudima ta riuriuna da tam bonideğō perovetedima guriguridima tenağā kabe i midimidisuğu munağā.”²⁰ Be tauna ya riuedina, “Be taumi nema kowai noğota bako, taugu aitau?” Be Pita ya paribeena, “Tam Tauwai yawasana, Mamaitua ya riupore yovoğemna.”

²¹ Dabudine Yesu na tauwai muriwatanama ya riu vavasağedina da nam aitau sibo a riue.²² Be ya riuna, “Banaga Natunama tokare ei nuatoitoina yaba totoi ġarodie be babada dosidima be pirisi adi babadama be tarawatu tauwai katakataidima, taudi matabudi Banaga Natunama tokare ta tuağiae be tai gurina. Be rağan wairabuiteğane Mamaitua e kawa midisuğu munağena.”

Yesu waimuriwatanenama ya giuena

(Mt 16:24-28; Mk 8:27-31)

²³ Be Yesu banaga matabudi ya riuedina, “Değoda aitau waimuriwataneguma e ġoena, naumeki da na ġoanama matabudi e gosedi, be rağan matabuna na korosima e kiroğī* be ei muriwataneguna.²⁴ Tam aitau tame am yawasanama kwa kaididi be kwa raberabena, tam tokare am yawasanama kwa kawa gewagewana, be tam aitau da taugu kautaiye am yawasanama kuyai utaena, am yawasanama tokare kwa banavina.²⁵ Değoda aitau dobu yabedima matabudi e ragaragaudina be yağoro tauna na yawasanama e gewagewana, inam yabedima tauna tokare nam tai yawasani.²⁶ Değoda aitau, taugu e tunimayağegu bo riuguma e tunimayağena, naumeki da tokare Banaga Natunama tauna Tamanama neneğarine be anea babau

* **9:23:** Korosi kiroğinama inam kwai nuatoitoina, maika Yesu korosie yai nuatoitoina.

neneğāridie e dobina, tauna mate inam baneginama e tunimayağena.²⁷ Be taugu riukaua yà riuriuemina, ġesäumima yodi uma ko midimidina, taumi tokare nam ko guri, naumeki da Mamaitua na waiguyauma ko kitana.”[†]

Yesu kitanama ya boru vitarena

(Mt 17:1-8; Mk 9:2-10)

²⁸ Naumeki da inam giudima a kovikovina murine, rağan aniwai 8 ne Yesu tauna Pita, Jon be Jeims yai dokedi be a nağona oya debane moiragi aubainama.

²⁹ Be Yesu ya moimoiragina maika, tauna noğonama kitanama ya boru vitare be na garama ya ġavora be ya rawakeyekeyemina.³⁰⁻³¹ Yai rağantenaġe da tautauğoma rabui, Mousis be Elaija ma neneğāridi a mağħatara be Yesu mate a giugiuna. Taudi Yesu nema Jerusalemma e guri bako be uma dobunama e naġo porena, vutuna a giugiuena.³² Be Pita na banagama mate a yadoyadona. Be a ġosogosoridina rağanine, taudi Yesu ma neneğārina be tautauğoma rabui, tauna mate a midimidina a kitekitedina.³³ Be rağanine tautauğomidima Yesu a gosegosena, dabudine Pita ya riuna, “Bada, ya vere kauana da tauma yodi uma dobudine. Agunai kape rabuiteğä ka keridina, tenağä tam aubaimma be tenağä Mousis aubainama be tenağä Elaija aubainama.” Be Pita tauna nam i kataiena aba ya giugiuena, be tauna ya giugiu yababayababana.

³⁴ Be Pita yağoro ya giugiuna maika, giyou ya dobi da vagurune ya rupu tawedina. Be rağanine giyou ya sumasuma tawedina, taudi a naira kauana,³⁵ be giyou nopone bona ya dobi be ya riuna, “Uma tauna taugu natuguma be taugu è vinena, aubainama tauna bonanama ko vaiena!”³⁶ Bona yağoro ya giugiuna maika, taudi ta kitana be Yesu taunağä ya midimidina. Be tauwai muriwatana inam rağanine aba taudi a kitakitana, a nuevina be nam aitau ti riuedina.

Penama gomana tauğominama ya kokuna

(Mt 17:14-18; Mk 9:14-27)

³⁷ Pomainama taudi oya debane be a yovoyovo muñağana rağanine, patara dosinama taudi ġarodie a tavana.

³⁸ Patara nopodie tauğoma tenağä tauna ya rasa be ya riuna, “Tauwai katakatai, yàwai bağamma da yau gomanama uma kwa kita, taugu natuguma tauğominama tenağä ġominama.

³⁹ Penama kana rağanie yau gomanama e vunuġi be e kawakawa rasarasa be e kawakawa kokerina, be tauna gayane kasampuropuro ta dobidobina. Inam peneminama

[†] 9:27: Inam pentekost.

natuguma nam airaġan ima gosegosena, be natuguma tuninama e kawakawa gewagewana. ⁴⁰ Be taugu am tauwai muriwatanama ēi baġedina da taudi sibo penama a tаву dobiġena, taudi a raurubu be nam teneteneġina.”

⁴¹ Be Yesu ya paribeena, “Taumi banegimima beapotepotemima, nam waisumēġimi, taumi mate tà mia ġaġa be ami vitama yà kiroġa ġaġae? Natumma kwa verauġe uma dabudine!” ⁴² Be gomana ya veraverauna raġanine, penama tauna yai beku doġae be ya kawa kokerina. Dabudine Yesu penama ya riutuaġiae be gomana yai yawasanina, yodibe tamanama ya ute munaġena. ⁴³ Be banaga matabudi Mamaitua na rewapanama dosinama aubainama a basena.

Yesu e gurina ya giu munaġena

(Mt 17:22-23; Mk 9:30-32)

Yesu yaba matabuna ya voivoiedina banaga yaġoro a basebasena maika, Yesu na tauwai muriwatanama ya riuedina, ⁴⁴ “Koi beavaia kaua da aba yodi yà riuemina. Banaga Natunama ta boru dobiġena banaga nimedie raukivigewegewenama aubainama.” ⁴⁵ Be na tauwai muriwatanama inam giunama, baninama nam ti kataiena. Giu baninama semosemonama da taudi nam sibo a kataie. Be inam giunama aubainama taudi Yesu sibo ai taravirena, be a nairana.

Aitau ya saġa gurata?

(Mt 18:1-5; Mk 9:33-37)

⁴⁶ Raġan tenaġa Yesu na tauwai muriwatanama ai saġasaġana da poudie aitau ya saġa gurata. ⁴⁷ Be Yesu adi wainua noġonogħotama ya kataiena, vutuna aubainama gomana ġaubaġonama ya riue da diane ya midi ⁴⁸ be taudi ya riuedina, “Aitau uma gomeninama ġaubaġonama taugu isague ewai turanena, naumeki da tauna ewai turaneguna, be aitau taugu ewai turaneguna, naumeki da tauna tauri-uporegħuma mate ewai turanena. Vutuna aubainama aitau taumi poumien na yawasanama ya yovona, tauna ya saġa guratana.”

⁴⁹ Be Jon ya riuna, “Bada, tauma tauġoma kè kitana, tauna isame penama ya tavutavu dobiġedina, be tauma kè riutuaġaiena, baninama tauna nam tauda mate tama noyanoya tenaġħana.” ⁵⁰ Be Yesu ya riuna, “Nam ko riutuaġiae, baninama tauna deġoda taumi nam ami ġavia, naumeki da tauna taumi turemima.”

Samaria banegidima Yesu a tuaġaiena

⁵¹ Naumeki da Yesu na raġanima maida ya tavatavana da tauna sibo ya munaġana marae, vutuna aubainama

na noğotama ya vitare da Jerusalem nağonama ya noğota didina.⁵² Be tauna tauwai noyanoya ya riupore dokedina, da taudi a nağona Samaria meagaine da Yesu na kaba verauma aubainama sibo a vokaukauana.⁵³ Be banaga dabudine nam ti aninena, baninama tauna ya nağonağona Jerusalemma.[‡]
⁵⁴ Be rağanine na tauwai muriwatanama Jeims be Jon nama a kitakitana, taudi a riuna, “Bada, naumeki bo ibewa da tauma sibo kai marae kè riue be ya yovo da uma banegidima sibo ya kara gorudi, Elaija ya voiana maika?”⁵⁵ Be Yesu yai tauvitara be ya riutuağiedina.⁵⁶ Naumeki da taudi a nağona meagai ġesaune.

*Yesu waimuriwatanenama na piripirima
(Mt 8:18-22)*

⁵⁷ Rağanine taudi kedağ a nağonağona, be tauğoma tenağā Yesu ya riuena, “Tam değō kwa nağona, taugu yài muriwatanemna.”⁵⁸ Be Yesu ya paribee be ya riuna, “Inam naumeki be uma kwa noğoti, kiudobo[§] taudi adi gaure adi kaba miama, be kiu adi noğie adi kaba miama, be Banaga Natunama nam değō na gabu kaua da tauna e sipere.”

⁵⁹ Be Yesu tauğoma ġesaunama ya riuena, “Kwai muriwatanegu!” Be tauna ya riuna, “Bada, noğone kwa gosegu da yà nağō be tamaguma yà dobona.”⁶⁰ Be Yesu ya paribeena, “Banaga guriguridima kwa gosedi da taudiğ a adi gurima ta dobo munağedina, be tam kwa nağō be Mamaitua na waiguyauma e veraverauna, vutuna kwa rauguguyena!”

⁶¹ Be banaga ġesau Yesu ya riuena, “Bada, taugu yài muriwatanemna, be noğone kwa gosegu da yà nağō be yau dosima yài kaiwedina.”⁶² Be Yesu ya riuena, “Değoda aitau yabiyabi** e pağopağō be ei tautinamurina, tauna nam teneteneğina da Mamaitua na waiguyauma nopone e noya.”

10

Yesu na tauwai muriwatanama 72 ya riuporağana*

¹ Uma kauinama murine Bada banaga ġesaudima matabudi 72 ya vinedina, be tauna değō meagaidiğ a nağonama ya noğonogötina, nama inam banegidima ma turana ma turana ya riupore nawe dokedina inam meagaidiğ a.² Be tauna umanama ya riuedina, “Sipi

[‡] 9:53: Jius adi ġaviam Samaria banegidima. § 9:58: Yesu ya riuna: ‘Fox’. Tauna dobira muserinama be gaure ta miamiana maika kiudobo. ** 9:62: Yesu ya riuna: ‘Plow’, baninama kuya waiplow be kuyai tautinamurine, tokare am noyama e barabarana, maika yabiyabi taupağonama, değoda ei tautinamurine, waga nağonama barağ a nağona, be am ġoanama dobune nam kwa tava.

* 10:: Giruma ġesaudima ta riuriuna da 70.

taupakinama koi bağā da tauna taunoya ġesaudima e riuporağā da taumi ta sagumina, baninama inam dabudine maura ya morabana be taunoya a raubisağāna.³ Naumeiki, ko nağō! Taugu yà riuriuporemina sipu natunatudima maika musara ġasigasidima nopolie. ⁴ Nam pausi ko ragau, nam tana, nam kağasuma ġesaudima mate, be nam kedae banaga mate koi boruboru!

⁵ “Rağanine vada nopone ko sağāna, noğone ko riuna, ‘Suba uma vadane.’ ⁶ Be değoda inam dabudine suba banegi-nama e mianana, naumeiki da ami subama tauna ġarone e kena, be değoda tauna nam suba banegina, naumeiki da ami subama e verau munağāna ġaromie. ⁷ Rağanine değō meagaine koya tava be değō vadane koya sağāna, naumeiki da vadane ko miana, be dabudi ko kani be ko tego gogonana, baninama taunoya sibo adi maesama a pağō. Be taumi nam koi vadasağā!

⁸ “Taumi değō meagaie ko tava be banegidima tai aninemina, naumeiki da aba ta uteutemina, vutudiğā ko kanna! ⁹ Be banaga sidesidedima koi yawasanidi be ko riuedina da Mamaitua na waiguyauma rağaninama e tavatavana. ¹⁰ Be taumi değō meagaine ko tava, be inam meagainama banegidima nam tai aninemi, naumeiki da ko nağō kedae be ko riuna, ¹¹ ‘Tauma ami meagaima popokaunama kağamaima ya patipatina ġaromie ka vava yasayasaina, be ko noğoti da taumi tokare nam ko yawasana, baninama Mamaitua na waiguyauma rağaninama ya tavatava be taumi koya tuağaiena.’ ¹² Taugu yà riuriuem da etara rağanine Mamaitua inam meagainama e kovoğā guratena, nam maika Sodom.

¹³ “Korasin be Betsaida meagaimima, ko kita kaua! Baninama değoda taugu sibo meagai Taiya be Saidon nopolie voia dosidima sibo è voiedina maika taumi ġaromie è voiedina nama, naumeiki da taudi bonika sibo noğota viravira a pağō, be adi gewagewama nuaboyanama a mogurena. ¹⁴ Etara rağanine Mamaitua taumi e kovoğā guratemina, nam maika Taiya be Saidon. ¹⁵ Be taumi Kapeniam banagimima, kowai noğotana tokare ko nağō marae, bo? Ibewa, Mamaitua taumi tokare banaga guriguridima adi gabue e kidipore nawemina.”

¹⁶ Be Yesu na tauwai muriwatanama umanama ya riuedina, “Aitau da taumi ami giumenta e vaivaiena, naumeiki da tauna taugu yau giumenta e vaivaiena. Be aitau da e tuatuağaiemina, naumeiki da tauna taugu e tuatuağieguna, be aitau da taugu e tuatuağieguna, naumeiki da tauna tauriuporeguma e tuatuağaiena.”

Yesu na tauwai muriwatanama 72 a tava munağā be Yesu yai nuaverena

(Mt 11:25-27; 13:16-17)

¹⁷ Be rağanine banegidima taudi 72 a tavatava munağana, taudi ai nuavere kaua be a riuna, “Bada, tam isame penama mate tauma a voteyeteyemaina.”

¹⁸ Be Yesu ya riuedina, “Taugu Seitan è kitana marae ya beku be ya yovona maika keama. ¹⁹ Taugu rewapanama è utemina da ġavia na rewapanama matabuna ko vaisubana, be mota be rikarikau debedie koi vutuğā be ko vamutudina. Be nam aba tokare e kawa gewegewemi. ²⁰ Be nam penama ta vovo teyeteyemina aubainama koi nuavere, avedi. Be taumi koi nuaverena, baninama isemima marae girugirumidima ta kenakenana aubainama.”

²¹ Inam rağanine Yesu nophonama Arua Babaue nuavere ya moğavu be ya riuna, “Mamai, tam mara be dobu Badanama, yà kaisuğumna, baninama uma kauidima kuya semodina da nuauyauya be katai banegidima ġarodie nam kui mağataridina. Be tam banaga koekoedima ġarodie kuyai mağataridina. Mamai, inam naumeki, tam am ġoanama ruvane.”

²² “Tamaguma yaba matabuna taugu ya uteguna. Be nam aitau i kataiena da Natunama aitau, Tamanama tauñağā ya kataiena. Be nam aitau i kataiena da Tamanama aitau, Natunama taunağā ya kataiena, be Natunama aitaúğā ya vinevinedina ġarodie ewai mağataridina da tauna Tamanama aitau.” ²³ Be Yesu na tauwai muriwatanama ġarodie yai tauvitare be taudığa ya riuedina, “Taumi uma kauinama koya kitakitana, nama banaga ta kitana, naumeki da nuedima e verena, ²⁴ baninama boni peroveta toitoi be guyaguyau a ġoegħoena da sibo uma kauinama a kitana, maika taumi yodi ko kitakitana nama, be nam ti kitana. Taudi a ġoegħoena da sibo uma giunama a vaiena, maika taumi yodi ko vaivaiena nama, be nam ti vaiena.”

Samaria baneginama verenama wainasinama

²⁵ Rağan tenağā tarawatu tauwai katakatainama ya verau da Yesu ya raurubu be ya riuna, “Tauwai katakatai, aba yà voie be yawasana kenakena nonoġinama yà paġo?”

²⁶ Yesu ya riuena, “Tarawatu nema e riuriu bako? Tam nema kwa katakatai bake?” ²⁷ Be tauġoma ya paribeena, “Bada, am Mamaituama nuanuamma e paġona, nuanuamma tabutabune, aruimma tabutabune, am noġotama tabutabune be am rewapanama tabutabune. Be turamma nuanuamma e paġona maika nema tam kwa ġoegħoe mu-nağemna nama.” ²⁸ Yesu ya riuena, “Tam kuya riu kauana,

inam vutuna rağan matabuna kwa voie be yawasana kwa pağona.”²⁹ Be tauname ya gudutara munağe be Yesu ya riuena, “Naumeki, be yau banagama aitaugā?”

³⁰ Yesu gututue tauna ya paribeena, “Rağan tenağā tauğoma Jerusalemma be ya dobi ya nağonağona Jerikoma. Be kedae banaga danedanenedima inam tauğominama a vunuğī da na garama a kaiporağā be a riğā da ya raugurere be a gose da a nağō porena.³¹ Naumeki da pirisi inam kedanağā ya dobi ya nağonağona. Be rağanine tauna e kitana be tauğominama ya kenakenana, naumeki da keda dianağā ya dobi be ya nağō ġomana.³² Be murine Livait dobudine ya dobina. Be kauinama teneğinama ya kita be tauna mate keda dianağā ya dobi be ya nağō ġomana.³³ Be Samaria tauğominama kedanağā ya dobi be ya nağonağō da tauğominama ġarone ya dobina. Be rağanine tauğominama nama e kitana, be ya raunuatoiena.³⁴ Naumeki da ya nağō ġarone ya tava be oeri be waen kerone ya ġinidi be garae keronama ya panidina. Yodibe ya kiroğī da na donkima ragane yai geru da yai doka nawena barekie, be dabudi ya rabena.³⁵ Naumeki da pomainama Samaria tauğominama Denari rabui ya ragaudi be bareki taurabenama ya ute be ya riuena da inam tauğominama sibo rabe kauena, be değoda mane nam teneğina, naumeki da taugu yà tava munağana rağanine tam yài maesimna.”

³⁶ Be Yesu tauğoma yai taravirena, “Be yodi nema kwa noğonoğota bake, uma banegidima rabuiteğā be değō baneginama taudanedenene a vunuvunuğina ewai turane?”³⁷ Dabudine tarawatu tauwai katakatainama ya paribee be ya riuna, “Aitau da inam tauğominama ya sagusaguna, inam tauna vutuna turanama.” Be Yesu ya riuena, “Tam kwa nağō be nama kwa voia watanana!”

Mata be Meri

³⁸ Yesu na tauwai muriwatanama mate a nağonağona Jerusalemma be kedae meagaie a tavatavana, dabudine waivi isanama Mata, tauna Yesu ya kokone da taudi vadae a sağana.³⁹ Be tauna tasinama isanama Meri, tauna Yesu kağane ya mia be na giuma yawai beavaiena.⁴⁰ Be Mata taunağā ya youyouvoa guratana, vutuna aubainama tauna Yesu ġarone ya verau be ya riuena, “Bada, tam kuya kataie bo ibewa da tasiguma ya gosegü be tauguğā yà youyouvoana. Kwa riue be e kaisagugu.”

⁴¹ Be Bada ya paribee be ya riuna, “O Mata, tam yaba matabudi kwawai nuaboyedi be taudi ta kawakawa nuarağarağamna.⁴² Be yaba tenağā yodi Meri ya vinena,

tauna vutuna ya vere kauana, be nam aitau tauna ġarone e kaipore.”

11

Moiragi waikatakatainama

(Mt 6:9-13; 7:7-11)

¹ Raġan tenaġa Yesu gabu ġesaune ya moimoiragina. Be ya moimoiragi kovina murine, na tauwai muriwatanama tenaġa ya riuna, “Bada, moiragi kwai kataimai da tauma nama sibo kē moiragina, maika Jon na tauwai muriwatanama yai katakataidina nama.” ² Yesu ya riuedina, “Raġanine ko moiragina, umanama ko riu:

Mamai, dobu matabuna isamma babaunama sibo a vivirena.

Tam am waibadama sibo ya verau.

³ Ama kanima raġan patapatanama sibo kuya utemai.

⁴ “Bada, ama gewagewama kwa noġota poredi maika tauma ama banagama ġaromiae gewagewa a voivoiedina ka noġonoġota poredina nama.

Be nam raurubue kwai dokemai.

⁵ Dabudine Yesu ya riuedina, “Deġoda tam aitau turamma risine kupi poune ku naġo be ku riuena, ‘Yau tura, buredi rabuiteġa kwa utegu, ⁶ baninama turaguma yodi vaġaie ya tava be taugu nam ġarogue aba da sibo ē ute.’ ⁷ Be turamma vada nopone i paribeem be i riuna, ‘Nam kwa taiġosoġosorigu, taugu yau sedama mate matakedu kē gudu be ka kenakenana, tokare nam aiyaba yà utem.’” ⁸ Dabudine Yesu ya riuna, “Taugu yà riuriuemina da turamma nam i goena da sibo ya midisuġu be kani ya utem. Be am waibaġa dobidoċima aubainama tauna tokare e midisuġu da kani e utemna.

⁹ “Vutuna aubainama yà riuriuemina, koi baġa be e utemina, ko wane be ko banavina, ko raupewapewa be ġaromie e kaiporena. ¹⁰ Baninama aitau ewai baġana, tokare e paġona, be aitau e wanewanena, tokare e banavina, be aitau e rarau pewapewana, tokare ġarone e kaiporena.

¹¹ “Nam ai gomana kani* i ġabegħabe be tamanama yeku i utena, ibewa. ¹² Be nam ai gomana pou i ġabegħabe be tamanama rikarikau i utena, ibewa. ¹³ Yodi uma ko noġoti, avedi da taumi banaga gewgewemima be yaġoro yaba veredima natunatumima ko uteutedina. Vutuna aubainama Tamemima marae tauna teneteneġinama da aitaugħa Arua Babau tawai baġena, tokare e utedina.”

* **11:11:** Gurik bonane ya riuna: Buredi. Buredi inam Jius adi kanima, maika tauda dà kanima kaire.

*Yesu be penama adi guyauma
(Mt 12:22-30; Mk 3:20-27)*

¹⁴ Yesu penama ya tavy dobiġena. Be uma peneminama banaga ya koku be ya miamiana tauna gumgum. Be inam penama tauġoma ya gosegosena raġanine, tauġoma giu yai kare munaġena, be banaga matabudi a basena. ¹⁵ Dabudine banaga ġesaudima a riuna, “Yesu tauna Belsebul isane penama e tavutavu dobiġedina. Be Belsebul tauna penama adi guyauma.” ¹⁶ Be banaga ġesaudima taudi Yesu raurubunama aubainama awai baġana da sibo mara matairinama ya voie be taudi sibo a kita be ai kawa riukaue da tauna naumeki Mamaitua ġaronama.

¹⁷ Be Yesu ya kataie da taudi aba awai nuanogoġotena, aubainama tauna umanama ya riuedina, “Deġo dobunama tenaġa e dariġa munaġena, tokare taunaġa e kawa gewagewa munaġena. Be deġo vadanama ei mia ġinanana, tokare taunaġa ei yamona munaġena. ¹⁸ Deġoda Seitan na banagama mate tai ġinana munaġedina, tauna tokare na waiguyauma e kawa gewagewa be nam ei rewapani. Umanama yà riuriuna, baninama taumi ko riuriuna da taugu kabe Belsebul isane penama è tavutavu dobiġedi. ¹⁹ Be deġoda taugu Belsebul isane, penama è tavutavu dobiġedina, naumeki da yodi taumi Parisi ami tauwai muriwatanama taudi aitau isane penama ta tavutavu dobiġedi? Taumi ami tauwai muriwatanama tawai maġatarana da taumi ko kaikaiyovuna! ²⁰ Be deġoda taugu Mamaitua nimarakurakune[†] penama yà tavutavu dobiġedina, inam anikitana Maitua na waiguyauma ġaromie ya tavana. ²¹ Deġoda banaga wairewapaninama ma madana na gabuma e bodabodamina, naumeki da na purapurama tokare ta kena kauana. ²² Be deġoda banaga wairewapani vavasaġinama e tava be inam baneginama e vunuġi be na madama na kaba waisumaġedima e ragaudina, inam raġanine banaga wairewapani vavasaġinama taubodama na purapurama e ragaudi be na banagama e soiedina.

²³ “Deġoda tauna aitau nam taugu mate, tauna inam taugu ewai ġavieguna. Be mate tauna aitau nam taugu mate kama noyanoya tenaġħana, tauna inam yau noyama e kawakawa gewagewana.

*Penama na kaba tava munaġama
(Mt 12:43-45)*

²⁴ “Be penama banaga e dobidobi porena raġanine, tauna dobu pokine e naġo be na kaba siperema gabunama e

[†] **11:20:** ‘Mamaitua nimarakurakunama’, baninama inam Arua Babau. Metiu 12:28 ko kitana.

wanena. Be değoda gabu nam e banavi, tauna tokare e riuna, ‘Taugu yà munağana yau vadae, dego e veraver-ae dabudi.’²⁵ Rağanine tauna e tava munağda vada kavakavanama, kawakawa verenama be waiwaisianama e kenakenana e kitana,²⁶ inam rağanine tauna e munağda be penama ġesaudima, matabudi 7 ei dokedina. Be inam pen-emidima a gewagewa vavasağana, nam maika noğone. Be taudi matabudi inam vadana nama nopone ta sağda be banaga nopone ta miana. Inam rağanine banaga na yawasanama e gewagewa vavasağana, nam maika noğone.”

Riukaua na wainuaverema

²⁷ Rağanine Yesu inam nama ya giugiuna maika, waivi patara nopolie bonanama dosine Yesu ya riuena, “Nuavere tauna aitau tam ya tikam be yai susumna.”²⁸ Be Yesu inam waivinama ya paribee be ya riuena, “Naumeki aba kuya riuena, be nuavere dosinama taudi aitaugā Mamaitua riunama ta vaivaie be ta voivoiena.”

Jona na matairama

(Mt 12:38-42; Mk 8:12)

²⁹ Be patara ya moramorabana rağanine, Yesu ya riuna, “Taumi uma kimtimima kimta gewegewemima. Taumi matairağā kitanama ko ġoeğøena, be nam tokare mataira ko kita da Jona na matairama taunağā tokare ko kitana.³⁰ Jona taunağā yai matairana Ninive aubaidima, teneğinama nama Banaga Natunama tokare ei matairana taumi kimtimima aubaimima.

³¹ “Etara rağanine dobu Saba guyaunama waivinama taumi kimtimima mate ko midisügu munağana rağanine, tauna tokare e riuna da taumi kimtimima sibo gienae koya nağona, baninama boni Saba guyaunama tauna dobu damone, be ya tavana, Solomon na nuauyauyama vaienama aubainama, be yodi uma dobudine banaga tenağā Solomon ya sağda porena be tauna na giuma nam komawai beavaiena.³² Etara rağanine Ninive meagainama banegidima taumi kimtimima mate ko midisügu munağana rağanine, taudi ta riuna da taumi kimtimima sibo gienae koya nağona, baninama boni Jona ya rarauguguyana, be Ninive banegidima a vaie be taudi noğota vitara a pağona, be yodi uma dobudine banaga tenağā Jona ya sağda porena, be tauna na giuma nam komawai beavaiena.

Tubuğā na kodamma

(Mt 5:15; 6:22-23)

³³ “Nam aitau kodam e gabu be e semo, bo tebo dibune e boru. Ibewa, tauna kodam ġavoe ei midiri da banaga ta

sagasağana ta kitana. ³⁴ Matamma inam tunimma na kodamma. Değoda matamma verenama, naumeki da tunimma matabuna yanayananama, be değoda matamma e gewagewana, naumeki da tunimma matabuna ei kupikupina. ³⁵ Be yodi kwa kita kaua da yana ġarome nam ei kupikupi. ³⁶ Değoda tam tunimma matabuna yanayananama, be nam tunimma aiyabinama ei kupikupi, naumeki da tunimma matabuna e yanana maika kabe kodam neneğarinama ġarome i yanayananana.”

Waisumaġa kaikaiyovudima

(Mt 23:1-36; Mk 12:38-40; Lk 20:45-47)

³⁷ Raġanine Yesu na giuma yawai kovina, Parisi tenaġa tauna ya kokonena na vadae kani aubaina. Naumeki da Yesu ya saġa da ya mia be ya kanikanina. ³⁸ Be Parisi tauna ya basena, baninama Yesu tauna nimanama nam i koġa be ya kanikanina. ³⁹ Be Yesu Parisi ya riuena, “Taumi Parisi raġan matabuna ami raudunema mataira kitekitedima kowai sumaqedi be kowai muriwatanedina,[‡] be taumi nopomima gewagewa ya moġavuna. Taumi maika keaka be tebo tauridima ko koġekoġedina be nopodie mira yaġoro ta kenakenana. ⁴⁰ Taumi koya bua kauana! Koya kataie bo ibewa da Mamaitua ġavoe be nopoe raudunedima tauna ya voiedina? ⁴¹ Taumi nopomima ko koġedi be ami yawasanama ko kawa didimanidina, yodibe yaba matabuna inam e verena.

⁴² “Taumi Parisi ko kita kaua! Baninama yaba matabuna koi rawadamdamdi da matabudi 10 be dam tenaġa Mamaitua ko uteutena, be kani anitai dinidima mate.[§] Be taumi banaga ġesaudima ġarodie nam komawai rabaraba kauana be Mamaitua nuemima nam ima paġopaġona. Taumi yaba matabudi sibo koya voiedina!

⁴³ “Taumi Parisi, ko kita kauana! Baninama sinagognopone gabu verediġa ko ġoġeoġedina, be taumi ko ġoġeoġena da debae banaga tai kaiwemina banaga dosidima maika.”

⁴⁴ Be Yesu uma wainasinama ya riuedina, “Taumi Parisi, gewagewa ġaromie! Baninama taumi maika kokoaga nam waimatairidi banaga nam ti kataie be debanaġa ta naġo yababa be adi yawasanama ta kawakawa gewegewedina.”

⁴⁵ Dabudine tarawatu tauwai katakatainama tenaġa Yesu ya riuena, “Tauwai katakatai, uma yabedima kwa giugiedina, tauma mate kwa biribiri dobiġemainā.” ⁴⁶ Be Yesu ya paribee be ya riuna, “Taumi tarawatu tauwai katakataidima,

[‡] **11:39:** Mataira ġavoe inam ‘religious signs’, maika raġan matabuna tà saġa be taparoroe tà voivoiana. [§] **11:42:** Jius adi kanima anitai dinidima inam yaba ġaūgaubodima maika buta.

taumi mate ko kita kauana! Baninama taumi banaga vita koi kiroğidi be ta kirokiroğā rereğedina, be taumi nam airağān koma sagusagu rubudina. ⁴⁷ Ko kita kauana! Baninama boni taumi wağewäğemima peroveta ai guridina, be taumi kowai aninedina. ⁴⁸ Taumi ko noğonögötina da aba wağewäğemima a voivoiedina, inam naumeki, baninama taudi peroveta a vunuğidi be taumi yodi adi kokoagama koi kitedi be kowai nuaverena. ⁴⁹ Vutuna aubainama Mamaitua na nuauyauyae ya riuna, ‘Taugu peroveta be apasol yà riuporağāna be ġesaudima tai guridina, be ġesaudima ta raukivigewegewedina.’

⁵⁰ “Rağan pakane da yodi banaga peroveta ai guridina be kosinidima a darorona aubainama, taumi kimtimima tokare kovoğā ko pağona. ⁵¹ Peroveta matabudi Eibol ya nağō da Sakaraias, tauna olta be tempol poudie ai guridina. Inam banegidima awai guridina kadi taiye naumeki da taumi tokare Mamaitua e kovoğimina, baninama peroveta awai guridina taumi kowai aninedina aubainama.

⁵² “Taumi tarawatu tauwai katakataidima, ko kita kauana! Baninama taumi riukaua kiğinama koya pağō be ko semosemona, vutuna aubainama taumi nam tokare marae ko nağō. Be banaga ġesaudima taudi marae nağonama ta ġoeğöena, be taumi ko gudugududina.”

⁵³ Dobudine Parisi be tarawatu tauwai katakataidima nuedima yai medi be bonedima bagibagine awai sinasinana, ⁵⁴ da Yesu aba giunama gewagewanama sibo ya vato be a vunuğina.

12

Yesu na tauwai muriwatanama ya riu wainoğotidi be ya duğudina

(Mt 10:26-31)

¹ Rağan ġaubonağā be patara ya morabana tausand bisanama be adi banagama mate awai vaguda munağana. Be Yesu na tauwai muriwatanama ġarodie giu yai kare da ya duğudi be ya riu wainoğotidina, “Ko rabe munağemi be nam Parisi adi kauama ko ruvedi. Taudi ta voivoiana kabe banaga veredi, be ibewa. Baninama taudi adi waikaikaiyovuma maika sida* ewai raudavudavuna. ² Be rağan e veraverauna e tavana, inam rağanine uma yabedima rupurupudima tokare ta mağatarana, be yaba semosemodima tokare banaga matabudi ta kataiedina. ³ Be aiyaba kupie ko giuedina, tokare banaga matabudi yanae ta vaiedina,

* **12:1:** Gurik nopone inam ‘leaven’. ‘Leaven’ maika sida, baninama ewai raudavudavu be e moramorabana.

be aiyaba turemima mate waimoisirie koi kasavena, tokare patare ta giue be banaga matabudi ta vaiena.

⁴ “Yau bana, taugu yà riuriuemina, banaga tubuğā taunağā tauwai gurinama nam ko nairedi, tokare nam aba ġesau ta voie. ⁵ Taugu yà riuriuemina da aitau ko nairena. Mamaitua ko nairena, baninama ko gurina murine, tauna değoda e ġoena, tauna rewapanā ġarone da tokare gienae e porağā nawemina. Vutuna aubainama yà riuriuemina da tauna taunağā ko naire!

⁶ “Kiu ġauğaubodima matabudi ⁵ maesidima 20 Toea. Be nam ai kiu tenağā Mamaitua nuanama i koana. ⁷ Avedi debavuvuğimima be inam matabudi Mamaitua ya sievidina. Vutuna aubainama nam ko naira, taumi noğotimima ya moraba kauana, nam kiu ġauğaubodima maika.

Yesu na matamatama
(Mt 10:19-20, 32-33; 12:32)

⁸ “Be yà riuriuemina da aitau taugu ei mağatariguna banaga matedie, naumeki da taugu tauna Mamaitua na aneama matedie yai mağatarina. ⁹ Be aitau taugu e bovieguna banaga matedie, naumeki taugu tauna Mamaitua na aneama matedie yà boviena. ¹⁰ Değoda aitau Banaga Natunama ġarone e riu viravirana, naumeki da taugu tokare yà noğota porena, değoda tauna noğotaporağā e ġoena. Be değoda aitau Arua Babau ġarone ei diboğana, avedi da tauna noğotaporağā e ġoeğöena, be taugu tokare nam yà noğota pore.

¹¹ “Taumi taugu kowai sumağeguna aubainama, değoda banaga ta verauğemina sinagog nopone etaremima aubainama, nam ko naira bo ko riuna, ‘Nema tà gudutara bako?’ ¹² baninama inam rağanine tokare Arua Babau tauna giu e utemi be nama ko giuna.”

Waiguyau baneginama buabuanama wainasinama

¹³ Banaga tenağā patara nopodie Yesu ya riuena, “Tauwai katakatai, tuağaguma kwa riue da tauna dosi gagasidima e soiedi da tauna be taugu.” ¹⁴ Be Yesu ya riuena, “Badam, tam aitau ya riuem da taugu ami purapurama soienama yài tarapiriedi?” ¹⁵ Be Yesu taudi ya riuedina, “Ko kita kaua da ġaromie nam purapura matabudi koi gogo, baninama taumi nam teneteneğina da inam purepuredie yawasana ko banavi!”

¹⁶ Dabudine Yesu uma wainasinama ya riuedina, “Rağan tenağā purapura baneginama na sipima ya maurana. ¹⁷ Be inam baneginama tauna ya noğota munağena, ‘Taugu yodi aba yà voie? Taugu yau gabuma nam teneteneğina da yau maurama yài damdi.’ ¹⁸ Dabudine tauna ya riuna, ‘Taugu è

kataienai yodi aba yà voienna. Yau kanima vadedima yà kati weidi be vada dosidiña yà keridi. Be dabudine yau maurama be yau purapura matabudi yài damdina. ¹⁹ Be dabudine taugu yà riu munağeguna, Ya vere kauana, yodi aba yài nuaboye? Taugu yabedima veredima matabudi è ăgoëgoedina yodi è ragaudina modi toitoi ruvedima. Yodi taugu yà sipere, yà kani, yà tego be yài nuaverena.'

²⁰ "Be Mamaitua ya riuena, 'Tam bua! Manaka kupine am yawasanama yà kaiporena, be aubaimma kuya vovo kaukauana tokare aitau e ragaudi?'

²¹ "Inam kauinama teneğinama nama tauna aitau dobue maurama ewai damna ăgarone e tubuğana, be tauna nam Mamaitua ăgarone na maurama imawai damna, ibewa."

Nam koi nuaboya

(Mt 6:19-21, 25-34)

²² Be Yesu na tauwai muriwatanama ya riuedina, "Taugu yà riuriuemina da nam tubuğimima na yawasanama aubainama koi nuaboya, aba sibo koya kani bo aba sibo koya kote tunimima aubainama. ²³ Baninama yawasana noğotinama inam ya moraba vavasağana, nam maika kani, be tunimima noğotinama inam ya moraba vavasağana, nam maika gara. ²⁴ Kiu gayogayo ko kitedi! Taudi nam tima sipisipina, be nam kani timawai damna. Be yağoro Mamaitua ewai kanidina. Be taumi noğotimima inam ya moraba vavasağana, nam maika kiu. ²⁵ Tam aitau da inam yabedima kwawai nuaboyedina, tokare kwa mia watana, bo? ²⁶ Be taumi değoda inam yabedima ăgauğaubodima nam teneteneğina da ko voiedi, naumeki da yaba ăgesaudima mate nam koi nuaboyedi!

²⁷ "Nanari dobire ta gogogogona ko kitedi. Taudi nam tima noyanoyana be gara nam tima voivoiedina. Be yà riuriuemina, avedi da guyau Solomon na garama veredima waimatakanikanidima, be nam ai gara tenağà i vere vavasağana nanari maika. ²⁸ Be yodi berana ta gogo be Mamaitua ewai garedina ko kitekitedina, be pomai kaie ta gabu gorudina. Teneğinama nama Mamaitua tokare teneteneğinama da taumi ei garemina! Taumi ami waisumağama ya ăgaubo kauana! ²⁹ Be mate kani be tego nam koi nuaboyedi! ³⁰ Dobu banegidima nam waiwaisumeğidi inam yabedima tawai nuaboyedina. Taumi Tamemima marae ya kataie da inam yabedima ko ăgoëgoedina. ³¹ Be taumi noğone Mamaitua na waiguyauma ko wane dokena. Yodibe tauna inam yabedima matabudi e utemina.

³² "Taumi inam taugu yau yosima damnama ăgaubonama, nam koi nuaboya, baninama Tamemima tokare na

waiguyauma e utemina. ³³ Ami purapurama ko raugimaredi be mane banaga waikaruwağewağedima ko utedina. Değoda nama ko voiana, tokare marae ami waiguyauma verevavasağinama ko pağona, be inam waiguyaunama nam airağan e kovi. Be nam aitau ami waiguyauma e danene bo kwarikwari ta kanidi. ³⁴ Baninama taumi ami waiguyauma vere vavasağıdima dego ta kenakenana, taumi ami noğotama be nuemima tabutabunama inam dabudine ta kenakenana.

*Ko vokaukaua be koi rabana Yesu aubainama
(Mt 24:45-51)*

³⁵ “Rağan matabuna ko vokaukaua wainonoğā da ami kodamma ko gabudi be koi rabana, ³⁶ maika taunoya adi badama soie[†] ya nağō be ta raberabena da e verau munağana, be rağanine e tava munağā be e raupewapewana taudi waiğapa ta dobi be matakedra ta kaiporena. ³⁷ Rağanine Bada e verau munağā be na taunoyama a vokaukaua be tauna a raberabena e kitedina, inam rağanine nuavere dosinama taunoya ġarodie. Taugu yà riuriu kauemina inam rağanine Bada na taunoyama e riuedi da taudi ta mia be tauna na taunoyama adi kanima e soiena. ³⁸ Inam rağanine, taunoya avedi da kenavauvae bo nobautuae, taudi yağoro a vokaukaua be tawai rabana. Be Bada e verau munağā da e kitana be na taunoyama a vokaukauana be awai rabana, inam rağanine naumeki da nuavere dosinama taudi ġarodie.

³⁹ “Uma ko noğoti, değoda vada taupakinama sibo tau-danene na kaba tavama rağaninama i kataiena, naumeki da tauna tokare na gaburama ya bodame be baneginama nam na vadae ya sağā be ya danene. ⁴⁰ Be taumi mate nama ko vokaukauana, baninama Banaga Natunama na verauma rağaninama taumi nam koma noğonogotina da tauna e tava, inam rağanine tauna e tavana.”

⁴¹ Be Pita yai taravira be ya riuna, “Bada, uma wainasina-ma taumağā aubaimaima kuya giue bo banaga ġesaudima mate?” ⁴² Be Yesu ya paribeena, “Aba è riuriuemina, yodi nema ko noğonogota bake? Aba taunoyanama waisumeğina be nuanuauyauyanama, da bada inam taunoyanama e vine be tauna na banagama ei badedi be adi kanima e soiena? ⁴³ Rağanine Bada e verau munağā be na taunoyama inam noyanama e voivoiena e kitana, naumeki da nuavere dosinama inam taunoyanama ġarone. ⁴⁴ Yà riuriu kauemina da tokare Bada inam taunoyanama e vine da Bada na purapurama matabudi ei badedina. ⁴⁵ Be değoda taunoya tauname e riu munağē be e riuna, ‘Yau Badama bonika

[†] **12:36:** Yesu ya riuna: ‘Wainagi soinama’, baninama Israel nopone wainağı soinama ya dau kauana, be nam aitau I kataiena da airağan soi e kovi.

dego ya nañona be nam ima veraverau munañana.' Inam rañanine tauna na banagama gesaudima riñedima ei karena, dabudine tauna e kanikani be e tegotego koakoa be e tego buana. ⁴⁶ Inam rañanine taunoya e miamia nuababaña be Bada e verauna rañanine, tauna e dourakaraka be banaga nam waiwaisumegidi ñarodie e boru nawena. ⁴⁷ Be taunoya Bada na ñoanama ya kataiena, be nam i vokaukauana bo Bada na ñoanama nam i voivoiena, naumeiki da tauna tokare kovoña dosinama e pañona.

⁴⁸ "Be degoda taunoya aitau Bada na ñoanama nam i kataiena be aba ya voia waigewana, tauna tokare kovoña ñaubonama e pañona. Degoda Mamaitua banaga yaba toitoi ya uteutena, tauna tokare inam baneginama ñarone yaba toitoi e ragaudina. Be Mamaitua banaga aitau yaba toitoi nimane ya biridi be e raberabedina, naumeiki da inam baneginama yaba toitoi Mamaitua e ute munañena.

Yesu kana taiye dariña e tubuñana
(Mt 10:34-36)

⁴⁹ "Taugu è yovona kai karakaratinama dobue è yovoñena, be yà noñonoñotina da kainama kaiteka e karatina. ⁵⁰ Taugu tokare babataito[‡] bagibaginama yà pañona, be ma nuaboyagu naumeiki da yà raudamoena. ⁵¹ Taumi ko noñonoñoti da taugu dobue è yovona suba è yovoñe, bo? Ibewa, nam suba be dariña. ⁵² Yodi be nokoi e nañona vada tenaña nopone banaga 5 tai kawa dariña munañana. Banaga rabuiteña rabui mate tai sañasañana, be banaga rabui rabuiteña mate tai sañasañana. ⁵³ Tametamedima, natunatudima tautauñomidima mate tai sañasañana, be natunatudima tautauñomidima, tametamedima mate tai sañasañana, be tinetinedima, natunatudima waiwaividima mate tai sañasañana, be natunatudima waiwaividima, tinetinedima mate tai sañasañana. Be rawanama visara mate tai sañasañana, be visara rawanama mate tai sañasañana."

Yodi rañanine matairidima
(Mt 16:2-3)

⁵⁴ Be Yesu banaga ya riuedina, "Taumi giyou ko kita be egasiña e nañonañona, inam rañanine ko riuriuna, 'Yodi kusana e ñogona', be nama e tubutubuñana. ⁵⁵ Be degoda sive oyaña e yovoyovona, inam ko riuriuna, 'Yodi komra e

[‡] **12:50:** Uma babataitonama, baninama Yesu ya gurigurina ya guiena.

tomna', be nama e tubutubuğana. ⁵⁶ Taumi banaga kaikaiyovumima! Taumi mataira gunume be dobue kitawairuvedima koya kataiena. Be aba aubaina yodi rağandima matairidima kitawairuvedima nam koma siasiava kauedi?

*Am gewagewama kwa kawa didimani dokena
(Mt 5:25-26)*

⁵⁷ "Taumi koi tarapiri munağemi da değō tauna didimana be riukaua. ⁵⁸ Değoda banaga tam e panim be e nawemna etara aubainama, naumeki da kedae kwa raurubu da am gewagewama kwa kawa didimana dokena. Inam rağanine nam etara tauwai badenama e riuem be dibure kwa na gó. ⁵⁹ Taugu yà riuriuemna da tam tokare nam dibura kwa dobi pore naumeki da Toea damonama kwa kaiğavutina."

13

Nuenuemima nam ko vitaredi, tokare ko gurina

¹ Inam rağanine banaga aitaúga dabudi a tavatavana, taudi Yesu ğarone ai mağatarana da Galili provins banegidima gesaudima taudi musare Mamaitua ğarone a rarau puyona maika, Paelat na tauığarama inam banegidima ai guridina.

² Be Yesu ya riuedina, "Taumi ko noğonoğotina da inam banegidima nama ai nuatoitoi be a gurina adi gewagewama ya moraba kaua, nam banaga gesaudima maika, bo? ³ Ibewa, nam nama. Yà riuriuemina da nuemima nam ko vitaredi, taumi matabumi tokare nama ko gurina. ⁴ Bo banaga matabudi 18 ko noğotidi, taudi rağanine Siloamma be vada debedie ya beku be yai guridina. Taumi ko noğonoğotina da noa banegidima nama a gurina adi gewagewama ya moraba kaua, nam maika banaga gesaudima Jerusalemma nama, bo?

⁵ Ibewa, nam nama. Yà riuriuemina da nuemima nam ko vitaredi, taumi matabumi tokare nama ko gurina."

Damaya nam votavotana wainasinama

⁶ Dabudine Yesu uma wainasinama ya riuedina, "Tauğoma tenağna sipie damaya ya midimidina. Be inam tauğominama ya nağona damaya banidima aubaidima, be nam i banavidina. ⁷ Vutuna aubainama tauna sipi taurabenama ya riuena, 'Taugu modi rabuiteğə nopodie èi veraverauna damaya banidima wanedima aubainama, be nam airağan banidima e banavidina. Vutuna aubainama kwa tarağça pore! Aba aubainama doğa ewai yakare?'

⁸ "Be sipi taurabenama ya riuna, 'Bada, kwa gosepore da modi tenağna nopone taugu yà keri dobona. ⁹ Be değoda modi gesau nopone e banina, inam naumeki. Be ibewa, naumeki da kwa tarağça porena.'

Yesu Sabat rağanine waivi yai yawasanina

¹⁰ Sabat rağanine Yesu sinagog tenağā nōpone yawai katakataina. ¹¹ Be inam dabudine waivi tenağā nōpone penama ya sağā be ya voie da tauna ya sida kauana modi 18 a kovina, be nam teneteneğīna da sibo ya didimana munağā. ¹² Rağanine Yesu inam waivinama ya kitakitana, tauna ya riue da ġarone ya tava be ya riuena, “Waivi, yodi am sidama ya kovina.” ¹³ Naumeki da Yesu nimanama waivi debane ya boru be yai rağantenağē da waivi ya didimana munağā be Mamaitua isanama ya kaisuğuna.

¹⁴ Be sinagog taurabenama nuanama yai medi kauana, baninama Yesu tauna Sabat rağanine banaga yai yawasanina. Dabudine sinagog taurabenama banaga ya riuedina, “Rağan matabudi 6 ta kenakenana, inam noya na rağonima. Inam rağandie ko verauna waiyawasana aubainama be nam Sabat rağanine!”

¹⁵ Be Yesu tauna ya paribee be ya riuna, “Taumi kaikaiyovumima! Matabumi Sabat rağandie ami yosima nam komawai kanidi, bo?* ¹⁶ Be uma waivinama Eibraham natunama, be Seitan ya pani be ya rabena modi 18 a kovina. Be yodi aba aubainama Sabat rağanine nam sibo èi yawasani?” ¹⁷ Inam nama ya riuriuna rağanine, na ġaviamma banegidima debedima ya suba kauana. Be banaga ġesaudima nuedima ya vere kauana, baninama tauna yaba matabudi veredima ya voivoiedina aubainama.

Yauğana pesinama be yist wainasinama

(Mt 13:31-32; Mk 4:30-32)

¹⁸ Yesu ya riuna, “Mamaitua na waiguyauma nema maika kitana? Nema yài tarapata bake da taumi ko kataie? ¹⁹ Inam maika pesi ġaubonama† banaga ya pağō be na sipie ya kuma be ya gogo ya moraba da kai dosinama ya tubuğana. Be kiu a verau be ragane a raraugnoğina.”

²⁰ Be Yesu ya riu munağana, “Mamaitua na waiguyauma nema maika kitana? Nema yài tarapata bake da taumi ko kataie? ²¹ Inam maika yist waivi ya pağō, parawa toitoi nopolie ya biridi, da ya gwada be parawa ya sasanana.”

Matakeda ġuririnama

(Mt 7:13-14, 21-23)

²² Yesu tauna Jerusalemma ya nağonağona, be kedae meagaiğā banaga yawai katakataidina. ²³ Be banaga tenağā Yesu

* **13:15:** Bo: Taumi matabumi Sabat rağandie ami oks bo donki ko kuvesidi be upae ko nawedi be kowai tegodina. † **13:19:** Gurik bonane ya riuna: Gaga pesinama. Be inam gaga ġesau, tauna kai, nam taitai.

yai taravirena, “Bada, inam riukaua da banaga raubisaā tokare ta yawasana, bo?”

Be Bada ya riuedina,²⁴ “Ko kaivavasaāge da matakedā ġuririne ko sonaāgħana, baninama banaga toitoi ta rarau rubuna da ta sonaāgħana, be tokare nam teneteneġina.²⁵ Baninama raġanine vada taupakinama e midisūg be matakedā e guduna, dabudine taumi doğae ko midi be matakedae ko raupewapewa be ko riuna, ‘Bada, matakedā aubaimaima kwa kaipore.’ Be tauna tokare umanama e paribeemina, ‘Taugu nam taumi e kataiemina. Taumi aikdedae be koya tava?’²⁶ Dabudine taumi ko riuna, ‘Bada, tauma tam mate tè kanikani be tè tegotegona, be ama meagaiġa kuyawai katakatai naġona.’²⁷ Be tauna e riu munaġemina, ‘Kaite naumeki è riuemina. Taugu nam taumi e kataiemina. Taumi aikdedae be koya tava? Ko naġo ġavoe! Taumi nam uma dabudine ko saāga, gewagewa tauvoienama.’

²⁸ “Dabudine taumi ko ġaba gurata be gadigadimima ko sanadididina. Be dabudine taumi tokare Eibrahim, Aisik, Jeikob be peroveta matabudi Mamaitua na waiguyauma nōpone ta soisoina ko kitedina, be taumi tokare Mamaitua ei poraġa dobiġemina.²⁹ Be Banaga dobu matabuna nōpone tokare ta verauna, Mamaitua na waiguyauma nōpone ta mia be Mamaitua na soima ta kanina.³⁰ Naumeki da yodi ko kita, aitauġa yodi ta dokadokana, taudi tokare tai murina, be aitauġa yodi tawai murina, taudi tokare ta dokana.”

*Yesu Jerusalem ewai nuaboyena
(Mt 23:37-39)*

³¹ Inam raġaninama teneġine Parisi a verau Yesu ġarone be a riuena, “Tam uma dobunama kwa dobi pore be kwa naġona wari kedae, baninama guyau Herod e ġoegħoena ei gurimna.”³² Be Yesu umanama ya paribeedina, “Ko naġo be inam dakonama ko riuena, taugu manaka be pomai penama banaga nōpodie yai dobidina, be banaga sidesidedima yai yawasanidina, be mainokomġo yau raġonima e kovina.³³ Be yodi taugu naumeki da yau noyama yà voiedina, manaka, pomai, be mainokomġo mate, baninama nam i verena da peroveta wari kedae e guri, ibewa da Jerusalemġa nōpone.

³⁴ “O Jerusalem, Jerusalem! Taumi peroveta kowai guridina. Mamaitua banaga e riuriu poraġana ġaromie, be taumi ko rarau yekudina! Raġan ya toi kauana taugu è raurubu da è rawateġteġeimina kamkam natunatunama mapenama dibune e rawarawa teġeidina maika, be taumi nam ko ġoena.³⁵ Vutuna aubainama Mamaitua ami tempolma e goseña. Be taugu yà riuriuemina taumi nam ko kita munaġegu,

naumeki da rağan e veraverauna e tavana, inam rağanine taumi tokare umanama ko riuna, ‘Isanama tà kaisuğu, tauna vutuna Bada isane e veraverauna!’ ”

14

Yesu Parisi na vadae tauğoma yai yawasanina

¹ Sabat tenağä Yesu ya nağona Parisi dosinama na vadae kani aubainama, be banaga tauna a kitakita watanina, ² baninama Yesu noğonama yauwanine tauğoma kağanama be nimanama sasasanidima ya miamiana. ³ Be Yesu Parisi be tarawatu tauwai katakataidima yai taraviredina, “Inam naumeki bo ibewa da Sabat rağanine banaga tài yawasanina?” ⁴ Be taudi nam aba ti riuena. Naumeki da Yesu inam tauğominama ya taukonî da yai yawasani be ya riupore nawena. ⁵ Dabudine Yesu inam banegidima ya riuedina, “Tam aitau tenağä natum bo am kauma kaikaivainama Sabat rağanine dome i kuruvana, tam Sabat rağanine aubainama tokare nam kuya soru tavaite, bo?” ⁶ Be taudi nam teneteneğina da tauna sibo a paribee.

Ğaubomunağä waikatakatainama

⁷ Rağanine Yesu e kitana be ware gabu verediğä a vinevine-dina, tauna uma wainasinama ya riuedina, ⁸ “Rağanine aitau soie e kokonemna, nam kwa nağö be guni poune kwa mia! Baninama değoda banaga ġesaunama ya kokonena ya sağä vavasağña nam maika tam e veraverauna e tavana. ⁹ Inam rağanine taupaka tokare tam e riuemna, ‘Kwa nağö ġavoe, inam banaga dosinama na gabuma.’ Dabudine tam kwa tunimayağä be doğae kwa dobina.

¹⁰ “Vutuna aubainama rağanine aitau soie e kokonemna, naumeki da kwa nağö be doğae kwa miana! Be taukokonemma e riuemna, ‘Yau tura, kwa sağä guni poune kwa mia!’ Inam rağanine tam tokare ta kawa sağemna. ¹¹ Baninama aitauğä ta kawakawa sağe munağedina, taudi tokare e biri dobiğedina. Be aitauğä ta biribirî dobiğä munağedina, taudi tokare e kawa sağedina.”

¹² Dabudine Yesu taupaka ya riuena, “Tam kani kwa vokaukauena rağanine, nam am banagama bo tuatuağamma, am damma bo am banagama waiguyaudima kwa kokonedi, avedi, baninama taudi tokare tam ta kokonağaremna. ¹³ Be tam kani kwa vokaukauena rağanine, banaga waikaruwağewağedima be nuakududima be tuera ragaragaudima be matapotepotedima, taudi kwa kokonedina. ¹⁴ Inam rağanine tam nuavere dosinama kwa pağona, baninama taudi nam aba ġarodie da ta

kokonağarem. Be didimana banegidima guriguridima ta midimidisuğu munağana rağanine, Mamaitua tam ei maesimna.”

*Soi dosinama wainasinama
(Mt 22:1-10)*

¹⁵ Dabudine tauğoma tenağä Yesu mate a mia da a kanikanna, nama giunama e vaiena be tauna Yesu ya riuena, “Nuavere taudi aitaüğä Mamaitua na waiguyauma nopone ta mia tenağä be ta kanina.”

¹⁶ Be Yesu tauna ya riuena, “Rağan tenağä banaga tenağä ya soisoina, be soinama nopone banaga toitoi ya kokonedina. ¹⁷ Rağanine soi ya vokaukaue ya kovina, da na taunoyama ya riupore da na warema riuedima aubainama. Be taunoya ware ya riuedina, ‘Ko verau! Yaba matabudi kè vokaukaua rovodina.’ ¹⁸ Be ware matabudi a raugudutarağä da kabe adi noyama ti kenakena. Ware dokadokanama ya riuna, ‘O ebom, taugu yodi ġoma yau doğama è gimeri be ya nağonağona kitnama aubainama. Tokare nam ya verau!’ ¹⁹ Be ġesaunama ya riuna, ‘O ebom, taugu yau kauma kaikaivaidima 10 è gimara be yodi ya nağonağona ya raurubudina, aubainama da nam ya verau.’ ²⁰ Be waiğesaunama ya riuna, ‘O ebom, taugu yodi ġoma èi nağina, vutuna aubainama da nam ya verau.’

²¹ “Dabudine taunoya ya munağä be riudima matabudi na badama ġarone yai mağtaridina. Naumeiki be na badama nuanama yai medi kaua be na taunoyama ya riuena, ‘Kwa nağ makai meagai dosinama nopone keda dosidie be kedasorağä be banaga waikaruwağewağedima be banaga tunidima nuakududima be tuera ragaragaudima be mat-apotepotedima taudi kwai doka verauğedina.’ ²² Naumeiki da, taunoya yaba matabudi ya voia kovidi be ya riuna, ‘Bada yaba matabuna kuya riuriueguna è voiedina, be yağoro gabu e kenakenana.’ ²³ Be bada na taunoyama ya riuena, ‘Kwa nağ diadiağä be banaga kwa segeridi be ta verau da yau vadama tai moğavuna!’ ²⁴ Taugu ya riuriuemina da taudi aitaüğä noğone è kokonedi be a gudugudu tarana nam aitau tenağä yau soima kaninama e sanarubu.”

*Yesu waimuriwatanenama na giuma
(Mt 10:37-38)*

²⁵ Inam rağanine patara dosinama Yesu mate a nağonağona. Be tauna yai tautinamuri ġarodie be ya riuedina, ²⁶ “Değoda aitau waimuriwataneguma e ġoena, inam naumeiki, be değoda tamanama, tinanama, na waivima, natunatunama, tuatuağanama, tasitasinama, nuvunuvunama bo tauname na yawasanama ei nuapağō

guratedina, nam maika taugu, tauna nam teneteneğina da taugu yau tauwai muriwatana. ²⁷ Be değoda aitau nam na korosima e kiroğī* be ei muriwatane, tauna nam teneteneğina da taugu yau tauwai muriwatana.

²⁸ “Değoda tam aitau vada dosinama kerinama kwai nuanoğonoğotena, noğone tam kwa mia be kwa kita da mane teneteneğinama, naumeki da vada kwa kerina. ²⁹ Baninama değoda vada pakanama kerinama kwai karena be nam teneteneğina da kwai kovi, inam rağanine banaga matabuna tokare vada ta kita be ta kwatevem ³⁰ be ta riuna, ‘Uma baneginama vada kerinama yai karena, be nam teneteneğina da ei kovi.’

³¹ “Bo değoda guyau tenağā, na tauığarama 10 tausand mate muriğā da ta nağona iğara aubainama, tauna noğone e mia be ei nuanoğonoğota da tauna teneteneğina bo ibewa da guyau ġesau na tauığarama 20 tausand mate tai iğara. ³² Be değoda e noğoti be nam teneteneğina, naumeki da taudi madanie be banaga e riuporedina guyau ġesau ġarone suba waibağenama aubainama. ³³ Inam kauinama teneğinama nama tam aitau am ġoanama matabudi nam kwa gosağā, tam nam teneteneğim da yau tauwai muriwatana.

(Mt 5:13; Mk 9:50)

³⁴ “Buta inam yaba verenama. Be değoda buta dininama e gewagewana,[†] tokare nema kwa voia bake da e dini munağā? ³⁵ Inam butanama nam sipi bo mui waidamnama mate tai rawateğei be teneteneğina,[‡] ibewa, inam butanama nam na noyama aba, tokare banaga ta pore kaiyatina. Değoda beemima ta kenakenana, naumeki da koi beavaia kauana.”

15

Sipu kwakokwakonama wainasinama

(Mt 18:12-14)

¹ Dabudine teks tautamina be gewagewa banegidima ġesaudima mate Yesu waibeavienama a tavana. ² Be Parisi be tarawatu tauwai katakataidima momodu ai kare be a riuna, “Uma baneginama ko kita, tauna banaga gewegewedima ei aninedi be mate ta kanikanina.”

* **14:27:** Korosi kiroğinama inam kwai nuatoitoina, maika Yesu korosie yai nuatoitoina. † **14:34:** Anikunee banaga ġesaudima mane dosinama pağonama a ġoena aubainama, buta gimori mate ai rawateğeidina, vutuna aubainama buta ya gewagewana. Değoda tauda tà ġoena maika buta verenama, naumeki da tauda dà yawasanama nam tài mira. ‡ **14:35:** Jius banegidima buta sipie ta boruboruna, sipi ta gogo kauana aubainama. Be mui waidamne mate ta boruboruna da mui e bova kaua da muriğā sipie ta boruna aubainama.

³ Vutuna aubainama Yesu uma wainasinama ya riuedina,
⁴ “Değoda tam aitau am sipuma 100 be tenağɑ i kwakona, tam tokare aba sibo kuya voie? Tam tokare sipu 99 gabu verene kwa gosağɑ be kwa nağɑ da tenağɑ kwa wanena, be kwa banavi da naumeki. ⁵ Be kwa banavina rağanine, tam ma nuavereverem ragame kwa boru ⁶ be kwa kiroğɑ nawe munağena am vadae. Be dabudine am banagama kwa riu gogonidi be kwa riuedina, ‘Tài nuavere tenağana, baninama yau sipuma ya kwako be è banavi munağena.’ ⁷ Yà riuriuemina da uma kauinama teneğinama nama marae, değoda banaga gewagewanama tenağɑ na noğotama e vitarena, tauna debane tokare nuavere dosinama e tubuğana. Be nam banaga 99 maika, taudi noğota vitara nam tima ġoeğöena, baninama taudi ta noğonogötina da kabe banaga didimanidi.

Sirin taitaikuruvinama wainasinama

⁸ “Bo waivi tenağɑ ġarone sirin matabudi 10. Be değoda tenağɑ i taikuruvina, tauna tokare aba sibo ya voie? Tauna kodam ya gabu, be vada ya rauğiriğiri be yai wanawana kauana, ya banavi da naumeki. ⁹ Be ya banavina rağanine, na banagama ya riu gogonidi be ya riuedina, ‘Tài nuavere tenağana, baninama yau sirinma taitaikuruvinama è banava munağena.’ ¹⁰ Yà riuriuemina da uma kauinama teneğinama nama değoda gewagewa baneginama tenağɑ na noğotama e vitaredina, tokare Mamaitua na aneama tai nuavere kauana.”

Tauğoma kwakokwakonama wainasinama

¹¹ Yesu na giumenta ya kaiwatani be ya riuna, “Tauğoma tenağɑ be natunatunama tautauğomidima rabui. ¹² Be tauğoma natunama tautasinama tauna tamanama ya riuena, ‘Mamai, taugu yau sikerema kwa utegu.’ Naumeki da tamanama mane ya sikeredi da tauna na sikerema ya utena.

¹³ “Naumeki da rağan ġaubonağɑ be gomana tautasinama na sikerema ya ragaudi be ya nağona wari dobue. Be dabudine bua na miae ya mia be na sikerema matabuna yai yakaredina. ¹⁴ Rağanine na sikerema matabuna yai kovina murine, inam dobunama meiğara rağaninama ya tavana, be tauna wainuatoitoi yai karena. ¹⁵ Vutuna aubainama tauna ya nağona inam dobunama baneginama ġarone noya aubainama. Naumeki da dobunama baneginama tauna ya riupore nawena na bawama rabedima aubainama. ¹⁶ Dabudine tauğoma kani ya karati be bawa adi kanima sibo ya kanina, be yosi taupakinama nam i aninena.

¹⁷ “Inam rağanine tauğoma noğota debane ya sağasağana, be tauna ya riuna, ‘Tamaguma ġarone taunoya toitoi be taudi

garodie kani ya toi vavasağana, be nam tima kanikani rovodina, be taugu uma dabudi yà miamia kanigurina. ¹⁸ Taugu yà midisügu be yà munağana tamaguma ġarone be yà riuena: Mamai, taugu gewagewa è voiena Mamaitua ġarone be tam ġarome. ¹⁹ Taugu nam teneteneğigu da ta riueguna tam natum; be kwa voiegu da maika am taunoyama tenağā.'

²⁰ "Dabudine tauğoma ya midisügu be ya munağana tamanama ġarone. Tauna yağoro madanie be tamanama yawai kita da gomana ya kita be nuanama yai poya kauana. Naumeki da tauna ya manini natunama ġarone da natunama ya tika be yai suruvena. ²¹ Be natunama tamanama ya riuena, 'Mamai, taugu gewagewa è voiena Mamaitua ġarone, be tam ġarome. Taugu nam teneteneğigu da ta riueguna tam natum.'

²² "Be tamanama na taunoyama ya riuedina, 'Waiğapa ko nağó be gara verenama ko pağó be natuguma koi garana. Be rin nimane ko boru be kağasuma kağane ko boruna. ²³ Kau natunama momomoninama koi guri da tà soi be tài nuaverena. ²⁴ Baninama uma natuguma tauna ya gurina, be yodi ya yawasana munağana, tauna ya kwakona, be yodi è banavi munağena.' Naumeki da soi ai karena.

²⁵ "Inam rağanine gomana tautuağā tauna yağoro sipie. Be tauna ya munamunağana vadae. Be tauna vada diane ya tava da e vaiena be banaga a saresare be a bigabigana. ²⁶ Naumeki da taunoya tenağā ya yokoe be yai taravirena, 'Aba e tubutubuğā?' ²⁷ Be taunoya ya riuna, 'Tasimma ya tava munağana, aubainama tamamma kau natunama momomoninama yai gurina. Baninama natunama ya banavi munağena aubainama, be nam aba gewagewanama i banavina.'

²⁸ "Dabudine gomana tautuağā nuanama yai medi kaua be nam vadae nağonama i ġoena. Vutuna aubainama tamanama ya dobi be ya riuwai nuabigabigana. ²⁹ Be tauna tamanama ya riuena, 'Kwa kita, taugu suara toitoi aubaimma è noya guratana be nam airağan, am riuma è rawağaiğaiena. Be taugu nam airağan musara ġaubonama* ku ute rubugu da yau banagama mate kei nuaverena, ³⁰ be natumma inam am mane be yaba matabuna yai yakaredina toretore waiwaividima ġarodie. Be yodi ya tavatava munağana tam kau natunama momomoninama tauna aubainama kuyai gurina.'

³¹ "Be tamanama ya riuna, 'Taukui, tam rağan matabuna taugu mate tà miamiana, be yaba matabuna taugu ġaroguma, inam tam ġaromma. ³² Be yodi inam ya verena da

* 15:29: Gurik bonane ya riuna: 'Goat ġaubonama'

tauda tà soi be tài nuaverena, baninama tasimma ya guri, be yodi ya yawasana munağana. Tauna ya kwakona, be yodi è banava munağena.”

16

Stoa taurabenama kaikaiyovunama wainasinama

¹ Yesu na tauwai muriwatanama ya riuedina, “Stoa tau-pakinama ġarone stoa taurabenama ya miamiana. Be banaga stoa taupakinama a riuena da tauna na stoama taurabenama mane ya danedanenedina. ² Dabudine stoa taupakinama yodi stoa taurabenama ya yokoe be ya riuena, ‘Inam aba giunama ġarome è vaie? Am noyama kuya voivoiena yà kita. Tam nam airaġan yau stoama kwa rabe munaġe.’

³ “Be stoa taurabenama taunaġa ya riu munaġena, ‘Aba yodi yà voie, bada yau noyama ya kaiporena aubainama? Taugu nam wairewapanigu da noya dosinama yà voiedi, be banaga kiġiedima taugu è tunimayaġana. ⁴ Yodi è kataiena aba yà voie da banaga ġesaudima ta rabeguna yau noyama e kovikovina raġanine.’

⁵ “Naumeki da stoa taurabenama banaga aitauġa stoe awai bukinna banegidima ya riuedi da ġarone a tavana. Be dokadokanama ya riuena, ‘Am bukinma bisa yau badama ġarone?’ ⁶ Be tauna ya paribeena, ‘Oeri duramdim 100.’ Be stoa taurabenama ya riuena, ‘Am bukinma pepanama kwa paġo, be kwa girumina 50.’ ⁷ Be murine ġesau ya riuena, ‘Tam, am bukinma bisa yau badama ġarone?’ Be tauna ya riuna, ‘Wit begidima 1 tausand.’ Be stoa taurabenama ya riuena, ‘Am bukinma pepanama kwa paġo be kwa girumina 800.’

⁸ “Be stoa taupakinama tauna na stoama taurabenama kaikaiyovunama ya basena, baninama stoa taurabenama na nuauyauyae na yawasanama kedanama ya voivoiena aubainama.” Be Yesu ya riuna, “Uma dobunama natunatunama mane mate waitureninama a katai kauena, nam yana natunatunama maika, ⁹ vutuna aubainama yà riuriuemina, banaga ġesaudima manee gewagewa ta voivoiedina, be taumi ami manee banaga ko sagudi da bada ta banavina. Inam taudi taumi ami banagama, be tokare mane e kovina raġanine, taumi marae tai aninemina.

¹⁰ “Deġoda tam yaba ġaġaubodie be vere kwa voiedina, naumeki da tam teneteneġinama tokare yaba dosidie vere kwa voiedina. Be deġoda tam yaba ġaġaubodie nam vere kwa voiedi, naumeki da tam tokare nam teneteneġina da yaba dosidie vere kwa voiedi. ¹¹ Deġoda taumi dobu

yabedima nam ko rabe kauedi, naumeki da taumi tokare Mamaitua nam ei sumaġemi be mara yabedima e utemi. 12 Be deġoda taumi banaga ġesaudima adi purapurama nam ko rabe kauedi, naumeki da taumi tokare Mamaitua nam ei sumaġemi be purapura e utemi.

13 “Nam ai taunoya teneteneġina da babada rabui ġarodie ei yaraga. Deġoda e ġoena, naumeki da noġone badanama e tuaġiae be murine badanama e ġoena, bo noġone badanama e ġoena, murine badanama e tuaġaiena. Taumi nam mane be Mamaitua ġarodie koi yaraga tenaġa!”

*Mousis na tarawatuma be Yesu riunama
(Mt 11:12-13; 5:18, 31-32; Mk 10:11-12)*

14 Raġanine Parisi uma riudima a vaivaledina, taudi Yesu ai kwatekwatevena, baninama mane nuedima ya paġona aubainama. 15 Be Yesu taudi ya riuedina, “Taumi banaga matedie ko voivoia munaġemina da kabe veremi, be Mamaitua taumi nuemima noponama ya kataiena. Yaba banaga e noġonogħotina da kabe yaba dosidi, be inam yabedima Mamaitua matane a gewagewa vavasaġana.

16 “Noġone taumi Mousis na tarawatuma be peroveta adi girumama ġarromie a kenakenana. Raġanine Jon tauwai babbataito ya tavatavana, dabudine taudi adi raġanima ya kovina. Be dabudine vari verenama Mamaitua na waiguyauma riunama yà rarauguguyena. Be banaga matabudi ta raraugrubuna da Mamaitua na waiguyauma nopone sibo a saġana. 17 Mara be dobu teneteneġinama da ta samoana, be Mamaitua na tarawatuma, avedi da ġaubaġominama be tokare nam e samoan.

18 “Aitau na visarama e gose be waivi ġesaunama e naġina, tauna na waivima debane mui e poreporena. Be dego tauġominama na waivima e tuaġiae be e gosena, be wari tauġoma inam waivinama e naġina, tauna turanama debane mui e poreporena.”

Purapura baneginama be Lasares

19 Be Yesu ya riuna, “Raġan tenaġa purapura baneginama tauna na garama waimatakanikanidima ya kotekotedina maesidima dosidima. Be vada maesadonanama nopone ya miamiana. Be dabudine na purapurama damnama a kenakenana. Be tauna raġan matabuna yawai nuaverena.

20 Be na vadama matakedane taukiġikīgi wainuatoitoinama ya kenakenana, tauna isanama Lasares. Be tauna tuninama kerokero ya moġavuna. 21 Be Lasares tauna ya kena be yawai noġotana da purapura baneginama na kanima kurekuredima sibo ya kanidina. Be daġġadāġasi a tavana da keronama a remoremodina. 22 Naumeki da raġan tenaġa Lasares ya guri

be anea a kiroğā nawe da Eibraham diane ya miana. Murine purapura baneginama ya guri be a dobona. ²³ Be banaga guriguridima aruidima adi gabue tauna ma tunimuyana ya miamiana. Be ei kitasağāna be madanie Eibraham be diane Lasares ya miamiana ya kitedina.

²⁴ “Dabudine ya yokona, ‘Mamai Eibraham, kwa raunuatoiegū be Lasares kwa riupore da upa nimarakurakune ei buta be e yovo da menaguma ei subana, baninama taugu yàwai nuatoitoina uma kai menamenane.’

²⁵ “Be Eibraham ya riuna, ‘Natuguma, tam am rağanie kwa noğoti! Yaba matabudi vereveredima tam ġarome, be Lasares tauna yaba matabuna ya marumaruabiedina. Vutuna aubainama yodi Lasares nuanuanama e subasubana, be tam kwawai nuatoitoina. ²⁶ Be yaba ġesaudima mate inam, tam be tauma poude siġuġu dosinama e kenakenana. Vutuna aubainama banaga ġarome veraunama ta ġoēgoena be nam teneteneğina. Be kauinama teneğinama nama banaga tauma ġaromaie veraunama ta ġoēgoena be nam teneteneğina.’

²⁷ “Naumeki da purapura baneginama ya riuna, ‘Inam naumeki mamai, be yàwai bağamna da Lasares kwa riupore nawena tamaguma na vadae ²⁸ da tasitasiguma 5 nuedima e boru da taudi nam uma tunimuya dosi kaukauinama gabune ta verau, maika taugu.’

²⁹ “Be Eibraham ya riuna, ‘Tasitasimma taudi Mousis be peroveta riudima ġarodie da tai beavaiedina.’

³⁰ “Be purapura baneginama ya riuna, ‘Ibewa mamai Eibraham, inam nam teneteneğina, be değoda banaga gurigurinama sibo i midisuğu munağā be i nağona ġarodie, inam rağanine taudi tokare adi noğotama a vitaredina.’

³¹ “Be Eibraham ya riuna, ‘Değoda taudi Mousis be peroveta adi giumentu nam tai beavaiedi, naumeki da tokare banaga gurigurinama sibo i midisuğu munağana, taudi yağoro nam ai sumäge.’”

17

*Gewagewa be waisumağā
(Mt 18:6-7, 21-22; Mk 9:42)*

¹ Yesu na tauwai muriwatanama ya riuedina: “Rağan matabuna yaba ġesaudima banaga ta raurubudi da gewagewa ta voivoiedina. Be taumi aitaüğā ami banagama raurubue ko biridi be gewagewa ta voivoiedina, ko kita kauana. ² Değoda tam aitau yau banagama bo yau sedama gewagewae kwa biri nawedina, ya verena da tam gadome sibo yeku dosinama a pani be egasie sibo a pore

nawemna. Be nam i verena da Mamaitua tokare kovoġa dosinama e utem.³ Vutuna aubainama aba ko voivoiena, ko kita kauana. Deġoda tauwai sumaġa ġesau gewagewa e voivoiena, naumeki da kwa riutuġaiena. Be deġoda tauna na noġotama e vitarena, naumeki da na gewagewama kwa noġota porena.⁴ Be deġoda ġarome gewagewa 7 ya voiedina raġan tenaġa nopone, be e noġota vitara be raġan 7 e verau ġarome be e riuna, ‘Ebom, taugu gewagewa ġarome è voiedina’, naumeki da na gewagewama kwa noġota poredina.”

⁵ Be apasol Bada a riuena, “Ama waisumaġama kwai morebi!”⁶ Be Bada ya paribeedi be ya riuna, “Deġoda taumi ami waisumaġama ġaubonama yauġana pesinama maika, inam teneteneġinama da tokare uma kainama mobiri ko riuena, ‘Kwa nuakamoġa ma waramim be egasie kwa pore nawem!’ Be tauna tokare e voteyeteyemina.

Taunoya adi noyama

⁷ “Deġoda tam aitau sibo ġarome taunoya be tauna ya suasuata bo sipu ya raberabedina. Be raġanine na noyama yai kovi be ya tavana vadae, tam tokare umanama kuya riu bo ibewa, ‘Yodi kwa mia be kwa kani?’⁸ Ibewa, tam agunai tokare umanama kuya riuna, ‘Taunoya, yau kanima kwa raubuka’, be muriġa sibo kuya riuna, ‘Yau kanima kwa vokaukaue be yà kanina. Be raġanine taugu yà kani be yà tego rovona, murine tam kwa mia da kwa kani be kwa tegona.’⁹ Inam raġanine bada bonanama na taunoyama ya voteyeteyena aubainama, tokare ei kaiwe bo ibewa? Ibewa!¹⁰ Inam nama taumi, raġanine yaba matabuna Mamaitua e riuriuem be ko voivoiedina, naumeki da taumi umanama ko riuna, ‘Tauma taunoya yababa. Naumeki da ama noyama kè voiena.’”

Yesu tautaugħoma 10 yai yawasanidina

¹¹ Yesu ya nanaġona Jerusalemma maika, tauna Samaria be Galili provins poudiġa ya naġonāġona.¹² Be raġanine meagaie ya tavatavana, dabudi tautaugħoma kito ragara-gaudima matabudi 10 Yesu ġarone a tavana da ġavoe a midi be bonedima dosine a yokona,¹³ “Yesu, Bada, kwa raunuatoiemai!”

¹⁴ Yesu ya kitedi be ya riuedina, “Ko naġo pirisi ġarodie be koi kataiemina!”* Naumeki da taudi pirisi ġarodie a naġonāġona maika, taudi kedae a vere munaġana.

* **17:14:** Raġanine uma sidanama banaga ya paġona, tauna nam teneteneġina da banaga ġesaudima mate ta mia. Be raġanine sida a verena, noġone pirisi e kita dokedi be ei aninedina da taudi banaga mate ta miana.

15 Dabudine tauğoma tenağā ya kita munağē da tauna ya yawasanana, naumeki da ya munağā be bonanama dosine Mamaitua isanama ya kaisuğusuğuna. ¹⁶ Be inam tauğominama Yesu kağapakane noğone ya beku da ya raudunee be yai kaiwena. Be inam tauğominama, tauna Samaria baneginama.

17 Be dabudine Yesu ya riuna, “Banaga matabudi 10 a yawasanana, be banaga ġesaudima 9 değō? ¹⁸ Aba aubainama uma madani baneginama taunağā Mamaitua waikaiwenama ya tava, be ġesaudima ibewa?” ¹⁹ Be Yesu inam tauğominama ya riuena, “Kwa midisügu be kwa nağō, am waisumağama yai yawasanimna.”

Mamaitua na waiguyauma be Banaga Natunama na rağanima[†]

(Mt 24:23-28, 37-41)

20 Be Parisi Yesu ai taravirena, “Airağan Mamaitua na waiguyauma e verau?” Be Yesu umanama ya paribeedina, “Mamaitua na waiguyauma nam aiyaba maika e verau be tokare ko kita, ²¹ be nam aitau e riuna, ‘Ko kita, umanema’ bo ‘Ko kita noanema.’ Baninama Mamaitua na waiguyauma inam nopomie.”[‡]

22 Dabudine na tauwai muriwatanama ya riuedina, “Rağan e veraverauna e tavana rağanine, taumi koya ġoeğoe guratena da Banaga Natunama na rağanima sibo koya kitana, be tokare nam ko kita. ²³ Inam rağandie banaga tokare ta riuemina, ‘Ko kita, Keriso umanema’ bo ‘Ko kita, Keriso noanema!’ Be nam ko nağō bo koi muriwatanedi! ²⁴ Banaga Natunama na rağanima ei rağantenağē be keama maika e kidi be gunuma matabuna e yana porena. ²⁵ Be noğone tauna ei nuatoitoi guratana be uma kimtinama banegidima tauna ta tuağaiena.

26 “Banaga Natunama na rağanima inam Noa na rağanie maika: ²⁷ Banaga a kanikani, a tegotego, awai nağī be awai nağidina. Nama a voivoia be Noa waga ak nopone ya sağana, be kabaita ya tubuğā da banaga matabudi yai guridina.

28 “Bo Banaga Natunama na rağanima inam Lot na rağanie maika: Banaga a kanikani, a tegotego, a gimagimara, awai kawa gimagimara, a kumakuma be a vadavada kerina.

29 Inam rağanine Lot Sodom ya gosena, be kai menanama be yeku monamonaunidima isedima salfa marae a kuruva dobi be banaga matabudi ai guri rovodina. ³⁰ Inam kauidima teneğidima nama banaga tokare ta voivoiedi be Banaga

[†] 17:19: ‘Banaga Natunama na rağanima’ inam rağanine Bada Yesu e verau munağana. [‡] 17:21: ‘Mamaitua na waiguyauma nopomie’ bo ‘poumie’.

Natunama e mağatarana. ³¹ Inam rağanine aitau da vada debane kuya miamia be am purapurama vada nopone, nam kwa nađo be kwa ragau. Be aitau da sipie, nam vadae yaba kuya gosagosağana kwa nođotidi! ³² Lot na visarama ġarone aba ya tubuğana ko nođoti! ³³ Aitau na yawasanama dobue e raberabena, tokare na yawasanama ġarogue e kawa gewagewana. Be aitau na yawasanama ewai utaena, naumeki da yawasana ġarogue ya banavina. ³⁴ Yà riuriuemina, inam kupine gunie banaga rabui ta kenakena be tenađa tokare ta nawena, be ġesau e kena kwasana. ³⁵ Banaga rabui ta raraū riti be tenađa e kaiporena be ġesau e mia kwasana.” ³⁶ (-)§

³⁷ Be na tauwai muriwatanama ai taravirena, “Bada, uma kauidima deđo dabudi ta tubuđa?” Be tauna ya riuedina, “Deđo musara gurinama e kenakenana, dabudine naboduba** ta rawateđeidina.”

18

Kaiyababa be tauwai tarapiri wainasinama

¹ Naumeki be Yesu na tauwai muriwatanama wainasi ya riuedi be yai katakataidi da taudi rağan matabuna sibo a moimoiragina, be nam a tunituağai. ² Tauna uma wainasinama ya riuedina, “Meagai tenađa nopone tauwai tarapiri ya miamiana. Tauna Mamaitua nam i nainaire be banaga nam i viviviviredina. ³ Be inam meagaine kaiyababa mate ya miamiana. Tauna tauwai tarapiri ġarone ya verau be yawai bağana, ‘Kwa kaisagugu, baninama tauwai wavuguma rağan matabuna ewai ġavieguna.’ ⁴ Be kaiyababa rağan bisanama tauwai tarapiri yai bağana be nam i sagu rubuna. Be rağan tenađa tauwai tarapiri tauname ya riu munađena, ‘Avedi taugu Mamaitua nam ama nainairena bo banaga nam ama viviviviredina, ⁵ be uma kaiyababinama e riuriu ġasakirieguna, vutuna aubainama naumeki da yà kaisaguna, muriđa be waiveraverau e kawa nuađoroguna.’”

⁶ Be Bada ya riuna, “Tauwai tarapiri gewagewanama nema ya riu bakona, taumi koya vaie? ⁷ Taumi ko nođonođotina Mamaitua na vinevinema banegidima kipi da suara sagu ta ġabeđabena, nam adi nuaboyae e sagudi, bo? Bo tokare nuatauđa e sagudi, bo? ⁸ Ibewa! Tauna waigapa adi nuaboyae e sagudina. Be rağanine Banaga Natunama e

§ 17:36: Vers 36 inam banaga muriđa baibol nopone a boru sađena, nođone nam i kenakenana. Vers 36 inam umanama: Banaga rabui sipie, be tenađa yà kaipore be ġesau e mia kwasana. ** 17:37: ‘Naboduba’ inam maika kiu isanama ‘vulture’. Taudi musara deđo e gurina be waiđapa ta tavana. Be matabudi a kataiena da musara deđo dabudi e kenakenana.

tava munağana dobue, tauna tokare banaga waisumeğidima e banavidi bo ibewa?”

Parisi be teks tautaminama wainasinama

⁹ Banaga aitauğā ta noğonoğotina da taudi kabe banaga veredi, be banaga ġesaudima ta kitakita tuağaiedinā. Vutuna aubainama Yesu uma wainasinama inam banegidima ya riuedina: ¹⁰ “Rağan tenağā banaga rabui a sağā a nağona tempol nopone moiragi aubainama, tenağā Parisi be ġesau teks tautaminama. ¹¹ Be Parisi taunağā ya miditeğā be tauname aubainama ya moiragi be ya riuna, ‘O Mamaitua, yàwai kaiwemna da taugu nam ama noğonoğota munağegu be ama danedanenena, be taugu yau visarama debane nam mui ama poreporena, banaga ġesaudima maika. Yàwai kaiwemna da taugu nam noa baneginama teks tautaminama maika. ¹² Taugu wiki tenağā nopone rağan rabui yà widiwidinana be yau purapurama yà rawadamdamdi da matabudi 10 be tenağā tam yà uteutemna.’

¹³ “Be teks tautaminama tauna noa madanie ya midimidina nam ġaubonağā noğonama i tausuğuna marae. Tauna nimane nuakadanama ya rauriğā be ya riuna, ‘O Mamaitua, kwa raunuatoiegū, taugu gewagewa banegiguma.’ ¹⁴ Taugu yà riuriuemina, Mamaitua teks tautaminama ya kawa didimani be ya nağona na vadae, be Parisi ibewa. Baninama banaga aitau tauname e kawakawa sağē munağena, tokare Mamaitua tauna e boru dobiğena. Be banaga aitau tauname e boruboru dobiğā munağena, tokare Mamaitua tauna e kawa sağena.”

Yesu be seda ġaġaubodima

(Mt 19:13-15; Mk 10:13-16)

¹⁵ Banaga ġesaudima Yesu ġarone adi sedama a veraverauğedina da sibo yai aiainidina. Be na tauwai muriwatanama nama a kitekitedina, taudi a riutuağaiedinā. ¹⁶ Be Yesu seda ya riuedi da ġarone be ya riuna, “Seda ko gosedi da ġarogue ta verauna, be nam koi ġakedi, baninama Mamaitua na waiguyauma inam banaga maika umanama sededima aubaidima. ¹⁷ Uma ko noğoti, aitau da nam Mamaitua na waiguyauma e paġo gomana ġaġubonama maika, naumeki da tauna inam waiguyaunama nopone nam e sağā.”

Purapura baneginama

(Mt 19:16-30; Mk 10:17-31)

¹⁸ Jius adi badama tenağā Yesu yai taravirena, “Tauwai katakatai veremma, aba yà voie da yawasana kenakena nonoğinama yà paġo?” ¹⁹ Be Yesu ya riuenā, “Aba aubainama kwawai isaguna vere? Nam aitau verena be

Mamaitua taunaḡa. ²⁰ Tam riuvavasaḡa kuya kataiedi bo ibewa? Nam monaḡemma debane mui kwa pore, nam kwa vunuḡa, nam kwa danene, nam kwa kaiyovu, tamam be tinamma kwa viviredi!"

²¹ Be tauḡoma ya paribee be ya riuna, "Raḡanine taugu vaugue da yodi uma riudima matabudi è vovo teyeteyedina." ²² Be Yesu nama riunama ya vaivaiena, tauna ya riuna, "Yaḡoro yaba tenaḡa tam kwa gosegosena. Tam yaba matabudi ġarome kwa gimaredi be mane banaga waikaruwaġewaġedima kwa utedina, be tam marae kwai purapurana. Yodibe tam taugu kwai muriwataneguna!" ²³ Be raḡanine tauḡoma uma riunama ya vaivaiena, tauna yai nuaboya kauana, baninama tauna yai purapura kauana aubainama.

²⁴ Yesu inam tauḡominama ya kita be ya riuna, "Purapura banegidima taudi Mamaitua na waiguyauma nōpone saġanama ġarodie ya piripiri kauana. ²⁵ Kamel ya bagibagi kauana da seyau gavogavone e sonaġħa, be nama purapura baneginama tauna Mamaitua na waiguyauma nōpone saġanama ya bagibagi da bagibagi kauana."

²⁶ Be banaga aitauḡa nama a vaivaiena ai taravirana, "Tauma kē noġoti da purapura banegidima kabe ta naġona marae. Be yodi deġoda purapura banegidima nam ta yawasana, naumeki da nam aitau tokare e yawasana, bo?" ²⁷ Be Yesu ya paribeedina, "Aiyaba banaga ġarodie nam teneteneġina, Mamaitua ġarone inam teneteneġinama." ²⁸ Dabudine Pita ya riuna, "Aiyo! Tauma yaba matabudi kē gosedina tam waimuriwatanemma aubainama."

²⁹ Dabudine Yesu ya riuedina, "Yà riuriu kauemina, aitau da na meagaima bo na dosima bo tuatuaġanama bo na visarama bo na sedama ya gosedina Mamaitua na waiguyauma aubainama, ³⁰ naumeki da tauna yawasana veredima toitoi yodi raġandie e banavidina. Be mate tokare yawasana kenakena nonoġinama e veraverauna e paġona."

Yesu nema ya guri bakona raġan wairabuiteġanama ya giu munaġġena

(Mt 20:17-19; Mk 10:32-34; Lk 9:22, 44)

³¹ Yesu na tauwai muriwatanama 12 yai doka nawedi ġavoe be ya riuedina, "Tauda tà saġa tà naġonāġona Jerusalemma be dabudine yaba matabudi Banaga Natunama ġarone ta tubuġħana, nema boni peroveta a giru-girumina nama: ³² Jius taudi Banaga Natunama eteni banegidima nimedie ta boruna. Be taudi tai varevare, ta ġasie, ta kaviso ³³ be dabudine ta kwapu be tai gurina. Be raġan wairabuiteġħane tauna e midisuġu munaġġana."

³⁴ Be tauwai muriwatana uma yabedima Yesu ya giugiedina banidima taudi nam ti kataiedina. Be uma riudima semosemodima, vutuna aubainama taudi nam ti kataiedina.

*Yesu banaga matapotapotanama yai yawasanina
(Mt 20:29-34; Mk 10:46-52)*

³⁵ Rağanine Yesu Jeriko meagainama diane ya tavatavana, dabudine tauğoma matapotapotanama keda diane ya mia be mane ya kiğikiğiena. ³⁶ Be rağanine e vaiena be banaga patara dianağā a nağonağona, naumeki da tauna yai taravirana, “Aba e tubutubuğā?” ³⁷ Taudi a riuena, “Yesu Nasaretma ya verau be e nağonağona.” ³⁸ Dabudine tauna ya yoko be ya riuna, “Yesu, Deivid natunama, kwa raunuatoiegu!” ³⁹ Be aitaüğā a dokadokana a riutuağacie be a riuna, “Kwai nuatuğū!” Be tauna ya rasa guratana, “Yesu, Deivid natunama, kwa raunuatoiegu!”

⁴⁰ Dabudine Yesu ya midi kwasa be banaga ya riuedi da tauğoma matapotapotanama sibo a verauğena ğarone. Be rağanine tauğoma maida ya tavatavana, Yesu tauna yai taravirena, ⁴¹ “Aba kwa ġoeğoenə yà voie aubaimma?” Be tauna ya riuna, “Bada, taugu yà ġoeğoenə sibo èi kitana.” ⁴² Be Yesu ya riuena, “Kwai kita! Am waisumağama yai yawasanimna.” ⁴³ Be yai rağantenäge da tauğoma matanama yai kitana. Dabudine tauna Yesu yai muriwatane be Mamaitua isanama ya kaisuğuna. Inam rağanine banaga matabudi nama a kitakitana, taudi mate Mamaitua isanama a kaisuğusuğuna.

19

Yesu be Sakias

¹ Be Yesu Jerikoma ya tava be ya nağonağona. ² Be dabudi banaga tenağā isanama Sakias, tauna teks tautaminama banegidima adi badama, be tauna purapura baneginama. ³ Tauna ya ġoeğoenə Yesu sibo ya kitana, tauna nema maika kitana, be nam Yesu i kitana, baninama tauna banaga tuponama be patara ya moraba kauana aubainama. ⁴ Vutuna aubainama tauna ya manini doka be kai damaya ya sağaina Yesu kitanama aubainama, baninama Yesu inam kedanağā ya veraverauna aubainama.

⁵ Rağanine Yesu değō Sakias ya miamiae dabudi ya tavatavana, tauna ya midi kwasa da ya kitasağē be ya riuna, “Sakias, kwa yovo makai! Taugu manaka tam am vadae yà miana.”

⁶ Naumeki da Sakias ya dobi makai be ma nuavereverena Yesu yai kaiwena. ⁷ Banaga matabudi umanama kauinama

a kitakitana rağanine, taudi a momodu be a riuna, “Uma baneginama yodi gewagewa baneginama ġarone e miana.”

⁸ Dabudine Sakias ya midisūgu be Bada ya riuena, “Bada, yau purapurama nevedima banaga waikaruwağewağedima ya utedina. Be değoda aitau ġarone kaiyovue yaba tenağā è pağopağona, naumeki da debane rabui be rabui ya taipoto be ya ute munağena.” ⁹ Naumeki da Yesu tauna ya riuena, “Manaka kuvesa uma vadane ya sağana, baninama Sakias tauna yodi ewai mağatara munağena da tauna Eibraham natunama. ¹⁰ Banaga Natunama ya verauna, baninama tauna banaga kwakokwakodima e wanedi be ei yawasandina.”

*Taunoya mane a ragaudina wainasinama
(Mt 25:14-30)*

¹¹ Dabudine banaga awai beavaia be awai noğotana da Mamaitua na waiguyauma kabe vutuna i tavatava, baninama Yesu kaiteka Jerusalem diane ya tavana aubainama. Vutuna aubainama Yesu wainasi ġesaunama ya riuedina adi noğotama kawa didimaninama aubainama. ¹² Naumeki da Yesu ya riuna, “Guyau tenağā natunama ya nağō wari dobue be waiguyau ya pağona, yodibe ya munağana. ¹³ Vutuna aubainama guyau na taunoyama matabudi 10 ya riuedi be mane isanama Mina* matabudi 10 ya utedi be ya riuedina, ‘Mane ko noyedi da ta toina, muriğā da ya tava munağana.’ ¹⁴ Be na dobuma banegidima tauna a tuağcie be riu murine a riupore be Sisa a riuena, ‘Tauma inam baneginama nam kama ġoegoena ġaromaie ei bada.’

¹⁵ “Be tauna yağoro na waibadama ya pağō be ya munağana na dobue. Dabudine na taunoyama aitaüğā mane ya uteutedina ya riuedi da ġarone a tavana, baninama tauna ya ġoegoena da sibo ya kataiena, da tenağāğā mane bisa a voiedi. ¹⁶ Naumeki da taunoya dokadokanama ya tava be ya riuna, ‘Bada, mane kuya uteuteguna anitai potonama mate debane matabudi 10.’ ¹⁷ Be na Badama ya paribeena, ‘Ya vere kauana, tam taunoya veremma. Baninama tam mane ġaubañama be kuya noya kauena, vutuna aubainama rewapana ya uteutemna da tam meagai 10 kwai badedina.’

¹⁸ “Naumeki da taunoya wairabuinama ya verau be ya riuna, ‘Bada, mane kuya uteuteguna anitai potonama mate debane matabudi 5.’ ¹⁹ Be na badama ya paribeena, ‘Tam yodi rewapana ya uteutemna da meagai 5 kwai badedina.’

* **19:13:** Mina inam Gurik banegidima adi manema isanama.

²⁰ “Naumeki da taunoya ġesau ya verau be ya riuna, ‘Bada, am manema garae è suma be è semosemona umanema, ²¹ baninama tam banaga ġasiġasimma aubainama è nairemna. Yaba nam tam ġarom be kwa ragaragaudina, tam nam kusipina be kwa ragaragaudina.’

²² “Bada na taunoyama ya riuena, ‘Tam taunoya gewagewamma, tam aba kuya riuriueguna, nama tam yà etaremna. Tam kwa noġonogotina da taugu kabe banaga gewagewagu be yaba taugu nam ġarrogħu be yà ragaragaudina, be taugu nam e sipina be yà ragaragaudina. ²³ Be aba aubainama yau manema nam banike ku boru? Taugu yodi è tava munaġana, yau manema anitai potonama mate sibo è paġona.’

²⁴ “Dabudine tauna banaga aitaugħa diane a midimidina ya riuedina, ‘Inam taunoyanama gewagewanama ġarone mane ko paġo be ko naġo da taunoya aitau ġarone mane 10, tauna ko utena!’ ²⁵ Be banaga Bada a riuena, ‘Bada, tauna kaite mane 10 ya ragaudina!’

²⁶ “Be tauna ya paribeedina, ‘Yà riuriuemina, aitau yaba[†] ġarone e taipotona, naumeki tauna yaba ġesaudima mate yà utena, be aitau da ġarone yaba nam i taipotona, naumeki da tauna avedi da ġaubonama ġarone, be taugu yaġoro yà kaiporedina. ²⁷ Be yodi aitaugħa yau ġaviamra nam ti ġoeġgoena da taugu sibo ġarodie ēi bada, ko verauġedi uma dabudi be noġogue koi guridina!’”

*Yesu Jerusalem nōpone e saġana
(Mt 21:1-11; Mk 11:1-11; Jn 12:12-19)*

²⁸ Be Yesu nama ya giugiuna murine, tauna ya doka ġome be ya saġa ya naġona Jerusalemma. ²⁹ Tauna oya Olip, diane meagħi Betpage be Betanima ya tavatavana, dabudine na tauwai muriwatanama rabui ya riuporedi ³⁰ be ya riuna, “Ko naġo noġomie meagaine. Be raġanine meagaie ko saġasaġa, dabudi ko kitana donki natunama a nigorina. Inam donkinama natunama nam aitau i geru rubuena, vutuna ko kuvesi be ko verauġena! ³¹ Be deġoda aitau ei taraviremina, ‘Aba aubainama ko kuvekuvesi?’, naumeki da ko riuena, ‘Bada e ġoeġgoena.’”

³² Naumeki da taudi a naġo be aba Yesu ya riuriuedina, nama a banavidina. ³³ Raġanine taudi donki natunama a kuvekuvesina, taupaka ya riuedina, “Aba aubainama ko kuvekuvesi?” ³⁴ Be taudi a riuna, “Bada e ġoeġgoena.” ³⁵ Taudi ai doka nawe Yesu ġarone be adi garama donki debane a yesidi be Yesu a boru tavaitena donki debane.

[†] **19:26:** ‘Yaba’ inam puyo Mamaitua ya uteutedana.

³⁶ Be rağanine tauna kedağā ya nağonağona, banaga adi garama kedağā a yesidina. ³⁷ Rağanine tauna oya Olip isune ya tavatavana, na tauwai muriwatanama matabudi bonedima dosine Mamaitua isanama kaisuğusuğunama ai karena, baninama mataira matabudi a kitekitedina aubainama. ³⁸ Be taudi a riuna,

“Guyau isanama tà kaisuğu, tauna Bada isane e veraver-auna!”

³⁹ Dabudine Parisi ġesaudima patara nopone Yesu a riueno, “Tauwai katakatai, am tauwai muriwatanama kwa riutuağaledi!” ⁴⁰ Be Yesu ya riuna, “Yà riuriuemina, değoda taudi tai nuatuğuna, naumeki da yeku tokare ta yogona.”

Yesu ya ġabana Jerusalem aubainama

⁴¹ Be rağanine Jerusalem diane ya tava be meagainama ya kitakitana, Yesu ya ġabana Jerusalem aubainama ⁴² be ya riuna, “Taumi manaka sibo suba koya pağona, be yodi ya semona aubainama, taumi nam ko kita. ⁴³ Tokare rağan e tavana da ami ġaviamta verau be ta babavivirimi be ta vağuruvimina. ⁴⁴ Be taudi tokare taumi be ami sedama mate tai miagudemina. Be ami ġaviamta tokare nam aiyaba ta taugose. Uma yabedima ġoromie ta voiedina, baninama taumi Mamaitua na kaba verauma mayanama nam ko pağona.”

Yesu taukune tempol nopone ya tavy dobiğedina

(Mt 21:12-17; Mk 11:15-19; Jn 2:13-22)

⁴⁵ Dabudine Yesu ya nağona tempol nopone be banaga a kunekunena ya tavy dobiğedi ⁴⁶ be ya riuedina, “Girugiruminama porane umanama ya riuna, ‘Taugu yau vadama inam moiragi kana vadama’ be taumi ko voivoiena da kabe anidanene gabuna.

⁴⁷ Be rağan matabuna tauna tempol nopone yawai katakataina. Be pirisi adi babadama be tarawatu tauwai katakataidima be babada ġesaudima mate a rawateğeidi be a rara rubuna da sibo Yesu ai gurina. ⁴⁸ Be taudi nam değō aniwai gurinama kedanama ti banavina da sibo ai guri, baninama banaga matabudi tauna na giuma nuedima ya pağō be yağoro awai beavaiena.

20

Aitau waibada Yesu ya ute?

(Mt 21:23-27; Mk 11:27-33)

¹ Rağan tenağā Yesu tempol nopone banaga yawai katakataidi be vari verenama ya rarauguguyena, be pirisi adi babadama be tarawatu tauwai katakataidima be babada ġesaudima mate a rawateğeidi be a sağana Yesu ġarone,² be a

riuenā, "Kwa riuemai, tam aba waibadana be uma yabedima kwa voivoiedi,* bo aitau uma waibadanama ya utem?"

³ Yesu ya paribeedina, "Be taugu mate taumi yai taraviremina, ko riuegu, ⁴ Jon na waibadama aitau ya ute be yawai babataito, Mamaitua bo banaga?"

⁵ Dabudine taudiā ai sağasağā be a riuna, "Değoda tà riuna, 'Mamaitua īarone', tauna tokare ei taraviredana, Be aba aubainama nam Jon koi sumāge? ⁶ Be değoda tà riuna, 'Banage', tokare banaga matabudi yekue ta kati gabadana, baninama banaga matabudi ta noğonogötina da Jon tauna Mamaitua na perovetama." ⁷ Vutuna aubainama taudi a riuna, "Tauma nam ke kataiena Jon waibada aikedae ya pa gó." ⁸ Be Yesu ya riuedina, "Naumeki, taugu mate nam yà riuemi da taugu aba waibadane uma yabedima yà voivoiedi."

Gureipi sipinama taurabenama wainasinama

(Mt 21:33-46; Mk 12:1-12)

⁹ Yesu banaga uma wainasinama ya riuedina, "Rağan tenağā banaga sipi ya voie be gureipi ya kumedina. Be banaga gesaudima īarodie sipi ya gosepore da taudi a rabena, be tauna ya nağona wari kedae be ya mia guratana. ¹⁰ Be gureipi taminama na rağanie, tauna na taunoyama tenağā ya riuporena sipi taurabenama īarodie da na badama na dariğama sibo ya pağona. Be sipi taurabenama taunoya a riğā be nimakavakavanama a riupore munağena. ¹¹ Dabudine bada na taunoyama gesau ya riuporena, be sipi taurabenama inam taunoyanama mate a riğā be yaba gesaudima mate a voie da tauna a kawa tunimayagi be nimakavakavanama a riupore munağena. ¹² Naumeki be bada na taunoyama wairabuiteğanama ya riuporena. Be tauna mate a vunuğī da ai kero be a rubu dobiğena.

¹³ "Dabudine gureipi sipinama taupakinama ya riuna, 'Yodi aba yà voie? Agunai natuguma tauğominama, nüaguma e pağopágo kauena, tauna yà riupore be taudi ta kita be dabudine ta vivirena.' ¹⁴ Be rağanine sipi taurabedima tauna a kitakitana, ai giu vivivirana, 'Tauna tokare tamanama na buderima e pağona, aubainama tà vunuğī be tauda tài buderiena.' ¹⁵ Naumeki da tauna siple be a pore dobiğe be ai gurina.

"Be yodi taumi aba ko noğonogoti, sipi taupakinama aba e voie sipi taurabedima īarodie? ¹⁶ Tauna tokare e yovo be sipi taurabedima ei guridi be gureipi sipinama waria e utedina."

* **20:2:** Pirisi nuedima yai medina, baninama Yesu tempol nopone banaga a kunekune be ya tavu dobiğedina aubainama.

Be rağanine banaga Yesu nama ya riuriuna a vaivaiena, taudi a riuna, "Uma riunama tokare nam e tubuğ!"¹⁷ Be Yesu ya kitadididi be yai taraviredina, "Değoda taugu ama kaikaiyovu, naumeki girugiruminama poranama nōpone riu uma ya girugirumina, baninama aba,
'Vada taukerinama taudi yekue vada a kerikerina,
be yeku tenağ a pore kaiyatina, baninama taudi ai noğotana
kabe inam yeku gewagewana.

Be Mamaitua inam yekunama porepore kaiyatinama ya pağ be ya voie da na vadama yasinama ya tubuğana.¹⁸ Be banaga matabudi ta beku be uma yekunama debane ta ravusedina, taudi tokare tai mia gorugorudina. Be yekunama banaga aitau debedie e ravusena, taudi tokare ei mia mutumutudina."[†]

¹⁹ Dabudine pirisi adi babadama be tarawatu tauwai katakataidima a ġoeğona waiğapa sibo Yesu a vunuğina, baninama mayedima a pağ da tauna taudi yawai nasiedina. Be taudi banaga a nairedina.

*Teks waitaraviranama
(Mt 22:15-22; Mk 12:13-17)*

²⁰ Be taudi Yesu a kitakita watanina, be taukita wataninama banegidima a riuporağana. Taudi a voivoiana da maika kabe banaga veredi be a raurubuna da sibo Yesu a kaiyovue da aba sibo ya vato waigewana, yodibe babada dosidima ġarodie a nawena etarenama aubainama. ²¹ Dabudine taukita wataninama Yesu ai taravirena, "Tauwai katakatai, tauma kè kataiena da tam rağan matabuna kwa giugiu be kwawai katakataina matabuna riukaua. Be tam banaga nam kuma nainairedi, be Mamaitua na kauama matabuna kwa giugiuena inam riukaua.²² Kwa riuemai, inam naumeki bo ibewa da tauma Sisa ġarone kai teks?"

²³ Be Yesu ya kataiena da taudi a ġoeğona da sibo a kaiyovuena, be Yesu ya riuedina,²⁴ "Sirin koi kataigu! Aitau noğona be isanama sirin bogane ta kenakena?" Be taudi a paribeena, "Sisa noğonama be isanama ta kenakenana."

²⁵ Dabudine Yesu ya riuedina, "Naumeki da Sisa ġaronama Sisa ko utena, be Mamaitua ġaronama Mamaitua ko utena!"

²⁶ Inam rağanine taudi nam teneteneğina da Yesu sibo a kaiyovue be aba ya vato waigewa. Be taudi dabudine na giuma a base be ai nuatuğutuğuna.

*Midisuğu munağ a waitaraviranama
(Mt 22:23-33; Mk 12:18-27)*

[†] **20:18:** Yeku tauna Yesu. Be aitau Yesu e tuağaiena, taunağ a tokare e vunuğa munağena, be guri murine Yesu tokare aruinama e doumutuna.

²⁷ Jius nopolie dam ġaubonama isanama Sadisi. Taudi a riuriuna da banaga e guri be nam tokare e midisugū munaġa. Taudi a verau Yesu ġarone be ai taravirena, ²⁸ “Tauwai katakatai, Mousis ya giruma be ya riuna, deġoda tauġoma ya guri be na visarama e goseporena nam waisedasedana, naumeki da tasinama tuaġanama kaiyababinama sibo ya naġi be seda yai tubuġana tuaġanama aubainama. ²⁹ Deġoda tautauġoma 7 dam tenaġa nophone be dokadokanama waivi ya naġi da nam ti natuna be tauġoma ya gurina, ³⁰ naumeki da tauġoma wairabuinama ³¹ inam kaiyababinama ya naġina. Be namaġa da tauġoma aniwai 7-nama ġarone ya dobina. Be yaġoro nam ti natunana. ³² Muriġa waivinama mate ya gurina. ³³ Yodi nemanama? Midisugū munaġa na raġanie uma waivinama tautauġoma 7 a naġināġina, tokare aitau na waivi?”

³⁴ Be Yesu ya riuedina, “Banaga uma raġandie ta mi-amiana, naumeki taudi tawai naġina. ³⁵ Be Mamaitua na banagama gurie ta midisugū munaġana raġanine, taudi Mamaitua na dobuma ġesaune ta mia nonoġana, be inam raġanine taudi nam tai naġi. ³⁶ Be nam ta guri munaġa, ibewa, be taudi ta miana maika anea. Taudi Mamaitua na sedama, baninama taudi gurie be a midisugū munaġana aubainama.

³⁷ “Be taumi Mousis na gututuma gedara kodekoderinama ko noġoti. Inam dabudine Mousis mate yai kataidana da banaga gurie be ta midisugū munaġana, baninama Mamaitua umanama Mousis ya riuena, ‘Taugu Eibrahim, Aisik be Jeikob adi Mamaituama.’[‡]

³⁸ Dabudine tà kataie da Mamaitua nam banaga guriguridima adi Mamaitua, ibewa da tauna banaga yawayawasanidima adi Mamaituama. Baninama taune yaba matabudi ta yawayawasanana.”

³⁹ Dabudi tarawatu tauwai katakataidima ġesaudima Yesu a riunena, “Tauwai katakatai, tam kuya giu kauana.”

⁴⁰ Inam raġanine nam aitau teneteneġina da sibo ai taravira munaġe, matabudi a nairana.

*Keriso tauna aitau natuna?
(Mt 22:41-46; Mk 12:35-37)*

⁴¹ Be yodi Yesu yai taraviredina, “Nemanama da tarawatu tauwai katakataidima ta riuriuna da Keriso tauna kabe guyau Deivid natuna? ⁴² Be buka Salamo nophone Deivid tauna ya riuna,

‘Bada yau Badama ya riuena, Kasaugue kwa mia.

[‡] **20:37:** (Exodus 3:6) Eibrahim, Aisik be Jeikob taudi a gurina, be aruidima yawayawasanidima marae.

43 Be taugu am ġaviamā yà vaġaġaridi be kaġamma dibune yà biridina maika guni.'

44 Be yodi tà kita da Deivid Keriso ya riuena ‘Yau Badama’, be yodi nemanama da Keriso Deivid natuna?’

*Yesu tarawatu tauwai katakataidima nuedima ya boruna
(Mt 23:1-36; Mk 12:38-40)*

45 Dabudine banaga matabudi awai beavaia be Yesu na tauwai muriwatanama ya riuedina, 46 “Koi kita kauana tarawatu tauwai katakataidima ġarodie. Taudi gara veredima ta kotedi be ta rarau guyaguyau naġona, be adi ġoanama banaga debae taudi tai kaiwedina, be sinagog nopolie bo soi nopolie taudi gabu verediġa ragaudima ta ġoeġoedina. 47 Be taudi kaiyababa waikaruwaġewaġedima adi vadama ta danedanenedi be moiragi daudaudima kaikaiyovudima ta voivoiedina da banaga kabe ta kitedi be ta basedi. Inam nama banegidima taudi tokare kovoġa dosinama ta banavina.”

21

*Kaiyababa na puyoma
(Mk 12:41-44)*

1 Be Yesu yawai kita be mane banegidima ya kitekitedina tempol nophone mane a boruboruna. 2 Be tauna kaiyababa waikaruwaġawaġanama mate ya kitana, penipeni dubedima rabui ya biridina. 3 Dabudine Yesu ya riuna, “Yà riuriuemina da uma kaiyababinama waikaruwaġawaġanama tauna na puyoma ya moraba kauana, nam maika banaga ġesaudima nama. 4 Baninama taudi ġesaudima mane ai maurena, be tautaugosedima a raupuyoedina. Be kaiyababa tauna na manema ġaubaonama sibo na kanima ya gimarana, be matabuna ya raupuyoena.”

Yesu tempol kawa gewagewanama be raġan damodima adi matairama ya giuedina

(Mt 24:1-14; Mk 13:1-13)

5 Yesu na tauwai muriwatanama ġesaudima a riuna da tempol kitanama ya vere vavasaġana, baninama banaga tempol yeku waimatakanikanidie ai siana, be puyo veredima mate a raupuyoedina Mamaitua ġarone. Be Yesu ya riuna, 6 “Yodi uma yabedima matabudi ko kitekitedina, be raġan e tavana uma yabedima matabudi tai kavena. Nam ai yeku tenaġa tokare na gabue e kena.”

7 Be taudi ai taravirena, “Tauwai katakatai, airaġan uma kauidima ta tubuġa be aba matairidima ka kitedi be ka kataie?” 8 Be Yesu ya riuna, “Ko kita kaua da nam aitau

ei kedadoka waigewemi, baninama banaga toitoi tokare isague ta tava be ta riuna, ‘Taugu vutuna Keriso, be rağan damonama ya tavana.’ Be nam koi muriwatanedi! ⁹ Be rağanine ġavia bo iğara riudima ko vaiedina, nam ko naira! Inam yabedima matabudi ta tubuğā dokana, be rağan damonama tokare nam e tava makai.” ¹⁰ Be na giuma ya kaiwatani be ya riuna, “Tokare dobu turanama dobu mate, be waiguyau turanama waiguyau mate tai kawa ġasiġasina. ¹¹ Be dobu ġesaudie yoyo dosidima ta tubuğāna, be meiğara be guriguri rağandima ta tavana. Be yaba wainua nainairidima be mataira dosidima gunume ta tubuğāna.

¹² “Muriġa da uma kauidima ta tubuğāna noġone, banaga taumi ta vunuġimi be ta raukivi gewegewmina. Be etare ta biri nawemina, sinagog banegidima be guyaguyau be babada dosidima noġodie, da taumiġa ko gudutaraġa munaġemina. Be dabudine taumi dibure ta biri nawemina, baninama taumi taugu kowai sumaqiegħuna aubainama. ¹³ Inam kauidima ta tubutubuğāna rağanine, taumi taugu aubaigħuma koi matamatana. ¹⁴ Be taumi nema sibo koya giu bakona, nam yodi koi nuaboye. ¹⁵ Baninama taugu tokare giu be nuauyauya yà utemi da ami ġaviamra nam teneteneġina da ami giuma ta riġa bo ta mediemi. ¹⁶ Taumi ami dosiġomama, tuatuġġemima, ami damma be ami banagħama taudi tokare ta biri dobiġemina. Be ġesaumima tokare taudi tai gurimina. ¹⁷ Be banaga matabudi ta tuaġġiemina, baninama taumi taugu kowai sumaqiegħuna aubainama. ¹⁸ Be taumi deba vuvuġġimima nam tenaġħa tokare e beku waiyakare, vutuna aubainama nam koi nuaboya. ¹⁹ Ko midi bagibaginaġa da aruimima koi yawasanina.

*Yesu Jerusalem nema e gewagewa bakona ya giuena
(Mt 24:15-21; Mk 13:14-19)*

²⁰ “Taumi ko kitakita be iğara banegidima Jerusalem ta midi kwa vivirona, inam rağanine ko kataie da ġaġbonaġa Jerusalem ta kawa gewagewana. ²¹ Dabudine aitaugħa Ju-diamo, taudi sibo a naġona oya. Be aitaugħa Jerusalemnopone, taudi sibo a dobi a naġona. Be aitaugħa Jerusalem diane miemienidima, taudi nam sibo a saġa Jerusalemnopone. ²² Baninama inam biwa rağaninama e tavana, boni peroveta a girugirumina, ruvane nama e tubuğāna. ²³ Inam rağandie tokare waiwaiivi bogebogedima be wai-tatau vaudima ġarodie e gewagewa kauana, baninama inam rağanine tokare wainuatoitoi dosinama e tubuğāna dabudine, baninama Mamaitua nuanama yai medi kauana banegidima ġarodie aubainama. ²⁴ Dabudine banaga

ḡesaudima tai guridina, be ḡesaudima ta ragaudi be dobu matabuna nopodie dibure ta biri nawedina. Be eteni banegidima taudi Jerusalem ta vagudagudana, naumeki da adi rağanima boruborune e kovina.

Yesu na kaba yovoma rağaninama

(Mt 24:29-31; Mk 13:24-27)

²⁵ “Be inam rağandie mataira ta tubuğana suara, nawaṛavi be kipora bogedie. Be dobu matabuna tokare wainuatoitoi dosinama ta banavina, be banaga matabudi egasi* gavasina ma be rabaminama e rawanapedina. ²⁶ Inam rağanine banaga tokare naira e kawa raugureredina, baninama taudi ta nainaira kauana da aiyabağɑ ḡesaudima gewegewedima dobue ta tubuğana. Be rewapanan matabudi gunume ta rawadaberaridina. ²⁷ Yodibe Banaga Natunama ma giyouna e yovona, rewapanan be nenerağinama dosinama mate, be banaga matabudi tokare ta kitana. ²⁸ Be inam yabedima matabudi ta tubuğana rağanine nam ko naira, be taumi ko tausuğumi be koi nuaverena, baninama rağan ya tavana, da taugu ya yovoyovona yài yawasanimina aubainama.”

Damaya kainama na waikatakataima

(Mt 24:32-35; Mk 13:28-31)

²⁹ Dabudine Yesu uma wainasinama ya riuedina, “Damaya kainama be kai ḡesaudima mate ko noğotidi! ³⁰ Taumi kai ta kinikinina rağanine ko kitedi be ko kataikataienan da inam bodu rağaninama e tavatavana. ³¹ Be inam kauinama tenegiñama nama rağanine inam kauidima ta tubutubuğana ko kitekitedina, dabudine ko kataie da Maimaitua na waiguyauma rağaninama e tavatavana. ³² Taugu ya riuriu kauemina, da uma kimtinama nam ei kave be inam kauidima matabudi Jerusalemma ta tubuğana. ³³ Mara be dobu tokare tai kavena be taugu riuguma nam airağan ei kave!

Nam ko mia nuababağɑ!

³⁴ “Ko kita kauemi da kanidobidobi be tegobua bo dobu yawasanidima nuaboyedima nam ta taimatakoekoemi, değoda rağan damonama ei rağantenäge be ei ḡosorimina. ³⁵ Baninama inam rağaninama tokare banaga matabudi dobue e kamotidina maika kwaro! ³⁶ Vutuna aubainama taumi koi neneğana be rağan matabuna ko moiragi da taumi tokare teneteneğinama da uma kauidima ta tubutubuğana, nopodiğɑ ko nağó be Banaga Natunama noğone ko midina, be nam tokare ko tunimayağɑ.”

* **21:25:** Baibol nopone rağanine ḡesaudie riu ‘egasi’ inam nam egasi ḡoma, be inam banaga dobu matabuna.

³⁷ Yesu suare tempol nopone yawai katakataina, be kupie ya dobi be ya nāgonāgona oya Olip debane, kena aubainama.
³⁸ Be banaga matabudi rāgantomtom a nāgona tempol no-pone tauna waibeavaienama aubainama.

22

Judas Yesu kana ̄gaviamma nimedie ya boru dobīgena
(Mt 26:1-5; Mk 14:1-2; Jn 11:45-53)

¹ Buredi-Nam-Sasasanina soinama rāganinama ya tavatava, isanama ‘Nāgopore soinama’. ² Pirisi adi babadama be tarawatu tauwai katakataidima, taudi Yesu waigurinama kedanama a wanewanena nema sibo ai guri bakena, be taudi banaga a nairedina.

³ Be Judas, tawai isana ‘Iskariot’, tauna nopone Seitan ya sāgana. Tauna tenāgā tauwai muriwatana 12 nopolie. ⁴Vutuna aubainama tauna ya nāgona pirisi adi babadama be babada ̄gesaudima mate ai tarapiri da nema sibo tauna Yesu ya boru dobīga bakena ̄garodie. ⁵ Be taudi nuedima ya vere kaua be ai aninana da Judas sibo mane a utena. ⁶ Naumeki da Judas mate yai aninana da tauna inam noyanama e voiena. Be keda ya wanewanena da patara matakoedie sibo Yesu ya boru dobīgena.

Nāgopore soinama
(Mt 26:17-25; Mk 14:12-21; Jn 13:21-30)

⁷ Buredi-Nam-Sasasanina soinama rāganinama ya tavana. Be inam rāganine dam matabudi adi sipuma tenāgā ai guridina Nāgopore soinama aubainama.

⁸ Dabudine Yesu tauna Pita be Jon ya riuporedi be ya riuna, “Ko nāgo be Nāgopore soinama ko vokaukaue be tà kanina.” ⁹ Be taudi ai taravirena, “Dēgo dabudi kwa ̄goēgoemaina soi ka vokaukaue?” ¹⁰ Be tauna ya riuedina, “Taumi ko nāgo be rāganine meagaie ko tavatavana, dabudine banaga ko banavina upa duginama e kirokirōgina. Inam baneginama koi muriwatane da na vadae ko tavana. ¹¹ Be vada taupakinama ko riuena, ‘Tauwai katakatai umanama ya riuemna: Dēgo ware adi gabu da taugu be yau tauwai muriwatanama mate Nāgopore soinama ka kani?’ ¹² Be tauna vada vata-vatara rabui nopone be debane vatarine dabudine gabu dosinama be yaba matabuna kawakawa nonōgidima tauna ei kataimina. Be inam dobudine kani ko vokaukauena.” ¹³ Dabudine taudi a nāgo be Yesu ya riuriuedina yabedima nama a banavidina, naumeki da Nāgopore soinama taudi a vokaukauena.

*Bada na soima**(Mt 26:26-30; Mk 14:22-26; 1Ko 11:23-25)*

¹⁴ Naumeki da soi na rağanima ya tavatavana, Yesu na apasolma mate a miana kani aubainama. ¹⁵ Dabudine tauna ya riuedina, “Nuaguma ya poyapoya vavasağena da uma Nağopore soinama taumi mate sibo tè kanina, be muriğä da taugu yài nuatoitoina. ¹⁶ Baninama yà riuriuemina da taugu Nağopore soinama nam airağan yà kani munağe naumeki da uma soinama baninama e mağatarana Mamaitua na waiguyauma nopone.”

¹⁷ Be ya giugiuna murine Yesu keyaka ya pağō, yai kaiwa be ya riuna, “Uma ko pağō be ko soiena! ¹⁸ Baninama yà riuriuemina da yodi be nokoi ya nağona taugu nam waen yà tego munağe naumeki da Mamaitua na waiguyauma e tavana.”

¹⁹ Be tauna buredi ya pağō, yai kaiwa, ya giva da ya utedi be ya riuna, “Uma taugu tubuğiguma yà uteutemina. Yodi be nokoi e nağona uma ko voiena taugu aninoğotiguma aubainama.” ²⁰ Be kani murine keyaka ya pağō be ya riuna, “Uma keyekinama inam waianina vaunama, baninama kosiniguma e rauğinina taumi aubaimima.

²¹ “Be banaga aitau tokare e boru dobiğeguna, be tauboru-dobiğeguma tauna mate yodi uma dabudine tà miamiana.

²² Banaga Natunama tokare e gurina, inam naumeki. Be aitau da ya boruboru dobiğena, tauna tokare gewagewa dosinama e banavina.” ²³ Dabudine apasol taudiğä ai taraviravira munağedina, da aitau uma kauinama e voie.

Aitau ya sağä gurata?

²⁴ Dabudine apasol waisağasäğä ai karena, da aitau poudie ya sağä gurata. ²⁵ Be Yesu ya riuedina, “Dobu guyaguyaudima adi banagama ğarodie awai badabadana, be banaga a riuedi be taudi awai isedina ‘Raukivivere banegimima’.

²⁶ Be taumi nam sibo nama! Banaga dosinama nopomie tauna sibo maika gomana, be ami badama tauna sibo maika taunoya. ²⁷ Aba taumi ko noğonoğoti, aitau ya sağä gurata? Banaga e mia be e kanikanina, bo kani tauşoienama? Banaga e mia be e kanikanina, tauna ya sağä guratana! Be taugu poumie maika taunoya. ²⁸ Taumi banagimima taugu yau wainuatoitoie koya riu vaivaiteguna.

²⁹ Vutuna aubainama taugu rewapana yà uteutemina da taumi koi badana, taugu yau waiguyauma, Tamaguma ya uteuteguna nopone. ³⁰ Dabudine taumi tokare ko kani be ko tegona yau waiguyauma nopone. Be taumi waibadae ko mia be Israel damnama 12 taumi tokare ko etaredina.”

*Yesu ya riuna da tokare Pita tauna e bovienna
(Mt 26:31-35; Mk 14:27-31; Jn 13:36-38)*

³¹ Be Bada ya riuna, “O Saemon! Seitan Mamaitua yai bağana da matabumi e raurubumi be e dariğemina maika banaga raisi banidima be muidima ta daridariğedina nama, taumi veree be e nawemina gewagewae. ³² Be taugu aubaimma è moiragina da am waisumağama nam e beku, be rağanine am noğotama e verau munağana ğarogue, naumeki da tam am banagama kwa voiedi da tai rewapanana.”

³³ Be Pita ya riuna, “Bada, taugu è vokaukauana da tam mate tà nağona dibure be tam mate tà gurina.” ³⁴ Be Yesu ya riuna, “Yà riuriuemna Pita, tam manaka rağan rabuiteğä kwa bovieguna da tam nam ku kataieguna, muriğä da kamkam e riuna.”

³⁵ Dabudine Yesu yai taraviredina, “Boni taugu è riuporemina, be nam mane, nam tana be nam kağasuma mate, inam rağanine taumi aba koya maruabie bo ibewa?” Be taudi a riuna, “Ibewa!” ³⁶ Dabudine ya riuedina, “Be yodi na tabu, aitau ğarone mane bo tana da e pağona. Be aitau ğarone kwatikwati ibewa, naumeki da tauna na rupue kwatikwati e gimerina, ³⁷ baninama girugiruminama poranama nöpone a girumina taugu aubaiguma, ‘Taudi tauna a voienna maika kabe tauvunuvunuğä.’”

³⁸ Be apasol a riuna, “Bada, uma kwa kita, kwatikwati rabui.” Be tauna ya riuna, “Inam nakarua!”

*Yesu oya Olip debane ya moimoiragina
(Mt 26:36-46; Mk 14:32-42)*

³⁹ Yesu vada ya dobi pore be na kaba nağoe ya nağona oya Olip debane. Be na tauwai muriwatanama mate ai muriwatanena. ⁴⁰ Be rağanine taudi Yesu ğarone a tavatavana, tauna ya riuedina, “Ko moiragi da nam raurubue ko beku!”

⁴¹ Dabudine na tauwai muriwatanama ya gosedi be ya nağda yeku ruburubunama ruvane nama, be tuapikane doğae ya raupari da ya moiragi ⁴² be ya riuna, “Mamai, taugu nam ama ġoegoena ğorağoranama yà sigue, be naumeki da tam am ġoanama yà voienna, be nam taugu yau ġoana.” ⁴³ Dabudine anea marae ya yovo be ya kawa rewapanina.

⁴⁴ Yesu na nuaboyama ya moramoraba guratana, vutuna aubainama tauna ya moiragi gurata, be poya kosina maika a tositosina doğae. ⁴⁵ Dabudine ya midisügu munağä be ya nağona na tauwai muriwatanama ğarodie da e kitana be taudi matabudi ai nuaboya kaua be a kenakenana. ⁴⁶ Be tauna ya riuedina, “Aba aubainama ko kenakena? Ko midisügu be ko moiragi da taumi nam raurubue ko beku!”

*Banaga Yesu a vunuġina
(Mt 26:47-56; Mk 14:43-50; Jn 18:3-11)*

⁴⁷ Yesu tauna yaġoro ya giugiu be banaga toitoi a tavana, be apasol 12 nopolie apasol tenaġa isanama Judas, tauna inam banegidima yai dokedokedina, be Judas tauna ya saġa da Yesu yai suruvena. ⁴⁸ Be Yesu ya riuena, “Judas, tam Banaga Natunama waisuruvae kwa boruboru dobige, bo?”

⁴⁹ Be raġanine Yesu na tauwai muriwatanama nama kauinama a kitakitana, taudi a riuna, “Bada, kwa ġoegoemina tauma ama kwatikwatima ka kwadiedi, bo?”
⁵⁰ Naumeki da tauġoma tenaġa kwatikwati ya kwadie be pirisi adi badama na taunoyama beanama kasaunama yai miarakana.

⁵¹ Be Yesu ya riuna, “Avedi! Ko gose pore!” Dabudine Yesu inam tauġominama beanama ya taukoni be yai yawasanina.
⁵² Be Yesu pirisi adi babadama, tempol babadidima be banaga adi babadama ġesaudima mate ya riuedina, “Taumi kwapi be kwatikwati koya kiroġa be koya verauna tau-danedanene ko vunuġi, bo? ⁵³ Taugu raġan matabuna taumi mate tempolnopone tē miamiana, be dabudine taumi nam ko vunuġiguna. Be naumeki da yodi taumi ami raġanima. Yodi tadiwanawana* na waibadama raġaninama.”

Pita Yesu e boviena

(Mt 26:57-58, 69-75; Mk 14:53-54, 66-72; Jn 18:12-18, 25-27)

⁵⁴ Dabudine taudi Yesu a pani be a nawena pirisi adi badama na vadae. Be Pita muriġa yai muriwatanedina.
⁵⁵ Be inam banegidima taudi pirisi na vadama diane anikaba etare, dabudi kai a dena be diane a miamiana, be dabudine Pita mate diedie ya miamiana. ⁵⁶ Be taunoya waivinama tenaġa e kitana be Pita kai diane ya miamiana, dabudine ya kita yaġeyaqe be ya riuna, “Kaua tauġominama mate Yesu murinaġa ya naġonaġona!”

⁵⁷ Dabudine tauna ya bovi be ya riuna, “Ibewa! Taugu Yesu nam e kataien!” ⁵⁸ Be a mia da raġan ġaubonāġa be banaga ġesau e kitana be ya riuna, “Tam mate Yesu turanama!” Be Pita ya riuna, “Ei, nam taugu!” ⁵⁹ Naumeki da a taumia raġan ġaubonāġa be tauġoma ġesau ya riu gurata be ya riuna, “Ee, riukaua inam tauna mate Yesu yawai muriwatanena, baninama tauna Galili provins baneginama!” ⁶⁰ Be Pita ya riuna, “Ei badam, tam aba kwa giugiuena taugu nam e kataien!” Be Pita yaġoro nama ya giugiu be kamkam ya riuna.

* **22:53:** Baibol nopone ‘tadiwanawana’ e giugiuena, inam baninama penama bo Seitan adi rewapanama.

⁶¹ Dabudine Bada yai tautinamuri be Pita ya kitadidina. Inam rağanine Pita Yesu na giuma uma ya noğotina, ‘Tam rağan rabuiteğä kwa bovieguna da tam nam taugu ku kataieguna, muriğä da kamkam e riuna.’ ⁶² Be dabudine Pita ya dobi doğae be ya ġaba da ya ġaba guratana.

*Yesu a nawena tauwai tarapiri babadidima† ġarodie
(Mt 26:59-66; Mk 14:55-64; Jn 18:19-24)*

⁶³ Be banaga aitaüğä Yesu taukita wataninama taudi Yesu waivarevarenama be riğanama ai karena. ⁶⁴ Taudi Yesu matanama a suma be a riuriuena, “Kwai peroveta da aitau kabe ya riğam.” ⁶⁵ Be taudi ġasi gewegewedima toitoi mate tauna a riuriuena.

⁶⁶ Rağantotom babada a rawateğeidina, taudi inam pirisi adi babadama, tarawatu tauwai katakataidima be banaga adi babadama. Yodibe Yesu ai doka verauğena ġarodie. ⁶⁷ Yodibe taudi Yesu ai taravirena, “Kwa riuemai, tam Keriso, bo?” Be tauna ya paribeedi be ya riuna, “Değoda taugu yà riuemina, taumi tokare nam koi sumağegu, ⁶⁸ be değoda taugu taumi sibo èi taraviremina, taumi nam tokare koya paribeeugu. ⁶⁹ Be yodi da nokoi ya nağona Banaga Natunama Mamaitua wairewapana vavasağınama nimanama kasaune e miana.”

⁷⁰ Dabudine taudi matabudi ai taravirena, “Tam Mamaitua Natuna, bo?” Be tauna ya riuedina, “Taumi aba ko vatovatona, vutuna taugu.” ⁷¹ Be taudi a riuna, “Tauma yodi nam matamata ġesaudima kama ġoeğeoedina, baninama tauma matabumai kè vaiena tauna aba ya vatona.”

23

*Yesu a nawena Paelat be Herod ġarodie
(Mt 27:1-2, 11-14; Mk 15:1-5; Jn 18:28-38)*

¹ Dabudine banaga matabudi borue a midisuğü be Yesu a nawena Paelat ġarone. ² Be dabudi taudi waiwavunama ai karena be a riuna, “Tauma kè vaie da uma baneginama tauna banaga yawai doka waigewedı, be ya riuna da nam sibo Sisa ġarone ai teks, be mate tauna ya riuna da taunağä guyau be Keriso.”

³ Vutuna aubainama Paelat Yesu yai taravirena, “Tam Jius adi guyau, bo?” Be tauna ya riuna, “Vutuna kwa vatovatona.” ⁴ Be Paelat, pirisi adi babadama be patara ya riuedina, “Taugu nam aba gewagewanama uma baneginama ġarone e banavina.” ⁵ Be taudi a riu vavasağana, “Tauna Jius

† 22:62: Tauwai tarapiri babadidima inam banaga adi babadama, tarawatu tauwai katakataidima be pirisi adi babadama tauna boru yawai badena.

nopone na waikatakataima, aubainama banaga nuedima ya sorusoru viviridina. Tauna Galili nopone waikatakatai yai karena da uma dobudine ya tavana.”

⁶ Rağanine Paelat e vaiena be banaga Galili provins a vatovatona, dabudine tauna yai taravidedina, “Tauna Galili provins banegina, bo?” ⁷ Be dabudine e vaiena be Yesu Herod na waiguyauma* nopone, naumeki da tauna ya riuporena Herod ġarone. Baninama inam rağanine tauna Jerusalemma ya miamiana aubainama.

⁸ Rağanine Herod Yesu ya kitakitana, tauna nuanama ya vere kauana, baninama tauna bonidego be ya ġoeġoena sibo Yesu ya kitana. Baninama Yesu yaba toitoi yawai tubuġidina ya vaiena, vutuna aubainama Herod yawai noġotana Yesu sibo mataira ya voie be tauna ya kitana. ⁹ Be Herod giu toitoi Yesu yai taravirevirena, be Yesu nam i paribeena. ¹⁰ Dabudine pirisi adi babadama be tarawatu tauwai katakataidima a midisuġu be Yesu ai wavy vavasaġena. ¹¹ Be Herod na tauiġarama mate Yesu ai varavara be a raukivi gewagewa kauena. Be Herod gara waimata kanikaninama Yesu yai kote be ya riupore nawe munaġena Paelat ġarone. ¹² Inam rağanine Paelat be Herod ai turana kauana. Be noġone taudi awai mia taurina.

Paelat ya riuna da Yesu e gurina

(Mt 27:15-26; Mk 15:6-15; Jn 18:39-19:16)

¹³ Paelat, pirisi adi babadama, babada ġesaudima be banaga ya rawateġeidi ¹⁴ be ya riuedina, “Taumi uma banegi-nama koya verauġe ġarogue be koya riuna da tauna banaga ya sorusoru viviridina, be taugu noġomie è etare be è banavi da taumi ami waiwavuma matabudi nam banidi. ¹⁵ Be tenegiñama Herod nama, be ya riupore munaġena ġarode, baninama tauna nam aiyaba i banavina da Yesu sibo ai guri. ¹⁶ Vutuna aubainama taugu yodi tauna yà kovoġi be yà riupore da e naġona.” ¹⁷ (-)†

¹⁸ Be banaga matabudi a rauyogo tenaġa be a riuna, “Koi guri, be Barabas ko kaiporena tauma ama ġoanama!” ¹⁹ Be Barabas tauna dibure a boruna, baninama tauna meagai nopone iġara dosinama yai kare, be banaga yai gurina. ²⁰ Be Paelat banaga ya riu munaġedina, baninama tauna ya ġoeġoena Yesu sibo ya kaiporena aubainama. ²¹ Be taudi Paelat a rauyogoe be a riuriuna, “Kwa tuparatu, kwa

* **23:7:** Herod na waiguyauma inam Galili provins nopone be Paelat na waiguyauma inam Judia provins nopone. † **23:17:** Vers 17 inam banaga muriġa baibol nopone a boru saġena, noġone nam i kenakenana. Vers 17 inam umanama: Soi matabuna nopolie Paelat dibura banegidima tenaġaġa e kaikaiporaġana.

tuparatu!”²² Be Paelat rağan wairabuuiteğanama ya riu munağedina, “Be uma baneginama aba e gewagewanama ya voie? Taugu nam aba e banavina da yài guri! Taugu yà kovoğí be yà riupore be e nağona.”

²³ Be taudi a mia rasarasa be a ġoeğoenä sibo Yesu a tuparatuna korosie. Be taudi yağoro a rasarasana. ²⁴Dabudine Paelat nuanama ya vitare da banaga adi ġoanama nama e voiena. ²⁵ Be tauğoma meagai nopone iğara yai kare be banaga yawai gurina, tauna dibure be Paelat ya riupore da ya nağona, banaga adi ġoanama ruvane. Be tauna Yesu taudi nimiedie ya boru da adi ġoanama nama a voiena.

Yesu a tuparatuna korosie

(Mt 27:32-44; Mk 15:21-32; Jn 19:17-27)

²⁶Dabudine Yesu ai doka dobiğe da a nawenawe, be kedae tauğoma tenağ a banavina isanama Saemon, tauna Sairin meagainama tauğominama. Tauna sipie be ya munamu-nağana meagaie. Naumeki da tauna a vunuğ be korosi ai kiroğina, be tauna Yesu ya sagu da korosi ya kiroğina. ²⁷ Be patara dosinama tauna murinağ a nağonağona, be nopodie waiwaivi mate, be taudi Yesu ai nuaboye be a ġabağabana. ²⁸ Dabudine Yesu yai tautinamuri be ya riuedina, “Taumi Jerusalem waiwaivimima nam ko ġabegu, be taumi be ami sedama mate ko ġaba munağemina! ²⁹ Baninama rağan ta tavana da taumi ko riuna, ‘Nuavere dosinama waiwaivi kaikaipokidima ġarodie be aitaüğa nam ti bogana be susudie nam seda ti susurubudina.’ ³⁰ Inam rağanine banaga oya ta riuedina, ‘Debamaie ko beku da ko dobotawamai!’ Be oya ġauğaubodima ta riuedina, ‘Ko ruputawamai!’ ³¹ Değoda taugu kai gidegideviguma ġarogue nama banaga ta voivoiana, naumeki da banaga maika kai pokidima ġarodie tokare aba e tubuğ?”

³² Be tauığaiğara banaga gewegewedima rabui mate ai doka tenağedina waiguridima aubainama.

³³ Rağanine taudi dobu isanama ‘Debagarere’ dabudi a tavatavana, taudi korosie Yesu a tutuna, be banaga gewegewedima rabui mate. Tenağ a Yesu kasaunama yauwane be tenağ seninama yauwane.

³⁴ Be Yesu ya riuna, “Mamai kwa noğota poredi, baninama taudi nam ti kataiena aba ta voivoiena!” Be tauığara Yesu na garama a kasiedina. ³⁵ Be banaga patara dabudine a midi be yaba matabuna a kitekitedina. Be babada Yesu ai kwatekwateve be a riuriuna, “Banaga ġesaudima yai yawasanidina, be yodi taunağ a ei yawasana munağe değoda tauna Keriso,

Mamaitua na vinevinema!”³⁶ Be tauīgaiāgara mate waikwatekwatevenama, aubainama taudi waen wairurunama ai tego be a riuna,³⁷ “Değoda tam Jius adi guyauma, naumeki da kwai yawasana munāgēm!”

³⁸ Be kai ġaubonama bogane a girumana raġan rabuitegħa, Gurik bonane, Letin bonane be Hibru bonane be a riuna:

UMA TAUNA JIUS ADI GUYAUMA

be korosi bogane a tutuna Yesu debane.

³⁹ Be gewagewa tauġominama tenaġħa dabudi ya dawedawena yai dibogħi be ya riuna, “Tam Keriso da kwai yawasanim be kwai yawasanimai!”⁴⁰ Be gewagewa baneginama ġesaunama turanama ya riutuāgħie be ya riuna, “Tam wainuatoitoi teneġinama kwa paġopaġona maika Yesu, vutuna aubainama tam Mamaitua sibo kuya vivirena nam kuyai dibogħi,⁴¹ baninama tauda tà gurina dà gewagewama aubaidima inam naumeki, be tauna nam aba gewagewanama i voiena da sibo ya guri.”⁴² Be dabudine ya riuna, “Yesu tam am waiguyaumanopone kwa saġasaġħana raġanine, kwa noġotiguna.”⁴³ Be Yesu ya riuela, “Yà riuriu kauemna da tam manaka taugu mate paradaisie‡ tà miana.”

Yesu ya gurina

(Mt 27:45-56; Mk 15:33-41; Jn 19:28-30)

⁴⁴⁻⁴⁵ Naumeki be suaratopunama suara ya duba be dobu matabuna yai kupikupina, be nama ya kenana da ravie nama be dobu ya yana munaġa. Inam raġanine gara tempol nopone matakedha awai saurina poune ya nuasika poraġa§ da ma nevana a kenana.⁴⁶ Be Yesu bonanama dosine ya riuna, “Mamai, aruiguma nimame yà boruboruna!” Tauna nama ya riuriuna, naumeki da ya gurina.

⁴⁷ Dabudine Rom adi badama aba a tubutubuġħana nama ya kitakitana, tauna Mamaitua isanama ya kaisuġu be ya riuna, “Naumeki riukaua, uma tauna inam didimana baneginama.”⁴⁸ Be banaga matabudi a veraveruna Yesu tuparaturunama kitianama aubainama, raġanine aba ya tubutubuġħana nama a kitekitedina, taudi ai nuaboya kaua be nimedima nuakadedie a biridi be a munaġħana.⁴⁹ Dabudi Yesu na banagama matabudi be waiwaivi Galilima be awai muriwatanena, taudi mate ġavoe a midi be yaba matabudi a tubutubuġħana a kitekitedina.

‡ 23:43: ‘Paradaisi’ inam banaga aitaūgħa Yesu tawai sumāġe be ta gurigurina, dobudine ta naġħona. § 23:44-45: Gara ya nuasikana, vutuna aubainama tauda yodi nam tempol bo pirisi bo musara tà raupuyo Mamaitua ġarone. Baninama Yesu ya gurina, be yabedima matabudi a kovina. Be yodi tauda didimaninama Mamaitua ġarone tà naġo ġomana.

Yesu waikokoaginama

(Mt 27:57-61; Mk 15:24-47; Jn 19:38-42)

⁵⁰ Dabudine tauğoma tenağ a isanama Jousep. Tauna tenağ a tauwai tarapiri badanama, be tauna na yawasanama verenama be didimaninama. Be tauna ⁵¹ Mamaitua na waiguyauma ya raberabena da sibo ya tavana. Be inam baneginama tauna na banagama yaba matabudi a giuguedi be a voivoiedina tauna nam i aninedina. Tauna Jius meagaine, isanama Arimatiam, be ya verauna. ⁵² Naumeki be tauna ya nağona Paelat ġarone be Yesu tubuğinama aubainama yai bağana. ⁵³ Yodibe ya kiroğ a dobiġe da garae ya suma be kokoaga guba voivoienama nopone ya boruna, noğone nam aitau inam kokoagine ti boru rubuna.

⁵⁴ Inam rağaninama vokaukaua na rağanima, be Sabat rağaninama ġaubonağ a e tava. ⁵⁵ Be dabudine waiwaivi aitaúga Yesu Galili provins nopone ai muriwatane be a veraverauna, taudi Jousep ai muriwatane da kokoagae be nema Yesu tubuğinama e boru bakena, vutuna kitanama aubainama. ⁵⁶ Dabudine waiwaivi a munağana vadae da upa be bunama ġabuğabudima a vokaukaudina Yesu tubuğinama aubainama. Be Sabat rağanine taudi a siperena, adi tarawatuma e riuriuna nama.

24

Yesu e midisuğu munağana

(Mt 28:1-10; Mk 16:1-8; Jn 20:1-10)

¹ Sande rağantomtom waiwaivi upa be bunama ġabuğabudima voivoia wainonoğidima a kiroğ a be a nağona kokoagae.* ² Be taudi kokoagae a tavatavana, ta kitana be kokoaga matakedanama yeku waimidotnama ya rawakui da ġavoe ya nağona. ³ Naumeki da taudi kokoaga nopone a sağana, be Bada Yesu tubuğinama nam dabudine. ⁴ Be taudi uma kauinama awai riu nuababağ e tautauğoma rabui, adi garama waimatakanikanidima, ai rağantenäğe da diedie a mağatarana. ⁵ Dabudine waiwaivi a naira kaua be noğodima doğae ya yovona, be tautauğoma rabui a riuna, “Aba aubainama taumi banaga yawayawasaninama banaga guriguridima nopodie ko wanewane? ⁶ Tauna nam uma dobudi. Ya midisuğu munağana. Tauna boni taumi mate Galilima be nema ya riuriu bakemina, vutuna ko noğot! ⁷ Tauna umanama ya riuna, ‘Mamaitua ya ġoena da Banaga Natunama banaga gewegewedima nimedie ta boru nawe da korosie ta tuparatuna. Be tauna rağan wairabuiteğane e midisuğu munağana.’ ”

* **24:1:** Uma kokoaginama inam guba nopone.

⁸ Dabudine waiwaivi riunama a noğotina ⁹ be kokoaga a gose pore da a munağana apasol 11 be tauwai muriwatana gesaudima mate ġarodie. Be waiwaivi yaba matabudi tauwai muriwatana a riuedina. ¹⁰ Inam waiwaividima taudi Meri Magdalin, Joana be Meri tauna Jeims tinanama. Taudi be waiwaivi gesaudima mate uma kauidima apasol a riuedina. ¹¹ Be apasol ai noğotana waiwaivi adi riuma kabe kaiyovu aubainama, taudi nam ti sumağedina. ¹² Dabudine Pita ya midisugu, ya manini be kokoagae ya nağona. Be tauna ya raudune yovo da garağɑ ya kitedina be nam aba gesau. Naumeki da ya munağana vadae, be ya nuababağana aba ya tubuğɑ.

Tautauğoma rabui Emausma a nağonağó be Yesu ya mağatarana

(Mk 16:12-13)

¹³ Inam rağaninama teneğine tautauğoma rabui taudi a nağonağona meagaie, uma meagainama isanama Emaus. Be inam meagaine da Jerusalem na madanima inam 10 kilomita. ¹⁴ Be taudi ma turana yaba matabudi Jerusalemma a tubutubuğana awai giugiu edina. ¹⁵ Dabudine taudığɑ awai giugiu nağó be Yesu ya tava da taudi mate a nağonąğona. ¹⁶ Be taudi Yesu a kitana be nam ti kataiena da tauna aitau.

¹⁷ Be Yesu ya riuedina, “Taumi aba kowai giugiu nağoe?” Naumeki da taudi ma nuaboyedi a midi kwasa ¹⁸ be tauğoma tenağɑ isanama Kleopas, tauna Yesu ya riuena, “Tamğɑ Jerusalem nopone nam ku kataie da aba a tubuğɑ uma rağandie?” ¹⁹ Be Yesu ya riuna, “Aba yabedi?” Be taudi a paribeena, “Yaba matabuna Nasaret Yesunama ġarone a tubutubuğana, vutuna ka giugiu edina. Tauna peroveta be na giuma be na voiama matabudi ai rewapanan kauana yai mağataridina, Mamaitua be banaga matedie. ²⁰ Pirisi adi babadama be tauma ama babadama ai utaena Rom ġarodie da korosie a tuparatu be ya gurina. ²¹ Be tauma kè noğotana da tauna kabe Israel damnama ei yawasanidi, be uma kauidima a tubuğana yodi rağan rabuiteğɑ a kovina. ²² Be manaka waiwaivi gesaudima ġaromeiae a riuwai nuababağimaina, baninama taudi rağan tomtom a nağona kokoagae ²³ be Yesu tubuğinama nam ti banavina. Be taudi a verau munağɑ be a riuna da anea ġarodie a mağatara be a riuna da Yesu ya yawasanana. ²⁴ Naumeki da tauma ama banagama gesaudima a nağó kokoagae a tavana, be aba waiwaiyi a riuriuena nama a kitana. Taudi Yesu nam ti kitana.”

²⁵ Dabudine Yesu taudi ya riuedina, “Taumi buebuemima. Aba aubainama peroveta a riuriuna taumi nam koi sumağedi? ²⁶ Keriso tauna uma yabedie ei nuatoitoina

muriā be e naōona na neneğarae.”²⁷ Be dabudine Yesu peroveta adi giuma girugiruminama poranama nopone, matabudi tauna na kauama a giugiuena, taudi ya giu waibatedina. Tauna Mousis na bukae giu yai karena da peroveta ġesaudima ġarodie ya tavana.

²⁸ Be taudi meagai diane a tavatavana raġanine, Yesu ya voie da kabe i dokadoka. ²⁹ Be taudi a riu vavasaġena, “Suara ya kovina, kaiteka kupi, tauma mate tà miana!” Naumeki da tauna adi vadae ya saġa be dabudi a miana. ³⁰ Be raġanine kani aubainama dabudi Yesu buredi ya paġo, da Mamaitua yai kaiwe, yodibe ya giva da ya utedina. ³¹ Be dabudine taudi matedima ya kaya be Yesu a kataiena, be inam dabudine yai raġantenaġe da tauna ya samoana.

³² Inam dabudine taudiġa ai giugiu be a riuna, “Kwa noġonoġoti bo ibewa raġanine kedae girugirumidima poranama ya giuedi be nuadama kai maika ya karatina.” ³³ Inam raġaninama tenegħine taudi a midisuġu be a naōona Jerusalemma apasol 11 be ġesaudima mate ġarodie. ³⁴ Be taudi raġanine Jerusalemma vadae a saġasaġana, dabudine tauwai muriwatana inam banegidima rabui a riuedina, “Bada riukaua ya midisuġuna, tauna Saemon ġarone ya maġatarana.” ³⁵ Dabudine tautauġomidima rabui aba kedae ġarodie ya tubutubuġana tauwai muriwatana ai varidina. Be mate taudi ai varidina da Yesu buredi ya givagivana raġanine, taudi a kataiena da tauna aitau.

*Yesu na tauwai muriwatanama ġarodie ya maġatarana
(Mt 28:16-20; Mk 16:14-18; Jn 20:19-23; Ap 1:6-8)*

³⁶ Taudi inam kauinama yaġoro a giugie be Yesu tauna ġominama poudie ya raumidire be ya riuedina, “Suba ġaromie e kenana.” ³⁷ Be taudi a ġosoridi be naira nopodima ya moġavuna, baninama taudi ai noġotana kabe ġaġarua ti kitakita. ³⁸ Be tauna ya riuedina, “Taumi aba aubainama ko nainaira be nopomima e vovo raġaraġa?” ³⁹ Nimagu be kaġagħuma ko kitedi be ko kataie da inam taugu. Be ko taukonigu da ko kataiegħu da taugu nam ġaġarua, baninama ġaġarua taudi nam visiġodi bo turiġidi taugu maika.” ⁴⁰ Yesu nama ya riuriuna, naumeki da tauna nimana be kaġanama yai kataidina.

⁴¹ Inam raġanine taudi nuedima ya vere kaua be a mosamosari koena be nam ti sumaġena. Vutuna aubainama tauna ya riuedina, “Kani ġaromie e kenakena bo ibewa da taugu ya kani?” ⁴² Be taudi iyana gabugabunama nevanama a utena. ⁴³ Be tauna ya paġo be matedie ya kanina.

⁴⁴ Dabudine Yesu ya riuedina, “Dokane taugu taumi mate rağanine be è riuemina da yaba matabudi Mousis na tarawatuma, peroveta be Salamo nopolie a girugirumidina taugu aubaiguma, nama yodi ta tubutubuğana.” ⁴⁵ Dabudine Yesu taudi noğota ya sagudi da taudi girugiruminama poranama a noğoti be a kataieno, ⁴⁶ be ya riuedina, “Girugiruminama porane umanama a girumina: Keriso ei nuatoitoi be rağan wairabuiteğane guriguridima nopolie tauna e midisuğu mu-nağana. ⁴⁷ Be tauna na rewapanae noğota vitara be noğota porağ'a dobu matabudi nopolie ta rauguguyedina. Be rau-guguya inam Jerusalemma tai karea. ⁴⁸ Be taumi inam kauidima matabudi adi matamatama. ⁴⁹ Taugu Tamaguma aba ya riuriueguna,[†] tokare ya riuporena taumi ġaromie. Be taumi Jerusalem meagaine ko miana, naumeki da Mamaitua na rewapanama ko pağona.”

Yesu e nağonağona marae

(Mk 16:19-20; Ap 1:9-11)

⁵⁰ Naumeki da Yesu na tauwai muriwatanama Jerusalem meagaine be yai doka nawedina Betenima. Dabudine tauna nimanama ya kaisuğudi be na tauwai muriwatanama yai aiainidina. ⁵¹ Be tauna yawai aiainidina maika, Mamaitua tauna ya nawena marae. ⁵² Be tauwai muriwatana tauna a raudunee be nuedima ya vere vavasağana, be ma mosaridi a munağana Jerusalemma. ⁵³ Be rağan matabuna taudi tempol nokane a mia be Mamaitua isanama a kaikai suğusuğuna.

[†] **24:49:** Baninama, inam da tauna Arua Babau e riuporena.

Jon

Riu yai rawabanagana

¹ Boni pakane muriā da dobu ya tubuāna, Riu taunaāga ya kenakenana. Be Riu tauna Mamaitua mate. Be inam Riunama vutuna tauna Mamaitua. ² Inam Riunama tauna boni pakane Mamaitua mate a miamiana. ³ Inam Riune yaba matabudi a tubuāna. Be tauna ibewa, yaba yodi ta kenakenana tokare nam a tubuā. ⁴ Tauna ġarone yawasana ya kenakenana. Be inam yawasaninama vutuna banaga adi kodamma. ⁵ Be inam kodamnama tadiwanawanae e yanayanana, be tadiwanawana nam teneteneğina da inam kodamnama sibo ya suragaba.

⁶ Be Mamaitua banaga tenāga ya vinena isanama Jon, ⁷ be ya riu pore da banaga ġarodie inam kodamnama e giuena, be inam giune banaga matabudi sibo ai sumāga. ⁸ Jon tauna nam kodam. Ibewa, tauna ya verauna kodamnama e rauguguyena. ⁹ Riukaua kodamnama ya veraverauna dobue, vutuna banaga ewai yanedina.

¹⁰ Tauna vutuna dobu be yaba matabuna ya voiedina. Be tauna dobue ya miamiana raġanine, banaga yaġoro tauna a nuababaġena. ¹¹ Tauna ya yovona na dobue, na banaga ġomama ġarodie, be taudi nam ti aninena. ¹² Be aitauāga tauna ai anine be isane awai sumāga, taudi vutudi yai aninedi da Mamaitua natunatunama a tubuāna. ¹³ Taudi nam banaga kosinine ti tubuāna. Be taudi nam tubuāna na ġoane bo banaga na ġoane ti tubuāna, ibewa da Mamaitua ġarone a tubuāna vitarana.

¹⁴ Riu yai rawabanaga be ġarode dobue ya miana. Tauna raukivivere be riukaua nophonama ya moġavuna. Be Mamaitua na neneğarama matabuna nuuanunama Natunama tenāga ġominama ya uteutena tauma kē kitana.

¹⁵ Jon inam baneginama vutuna ya rauguguye be ya riuna, ‘Uma baneginama vutuna boni umanama ē riuriuemina, ‘Banaga murigue e veraverauna tauna ya saġa vavasaġana, nam maika taugu. Baninama muriā da taugu ē tubuāna, tauna boni nama miemieninama.’ ”

¹⁶ Be na raukivivere tauna vere toitoi tabu be tabu ya utedana, ¹⁷ raukivivere be riukaua Yesu Kerisoe a verauna. Be Mousis tauna tarawatu taunaāga ya utedana. ¹⁸ Nam aitau airāġan Mamaitua i kita rubuna, be Natunama tenāga ġominama tauna vutuna Mamaitua, Tamanama nuuanue miemieninama, vutuna Mamaitua ġarode yai maġatarina.

*Jon tauwai babataito Keriso varinama e rarauguguyena
(Mt 3:1-2; Mk 1:1-8; Lk 3:1-18)*

¹⁹ Jerusalemma Jius babadidima taudi pirisi be Livait banegidima a riupore nawedina Jon ġarone, da ai taravire be sibo a kataiena tauna aitau. ²⁰ Be Jon riukaue ya paribeedi be ya riuna, “Taugu nam Tauwai yawasana.”

²¹ Dabudine taudi ai taravira munaġena, “Be tam aitau? Peroveta Elaija, bo?” Be tauna ya riuna, “Ibewa.” Be taudi ai taravira munaġena, “Mamaitua ya sausaugena peroveta raġan damone e tavana, vutuna tam, bo?” Be tauna ya riuna, “Ibewa.”

²² “Be yodi tam aitau? Tam giu baninama kwa ute yaġemai be tauma ka paġo da ka munaġe be tauriuporemaima kai varidina. Tam nema kwa noġonogoġota bakem, tam aitau?”

²³ Be tauna ya paraibeedi be peroveta Aisaia na giue ya riuedina,

“Taugu vutuna banaga dobu kavakavane bonanama dosine umanama e riuriu, ‘Bada na kedama ko kawa didimani.’”

²⁴ Dabudine Parisi adi banagama a riuriuporedina Jon waitaravirenama aubainama. ²⁵ Taudi Jon ai taravire be a riuna, “Deġoda tam nam Keriso bo Elaija bo Mamaitua peroveta ya sausaugena, naumeki da aba aubainama tam yodi banaga kwawai babataitodi?”

²⁶ Be Jon ya paribeedi be ya riuna, “Taugu upae yàwai babataitonā be banaga tenaġa poumie nam ko kataiena, ²⁷ tauna vutuna tokare murigue e tavana, be taugu nam veregu da tauna na kaġasumama yà kaiporaġa.” ²⁸ Inam kauidima matabudi Betenima a tubuġana, upa Jodan be noaġo nevane. Inam dabudine Jon banaga yawai babataitodina.

Mamaitua Na Sipuma Yesu

²⁹ Pomainama Jon Yesu ya kitana, ġarone ya veraverauna, be Jon ya riuna, “Ko kita, tauna vutuna Mamaitua Na Sipuma. Banaga sipu natunama ta vunuġi be ta tipatipana, nama Mamaitua Na Sipuma yai utaena da banaga adi gewagewama dobue e koġa poredina. ³⁰ Uma baneginama vutuna boni taugu umanama è riuriuemina, ‘Banaga murigue e veraverauna, tauna ya saġa vavasaġana, nam maika taugu. Baninama muriġa da taugu è tubuġana, tauna boni nama miemieninama.’ ³¹ Noġone taugu nam e kataiena da aitau Keriso, be taugu è verau be upae banaga èi babataitodina da tauna Israel banegidima ġarodie e maġatarana.”

³² Be Jon umanama ya riuna, “Taugu è kitana Arua Babau marae be ya yovona kiu gabubu maika, be Yesu debane ya miana. ³³ Noğone taugu nam e kataiena da tauna Keriso be Mamaitua taugu upae waibabataito aubainama ya riuriuporeguna rağanine, umanama ya riueguna, ‘Tam tokare Arua kwa kitana e yovo be banaga aitau debane e miana, tauna vutuna tokare Arua Babaue ei babataitonā.’ ³⁴ Taugu uma kauinama nama è kitana Yesu ġarone ya tubuğana. Vutuna aubainama yà riuriu kauemina da tauna vutuna Mamaitua Natuğominama.”

Yesu tauwai muriwatana dokenama

³⁵ Pomainama Jon ya tava munağā be na tauwai muriwatana rabui mate a midimidina. ³⁶ Be rağanine Jon e kitana be Yesu dianağā ya nağonağona, inam dabudine tauna ya riuna, “Ko kita, tauna vutuna Mamaitua Na Sipuma.” ³⁷ Be Jon na tauwai muriwatanama rabui inam riunama a vaivaiena rağanine, taudi Yesu ai muriwatanena.

³⁸ Dabudine Yesu yai tautinamuri da taudi ya kitedi be yai taraviredina, “Aba ami ġoşa?” Be taudi a paribee be a riuna, “Rabai, tam değō dabudine am kaba mia?” (Giu ‘Rabai’ baninama inam ‘Tauwai katakatai’) ³⁹ Be Yesu ya riuedina, “Ko verau ko kita.” Naumeki da 4 okoroki nama taudi tauna mate a nağona na kaba miae be dabudine a mia kupina.

⁴⁰ Inam tauwai muriwatanidima rabui, be tauğoma tenağā isanama Endru, tauna Saemon Pita tuağanama. ⁴¹ Dabudine Endru aba ya voienā inam noğone ya nağō tasinama Saemon ya wane, be ya riuena, “Tauma Mesaia kè banavina.” Mesaia baninama inam Keriso.

⁴² Naumeki da Endru Saemon yai doka verauğena Yesu ġarone, be Yesu Saemon ya kita be ya riuena, “Tam Saemon, Jon natunama be yodi tokare yài isamna ‘Kipas’ inam baninama ‘Pita’.”*

⁴³ Pomainama Yesu Galili nağonama yai taina. Be kedae tauna Pilip ya banavi be ya riuena, “Kwai muriwatanegu!” ⁴⁴ Pilip tauna Betsaida baneginama maika Endru be Pita.

⁴⁵ Naumeki da Pilip Nataniel ya banavi be ya riuena, “Tauma Tauwai yawasana kè banavina. Inam Nasaret Yesunama Jousep natunama. Tauna vutuna Mousis na tarawatue be peroveta adi bukae a girugirumina.” ⁴⁶ Be Nataniel yai taravirena, “Tam aitau ya riuem da tokare Nasaretma† vere e tubuğā?” Be Pilip ya riuena, “Kwa verau be kwa kita.” ⁴⁷ Be Yesu e kitana, be Nataniel tauna ġarone ya

* **1:42:** Riu ‘kepas’ be ‘Pita’, inam baninama ‘yeku’. † **1:46:** Peroveta a riuriuna da Tauwai yawasana tokare Betliemma e tubuğana, be nam Nasaretma.

veraverauna. Dabudine Yesu ya riuna, “Uma riukaua Israel baneginama, tauna nam kaiyovu nopone ima kenakenana.”⁴⁸ Dabudine Nataniel Yesu yai taravirena, “Tam nemanama taugu kuya katai bakegu?” Be Yesu ya paribeena, “Taugu tam kai damaya pakane è kitamna, muriğā da Pilip ya riuem be koya verauna.”⁴⁹ Dabudine Nataniel Yesu ya riuena, “Tauwai katakatai, tam riukaua Mamaitua Natunama, be Israel guyaunama tam.”

⁵⁰ Be Yesu ya riuena, “Tam kai damaya pakane è kitam be è riuemna aubainama kuyai sumağā, bo? Be nam inam vutunağā, tam yaba ġesaudima dosidima mate tokare kwa kitedina.⁵¹ Be yà riuriu kauemina da taumi tokare ko kitana mara e nuaporağā be Mamaitua na aneama ta sağasağā be ta yovoyovona Banaga Natunama ġarone.”

2

Matakopa soinama Keinama

¹ Rağan wairabuiteğane matakopa soinama Keina meagaine ya tubuğana Galili provins nopone. Be Yesu tinanama mate dabudine. ² Yesu be na tauwai muriwatanama mate a kokonedina inam soinama aubainama. ³ Be waen ya kovina rağanine, Meri Yesu ya riuena, “Banaga adi waenma ya kovina.”

⁴ Be Yesu ya riuna, “Tam be taugu dà noyama dabudine nam ima kenakenana. Taugu yau rağanima nam i tavana.”

⁵ Dabudine Yesu tinanama taunoya ya riuedina, “Aba tauna e riuriuemina, naumeki da ko voiena.”

⁶ Inam dabudine vaivai raukoğanama kadi dugima matabudi 6 a midimidina. Dugidima a moraba vavasağana, tenatenağāga 100 lita ruvanama. ⁷ Be Yesu taunoya ya riuedina, “Uma dugidima matabudi upa koi moğavudina.” Naumeki da taudi dugi upa ai moğavu taritaridina. ⁸ Yodibe taudi ya riuedi da upa dugi nopone a redu be soi taupakinama a utena. Yesu aba ya riuriuen, nama taudi a voiena.

⁹ Be soi taupakinama upa e tego rubuna be upa yai rawawaenna. Be soi taupakinama nam i kataiena da uma waennama aikedae be ya tava, be taunoya aitaüğā upa tauredunama, taudiğā a kataiena. Dabudine soi taupakinama nağıvau tauğominama ya riue da ġarone ya tava¹⁰ be umanama ya riuena, “Tam waen dinidininama vutuna sibo kuya soi dokena, be ware a tegotego buana murine, tam waen ġesaudima tometomedima sibo kuya soiedina. Tam aba aubainama waen verenama kuya rabe kwase be yodi kuya dobiġe?”

¹¹ Uma inam Yesu mataira pakanama voienama yai karena Keina meagaine, Galili provins nopone. Inam kedane tauna neneğarinama yai mağatari be na tauwai muriwatanama ai sumägena.

¹² Matakopa soinama murine Yesu be tinanama, tasitamina be na tauwai muriwatanama mate a nağona Kapeniam meagaine. Be taudi dabudine a taumiana rağan bisanama.

Yesu tempol nopone taukune banegidima ya tavu dobiğedina

(Mt 21:12-17; Mk 11:15-19; Lk 19:45-48)

¹³ Be Nağopore soinama rağaninama ya tavatavana aubainama, Yesu ya sağ'a ya nağona Jerusalemma. ¹⁴ Be dabudine tempol nopone taukune banegidima ya kitedina, taudi kau, sipu be kiu bunebune a gimagimaredina. Be mane tauwai sensinama banegidima mate ya kitedina dabudine a miamiana. ¹⁵ Dabudine Yesu kwapu taie ya voie, yodibe taukune, sipu, kau mate, matabudi tempol nopone be ya tavu dobiğedina. Be mate mane tauwai sensinama banegidima adi vatarama ya rika be mane doğae yai yaraiedina. ¹⁶ Be taudi aitaüğ'a kiu bunebune a rarau gimaredina ya riuedina, "Uma yabedima ko nawedi ġavoe! Tamaguma na vadama nam ko voie da anikune gabunama e tubuğ'a!"

¹⁷ Uma kauinama ya tubutubuğana rağanine, na tauwai muriwatanama aba giruma porane a girugirumidina vutuna a noğotina: "Taugu am vadama nuaboyanama nopogue kai maika e vakivakina."

¹⁸ Dabudine Jius babadidima Yesu a riueno, "Mataira kwa voie be tauma ka kita be ka kataie da tam ġarome rewapano e kenakenana, aubainama uma kauidima kwa voivoiedina."

¹⁹ Be Yesu taudi ya riuedina, "Uma tempolnama ko katiwei be taugu rağan rabuiteğ'a nopolie tokare ya keri munağena."

²⁰ Be Jius a paribee be a riuna, "Uma tempolnama modi matabudi 46 nopolie a kerina. Be tam nema rağan rabuiteğ'a nopolie kwa keri munağ'a bake?" ²¹ Be Yesu aba tempolnama ya giugiuena, inam tauna tubuğ'a ġominama ya giugiuena. ²² Be Yesu ya guri be ya midimidisuğu munağana rağanine, na tauwai muriwatanama uma giudima Yesu ya vatovatodina a noğotidina. Be taudi Yesu na giuma be girugiruminama poredie aba a riuriueno ai sumağedina.

²³ Rağanine Yesu Jerusalemma Nağopore soinama nopone ya miamiana maika, tauna mataira toitoi ya voiedina, dabudine banaga toitoi mataira a kitedi be Yesu isane ai sumağana. ²⁴ Be Yesu inam banegidima adi yawasanama

nemanama, tauna ya kataiedina, vutuna aubainama tauna nam i sumāgedina.²⁵ Tauna nam i ġoegoena da aitau tenaġa ya naġo tauna ġarone be banaga adi yawasanama sibo ya giue, baninama tauna kaite banaga nopolima matabuna ya kataiedina.

3

Nikodimas Yesu ġarone ya tavana

¹ Raġan tenaġa Nikodimas tauna Yesu ġarone ya tavana. Nikodimas tauna Parisi, Jius adi badama tenaġana. ² Tauna kupie giu aubainama Yesu ġarone ya verau be ya riuna, “Tauwai katakatai, tauma kē kataienia da tam Mamaitua ya riuporemla tauma waikatakataimaima aubainama. Bani-nama am matairama tawai maġatarana da tam Mamaitua ya riuporemla.”

³ Be Yesu ya paribee be ya riuena, “Yà riuriu kauemna, deġoda tam nam kwa tubuġa vitara, Mamaitua na waiguyauma nopolme tokare nam kwa saġa.” ⁴ Dabudine Nikodimas ya riuna, “Deġoda banaga kaite ya moraba poraġana, tauna tokare nema e tubuġa vitara bako? Nema tinanama kapone e saġa munaġa bako be e tubuġa vitara?”

⁵ Be Yesu ya paribee be ya riuena, “Yà riuriu kauemna, banaga upae be Arua Babaue nam e tubuġa vitara, tauna tokare Mamaitua na waiguyauma nopolme nam e saġa.

⁶ Tubuġa yawasaninama inam banage e tubutubuġana, be yawasana arue inam Arua Babaue e tubutubuġana. ⁷ Taugu è riuna da tam sibo kuya tubuġa vitarana, be inam riunama nam ei basem. ⁸ Sive e manimaninina na ġoane nama e naġonāġona. Tam gugurinama kwa vaivaiena, be deġo yai kare be aikdede e naġonāġona nam ku kataienia. Inam kauinama teneġināma nama aitau da Arue e tubutubuġana, tam tokare nam kwa kataie.”

⁹ Be Nikodimas Yesu yai taravirena, “Uma kauinama nema tokare e tubuġa bako?” ¹⁰ Be Yesu ya riuna, “Tam Israel adi tauwai katakataima be uma kauinama nam ku kataie, bo? ¹¹ Taugu yà riuriu kauemna, tauma aba kē katakataienia vutuna ka giugiuena, be aba kē kitekitedina kawai maġataridina. Be yaġoro taumi banegimima tauma ama giuma nam komawai aninedina. ¹² Taugu dobu kauidima è giuemi be nam koi sumāgedina, vutuna aubainama anikitanama mara yawasanidima yà giuedina, be taumi tokare nam koi sumāġa. ¹³ Nam aitau marae i naġo rubuna, ibewa da Banaga Natunama tau-naġa noteġo ya yovona. ¹⁴ Boni Mousis dobu kavakavane mota brons voivoienama kai bogane yai dawena. Inam

kauinama teneğinama nama Banaga Natunama tokare kai bogane tai dawena,¹⁵ be aitaugā tauna tawai sumağena, taudi tokare yawasana kenakena nonoğinama ta pağona,¹⁶ baninama Mamaitua dobu nuanama ya pa gó vavasağena aubainama, nuanuanama Natunama tenağā ġominama yai utaena. Be aitaugā tauna tawai sumağena, taudi tokare nam ta kodena, ibewa da yawasana kenakena nonoğinama ta pağona.¹⁷ Mamaitua nam dobu kovoğinama bo kawa gewagewanama aubainama Natunama i riuporena, ibewa da tauna dobu waiyawasaninama aubainama ya riuporena.

¹⁸ “Aitau da tauna ewai sumağena, Mamaitua inam baneginama nam imawai tara tautauena. Be aitau da tauna nam imawai sumağena, Mamaitua inam baneginama kaite yai tara tautaue be e miamiana, baninama inam baneginama Mamaitua Natunama tenağā ġominama isanama nam i sumağena aubainama.

¹⁹ “Baninama uma aubainama waitaratautau ya tubuğana: Yana dobue ya yovona be banaga tadiwanawana a ġoe vavasağena, nam maika yana, baninama taudi adi voima matabudi gewegewedima aubainama.²⁰ Banaga aitaugā gewagewa ta voivoiedina taudi yana nam tima ġoeġoena. Inam banegidima tokare nam yana nopone ta verau, baninama taudi ta nainairana deġoda adi gewagewama tima mağatara aubainama.²¹ Be banaga aitaugā da riukaue ta miamiana, taudi yana nopone ma nuaveredi ta veraverauna, da banaga matabudi taudi sibo a kitedi be a kataie da taudi Mamaitua na ġoanama ta voivoiedina.”

Jon be Yesu

²² Inam kauidima muridie Yesu na tauwai muriwatanama mate a nağona Judia provinsnama nopone be dabudine taudi rağan bisanama a rautapa miana be banaga awai babataitodina.

²³ Inam rağanine Jon mate tauna Salim diane Aionma yawai babataitona, baninama dabudine upa dosinama aubainama. Be banaga rağan matabuna a tavatavana babaítai konorinama.²⁴ Uma kauinama noğone ya tubuğana, muriġa da Jon dibure a boru nawena.²⁵ Naumeki da rağan tenağā vaivai raukoğanama debane waikawa riuriu ya nuasarina Jon na tauwai muriwatanama be Jius baneginama tenağā mate.²⁶ Jon na tauwai muriwatanama a verau tauna ġarone be a riuena, “Tauwai katakatai, tauġoma noğone Jodanma be noa gó nevane tè banavi be tam kuya riuna tauna Tauwai yawasana, tauna vutuna yodi banaga

ewai babataitodina. Be banaga matabudi tauna ġarone ta naġonaġona.”

²⁷ Be Jon ya paribeedi be ya riuna, “Mamaitua marae tauna banaga tenatenaġa adi noyama e vinevineditha. ²⁸ Taumi koya kataiena da taugu patare ē riuemina da taugu nam Tauwai yawasana. Mamaitua taugu ya riuporeguna da Bada na kedama yà kawa didimanina, inam vutunaġa. ²⁹ Waivi tokare e naġona na ġoapaparama ġarone. Be waivi na ġoapaparama ġarone e tavatavana raġanine, tauġoma turanama tokare nuanama e vere kauana. Be tauġoma turanama inam taugu. ³⁰ Tauna banaga dosinama e tubuġana, be taugu naumeki da yà ġaubona.

³¹ “Tauna marae be ya yovona aubainama, tauna yaba matabuna ya saġa poredina. Be taugu dobu banegiguma, vutuna aubainama taugu yau noġotama na ruvae yaba yà giugiedina. Be tauna marae be ya yovona, vutuna aubainama tauna ya saġa vavasaġana. ³² Tauna marae yaba ya kitekitedi be ya vaivaledina, vutudi ya riuedana. Be banaga raubisaġa tawai sumaqena. ³³ Be banaga aitaġa da tauna na giuma tawai sumaqena, taudi tawai kawa riukauana da Mamaitua tauna riuriu kauinama. ³⁴ Be Mamaitua banaga ya riuriuporena, tauna Mamaitua riunama e giugien, baninama tauna nophonama Mamaitua Aruinama yai moġavu taritarina. ³⁵ Tamanama Natunama nuanama ya paġo kau be yaba matabuna Natunama nimane ya biridina.

³⁶ “Aitau da Mamaitua Natunama ei sumaqena, tauna yawasana kenakena nonoġinama ya paġona. Be aitau da Mamaitua Natunama e tuatuaġaiena, tauna tokare nam yawasana e banavi, baninama Mamaitua na medima tauna ġarone tokare e kena nonoġana.”

4

Yesu be Samaria waivinama

¹ Parisi ta vaiena be Yesu ya naġo be banaga toitoi yai babataitodi be tauna awai muriwatanena, be na tauwai muriwatanama a toi kauana, nam maika Jon. ² Be Yesu tauna nam banaga iwai babataitodina, ibewa, tauna na tauwai muriwatanama taudiġa banaga awai babataitodina. ³ Raġanine Yesu e vaiena be tauna aba ya voivoien, Parisi kaite a kataiena, vutuna aubainama tauna Judia ya gose be ya munaġana Galilima.

⁴ Tauna Galili naġonama aubainama Samaria kedanaġa ya naġona. ⁵ Naumeki da tauna Samaria nophone meagai isanama Saikama ya tavana. Boni Jeikob natunama Jousep doġa ya utena, Saika meagainama diane. ⁶ Inam dabudine

Jeikob na upama domnama e kenakenana. Suaratopu nama Yesu ya babara siauana aubainama, inam upanama diane ya mia be ya siperena.

⁷ Dabudine Samaria waivinama ya tavana upa redunama aubainama, be Yesu inam waivinama ya riuena, “Upa kwa utegu be yà tego.” ⁸ Be Yesu na tauwai muriwatanama taudi inam dabudine nam mate. Taudi a nágona meagaie kani gimeridima aubainama.

⁹ Dabudine Samaria waivinama Yesu ya base be ya riuena, “Tam Jius banegimma be taugu Samaria waiviguma, be aba aubainama tam taugu kwa riuriueguna da upa yà utem?” Tauna nama ya riuna, baninama Jius banegidima nam airağan Samaria banegidima mate tiwai rawateğeidina. ¹⁰ Dabudine Yesu ya paribee be ya riuena, “Değoda tam Mamaitua na puyoma sibo ku kataiena, naumeki da taugu mate sibo kuya kataieguna, inam rağanine tam tokare kuyai bağagu be yawasana upanama sibo è utem be kuya tegona.” ¹¹ Dabudine waivi ya riuna, “Bada, tam anirau redu ġarome nam ima kenakenana da upa kwa redu, dom ya dau kauana. Yawasana upanama nema kwa redu bake? ¹² Wağawağadama wağedima Jeikob uma upanama ya uteutemaina, tam tauna kuya sağapore, bo? Jeikob be na sedama be na yosima mate uma upanama a tegotegona.”

¹³ Be Yesu inam waivinama ya paribee be ya riuna, “Aitaüğa uma upane ta tegotegona, taudi tokare nuedima e raukasakasa munağana, ¹⁴ be aitau da upa taugu yà ute be e tegona, tauna nam airağan nuanama e raukasakasa munağā. Be uma upanama taugu yà ute be tauna noppone bigabiga maika e manini watanana, be yawasana kenakena nonoğinama e pağona.” ¹⁵ Dabudine waivi ya riuena, “Inam upanama kwa utegu da nam airağan nuaguma e raukasakasa munağā be uma dabudine upa redunama aubainama nam yài veraverau.”

¹⁶ Be Yesu inam waivinama ya riuena, “Kwa nağó be am tauğomama kwa riue be mate ko verauna.” ¹⁷ Dabudine waivi ya riuna, “Ai, taugu nam ei nağina.” Be Yesu ya riuena, “Inam riukaua, ¹⁸ be tam noğone tautauğoma 5 kuya nağidina, be tauğoma yodi vadae kuya gose be kuya verauna inam nam tam am tauğoma.”

¹⁹ Dabudine waivi ya riuna, “Taugu yodi è kataie da tam peroveta. ²⁰ Tauma tamatamamaima uma oyanama debane Mamaitua a raraу duneena. Be taumi Jius ko riuriuna da Jerusalem inam vutuna aniraudune gabunama, be dabudine banaga sibo Mamaitua a rauduneena.” ²¹ Be Yesu waivi umanama ya riuena, “Aba yà riuriuen, kwai sumağena,

rağan e veraverauna e tavana, inam rağanine banaga uma oyanama debane Tamadama ta raudunee bo Jerusalemma ta rauduneena, inam nam aiyaba, inam matabuna naumeki. 22 Taumi Samaria banegimima Mamaitua ko rarau duneena nam ko katai kauena. Be tauma kè katai kaue be ka rarau duneena, baninama Tauwai yawasana tokare Jius ġarodie be e verauna.

23 “Be rağan e veraverauna e tavana, vutuna yodi ya tavana. Arua Babau na rewapanama banaga nopodie e noyanoyana da taudi riukae Tamadama Mamaitua ta rauduneena. Tamadama Mamaitua inam nama rauduneenama e ġoēgħoe kauena. 24 Baninama Mamaitua tauna Arua, vutuna aubainama taurauduneenama taudi naumeki da Arue be riukae ta rauduneena.”

25 Dabudine waivi Yesu ya riuena, “Taugu è kataiena da Tauwai yawasana tawai isana Keriso, tauna e veraverauna. Tauna e tavana rağanine, tokare yaba matabudi ġaromaie e giu waibatedina.” 26 Dabudine Yesu ya riuna, “Inam vutuna taugu, yodi tam mate tħawġi giuna.”

27 Inam rağanine Yesu na tauwai muriwatana a tava munaġa da ta kitana be Yesu inam waivinama mate awai giuna, dabudine taudi a base kauena. Be nam aitau Yesu i taravirena da tauna aba inam waivinama ġorone ya ġoēgħoe, bo aba aubainama inam waivinama mate awai giu. 28 Dabudine waivi upa duginama ya gose pore da ya munaġana meagaie be banaga umanama ya riuedina, 29 “Ko verau be tauġoma tenaġa ko kita. Tauna abaq boni è voivoiedina matabuna ya giuedina. Tauna agunai Tauwai yawasana?” 30 Naumeki da banaga meagai a gose pore be a naġona Yesu ġorone.

31 Inam kauidima a tubutubuġana maika, tauwai muriwatana Yesu a riuena da tauna kani sibo ya kanina. 32 Be Yesu ya paribeedi be ya riuna, “Taugu yau kanima e kennakenana yà kanina, taumi nam ko kataiena.” 33 Dabudine tauwai muriwatana ai giu vivira be a riuna, “Banaga aitau agunai muriġa ya tava, be kani ya utena.”

34 Be Yesu ya riuedina, “Taugu yau kanima inam tauri-uporeguma na ġoanama yà voienna, be noya ya uteuteguna yai kovina. 35 Taumi ko riuriuna da nawaravi 4 ta kovi be muridie maura e ravusana. Be yodi ko kita, maura kaiteka ya tavana. 36 Maura taurawatupanama, taudi tokare adi maesama verenama ta paġona. Be maura ta rawarawa tupertupana inam giunama, baninama taudi banaga ta veraverauġedina Mamaitua na waiguyauma nopone. Be taukuma be maura taurawatupanama, taudi rabuidi tokare tai nua vere tenaġana. 37 Inam riunama ‘Banaga ġesau taukuma,

be banaga ġesau maura taurawatupanama', inam riukaua. ³⁸ Avedi da taumi nam ko sipina, be taugu è riuporemina da maura ko rawatupetupedina. Banaga ġesaudima a noyana be taumi nonoġinama ko rawatupatupana."

³⁹ Dabudine Samaria banegidima toitoi inam meagaine Yesu ai sumaġena, baninama waivi umanama ya giuna aubainama, "Taugu abaq boni è voivoiedina, matabuna tauna ya giuedina." ⁴⁰ Be Samaria banegidima Yesu ġarone a tavatavana raġanine, taudi Yesu ai baġana da mate sibo adi meagaie a miana. Naumeki da Yesu taudi mate raġan rabui kavakava a miana. ⁴¹ Be Yesu na rauguguyama kana taiye banaga riba ai sumaġana. ⁴² Dabudine taudi waivi a riuena, "Noġone tauma am giuma aubainama kē sumāġana, be yodi tauma mabimaie tauna na giuma kē vaie be kē sumāġana, yodi kē kataiena da tauna riukaua Tauwai yawasana dobu matabuna aubainama."

*Yesu gabeman natunama tauġominama yai yawasanina
(Mt 8:5-13; Lk 7:1-10)*

⁴³ Be raġan rabui muridie Yesu inam meagainama ya gose, be ya naġona Galilima. ⁴⁴ Ko noġoti da Yesu boni ya riuna da peroveta na dobu ġomae nam tima vivivivirena. ⁴⁵ Tauna Galilima ya tavatavana raġanine, Galili banegidima ai aninena, baninama taudi na voiama dosidima Jerusalemma Naġopore soinama nopone a kitedina aubainama.

⁴⁶ Be Yesu na vaġiae ya munaġana Keinama deġo maiġone upa ya voie be yai rawawaenna. Be inam meagaine gabeman tenaġa ya miamiana, tauna natunama tauġominama Kappeniamma ya sida kauana. ⁴⁷ Inam tauġominama e vaiena be Yesu Judiaġa ya veraverauna Galilima. Naumeki da tauna Yesu yai baġana da tauna na vadae sibo ya naġo be natunama yai yawasanina, inam gomeninama ġaubonāġa da sibo ya gurina.

⁴⁸ Be Yesu ya riuena, "Taumi sibo koyawai sumaġana, be nam mataira kitnama koyawai rabe." ⁴⁹ Be gabeman ya riuna, "Bada, kwa verau makai muriġa da natuguma e gurina." ⁵⁰ Be Yesu gabeman ya riuena, "Kwa naġo natumma ya yawasana." Be gabeman Yesu aba ya riuriuena yai sumaġe be ya naġona.

⁵¹ Gabeman tauna ya munaġa ya naġonaġo be na taunoyama kedae a banavi be a riuena, "Natumma ya yawasanana." ⁵² Dabudine gabeman taudi yai taraviredina da suara aba gomana ya yawasana. Be taudi gabeman a paribee be a riuna, "Maiġo suaratopu 1 okoroki poyapoya gomana ya gosena." ⁵³ Be dabudine gomana tamanama e noġotina be maiġo inam suerinama nama ruvane Yesu

ya riuna, “Natumma ya yawasanana.” Dabudine tauna be na vadama nponama banegidima mate, matabudi Yesu ai sumāgena.

⁵⁴ Uma inam mataira aniwai rabuinama Yesu Galili provinsne ya voiena.

5

Yesu topa diane tauğoma kağā nuakudunama yai yawasanina

¹ Uma kauinama muridie Yesu ya sağā ya nağona Jerusalemma Jius adi soima aubainama. ² Be Jerusalem gananama bogane matakedə tenağā, inam Sipu adi matakedama. Be inam matakedanama diane topa ya midimidina, Hibru bonane tawai isana Betesda. Be inam topanama dianağā banaga sidesidedima adi vaguruma kerikeridima matabudi 5 a midimidina. ³ Be vagurudima nopodie anikaba miae banaga sidesidedima toitoi a miamiana. Banaga ġesaudima matapotepotedima, ġesaudima kağā nuakudukududima, be ġesaudima nuakudukududima. ⁴ Taudi awai rabana da upa sibo yai burukwakwakwana.* ⁵ Be nopodie banaga tenağā dabudine kağanama ya nuakuduna modi 38 a kovina. ⁶ Yesu inam tauğominama doğae ya kenakenana ya kitana, be ya vaie da inam tauğominama sida bonidego ya pağona. Dabudine Yesu inam tauğominama yai taravirena, “Tam yawasana kwa ġoeğoe bo ibewa?”

⁷ Be tauğoma ya paribee be ya riuena, “Bada, topa ewai dagudaguna rağanine, taugu nam aitau turagu da ya sagugu be topae sibo è nağō. Taugu topae nağonama yāwai taina rağanine, banaga ġesunama kaite e dokadoka ġomena.” ⁸ Dabudine Yesu tauğoma ya riuena, “Kwa midisügu, am duyama kwa pağō be kwa nağō.”

⁹ Inam dabudine yai rağantenäge da tauğoma ya yawasanana, be na duyama ya pağō da ya nağona. Inam kauinama Sabat rağanine ya tubuğana, ¹⁰ vutuna aubainama Jius babadidima tauğoma ya yawayawasanana umanama a riuena, “Manaka Sabat! Tarawatu e riuriuna tam am duyama nam kwa kiroğ!”

¹¹ Be tauğoma ya paribeedi be ya riuna, “Banaga tauwai yawasaniguma tauna ya riueguna, ‘Am duyama kwa kirogi be kwa nağō.’ ” ¹² Be taudi tauğominama ai taravirena, “Inam

* **5:4:** Gurik baibol ġesaudima vers 4 umanama a girumina: Rağan ġesaudie Bada na aneama ya yovo topa nponone be upa ya voie be yawai burukwakwakwana. Murine aitau da ya poti doka be topae ya nağona, tauna ya yawayawasanana, avedi da sida nema maika kitanama, be yağoro ya yawasanana.

ai banaga nama ya riuem da tam am duyama sibo kuya kirogi, wa?"¹³ Be taugomā nam i kataiena aitau tauna yai yawasani, baninama Yesu patara nopodie ya rausonağe be ya nağona.¹⁴ Muriğanama Yesu inam tauğominama tempol nōpone ya banavi be ya riuena, "Yodi kuya kita, tam kuya yawasanana. Nam gewagewa kwa voia munağe, da tokare nam kai matane kwa naço."¹⁵ Naumeki da taugomā ya naço be Jius babadidima yai varidina da Yesu tauna yai yawasanina.

Yesu na voiama aubainama ya gudutarana

¹⁶ Yesu Sabat rağandie noya ya voivoiedina. Vutuna aubainama Jius babadidima tauna raukivigewegewenama ai karena. ¹⁷ Be Yesu taudi ya riuedina, "Taugu Tamaguma rağan matabuna na noyama è voivoienā naumeki da yodi. Vutuna aubainama taugu mate ya noyanoyana."¹⁸ Uma giudima aubainama Jius a rara rubu guratana da sibo Yesu ai gurina, nam Sabat tarawatunama waikatikotovinama tauñağā debane, ibewa be mate tauna ya riuriuna da Mamaitua inam tauna Tamağominama. Be inam kauine tauna kabe Mamaitua i ruvaruva.

¹⁹ Be Yesu umanama ya paribeedina, "Taugu ya riuriu kauemiña da Mamaitua Natunama nam tokare mabine aba e voiedi, ibewa. Tauna Tamanama abağā ya voiedi be ya kitakitana, vutudiğā tauna e voivoiedina. ²⁰ Baninama Tamanama Natunama nuanama ya pağona aubainama, yaba matabudi ya voivoiedina nama tauna Natunama yai katai be e voivoiedina. Be Natunama tokare voia ġesaudima dosidima mate e voiedi be ko basedina, be nam banaga waiyawasaninama taunağā. ²¹ Tamanama banaga gurie be e kawakawa midisügu munağedina, be kauinama teneğinama nama Natunama na ġoane banaga gurie be e kawa midisügu munağedi, be yawasana ta pağopağona. ²² Be Tamanama etara matabudi Natunama nimane ya biridina ²³ da banaga matabudi sibo Natunama a vivirena Tamanama ta vivivivirena maika. Be aitaüğā Natunama nam tima vivivivirena, taudi Tamanama mate nam tima vivivivirena, baninama Tamanama tauna vutuna Natunama ya riuporena.

²⁴ "Taugu ya riuriu kauemina aitaüğā da yau giuma ta vaivaie, be tauriuporeguma tawai sumağena, taudi yawasana kenakena nonoğinama kaite a pağona, be nam tokare ta naço gienae. Taudi gurie be a davuna yawasanae.

²⁵ "Be mate ya riuriu kauemina da rağan e veraverauna e tavana, vutuna yodi ya tavana. Inam rağanine banaga guriguridima taudi taugu Mamaitua Natunama bonaguma tai beavaiena, be aitaüğā bonaguma ta vaivaiena, taudi

tokare yawasana ta paǵona. ²⁶ Taugu nama è riuemina, baninama Tamaguma tauna vutuna yawasana pakanama, be inam yawasaninama tauna nopone e kenakenana. Be tauna ya voie da Natunama mate nopone inam yawsaninama e kenakenana. ²⁷ Be tauna rewapania Natunama ya utena da banaga e etaredina, baninama tauna vutuna Banaga Natunama. ²⁸ Nam ko base da raǵan e veraverauna e tavana, inam raǵanine banaga kokoagae keneke nedima matabudi tokare Mamaitua Natunama bonanama ta vaie be ta midisuguna. ²⁹ Be aitaugā vere a voivoiena, taudi ta midisugū be ta yawasana nonoǵana. Be aitaugā gewagewa a voivoiena, taudi ta midisugū be gienae ta naǵona, inam vutuna adi kovogama. ³⁰ Taugu nam nuague yaba ama voivoiedina, ibewa da Tamaguma yaba ewai aninedina ruvane, nama yà voivoiedina. Vutuna aubainama yau rauetarama inam didimaninama, baninama tauriuporeguma ya riuriueguna, ruvane nama banaga yà etaetaredina, be nam taugu yau ǵoane.

Yesu tauwai matematenama

³¹ “Deǵoda taugume yai matamata munaǵeguna, tokare yau giuma nam tai kawa riukaue. ³² Be taugu è kataiena da tauwai matemateguma ǵesau tauna taugu e giugueguna, inam matabuna riukaua. ³³ Taumi boni tauwai noyanoya koya riupore nawedina Jon ǵarone, be tauna ǵarodie taugu ya giueguna inam matabuna riukaua. ³⁴ Taugu Jon na giuma yà riuriu wainoǵotima da taumi yawasana ko banavina. Be taugu yau matamatama inam nam banaga ǵoma. ³⁵ Jon tauna kodam maika ya yanayanana, be taumi na yanae ami ǵoanama ruvane raǵan ǵaubonaǵa koyawai nuaverena. ³⁶ Jon aubaiguma aba ya giuguemina, inam matabuna ya verena. Be taugu yau matamatama vere vavasaǵidima inam voia dosidima, Tamaguma ya uteuteguna yà voivoiedina. Inam voiedima dosidima tawai maǵatarana da taugu Tamaguma ya riuporeguma. ³⁷ Be Tamaguma tauriuporeguma tauna mate aubaiguma riukaue e giugiuna. Be taumi nam airaǵan bonanama ko vaie bo noǵonama ko kitana. ³⁸ Tauna ya riuporeguma be taumi nam koi sumaǵeguna, vutuna aubainama na giuma nopomie nam tima kenakenana.

³⁹ “Taumi buka poredima ko sievidi be kowai nuanoǵonoǵotedina da kabe yawasana kenakena nonoǵinama dabudine ko banavi. Be inam bukanama taugu e giugueguna, ⁴⁰ taumi sibo ǵarogue koya verau be yawasana koya paǵona. Be taumi debemima ya bado kauana.

⁴¹ “Deǵoda taumi ko kawa saǵegu bo ibewa, inam giudima taugu ǵarogue nam banibiribiridi, ⁴² baninama taugu è

kataienai da taumi nōpomie Mamaitua nam komawai nua-pāgoena.⁴³ Taugu Tamaguma isane ġaromie ē yovona, be taumi nam koi anineguna. Be deġoda banaga ġesau tauname isane ġaromie e tavatavana, taumi kowai aninena.⁴⁴ Vutuna aubainama taumi nam teneteneġina da koi sumāgegu, baninama taumi ami banagama ta kawa saġemina, vutuna ko ġoeġoe guratena. Be Mamaitua sibo taumi ya kawa saġemina, taumi nam koma ġoeġoena.

⁴⁵ “Be taugu tokare Tamaguma ġarone nam ya samanimi. Taumi ami voiama maika kabe Mousis kowai muriwatane be kowai sumāge. Be Mousis tauna tokare Tamaguma ġarone e samanimina,⁴⁶ be deġoda taumi Mousis koi sumāgena, naumeki da taugu mate sibo koyai sumāgeguna, baninama Mousis na bukae taugu mate ya giueguna.⁴⁷ Be deġoda tauna aba ya girugirumidina nam koi sumāgedi, naumeki da taugu yau giuma tokare nema koi sumāga bakedi?”

6

*Yesu banaga 5 tausand ei kanidina
(Mt 14:13-21; Mk 6:30-44; Lk 9:10-17)*

¹ Raġan bisanama muridie Yesu wagae ya geru be yawawa Galilima ya davu be ya naġona noaġo nevane gerese. Be inam yawawinama isanama ġesau ta riuriuna: Taiberias yawawinama.² Be patara dosinama Yesu ai muriwatanena, baninama tauna mataira dosidima banaga sidesidedima ġarodie ya voivoiedina aubainama.³ Dabudine Yesu tauna ya saġa ya naġona oyae be na tauwai muriwatanama mate a miana.⁴ (Be Naġopore soinama raġaninama kaiteka maida ya tavatava be uma kauidima a tubuġana.)

⁵ Be Yesu patara ya kitedi be tauna ġarone a saġasaġana, dabudine tauna Pilip ya riuena, “Kani deġo tà gimara be uma banegidima tai kanidi?”⁶ Tauna nama ya riuna Pilip raurubunama aubainama, be Yesu kaite ya katai munaġena da tauna tokare aba e voienna.

⁷ Be Pilip ya paribee be ya riuna, “Ai Bada, deġoda tauda ġarode 200 Denari sibo i kena be kani sibo tè gimarana, yaġoro uma patarinama matabuna tokare nam tei kanidi be teneteneġina.”⁸ Dabudine Saemon Pita tuaġanama Endru ya riuna,⁹ “Uma gomeninama tauġominama ġaubaonama, tauna ġarone buredi 5 be iyana rabui ta kenakenana. Be inam nam teneteneġina uma patara ya moraba kauana.”

¹⁰ Dabudine Yesu na tauwai muriwatanama ya riuedina, “Banaga matabudi ko riuedi da ta mia.” Naumeki da banaga matabudi mui debedie a miana. Be tautauġoma

sievinama 5 tausand* nama. ¹¹ Naumeki da tauna buredi ya ragaudi, da Mamaitua yai kaiwe be patara ġarodie buredi ya soiedina. Be murine kauinama tenēginama nama iyana ya voienna. Be banaga matabudi a kani da a kani siauana. ¹² Be banaga a kanikani kovina murine, Yesu na tauwai muriwatanama ya riuedina, “Yodi ko naġo be kani kanikani gosedima matabudi ko rawateġeġeidi, nam i verena da kani tai yakaredi.” ¹³ Naumeki da taudi buredi kanikani gosedima matabudi a rawateġeġeidi be posa matabudi 12 ai moġavudina.

¹⁴ Be raġanine banaga uma matairinama nama a kitikitana, taudi a riuna, “Tauna vutuna riukaua da peroveta boni a riuriuena yodi ya tavana.” ¹⁵ Yesu ya kita da taudi a ġoeġoena da tauna sibo a kawa guyau makaiena. Vutuna aubainama Yesu taunaġa ya rausonaġe be oya debane ya naġona.

Yesu upa debanaġa ya naġona

(Mt 14:22-33; Mk 6:45-52)

¹⁶⁻¹⁷ Naumeki da ravi ya tavana, be Yesu na tauwai muriwatanama ġarodie nam i tava munaġana. Vutuna aubainama taudi a dobi be a munaġana gerese. Be dabudine wagae a geru da yawawa a davu be a naġona Kapaniamma.

¹⁸ Taudi a taunaġa ġaubaġonaġa be sive dosinama yai ravusa be rabama yai karena. ¹⁹ Inam raġanine ta kitana be Yesu topa debanaġa ya babara be ġarodie ya naġonaġona. Dabudine taudi a naira kauana, ²⁰ be tauna ya riuedina, “Taugu! Nam ko naira!” ²¹ Dabudine tauwai muriwatana a ġoeġoena da tauna sibo a soru tavaitena wagae. Be yai raġantenāġe da waga kaite noaġo nevane gerese ya midimidina.

²² Pomai raġonboiboi patara muridie a gosegosedina, taudi Yesu a raberabena, baninama taudi maiġo ravie a kita da waga tenaġa kavakava dabudine ya midimidina be tauwai muriwatana taudiġa inam wagane a geru da a naġona, be nam Yesu mate. ²³ Be waga ġesaudima Taiberiasġa a veraverauna a tava da deġo Bada buredi yai aiaini be banaga a kanikanina, dabudine a ġotana. ²⁴ Raġanine patara ta kitana be Yesu be na tauwai muriwatanama mate taudi nam dabudi, naumeki da inam wagedie a geru be a munaġana Kapaniamma Yesu wanenama aubainama.

Yesu tauna yawasana kaninama

²⁵ Raġanine taudi noaġo nevane a tava be Yesu a banabanavina raġanine, taudi ai taravire be a riuena, “Tauwai katakatai, tam nema kuya verau bako?” ²⁶ Be Yesu ya

* **6:10:** Tautaugħomha taudiġa sievinama 5 tausand. Be waiwaivi seda mate nam ti sievidina, taudi mate a kanina.

paribeedi be ya riuna, “Maīgo taugu èi kani siauemina, aubainama taumi taugu ko wanewaneguna. Be yau voiama dosidima aba tawai māgataridina yāgoro taumi nam koma katakataiena. Be inam voiedima tawai māgatariguna da Mamaitua taugu ya riuporeguna.²⁷ Taumi nam kani ̄gomá aubainama ko noyanoya, avedi, inam tokare ta bova be tai kavena. Be taumi yawasana kaninama ko wanena, vutuna tokare e kena nonōgána. Yodibe Banaga Natunama yawasana kenakena nonōginama è utemina, bani-nama Tamadama Mamaitua tauna vutuna yai aninena.”

²⁸ Be taudi ai taravire be a riuna, “Mamaitua aba e ̄goēgoena ka voie?”²⁹ Be Yesu ya riuna, “Mamaitua na ̄goanama inam aitau ya riuriuporena tauna koi sumāgena.”³⁰ Be taudi a riuena, “Aba matairinama kwa voie da tauma ka kita, yodibe kai sumāgemna.³¹ Maika girugiruminama porane ya riuna da Mousis wāgawāgadama mara kaninama ya utedi be a kanina dobu kavakavane a babababarana rāganine.”

³² Be Yesu ya riuna, “Ibewa, yà riuriu kauemina da inam nam Mousis mara kaninama i utedina. Ibewa da Tamaguma marae miemieninama ya utedina be yodi tauna mara kani ̄gominama e uteutemina.³³ Be mara kani ̄gominama inam tauna aitau marae be ya yovona da banaga matabuna dobue ei yawasanidina.”³⁴ Be taudi a riuna, “Bada, inam kaninama rāgan patapatanama kwa utemai.”

³⁵ Be Yesu ya riuna, “Yawasana kaninama inam vutuna taugu! Be aitaugá ̄garogue ta veraverauna, taudi nam airāgan kani e karatidi, be aitaugá tawai sumāgegun, taudi nam airāgan nuedima e raukasakasa.³⁶ Be taumi ko kitak-itaguna, be yāgoro nam komawai sumāgegun,³⁷ Be taudi aitaugá Tamaguma ya uteuteguna, taudi tokare ̄garogue ta verauna, be taugu tokare nam yà riutuāgiedi.³⁸ Taugu marae be è yovona tauriuporeguma na ̄goanama yà voiema aubainama, be nam taugu.³⁹ Be Mamaitua na ̄goanama inam umanama, tauna aitaugá taugu ya uteuteguna nam tenāga maika yà viri yakasi, ibewa da rāgan damone taudi tokare gurie be yà kawa midisúgu munāgedina.⁴⁰ Tamaguma na ̄goanama inam banaga aitaugá Mamaitua Natunama ta kita be tawai sumāgena, taudi tokare yawasana kenakena nonōginama ta pāgona, be rāgan damone taudi gurie be yà kawa midisúgu munāgedina.”

⁴¹ Inam rāganine Jius banegidima momodu ai karena, bani-nama Yesu ya riuna da tauna vutuna kani marae, be ya yovona.⁴² Be taudi a riuna, “Uma tauna Yesu, Jousep

natunama. Na dosima tauda tè kataidina. Be nemanama da tauna e riuriuna, ‘Taugu marae be è yovona.’”?

⁴³ Be Yesu ya riuedina, “Momodu ko gose pore! ⁴⁴ Nam aitau tenēginama da tokare ġarogue e verau. Be Tamaguma tauriuporeguma aitaūga e veraverauğedina ġarogue, taudi tokare ġarogue ta verauna. Be taudi vutudi tokare rağan damone gurie be yà kawa midisuğu munağedina. ⁴⁵ Baninama girugiruminama porane peroveta umanama a riuna, ‘Taudi matabudi Mamaitua tokare ei kataidina.’

Be aitaūga Tamaguma bonanama tawai beavaie be riunama ta pağopāğona, taudi tokare ġarogue ta verauna. ⁴⁶ Nam aitau tenağga Tamadama i kita rubuna. Ibewa da taugu Mamaitua ġarone be è yovona, tauguğga Tamadama è kitana.

⁴⁷ “Yà riuriu kauemina, aitau da taugu ewai sumağeguna, tauna kaite yawasana kenakena nonoğinama ya pağona.

⁴⁸ Yawasana kaninama inam vutuna taugu! ⁴⁹ Taumi wağewağemima boni dobu kavakavane mana a kanikanina, yağoro a gurina. ⁵⁰ Be aitau uma kaninama marae yovoyovonama e kanina, tauna tokare nam e guri. ⁵¹ Be taugu vutuna yawasana kaninama marae be è yovona. Be aitau da inam kaninama e kanina, tauna tokare e mia nonoğana. Be inam kaninama vutuna taugu tubuğga ġomiguma yai utaena, da dobue banaga ta yawasanana aubainama.”

⁵² Dabudine Jius banegidima ai sağasağga gurata be a riuna, “Nemanama da uma baneginama tubuğinama e uteda be tà kani?” ⁵³ Be Yesu ya paribeedi be ya riuna, “Yà riuriu kauemina, değoda Banaga Natunama tubuğinama nam taumi ko kani be kosininama nam ko tego, taumi nopomie yawasana ibewa. ⁵⁴ Be aitau da tubuğga ġomiguma e kanikani be kosiniguma e tegotegona, tauna yawasana kenakena nonoğinama kaite ya pağona. Be rağan damone tokare gurie be yà kawa midisuğu munağedina. ⁵⁵ Baninama taugu tubuğga ġomiguma inam vutuna kani kaua. Be kosiniguma inam vutuna tego kaua. ⁵⁶ Be aitau da tubuğga ġomiguma e kanikani be kosiniguma e tegotegona, tauna taugu nopogue be taugu tauna nopone. ⁵⁷ Tamaguma yawayawasanimama ya riuriuporeguna na rewapanae taugu yà miamiana. Teneğinama nama aitaūga taugu ta kanikaniguna, taudi tokare yau rewapanae ta miana. ⁵⁸ Be taugu vutuna kani kaua marae be è yovona. Taumi wağewağemima boni mana a kanikanina, taudi a gurina. Be aitau uma kaninama e kanina, tauna tokare e mia nonoğana.”

⁵⁹ Yesu inam giudima matabudi Kabeniamma sinagognopone banaga yai katakataidina.

Tauwai muriwatana toitoi Yesu na waikatakataima a tuāgaie be a gosena

⁶⁰ Be rağanine Yesu na tauwai muriwatana toitoi nama giudima a vaivaiedina, taudiğə ai giu vivira be a riuna, “Uma waikatakatainama nam i vere kauana, aitau tokare e pago?”

⁶¹ Dabudine Yesu ya kataie da na tauwai muriwatana tauna na giuma aubainama a momomomoduna, naumeiki be ya ruedina, “Taugu yau giuma ami waisumāğama e kawakawa gewagewa, bo? ⁶² Be Banaga Natunama marae e munamunağana ko kitana rağanine, taumi nema ko noğota bako? ⁶³ Mamaitua Aruinamat[†] tauna vutuna yawasana kenakena nonoğinama banaga e uteutedina. Tubuğə tauñağə nam yawasana e utemi. Be taugu yau giuma aba è riuriuemina, inam vutuna Mamaitua Aruinama, yawasana e uteutemina. ⁶⁴ Be yağoro taumi ġesäumima nam komawai sumağeguna.” Yesu tauna noğone ya kataiedina da aitaüğə tauna nam timawai sumağena, be aitau tauna tokare e boru dobiğena. ⁶⁵ Be Yesu giu yai kare munağe be ya riuna, “Vutuna aubainama noğone è riuemina da nam aitau teneğinama da tokare ġarogue e verau. Be Tamaguma aitau rewapana e uteutena, tauna tokare ġarogue e verauna.”

⁶⁶ Uma giune Yesu na tauwai muriwatana toitoi tauna a gose be ai nağō teğateğana. ⁶⁷ Dabudine Yesu na tauwai muriwatana 12 a miamia kwasana yai taraviredi be ya riuna, “Taumi nemanama? Taumi mate nağō ko ġoeğoe, bo?”

⁶⁸ Be Saemon Pita Yesu ya paribee be ya riuna, “Bada, aitau ġarone ka nağō? Tam yawasana kenakena nonoğinama riudima tamğə ġarome ta kenakenana, ⁶⁹ be tauma kawai sumağemna be kè kataienai da tam vutuna Mamaitua na Babau vinevinema.”

⁷⁰ Dabudine Yesu ya riuna, “Taumi 12 taugu è vinemina be nopomie tenağə tauna Seitan na taunoyama.” ⁷¹ Tauna inam Judas ya giugiuena. Be tauna Saemon Iskariot natunama. Be avedi da Judas tauwai muriwatana 12 nopolie, be tauna yağoro Yesu ya boru dobiğena.

7

Yesu tasitasinama

¹ Inam kauidima muridie Yesu Galili noponağə ya babababara nağona. Be tauna Judia nağonama nam i ġoena, baninama inam dabudine Jius babadidima Yesu kana kasirama a tomtomna da sibo ai gurina.

[†] **6:63:** Gurik baibol nokane ‘Arua’ taunağə e kenakena, nam ‘Mamaitua Aruinama’.

² Be Kapekape soinama rağaninama maida ya tavatavana aubainama, ³ Yesu tasitasinama tauna a riuena, “Tam Galili sibo kuya gose be kuya nağona Judiama soie, be dabudine patare sibo mataira kuya voiedi be am tauwai muriwatanama sibo a kitedina. ⁴ Tam değoda kwa ġoeġoena banaga matabudi ta kataiemna, naumeki da patara mate-die mataira dosidima kwa voedina, be nam kwa miamia yababa.” ⁵ Taudi nama a riuna, baninama avedi da Yesu tasitasiğominama taudi mate Yesu nam ti sumaġena.

⁶ Vutuna aubainama Yesu taudi ya riuedina, “Taugu yau rağan yağama nam i tavana. Be taumi naumeki da ami ġoane nama ko nağona. ⁷ Banaga tokare nam ta tuağaiemi, be taugu ta tuatuağieguna, baninama taugu yà riuriuedina da adi voiama a gewagewana. ⁸ Naumeki taumi ko nağ soie, be taugu inam nam ama nağonağona, baninama yau rağan yağama yağoro nam i tavana aubainama.” ⁹ Naumeki da Yesu Galilima ya mia kwasana.

¹⁰ Be tasitasinama taudi a nağonağona soie rağanine, tauna mate muriġa moisiriġa ya nağona soie. Be nam patare i taimağatarina. ¹¹ Be soi nopone Jius babadidima Yesu a wane be a riuriuna, “Uma baneginama tauna dego?”

¹² Be inam dabudine patara dosinama taudi kasave mareġa Yesu awai giugiuena. Banaga ġesaudima a riuna, “Tauna banaga verenama”. Be ġesaudima a riuna, “Ibewa, tauna banaga e biribiri waideğedina.” ¹³ Be nam aitau tenaġa debanama i tora be patare i giu guratana, baninama taudi Jius babadidima a nairedina aubainama.

Yesu banaga ewai katakataidina

¹⁴ Soi ġaubonąğda sibo ya kovina, Yesu ya sağya ya nağ tempol nopone be waikatakatai yai karea. ¹⁵ Dabudine Jius banegidima tauna a base be a riuna, “Uma baneginama tauna nam aikedae i girumana. Be nemanama da uma yabedima matabudi ya kataiedi?”

¹⁶ Be Yesu taudi ya riuedina, “Aba yàwai katakataimina inam nam taugu nuague ama waikatakataimina. Ibewa da inam tauriuporeguma tauna na waikatakataima. ¹⁷ Be aitau da Mamaitua na ġoanama voienama e ġoeġoena, tauna tokare e kataie da inam waikatakatainama Mamaitua na waikatakatai, bo taugume yau waikatakatai. ¹⁸ Banaga aitau da na noğote e giugiuna, inam baninama tauna e rara rubuna da banaga tauna kabe ta kawa saġe. Be tauna aitau da tauriuporenama kawa saġenama aubainama e giugiuna, tauna inam banaga verenama, be tokare nam ġarone gewagewa ta banavi. ¹⁹ Mousis tarawatu ya utemina, be nam aitau tenaġa inam tarawatudima kumawai

muriwatanedina. Aba aubainama taugu waiguriguma ko ġoēgōe? Taumi inam tarawatu kowai kati kotovina.”

²⁰ Dabudine banaga Yesu a riuena, “Tauma nam tam waigurimma ke riuena, tam agunai penama ya kokumna.” ²¹ Be Yesu taudi ya riuedina, “Taugu Sabat raġanine tauġoma tenaġa èi yawasani be taumi nuemima yai medina. ²² Be you, taumi mate Sabat raġanine ko noyanoyana. Taumi Mousis na tarawatuma ruvane seda tautauġomidima ġarodie kopitom ko voivoiedina. Be inam vaivainama novemai Eibraham ġarone be ya saġana, muriġa da Mousis tarawatu ya yovoġena. ²³ Deġoda gomana Sabat raġanine kopitom e paġona, inam naumeki Mousis na tarawatuma na ruvae. Nama teneġine taugu yodi banaga Sabat raġanine èi yawasanina, yodi nemanama? Be aba aubainama yodi ġarogue ko medimed? ²⁴ Inam kauidima ko kita yaġedi da nam voia ġavoe kitakitanama, vutuna ko kitakita wairuva. Avedi, be didimanae yaba ko kita wairuvedi be muriġa da ko giuedi.”

Yesu tauna Tau waiyawasana, bo?

²⁵ Inam giudima aubaidima Jerusalem banegidima ġesaudima a riuna, “Uma baneginama vutuna waigurinama ta riuriue, bo? ²⁶ Tauna yodi umanema patare e giugiuna, be taudi nam aba ġarone tima riuriuena. Agunai tauda dà babadama a banavi da tauna naumeki Tauwai yawasana. ²⁷ Be inam nemanama? Uma baneginama tauda tè kataiena da tauna aikedae be ya tavana. Be Tauwai yawasana aikedae be e tavana nam aitau i kataiena.”

²⁸ Yesu tauna yaġoro tempol nopone yawai katakataina maika, tauna bonanama dosine ya riuna, “Inam riukaua taumi koya kataiena da taugu aitau be aikedae è tavana. Taugu nam yau ġoane uma dabudine e tavana. Ibewa da Tamaguma ya riuporeguna, be tauriuporeguma riukaua e miamiana, be taumi tauna nam ko kataiena. ²⁹ Be taugu tauna è kataiena, baninama taugu tauna ġarone be è yovona. Tauna ya riuporeguna.” ³⁰ Umanama giudima debedie taudi a rara rubuna da sibo a vunuġina, be nam ti vunuġina, baninama na raġan yaġama nam i tavana aubainama.

³¹ Be patara nopolie banaga toitoi Yesu ai sumaġe be a riuna, “Tauwai yawasana e tavana raġanine, mataira ġesaudima dosidima uma baneginama ya voivoiedina nama tokare e voiedi, bo? Vutuna aubainama uma tauna naumeki vutuna.”

³² Dabudine patara kasave Yesu awai giugiuena, Parisi a vaiedina. Vutuna aubainama taudi be pirisi adi babadama mate porisiman a riuporedina da Yesu sibo a vunuġi

be a panina. ³³ Be Yesu ya riuna, “Taugu taumi mate rağan ġaubonağā tà miana, muriğā be yà munağana tauriuporeguma ġarone. ³⁴ Taumi tokare ko waneguna be nam ko banavigu, baninama dego taugu yà miamiae, dabudi taumi tokare nam ko tava.”

³⁵ Dabudine Jius babadidima adi banagama adi banagama mate a riuna, “Inam baneginama dego nağonama ewai tai? Agunai tauna uma dobunama e gose be e nağona wari dobue da nam tà kita munağe. Agunai tauna Jius banegidima ai daberaridi be wari dobue ta miamiana ġarodie e nağona. Bo Gurik banegidima ġarodie e nağō be ei katakataidina. ³⁶ Tauna ya riuna, ‘Taumi tokare ko wanegu be nam ko banavigu be dego yà miamiana, dabudi taumi tokare nam ko tava’. Uma giudima banidima aba?”

Yesu yawasana watutunama e uteutedana

³⁷ Soi rağaninama dosinama damone Yesu ya midisuğü be bonanama dosine ya riuna, “Aitau da nuamma e rarau kasakasana kwa verau ġarogue be upa yà utem be kwa tegona. ³⁸ Aitau da taugu ewai sumağeguna, inam baneginama nopone yawasana watutunama e manini dobina maika girugiruminama porane ya riuriuna nama.” ³⁹ Yesu upa ya giuena inam Arua e giugiuena, be taudi aitaugā tauna tawai sumağena tokare e utedina. Inam rağanine Arua yağoro nam i yovona, baninama Yesu yağoro dobue ya miamiana, tauna nam gurie i midisuğü be i nağona marae.

Banaga a dariğā munağedina

⁴⁰ Be banaga umanama giudima a vaivairedina, dabudine ġesaudima a riuna, “Riukaua da inam tauğominama tauna vutuna peroveta Mamaitua ya sausaugena rağan damone e tavana, vutuna yodi ya tavana.” ⁴¹ Be banaga ġesaudima a riuna, “Tauna Tauwai yawasana.” Be ġesaudima a riuna, “Ibewa, Tauwai yawasana nam tokare Galilima be e verau, ⁴² baninama girugiruminama porane e riuriuna da Tauwai yawasana tauna guyau Deivid na damma nopone e tubuğana. Be tauna tokare Deivid na meagaie Betliemma be e verauna.”

⁴³ Naumeki da Yesu kana taiye banaga adi noğotama ruvedie nama a dariğā munağedina. ⁴⁴ Banaga ġesaudima a ġoeğoenä da sibo a vunuğina, be nam aitau tenağā ni-manama Yesu tunine i boru rubuna.

⁴⁵ Naumeki da porisiman a tava munağana Parisi be pirisi adi babadama ġarodie. Be inam babadidima porisiman ai taraviredi be a riuna, “Aba aubainama Yesu nam ko vunuğī be ko pani verauge?” ⁴⁶ Be porisiman a riuna, “Uma baneginama na giuma ai rewapano kauana, nam

aitau airāgan nama i giu rubu be ke vaiena.”⁴⁷ Be Parisi a riuedina, “Taumi mate yodi tauna kowai murinağonaño, bo? Tauna inam banaga tauboru waidegedima.⁴⁸ Ami babadama be tauma Parisi ko kitamai, inam tauğominama kawai muriwatane, bo?⁴⁹ Ibewa, be uma pataridima buebuedima tarawatu nam ti kataieno, vutuna aubainama tokare Mamaitua ei tara tautaedina.”

⁵⁰ Dabudine Parisi tenaĝa isanama Nikodimas, tauna vutuna boni Yesu ĝarone ya tavatavana, tauna ya midisuĝu be ya riuna,⁵¹ “Tauda dà tarawatuma nema e riuriu bakeda? Banaga tà kovoĝa yababe, bo noĝone tà etara doke be muriĝa tà kovoĝi?”

⁵² Dabudine na banagama a paribee be a riuna, “Tam mate Galili banegim, bo? Girugiruminama porane kwa sievi be kwa kita da nema e riu bakem. Nam airāgan peroveta Galiliĝa tokare e verau.”

⁵³ Naumeki da ai daberaridi be tenatenaĝaĝa a naĝona adi vadae.

8

Waivi na banagama debedie mui ya poreporena

¹ Be Yesu tauna ya naĝona oya olip debane. ² Pomainama raĝanboiboi tauna ya munaĝana tempol nopone be dabudine patara a rawategeidina. Naumeki da tauna ya mia be waikatakataidima yai karena.

³ Tauna dabudi ya giugiuna maika, tarawatu tauwai katakataidima be Parisi taudi waivi tenaĝa a kita banavina, tauna na banagama debedie mui tauporenama. Vutuna aubainama taudi a verauĝena Yesu ĝarone. Be waivinama a riue da patara noĝodie ya midi ⁴ be taudi Yesu a riueno, “Tauwai katakatai, uma waivinama na banagama debedie mui ya porepore be kè banavina. ⁵ Nema kwa noĝonogota bake? Mousis na tarawatuma e riuriuna da umanama waivinama tauma sibo kè rauyeku be ya gurina.”

⁶ Be inam babadidima taudi keda a wanewanena da Yesu sibo aba ya vato waigewa be inam giudie sibo ai wavuna. Be Yesu ya raudune yovo be nimarakurakune doğa debane yawai girugirumana. ⁷ Be taudi yaĝoro waitaravira awai borudidina. Naumeki da Yesu ya tausuĝu be ya riuedina, “Tam aitau da gewagewa nam ku voia rubuna, naumeki da tam banegimma yeku kwa rubu dokena.” ⁸ Dabudine tauna ya raudune munaĝa be doğa debane waigirugiruma yai kare munaĝena.

⁹ Raĝanine waivi tauwai wavunama nama giunama a vaivaiena, naumeki da tenatenaĝaĝa ai naĝo tegetegeidina, be babada poredima taudi inam a doka ĝomedina. Be Yesu

inam waivinama mate taudiā a gose poredina.¹⁰ Naumeki da Yesu ya tausūgu be waivinama yai taravirena, “Tauwai wavumama aikedaē a naōgo? Taudi nam ti rauyekum, bo?”¹¹ Be waivi ya riuna, “Ibewa Bada.” Be Yesu tauna ya riuenā, “Taugu mate nam tokare yā rauyekum. Kwa naōgona, be nam gewagewa kwa voie munaāge!”

Yesu tauna dobu na yanama

¹² Yesu patara īgarodie giu yai kare munaāga be ya riuna, “Taugu vutuna dobu na yanama. Aitau da taugu ewai muriwataneguna, tauna tokare nam tadiwanawanae ei suratou naōgo. Ibewa da tauna nopone yana e kenana, inam raāganine yawasana e banavina.”

¹³ Be Parisi taudi a paribee be a riuna, “Tam inam kaiyovue tamāga aubaimma kwa giugiu raukosōgāīgai.”¹⁴ Be Yesu taudi ya riuedina, “Deōoda taugume aubaiguma sibo è giu raukosōgāīgaina, inam yaōgoro riukaua. Baninama taugu aikedaē è verau be aikedaē yā naōgonaāgona taugu è kataiena, be taumi nam ko kataiena.

¹⁵ “Taumi ko etaetareguna inam banaga īgomā ami noōgotama ruvane ko etaetareguna. Be taugu nam aitau ama etaetarena.¹⁶ Be deōoda taugu banaga etaredima è īgoena, taugu yau rauetarama tokare didimanae è voienā, baninama Tamaguma tauriuporeguma murigue e midimidina, be nam tauguāga ama miamiana.¹⁷ Taumi ami tarawatuma e riuriuna da raāganine matamata rabui giu teneēinama ta vatona, inam giunama banaga tokare nam ta riuwai kaikaiyovu.¹⁸ Taugu inam matemie yodi aubaiguma yā giugiuna, be wairabuiguma inam Tamaguma tauna vutuna tauriuporeguma.”

¹⁹ Dabudine taudi Yesu a riuenā, “Yodi tamamma deō?” Be Yesu ya paribeedi be ya riuna, “Taumi taugu Tamaguma mate nam ko kataiemaina. Deōoda taugu sibo ko kataieguna, taumi tokare Tamaguma mate koya kataiena.”

²⁰ Yesu tauna tempol nopone deō mane aniborunama gabune, dabudi ya midi be inam yabedima matabudi yai katakataidina. Be nam aitau Yesu i kaididi be i pani nawena, baninama tauna na raāgan yaāgama yaōgoro nam i tavana.

²¹ Be Yesu inam babadidima ya riu munaāgedina, “Taugu tokare yā naōgona, be taumi ko waneguna be ami gewagewae tokare ko gurina. Be deō yā naōgonaāgona, taumi tokare nam dabudi ko tava.”²² Be Jius babadidima a riuna, “Yodi agunai waiguri munaāgenama ewai nuanoōgonōgōtena. Vutuna aubainama tauna ya riuna, ‘Deō yā naōgonaāgona, taumi tokare nam dabudi ko tava’. Bo inam giunama baninama aba?”

²³ Dabudi Yesu na giuma ya kaiwatani be ya riuedina, “Taumi inam uma dobunama ġaronama, be taugu ibewa. Taugu inam note banagiguma. ²⁴ Vutuna aubainama è riuemina da taumi tokare ami gewagewae ko gurina. Be taugu inam vutuna taugu. Be deġoda nam koi sumaqegu, taumi tokare naumeki da ami gewagewae ko gurina.” ²⁵ Be taudi a riuena, “Tam aitau?” Be Yesu ya riuedina, “Kaite yà riuriuemina, taugu inam vutuna taugu. ²⁶ Taumi ami voiama debane nema sibo è riuriu bakemina, be tokare nam nama yà voia. Be tauna aitau tauriuporeguma riukaua da tauna e miamiana. Tauna vutuna aba e riuriueguna ruvane, nama dobue banaga yà riuriuedina.” ²⁷ Be banaga dabudine taudi nam ti kataiena da tauna inam Tamanama ya giugieno.

²⁸ Vutuna aubainama Yesu ya riuna, “Raġanine taumi Banaga Natunama ko kaisuġu be koi dawena, inam raġanine taumi tokare ko kataiegħu da taugu vutuna taugu. Be taugu nam yau ġoane yaba ama giugiedina, ibewa da Tamaguma nema ewai katakataiguna ruvane, nama yà giugiedina. ²⁹ Tauriuporeguma tauna raġon matabuna taugu mate be nam ima gosegoseguna, baninama taugu raġon matabuna na ġoanama yà voiedi be tauna ewai nuaverena.” ³⁰ Banaga toitoi uma giudima a vaivaiena, taudi Yesu ai sumaqegħa.

Riukaua banaga e kuvesidina

³¹ Taudi aitauġa Yesu awai sumaqegħa, tauna ya riuedina, “Deġoda yau waikatakataima ko kaidididi be ko voteyeteyedina, taumi riukaua da yau tauwai muriwatanama. ³² Inam raġanine taumi riukaua ko kataie be riukaua taumi e kuvesimina.”

³³ Be taudi a paribee be a riuena, “Nemanama kwa riuriuna da kwa kuvesimai? Tauma Eibrahim na damma, nam aitau ġarone kamawai yaragħana, riukaua nema e kuvesa bakemai?” ³⁴ Be Yesu ya riuedina, “Yà riuriu kauemina, aitau da gewagewa e voivoiena, tauna gewagewa ġarone ewai yaragħana. ³⁵ Be aitau da gewagewa ġarone ewai yaragħana, tauna Mamaitua na damma nopone nam na waibadama ima kenakenana. Be Mamaitua Natuġominama tauna na waibadama e kenakena watanana. ³⁶ Vutuna aubainama deġoda Mamaitua Natuġominama e kuvesimina, taumi naumeki da kuvekuvesimima ko miana. ³⁷ Taugu è kataiena taumi Eibrahim na damma, be yaġoro taumi waiguriguma kowai taina, baninama taugu yau giuma tauminopomie nam ima kenakenana aubainama. ³⁸ Taugu Tamaguma ġarone yaba è kitekitedina vutudi yà riuriuemina. Be

taumi tamemima aba ya riuriuemina, vutuna koi muriwatanena.”

³⁹ Be taudi a riuna, “Tauma tamamaima Eibraham.” Be Yesu ya riuna, “Ibewa, Eibraham inam nam taumi tamemi. Değoda taumi sibo tamemima, Eibraham naumeki da tauna yaba ya voivoiedina ruvane, nama sibo koya voiedina. ⁴⁰ Taugu riukaua Mamaitua ġarone è vaie be è riuriuemina be yaġoro da taumi vunuġiguma kowai taina. Eibraham tauna tokare nam nama ya voia. ⁴¹ Taumi ami voiama ewai maġatarana da taumi tamaġomimima inam banaga ġesau, be tauna na voiama kowai muriwatanena.”

Be taudime a gudutaraġa munaġedi be a riuna, “Tauma Tamaġomimaima inam Mamaitua be nam keda sedamai.” ⁴² Be Yesu ya riuedina, “Ibewa, Mamaitua inam nam taumi tamemi. Taumi değoda sibo tamemima Mamaitua, naumeki da taumi koyai nuapaġoeguna, baninama taugu Mamaitua ġarone be è yovona. Be taugu nam mabigue è yovona, ibewa da tauna ya riuporegu be è yovona. ⁴³⁻⁴⁴ Taumi tamemima Diaboro, vutuna aubainama taugu yau giuma koya nuababaġena, be taugu aba yaġi giuguedina, taumi nam koma vaivaledina. Taumi tamemima na ġoanama vutudi kowai muriwatanedina. Tauna boni pakane da yodi tauna taurau vunuġa. Baninama tauna riukaua e tuatuaġiae be nopone nam riukaua ima kenakenana. Tauna taukaikaiyovu be kaiyovu Tamanama, tauna naumeki na yawasanama vutuna. ⁴⁵ Vutuna aubainama taugu raġanine riukaua yaġi giuguen, taumi nam taugu komawai sumaġeguna. ⁴⁶ Aba gewagewane taumi tokare koi wavugu? Değoda taugu yaġi riuriu kauana, naumeki da taumi sibo koyai sumaġeguna. ⁴⁷ Tam aitau da Mamaitua ġaronama, tam tauna riunama kwa vaivaiena. Be değoda riuguma nam kuma vaivaiena, inam anikitana tam nam Mamaitua ġarona.”

Yesu tauna Eibraham e saġa porena

⁴⁸ Be Jius babadidima a riuena, “Tam maiġone aba kë riuem? Tam gewagewa banegimma be penama ya kokumna!” ⁴⁹ Be Yesu ya riuna, “Taugu nam penama i kokuguna, ibewa da taugu Tamaguma ya vivivivirena, be taumi taugu nam koma vivivivirena. ⁵⁰ Taugu nam ama kawakawa saġe munaġeguna, ibewa da Tamaguma Mamaitua tauna e kawakawa saġeguna, be tauna vutuna yaba matabuna taukita wairuvanama. ⁵¹ Taugu yaġi riuriu kauemina, Tam aitau da riuguma kwa voteyeteyedina, tam nam airaġan tokare guri e taukonim.”

⁵² Dabudine Jius babadidima tauna a riuena, “Yodi kë vaia kauemna da tam riukaua penama ya kokumna. Tam kuya

riuna da aitau riumma e voteyeteyedina, guri nam airağan tokare tauna e taukoni. Be you, Eibraham be peroveta taudi a gurina.⁵³ Tam nema maika kitam? Tamadama Eibraham be peroveta taudi a gurina, tam kwa sağā poredi, bo?"

⁵⁴ Dabudine Yesu ya riuna, "Değoda taugume yà kawa sağē munağeguna, inam kawasağenama nam baniboruboruna. Taugu Tamaguma e kawakawa sağeguna, tauna vutuna taumi ko riuriuna ami Mamaituama.⁵⁵ Be taumi tauna nam ko kataieno. Be taugu tauna è kataieno. Değoda taugu sibo è riuna taugu nam tauna e kataieno, inam rağanine taugu tokare banaga kaikaiyovuguma è tubuğana taumi maika. Be inam nam nama! Taugu tauna è kataie be riunama yà vovo teyeteyena.

⁵⁶ "Tameimma Eibraham ya noğonogötina da yau kaba verauma rağaninama e kitana, aubainama tauna nuanama ya mosarina. Be inam rağaninama tauna kaite ya kita be yai nuaverena."⁵⁷ Be Jius Yesu a riuena, "Tam am suarama ğauboğominama nam 50 ku pağona. Be nemanama da kwa riuriuna tam Eibraham kuya kita?"

⁵⁸ Be Yesu ya paribeedi be ya riuna, "Riukaua yà riuriemina, muriğā da Eibraham ya tubuğana, taugu miemieniguma nama yà miamiana."⁵⁹ Inam giunama debane taudi yeku a ragaudi da Yesu sibo a rauyekuna. Be tauna tempol ya dobi pore, da ya rausonağe be ya nağona.

9

Yesu tauğoma matapotapotanama yai yawasanina

¹ Naumeki da Yesu ya babababara nağō, be tauğoma matapotapotanama ya kitana. Be inam tauğominama matapotapotanama tauna nama ya tubuğana.² Be Yesu na tauwai muriwatanama tauna ai taravirena, "Tauwai katakatai, gewagewa aikedae ya tava be uma tauğominama ya voie da ma matapotapotana ya tubuğā? Tauname na gewagewa bo na dosima adi gewagewa?"

³ Be Yesu ya riuedina, "Ibewa, nam tauna na gewagewa bo dosi adi gewagewa. Uma kauinama ya tubuğana da inam tauğominama ğarone Mamaitua na rewapanama ei mağatari be tà kitana.⁴ Rağan yodi e yanayanae tauriuporeguma na noyama tà voienna. Be kupi e veraverauna e tavana, inam rağanine nam aitau tokare noya e voie be teneteneğina.

⁵ Taugu dobue yà miamiana maika, taugu vutuna dobu na yanama."

⁶ Rağanine nama ya riuriuna, tauna doğae ya kaviso be nimane kavisonama ya voie da dogodogo ya tubuğana, be dogodogonama tauğominama matanama debane ya rodana.

⁷ Yodibe ya riuena, “Yodi kwa naōo kwa siguna Silom topane.” (isa ‘Silom’ baninama inam ‘Riupore’). Naumeki da tauōoma ya naōo be ya sigusiguna murine, matanama yai kita be ya verau munaōana.

⁸ Tauna na banagama be banaga ġesaudima taudi noōone a kitana da tauna taukiġikiġi matapotapotanama. Dabudine taudi a riuna, “Inam tauōominama vutuna kabe taukiġikiġi matapotapotana, bo?” ⁹ Be banaga ġesaudima a riuna, “Ee, inam tauna”. Be ġesaudima a riuna, “Ibewa, inam waria, be kitanama maika tauna.” Be tauōominama ya riu raukosogaiġai be ya riuriuna, “Inam vutuna taugu.” ¹⁰ Be taudi a riuna, “Aitau matamma yai yawasani?” ¹¹ Be inam tauōominama taudi ya riuedina, “Tauōoma tenaġa tawai isana Yesu, tauna dogodogo ya voie da matague ya roda be ya riuegu da Silom topane ē siguna. Naumeki da ē naōo ē sigusiguna murine, taugu ēi kitana.” ¹² Be banaga inam tauōominama a riuena, “Baneginama yodi dego?” Be tauna ya riuedina, “Bai, taugu nam e kataiena.” ¹³ (-)

¹⁴ Inam kauinama Sabat raġanine Yesu ya voiena. (v13) Vutuna aubainama taudi inam tauōominama noōone matapotapotanama ai doka nawena Parisi ġarodie. ¹⁵ Be dabudine tauōoma nema be yai kita bakona, vutuna Parisi tauna ai taravirevirena. Be tauōominama ya paribeedi be ya riuedina, “Tauna dogodogo matague ya roda, da murine ē sigu, yodibe taugu ēi kitana.”

¹⁶ Dabudine Parisi ġesaudima a riuna, “Inam tauōominama tauna Sabat nam ima vivivirena. Inam kauine tauma kē kataiena da Mamaitua nam tauna i riuporena.” Be ġesaudima a riuna, “Gewagewa baneginama mataira dosidima tokare e voiedi, bo?” Naumeki da Parisi inam giudima debedie taudi a dariġa munaġedina. ¹⁷ Dabudine taudi inam tauōominama noōone mata potapotanama ai taravira munaġe be a riuena, “Tam aba kwa noġonogoti, inam baneginama matamma yawai yawanidina, tauna aitau?” Be tauōoma ya riuna, “Tauna agunai peroveta.”

¹⁸ Be Jius babadidima taudi inam tauōominama nam ti sumaqenā da tauna noōone matapotapotana. Vutuna aubainama taudi na dosima a riuedi da a tava, ¹⁹ yodi be ai taraviredina, “Uma taumi natumi, bo? Tauna matapotapotanama nama ya tubuġa, bo? Yodi nemanama da matanama yai kita?” ²⁰ Dabudine na dosima a riuna, “Ee, inam tauma natumaima be tauna matapotapotanama nama ya tubuġana. ²¹ Be yodi nemanama da yai kitana tauma nam ke kataiena. Tauna koi taravire be e riuemina, tauna ya morabana.”

²² Tauḡoma na dosima nama a riuna, baninama taudi Parisi a nairedina aubainama. Baninama Parisi taudi noḡone adi ogama a tarāḡina da banaga aitau e riuna, ‘Yesu tauna Tauwai yawasana’, inam raḡanine baneginama tokare sinagog nopone be tà tavu dobiġena. ²³ Inam kauinama aubainama na dosima a riuna, “Tauna koi taravire be e riuemina, tauna kaite ya morabana.”

²⁴ Naumeki da taudi inam tauḡominama raḡan wairabuinama a riue da ya saḡa munaḡa be a riuena, “Tam Mamaitua sibo kuya vivire be tauma riukaua sibo kuya riuemaina, baninama tauma ke kataie da Yesu tauna gewagewa baneginama.” ²⁵ Dabudine inam tauḡominama ya riuna, “Taugu nam e kataiena tauna gewagewa banegina bo ibewa. Be aba è kataiena inam taugu mataguma potapotanama be yodi èi kitana.”

²⁶ Dabudine Parisi tauḡoma matapotapotanama ai taravira munaġe be a riuena, “Nema yai yawasana bakem? Aiyaba ya voie?” ²⁷ Be tauḡominama ya riuna, “Taugu kaite è riuemina be taumi nam kowai beavaiana. Yodi aba aubainama ko ġoegħoena ko vaia munaġe? Taumi mate tauna waimuriwatanenama ko ġoegħoe, bo?”

²⁸ Dabudine taudi inam tauḡominama a kunure be a riuna, “Tam inam baneginama na tauwai muriwatanama, be tauma inam Mousiš na tauwai muriwatanama! ²⁹ Mamaitua Mousis ġarone ya giuna, vutuna tauma kè kataiena. Be inam tauḡominama aikedae be ya tavana tauma nam ke kataiena.”

³⁰ Be tauḡoma ya riuna, “Taumi ko nuanua babaġħa inam naumeki, taugu mate nam e kataiena tauna deġo be ya tava, be mataguma yai yawasanina, inam vutuna è kataiena. ³¹ Tauda matabuda tè kataiena da gewagewa banegidima adi waibaġħa Mamaitua nam ima vaivaiena. Ibewa da aitauġa tauna ta vivivivre be na ġoanama ta voivoiena, taudi adi waibaġħa tauna e vaivaiena. ³² Boni pakane da yodi nam aitau tenaġa ke vaie da banaga ma matapotapotana tubutubuġinama i yawasana rubuna. ³³ Uma baneginama tauna riukaua da Mamaitua ġaronama, be deġoda ibewa, tauna nam teneteneġina da umanama kauinama tokare ya voie.”

³⁴ Be Parisi a riuena, “Tam kuya tubutubuġe gewagewa ya kaididimna naumeki da yodi. Be yodi tauma kwai katakataimai, bo?” Naumeki da taudi inam tauḡominama sinagog nopone be a tavu dobiġena.

Banaga nam waisumegħidi taudi matedima ya potana

³⁵ Yesu ya vaie da Parisi inam tauḡominama sinagog nopone be a tavu dobiġena. Be Yesu raḡanine inam

tauğominama ya banabanavina ya riuena, “Tam Banaga Natunama kwawai sumäge bo ibewa?”³⁶ Dabudine inam tauğominama ya riuna, “Bada, inam aitau? Kwa riuegu be yài sumağe.”³⁷ Be Yesu ya riuna, “Tam vutuna yodi kwa kitakitana, be ġarome e giugiuna.”³⁸ Naumeki da inam tauğominama ya riuna, “Bada, yàwai sumağana.” Dabudine tauna ya rauduneena.

³⁹ Be Yesu ya riuena, “Taugu è yovona dobue banaga waitarapiriedima aubainama, da banaga matapotepotedima tai kitana, be banaga waikitedima taudi ta noğonogötina da kabe tiwai kita, ibewa da taudi matedima ya potana.”⁴⁰ Be Parisi ġesaudima dabudi a midimidina nama a vaivaiena, taudi a riuna, “Aiyaba, tauma mate matamaima ya pota, bo?”⁴¹ Be Yesu ya riuedina, “Değoda taumi sibo ko riuna, ‘Tauma matamaima ya potana’, inam rağanine taugu tokare è sagumi da gewagewa nam ġaromie ya kena. Be yodi taumi ko riuriuna da taumi matemima ewai kitana, vutuna aubainama taugu tokare nam yà sagumi, be ami gewagewama naumeki da nama ta kenana.”

10

Tauyosi verenama

¹ Yesu ya riuna, “Taugu yà riuriu kauemina, banaga aitau sipu adi ganama matakedane nam e sağɑ be tauna gana boganağɑ e raukai sağɑna, inam baneginama tauna taudanedanene.² Be tauyosi tauna matakedağɑ be e sağasağɑna sipu ġarodie.³⁻⁴ Be matakeda taurabenama tauna matakeda e kaiporena tauyosi aubainama. Be tauyosi tauna na sipuma tenağɑga isedima e vatodi be tauna bonanama ta vaie, yodibe tauna ewai doka dobiğedina. Be sipu tauna tawai muriwatanena, baninama tamedima bonanama a vaia marağamena.⁵ Be banaga tabunama bonanama ta vaiena, taudi tokare naira ta nağona, baninama tauna bonanama nam ti marağamena.”

⁶ Taudi aitaüğɑ inam wainasinama nama a vaivaiena, taudi wainasi baninama nam ti kataiena da Yesu aba ya giugie.⁷ Naumeki da tauna wainasinama, baninama ya giu yağedina, “Yà riuriu kauemina, taugu vutuna sipu adi matakedama.⁸ Be banaga ġesaudima noğogue tavetavedima, taudi inam banaga danedanenedima, vutuna aubainama sipu taudi bonedima a vaia nuababağedina.⁹ Be matakeda inam vutuna taugu. Aitau nopogue e sağɑ be e nağona gana nopone, tauna tokare yawasana e banavina, tauna tokare e mia genuana be kani nonoğinama e kanna.¹⁰ Taudanedanene e tavana, tauna sipu e danenedi, e

vunuğidi be e kawa gewegewedina aubainama e tavana. Be taugu è tavana sipu yài yawasanidina aubainama, be taudi yawasana verenama tai maurena, be nam aba ta maruabie.

11 “Taugu vutuna tauyosi vereguma. Be tauyosi verenama na yawasanama tokare ei utaena sipu waiyawasanidima aubainama. 12 Be tauyosi mane aubainama e vovo bagibagina, inam tauna nam tauyosi verena, be tauna nam sipu tamedi. Baninama tabei ta tavatavana rağanine, inam taunoyanama na yawasanama aubainama naira e nağona. Dabudine tabei tokare sipu tai retedi be tai daberaridina. 13 Inam tauğominama naira e nağona, baninama tauna mane aubainama e noyanoyana, be nam sipu imawai nuaboyedina.

14-15 “Taugu tauyosi vereguma. Taugu Tamaguma è kataiena, be tauna taugu ya kataieguna, teneğinama nama taugu yau sipuma è kataiedina, be taudi taugu a kataieguna. Be taudi waiyawasanidima aubainama taugu yau yawasanama yài utaena. 16 Be taugu yau sipuma ġesaudima gana ġesaudie ta miamiana, taudi mate yà saqedina gana nopone. Da taudi mate taugu bonaguma ta vaie be adi banagama mate dam tenağta tubuğana, yodibe taudi tauyosi tenağta vagurune ta miana.

17 “Taugu yau yawasanama yài utae be ya pağó munağena, vutuna aubainama Tamaguma ewai nuapağoe guna. 18 Be nam aitau tokare yau yawasanama e pağó pore! Ibewa da taugume yau ġoane yau yawasanama yài utaena. Taugu rewapanā ġarogue e kenakenana da yau yawasanama yài utaena, be rewapanā ġarogue da yà pağó munağena. Nama Tamaguma ya riu vavasağeguna.”

19 Inam nama ya giugiuna rağanine, Jius banegidima dabudine ai kawa dariğta munağana, 20 be banaga toitoi a riuna, “Tauna ya bua kauana, penama ya kokuna. Aba aubainama kowai beavaie?” 21 Be banaga ġesaudima a riuna, “Tauna na giuma vaienama nam banaga penama kokukokuna maika. Baninama penama nam teneteneğina da banaga matapotapotanama ei yawasani.”

Jius banegidima Yesu a tuağaiena

22 Tururu rağanine Jerusalemma tempol soinama rağaninama ya tavana, 23 be tempol nopone gabu isanama ‘Solomon na wagapatae’* dabudine Yesu ya babababara nağona. 24 Be Jius banegidima tauna a midiğuruvi be a riuenā, “Tam Tauwai yawasana teika da kwa riu ġomemai. Be nam kwa kawa nuarağarağta guratemai.”

* **10:23:** Uma wagapatanama inam maika vada dosinama, be nam garigari mate.

²⁵ Be Yesu ya riuna, “Taugu maiġoka è riuemina, be nam komawai sumaġeguna. Mataira dosidima Tamaguma isane yà voivoiedina taudi tawai maġatariguna, ²⁶ be yaġoro taumi nam komawai sumaġana, baninama taumi nam taugu yau sipu. ²⁷ Taugu yau sipuma taudi bonaguma vaienama a kataieno, be taugu taudi è kataiedi be tawai muriwatane-guna. ²⁸ Be taugu yawasana kenakena nonoġinama taudi yà uteutedina, da taudi tokare nam airaġan gienae ta naġo. Be nam aitau tokare e kwayagu be teneteneġina. ²⁹ Baninama Tamaguma tauna yai rewapano vavasaġana nam maika aitau gesau. Tauna vutuna sipu ya uteguna, be nam aitau tokare tauna nimane e kwaya be teneteneġina. ³⁰ Tamaguma be taugu, tauma tenaġa.”

³¹ Naumeki da Jius banegidima yeku a tama munaġedi da Yesu sibo a rauyekuna. ³² Be Yesu taudi ya riuedina, “Taugu mataira dosidima toitoi Tamaguma na rewapanae è voiedi be koya kitedina. Yodi deġo matairinama debane taumi rauyekuguma kowai tai?” ³³ Be Jius banegidima a riuena, “Tauma nam inam matairidima aubaidima rauyekumna kamawai taina, ibewa da tam am waidibogoġama aubainama rauyekuma kawai taina. Tam banaga ġoma be kwa riuriu munaġemna da tam kabe Mamaitua.”

³⁴ Be Yesu ya paribeedi be ya riuna, “Koya kataie bo ibewa da ami bukama porane a giruma be umanama a riuna, ‘Taugu è riuemina da taumi dobu mamaituedima.’”

³⁵ Be giruminama poranama aba e riuriuena inam riukaua! Avedi da Mamaitua riunama Israel babadidima ġarodie ya riupore yovoġena, be yaġoro tauna yai isedina ‘mamaitua’.

³⁶ Be yodi taugu yà riuriuna da taugu Mamaitua Natunama be aba aubainama taumi ko medimediegu? Taugu nam amawai diboġana. Taugu Tamaguma ya vinegu be ya riupore yovoġeguna dobue. ³⁷ Deġoda taugu Tamaguma na voiama nam yà voiedi, naumeki da nam koi sumaġegu.

³⁸ Be deġoda yau giūma mate nam koi sumaġe, naumeki da mataira dosidima yà voivoiedina, vutudi sibo koya kitedi be koyai sumaġana. Inam raġanine taumi tokare ko kataie da Tamaguma taugu nōpogue, be taugu Tamaguma nōpone.”

³⁹ Dabudine Jius banegidima a rarau rubu munaġana da Yesu sibo a vunuġina, be taudi tauna a viri yakasi be ya naġo poredina. ⁴⁰ Inam kauinama murine Yesu upa Jodan ya davu be ya munaġana deġo boni Jon banaga yawai babataitodie, dabudine ya miana. ⁴¹ Be banaga toitoi a tava be a riuna, “Jon tauna nam airaġan voia dosidima i voia rubudina, be tauna uma baneginama ya giugiuena inam matabuna

riukaua.”⁴² Vutuna aubainama inam dabudine banaga toitoi Yesu ai sumağena.

11

Lasares ya gurina

¹ Beteni meagaine tauğoma tenağña isanama Lasares tauna ya sida kauana, be nuvunuvunama rabui mate a miamiana. Tauna nuvunuvunama isedima Meri be Mata. ² Uma Merinama tauna vutuna upa ġabuğabunama Yesu kağane ya ġini be debavuvuğine ya ravusina. Tauna vutuna nuvunama ya sidana. ³ Vutuna aubainama inam waiwaividima rabui Yesu na riuma a riupore be a riuna, “Bada, turamma nuamma taupağonama ya sidana.”

⁴ Rağanine Yesu inam varinama ya vaivaiena, tauna ya riuna, “Inam sidanama tokare nam Lasares ei guri. Ibewa da inam sidane Mamaitua neneğarinama ei mağatarina, be inam neneğarine Mamaitua Natunama e kawa sağena.”⁵ Yesu, tauna Mata, Meri be Lasares ewai nuapağgoedina,⁶ be yağoro tauna nam i nağó makaina ġarodie. Tauna rağan rabui ya miana be muriğña da ya nağona ġarodie.

⁷ Naumeki da rağan rabui a kovina murine, Yesu na tauwai muriwatanama ya riuedina, “Yodi tà munağana Judiama.”⁸ Be na tauwai muriwatanama tauna a riueno, “Tauwai katakatai, maiğone kuya kita! Inam dabudine Jius babadidima rauyekumma awai taina. Be yodi tam dabudi kwa munağña, bo?”⁹ Be Yesu ya paribeedina, “Rağan e yanayanae tauda noya tà voiena. Banaga rağan e yanayanae ta babarana tokare nam kağedima tai tutu, baninama taudi dobu yanayanane keda ta kitakita kauena.”¹⁰ Be kupie taudi tokare kağedima tai tutuna, baninama nam yana.”¹¹ Be na giuma ya kaiwatani be ya riuedina, “Turadama Lasares ya kena nuakoana, be taugu yà nağonağona ġarone taiğosorinama aubainama.”

¹² Be na tauwai muriwatanama a riuna, “Bada, değoda tauna ima kenakena, inam tokare sida e yawasanana.”¹³ Be Lasares tauna ya gurina, vutuna Yesu ya giugue be na tauwai muriwatanama ai noğotana kabe tauna kena ġoma i giugue.¹⁴ Vutuna aubainama Yesu taudi ya riu ġomedi be ya riuna, “Lasares ya gurina.”¹⁵ Be taumi aubaimima nuaguma ya verena da nam ġarone e tavana. Yodi inam keda ġesaunama e kenakenana da taumi tokare koi sumağana. Yodi tà nağona tauna ġarone.”¹⁶ Dabudine Tomas awai isana ‘Rağarağā’ tauna tauwai muriwatanana ġesaudima ya riuedina, “Naumeki, matabuda tà nağó be tauna mate tà guri tenağana.”

¹⁷ Yesu Betenima ya tavatavana, tauna ya vaie da Lasares ya guri be kokoagae ya kenana rağan 4 a kovina. ¹⁸ Beteni da Jerusalem nam madani i dauna, ¹⁹ vutuna aubainama banaga toitoi Meri be Mata nuadubuedima aubainama a tavana Betenima, taudi nuvudima ya kovina aubainama. ²⁰ Dabudine Mata e vaiena be Yesu ya veraverauna ġarodie, naumeki da ya dobi ya nağona Yesu verau bodebodenama aubainama. Be Meri tauna vadae ya mia kwasana. ²¹ Be Mata Yesu ya riuena, “Bada, değoda tam maiğone uma dabudine ku tavana, nuvuguma tokare nam ya guri. ²² Be taugu è kataiena değoda yodi aba kwai bağena, Mamaitua tokare e utemna.”

²³ Be Yesu tauna ya riuena, “Nuvumma tokare e midisügu munağana.” ²⁴ Be Mata ya riuna, “Taugu è kataiena da rağan damone midisügu munağ'a rağanine tauna tokare e midisüguna.” ²⁵ Be Yesu tauna ya riuena, “Taugu vutuna midisügu munağ'a be yawasana. Aitaüğ'a da tawai sumağeguna, taudi avedi da a gurina, be yağoro tokare ta yawasanana. ²⁶ Be banaga miemienidima aitaüğ'a taugu tawai sumağeguna, taudi tokare nam airağan ta guri. Inam giunama kwawai sumağ'e bo ibewa?” ²⁷ Be Mata ya riuna, “Bada, taugu yàwai sumağana da tam vutuna Tauwai yawasana Mamaitua Natunama, dobue kuya yovona.”

²⁸ Nama ya giugiu rovona murine, tauna ya munağana vadae tasinama Meri ġarone be mareğ'a ya riue da ġavoe be ya riuena, “Tauwai katakatai ya tava be e ġoegoena e kitamna.” ²⁹ Be Meri inam giunama ya vaivaiena, tauna waiğapa ya midisügu makai be ya nağona Yesu ġarone. ³⁰ Mata değ'o Yesu ya banabanavie, inam dabudine Yesu ya miamiana be nam meagaie i tavana.

³¹ Jius banegidima Meri a miamia roguena, dabudine a kita da Meri vadae be ma girigirina ya dobi makaina. Dabudine taudi a noğotina da Meri kabe nuvunama kokoagine ġaba aubainama i nağonąğ'o, naumeki da taudi ai muriwatanena. ³² Rağanine Meri Yesu ġarone ya tavatavana, tauna ya raupari be ya riuna, “Bada, değoda tam maiğone uma dabudine ku tavana, nuvuguma tokare nam ya guri.”

³³ Yesu e kitana be Meri ya ġabağabana, be Jius banegidima Meri a miamia roguena taudi mate a ġabağabana. Inam rağanine Yesu medi nöponama ya karati be nuanama ya gewagewana. ³⁴ Dabudine Yesu taudi yai taraviredi be ya riuna, “Lasares değ'o dabudine koyai kokoagi?” Be taudi a riuna, “Bada, tà nağ'o be kwa kita.” ³⁵ Naumeki da Yesu ya ġabana. ³⁶ Be banaga dabudine a midimidina taudi a riuna, “Ko kita, Lasares tauna nuanama ya pağ'o kauena.”

³⁷ Be ġesaudima a riuna, “Uma tauġominama banaga mat-apotapotanama yai yawasanina, be aba aubainama tauna Lasares varinama ya vaia yababe be ya guri?”

Yesu, Lasares ya guri be ya kawa midisuġu munaġena

³⁸ Dabudine Yesu medi noponama ya kara munaġe be kokoagae ya tavana. Lasares kokoaginama inam gubae. Be gubanama gayane yeku dosinama ai miditomna.

³⁹ Be Yesu ya riuna, “Yeku ko taurie ġavoe e naġo!” Be Mata ya riuna, “Bada, yodi tokare pana e morabana, baninama tauna kokoagae ya kenana raġan ⁴ a kovina.” ⁴⁰ Be Yesu ya riuena, “Taugu è riuem bo ibewa da tam kwai sumaġana tokare Mamaitua neneġarinama kwa kitana.” ⁴¹ Dabudine taudi Yeku a raurie da ġavoe ya naġo, yodibe Yesu gunuma ya kitasaġe be ya riuna, “Mamai, yāwai kaiwemna da tam taugu bonaguma kuya vaiena. ⁴² Taugu è kataiena da tam raġan matabuna taugu bonaguma kwa vaivaiena, be uma banegidima ta midimidina, taudi kadi taiye taugu bonaguma dosine yà riuna da taudi sibo a vaie be ai sumaġa da tam taugu kuya riuporeguna.”

⁴³ Yesu nama ya giugiu kovina, tauna bonanama dosine ya riuna, “Lasares, kwa dobi!” ⁴⁴ Naumeki da tauġoma gurigurinama gubae be ya dobina. Tauna nimanama, kaġanama, debanama be tuninama matabuna garae sumasumanama. Naumeki da Yesu ya riuna, “Gara ko kuvesa poredi be e naġona!”

Jius babadidima Yesu kana kasirama a tomna waigurinama aubainama

⁴⁵ Jius banegidima toitoi Meri nuadubuenama aubainama a tavatavana, taudi Yesu aba ya voivoiena a kita be tauna ai sumaġena. ⁴⁶ Be banaga ġesaudima taudi a naġo be Yesu aba ya voivoiena Parisi ġarodie ai samanina. ⁴⁷ Dabudine pirisi adi babadama be Parisi ai rawateġeidina Sanedrion waiborunama aubainama. Be dabudine taudi a riuna, “Yodi aba tà voie? Uma tauġominama mataira toitoi e voivoiedina. ⁴⁸ Deġoda tauda tà kita yababena, banaga matabudi tokare tauna tai muriwatanena. Inam raġanine tauīgħara Romġa tokare ta verau, be dà tempolma be dà dobuma ta kawa gewgewedina.”

⁴⁹ Naumeki da tauġoma tenaġħa isanama Kaiyapas, tauna pirisi adi badama inam modinama nopone. Tauna ya midisuġu be ya riuna, “Taumi buebuemima, ⁵⁰ nam aiyaba ko kataiena. Ya verena da inam baneginama tenaġħa sibo ya gurina, be tauda matabuda sibo tè yawasanana.”

⁵¹ Inam giunama nam Kaiyapas nuane i giu yababana, ibewa. Be tauna pirisi adi badama ya miamiana inam modinama nopone, vutuna aubainama tauna yai perovetana da Yesu sibo ya gurina Jius banegidima matabudi aubaidima. ⁵² Be nam Jius taudiā, ibewa da Mamaitua na sedama dobu matabuna nopone a daberara be ta miamiana, taudi mate aubaidima tauna e guri be e rawategeidi da taudi tenaā ta tubuāna.

⁵³ Naumeki da inam raānina be nokoi ya naāona taudi Yesu na kasirama tomnama ai karea da sibo ai gurina.

⁵⁴ Vutuna aubainama Yesu nam patara nopodie i noya munaāna, tauna ya gosedi be ya naāona Epreim meagaine. Inam meagainama dobu kavakavanama diane, be dabudine tauna na tauwai muriwatanama mate a miana.

⁵⁵ Naumeki da Naāopore soinama raānina maida ya tavatavana aubainama, banaga toitoi Israel nopone miemienidima a rauria be a saāa a naāona Jerusalemma. Baninama muriā da Naāopore soinama sibo ya tavana, be noōone taudi adi vaivaima da sibo a sigu dokana.

⁵⁶ Dabudine taudi a ġoeġoena da Yesu sibo a kitana. Vutuna aubainama taudi tempol dianāa a midi babara be adi banagama adi banagama ai taraviredi be a riuriuna, “Aba ko noōonogoti, Yesu tokare soie e saāa bo ibewa?” ⁵⁷ Inam dabudine pirisi adi babadama be Parisi, taudi adi giuma bagibaginama a boruna da aitau Yesu e kitana, waīapa taudi ġarodie ei maātarana. Yodibe tauna ta vunuāina.

12

Meri upa ġabuābunama Yesu kaāanama ya ġinina

(Mt 26:6-13; Mk 14:3-9)

¹ Raāan 6 a kenakenana muriā da Naāopore soinama e tavana. Be Yesu tauna ya naāona Betenima Lasares na vadae, tauna vutuna ya gurina be Yesu ya kawa midisuū munaāena. ² Dabudine Yesu na kanima a vokaukauena. Naumeki da Mata kani ya tebodi be Yesu, Lasares be banaga ġesaudima mate gunie a miamiana ya ute nawedina. ³ Be Meri dabudine upa ġabuābunama* ya paō da Yesu kaāanama debane ya ġini be deba vuvuāine Yesu kaāanama ya ravusina. Be inam upanama isanama ‘Nad’ be maesinama dosinama. Be inam vadanama nponama matabuna ġabuāa ya kaiyaāotina.

⁴ Be Yesu na tauwai muriwatanama tenaā isanama Judas Iskariot, tauna vutuna tokare Yesu e boru dobigena,

* **12:3:** Gurik baibol ya riuna: Inam upanama ġabuābunama na vitama inam ½ kilo nama.

tauna umanama ya riuna,⁵ “Inam upanama ġabuġabunama maesinama ya moraba kauana!† Taumi sibo koya raugimare be mane banaga waikaruwaġewaġedima sibo koya utedina.”⁶ Judas nam banaga waikaruwaġewaġedima i noġotidi be inam giunama i vatona, ibewa da tauna banaga danedanenena, aubainama nama ya giuna. Baninama Judas tauna mane taurabenama be wari raġan tauname aubainama mane nevedima ya rarausor u poraġana.

⁷ Be Yesu tauna ya paribee be ya riuna, “Nam Meri kwa tainuaraġaġa, kwa gose pore. Tauna umanama ya voiana inam ya kawa nonoġiguna waikokoagiguma aubainama.⁸ Banaga waikaruwaġewaġedima raġan matabuna taumi mate ko miamiana. Be taugu nam tokare taumi mate tà mia gurata.”

⁹ Taudi dabudine yaġoro a kanikanina, be patara dosinama a kataie da Yesu tauna Lasares na vadae ya miamiana. Vutuna aubainama a verauna kitana aubainama, be nam Yesu taunaġa, Lasares mate kitana aubainama a verauna, baninama tauna ya gurina, be Yesu yai yawasani munaġena.¹⁰ Inam kauinama aubainama pirisi babadidima adi ogama a taraġina da Lasares mate sibo ai gurina.¹¹ Baninama tauna kana taiye banaga toitoi Jius babadidima a gosedi be Yesu ai muriwatanena.

Yesu Jerusalemma ya saġa ya naġonāġo be banaga ai nuaverena

(Mt 21:1-11; Mk 11:1-10; Lk 19:28-40)

¹² Pomainama banaga soi aubainama a tavatavana, taudi a vaie da Yesu ya saġasaġana Jerusalemma.¹³ Vutuna aubainama banaga toitoi garamo a ragaudi da a dobi a naġona veraubodenama aubainama, be bonedima dosine a yogo be a riuriuna,

“Hosana, waiaiaininama tauna vutuna Bada isane e veraverauna! Israel guyaunama waiaiaininama!”

¹⁴ Yesu donki natunama ya banavi be debane ya miana, maika girugiruminama porane ya riuriuna nama,

¹⁵ “Jerusalem‡ banegimima nam ko naira, ko kitana ami guyauma donki natunama ya gerue be ġaromie e veraverauna.”

¹⁶ Yesu na tauwai muriwatanama uma kauidima noġone nam ti kataiedina. Be Yesu marae ya saġa ya naġonāġona murine, girugiruminama porane aba a riuriuedina, vutudi

† **12:5:** Be upanama maesinama inam maika modi tenaġa nopone ta bagibagi be maesinama ta paġopaqona ruvanama. ‡ **12:15:** Gurik bonane ya riuna: ‘Saion natunama waivinama’. Saion, baninama inam oya, be natunama inam meagai inam oyanama debane e kenakenana. Be meagainama isanama inam ‘Jerusalem’.

Yesu na tauwai muriwatanama a noğotidina, be a kataie da noğone aba awai perovetaena yodi a tubuğ a be a kitana.

¹⁷ Be maiğone Lasares ya guri da kokoagae ya kenakenana. Be Yesu Lasares gurigurinama kokoagae ya riue, be ya kawa midisügu munağe da ya dobina. Inam rağanine banaga toitoi dabudi mate, be Yesu aba ya voie be a kitakitana, taudi inam varinama ai daberarina. ¹⁸ Be banaga toitoi inam varinama a vaiena. Vutuna aubainama taudi garamo a ragaudi be a dobi a nağona Yesu nağobodenama aubainama. ¹⁹ Dabudine Parisi taudi adi banagama adi banagama a riuedina, “Yodi aba tà voie? Banaga matabudi Yesu tawai muriwatanena.”

Yesu nema e guri bakona ya giuena

²⁰ Inam soinama nopone dabudine Gurik banegidima ġesaudima mate inam soinama aubainama a tavana. ²¹ Taudi a verauna Pilip ġarone. (Pilip tauna Betsaida baneginama Galili provins nopone.) Be taudi Pilip ai bağ a be a riuna, “Yau tura, tauma Yesu kitanama ka ġoeğōena.” ²² Naumeki da Pilip ya nağó Endru yai vari be rabuidi a nağona Yesu riunama aubainama.

²³ Be Yesu ya paribeedi be ya riuna, “Yodi rağan ya tavana da Banaga Natunama neneğarinama e mağatarana. ²⁴ Yà riuriu kauemina, değoda pesi nam doğa nopone ko kuma be e guri, inam tokare kitanama teneğinama nama e kenakenana. Be değoda pesi doğa nopone kwa kuma be e gurina, inam rağanine tokare e gogo tava be baninama toitoi e sivudina. ²⁵ Aitau da tauname na yawasanama ewai nuaboyena, tokare na yawasanama e kawa gewagewana. Be aitau da uma dobune nam na yawasanama imawai nuaboyena, tauna tokare yawasana kenakena nonoğinama e pağona. ²⁶ Aitau aubaiguma noya e ġoeğōena, naumeki da ei muriwataneguna. Değ o yà nağonağ bo yà miamiana, tauna taugu mate. Be Tamaguma inam banegidima aitaug a aubaiguma ta noyanoyana, tokare e kawa sağedina.

²⁷ “Be yodi taugu èi nuaboya kauana be nema yà riu bako? Umanama yà riu bo avedi, ‘Mamai, kwa sagugu da uma nuaboyanama nam yà sigue.’ Ibewa, nam nama yà riu, baninama inam vutuna aubainama uma dobudine è yovona. ²⁸ Taugu umanama yà riuna, ‘Mamai, tamğ a isamma kwa kawa sağe munağemna.’” Naumeki da bona marae ya dobi be ya riuna, “Taugu kaiteka isaguma è kawa sağe munağeguna be yodi yà voia munağena.” ²⁹ Inam rağanine patara bona a vaivaiena, banaga ġesaudima a riuna, “Inam parere.” Be ġesaudima a riuna, “Ibewa, inam anea Yesu ġarone e giugiuna.”

30 Dabudine Yesu ya riuna, “Taumi anisagumima aubainama inam bonanama ya dobina, nam taugu. 31 Yodi rağan ya tavana da Mamaitua dobu ei tarapirie be dobunama tauwai badenama e tavu dobiğena. 32 Be taudi korosie tawai daweguna rağanine, taugu yau banagama matabudi yà veraugedina ġarogue.” 33 Inam giudima tauna ya vatodina da banaga sibo a kataie da tauna tokare nema e guri bakona.

34 Dabudine banaga a riuna, “Tauma tarawatu nopone kè kataienia da Tauwai yawasana tauna tokare e mia nonoğana. Be yodi nemanama da kwa riuriuna, ‘Banaga Natunama tokare korosie tai dawe? Banaga Natunama inam aitau?’ ”

35 Be Yesu ya riuedina, “Taugu vutuna ami yanama, be taugu tokare nam taumi mate tà mia gurata. Vutuna aubainama yodi rağan daumorine taumi inam yananama noponağā ko babarana. Inam kedane tadiwanawana tokare nam e rupu tawemi. Baninama aitaüğā tadiwanawana noponağā ta bababarana, taudi keda nam tima kitakitana, taudi ta nağonağona aikedae ta tavana nam ti kataienia. 36 Taumi yana yodi ġaromie e miamiana maika, naumeki da taumi yananama koi sumağena, inam rağanine taumi tokare yana natunatunama ko tubuğana.” Be Yesu na giuma yawai kovina, murine tauna ya gosedi be ya nağō waimatapoviedina.

Jius babadidima yağoro da nam timawai sumağana

37 Yesu mataira toitoi Jius matedie ya voiedina, be taudi yağoro nam ti sumağena, 38 baninama peroveta Aisaia aba ya riuriuena nama a tubuğana. Tauna umanama ya riuna, “Bada, aitau tokare ama giuma ei sumağe? Be aitau ġarodie tokare am rewapanama kwai mağatari?”

39 Be mate Aisaia gabu gesaune umanama ya riuna,

40 “Mamaitua taudi matedima be nuedima yai potedina, inam kedane taudi matedie nam aba sibo a kita, bo nuedie nam aba sibo a kataie

da nuedima a vitaredi be sibo ei yawasanidi.”

41 Aisaia nama ya riuna, baninama tauna kaite Yesu neneğarinama ya kita be ya guiena. 42 Be yağoro banaga toitoi be Jius babadidima toitoi mate Yesu ai sumağena. Be taudi Parisi a nairedina, baninama değoda sinagog nopone be tima tavu dobiğedi. Vutuna aubainama taudi nam ti mağatara munağedina da taudi tauwai sumağā, 43 baninama taudi a ġoeğoenā da Mamaitua sibo ya kawa sağedina. Be adi ġoana kauama inam sibo banaga taudi a kawa sağedina.

44 Dabudine Yesu bonanama dosine ya riuna, “Banaga aitau taugu ewai sumağeguna, inam nam tauguğā imawai sumağeguna, ibewa da tauriuporeguma mate ewai

sumaġena. ⁴⁵ Be deġoda aitau taugu ya kitaguna, inam tauriuporeguma kaite ya kitana. ⁴⁶ Taugu è yovona dobu waiyananama aubainama. Be aitau taugu ewai sumaġeguna, tauna tokare nam tadiwanawanae e mia.

⁴⁷ “Be aitau da yau giuma e vaivaledina be nam e voteyeteyedi, taugu nam yodi tauna yài tarapirie, baninama taugu nam dobu waitarapirienama aubainama e yovona, ibewa da taugu dobu waiyawasaninama aubainama è yovona. ⁴⁸ Be aitau da taugu e riuriu tuatuaġiegħi be yau giuma nam ei aninedi, tauna tokare kovoġa e banavina. Baninama raġan damone taugu yau giuma tokare tauna ta etarena. ⁴⁹ Taugu nam nuague ama giugiu yababana, ibewa da Tamaguma tauriuporeguma tauna ya riu vavasaġeguna da taugu aba yà giuena. ⁵⁰ Be taugu è kataiena da tauna na giuma ewai kataimina da taumi yawasana kenakena nonoġine ko tavana. Vutuna aubainama Tamaguma aba ya riuriueguna, ruvane nama yà giugiuna.”

13

Yesu na tauwai muriwatanama kaġedima e koġekogħedina

¹ Naumeki da Naġopore Soinama raġaninama ġauba noha da sibo ya tavana. Be Yesu tauna kaite ya kataiena da na raġanima ya tavana da uma dobunama e gose be e munaġana Tamanama risine. Dabudine tauna na tauwai muriwatanama yai kataidi da tauna ewai nuapaġo kauedina. ² Ravie kani na raġanie Diaboro kaite Judas Iskariot, nophone noġota gewagewanama ya boruna da Yesu e boru dobiġena, Judas tauna vutuna Saemon natunama. ³ Be Yesu ya kataiena da Tamanama rewapani matabuna tauna nimane ya boruna da yaba matabudi ei badedina. Be mate tauna ya kataiena da tauna Mamaitua ġarone be ya yovona, be yodi e munamunaġana. ⁴ Vutuna aubainama Yesu kani nophone ya midisuġu da na kwamama ya kaipore, be taweri ya paġo da bogane yai rauvirina. ⁵ Yodibe tauna disi ya paġo da nophone upa ya ġini be na tauwai muriwatanama kaġedima ya koġedi be inam tawerine kaġedima ya ravusidina.

⁶ Be raġanine Yesu Saemon Pita ġarone ya tavatavana, Pita ya riuena, “Bada umanema nama da tam taugu kaġagħuma kwa koġa?” ⁷ Be Yesu tauna ya riuena, “Taugu yodi aba yà voivoiena baninama tam nam ku kataiena, be tokare kwa kataie da baninama aba.” ⁸ Be Pita ya riuna, “Avedi, nam airaġan kaġagħuma kwa koġedi!” Be Yesu ya paribeena, “Deġoda taugu kaġamma nam yà koġa, tam taugu nam yau tauwai muriwatana.” ⁹ Be Saemon Pita ya riuna, “O Bada,

değoda nama, naumeki da nam kağaguğā kwa koğedi, be nimaguma be debaguma mate kwa koğedina.”

¹⁰ Be Yesu ya riuena, “Banaga aitau da tuninama matabuna topa nopone ya yovo be ya sigu ġomana, inam baneginama kağanama taunağā tokare e koğedina, bani-nama tauna kaite ya sigu be verenama e miamiana. Be taumi inam koya sigu be veremima ko miamiana, be ġesaumima nam veremi.” ¹¹ Yesu nama ya riuna, bani-nama tauna kaite ya kataie da aitau tokare tauna e boru dobiğena. Vutuna aubainama tauna ya riuna, ‘Gesaumima nam veremi’.

¹² Rağanine taudi kağedima ya koğakoğā kovina, tauna na kwamama ya kote munäge da ya munäga na gabue ya mia be yai taraviredina, “Taugu aba yodi è voiena baninama koya kataie bo ibewa? ¹³ Taumi ko riuriueguna ‘Tauwai katakatai’ be ‘Bada’. Be inam ko riuriu kauana, baninama inam vutuna taugu. ¹⁴ Be yodi koya kita, taugu ami Badama be ami Tauwai katakataima be yağoro kağemima è koğedina. Vutuna aubainama taumi taumiğā ami banagama ami banagama mate kağemima sibo nama koya koğedina. ¹⁵ Taugu yodi mataira verenama è voie be koya kitana, be taumi nama sibo koya voiana, ¹⁶ baninama taunoya tauna nam tokare na badama e sağā pore, be mate tauwai noyanoya tauna nam tokare tauriuporenama e sağā pore. ¹⁷ Yodi taumi uma yabedima koya kitedi be koya kataiedina, be değoda ko voiedina, taumi tokare waiaiaina ko banavina.

¹⁸ “Taugu nam matabumi ġaromie uma yabedima ama giuguedina, ibewa da taugu è vinemina aubainama tenatenağā ami yawasanama è kataiedina. Be girugiruminama porane aba a riuriена inam riukaua, taudi a riuna, ‘Banaga aitau da yau kanima nevanama ya kanina, tauna vutuna ya midi vitare be yai ġavieguna.’ ¹⁹ Uma kauinama muriğā da e tubuğāna yodi ya riuriu wainonoğimina, be tokare e tubuğāna rağanine, dabudine koi sumağā da taugu vutuna Tauwai yawasana. ²⁰ Taugu ya riuriu kauemina, aitau da yau tauwai noyanoyama ei aninena, tauna inam taugu ewai anineguna. Be aitau da taugu ei anineguna, tauna inam tauriuporeguma ewai aninena.”

Judas Yesu e boru dobiğena

(Mt 26:20-25; Mk 14:17-21; Lk 22:21-23)

²¹ Yesu nama ya riuriuna murine, tauna nophonama nu-aboya ya moğavu be ya riuna, “Ya riuriu kauemina, nophonie tenağā tokare taugu e boru dobiğeguna.”

²² Dabudine tauwai muriwatana tenatenağā turanama turanama matanama ya kita be a nuanua babağāna da

Yesu aitau e riuriue. ²³ Be taudi nopolie tenaḡa Yesu tura kaukauinama tauna Yesu diane ya miamiana. ²⁴ Naumeki da Saemon Pita inam baneginama Yesu diane miemieninama mamareḡa ya riu kasave be ya riuena, “Bada kwa riue, aitau tauna e riuriue?” ²⁵ Dabudine inam baneginama Yesu diane miemieninama ya kekera naḡo Bada diaḡomine be mamareḡa ya riu kasavena, “Bada, aitau tokare tam e boru dobiḡem?”

²⁶ Yesu ya paribee be ya riuna, “Kwa kita be taugu raḡanine buredi riku nopone yai gayo be banaga aitau yà utena, inam baneginama vutuna taugu e boru dobiḡeguna.” Naumeki da Yesu buredi riku nopone yai gayo be Judas Iskariot ya utena. Tauna vutuna Saemon natunama. ²⁷ Raḡanine Judas buredi ya paḡo be ya kanikanina, Seitan Judas nopone ya saḡana, dabudine Yesu Judas ya riuena, “Tam aba voienama yodi kwawai nuanoḡonogotena, naumeki da waiḡapa kwa voiena.” ²⁸ Be ḡesaudima dabudine a kanikanina nam ti kataiena aba aubainama Yesu nama Judas ya riue. ²⁹ Be Judas tauna mane taurabenama. Vutuna aubainama, na banagama ḡesaudima ai noḡotana kabe Yesu Judas i riuriupore nawe soi kanima gimerinama aubaina, bo mane banaga waikaruwaḡewaḡedima kabe e utedi. ³⁰ Dabudine Judas ya dobi be kupiḡa ya naḡona.

Yesu ya riuna da Pita tokare tauna e boviena

³¹ Raḡanine Judas ya dobi be ya naḡonaḡona murine Yesu ya riuna, “Yodi raḡan ya tavana da taugu Banaga Natunama neneḡariguma e maḡatarana. Be abaḡa taugu ḡarogue ta tubutubuḡana raḡanine, Mamaitua neneḡara dosinama e paḡona.” ³² Inam raḡanine Mamaitua tokare waiḡapa banaga ei kataidi da Banaga Natunama tauna ya saḡa vavasaḡana. ³³ Yau sedama, noḡone nema Jius babadidima è riuriuedina, nama yodi taumi yà riuriuemina, da taugu tokare taumi mate nam tà mia gurata. Taumi tokare ko waneguna, be deḡo taugu yà naḡonaḡona, dabudi taumi tokare nam ko tava. ³⁴ Be yodi riuvavasaḡa vaunama yà utemina inam: Ami banagama ami banagama nuemima ta paḡona, nema taugu yàwai nuapaḡoemina nama. ³⁵ Deḡoda koi nuapaḡo vivirana, inam raḡanine banaga matabudi tokare ta kataiem da taumi taugu yau tauwai muriwatanama.”

³⁶ Dabudine Saemon Pita Yesu yai taravirena, “Bada, tam deḡo kwa naḡonaḡo?” Be Yesu ya riuna, “Taugu deḡo yà naḡonaḡona, dabudi tam yodi nam kwa tava be tenegina, be tokare tam dabudine kwa tavana.” ³⁷ Be Pita ya riuna, “Bada, aba aubainama dabudine yodi nam yà tava? Taugu

yodi inam teneteneğinama da tam mate tà gurina.”³⁸ Be Yesu tauna ya riuena, “Tam kuya noğoti da teneğinama taugu mate tà gurina. Be taugu yà riuriu kauemna da tam tokare rağan rabuiteğə taugu kwa bovieguna, muriğə da kamkam e riuna.

14

Yesu tauna vutuna keda

¹ “Nam koi nuaboya, Mamaitua koi sumage, be mate taugu koi sumageguna. ² Tamaguma na vadae gabu toitoi ta kenakenana, be taugu yodi dabudine yà nağonağona ami gabuma yà vokaukauedina. Be değoda gabu sibo ibewa, taugu tokare nam e riuemi. ³ Be rağanine yà nağ be gabu yà vokaukaua rovona murine, taugu tokare yà verau munağə be matabumi yai doka nawemina yau kaba miae. Be dabudine matabuda tokare tà mia tenağana. ⁴ Be taugu değə yà nağonağona kedanama taumi koya kataiena.”

⁵ Be Tomas Yesu ya riuena, “Bada, keda nema ka kataie bake? Tauma nam ke kataiena tam aikedae kwa nağonağō.” ⁶ Be Yesu tauna ya paribee be ya riuna, “Taugu vutuna Keda, Riukaua be Yawasana. Be nam aitau tokare Tamaguma ġarone e tava be teneteneğina, ibewa da taugue tokare Tamaguma ġarone ko tavana. ⁷ Değoda taumi ko katai kaueguna, taumi tokare Tamaguma mate sibo koya kataiena. Taumi yodi da nokoi ya nağona Tamaguma koya kataiena, baninama tauna kaite koya kitana.”

⁸ Dabudine Pilip ya riuna, “Bada, Tamamma kwai kataimai, yodibe nuamaima e verena.” ⁹ Be Yesu ya riuna, “Pilip, taugu noya èwai karee da yodi taugu rağan matabuna taumi mate tè miamiana, be yağoro tam nam ku kataieguna da taugu aitau. Be aba aubainama kwa riuriuna, ‘Tamamma kwai kataimai?’ Banaga aitau da taugu ya kitaguna, inam Tamaguma ya kitana. ¹⁰ Taugu inam Tamaguma nopone be tauna taugu nogue, inam riunama tam kwawai sumage bo ibewa? Abağə yà giugiuedina inam nam nuague ama giugiu yababedina, ibewa da Tamaguma nogue e miamiana, tauna vutuna na noyama e voivoiedina. ¹¹ Taugu inam Tamaguma nopone be tauna taugu nogue, inam riunama tam naumeki kwai sumağena. Be değoda ibewa, naumeki da mataira dosidima yà voivoiedina, vutudi sibo kuya kitedi be kuyai sumağana.

¹² “Yà riuriu kauemina, aitau ewai sumageguna, tauna tokare voia dosidima taugu è voivoiedina, teneğidima nama tauna e voiedina. Be nam inam vutudığa, ibewa da tauna tokare voia dosi vavasağidima mate e voiedina, nam maika

taugu è voivoiedina nama. Baninama taugu Tamaguma ġarone yà naġonaġona aubainama.¹³ Be aiyaba taugu isague koi baġena, taugu tokare yà voiena, Tamaguma isanama kawa saġenama aubainama.¹⁴ Be taugu isague aba koi baġaguna, tokare yà voiena.¹⁵ Taumi deġoda koi nuapaġoeguna, taugu aba è riuriu vavasaġemina, tokare ko voteyeteyedina.

Yesu ya saugana da Arua Babau e riupore yovoġena

¹⁶ “Taugu tokare Tamaguma yà baġa da tauna tokare ami tausaguma ġesau e riupore yovoġe¹⁷ be taumi mate ko mia nonoġana, tauna vutuna Riukaua Aruinama. Be dobu banegidima taudi nam teneteneġina da tauna tai anine be adi tausaguma e tubuġa, baninama taudi nam Arua tima wanewanena da sibo a kataie. Be taumi tauna koya kataieno, baninama inam Aruinama yodi taumi mate ko miamiana, be tokare tauna nopomie e miana.¹⁸ Taugu nam tokare yà gose pore yababemi seda kedekededima maika. Ibewa, taugu tokare yà verau munaġana ġaromie.¹⁹ Raġan ġaubonaġa dobu banegidima tokare nam ta kita munaġegu. Be taumi tokare ko kita munaġeguna. Taugu yà yawasana munaġana, aubainama taumi mate tokare ko yawasanana.²⁰ Taugu yà guri be yà midisūgu munaġana raġanine, dabudine taumi tokare ko kataie da taugu Tamaguma nopone. Be taumi taugu nopal, be taugu taumi nopomie.²¹ Tauna aitau yau riuvavasaġama e vovo teyeteyedina, tauna vutuna taugu ewai nuapaġoeguna. Be tauna ewai nuapaġoeguna aubainama, Tamaguma be taugu tokare tauna kai nuapaġoena, be ġarone taugu yà maġatarana.”

²² Dabudine Judas ġesau (nam Judas Iskariot), tauna Yesu ya riuena, “Bada, aba aubainama taumaġa ġaromaie kwa maġatara be nam dobu banegidima ġarodie?”

²³ Be Yesu ya paribee be ya riuna, “Aitau ewai nuapaġoeguna, tauna yau giumentu matabuna tokare e voteyeteyedina. Be Tamaguma inam baneginama ei nuapaġoe, be tauma inam baneginama ġarone ama kaba miama kai tubuġi be dabudine ka miana.²⁴ Be aitau nam imawai nuapaġoeguna, tauna yau giumentu tokare nam e voteyeteyedina. Inam giudima nam nuague amawai tubuġidi be ama giugiedina, ibewa da Tamaguma tauriuporeguma tauna uma giudima ya utegu be yà giugiedina.²⁵ Taugu yodi yaġoro taumi mate tħalli miamiana, aubainama uma kauidima yà giugiedina.²⁶ Taugu isague Tamaguma tokare tausagu Arua Babau e riupore yovoġena ġaromie. Be tauna tokare yaba matabuna ei katakataimina, be abaqà è giugiedina tokare tauna e riuwai noġotmina.

²⁷ “Taugu yà naǵonaǵona be yau subama nopomie yà boruna. Taugu yau subama inam nam dobu banegidima suba ta voivoiena maika, vutuna aubainama nam ko naira bo koi nuaboya. ²⁸ Taugu è riuemina da taugu yà naǵona, be tokare yà verau munaǵana ǵaromie. Deǵoda nuemima tabutabune sibo koi nuapaǵoeguna, taumi sibo nuemima ya verena da taugu yà naǵonaǵona Tamaguma ǵarone. Baninama tauna ya saǵa guratana nam maika taugu. ²⁹ Uma kauidima muriǵa da ta tubuǵana yodi yà riuriu wainonoǵimina, be tokare ta tubuǵana raǵanine, dabudine koi sumaǵa da taugu aba è riuriuemina inam matabudi riukaua.

³⁰ “Be yodi nam gavogavo ima kenakenana da tà giu gurata, baninama uma dobunama kana guyauma kaiteka maida e tavatavana. Tauna nam na rewapanama ǵarogue ima kenakenana. ³¹ Taugu Tamaguma aba ya riuriuena, vutuna yà voienna. Yodibe dobu banegidima tokare ta kataie da taugu Tamaguma yàwai nuapaǵoena. Ko midisuǵu tà naǵo.

15

Yesu tauna vutuna waen kainama

¹ “Taugu vutuna waen kainama, be Tamaguma tauna waen taukumanama. ² Be waen ragedima ǵesaudima nam votevotedi, tauna ewai miaraka poraǵana. Be raga ǵesaudima votevotedima, tauna e tomtom vuneǵidina da taudi ta vota kauana. ³ Be taugu yau waikatakataie Tamaguma kaite taumi ya tom vuneǵimi be koya verena. ⁴ Taumi naumeki da taugu nopogue ko miana, be taugu taumi nopomie yà miana. Baninama deǵoda waen raganama e nuagasi poraǵana inam raganama tokare nam e vota. Be teneǵinama nama deǵoda taumi nam nopogue ko mia, taumi tokare nam ko vota.

⁵ “Taugu vutuna waen kainama, be taumi waen ragedima. Aitau da taugu nopogue e miana, be taugu tauna nopone yà miana, tauna tokare e vota kauana. Be deǵoda taumi ko gosegú be ǵavoe ko midi teǵana, taumi tokare nam ko vota rubu. ⁶ Be aitau nopogue nam e mia, tauna inam waen raganama ta tom pore be ta pokipokina maika. Inam ragedima pokipokidima tokare ta ragaudi be kai matane ta gabu gorudina. ⁷ Deǵoda taumi nopogue ko mia nonoǵa be riuguma taumi nopomie e kenana, taumi aba kowai baǵena, tokare ko banavina. ⁸ Taumi ko votavota kauana raǵanine, Tamaguma neneǵarinama tokare dabudi e maǵatarana. Inam kedane banaga tokare ta kataie da taumi taugu yau tauwai muriwatanama.

⁹ “Tamaguma nema taugu yai nuapaño bakeguna, nama taumi yàwai nuapañoemina. Be yodi inam wainuapañoone ko miana! ¹⁰ Değoda taugu yau riuvavasağama ko voteyeteyedina, taumi tokare yau wainuapañoe ko miana, nema taugu Tamaguma na riuvavasağama è voteyeteyedi be na wainuapañoe yà miamiana nama. ¹¹ Taugu nama yà riuriuemina da nuavere taugu nopalogue kenakenanama, teneğinama taumi nopalome e moğavuna.

¹² “Be taugu yau riuvavasağama inam uma: Ami banagama ami banagama nuemima ta pağona, nema taugu yàwai nuapañoemina nama. ¹³ Wainuapaño dosinama inam umanama: Banaga değoda na yawasanama ei utae be na banagama aubaidima e gurina, inam vutuna wainuapaño dosi vavasağinama inam baneginama ya voiena. ¹⁴ Be taumi değoda yau riuvavasağama ko voteyeteyedina, taumi vutuna taugu yau banagama. ¹⁵ Boni taugu è riuriuemina, taumi taunoya. Be taunoya tauna na badama aba e voivoiedina, tauna nam ima katakataiedina. Vutuna aubainama yodi yà riuriuemina, taumi taugu yau banagama, baninama taugu Tamaguma aba ya riuriueguna, matabudi taumi è riuemina. ¹⁶ Taumi nam taugu ko vineguna, be taugu taumi è vinemina da ko naño be ko votana. Be inam votedima tokare ta kena nonoğana. Yodibe aba isague koi bağena, Tamaguma tokare e utemina. ¹⁷ Yà riuriu vavasağemina da ami banagama ami banagama mate koi nuapağona.

Dobu banegidima tokare ta tuağaiemina

¹⁸ “Değoda dobu banegidima taumi ta tuağaiemina, dabudine ko noğoti da taugu noğone a tuağai dokeguna.

¹⁹ “Değoda taumi sibo dobu ġaronama, taudi tokare ai nuapañoemina. Be ibewa da taumi nam dobu ġarona, baninama taugu è vinemina da inam dobunama ko dobi porena. Vutuna aubainama dobu banegidima ta tuağaiemina. ²⁰ Be banaga taudi kaite taugu ta raraukivi gewegeweguna. Be noğone aba è riuriuemina, vutudi ko noğotidi: ‘Taunoya tauna nam tokare na badama e sağapore.’ Vutuna aubainama taumi mate tokare nama ta raukivi gewegewemina. Be değoda banaga yau giuma sibo ti vovo teyeteyedina, naumeki da taumi mate ami giuma tokare a voteyeteyedina. ²¹ Be taumi taugu ġaroğaroguma aubainama, banaga tokare taumi ta raukivi gewegewemina. Baninama taudi tauriuporeguma nam ti kataiena. ²² Taugu ġarodie è mağatara be Tamaguma riunama è giuena. Be taudi yağoro da ġarogue nama ta voivoiana, vutuna aubainama taudi ġarodie naumeki da gewagewa e kenakenana. Be değoda taugu ġarodie nam sibo e yovo

be e giu, taudi tokare nam gewagewa ġarodie ya kena. ²³ Aitau taugu e tuatuāgaieguna, tauna Tamaguma mate e tuatuāgaiena. ²⁴ Taugu ġarodie mataira dosidima è voiedina, nam aitau deġo nama matairidima i voia rubudina. Be taudi inam matairidima a kitedina, be yaġoro da Tamaguma be taugu ta tuatuāgaiemaina, vutuna aubainama taudi ġarodie gewagewa e kenakenana. Be deġoda taugu sibo mataira dosidima voiedima ibewa, taudi tokare nam gewagewa ġarodie ya kena. ²⁵ Be adi tarawatuma bukane umanama ewai perovetana, ‘Taudi nam aba gewagewanama ġarogue ti banavina be a tuaġai yababeguna.’

Inam giudima yodi ta maġamaġatarana.

²⁶ “Taugu tokare tausagu yà riupore yovoġena ġaromie. Tauna vutuna Riukaua Aruinama. Tauna Tamaguma ġarone e yovo be taugu yau voiama e giuedina. ²⁷ Be taugu noya èwai karee da yodi taumi mate tè naġonaġona. Aubainama taumi mate yau voiama banaga ġesaudima ġarodie ko giuedina.

16

¹ “Uma kauidima matabudi noġone è riuemina da taumi ami waisumaġe tokare nam ko beku. ² Taumi tokare sinagog nopodie be ta tavu dobiġmina. Be raġan e veraverauna e tavana, banaga tokare tai gurimina, baninama taudi tawai noġotana kabe Mamaitua na ġoanama ti voivoie. ³ Taudi inam kauidima nama ta voiedina, baninama Tamaguma be taugu taudi nam ti kataiemaina. ⁴ Uma giudima noġone taugu nam e riu dokemina, baninama taugu yaġoro taumi mate tè miamiana aubainama. Be yodi uma kauidima yà riuriu wainonoġimina, be inam kauidima ta tubuġana raġanine, aba è riuriuemina vutudi tokare ko noġotidina.

Arua Babau na noyama

⁵ “Taugu yodi yà naġonaġona tauriuporeguma ġarone. Be nam aitau kui taraviregu be ku riuna, ‘Tam deġo kwa naġonaġo?’ ⁶ baninama taugu è riuemina aubainama, taumi koyai nuaboyana. ⁷ Be taugu yà riuriu kauemina, ya verena da taugu yà naġona, be deġoda nam yà naġo, tausagu tokare nam e yovo. Be taugu yà naġona raġanine, tausagu tokare yà riupore yovoġena ġaromie. ⁸ Tausagu e yovona raġanine, tauna tokare dobu banegidima matedima e viriġaridi da taudime adi gewagewama ta kitedina, be mate tauna didi-mana kedanama be Mamaitua na etarama ei kataidi da ta kataiedina. ⁹ Be banaga nam timawai sumaġeguna, taudi tokare tausagu ei kataidi da inam vutuna gewagewa. ¹⁰ Be taugu yà naġonaġona Tamaguma ġarone. Inam raġanine taumi tokare nam ko kita munaġegu, vutuna aubainama

tausagu tauna didimana kedanama tokare banaga ei kataidina.¹¹ Be mate tauna banaga ei kataidi da Mamaitua tokare banaga matabudi adi gewagewama aubaidima e etaredina, nema Mamaitua kaite dobu guyaunama etarenama yai karena maika.

¹² “Taugu giu gesaudima toitoi mate sibo è riuemina, be taumi nam teneteneğimi da uma giudima matabudi yodi ko ragaudi. ¹³ Vutuna aubainama Riukaua Aruinama e yovona rağanine, tauna tokare riukaua matabuna ei kataimina. Tauna nam tokare nuane e giu yababa, ibewa da aba ġarogue e vaivaiena, vutuna e giuedina. Be mate yaba gesaudima muriğā da ta tubuğana, tauna ei mağatar dokedina. ¹⁴ Tauna yaba matabudi ġarogue e ragaudi be taumi ġaromie ei mağataridina. Inam kedane tauna isaguma e kawakawa sağena. ¹⁵ Yaba matabudi Tamaguma ġaronama, inam taugu ġaroguma, vutuna aubainama taugu umanama è riuna, ‘Arua yaba matabudi ġarogue e ragaudi be taumi ġaromie ei mağataridina’.

Tauwai muriwatana tokare tai nuavere munağana

¹⁶ “Rağan ġaubonağā tokare nam ko kita munağegu. Be rağan bisanama muridie* taumi tokare ko kita muñağeguna.”

¹⁷ Be na tauwai muriwatanama gesaudima taudi adi banagama adi banagama mate ai giu be a riuna, “Uma giunama baninama aba, tauna ya riuna, ‘Rağan ġaubonağā tokare nam ko kita munağegu. Be rağan bisanama muridie taumi tokare ko kita muñağeguna’. Be mate ya riuna, ‘Taugu ya nağonağona Tamaguma ġarone’, inam giunama baninama aba?” ¹⁸ Be riu ġesau ya riuna, ‘Rağan ġaubonağā’ inam giunama baninama aba? Tauna na giuma aba ya giugiedina tauda nam te kataiedina.”

¹⁹ Yesu ya kataie da taudi a ġoeğoenä uma giudima aubaidima tauna sibo ai taravirena. Vutuna aubainama tauna ya riuedina, “Taumi aba è giugiuemina, vutudi ko nuanua babağedi, bo? Taugu è riuna, ‘Rağan ġaubonağā tokare nam ko kita munağegu. Be rağan bisanama muridie taumi tokare ko kita muñağeguna’. ²⁰ Ya riuriu kauemina da taumi tokare koi nuaboya be ko ġabana. Inam rağanine dobu banegidima tokare tai nuaverena. Taumi tokare koi nuaboya guratana, be murine koi nuavere kauana. ²¹ Inam kauinama maika waivi gomana e suru be e tepatepana nama. Be gomana e tubuğana rağanine nuaboya e kovina, inam rağanine waivi nuanama e verena, baninama banaga

* **16:16:** Rağan bisanama muridie inam kokoagae be e midisuğu munağana ya giuena.

vaunama dobue ya tubuğana. ²² Inam kauinama teneğinama nama taumi ġaromie. Yodi ami nuaboyama rağaninama ya tavana, be tokare ko kita munağeguna rağanine, taumi koi nuaverena. Be inam wainuaverenama nam aitau tenaġa tokare ġaromie e paġo pore. ²³ Inam rağanine taumi tokare nam koi baġagu, ibewa. Taugu aba ya riuemina inam, taugu isague Tamaguma koi baġa be tauna ami ġoanama e utemina. ²⁴ Noġone be ya saġa da yodi nam airaġan isague aiyaba koi baġa rubuna. Be yodi ya riuriuemina da koi baġa be taumi ami ġoanama e utemina, inam rağanine taumi tokare nuemima e vere vavasaġana.

Yesu dobu na rewapanama ya vaisubana

²⁵ “Taugu inam yabedima matabudi wainasie è giugiuemina. Be rağan e veraverauna e tavana, inam rağanine taugu tokare nam wainasie ya giuemi, ibewa da taugu giu didimanidie Tamaguma na kauama ġaromie ya giuedina. ²⁶ Inam rağanine taugu nam taumi aubaimima Tamaguma ya baġa. Ibewa da taumiġa aubaimima Tamaguma koi baġana taugu isague, ²⁷ baninama taumi kowai nua-paġoegu be kowai sumağeguna da taugu Mamaitua ġarone be è yovona. Vutuna aubainama Tamaguma nuanama ko paġopaġona. ²⁸ Taugu Tamaguma ġarone be è yovona dobue, be yodi taugu dobu ya gose pore be ya munamunaġana Tamaguma ġarone.”

²⁹ Dabudine Yesu na tauwai muriwatanama tauna a riueno, “Yodi tam nam wainasie kuma giugiuna, ibewa da giu didimanidie kwa giugiu yaġana. ³⁰ Yodi tauma kे kita be kе kataie da tam banaga adi noġotama matabudi kuya kataiedina, be nam aitau tokare kwai taravire be na noġotama tam e riuem. Uma kauinama aubainama tauma kawai sumağemna da tam Mamaitua ġarone be kuya yovona.”

³¹ Be Yesu ya riuedina, “Yodi koyai sumaġa! ³² Be rağan e veraverauna kaiteka ya tavana, taumi matabumi tokare ko gosegħu be naira koi naġo teğateġana, be Tamaguma tauna yaġoro taugu mate. ³³ Uma kauidima matabudi è riuwai nonoġimina, taumi taugu nopologue ko miana, inam rağanine suba taumi nopolomie e kenana. Uma dobune taumi tokare piripiri ko banavidina, be nam koi nuaboya! Baninama taugu dobu rewapanidima matabuna è vaisubedina.”

Yesu ya moiragina

¹ Dabudine Yesu na giuma yawai kovina murine, tauna mara ya kitasaäge be umanama ya moiragina, "Mamai, rağan ya tavana yodi natumma neneğarinama kwai mağatarina. Inam kedane natumma tam neneğarimma ei mağatarina. ² Baninama tam natumma rewapana kuya utena da tauna banaga matabudi ei badedina. Be banaga aitaugā tam natumma nimane kuya biribiridina, tauna yawasana kenakena nonoğinama taudi e utedina. ³ Be yawasana kenakena nonoğinama kedanama inam umanama: Banaga sibo a kataiem da riukaua Mamaituanama inam vutuna tam. Be mate sibo a kataie da Yesu Keriso tam kuya riuporena, yodibe taudi sibo ai sumağena. ⁴ Taugu noya matabuna tam kuya uteuteguna dobue è voia rovodina, inam kedane am rewapanama èi mağatarina. ⁵ Mamai, yodi taugu noğome kwa voiegu da neneğara dosinama nopone yà sağā be yà miana, maika boni tè miamiana nama, muriğā da dobu ya tubuğana.

Yesu na tauwai muriwatana aubaidima ya moiragina

⁶ "Tam uma banegidima dobue a miamiana, be yodi nimague kuya biridina. Be taudi ġarodie taugu tam èi mağatarimna. Taudi noğone tam ġaromma, be yodi kuya uteguna, taudi am giuma a paǵo be a kaidididina. ⁷ Be yodi taudi a kataiena da yaba matabudi kuya uteuteguna, inam tam ġarome be ta yovoyovona. ⁸ Am giuma taugu è riuedina, be giunama taudi a paǵona. Be taudi a katai kauena da taugu tam ġarome be è yovona. Be mate taudi ai sumağana da tam taugu kuya riuporeguna.

⁹ "Taugu nam dobu banegidima aubaidima amawai baǵamna, ibewa da taudi aitaugā kuya uteuteguna aubaidima yà moimoiragi be yàwai baǵamna, baninama taudi tam ġaroğaromma aubainama. ¹⁰ Yaba matabudi taugu ġarogue inam tam ġaroğaromma, be yaba matabudi tam ġarome inam taugu ġaroğaroguma. Be taudie taugu neneğriguma e mağatarana. ¹¹ Taugu taudi uma dobune yà gosegosedina, baninama taugu yà sağasagana ġarome. Mamai Babaumma, yàwai baǵamna da taudi aitaugā kuya uteuteguna taudi isamma na rewapanae kwa rabe kauedina. Be kwa voiedi da taudi tenaǵa ta tubuğana, maika tam be taugu tauda tenaǵa. ¹² Be taugu taudi mate kè miamiana rağanine, inam isanama teneğine taugu è rabe kauedina. Be nam aitau tenaǵa e kawa gewagewana. Be tenaǵa vinevinenama aubainama tauna wari keda ya watanina, da aba awai perovetaena ruvane ya tubuğana.

¹³ “Yodi taugu yà sağasağana ġarome. Be taugu taudi mate kè miamiana rağanine, yaba toitoi taudi è giuedina da nuavere nopalogue kenakenanama, taudi nopalodima e moğavuna. ¹⁴ Taugu riumma taudi è utedina. Vutuna aubainama dobu banegidima taudi a tuağaledina, baninama taudi maika taugu, tauma nam dobu ġarona. ¹⁵ Taugu nam yodi amawai bağamna da taudi dobue be kwa nawedi ġavoe, ibewa da yàwai bağamna da gewagewa Tamanama na rewapanama nam taudi e kawa gewegewedi. ¹⁶ Taudi maika taugu, tauma nam dobu ġarona. ¹⁷ Am riukaue kwa voiedi da taudi banaga babaudima ta tubuğana. Be inam riukauinama vutuna tam riumma. ¹⁸ Tam taugu kuya riuporeguna dobue, be nama taugu taudi yà riuriuporedina dobue. ¹⁹ Taudi kadi taiye taugume ei uta munağeguna ġarome, inam kedane taudi mate riukaua na rewapanae tokare banaga babaudima ta tubuğana. Yesu tauwai muriwatana ġesaudima mate aubaidima ya moiragina.

²⁰ “Mamai, taugu nam uma taudiğä aubaidima amawai bağamna. Ibewa da taudi adi rauguguye aitaugä da muriğä tai sumağeguna mate aubaidima yàwai bağamna ²¹ da taudi matabudi tenağä ta tubuğana, maika tam be taugu tauda tenağä. Mamai, kwa voiedi da taudi nopalode ta miana, maika tam taugu nopalogue, be taugu tam nopalome. Inam kedane dobu banegidima tokare ta kita be tai sumağä da tam taugu kuya riuporeguna ġarodie. ²² Tam neneğara taugu kuya uteuteguna, vutuna taudi è utedina da taudi tenağä ta tubuğana maika tauda tenağä, ²³ taugu taudi nopalodie be tam taugu nopalogue. Be taudi tenağä ta tubuğana rağanine, dobu banegidima tokare ta kataie da tam taugu kuya riuporeguna. Be mate ta kataie da tam nema taugu kwawai nuapağö bakeguna, nama taudi aitaugä kuya uteuteguna, kwawai nuapağöedina. ²⁴ Mamai, muriğä da dobu ya tubuğana tam nuamma è pağona aubainama neneğara dosinama kuya uteeguna. Be taugu yà ġoeğoenä da taudi aitaugä taugu kuya uteuteguna, taudi taugu mate ka mia tenağä, be yau neneğarama ta kitana.

²⁵ “Mamai, tam didimana Mamaituamma, be dobu banegidima nam ti kataiemna. Taugu tam è kataiemna be uma tauwai muriwatanimda taudi a kataiena da tam kuya riuporeguna. ²⁶ Taudi ġarodie taugu tam yàwai mağatarimna. Nama yà voivoiana, baninama tam kwawai nuapağö gurateguna, be taugu yà ġoeğoenä inam wainuapağonama taudi nopalodie e kena, be taugu taudi nopalodie yà miana.”

18

Yesu a vunuğina

(Mt 26:47-56; Mk 14:43-50; Lk 22:47-53)

¹ Yesu ya moimoiragina murine, tauna na tauwai muriwatanama mate upa Kidron a davu be a nağona noaño nevane sipi nopone. ² Be Judas tauborudobiña, tauna inam gabunama ya kataiena, baninama Yesu rağan toitoi na tauwai muriwatanama mate inam dabudine a nağonağona. ³ Naumeki da pirisi be Parisi taudi Yesu vunuğinama aubainama banaga iğeigeridima be tempol taubodamenama Judas a utena da tauna ei doka nawedina Yesu ġarone, vunuğinama aubainama. Be inam banegidima adi kodam be adi madama a ragaudina, yodibe Judas yai dokedi be inam sipine a tavana.

⁴ Yesu ya kitedi be ya kataiena da yodi aba ġarone e tubuğana, naumeki da tauna ya nađo ġarodie be yai taraviredina, “Aitau ko wanewane?” ⁵ Be taudi a paribee be a riuna, “Tauma Nasaret Yesunama ka wanewanena.” Be Yesu ya riuna, “Tauna vutuna taugu.” Be Judas tauborudobiña, tauna mate tauiğara nopodie ya midimidina. ⁶ Be rağanine taudi ta vaiena be Yesu ya riuna, “Tauna vutuna taugu”, inam rağanine tauiğara a beku be tauridie a ravusedina.

⁷ Dabudine Yesu yai taravira munağedina, “Aitau ko wanewane?” Taudi a paribea munağe be a riuna, “Tauma Nasaret Yesunama ka wanewanena.” ⁸ Be Yesu ya riuna, “Kaite è riuemina da tauna vutuna taugu. Be değoda taumi taugu koma wanewanegu, naumeki da yau tauwai muriwatanama nam nema ko bakedi.” ⁹ Tauna nama ya riuna, baninama aba noğone ya riuriuela, nama ya tubuğana. Noğone Yesu umanama ya riuna, “Nam aitau tenağā kuya uteuteguna taugu e kawa gewagewana.”

¹⁰ Dabudine Saemon Pita kwatikwati ya soru pore, be pirisi adi badama na taunoyama tenağā isanama Marukas beanama kasaunama yai miarakana. ¹¹ Be Yesu Pita ya riuuela, “Kwatikwati kwa boru pore! Tam kuya kataie bo ibewa da taugu yodi Tamaguma na ġoanama aubainama naumeki da ġorağoranama ya siguena.”

Yesu a nawena Anas ġarone

(Mt 26:57-75; Mk 14:53-72; Lk 22:54-71)

¹² Naumeki da tauiğara adi babadama mate be tempol taubodamenama taudi Yesu a pani be ¹³ noğone a nawe dokena Kaiyapas botianama* Anas ġarone. Inam modinama nopone Kaiyapas tauna pirisi adi badama. ¹⁴ Kaiyapas

* **18:13:** Kaiyapas tauna Anas natunama ya nağına.

tauna vutuna boni Jius babadidima ġesaudima umanama ya riuedina, "Ya verena da inam baneginama tenaġa sibo ya gurina, be tauda matabuda sibo tè yawasanana."

Pita Yesu ya boviena

¹⁵ Saemon Pita be tauwai muriwatana ġesauunama mate taudi Yesu awai muriwatanena. Be pirisi adi badama inam tauwai muriwataninama ya kataieno, aubainama tauna Yesu mate a saġħana pirisi na vadae. ¹⁶ Be Pita tauna doġae matakedo diane ya mia kwasana. Dabudine tauwai muriwatana vadae saġħaġa dokanama ya dobi munaġa, be waivi matakedo taurabenama ya riue be Pita vada nōpone ya saġħana. ¹⁷ Inam raġħanīne waivi matakedo taurabenama tauna Pita yai taravire be ya riuna, "Tam mate agunai Yesu na tauwai muriwatanama." Be Pita ya riuena, "Ibewa, nam taugu!" ¹⁸ Dobu ya tururuna aubainama, taunoya kai a suve be taudi tempol taubodamenama mate kai a midi kwaviviro be a marimaririna. Be Pita tauna mate dabudi ya midi be kai ya marimaririna.

Pirisi adi badama Yesu e etarena

¹⁹ Taudi kai a marimaririna maika, pirisi adi badama Yesu ya etare be ya riuena, "Am tauwai muriwatanama aitauġa? Be aiyabaġa banaga kwawai katakataidi?" ²⁰ Be Yesu tauna ya paribee be ya riuna, "Taugu yaba matabudi patara matedie ē giugiedina. Taugu sinagog be tempol nōpodie deġo banaga awai rawateġeidie dabudine ēwai katakataina. Be nam airaġan moisirie aba e giuedina. ²¹ Yodi aba aubainama kwawai taraviregu? Banaga ġesaudima aitauġa awai beavaieguna, taudi kwai taraviredi be ta riuemna."

²² Dabudine tempol taubodamenama tenaġa Yesu ya raunevakau be ya riuena, "Tam aitau ya riuem da pirisi adi badama ġarone nama kwa riuriu?" ²³ Be Yesu ya paribee be ya riuna, "Deġoda taugu aiyaba ē vato waigewana, naumeiki da kwa riu, taugu aiyaba gewagewanama ē vato. Be deġoda ibewa, aba aubainama kuya raunevakaugu?" ²⁴ Dabudine Anas Yesu ma panipanina ya riupore nawena pirisi adi badama Kaiyapas ġarone.

Pita Yesu raġan aniwai rabuinama be aniwai rabuiteġġanama ya boviena

²⁵ Saemon Pita kai ya marimaririna maika banaga ġesaudima ai taravire be a riuena, "Tam mate agunai Yesu na tauwai muriwatanama." Be Pita ya bovi munaġa be ya riuena, "Ibewa, nam taugu!" ²⁶ Dabudine pirisi adi badama na taunoyama ġesauunama, tauġoma beanama waimia rakanama tauna na damma baneginama. Inam

taunoyanama tauna Pita ya riuena, “Taugu sipie tam mate è kitemna.” ²⁷ Dabudine Pita ya bovibovi munağana murine, kamkam ya riuna.

Paelat Yesu ya etarena

(Mt 27:11-26; Mk 15:1-15; Lk 23:1-5, 13-25)

²⁸ Rağanboiboi kupinağɑ Jius babadidima Yesu tauna Kaiyapas ġarone, be ai doka nawena Rom gabemannama isanama Paelat ġarone. Be Jius taudi nam ti ġoena da tai mira munağedi. Vutuna aubainama taudi nam Paelat na vadae ti sağana. Baninama deġoda tai mira munağedina, taudi tokare Nağopore soinama nam ta kani. ²⁹ Vutuna aubainama Paelat doğae ya dobi be taudi yai taraviredina, “Tauna na gewagewama aba, be kowai wawu?” ³⁰ Be taudi Paelat a riuena, “Tauna banaga gewagewanama, vutuna aubainama kè verauğena ġarome.” ³¹ Be Paelat taudi ya riuedina, “Koi doka nawe be ko etarena taumi ami tarawatumɑ na ruvae.” Be Jius babadidima tauna a paribee be a riuena, “Tauma tam am waibadama dibune ka miamiana, vutuna aubainama nam ama rewapanama ima kenakenana da banaga kai guri.” ³² Uma giudima inam nema Yesu e guri bakona noğone ya giuguedina, ruvane nama a tubuğana.

³³ Dabudine Paelat ya munağɑ na vadae, be na tauiğarama ya riuedi da Yesu ai doka sağena ġarone. Yodibe Paelat Yesu yai taravirena, “Tam Jius adi guyau, bo?” ³⁴ Be Yesu ya riuena, “Tam am wainua noğonogotama ruvane taugu kwawai taraviregu, bo banaga a giugiuna ruvane kwawai taraviregu?” ³⁵ Be Paelat ya paribee be ya riuna, “Taugu nam Jius banegigu, da banaga adi noğotama ruvane sibo èi taravirem. Tam am banagama be pirisi adi babadama taudi a verauğemna ġarogue. Aba aubaina? Aba gewagewanama tam kuya voie?”

³⁶ Be Yesu ya riuena, “Taugu yau waiguyauma nam dobue ima kenakenana. Deġoda dobue i kenana, yau taunoyama tokare murgue a midi be iğara ai tubuğina. Inam rağanine Jius banegidima tokare nam sibo a vunuğigu be a panigu. Vutuna aubainama taugu è riuemna da taugu yau waiguyauma nam dobue ima kenakenana.” ³⁷ Dabudine Paelat ya riuna, “Tam naumeki riukaua guyau, bo?” Be Yesu ya riuena, “Inam riukaua, taugu guyau, inam vutuna aubainama è tubuğana. Taugu è yovona dobue da riukaua yà giuena banaga ġarodie, be aitauğɑ riukaua ġaroğaronama taudi bonaguma ta vaivaiena.” ³⁸ Dabudi Paelat yai taravire be ya riuna, “Riukaua inam aiyaba?” Paelat nama ya riuriuna, tauna ya dobi munağɑ doğae be Jius babadidima

ya riuedina, “Uma baneginama tauna nam aiyaba i voia waigewana da yà etare.

³⁹ “Be taumi ami vaivaima e kenakenana da Nāgopore soinama rāganine, dibura baneginama tenāga yà kaikaiporena. Taumi ko ġoeġoena Jius guyaunama yà kaipore, bo?” ⁴⁰ Be taudi matabudi bonedima dosine a yogo munāga be a riuna, “Nam tauna! Tauma ka ġoeġoena Barabas kwa kaiporena.” Be Barabas tauna iġara tauwai karenama.

19

Paelat Yesu Jius nimedie ya boruna tuparatunama aubainama

¹ Dabudine Paelat na tauiġarama ya riuedi, da Yesu kwa-pue ai madarouna. ² Be taudi gedara a pinou da Yesu debane ai mieni be a virididina. Taudi gara gatugatunama Yesu ai kote, ³ yodibe taudi ġarone a sāga da ai varavara be a riuriuna, “Ebom, Jius adi guyauma.” Be taudi nimedie nōgonama a riġana.

⁴ Dabudine Paelat ya dobi munāga be Jius banegidima ya riuedina, “Taugu uma baneginama yà yovoyovoġa mu-nāgena ġaromie, be yà riuriuemina da taugu nam aiyaba gewagewanama ġarone e banavina.” ⁵ Naumeki da Yesu vadae be ya dobina. Tauna gara gatugatunama waikotename be debane gedara boruborunama. Be Paelat ya riuna, “Inam baneginama umanema.”

⁶ Dabudine pirisi adi babadama be tempol taubodame-nama Yesu a kitakitana rāganine, taudi bonedima dosine a yogo be a riuna, “Kwa tuparatu! Kwa tuparatu!” Be Paelat ya riuedina, “Taumi ko tuparatu, taugu nam aiyaba gewage-wanama tauna ġarone e banavina.” ⁷ Be Jius babadidima a riuna, “Tauma ama tarawatuma e riuriuna da tauna e gurina, baninama tauna e riuriu munāgena da tauna kabe Mamaitua Natuna.”

⁸ Be Paelat inam giunama nama ya vaivaiena, tauna ya naira kaua ⁹ be ya munāġana vadae. Dabudine tauna Yesu yai taravire be ya riuna, “Tam aikeda be kuya tava?” Be Yesu nam Paelat i paribee. ¹⁰ Dabudine Paelat ya riuna, “Tam nam ġarogue giu kuma ġoeġoe, bo? Taugu ġarogue rewapanama e kenakenana da tam yà riuporem kwa nāgo bo yà tuparatunna, inam vutuna kuya kataie bo ibewa?” ¹¹ Dabudine Yesu ya paribee be ya riuna, “Mamaitua inam rewapaninama ya utemna, vutuna aubainama naumeki da taugu am waibadama dibune yà miamiana. Deġoda ibewa, taugu tokare nam am waibadama dibune e mia. Be aitau

da taugu nimame ya boruguna, tauna na gewagewama ya moraba vavasağana.”

¹² Inam dabudine be nokoi ya nağona Paelat ya raraubu guratana da Yesu sibo ya raukaigose be ya nağona. Be Jius babadidima bonedima dosine a riuna, “Değoda tam inam baneginama kwa kaipore be e nağona, naumeki da tam nam Sisa turana, baninama banaga aitau e riuna, ‘Taugu guyau’, inam baneginama tauna Sisa na ġaviam.”

¹³ Paelat inam nama giunama ya vaivaiena, tauna Yesu yai doka dobiġa munaġena. Yodibe anikaba etara gabunama tawai isana ‘Gasana’, be gasana debane anikaba mia ya midimidina. Dabudine Paelat ya mia be etara yai karena. Hibru bonane inam gabunama tawai isana ‘Gabata’.

¹⁴ Uma kauidima matabudi suaratopu a tubuğana, Nağopore soinama na vokaukauama rağanine. Be Paelat banaga ya riuedina, “Ami guyuma umanema.”

¹⁵ Dabudine taudi a yogo be a riuna, “Kwa nawe ġavoe! Kwa tuparatuna.” Be Paelat ya riuna, “Uma inam taumi ami guyuma, be ya tuparatu, bo?” Be pirisi adi babadama a riuna, “Tauma nam aba guyunama ġaromaie ima miamiana. Sisa taunağħa tauma ama guyuma.” ¹⁶ Naumeki da Jius adi ġoanama aubainama Paelat tauna Yesu tauīgħara nimedie ya boruna tuparatunama aubainama.

Yesu a tuparatuna

(Mt 27:32-44; Mk 15:21-32; Lk 23:26-43)

Naumeki da tauīgħara Yesu a nawena. ¹⁷ Yesu tauname na korosima ya kiroġi be a nağona gabu Hibru bonane tawai isana ‘Golgota’. Liu ‘Golgota’ inam baninama ‘debagarere’.

¹⁸ Inam dabudine taudi Yesu a tuparatuna. Be Yesu diane banaga rabui mate a tuparatudina. Tenaħġa Yesu kasaunama yauwanine, be tenaħġa seninama yauwanine. ¹⁹ Be Paelat kai ġaubonama bogane ya giruma be Yesu debane, korosi bogane ya tutuna. Tauna inam kainama bogane umanama ya girumina:

NASARET YESUNAMA, JIUS ADI GUYAUMA

²⁰ Inam giunama tauna Hibru bonane, Letin bonane, be Gurik bonane ya girumidina. Taudi Yesu Jerusalem meagħiġiġa diane a tuparatuna, vutuna aubainama Jius banegidima toitoi inam girumidima a siesievidina. ²¹ Be pirisi adi babadama inam giruminama a riutuāġie be Paelat a riuena, “Nam nama kwa giruma, umanama kwa girumana: ‘Inam baneginama ya riuna da tauna kabe Jius adi guyuma.’” ²² Be Paelat ya riuna, “Aba ē girumina, inam ē girumina.”

²³ Naumeki da tauīgāra matabudi 4 Yesu a tupatuparatuna murine, taudi Yesu na garama a ragaudi da a soiedi be taudi matabudi inam garedima a ragaudina. Be gara tenaāga dibune ya kotekotena ya vere kauana, be inam garanama a rautenāge da a voienna be nam popopona, ²⁴ vutuna aubainama taudi a riuna, “Uma garanama nam tà sika. Tauda tài kasie be aitau kasie ei rewapanana, tauna inam garanama e paōona. Inam kauine girugiruminama porane aba awai perovetaena nama yodi a tubuāna.” Girugiruminama porane umanama ya riuna, “Taudi yau garama a soiedina be ġesau ai kasienā.” Inam kauinama yodi tauīgāra ai tubuāna.

²⁵ Be korosi diane waiwaivi matabudi 4 a midimidina. Tenaāga inam Yesu tinanama, be ġesau inam Yesu tinanama tasinama, be Meri Klopas na visarama, yodibe Meri Megdalim. ²⁶ Dabudi Yesu e kitana be tinanama be tura kaukauinama tauna diane a midimidina. Naumeki be tinanama ya riuena, “Waivi, inam tauna yodi tam natumma.” ²⁷ Be turanama ġarone ya riuena, “Inam tauna yodi tam tinamma.” Dabudine inam tauwai muriwataninama tauna na vadae Meri yai doka nawe be dabudine ya rabena.

Yesu ya gurina

(Mt 27:45-50; Mk 15:33-37; Lk 23:44-46)

²⁸ Uma kauidima murine Yesu ya kataie da na noyama yodi ya kovina. Be girugiruminama porane aba awai perovetaena, nama e tubuāna. Dabudine Yesu ya riuna, “Nuaguma ya raukasakasana.” ²⁹ Inam dabudine waen ġorāgoranama duginama ya midimidina. Be banaga anitaiyo kai isune a pani be waen ġorāgoranama nopone ai sonom be Yesu mudune a boruna. ³⁰ Be Yesu inam waennama ġorāgoranama ya tegotegona raġanine, tauna ya riuna, “Yodi matabuna ya kovina.” Dabudine iwanama ya taukotovi be aruinama Tamanama nimane ya boru be ya gurina.

³¹ Inam kauidima Naġopore soinama vokaukauinama raġaninama nopone a tubuāna. Be pomainama inam Sabat raġaninama dosinama. Jius babadidima taudi nam ti ġoēgoena da Sabat nopone banaga tubuġidima korosie sibo a kena. Vutuna aubainama taudi Paelat ai baġana da inam banegidima korosie kaġedima sibo ai miakotovidi be tubuġidima a kaiporaġana. ³² Naumeki da tauīgāra inam banegidima aitauāga Yesu mate a tupatuparatudina, kaġedima ai mia kotovidina. ³³ Be taudi Yesu ta kitana be tauna ya gurina, vutuna aubainama tauna kaġanama nam ti mia kotovidina. ³⁴ Be tauīgāra tenaāga keae Yesu

girigirinama ya tiretiremina, yai rağantenäge da kosina upa mate a dobina.

³⁵ Tauna aitau uma kauidima ya kitedi be ya giuedina, inam matabudi riukaua. Inam baneginama ya kataiena da aba e giugiuedina, matabudi inam riukaua, vutuna aubainama tauna ġaromie ewai matematena da taumi mate koi sumaġana. ³⁶ Uma kauidima a tubuġana da girugiruminama porane aba awai perovetaena nama a tubuġana. Girugiruminama poranama umanama ya riuna: “Nam turiġinama tenaġa maika tokare e nuakotova.” ³⁷ Be girugiruminama ġesaune umanama ya riuna, “Taudi tokare inam baneginama a tiretiremina ta raubigena.”

Yesu ai kokoagina

(Mt 27:57-61; Mk 15:42-47; Lk 23:50-56)

³⁸ Inam kauidima muridie Jousep Arimatia tauġominama, tauna Paelat yai baġana Yesu tubuġinama paġonama aubainama. Jousep tauna Yesu na tauwai muriwatanama. Tauna Jius babadidima ya nairedina aubainama, tauna moisirie Yesu yawai sumaġena. Be Paelat Jousep yai anine da tauna Yesu tubuġinama ya kaipore be ya nawena. ³⁹ Be Nikodimas tauna ya sagu be mate a naġona. Nikodimas tauna vutuna dokane kupie Yesu ġarone ya tavana. Be tauna bunama toitoi* ya verauġedina Yesu tuninama viredima aubainama. ⁴⁰ Taudi adi waikokoagama vaivainama ruvane Yesu garae bunama mate a sumana.

⁴¹ Be Yesu dego a tupatuparatuna gabunama diane, dabudi sipi. Be inam sipine kokoaga gabunama vaunama, be inam kokoagine nam aitau ti kokoaga rubuna. ⁴² Be Naġopore soinama raġaninama kaiteka maida ya tavatavana, aubainama taudi Yesu inam kokoagine ai kokoagina, bani-nama inam kokoaginama maida aubainama.

20

Kokoaga kavakavanama

(Mt 28:1-10; Mk 16:1-11; Lk 24:1-12)

¹ Be Sande raġanboiboi kupinaġa Meri Megdalin ya naġona kokoagae. Be dabudine tauna e kitana be yeku matakedha waimidotomnama ai rawakui be ġavoe ya naġona.

² Dabudine tauna ya manini da ya munaġa be Saemon Pita be Yesu tura kaukauinama ya banavidi be ya riuedina, “Banaga Bada tubuġinama kokoagae a kaipore be aikedae a boruna taugu nam e kataiena.”

* **19:39:** Gurik baibol ya riuna: 34 kg. Be bunama isedima Mera be Alois rawarawateġeidima.

³ Dabudine Pita be tauwai muriwatana ġesäunama mate a manini a naġona kokoagae. ⁴ Taudi a manimanini be Pita turanama tauna ya manini raukosogaiġai da kokoagae ya tava dokana. ⁵ Tauna ya rauduru be kokoaga nopone yai kita saġa be gara ya kitedina a kenakenana. Be nam kokoaga nopone i naġona. ⁶ Be tauna murine Saemon Pita ya manimaninina ya tava da kokoaga nopone ya naġona. Dabudine tauna gara ya kitedina a kenakenana ⁷ be gara ġesau Yesu debanama a sumasumana, inam garanama nokunoku yaġenama, tau-naġa ġavoe ya kenakenana ya kitana. ⁸ Dabudine Pita turanama kokoagae tavatava dokanama, tauna mate kokoaga nopone ya saġa da gara nama ya kitedi be yai sumaġana. ⁹ Be girugiruminama porane ya riuna da Tauwai yawasana tokare e guri be e midisugu munaġana. Be taudi inam riunama yaġoro nam ti kataiena.

Yesu tauna Meri Megdalin ġarone ya maġatarana

¹⁰ Dabudine tauwai muriwatana rabui taudi a munaġana adi vadae, ¹¹ be Meri tauna kokoaga diane ya midi be ya ġabaġabana. Be tauna ma ġabaġabana kokoaga nopone ei kita saġana, ¹² be anea rabui ya kitedina, adi garama a ġavoġavorana. Taudi deġo Yesu ya kenakenae, dabudine a miamiana, tenaġa Yesu kaġanama yauwanine be tenaġa debanama yauwanine.

¹³ Dabudine anea Meri ai taravire be a riuena, “Aba kwa ġabegħabe?” Be Meri ya riuinedina, “Bada tubuġinama kokoagae be banaga a nawe da deġo a boruna, taugu nam e kataiena.” ¹⁴ Inam nama ya giugiuna murine tauna yai tautinamuri da murine Yesu ya midimidina ya kitana. Tauna ya kitana, be yaġoro nam i kataiena da inam tauna Yesu. ¹⁵ Be Yesu ya riuena, “Tam aba kwa ġabegħabe? Aitau kwa wanewane?” Be Meri yai noġotana kabe sipi taurabena, vutuna aubainama tauna ya riuena, “Tura, tam deġoda Bada tubuġinama kuma kirokiroġa nawe, naumeki da kwa rieuġu deġo kuya boru da taugu yà naġo be yà verauġena.” ¹⁶ Be Yesu ya riuena, “Meri!” Dabudine Meri ya midi vitare Yesu ġarone be ya riuna, “Tauwai katakatai!”*

¹⁷ Be Yesu tauna ya riuena, “Nam kwa taukonigu! Baninama taugu yaġoro nam Tamaguma ġarone e naġona. Be yodi tam kwa naġo tasitasiguma ġarodie be kwa riuinedina, ‘Taġu yà munamunaġana Tamaguma ġarone, be taumi mate Tamemima. Tauna yau Mamaituama, be taumi mate ami Mamaituama.’” ¹⁸ Naumeki da Meri Megdalin vari ya

* **20:16:** Gurik baibol ya riuna: Dabudine Meri ya midi vitare Yesu ġarone, be Hibru bonane ya riuna, “Raboni!” ‘Raboni’ inam baninama ‘Tauwai katakatai’.

munaġena tauwai muriwatana ġarodie be ya riuna, “Taugu Bada ē kitana!” Be Bada aba tauna ya riuriuena, vutudi taudi yai varidina.

Yesu na tauwai muriwatanama ġarodie ya maġatarana

¹⁹ Inam raġaninama teneġine Sande ravikupikupie tauwai muriwatana taudi Jius babadidima a nairedina aubainama, taudi adi matakedama a babaġavi be vada nopone a miamiana. Be yai raġantenaġe da taudi poudie Yesu ya midi maġatar be ya riuna, “Suba ġaromie e kena!”

²⁰ Tauna nama ya riuriuna murine, tauna nimanama be girigirinama tauwai muriwatana yai kataidina. Dabudine taudi a kita be nuedima ya vere kauana. ²¹ Dabudine Yesu ya riu muñaġana, “Suba ġaromie e kena! Tamaguma ya riuriuporeguna nama, taumi yà riuriuporemina.” ²² Dabudine Yesu taudi debedie yavutu gayane ya suve pore be ya riuna, “Arua Babau ko paġona! ²³ Taumi aitauġa adi gewagewama ko noġota poredina, naumeiki da Mamaitua taudi adi gewagewama e noġota poredina. Be deġoda banaga adi gewagewama ko kaidididina, nama tokare Mamaitua taudi adi gewagewama e kaidididina.”

Yesu Tomas ġarone ya maġatarana

²⁴ Yesu tauwai muriwatana ġarodie ya maġatarana raġanine, Tomas tauna nam dabudi mate. Tomas tauna tenaġa tauwai muriwatana 12 nopolie, be tawai isana ‘Raġaraġa’. ²⁵ Vutuna aubainama tauwai muriwatana ġesaudima Tomas a riuena, “Tauma Bada kè kitana.” Be Tomas taudi ya riuedina, “Taugu tokare nam yà sumaq. Noġone taugu tutu kividima yà kitedi be nimague tutu gabudima yà taukonidi, be girigirinama a tiretiremina yà taukon, yodibe yà sumaqana.”

²⁶ Wiki tenaġa murine, tauwai muriwatana taudi a rawatęgi muñaġedi da matakeda a babaġavi be vada nopone a miamiana, be Tomas mate dabudine. Be yai raġantenaġe da Yesu taudi poudie ya raumidire be ya riuna, “Suba ġaromie e kena!” ²⁷ Dabudine tauna Tomas ya riuena, “Nimatabaguma kwa kitedi be kwa taukonidi. Be girigiriguma kwa taukon. Nam kwa noġota bekubeku be kwai sumaqana.”

²⁸ Dabudine Tomas tauna ya riuena, “Tam yau Badama be yau Mamaituama!” ²⁹ Inam raġaninama Yesu Tomas ya riuena, “Tam yodi kuya kitaguna, vutuna aubainama kuyai sumaqana. Be nuavere taudi aitauġa nam ti kitaguna be yaġoro awai sumaqana.”

Jon na bukama ya girumina baninama uma

30 Yesu boni mataira dosidima toitoi na tauwai muriwatanama matedie ya voiedina. Be mataira ġesaudima nam buka nopone ti girumidina. ³¹ Be mataira uma bukanama nopone a girumidi be ta kenakenana, taudi vutudi ko kitedi be koi sumāga da Yesu tauna vutuna Tauwai yawasana, Mamaitua Natunama. Be raġanine tauna koi sumāgena, taumi tokare tauna isane yawasana ko banavina.

21

Yesu na tauwai muriwatanama ġarodie ya maġatara mu-naġana

¹ Raġan bisanama muridie Galili yawawinama* diane Yesu na tauwai muriwatanama ġarodie ya maġatara munaġana. Inam kauinama umanama ya tubuġana. ² Raġan tenaġa Galili yawawinama geresine tauwai muriwatana ġesaudima ai rawateġeidina. Taudi inam Saemon Pita, Tomas (tawai isana Raġaraġa), Nataniel (tauna Galili nopone Keina meagħinama baneginama), yodibe Sebedi natunatunama be tauwai muriwatana ġesaudima rabui mate.

³ Dabudine Saemon Pita na banagama ya riuedina, “Taugu yà naġo yà sagidana.” Be na banagama a riuna, “Tauma mate tà naġo tāi sagidana.” Naumeki da taudi wagae a saġa be a naġona. Be inam kupine taudi ai sagida raġanina, be nam aiyaba ti vunuġa rubuna.

⁴ Be raġanboiboi kupinaġa Yesu gerese ya raumidirena. Taudi a kitana be nam ti kataiena da tauna Yesu. ⁵ Be tauna bonanama dosine taudi yai taraviredi be ya riuna, “Yau bana, iyana koya vunuġa bo ibewa?” Be taudi a riuna, “Ibewa!” ⁶ Dabudine Yesu ya riuna, “Ami sagidama kasaumima yauwanine ko pore be dabudi tokare iyana ko konedina.” Naumeki da taudi Yesu aba ya riuriuedina, nama a voiana. Inam raġanine, taudi iyana toitoi a konedina, vutuna aubainama taudi nam teneteneġina da sagida sibo wagae a soru tavaite.

⁷ Inam raġanine Yesu tura kaukauinama, tauna Pita ya riuen, “Inam Bada!” Be Saemon Pita raġanine nama giunama ya vaivaiena, tauna na garama ya kotedi da topae ya poti dobi be ya yaka naġona barabarae. ⁸ Be tauwai muriwatana ġesaudima taudi wagae a munaġana gerese. Be gerese inam maida[†] aubainama taudi sagida a soru ġome be a naġona. ⁹ Be taudi gerese a ġotaġotana raġanine, taudi kai ya karakaratina a kitana. Be kaipou debane iyana be buredi a gabudi be a kenakenana a kitedina.

* **21:1:** Galili yawawinama isanama ġesau inam ‘Yawawa Taiberias’. † **21:8:** Gurik baibol ya riuna: 100 mitas.

¹⁰ Dabudine Yesu ya riuedina, “Iyana koya vunuvunuğidina ġesaudima ko veraugđedi.” ¹¹ Naumeki da Saemon Pita wagae ya poti tava da sagida ya pađo be ya soru nawena barabarae. Sagida nōpone iyana dosidima sievidima 153, be yağoro sagida nam i nuagigina. ¹² Dabudine Yesu ya riuedina, “Ko verau be ko kani.” Be nam aba tauwai muriwataninama Yesu i taravira rubu be i riuna, “Tam aitau.” Baninama taudi matabudi a kataiena da tauna Bada. ¹³ Naumeki da Yesu buredi be iyana ya ragaudi be taudi ya utedina.

¹⁴ Yesu ya guri be ya midisūgu munağāna murine, uma inam rağan aniwai rabuiteğanama na tauwai muriwatanama ġarodie ya mağatarana.

Yesu Pita ya riuena, “Yau sipuma kwai kani bagibagidina”

¹⁵ Naumeki da a kanikani rovona murine, Yesu Saemon Pita ya riuena, “Saemon, Jon natunama, tam naumeki kwawai nuapađo gurategu, nam am banagama kwawai nuapađoedina maika, bo?” Dabudine Pita ya paribee be ya riuna, “Ee Bada, kuya kataiena da tam nuaguma kwa pađopağona.” Dabudine Yesu ya riuena, “Yau sipuma natunatidima kwai kani bagibagidina.” ¹⁶ Be Yesu rağan aniwai rabuinama ya riu munağāna, “Saemon, Jon natunama, tam naumeki kwawai nuapađo gurategu, bo?” Dabudine Pita ya paribee be ya riuna, “Ee Bada, kuya kataiena da tam nuaguma kwa pađopağona.” Dabudine Yesu ya riuena, “Yau sipuma kwa rabedina.” ¹⁷ Naumeki da Yesu rağan aniwai rabuiteğanama ya riu munağena, “Saemon, Jon natunama, tam naumeki kwawai nuapađoegu, bo?” Inam rağanine Pita yai nuaboyana, baninama Yesu rağan aniwai rabuiteğanama ya riuna, ‘Tam naumeki kwawai nuapađoegu, bo?’. Dabudine Pita ya paribee be ya riuna, “Bada, tam yaba matabudi kuya kataiedina. Be kuya kataiena da tam nuaguma kwa pađopağona.” Dabudine Yesu ya riuena, “Yau sipuma kwai kani bagibagidina.

¹⁸ “Yà riuriu kauemna da tam rağanine vaume am tanama kuya pađo be am ġoane nama kuya nağonağona. Be kwai rawadosina rağanine, nimamma tokare banaga kwa utedi, da taudi nimame ta kaididi be adi ġoane nama tai dokem be ko nağona.‡ Avedi da tam inam dobunama nağonama nam kuma ġoeğgoena, be yağoro tai dokem be ko nağona.” ¹⁹ Yesu nama Pita ya riuena, baninama tauna tokare nema e

‡ 21:18: Inam giunama, baninama Pita nema tokare korosie ta tuparatu bakena, vutuna Yesu ya giuena.

guri bakona, vutuna ya giuena. Inam kedane Pita tokare Mamatua isanama e kawa saġena. Be Yesu nama ya giugiuna murine, tauna Pita ya riuena, “Kwai muriwatanegu!”

²⁰ Dabudine Pita yai tautinamuri da Yesu tura kaukauinama ya kitana, tauna muridiġa ya veraverauna. Tauna vutuna noġone Naġopore soinama a kanikani be ya raukekera naġo Yesu ġarone be ya riuna, “Bada, aitau tokare e boru dobiġem?”

²¹ Be Pita Yesu tura kaukauinama ya kitakitana raġanina, tauna Yesu ya riuena, “Bada uma tauna nemanama?” ²² Be Yesu ya paribee be ya riuna, “Tam nam am noyama aba tauna ġarone ima kenakenana. Deġoda taugu è ġoena, tauna tokare yawayawasaninama e miamia be ya verau munaġana. Be tam taugu kwai muriwataneguna.” ²³ Inam riunama tauwai muriwatana a vaia waigewa be taudi tauwai sumaġa ġesaudima ġarodie inam giunama ai daberari be a riuriuna, “Yesu tura kaukauinama tokare nam e guri.”

Be inam nam nama. Yesu nam i riuna tura kaukauinama tokare nam e guri. Ibewa, be tauna umanama Pita ya riuena, “Tam nam am noyama aba tauna ġarone ima kenakenana. Deġoda taugu e ġoena, tauna tokare yawayawasaninama e miamia be ya verau munaġana.”

²⁴ Inam tauwai muriwataninama tauna vutuna inam yabedima matabudi ya kitedi be ya girumidina. Tauda matabuda tè kataiena da yaba matabudi tauna ya girugirumidina inam riukaua. ²⁵ Yesu yaba ġesaudima toitoi mate ya voiedina. Be deġoda inam yabedima matabudi sibo ti giruma rovodina, taugu è noġotina da buka tokare dobu matabuna ya moġavu taritarina.

Apasol Adi Voiama

Luk e girugiruma munağana Tiopilas ġarone

¹ Kapore Tiopilas! Yau letama noğone è girugirumina,* inam matabuna Yesu aba pakane ya voivoiedina be yawai katakataina taudi vutuna è girumidina. ² Yesu na noyama yai kare be yaba toitoi ya voiedina, naumeiki da Mamaitua ya nawena marae. Vutudi matabudi è girumidina.

Muriġa da ya naġona marae, be noğone na apasolma vinevinédima Arua Babaue ya riuwai noğotidina da muriġa aba ta voienna. ³ Yesu ya gurina murine inam apasoldimia ġarodie ya maġatarana raġan toitoi da taudi ta kataie da tauna ya yawasanana. Raġan 40 nōpone namaġa ya voivoiana be Mamaitua na waiguyauma ġarodie ya giugiuena.

(Lk 24:47-52)

⁴ Be raġan tenaġa tauna na apasolma mate a rawateġeidi be ya riu vavasaġedina, “Nam Jerusalem ko gose be koi raba da Tamaguma puyo e riupore yovoġena maika noğone ya riuriuna nama e voienna. Taugu uma yabanama noğone è riuemina. ⁵ Jon banaga upae yai babataitodina, be raġan ġaubonaġa taumi Arua Babaue ko babataitona.”

Yesu ya naġonaġona marae

(Mk 16:19-20; Lk 24:50-53)

⁶ Adi wairawateġeie taudi Yesu ai taravirena, “Bada, tam yodi Israel waiguyau kwa ute munaġedi, bo?” ⁷ Be tauna ya riuedina, “Tamaguma na rewapanae tauna inam raġaninama ya vinena, be taumi nam ami noyama aba ima kenakenana da ko kataie. ⁸ Be Arua Babau ġaromie e yovona raġanine, taumi tokare rewapanae ko paġo da taumi taugu yau matamatama, Jerusalem, Judia be Samaria nōpodie, be dobu matabuna.”

⁹ Raġanine umanama ya riuriuna, matedie Mamaitua tauna Yesu ya kaisuġu nawe be giyou ya suma be nam ti kita munaġena. ¹⁰ Be tauna nema ya saġa ya naġo bakona, taudi yaġoro gunuma a kitakita be, tautauġoma rabui adi garama ġavoġavoridima, ai raġantenaġe diedie a raumidiredi ¹¹ be a riuna, “Taumi mani-Galili aba aubainama uma dabudi ko midi be gunuma ko kitakita? Uma Yesunama yodi Mamaitua ġaromie ya paġo nawena marae, tauna nema koya kita be ya saġa ya naġonaġona marae, nama tokare e yovo munaġana.”

* **1:1:** Noğone letanama inam Luk na gospelma. Luk 1:1-4 kwa kitana.

Judas epaiyanama

¹² Dabudine taudi oya isanama Olip, a gose be a munağana Jerusalemma. Uma oyanama Jerusalem diane, na madanima kilomita tenağā. ¹³ Be rağanine taudi a munamunağana, taudi vada tenağā be nopone vatavatara rabui be debane vatarine a sağana. Dabudine adi kaba mianama. Be banaga dabudine taudi Pita, Jon, Jeims, Andru, Pilip, Tomas, Batolomiu, Metiu be Jeims tauna Alpius natunama, be Saemon tauna awai isana ‘Selot’ be Judas tauna Jeims natunama. ¹⁴ Uma banegidima rağan matabuna a mia be a moimoiragina. Nopodie waiwaivi gesaudima mate, be Meri Yesu tinanama, be Yesu tasitastinama mate.

¹⁵ Be inam rağandie dabudine tauwai sumağā matabudi 120 be Pita tuatuağanama[†] nopolie ya midisuğu be ya giuna, ¹⁶ “Yau bana, dokane Arua Babau Deivid ya riuena da banaga tenağā Yesu e boru dobiğena. Be nama Deivid girugiruminama porane ya girumina. Be yodi uma riunama ya tubuğana. Be uma baneginama tauna Judas. Be tauna Yesu tauvunuğinama yai keda dokedina. ¹⁷ Be uma baneginama noğone Yesu tauna ya vinena da tauna tauda mate tè noyana. ¹⁸ Judas Yesu borudobiğenama aubainama mane a utena. Be uma manene doğa ya gimeri. Be dabudine tauna debane ya beku be ya kati sari be tinağenama a daberarana. ¹⁹ Be banaga matabuna Jerusalem nopone uma varinama a vaiena, vutuna aubainama uma doğanama adi bonae ai isana ‘Akeldamak’. Inam baninama ‘kosina doğanama’. ²⁰ Uma kauinama ya tubuğana, baninama buka Salamo nopone ya girugirumina nama, “Na kaba mianama e kavakava be nam aitau nopone e mia”! Banaga gesau na noyama gabunama sibo ya pağō”

²¹⁻²² “Vutuna aubainama tauğoma gesau tà góeğöena da tauna tauda mate Yesu ya midimidisuğu munağana tài matematena. Tauna aitau tauda mate tè nağonağona, Jon yawai babataitonrağanine, naumeki da Mamaitua Yesu ya nawena marae.”

²³ Naumeki da banaga rabui a vinedi. Jousep awai isana Basabas be awai isaisana Jastas be Mataias. ²⁴ Be dabudine a moiragina, “Bada, tam banaga matabudi nopolima kuya kataiena. Naumeki kwai kataimai da uma rabui nopolie değō tauna kuya vine ²⁵ da tauna sibo apasol noyanama ya pağō, baninama Judas uma noyanama ya gose pore be ya nağona na kaba miae.”‡ ²⁶ Naumeki da taudi yeku rabui bogedie inam banegidima isedima a girumidi da koukou

† **1:15:** Inam dabudine ‘tuatuağanama’, baninama nam tuatuağā gómina, be ‘Christian brothers’. ‡ **1:25:** Judas ya guri be ya nağona gienae, baninama gienae inam gewagewa gabunama.

nopone a biridina. Yodibe banaga tenaḡa yai matapota be koukou nopone yeku tenaḡa ya paḡo da e kitana be Mataias isanama yeku bogane. Naumeki da Mataias apasol 11 nopolide ya saḡana.

2

Arua Babau e yovoyovona

¹ Raḡanine Jius adi soima isanama Pentekost* raḡaninama ya tavatavana, tauwai sumaḡa matabudi gabu tenaḡa ai rawateḡeidina. ² Be yai raḡantenaḡe da gavasa marae be ya yovona maika kaibitibiti gugurinama, be a miamiana vadana nama nopenama yai moḡavuna. ³ Dabudine taudi yaba a kitana maika kai menanama ya daberara be tenatenaḡaḡa debediḡa ya mia naḡona. ⁴ Be matabudi Arua Babau nopolima ya moḡavu, be taudi bona da bona giudima ai karena, maika Arua Babau ya uteutedina nama.

⁵ Jerusalemma Jius banegidima toitoi a miamiana, Maitua a vivivivrena, be uma Jiusdima dobu ġesaudie miemienidima mate a tavana. ⁶ Be raḡanine uma gavasina ma vaivaiena, naumeki taudi gabu tenaḡa a rawateḡeidi be taudi a basedina da Yesu na tauwai muriwatanama bona be bona a giuguedina.

⁷ Be taudi a base kaue be a riuna, “Uma taudi Galili banegidima, ⁸ be nemanama da tauda tenaḡaḡa dà bonae dà bonae ta giugiu be tà vaivaiena? ⁹ Tauda matabuda dobu ġesaudie be tè tavana, inam Paritia, Midia, Elam, Mesopotamia banegidima, Judia, Kapadosia, Pontus, Eisia, ¹⁰ Pirigia, Pampilia, Ijipt, Libia Sairin diane be Rom. ¹¹ Rom banegidima taudi Jius be eteni banegidima ai rawajiusna. Be Kereti be Arebia banegidama mate tà miamia, be matabuda Mamaitua na kauama dosidima dà bonae dà bonae taudi ta giuguedina tauda tà vaivaiedina.” ¹² Yaḡoro taudi a base be a nuababaḡa be awai giu vivivirana, “Uma kauinama baninama aba?” ¹³ Be banaga ġesaudima ai varevaredi be a riuna, “Uma banegidima waen a tego guratena, vutuna aubainama a buana.”

Pita na rauguguyama

¹⁴ Dabudine Pita be apasol 11 a midisuḡu be Pita bonanama dosine banaga ya riuedina, “Taumi Jius be aitauḡa Jerusalemma ko miamiana, koi beavaia kaua be aba yà giuena! ¹⁵ Uma banegidima nam ti tego buana taumi ko noḡonogotina maika, baninama yodi 9 okoroki raḡanboiboi.

* **2:1:** Gurik adi bonae “Pentekost” inam namba 50. Taudi nama awai isana, baninama Naḡopore soinama murine raḡan matabudi 50 da Pentekost soinama ai karena.

- 16 Ibewa, be girugiruminama porane peroveta Joel aba ya giugiuena yodi e tubutubugāna. Joel ya giuna umanama:
- 17 'Mamaitua ya riuna, Rağan damodie taugu tokare yau Aruama yà ġini poraġāna banaga matabudi ġarodie.
- Be natunatumima tautauġomidi be waiwaividima taudi tokare tai perovetana. Be ami tautauġomā vaudima tokare matedie yaba ta kitedina maika rauboni, be ami banagama poredima taudi rauboni ta kitedina.
- 18 Be inam ragandie yau taunoyama tautauġomidima, be waiwaividima matabudi ġarodie yau aruama yà ġini poraġā da taudi tokare tai perovetana.
- 19 Be taugu mataira gunume be dobue yà voiedina, kosina, kai be basu mate.
- 20 Suara ei kupikupina be nawaravi e sabana maika kosina be muriġa da Bada na raġanima dosinama waimatakanikaninama e tavana.
- 21 Aitauġa Bada ġarone sagu tawai baġena, taudi tokare ei yawasanidina.'
- 22 "Israel banagimima, uma riudima ko vaiedi: Nasaret Yesunama, tauna Mamaitua ġarone be ya yovona ġaromie. Be taumi sibo koya kataiena da Mamaitua tauna ya riuporena, baninama Mamaitua rewapani Yesu ya utena da voia dosidima be mataira ya voiedina. 23 Be yaġoro taumi banaga nam waisumeġidi koya riuedi da tauna korosie a tuparatuna. Be nama Mamaitua na ogama. 24 Be Mamaitua Yesu ġarone guri tunimuyana be nuaboyanama ya kaipore be ya kawa midisuġu munaġena. Baninama guri nam teneteneġina da Yesu ya kaididi. 25 Baninama Deivid tauna Yesu na kauama umanama ya giuena:
 'Bada raġan matabuna ewai dokeguna è kitana, baninama tauna taugu mate da taugu nam yà vabeku.
- 26 Vutuna aubainama nuaguma ya vere be yau giuma be yau sarema mosari mate.
- Be avedi da taugu yà gurina, yaġoro è kataiena da matabuna inam naumeki be yài nuaverena.
- 27 Baninama tam tokare aruiguma nam guriguridima adi gabue kwa gose, be tam nam kui aninana da am Taunoya babauma e bova.
- 28 Tam yawasana kedanama kuyai kataigu be tam taugu mate da noppoguma mosari ya moġavuna.'
- 29 "Yau bana, naumeki da guyau Deivid na kauama yà riūgomemina. Deivid ya guri da a dobona be na kokoagama yaġoro yodi ġarode e kenakenana. 30 Tauna peroveta, vutuna aubainama tauna ya kataiena da na damma noppone tokare Mamaitua na waiguyauma banaga tenaġa e utena, baninama Mamaitua ya sauga wapana da nama e voiana.

31 Vutuna aubainama Deivid yai perovetana da Keriso e midisūgu munağana, be tauna nam guriguridima adi gabue i gose be tuninama i bovana.

32 "Tauma matabumai matamata da Mamaitua uma Yesunama gurie ya kawa midisūguna³³ be na rewapanae ya kawa sağe be kasaune yai mienina. Murine tamanama Arua Babau ya utena maika noğone ya riuriuna nama. Be Yesu tauna tauma ġaromäie e ġiniğini porena, vutuna yodi taumi ko kitakita be ko vaivaiena.³⁴ Be Deivid nam marae i nağona, be yağoro umanama ya riuna,

'Mamaitua taugu yau Badama[†] ya riuena, Kasaugue kwa miana

³⁵ naumeiki da taugu am ġaviamma yà vaġaġaridi be kaġamma dibune yà biridina maika guni.'

36 Vutuna aubainama Israel banegimima matabumi ko kataie da uma Yesunama koya tupatuparatuna Mamaitua tauna vutuna ya voie da yodi tauna Bada be Tauwai yawasana."

Banaga toitoi nuedima a vitaredi be ekalesia ya tubuğana

³⁷ Raġanine banaga umanama a vaivaiena, nuedima ya karati be Pita be aposels ġesaudima a riuedina, "Tuatuaġamaima, yodi aba ka voie?"

³⁸ Be Pita ya paribeedi, "Tenatenaġaġa nuenuemima ko vitaredi be ko babataitona Yesu Keriso isane da ami gewagewama e noğota pore be Mamaitua puyo Arua Babau e utemina. ³⁹ Baninama Mamaitua ya riu vavasağana da nama e voienna. Vutuna aubainama uma puyonama inam taumi be ami sedama mate aubaimima, be banaga ġesaudima madanie aitauġa Bada dà Mamaituama e yokoedina." ⁴⁰ Be giu toitoi ġesaudima mate Pita ya riuwai noğotidi be ya duġudina, "Mamaitua ko gose da ei yawasanimi, da nam uma damnama adi yawasanama barebaredima adi kovoġama ko paġo."

⁴¹ Yodi taudi aitauġa riunama a paġopaġona, taudi a babataitona. Inam raġanine banaga sievinama 3 tausand nama adi banagama waisumeġidima nopolie a sağana. ⁴² Be apasol adi waikatakataima a vaivaia nonoġedi be a raberabedina, be taudi a turituriya be moiragie matabudi awai rawateġeidina.

⁴³ Be matabudi nopolima naira ma vivirina ya moġavu be mate apasol voia dosidima be mataira toitoi a voivoiedina.

⁴⁴ Be banaga tauwai sumaġa matabudi a rawateġeidina be yaba matabuna ġarodie teneteneġinama a ragaudina, ⁴⁵ be taudi doğa be purapura a gimaredi da mane a paġo be

[†] 2:34: Deivid na Badama inam Yesu Keriso.

adi banagama waikaruwağewağedima a utedina. ⁴⁶ Rağan matabuna tempol nopone taudi awai rawateğedina, be adi vadama nopođiga taudi ma nuaveredi buredi a giva be a kanikanina. ⁴⁷ Be taudi Mamaitua a kaikai suğu be banaga ġesaudima nuedima a pağopağona. Be rağan matabuna Bada banaga ġesaudima yawai yawasanidina ya sağedina adi banagama nopođie.

3

Pita banaga tuera pağopağonama yai yawasanina

¹ Rağan tenağga ravie suara 3 okoroki inam moiragi rağaninama aubainama, Pita be Jon a sağ a nağonağona tempol nopone. ² Be tempol nopone matakedra tenağga ya kenakenana isanama ‘Verekaua’. Be rağan matabuna banaga dabudine tuera ya tubuğena a kiroğgi be inam matakedanama diane ai mieni be aitauğga tempol nopone a nağonağona ġarodie mane ya kiġikiġiedina. ³ Rağanine Pita be Jon tempol nopone ġaubonağga sibo a sağana, be tauna ya kitedi be mane aubainama ya kiġiedina.

⁴ Dabudine Pita be Jon tauna a kitadidi be Pita ya riuna, “Kwa kitamai!” ⁵ Naumeki da, tauğoma ya kitedi be yawai noğotana da aiyaba sibo ġarodie ya pağona. ⁶ Be Pita ya riuna, “Silva be gold nam ġarogue be aiyaba ġarogue, vutuna tam yà utemna. Nasaret Yesu Kerisonama isane: Kwa midisuğu be kwa na gó!”

⁷ Dabudine nimanama kasaune ya kaididi be ya soru waimidisuğuna. Be inam rağanine tauğoma kağanama be kağga matabiwanama ai rewapani munağana ⁸ be tauna kağane ya poti be na gó yai karea. Naumeki da taudi mate a nağona tempol nopone, be tauna tempol noponağga ya na gó be yai potipoti be Mamaitua isanama ya kaikai suğusuğuna.

⁹ Be banaga matabudi inam tauğominama a kitana ya na gó be Mamaitua isanama ya kaikai suğusuğuna. ¹⁰ Be banaga tauna a kitakitana a kataiğome da tauna baneginama rağan matabuna tempol noğone matakedra isanama ‘Verekaua’. Dabudine ya mia be mane ya kiġikiġi dobidobina. Be banaga matabudi a ġosoridi be a base da aba ġarone ya tubuğana.

Pita na rauguguyama wairabuinama

¹¹ Naumeki da taukiġikiġi Pita be Jon ya kaidididi be banaga matabudi a base kauena be a manini taudi ġarodie gabu isanama ‘Solomon na wagapatama’.* ¹² Rağanine Pita nama e kitedina be ya riuedina, “Israel banegimima,

* **3:11:** Uma wagapata inam maika vada dosinama, be nam garigari mate.

taumi aba ko basebase be ko kitakitamai da tauma kabe uma baneginama kè kawa na gó ama rewapanae bo ama voteyateyama Mamaitua ġarone? ¹³ Mamaitua, no góne tamatamadama Eibraham, Aisik be Jeikob awai sumágena, tauna na taunoyama Yesu ya kawa sa góena. Uma Yesunama taumi koyai utaena waigurinama aubainama. Be avedi da Paelat ya ġoe góena sibo ya riupore ya na góna be taumi koya raukosogái ġaina. ¹⁴ Tauna banaga babaunama be didimana vavasa góinama be taumi nam ko ġoe góena da tauna sibo ya yawasana be taumi banaga tauwai gurinama tauna aubainama Paelat koyai ba gó da ya yawasanana. ¹⁵ Taumi yawasana tauverau góenama koyai gurina. Be Mamaitua gurie yai yawasanina be tauma uma kauinama na matamatama.

¹⁶ “Be uma tau góminama matabumi ko kitakita be ko katakataieno, tauma ama waisumágo Yesu isane aubainama, Yesu isane yai rewapanana. Yesu uma waisume góinama ya utena da tauna ya yawasanana da yodi matabumi ko kitakitana.

¹⁷ “Be yodi yau banagama, taugu è kataieno da taumi ami babadama mate bua maika koya voivoiana. ¹⁸ Be umanama Mamaitua na giúma yai ma góatarina, baninama no góne peroveta matabudi ġarodie ya riuna da tokare na Kerisoma ei nuatoitoina. ¹⁹ Vutuna aubainama nuemima ko vitaredi be Mamaitua ġarone ko na gó da tauna ami gewagewama e kaiporága be nuemima e subana. ²⁰ Dabudine Tauwai yawasana ya vinevinena e riuporena ġaromie. Uma tauwai yawasaninama tauna Yesu. ²¹ Tauna marae e miana, naumeki da ra góan e tava da Mamaitua yaba matabuna e rawavau munágedina, baninama inam nama dokane tauna na babau perovetama ġarodie ya riuna. ²² Be Mousis mate ya riuna nama, ‘Bada ami Mamaituama tauna tokare nopomie peroveta tena góa e vinena maika taugu. Tauna ra góanine yaba matabuna e giugiuemina, taumi koi beavaiena! ²³ Be aitau tena góa tauna nam ei beavaie naumeki da Mamaitua tokare tauna e tavu dobi góe be e kawa gewagewana.’

²⁴ Be Pita na giúma ya kaiwatani be ya riuna, “Be peroveta gesaudima taudi mate a riuna da uma kauidima tokare ta tubu góana, maika yodi uma ra góandie ta tubutubu góana nama. Inam perovetedima taudi Samuel be gesaudima murine a tubutubu góana. ²⁵ Be taumi inam perovetedima adi sedama, vutuna aubainama Mamaitua boni ami dosima ġarodie riuwai no góta ya boruna, inam taumi mate aubaimima nama ya riuna. Be Mamaitua na riuwai no gótamá inam umanama Eibraham ġarone ya boruna, ‘Tokare am dame peroveta

tenaḡa e tubuḡana. Be taune taugu dam matabudi dobue yài aiaainidina.'

²⁶ "Vutuna aubainama Mamaitua na taunoyama gurie ya kawakawa midisugu munaḡena, noḡone ya riupore yovoḡena taumi ġaromie. Be inam taunoyanama e voiemi da ami gewagewama ko gose poredina, yodibe tauna ei aiaanimina."

4

Pita be Jon tauwai tarapiri babadidima ġarodie a ver-
auḡedina*

¹ Pita be Jon yaḡoro banaga ġarodie a giugiuna maika, pirisi, Sadisi be tempol taurabedima adi badama Pita be Jon ġarodie a tavana. ² Taudi nuedima yai medina, baninama Pita be Jon banaga awai katakataidi be a riuriuedina da Yesu gurie ya midisugu munaḡana aubainama, tokare banaga matabudi gurie be ta midisugu munaḡana. ³ Vutuna aubainama a panidi be ravi aubainama dibure a biridina naumeki da raġan ya tom. ⁴ Be banaga toitoi Pita na giuma a vaivaiena ai sumaḡana. Be yodi tauwai sumaḡa tautauḡoma sievinama ya tausaḡana ⁵ 5 tausand.

⁵ Naumeki da pomainama Jius adi babadama be babada dosidima be tarawatu tauwai katakataidima ai rawateġeidi be ai boruna Jerusalem nopone. ⁶ Banaga uma borune, Anas tauna pirisi adi badama, Kaiyapas, Jon, Alexandra be tau-tauḡoma ġesaudima pirisi adi badama na dame banegidima mate. ⁷ Taudi Pita be Jon poudie ai midiridi be ai taraviredina, "Aba rewapanine bo aba isane taumi uma kauinama koya voie?"

⁸ Dabudine Pita nophonama Arua Babau ya moḡavu be ya riuvedina, "Jius babadimima be babada dosimima koi beavaia. ⁹ Tauma manaka kowai taravireviremaina, voia verenama banaga tuera paḡopaḡonama ġarone ya tubuḡana aubainama. Taumi kowai taravireviremaina da aiyabae uma baneginama ya yawasana. ¹⁰ Naumeki da ka riuemi be taumi be Israel banagimima matabumi ko vaie. Nasaret Yesu Kerisonama taumi koya tupatuparatuna, tauna Mamaitua gurie ya kawa midisugu munaḡena, tauna isane uma baneginama yodi ya yawasana be noḡomie e midimidina.

¹¹ 'Tauna yekunama vutuna taumi vada taukerinama koya tuağaiena, be yekunama Mamaitua ya voie da na vadama yasinama ya tubuḡana'.

* ^{4::} Section heading footnote kwa kitana, Luk 22:63 nopone.

¹² “Nam aitau tenaḡa tokare ei yawasanimi, baninama dobu matabuna nopone nam ai isa ima kenakenana da isane yawasana tai baḡe, ibewa da Yesu taunaḡa isane.”

¹³ Raḡanine Pita be Jon adi raudebatorama a kitakitana, taudi a base kauedina, baninama taudi a kataiena da Pita be Jon taudi nam giruma kaua banegidi, be taudi banaga yababa. Taudi a kataiena da uma banegidima noḡone Yesu mate naḡonaḡodima. ¹⁴ Be yodi taudi ta kitana be banaga waiwai yawasaninama tauna diedie mate a midimidina. Vutuna aubainama taudi nam teneteneḡina da sibo ḡarodie aba a giue. ¹⁵ Naumeki be Sanedrion nopone be a riupore dobiḡedi be babada taudiḡa ai tarapiri vivirana.

¹⁶ Be taudiḡa ai taravira munaḡedina, “Uma banegidima nema tà bakedi? Jerusalem banegidima matabudi a kataiena da uma banegidima mataira dosinama a voiena, be tauda nam teneteneḡina da tà boviedi. ¹⁷ Be uma kauinama tà riutuaḡie da nam banaga ḡarodie e daberara, vutuna aubainama uma banegidima nuedima tà boru da nam aitau ḡarone Yesu isane ta giu munaḡa.” ¹⁸ Dabudine Pita be Jon a riuedi da Sanedrion nopone a saḡa munaḡa be a riu vavasaḡedina da nam sibo Yesu isane a giu bo ai katakatai rubu.

¹⁹ Be taudi a paribeedi be a riuna, “Taumiḡa ko kaivira da Mamaitua matane deḡo tauna ya vere. Mamaitua riunama ka voie bo taumi riumima ka voie? ²⁰ Tauma nam teneteneḡina da aba ke kitakitana be ke vaivaiena giuenama ka gose.”

²¹ Naumeki da a riuwai nainairidi be a gosedi da a naḡona, baninama taudi nam ti kataiena da nema sibo a kovoḡa bakedi. Be banaga matabudi inam matairinama dosinama aubainama, Mamaitua isanama a kaikai suḡusuḡuna, ²² baninama uma tauḡominama tuera paḡopaqonama tauna nama ya tubuḡena naumeki da yodi na suarama 40 be ya saḡa porena.

Tauwai sumaḡa raudebatora aubainama a moimoiragina

²³ Raḡanine Pita be Jon a riuriuporedina, taudi a munaḡana adi banagama tauwai sumaḡa ḡarodie be yaba matabuna pirisi adi babada be babada dosidima aba a giuguedina, nama ai maḡataridina. ²⁴ Raḡanine adi banagama nama a vaivaiena, taudi a rawateḡeidi be a moiragina Mamaitua ḡarone, “Bada dosimma, tam mara, dobu, egasi be nopodie yaba matabuna kuya voiedina. ²⁵ Tauma tamamaima Deivid, tam taunoyama, tam Arua Babaue kuya voie da tauna umanama ya giuna,

'Eteni banegidima aba aubainama ta medimedi? Inam banegidima aba aubainama taudi am kasirama ta tomtom yababe? Inam kasirinama kavakavanama.

²⁶ Dobu guyaguyaudima a midi be babada dosidima a rawategeidi da Bada be na vinevinema tawai ġaviedina.'

²⁷ "Riukaua, Herod, Pontis Paelat, eteni banegidima be Israel mate uma meagaine a rawategeidi be am taunoyama babauna Yesu kuya vinevinena ai ġaviena. ²⁸ Be taudi aba am rewapanae be am ġoanama oganama kuya tarataraqina da sibo ya tubuġana, nama yodi a voiena. ²⁹ Be Bada, yodi adi raukivigewagewama ġaromaie kwa noġoti be kwa voiemai da tauma am taunoyama riumma raudebatorae ka giue. ³⁰ Nimamma kwai yoyo waiyawasana aubainama da mataira be voia dosidima kwai tubuġidina am taunoyama babaunama Yesu isane."

³¹ Raġanine moiragi ya kovikovina taudi deġo awai rawategeidina gabunama yai tauyoyona. Be taudi matabudi Arua Babau yai moġavudi be taudi Mamaitua riunama ma raudebatedi a giuena.

Tauwai sumāġa adi purapurama a dariġedina

³² Tauwai sumāġa banegidima matabudi nuenuedima be adi noġotama tenaġa. Be nam aitau tenaġa i riuna tau-naġa na purapura, ibewa da matabudi ai sagu vivirana.

³³ Dabudine apasol ma rewapana vavasaġidi Bada Yesu ya guri ya midisuġuna awai matematena. Be Mamaitua sagu dosinama matabudi ġarodie ya riupore yovoġena. ³⁴ Be dabudine nam aitau poudie aba i maruabiena, baninama kana raġanie aitauġa doġa be vada ġarodie, a raugimaredi be mane ³⁵ apasol ġarodie a sivudina. Be aitau aba ya marumaruabiena, nama mane a utedina.

³⁶ Maika Jousep tauna Livai damnama nopone be Saiprasma ya tubuġana be apasol tauna awai isaisana Banabas. Isa Banabas baninama inam 'taurau duġu'. ³⁷ Tauna doġa yawai badena ya gimare be manenama ya verauġena apasol ġarodie dariġenama aubainama.

5

Ananaias be Sapira

¹ Tauġoma tenaġa isanama Ananaias, be na visarama Sapira, tauna mate adi doġama tenaġa ya gimare da ² mane isunama tauna aubainama ya kaididi kwasena be mane isunama apasol ya utedina. Be na visarama Sapira tauna mate yai aninana.

³ Be Pita ya riuena, "Aba aubainama Seitan kuyai anine da nopolma yai moġavu be Arua Babau ġarone kuya

kaiyovu be doğa kuya gimagimarena manenama isudima tam aubaimma kuya rabe kwasedi? ⁴ Tam sibo doğa kuya rabe kwasena bo doğa kuya gimarena murine, mane sibo kuya rabe kwasena. Be aba aubainama uma kauinama nopome kuyai nuanoğonogote be nama kuya voia? Tam nam banaga ġorone ku kaiyovuna, ibewa da Mamaitua ġorone kuya kaiyovuna.”

⁵ Rağanine Ananaias nama giunama ya vaivairedina, tauna ya beku be ya gurina. Be banaga aitaugā inam nama kauinama a vaivaiena, taudi a naira kauana. ⁶ Rağanine Ananaias ya gurigurina, dabudine yarayaraga a tava da a suma be a kiroğā nawe da a dobona.

⁷ Suara ruwanama 3 awasnama a kovina murine, Ananaias na visarama ya tava be nam i kataiena da aba ya tubuğā. ⁸ Pita yai taravirena, “Kwa riuegu, doğa koya gimagimarena manenama, naumeiki umanama, bo?” Be waivi ya riuna, “Ee, inam naumeiki nama.” ⁹ Be Pita ya riuena, “Aba aubainama taumi koyai anina da Bada Aruinama koya raurubu? Banaga am tauğomama a dobodobona, taudi matakedae tawai rabana da tam mate ta kiroğā dobiğemna.”

¹⁰ Naumeiki da waivi yai rağantenağē da Pita kağane ya beku be ya gurina. Dabudine yarayaraga a sağā vadae, ta kitana be waivi ya gurina. Naumeiki da a kiroğā dobiğe be na tauğomama diane a dobona. ¹¹ Be Mamaitua na damma matabudi be banaga ġesaudima aitaugā inam riunama a vaivaiena, taudi a naira kauana.

Apasol banaga toitoi ai yawasanidina

¹² Apasol mataira be voia dosidima toitoi a voiedina banaga ġarodie. Be tauwai sumağā matabudi kana rağanie Solomon na wagapatae awai rawateğeidina, ¹³ be banaga ġesaudima nam waisumegidi taudi wairawateğei a naira be yağoro banaga ġesaudima a vivivivira kauedina. ¹⁴ Be tau-tauğoma be waiwaivi ġesaudima mate Bada awai sumağena, inam damnama nopone a sağana. ¹⁵ Taudi banaga sidesidedima a kiroğā nawedi kedae da vatar be guni debedie ai kenedina. Nama a voiana, baninama Pita ya veraverauna vagurunama sibo ya taukonidina. ¹⁶ Patara ġesaudima Jerusalem diane meagaidima mate a rawateğeidi, be banaga sidesidedi be banaga nopodie arua gewegewedima miemienidima mate a tavaitedina, be matabudi ai yawasanidina.

Apasol a raukivi gewegewedina

¹⁷ Dabudine pirisi adi badama be na banagama Sadisi mate taudi nopodima unura ya moğavuna. ¹⁸ Taudi Apasol

a panidi be dibure a biridina. ¹⁹ Be kupie Bada na aneama dibura matakedanama ya kaipore da yai doka dobiğedi be ya riuedina, ²⁰ “Ko na gó, tempol nopone ko midi be uma yawasaninama vaunama, matabuna banaga ko riuedi!” ²¹ Rağanine uma riunama a vaivaiena, taudi rağantomtom a na gó tempol nopone be waikatakatai ai karea.

Pirisi adi badama be na banagama mate a tavana rağanine, taudi boru isanama Sanedrion a voiena Israel babadidima mate. Dabudine banaga a riuporedina dibure, apasol waidokedima aubainama. ²² Rağanine taudi dibure a tavatavana apasol nam ti banavidina, vutuna aubainama a munağá be babada ġarodie ai mağatara ²³ be a riuna, “Dibura matakedanama gudugudu yağenama be taurabenama matakedae a midimidina. Be matakeda kè kaikaiporena rağanine, nam aitau tenağá ke banavina.”

²⁴ Rağanine tempol taurabenama adi bada be pirisi adi babadama uma riunama a vaivaiena, taudi a nuababağá be nam ti kataiena aba tokare e tubuğá. ²⁵ Dabudine banaga tenağá ya tava be ya riuna, “Tautaugoma dibure koya sivusivudina, taudi yodi tempol nopone ta midi be banaga tawai katakataidina.”

²⁶ Dabudine tempol taurabedima adi badama mate a na gó be apasol a veraugédina. Be nam ti segeridina, baninama taudi a nairana banaga tima rauyekudi aubainama.

Apasol Sanedrion noğodie nam giu ti nairana

²⁷ Taudi apasol a veraugédina Sanedrion noğodie da pirisi adi badama ei taravireviredina. ²⁸ Be tauna ya riuna, “Kè riu vavasağemina da taumi nam sibo Yesu isane koyai katakatai. Be taumi yağoro koyawai katakatai da uma riunama yodi Jerusalem nophonama ya moğavuna, be ko riuriuna da uma baneginama ya gurina wavunama tauma kabe ka kiroğí.”

²⁹ Be Pita apasol gesaudima mate a riuna, “Tauda Mamaitua sibo tè voteyeteyena, be nam banaga. ³⁰ Taumi Yesu kai bogane koyai gurina, be tamatamadama adi Mamaituama tauna gurie be kawa midisügu munağena. ³¹ Be Mamaitua na rewapanae Yesu ya kawa midisügu da tauna Bada be Tauwai yawasana ya tubuğana, baninama taune Mamaitua ya voie da Israel banegidima adi noğotama ta vitaredi be adi gewagewama e noğota poredina. ³² Tauma be Arua Babau inam kauidima kadi matamatama. Be aitauğá Mamaitua a vovo teyeteyena, naumeki da taudi Arua Babau ya utedina.”

Gamaliel na raukurama

³³ Rağanine taudi umanama giunama a vaivaiena taudi nuedima yai medi kaua be waiguridima a góena. ³⁴ Be

Parisi tenaḡa isanama Gamaliel, tauna tarawatu tauwai katakatainama be banaga matabudi tauna a vivivivirena. Naumeki da tauna Sanedrion nopone ya midisugu be ya riuedi da apasol doğae a dobiğedina raḡan ġaubonaḡa.³⁵ Dabudine na banagama ya riuedina, "Israel babadimima taumi ko kita kaua da aba uma banegidima ġarodie ko voiena." ³⁶ Dokane nama tauḡoma isanama Tudas ya naḡomidisugu be ya riuna da tauna kabe banaga dosina, be banaga sievinama 400 nama ai muriwatanena. Be raḡanine tauna awai gurina, naumeki da tauwai muriwatanana ai daberaridi be yaba matabuna ya kovina. ³⁷ Be murine, Galili tauḡominama isanama Judas, tauna sensus raḡandie ya naḡomidisugu be banaga kourunama yai doka waigewedina. Be tauna mate ai gurina, be na tauwai muriwatanama mate ai daberaridina.

³⁸ "Vutuna aubainama yodi yà raraу kuremina da uma tautauḡomidima ko gose poredi be ta naḡo. Baninama deḡoda adi noyama banage, tokare noyanama e bekuna, ³⁹ be deḡoda Mamaituae, taumi tokare nam teneteneġina da uma tautauḡomidima ko riutuaḡaiedi deḡoda taumi Mamaitua kowai ġaviena." Naumeki da inam babadidima taudi Gamaliel na raukurama a voteyeteyena.

⁴⁰ Dabudine apasol ai doka saġedi da kwapue a riġedi, be a riu vavasaġedina da nam Yesu isane ta giu munaḡa. Naumeki da a raukai gosedi be a naḡona. ⁴¹ Dabudine apasol ma nuavereveredi Sanedrion a gose porena, bani-nama Mamaitua ya vinedina da taudi teneteneġinama da tai nuatoitoina Yesu isanama aubainama. ⁴² Be raḡan matabuna tempol be banaga adi vadama nopođiga waikatakatai nam ti gosena, be a raraу guguyana da Yesu tauna Tauwai yawasana.

6

Taunoya 7 a vinedina

¹ Inam raḡandie, tauwai muriwatanana sievinama ya moramorabana. Be Griк Jiusdima ai riusingāġayana Hibru Jius ġarodie, baninama Gurik Jiusdima adi kaiyababama a kitakita poredina, raḡanine kani a soisoiedina nopone. ² Vutuna aubainama 12 apasol tauwai muriwatanana ai rawatęgeidi be a riuna,

"Nam i vere da tauma kani ka soisoi koe be Mamaitua riunama ka gose. ³ Vutuna aubainama, yau bana, koi kita wanawana da tautauḡoma 7, aitauḡa koya kataiedina Arua Babau be nuauyauya nopođima ya moġavuna ko ragaudi da taudi uma noyanama ta paġo be ta voiena. ⁴ Be tauma

naumeki da ama noyama moiragi be rauguguya ka kaididina.”

⁵ Dabudine banaga matabudi apasol adi giuma ai anine be taudi uma banegidima a vinedina: Stepen, tauna tauğoma nophonama waisumağɑ be Arua Babau ya moğavu; be Pilip, Porokurus, Nikanor, Timon, Pamenes be Nikolas, tauna Antiok baneginama, be tauna yai rawajiusna. ⁶ Uma tau-tauğomidima apasol ġarodie a verauğedi be taudi aubaidima a moiragi be nimedima debedie a sivudina.

⁷ Naumeki da Mamaitua riunama ya daberarana. Tauwai muriwatana Jerusalem nophone sievidima ya morabana, be pirisi totoi mate Yesu ai sumağena.

Stepen a panina

⁸ Stepen tauna Mamaitua na wainuapaǵo be na rewapanama nophonama ya moğavuna. Be tauna mataira be voia dosidima banaga ġarodie ya voiedina. ⁹ Be rağan tenaǵa Jius sinagog nophone isanama ‘Libatine’, banegidima taudi Stepen a riuvirevirena. Dabudine Jius ġesaudima, Sairin be Alexandria be Silisia be Eisia provins banegidima mate Stepen a riuvirevirena. ¹⁰ Be Arua Babau Stepen nogota verenama ya utena da taudi nam teneteneǵina da na giuma sibo a riǵa.

¹¹ Vutuna aubainama taudi waimoisirie banaga a ragaudi be a riuedina da sibo umanama a giuna, “Tauma kè vaiena da Stepen, Mousis be Mamaitua ya riuwai gewegewedina.” ¹² Uma giunama debane banaga, babada dosidima be tarawatu tauwai katakataidima a kawa nuamedimedidina. Vutuna aubainama Stepen a pani be a verauğena Sanedrion babadidima nogodie. ¹³ Be taudi tauwai matamata kaikaiyovudima a voiedi da taudi a riuna, “Uma baneginama rağan matabuna tempol be tarawatu e riuriu tuatuaǵaiedina. ¹⁴ Baninama tauma kè vaiena da tauna umanama ya riuna, ‘Uma Nasaret Yesunama tauna tokare uma gabunama e kawa gewagewana be Mousis tarawatu ya riuriuedana matabudi e vitaredina.’” ¹⁵ Banaga matabudi Sanedrion nophone a miamiana Stepen a kitadidi be taudi a kitana da noǵonama maika kabe anea noǵona.

7

Stepen Sanedrion ġarodie ya giuna

¹ Pirisi adi badama Stepen ya riuena, “Uma banegidima aba ġarome ta giugiuena, riukaua, bo?” ² Be Stepen ya paribeedina, “Tamatamaguma be tuatuaǵaguma koi beavaiegu! Mamaitua ma neneǵarina tauna tamadama Eibrahim ġarone ya maǵatarana tauna Mesopotamiama ya

miamiana rağanine. Muriğā da ya na gó be Haranma ya miana.³ Be Mamaitua tauna ya riuena, ‘Am dobu be am banagama kwa gosedi be kwa na góna de gó dobunama yai kataimna dabudine!’⁴ Dabudine tauna dobu isanama Kaldea ya gose be ya na góna Haranma, dabudine ya miana. Be rağanine tamanama ya gurina, murine Mamaitua ya riuporena uma dabudine, de gó yodi taumi ko miamiaena.⁵ Be nam de gó gabu ġaubonaǵa i ute rubuna. Be Mamaitua ya saugana da wari rağan uma dobunama tauna be na damma muriğā e utedina. Avedi da Eibraham nam i natunana, be Mamaitua nama ya riuena.⁶ Be Mamaitua umanama ya riuena: ‘Tokare tam am damma taudi vaǵavaǵai dobu ǵesaune be inam dobunama banegidima tai taunoyedi be ta raukivi gewegewedina modi 400 nopolie.⁷ Be taugu uma dobunama banegidima yá kovogídina, binama tam am banagama awai taunoyedina. Be rağan muriğā inam dobunama ta gose be taudi uma dabudine yau noyama ta voiena.’⁸ Naumeki da Mamaitua kopitom riuwai noǵotinama Eibraham ya utena. Vutuna aubainama rağanine Aisik ya tubuǵana, be rağan aniwai 8-nama nopolie tamanama Eibraham Aisik ǵarone kopitom ya voiena. Be muriğā, Aisik natunama Jeikob ǵarone kopitom ya voiena, be Jeikob natunatunama 12 ǵarodie kopitom ya voiedina. Be uma banegidima 12 taudi dede* pakanama ai karena.

⁹ “Be dede pakanama banegidima taudi Jousep a nurena. Vutuna aubainama Ijipt banegidima ǵarodie a raugimarena. Be Mamaitua tauna mate,¹⁰ be na wainuatoitoie ya sagu da nuauyauya dosinama ya utena be Jousep tauna adi guyuma Pero ya tatai nuavaina. Be vutuna aubainama guyau Pero ya voie da Jousep Ijipt be na vadama† tauna yai badedina.

¹¹ “Naumeki da Ijipt be Kanan nopolie meiǵara dosinama ya tubuǵa be banaga ai nuatoitoi kauana be tamatamadama nam kani ti banavidina.¹² Rağanine Jeikob e vaiena be Ijiptma witi ya kenakenana, naumeki da tamatamadama ya riupore nawedina dabudine. Nam airaǵan Ijiptma ti na góna gó rubuna, naumeki da inam rağanine na góna.¹³ Adi na góma wairabuine Jousep tuatuáǵanama be tasitasinama ya riuedina da tauna aitau be dabudine guyau Pero Jousep na damma ya kataiedina.¹⁴ Naumeki da Jousep tuatuáǵanama be tasitasinama ya riuporedina da tamanama Jeikob na banagama mate matabudi ta verauǵedina. Be na damma sievinama matabudi 75.¹⁵ Naumeki da Jeikob

* **7:8:** Israel damnama adi dedema pakanama, dabudine ai karena. † **7:10:** Uma vadana inam guyau adi vadama awai isana ‘palace’. Palace inam vada dosi yababinama, be banaga toitoi ta miamiana.

ya naǵona Ijiptma, dabudine tauna be tamatamadama a gurina. ¹⁶ Be taudi tubuǵidima a verau munaǵedi Sikemma be dabudine gubae a biridina. Uma gubanama Sikemma, boni Eibraham manee ya gimerina Hemor natunatunama ġarodie.

¹⁷ “Muriǵa da Mamaitua na saugama ya boruboruna raǵaninama sibo ya tavana, be Mamaitua ya riuna, ‘Yodi taugu aba Eibraham è sausaugena, ǵaubonaǵa yà voiena.’ Be Ijipt nopone dà banagama Israel banegidima sievidima ya moraba kauana. ¹⁸ Naumeki da guyau Pero ya guri be murine tauǵoma ǵesau Ijiptma guyau ya tubuǵana be tauna Jousep nam i kataiena. ¹⁹ Be tauna dà dosima kadi kasirama ya tom be ya raukivi gewegewedina be ya segeridi da seda wawaídima ai poraǵa dobiǵedi da sibo a gurina.

²⁰ “Inam raǵandie Mousis ya tubuǵana, be Bada matane tauna nam kamai gomagomana. Be tauna nawaravi rabuiteǵa tamanama na vadae a rabena. ²¹ Be muriǵa nam teneteneǵina da vadae a semo, naumeki da a dobiǵe be a nawena. Be guyau Pero natunama waivinama ya banavi be ya yosina maika kabe natuǵomina. ²² Be Mousis Ijipt adi katai be adi nuauyauyama matabudi ya ragaudina, be na giúma be yaba ya voivoiedina matabudi ai rewapania kauana.

²³ “Raǵanine Mousis na suarama 40 a kovikovina, tauna nopone noǵota ya saǵa da na banagama, Israel banegidima, e vakitekitedina. ²⁴ Be Mousis e kitana be Ijipt tauǵominama tenaǵa Israel tauǵominama ya raraukivi gewegewena. Naumeki da Mousis ya midi ǵaǵarı be turanama biwanama ya paǵo be Ijipt tauǵominama ya kati gabana. ²⁵ Mousis yai noǵotana, ‘Israel banegidima sibo a kataie da Mamaitua taugu ya riuporeguna taudi waiyawasanidima aubainama.’ Be taudi nam ti kataiena.

²⁶ “Pomainama tauna e tava e kitana be Israel banegidima rabui taudiǵa awai kawa ǵasiǵasina. Dabudine tauna yai sasarana be ya riuna, ‘Ei! Turamma mate aba aubaina kowai kawa ǵasiǵas?’

²⁷ “Be tauǵoma iǵara tauwai karenama tauna Mousis ya biusuriǵi be ya riuna, ‘Tam aitau ya voiem da tauma kwawai bademai be kwawai tara piriemai? ²⁸ Tam maiǵo Ijipt tauǵominama kuya vunuǵi be manaka kwa ǵoeǵoena taugu kwa vunuǵigu, bo?’ ²⁹ Raǵanine Mousis uma giunama ya vaivaiena, tauna naira Ijipt ya gose be ya naǵona dobu isanama Midian. Inam dabudine ware ya miamiana, be na sedama tautauǵomidima rabui ya tikedina.

³⁰ “Modi 40 a kovina murine dobu kavakavane anea Mousis ǵarone ya maǵatarana gedara kodekoderinama

menanama nopone, oya isanama Sainai diane.³¹ Rağanine Mousis uma matairinama ya kitakitana, tauna ya base be ya nağona diane kita yağenama aubainama. Dabudine be Bada bonanama ya vaiena:³² ‘Taugu tametamemima Eibrahim, Aisik be Jeikob adi Mamaituama.’ Be Mousis tauna naira ya kawa gusugusu be Mamaitua kitanama ya nairana.

³³ “Naumeki da Bada Mousis ya riuena, ‘Am kağasumama kwa kaiporağı, baninama gabu inam kwa midimidina, tauna doğa babaunama.³⁴ Taugu è kitana nema Ijipt banegidima yau banagama a raukivi gewagewa bakedina. Taugu yau banagama a yakeyakei be a ġabaġabana è vaiedina. Be yodi è yovona yài yawasanidina. Be yodi tam kwa verau be ya riupore nawemna Ijiptma.’³⁵ Naumeki nama Mamaitua ya voie da Mousis banaga ei dokedi be ei yawasanidina, baninama nama Mousis na giuma Mamaitua anea ya utena gedara nopolie. Be taudi Mousis a tuaġaie be a riuena, ‘Tam aitau yai aninem da tauma kwai bademai bo kwai tara piriemai?’³⁶ Be yaġoro tauna Ijiptma yai doka dobiġed be voia dosidima be mataira Ijiptma be egasi sabasabane[‡] ya voiedina. Be muriġa modi 40 nopolie dobu kavakavane voia dosidima be mataira ya voiedina.

³⁷ “Be uma Mousisnama tauna Israel banegidima ya riuedina, ‘Taumi ġomimima ġaromie tokare Mamaitua peroveta tenaġa ei tubuġina maika taugu.’³⁸ Be rağanine tamatamadama taudi dobu kavakavane awai rawateġeina, Mousis ya nağona oya Sainai debane be anea tauna ġarone yawasana riunama ya giuena.

³⁹ “Be tamatamadama taudi nam ti voteyeteye be a tuaġaienā. Be taudi nopolie awai nuanoġoñoġotana da sibo a munaġana Ijiptma.⁴⁰ Be taudi Eron a riuena, ‘Kokoitau aubaimaima kwa voiedi da taudi ama mamaituamä be taudi sibo ai dokemainā, baninama tauma nam ke kataiena da Mousis Ijiptma yai doka dobiġemai be tauna aikedae ya naġo.’⁴¹ Dabudine taudi kokoitau a voiena kitanama maika kau natunama. Be taudi a puyo be nuedima ya vere kauana, baninama nimedie yaba ai tubiġina aubainama.⁴² Be Mamaitua ya mia tautauriedi be ya voie da adi gewagewama yai rewapanā be gewagewa banaga yai dokedi da gunuma kiporidima ta rauduneedina. Peroveta na bukae ya girugirumina nama:

‘Taumi Israel banegimima dobu kavakavane modi 40 koya miana. Be nopone taumi aitau aubainama tipa be puyo koya verauġed? Taugu aubaigu, bo?

[‡] 7:36: ‘Egasi sabasabana’ inam egasi ġoma isanama, be nam egasi sabasabana.

43 Ibewa, taumi ami kokoitauma koya voiedi be ko rarauduneedina. Be taumi Molok na kapema koya keri be Repan[§] na kiporama matairinama koya voie be koyaimidirina.

Vutuna aubainama taugu yà riuporemi be ko na gó kwasana Babilon be murine.'

44 "Dobu kavakavane tamatamadama taudi kape babaunama** ġarodie anitaparoro aubainama. Be inam kape-nama babaunama tamatamadama a voiena maika Mamaitua Mousis kape aruinama yai kataiena, be ya riuenda nama sibo ya voiena. 45 Naumeiki da tamatamadama adi raǵanie Josua mate uma kapenama a kiroǵa saǵena raǵanine eteni adi gabuma a kwayedina. Baninama Mamaitua eteni ya tavu dobigedina. Be kape babaunama dabudine ya kenana naumeki da Deivid na raǵanima ya tavana.

46 "Be Mamaitua Deivid ġarone ya raukiviverena, vutuna aubainama Deivid na ǵoanama da sibo Jeikob na Mamaituama na tempolma ya voiena, 47 be ibewa aubainama da Solomon tempol ya kerina Mamaitua aubainama. 48 Be yaǵoro banaga vada ta kerikeridie Mamaitua saǵasaǵa vavasaǵinama nam e mia, maika boni peroveta ya riuriuna nama:

49 "Bada ya riuna,

'Mara inam yau kaba miama be yau kaba waibadama be dobu inam yau kaǵamesuama, be tam vada nema maika kitana aubaiguma kwa keri? Bo deǵo dobudine yau kaba sipere?

50 Taugu uma yabedima matabudi nimague è voiedina!'

51 "Taumi banaga debababodomima. Taumi nuenuemima be beemima madanie be nam Mamaitua ġarone, maika eteni banegidima. Taumi raǵan matabuna Arua Babau kowai ǵakena maika tametamemima. 52 Ami dosima peroveta matabudi a raukivi gewegewedina. Be aitaúga didimana baneginama na kaba verauma a giugiuena, taudi mate ai guridina. Be uma didimana baneginama vutuna taumi yodi koya boru dobiǵe be koyai gurina. 53 Anea Mamaitua na tarawatuma a verauǵedina ġaromie be taumi nam ko voteyeteyena."

Stepen a rauyekuna

54 Raǵanine umanama giudima a vaivaiena, taudi nuedima yai medi kaua be mokedima a sanadididina. 55 Be Stepen nophonama Arua Babau ya moǵavu be marae yai kita saǵa da Mamaitua neneǵarinama be Yesu Mamaitua kasaune ya

§ 7:43: 'Molok' be 'Repan' taudi kokoitau isedima.
babau' inam 'tent' bo 'tabernacle'.

** 7:44: 'Kape

midimidina ya kitedina,⁵⁶ be ya riuna, “Ko kita, taugu mara ya kaiporena yà kitakitana be Banaga Natunama Mamaitua kasaune e midimidina.”

⁵⁷ Dabudine taudi arasa be beedima a viri tomdi be matabudi Stepen a puri⁵⁸ da meagai dosine be a soru dobiġena ġavoe. Dabudine rauyekunama ai karena. Be tauwai matamata kaikaiyovudima adi garama tauġoma, isanama Sol, kaġapakane ai damdi da tauna e rabedina.

⁵⁹ Be Stepen yekue a riġariġana raġanine, tauna ya moiragi be ya riuna, “Bada Yesu, aruiguma kwa paġo!” ⁶⁰ Dabudine tuapikane ya beku be bonanama dosine ya riuna, “Bada, uma gewagewanama ġarodie nam kwa noġoti!” Nama ya riuriuna, naumeki da ya gurina.

8

¹ Be Sol ya riuna da na rauvunuġama ya vere kauana.

Mamaitua na damma raukivi gewegewedima yai karena

Inam raġaninama teneġine Jerusalemma raukivi gewagewa dosinama Mamaitua na damma ġarodie ya tubuġana. Be dabudi tauwai sumaġa matabudi ai daberaridina Judia be Samaria nopođiġa be apasol taudiġa Jerusalemnopone a mia kwasana.² Tautauġoma Mamaitua tauwai sumaġenama taudi Stepen a dobo be a ġaba guratena.³ Be dabudine Sol Mamaitua na damma kawa gewegewedima yai karena. Tauna vada da vada ya naġo be tautauġoma be waiwaivi ya soru dobiġedi be dibure ya biridina.

Pirip Samaria nopone

⁴ Naumeki da tauwai sumaġa aitauġa a dabedaberarana dobu matabuna a naġo be Mamaitua na giuma a rauguguya nawena.⁵ Pirip ya dobi be ya naġona Samaria meagainama nopone, be dabudine Yesu Tauwai yawasana na kauama ya rauguguyena.⁶ Be tauna mataira ya voivoiedina, banaga a kitedi be na giuma ai beavaia kauena.⁷ Baninama arua gewegewedima banaga a gosedi be ma raserasedi a dobina. Be Pirip banaga toitoi tuera be kito ragaragaudima yai yawasanidina.⁸ Vutuna aubainama inam meagaine nuavere dosinama ya kenana.

Saemon gweribarabaraū

⁹ Noġonenama tauġoma isanama Saemon tauna ginauri* meagai nopone ya voiedi be Samaria banegidima matabudi tauna a basebasena, be tauna ya seġaseġara munaġena da kabe banaga dosina.¹⁰ Be banaga matabudi, banaga

* 8:9: ‘Ginauri’ inam magic matabuna.

dosidi be banaga ġoma, tauna awai muriwatanena, be a riuriuna, “Uma tauġominama Mamaitua na rewapanama ġarone, be uma rewapaninama yai rewapana vavasaġġa.”¹¹ Be taudi awai muriwatanena, baninama Saemon na ginaurie raġaninama daudaunama yawai basedina.¹² Be raġanine Pirip riu veredima Mamaitua na waiguyauma be Yesu Keriso ya rarauguguyedina, dabudine tautauġoma be waiwaivi a babataitona.¹³ Be Saemon mate yai sumaġġa be ya babataitona. Be deġo Pirip ya naġonaġġona tauna yai muri watane, be mataira be voia dosidima aubaidima ya base kauedina.

¹⁴ Raġanine apasol Jerusalemma ta vaiena be Samaria banegidima Mamaitua na giumenta a paġopaqona, naumeki da taudi Pita be Jon a riupore nawedina ġarodie.¹⁵ Raġanine taudi a dobidoċina, naumeki da aubaidima a moiragi da sibo Arua Babau a paġona,¹⁶ baninama Arua Babau yaġoro nam aitau tenaġġa i paġona be taudi Yesu isane a babataitō ġomana.¹⁷ Dabudine Pita be Jon nimedima debedie a biridi be banaga Arua Babau a paġona.

¹⁸ Raġanine Saemon e kitana be apasol nimedima banaga debedie a biridi be taudi Arua a paġopaqona, naumeki da tauna ġarodie mane yai yoyo be ya riuna,¹⁹ “Uma rewapaninama taugu mate ko utegu da taugu nimaguma banaga debedie yà boruboruna raġanine taudi Arua Babau ta paġona.”²⁰ Be Pita ya paribee, “Tam am manema mate ko naġo gienae, baninama tam kwa noġonogħoti da Mamaitua na puyoma kabe manee kwa paġo.”²¹ Tam am gabuma uma noyanama nopone nam ima kenakenana, baninama Mamaitua matane tamnopomma nam didimina.²² Vutuna aubainama am noġotama kwa vitaredi be inam gewagewanama kwa kuvesa pore da Bada ġarone kwa moiragi da tauna uma noġotidima gewegewedima nopome e noġota poredina, be deġoda Bada am gewagewama e noġota poredina.²³ Baninama taugu yà kitakitamna da nopome ġora ya moġavu be gewagewa dosinama ya panimna.”²⁴ Be Saemon ya paribee be ya riuna, “Bada ġarone aubaiguma ko moiragi da uma gewegewedima giudima koya riuriueguna nam ġarogue ta tubuġa.”

²⁵ Raġanine Pita be Jon Bada na giumenta a rarauguguyedina Samaria meagaidima nopodiġa.

Pirip be Itiopia tauġominama

²⁶ Bada na aneama Pirip ya riuena, “Kwa midisuġu be yavaragħwae yauwanine kwa naġo. Kwa naġo keda Jerusalemma be Gasama naġonaġġonama dabudi kwa dobi!

Uma kedanama inam mutuyuae be banaga nam tima mi-amiana.”²⁷ Naumeki tauna ya midisuğu be ya na gó be kedae tauna Itiopia baneginama ya banavina. Uma baneginama tauna tau góma kaikaivainama be tauna banaga dosinama be Kandake na manema taurabenama. Kandake tauna Itiopia banegidima adi guyauma waivinama. Inam tau góminama kaikaivainama Mamaitua rauduneenama aubainama Jerusalemma ya na góna,²⁸ be yodi tauna ya munamuna góana na dobue. Tauna na tureirama[†] debane ya mia be peroveta Aisaia na bukama ya siesievina.

²⁹ Be Arua Pirip ya riuena, “Kwa na gó be noa seroitnama diana gó kwai na góna gó.”³⁰ Dabudine Pirip ya manini ya na gó tureira diane be e vaiena be tau góma peroveta Aisaia na bukama ya siesievi be Pirip tau góma yai taravirena, “Aba kwa siesievina kwa katakataie bo ibewa?”³¹ Be tau góma ya paribeena, “Ibewa, nema yá katai bake de góda banaga nam aitau e giu waibategu?” Vutuna aubainama tauna Pirip ya riue da tureira debane ya sa gó be diane ya miana.³² Be tau góma girugiruminama poranama girugiruminama ya siesievina mudu gabunama umanama ya riuna: ‘Banaga tauna ai doka nawena waigurinama aubainama maika sipu tawai doka nawedina adi kaba waig-uridima gabune.

Be nema sipu natunama deba vuvu góinama ta tom be ewai nuatu gótu góuna, nama tauna yai nuatu gótu góuna.

³³ Be banaga tauna a raukivi gewegewe be a boru yovo góva vavasa góena. Be ra góanine tauna ya yovoyovo vavasa góana Mamaitua ya kaisagu be na yawasanama dobue ya kaipore be ya nawena.

Be yodi nam aitau tenetene góina da natunatunama e sievidi.’

³⁴ Tau góma kaikaivainama Pirip yai taravirena, “Kwa riuegu peroveta aitau e giugie? Tauna gó e giugiu muna gó, bo aitau?”³⁵ Dabudine Pirip giu yai kare be tau góma kaikaivainama Aisaia na bukama ya siesievina nopone dabudine yai kare be Yesu varinama verenama ya ya giu waibatena.

³⁶ Naumeki da taudi a na góna gó da upae a tavana, be dabudine tau góma kaikaivainama ya riuna, “Kwa kita upa umanema. Naumeki bo ibewa da sibo è babataito?”³⁷ Be Pirip ya riuena, “De góda tam nuamma tabutabune kwai suma góana, inam naumeki.” Be tau góma kaikaivainama ya paribebe be ya riuna, “Taugu yáwai suma góana da Yesu Tauwai yawasana tauna naumeki Mamaitua Natunama.”[‡]

[†] 8:28: ‘Hosi’ inam tureiranama adi kaba soruma. [‡] 8:37: Gurik baibol gesaudie uma versnama 37 nam ima kenakenana.

³⁸ Naumeki da tauğoma kaikaivainama tureira ya riutuağae da ya midi kwasana, be dabudine tauna be Pilip a nağona upae, be Pirip tauğoma yai babataitona.

³⁹ Rağanine taudi upae be a tavatava munağana Bada Aruinama yai rağantenağe da Pirip ya nawena. Naumeki tauğoma kaikaivainama nam Pirip i kita munağena, be tauna ma mosarine ya nağona. ⁴⁰ Naumeki da Pirip Asdod meagaine ya mağatara be tauna meagai matabudi nopodiğä ya babara nağ be vari verenama ya rarauguguyena, naumeki da Seseriamma ya tavana.

9

Sol na yawasanama ya vitarena (Ap 22:3-16; 26:9-20)

¹ Inam rağaninama teneğine Sol yağoro nuanama yai medi kaua be ya riuna da Bada na tauwai muriwatanama ei guridina. Vutuna aubainama tauna ya nağ pirisi adi badama ġarone ² be yai bağana da pirisi adi badama leta sibo ya girumidina sinagog Damaskasma aubaidima da sinagog banegidima sibo Sol a sagu be Yesu na kauama tauwai muriwatanenama, tautauğomidi be waiwaividima a banavidi da sibo a vunuğidi, a panidi be muriğä Sol sibo ya verauğedina Jerusalemma.

³ Rağanine Sol Damaskas meagainama diane ya tavatavanaugh, yana marae yai rağantenağe be ⁴ yai yana kwa vivirona be dabudine ya beku da doğae ya ravuse da e vaiena be bona marae ya riuna, “Sol, Sol, aba aubainama kwa raraukivi gewegewegu?” ⁵ Sol yai taravirana, “Tam aitau, Bada?” be Yesu ya paribeena, “Taugu Yesu vutuna kwa raraukivi gewegeweguna. ⁶ Yodi kwa midisuğu be kwa nağona meagaie, be dabudine ta riuem da aba kwa voiena.”

⁷ Tautauğoma Sol mate nağonağodima, dabudine a midi be ai nuadau kwasana, baninama taudi bona a vaiena be nam aitau ti kitana. ⁸ Naumeki Sol ya midisuğu munağä da sibo yai kitana be matanama yai kupikupi da nam aba i kita. Naumeki da nimane a kaididi nawena Damaskasma. ⁹ Be ma matapotapotana, nama ya miana rağan rabuiteğä be tauna nam aiyaba i kani bo i tego rubuna.

¹⁰ Damaskas nopone tauwai muriwatana tauğoma tenağä isanama Ananaias ya miamiana. Be Bada ya mağatara da ya yoko be ya riuna, “Ananaias!” Be tauna ya riuna, “Bada, taugu umanema.” ¹¹ Be Bada ya riuena, “Kwa midisuğu be kwa nağ keda tawai isana ‘Keda-Didimana’. Be kwa nağona Judas na vadae be dabudine Tasus tauğominama isanama ‘Sol’ kwa wanena. Tauna dabudine e moimoiragina, ¹² be

matane rauboni ya kitana da tauḡoma isanama ‘Ananaias’ vadae ya saḡana, be nimanama debane ya biridina da tauna matapotapotanama kabe iwai kita munaḡa.”¹³ Dabudine Ananaias ya paribee be ya riuna, “Bada, uma tauḡominama na kauama toitoi è vaiedina, da tauna voia gewegewedima toitoi ya voiedina am banagama Jerusalemma ġarodie.¹⁴ Be yodi pirisi adi babadama rewapan a ute be uma dabudine tauna ya tavana da aitauḡa tam isame tawai sumaḡana sibo ya vunuġidi be ya panidina.”¹⁵ Be Bada ya riuena, “Kwa naġo, baninama uma tauḡominama è vinena yau noyama anivoienama, da tauna isaguma e kiroġi be ei babarina eteni banegidima, guyaguyau be Israel banegidima ġarodie.¹⁶ Be taugu yài kataina da tauna nema ei nuatoitoi bakona, taugu isaguma aubainama.”

¹⁷ Dabudine Ananaias ya naġo da vadae ya saġa be nimanama Sol debane ya sivudi be ya riuna, “Tuai Sol, Bada Yesu, vutuna kedae ya maġatarana raġanine, tam uma dobudine kuya veraverauna, tauna ya riuporeguna ġarome da tam kwai kita munaġa be Arua Babau nopomma ei moġavumna.”¹⁸ Be yai raġantenaġe da yaba kitanama maika kabe iyana veveġinama matane i bekubeku, dabudine be yai kita munaġana. Naumeki da Sol ya midisūg be ai babataitona.¹⁹ Tauna ya kanikanina, dabudine tuninama ya bagibagi munaġana.

Sol Damaskasma rauguguya yai karena

Sol tauwai muriwatana mate Damaskasma raġan bisanama a taumiana.²⁰ Be dabudine tauna synagog nopolie rauguguya yai karena da Yesu tauna Mamaitua Natunama.

²¹ Be aitauḡa dabudine tauna a vaivaiena, taudi a nu-ababaġa be ai taravirana, “Uma tauḡominama vutuna kabe tauwai sumaġa Jerusalemnopone i vunuġidi? Be uma dabudine ya tavana da tauwai sumaġa kabe e panidi be e verauġedi pirisi adi babadama ġarodie.”

²² Naumeki da Sol na rauguguyama yawai rewapan a be tauna Jius banegidima Damaskasma miemienidima ya tainuababaġidina, baninama tauna yai kataidi da Yesu tauna Tauwai yawasana, be taudi nam teneteneġidi da sibo a riuġare munaġe.²³ Raġan toitoi muridie be Jius banegidima ai rawateġeidi be oga a taraġina da Sol sibo ai gurina.²⁴ Be Sol adi ogama ya vaiena. Be taudi kupi da suara meagai ganaganakukunama kededima matedie a bodabodamana da Sol sibo a vunuġi be ai gurina.²⁵ Be kupi tenaġa tauwai muriwatana taudi Sol siriga nopone a boru be garigari bogane gaure ai dawe dobiġena.

Sol ya nāgona Jerusalemma

²⁶ Rāganine Sol ya nāgona Jerusalemma be e raurubuna da Yesu tauwai muriwatanenama sibo ya rawakapudina, be taudi matabudi Sol a naire be nam ti sumāgena da tauna tauwai muriwatana. ²⁷ Be Banabas tauna Sol yai doka sāgena apasol ġarodie be na gututuma ya riuedi da nema kedae tauna Bada Yesu ya kita be mate ai giuna. Be muriġa tauna Damaskasma Yesu isane nam ma nairina i rauguguyana. ²⁸ Dabudine taudi Sol mate Jerusalemma a miana be ma raudebatorana Bada Yesu isanama ya rarau guguyena. ²⁹ Be tauna Jius banegidima Gurik bonane taugiunama mate a giu be ai sāgasāgana. Be taudi a ġoeġoena da sibo Sol ai gurina. ³⁰ Be rāganine tauwai sumāga nama a vaivaiena, taudi Sol ai doka dobīgena Seseriamma be dabudine a riupore nawena Tasusma.

³¹ Naumeki da dabudine Mamaitua na damma, Judia, Galili be Samaria nopođiġa ġarodie suba ya kenana. Be taudi ai rewapana be a miana Mamaitua a vivivivirena. Be Mamaitua na damma sievinama ya moramorabana, baninama Arua Babau ya duġudina.

Pita Aneas yai yawasanina

³² Pita dobu matabuna ya babababara nāgona. Rāgan tenāga tauna ya nāgona Lidama, banaga babaudima vakitedima aubainama. ³³ Dabudine tauna tauġoma isanama Aneas ya banavina. Inam tauġominama tuera ya paġo be na kaba kenaе ya kenana modi sievinama 8 a kovina. ³⁴ Be Pita ya riuena, “Aneas! Yesu Keriso ewai yawasanimna. Kwa midisūgu be am gunima kwa nokudi.” Naumeki da tauna waiġapa ya midisūguna. ³⁵ Be Lida be Saron banegidima matabudi Aneas a kitakitana, naumeki da nuedima a vitarena Bada ġarone.

Pita waivi gurigurinama ya kawa midisūguna

³⁶ Jopa meagaine tauwai muriwatana waivinama tenāga isanama Tabita ya miamiana. Tauna isanama Gurik bonane a vitare da Dokas. Tauna rāgan matabuna vere ya voivoiedina, be banaga waikaruwaġewaġedima ya sagusagudina. ³⁷ Rāgan tenāga tauna ya sida be ya gurina. Naumeki da banaga ġesaudima tubuġinama a koġana, baninama adi vaivaima nama. Be vada vatavatara rabui nopone be debane vatarine a boruna. ³⁸ Jopa tauna Lida meagainama diane. Be rāganine tauwai muriwatana ta vaiena be Pita tauna Lidama, naumeki da taudi tautauġoma rabui a riuporedina, be taudi Pita ai baġa be a riuena, “Naumeki bo ibewa da tam yodi sibo kuya verauna ama meagaie”

³⁹ Naumeki da Pita ya midisūgu be taudi mate a naǵona. Raǵanine tauna dabudi ya tavatavana, taudi Pita ai doka saǵena debane vatarine. Be kaiyababa matabudi ma ǵabeǵabedi Pita ǵarone a tava, be kwama be gara, Dokas ya popopopodina ai kataina raǵanine, tauna ma mienina. ⁴⁰ Dabudine Pita matabudi ya tavy dobiǵedi be tuapikane ya raupari be ya moiragina. Naumeki da tauna guri ǵarone yai tauvitare be ya riuna, “Tabita, kwa midisūgu!” Dabudine matanama yai kita be Pita ya kitakitana raǵanine, tauna ya midisūgu be ya miana. ⁴¹ Nimane ya kaididi be ya soru waimidisūguna. Be muriǵa Pita banaga babaudima be kaiyababa ya yokoedi da Tabita yawayawasaninama ǵarodie ya verauǵena.

⁴² Inam kauinama Jopa nopone banaga matabudi a vaiena, be banaga toitoi Bada ǵarone ai sumaǵana. ⁴³ Be Pita Jopama ya miana raǵan toitoi Saemon mate. Saemon tauna musara kopidima taukwaridima.*

10

Koniliás Pita ya kokonena

¹ Seseria meagainama nopone Rom tauǵoma isanama Koniliás ya miamiana. Tauna iǵeigeridima adi debama awai isana ‘Itali Deba’ adi torima matanama. ² Tauna na sedama mate yawasana verene a miana banaga Mamaitua tauwai sumaǵenáma maika. Tauna banaga waikaruwaǵewaǵedima ya sagusagu kauedi be raǵan matabuna Mamaitua ǵarone ya moimoiragina. ³ Raǵan tenaǵa ³ okorokinama, be tauna Mamaitua na aneama matane ya kitana kabe raubonie i kitakita, be anea ya saǵa be ya riuena, “Koniliás!”

⁴ Koniliás ma nairina ya kita kwase be ya riuna, “Bada, aiyaba?” Be anea tauna ya riuena, “Am moiragi be am waisaguma waikaruwaǵawaǵa banegidima ǵarodie Mamaitua nam nuanama i koana. ⁵ Be yodi tautauǵoma ǵesaudima kwa riuporaǵa nawedina Jopama be Saemon tawai isaisana Pita tai doka verauǵena. ⁶ Tauna Saemon musara kopidima taukwaridima mate ta miamiana, tauna na vadama egasi diane.”

⁷ Raǵanine anea na giuma ya kovikovina, naumeki da ya naǵona. Dabudine Koniliás na taunoyama rabui be na tauiǵarama tenaǵa ya riupore nawedina Pita ǵarone. Be uma tauiǵerinama na yawasanama verene ya miamiana banaga Mamaitua tauwai sumaǵenáma maika. ⁸ Inam dabudine Koniliás yaba matabuna ya tubutubuǵana yai varidi be ya riupore nawedina Jopama.

* **9:43:** Tauna musara kopidima ya kwaridi be gara ya voivoiedina.

Pita matagomine rauboni ya kita be ya naġona Koniliyas ġarone

(Ap 11:5-12)

⁹ Pomainama suaratopu be taudi meagai diane a tavatavana maika, Pita ya naġona vada debane* moiragi aubainama. ¹⁰ Dabudine tauna kani ya karati be ya ġoegħoena da sibo aiyaba ya kani. Be raġanina tauna na kanima vadae a vovo kaukauena maika, tauna yaba matane ya kitana kabe raubonie i kitakita. ¹¹ Tauna e kitana be mara kedanama ya nuaporaġa be yaba kitana maika rupu dosinama kawa susunama matabudi 4, kawa susudie a ragaudi be awai dawe dobiġenā dobue, ya kitana. ¹² Be inam rupunama nōpōne dobu museridima tabu be tabu a miamiana. Musara kaġedima 4, musara daredaredima be kiu.

¹³ Dabudine bona ya riuena, “Pita, kwa midisūgu, inam museridima kwai guridi be kwa kanidi!” ¹⁴ Be Pita ya paribeena, “Ibewa Bada, nam teneteneġina! Baninama inam museridima tauma ama waiyawama be nam airaġan taugu yaba yau waiyawama e kani rubuna.” ¹⁵ Dabudine bona aniwai rabuinama ya riu munaġana, “Deġo yabanama Mamaitua ya riuna da am waiyawama be yodi e riuriuna da nam am waiyawa, vutuna aubainama tam nam kwa riuna ‘yau waiyawa’.” ¹⁶ Uma kauinama raġan rabuiteġa nama ya tubuġana, muriġa be rupu a paġo nawena marae.

¹⁷ Raġanina Pita uma kauinama ya kitakitana, yaġoro baninama yawai nuanoġonoġote be tautaugħoma Koniliyas ya riuriuporedina, taudi Saemon na vadama a banavi be matakedae vada noġone a midina. ¹⁸ Taudi a riu rubu be ai taravira da Saemon awai isaisana Pita dobudine e miamia bo ibewa. ¹⁹ Pita matagomine rauboni ya kitakitana, baninama yaġoro yawai nuanoġonoġote be Arua ya riuena, “Saemon, tautaugħoma rabuiteġa tam konorimma a tavana, ²⁰ vutuna aubainama kwa midisūgu, kwa dobi kwa naġo be taudi mate ko naġona, be nam kwa noġota bekubeku, baninama taugu ē riuporedina.”

²¹ Pita ya dobi be tautaugħoma ya riuedi, “Taugu vutuna ko wanewaneguna, aba aubainama koya verau?” ²² Dabudine tautaugħoma a paribee be a riuna, “Tauma banaga iġeġeridima adi torima matanama, isanama Koniliyas ġarone be kē verauna. Tauna banaga didimanae be Mamaitua tauvivirenama be Jius banegidima matabudi tauna ta vivivivirena. Be anea babau ya riuena da tauna tam sibo yai doka nawem na vadae be aba sibo kuya giue

* **10:9:** Israel vadedima taudi debatabetabedima, banaga adi kaba waimiamiana.

da tauna ya vaiena.”²³ Naumeki da Pita tautauğoma yai doka sağedi vadae, kani ya utedi be dabudi a kenana. Be pomainama Pita ya midisuğu be tautauğoma mate a nağona. Be tuatuğanama ġesaudima Jopama mate a nağona.

Pita yodi Koniliyas na vadae

(Ap 11:13-17)

²⁴ Be mainokomgo rağanine taudi Seseriamma a tavana. Be Koniliyas na damma be na banaga kauama ya rawateğeidi da awai raba be Pita na banagama mate a tavana. ²⁵ Rağanine Pita vada nopone ya sağasağana, Koniliyas ya nağō bode da kağane ya beku be ya rauduneena. ²⁶ Be Pita ya soru waimidisugu be ya riuena, “Kwa midisuğu taugu banaga ġoma maika tam.” ²⁷ Dabudine Pita Koniliyas rabuina vada nponağā a giugiu nağona, be banaga toitoi Pita a miamia rabena, ya banavidina.

²⁸ Be Pita ya riuedina, “Taumi koya kataiena da Jius banegidima nam teneteneğina da eteni banegidima mate tai rawateğeidi bo ta vakitekitedi. Be yodi Mamaitua yai kataigu da tauna banaga matabuna nuanama e pağopağona, be nam Jius taudiğā. Vutuna aubainama taugu nam ya riuna banaga ġesaudima kamai banabanaga. ²⁹ Vutuna aubainama rağanine tam yau riuma kuya riuporena, taugu nam nuaguma i rağarağana, be naumeki da è verauna. Be yodi ya taraviremna: Aba aubainama kuya riuegu da è verau?”

³⁰ Dabudine Koniliyas ya paribee be ya riuna, “Rağan 4 a kovina taugu yau vadae è mia be suara 3 okorokinama taugu è moimoiragina. Be yai rağantenäge da tauğoma na garama waimatakanikaninama noğogue ya midi ³¹ be ya riuna, ‘Koniliyas! Mamaitua am moiragma ya vaiena be am waisaguma waikaruwağawağā banegidima ġarodie Mamaitua nuanama nam i koana. ³² Be yodi tautauğoma ġesaudima kwa riuporağā nawedina Jopama be Saemon tawai isaisana Pita tai doka verauğena. Tauna Saemon musara kopidima taukwaridima mate ta miamiana, tauna na vadama egasi diane.’ ³³ Vutuna aubainama taugu am riuma waiğopa è riuporena be ya vere kauana da tam kuya verauna. Be yodi tauma matabumai këi rawateğeimaina, Mamaitua matane be kawai rabana da aba Bada ya riuriuemna kwa giue da ka vaiena.”

Pita vari verenama eteni banegidima ya riuedina

³⁴ Dabudine Pita giu yai karena, “Yodi taugu è katai kauena da Mamaitua banaga matabuna nuanama e pağopağona, be nam Jius taudağā. ³⁵ Be banaga aitaüğā dobu matabuna

Mamaitua ta vivivivire be voia didimanidima ta voivoiedina, taudi Mamaitua ewai aninedina.³⁶ Taumi kaite koya kataiena da Mamaitua riu ya riuporena Israel banegidima ġarodie da tauna suba ya voiena. Be uma riunama, vari verenama Yesu Keriso ya rauguguyena. Be Yesu banaga be yaba matabuna ewai badedina.³⁷ Be uma kauidima Judiama a tubuġana, be taudi Galilima ai karena Jon na rauguguyama be na waibabataitoma raġaninama murine.³⁸ Inam raġanine Mamaitua Arua Babau be rewapanā, Nasaret Yesunama ġarone ya ġini porena. Dabudine Yesu ya babara naġo be voia veredima ya voivoiedina be banaga aitauġa Diaboro yawai badedina naumeki Yesu yai yawanidina, baninama Mamaitua tauna ġarone.

³⁹ “Be Yesu yaba matabuna Jius adi dobue be Jerusalem nopone ya voivoiedina, tauma adi matamatama. Be tauna vutuna Korosi bogane ai dawe be ai gurina. ⁴⁰ Be Mamaitua raġan aniwai rabuiteġane gurie ya kawa midisūg munaġe be ya kawa maġatarina banaga ġarodie da a kitana. ⁴¹ Be nam banaga matabudi ti kitana, be tauwai matamata aitauġa Mamaitua noġone ya vinevinedina, taudiġa a kitana. Be uma banegidima Mamaitua ya vinevinedina inam tauma. Be tauna gurie ya midisūg munaġa be murine tauma tauna mate kē kani be kē tegona. ⁴² Be tauna ya riu vavasaġemaina da tauma banaga ġarodie ka rauguguya be ka riuedi da tauma kē katai kauena da tauna banaga yawai yawanidi be guriguridima adi taurau etarama. ⁴³ Peroveta matabudi tauna a giugiuena da tauna vutuna, aitau Yesu isane tawai sumaġana, tokare Mamaitua adi gewagewama e noġota porena Yesu isane.”

Eteni banegidima Arua Babau a paġona

⁴⁴ Raġanine Pita yaġoro umanama ya giugiuena, Arua Babau ya yovona taudi aitauġa dabudi awai beavaiana ġarodie. ⁴⁵ Be Jius nopone aitauġa tauwai sumaġa banegidima Pita mate a veraverauna, taudi a base kauena baninama Mamaitua puyo Arua Babau eteni banegidima ġarodie ya ġini porena. ⁴⁶ Taudi a vaie da inam dabudine eteni banegidima bona gesaudima nam adi kaba kataiedi a giuguedi be Mamaitua isanama a kaikai suġusuġuna.

Dabudine Pita ya riuna,⁴⁷ “Taugu è noġotina da uma banegidima sibo upae tèi babataitodina be nam aita e riutuāġiedi, baninama taudi kaite Arua Babau a paġona maika tauda.”⁴⁸ Vutuna aubainama Pita ya riuna da taudi Yesu Keriso isane sibo ai babataitodina. Naumeki da taudi Pita ai baġana da tauna taudi mate sibo a taumiana raġan bisanama.

11

*Pita na kauama Jerusalemma yai mağataridina
(Ap 10:9-48)*

¹ Apasol be tauwai sumaǵa matabudi Judia nopone ta vaiena be eteni banegidima mate Mamaitua riunama a paǵona. ² Be Pita Jerusalemma ya tavana raǵanine, Jius nopolie aitauǵa tauwai sumaǵa banegidima taudi Pita mate ai saǵasaǵa ³ be a riuna, “Tam aba aubainama kuya naǵo eteni banegidima adi vadae be mate koya kanikani?”

⁴ Dabudine Pita yaba matabuna ya tubutubuǵana ya giu yaǵedi be ya riuna, ⁵ “Taugu Jopa meagaine è moimoiragi be rauboni mata ǵomae kitakitanama è kitana. Taugu marae yaba kitanama maika rupu dosinama è kitana. Be inam rupunama kawasusune a ragaudi be ai dawe dobiǵena noǵo ǵomigue. ⁶ Taugu rupu yà kitana be nopone dobu museridima tabu be tabu a miamiana, musara yosiyosi, do-bira museridima, musara daredaredima be kiu. ⁷ Dabudine taugu bona è vaie be ya riuna, ‘Pita, kwa midisugı, kwai guridi be kwa kanidi!’ ⁸ Be taugu è paribeena, ‘Ibewa Bada, nam teneteneǵina! Baninama inam museridima tauma ama waiyawama be nam airaǵan taugu yaba yau waiyawama e kani rubuna.’ ⁹ Dabudine bona marae aniwai rabuinama ya riu munaǵana, ‘Deǵo yabanama Mamaitua ya riuna da am waiyawama be yodi e riuriuna da nam am waiyawa, vutuna aubainama tam nam kwa riuna ‘yau waiyawa’.

¹⁰ “Uma kauinama raǵan rabuiteǵa nama a tubuǵana, muriǵa be matabuna a paǵo nawena marae. ¹¹ Naumeki be tautauǵoma rabuiteǵa inam vadane deǵo taugu è mi-amiae a tavana. Be taudi inam Seseriamma be a riupore verauǵedina ǵarogue. ¹² Be Arua ya riueguna, ‘Nam kwa noǵota bekubeku be taudi mate ko naǵo!’ Naumeki be taugu inam tautauǵomidima 6 mate kè naǵo be Koniliás na vadae kè saǵana. ¹³ Be dabudine tauna ya riuemainda da anea ya kitana, na vadae ya midimidina be anea tauna ya riuena, ‘Tautauǵoma ǵesaudima kwa riuporaǵa nawedina Jopama, be Saemon tawai isaisana Pita tai doka verauǵena. ¹⁴ Tauna riu e verauǵe be inam riune tam am vadama banegidima mate ko yawasanana.’

¹⁵ “Raǵanine taugu giu ǵewai karena, Arua Babau ǵarodie ya yovona maika dokane Pentekost raǵanine tauda ǵarode ya yovoyovona nama. ¹⁶ Dabudine Bada aba ya riuriuena è noǵotina, ‘Jon tauna upae yai babataitonma be taumi tokare Arua Babaue ko babataitonma.’ ¹⁷ Vutuna aubainama deǵoda Mamaitua eteni banegidima puyo teneǵinama ya utedina, maika tauda ya uteutedana nama, baninama Bada Yesu

Tauwai yawasana tèwai sumaġena aubainama, naumeki da taugu nam teneteneġina da Mamaitua yài ġake.”

¹⁸ Raġanine Jius nopone aitaugħa tauwai sumaġa banegidima umanama a vaivaiena, naumeki da adi waisaġasaqgħama dabudi ya kovi be Mamaitua isanama a kaisuġu be a riuna, “Riukaua, Mamaitua eteni banegidima mate ya voiedi da ta noġotva vitara be yawasana ta pagħona.”

Kuristen banegidima Antiok nopone*

¹⁹ Raġanine Stepen awai gurina, tauwai sumaġa ġesaudima raukivigewegħedima ai kare be toitoi a daberara be ai naġo teğeteġedina Ponitja, Saipras be Antiok paratidima. Be dabudine taudi riu verenama Jius taudiġa ai varidina. ²⁰ Be ġesaudima, Saipras be Sairin tautaugħomidima taudi a naġona Antiokma be dabudine taudi eteni banegidima mate ġarodie Bada Yesu varinama verenama a rauguguyena. ²¹ Be taudi Bada na rewapanae banaga sievidima toitoi ai sumaġa be nuedima a vitarena Bada ġarone.

²² Uma varinama Mamaitua na damma matabudi Jerusalemma a vaiena, vutuna aubainama taudi Banabas a riuporena Antiokma. ²³ Raġanine Antiokma ya tavatavana tauna Mamaitua na wainuapaġoma votanama ya kita be nuanama ya vere kauana. Be tauna ya duġudi da taudi sibo Bada mate a miana nuedima tabtabune. ²⁴ Banabas tauna banaga verenama, be tauna nophonama Arua Babau be waisumaġa ya moġavuna, vutuna aubainama tauna banaga toitoi ya verauġedina Bada ġarone.

²⁵ Dabudine tauna ya naġona Tasusma, Sol wanenama aubainama. ²⁶ Be raġanine ya banabanavina, tauna yai doka verauġena Antiokma. Naumeki da modi tabtabunama taudi rabuidi Mamaitua na damma mate Antiokma a mia, be banaga toitoi awai katakataidina. Inam raġanine tauwai muriwatana Antiokma ai isedina ‘Kuristen banegidima.’

Agabas na waiperovetama

²⁷ Inam raġandie peroveta ġesaudima Jerusalemma be a yovona Antiokma. ²⁸ Be poudie tenaġa isanama Agabas, tauna ya midisuġu be Arua Babaue ya riuna da tokare dobu matabuna meiġara dosinama e tubuġħana. Naumeki da Klaudias[†] na waibadama raġanine meiġara ya tavana. ²⁹ Vutuna aubainama Kuristen matabudi Antiokma ai oga da taudi sibo tauwai sumaġa Judiama a sagudina. Be tauwai muriwatana tenatenaġaġa sibo a kaigurate da sibo ai saguna. ³⁰ Naumeki da nama a voiana be adi puyoma

* **11:18:** Yesu tauwai muriwanenama taudi isedima ‘Kuristen’. † **11:28:** ‘Klaudias’ tauna Rom adi Sisama. Na waibadama modi 41 da 54 AD.

Banabas be Sol a utedi da a ragau nawedina Jerusalemma, tauwai sumaṅga babadidima ġarodie.

12

Jeims ai gurina, be Pita dibure a boruna

¹ Inam raġanine nama guyau Herod tauwai sumaṅga gesaudima ya vunuġidi be ya raukivi gewegewedina. ² Tauna Jon tuaġanama Jeims kwatikwatie yai gurina. ³ Be raġanine Herod e kitana be Jius nuedima ya vere kauana tauna na voiama aubainama, vutuna aubainama Pita mate ya vunuġi be ya panina. Uma kauinama Buredi-Nam-Sasanina soinama nopone ya tubuġana. ⁴ Naumeki da Herod Pita ya pani da dibure ya boru, yodibe banaga 16 ya riupore nawedi* da taudi sibo Pita a kita watanina. Be Herod na ogama ya tarataraġina da Naġopore soinama murine tauna sibo Pita ya dobiġe patare da sibo ya etarena. ⁵ Naumeki da Pita dibure a rabena, be Mamaitua na damma tauna aubainama Mamaitua ġarone a moimoiragina.

Pita dibura ya dobi porena

⁶ Pomainama sibo Herod Pita ya dobiġen a etarenama aubainama be manakanama kupine Pita banaga iġeġeridima rabui poudie ya kenakenana. Be tauna seini rabui a raupaniedina, tenaġa kasaune be tenaġa senine. Be inam seinidima tenegidie isudima banaga iġeġeridima nimedie a panidina. Be dibura matakedane taubodama a midimidina. ⁷ Be yai raġantenaġe da Bada na aneama ya raumidire be Pita na kaba kenama dobunama ya yanana. Be tauna Pita girigirinama ya riġa da ya taiġosori be ya riuena, “Kwa midisugu makai!” Naumeki be seinidima nimane a nuaporaġana. ⁸ Dabudine anea ya riuena, “Am gara be am kaġasumama kwa kotedi!” Be Pita nama ya voiena. Dabudine anea ya riuena, “Yodi am kwamama kwa kote be kwai muriwatanegu!”

⁹ Naumeki be Pita anea yai muriwatane be dibura a dobi porena. Be tauna nam i kataiena da aba anea ya voivoiana, naumeki baniġominama vutuna ya tubutubuġana, be tauna yai noġotana kabe rauboni matae kitakitanama i kitakita. ¹⁰ Taudi taubodama noġone be murine ai muridi be a dobina meagai kedanama matane, matakedha irama boruborune a dobi be matakeda mabine ya nuaporaġa be anea Pita mate ġavoe a dobi be kedaġa a naġonago be anea yai raġantenaġe da Pita ya gosena.

* **12:4:** Gurik nopone inam umanama: Be tauna banaga iġeġeridima damdima 4, be dam tenatenaġaġa nopone banaga sievinama 4 Herod Pita ya riuporena ġarodie.

¹¹ Be rağanine Pita na noğotama ya tava munağana, tauna ya riuna, "Yodi è katai kauena da riukaua. Bada na aneama ya riuporena da taugu Herod na rewapanae be Jius adi ogama gewegewedie yai yawasaniguna."

¹² Naumeki da tauna na noğotama ya yana, be ya nağona Meri na vadae. Meri, tauna Jon tawai isaisana Mak tinanama, be banaga toitoi na vadae ai rawateğeidi be a moimoiragina. ¹³ Naumeki da Pita matakedae ya raupewapewa be taunoya waivinama isanama Roda, tauna matakeda kaiporenama aubainama ya verauna. ¹⁴ Be rağanine Pita bonanama ya vaivaiena, tauna nuanama ya vere kaua be matakeda kaiporenama nuanama ya koa be ya manini ya munağɑ be ya riuna, "Pita matakedae e midimidina". ¹⁵ Be taudi a riuena, "Tam kuya bua, bo?" Be tauna ya riu raukosogaiğaina, aubainama taudi a riuna, "Agunai Pita keyaunama."

¹⁶ Be Pita yağoro ya raraupewapewana. Dabudine taudi matakeda a kaipore, be Pita ta kitana be nuedima ya mosarina. ¹⁷ Be Pita nimane ya raukatı tawedina da sibo ai nuatuğuna. Dabudine tauna, nema Bada dibure be ya dobiğɑ bakena ya gututuena. Be ya riuna, "Uma kauinama Jeims be tuatuağanama ġesaudima mate koi varidi!" Naumeki da tauna ya dobi munağɑ be wari kedae ya nağona.

¹⁸ Rağanboiboi taubodama a nuababağɑ be nuedima ya rovo be a riuna, "Pita nema ya bako?" ¹⁹ Be Herod ya ġoegoedina sibo Pita a nawena ġarone, taudi nam ti banavina. Vutuna aubainama tauna taubodama yai taravireviredi, be dabudine tauna banaga ġesaudima ya riuedi da taudi taubodama tai guridina.

Herod na gurima rağaninama

Dabudine Herod Judia ya gose be ya nağona Seseriam, be dabudine ya miana. ²⁰ Be Herod tauna Taiya be Saidon banegidima ġarodie nuanama yai medi kaua. Vutuna aubainama taudi adi babadama a riuporedina Herod ġarone. Be taudi Herod na vadama taurabenama, isanama Blastas ai turane be a riuena da tauna guyau Herod ya riue da tauna sibo suba ya voiena, baninama taudi inam guyaunama na dobue kani sibo a pağopağona. ²¹ Vutuna aubainama Herod rağan ya vine da değō rağanine sibo patara ġarodie sibo ya giuna. Naumeki da tauna na waiguyauma garedima ya kotedi be na kaba miae ya mia, be na giuma yai karena. ²² Na giuma poune be banaga bonedima dosine a riuna, "Inam mamaitua bonanama, nam banaga ġoma!"

²³ Vutuna aubainama Bada na aneama yai rağantenağē da Herod ya kati waibakoko be motamota nöponama a kani rovo da ya gurina, baninama tauna nam Mamaitua i vivirena aubainama. ²⁴ Be Mamaitua riunama ya moraba be ya daberarana.

²⁵ Rağanine Banabas be Sol adi noyama Jerusalemma awai kovina, naumeki taudi, Jon awai isaisana Mak, mate a munağana.

Pol na vağaima debanama tenağā

13

*Banabas da Sol a vinedi be a riuporedi**

¹ Antiokma Mamaitua na damma nöpodie peroveta be tauwai katakatai a miamicana. Taudi isedima Banabas, Simeon awai isaisana Niga, Lusias tauna Sairin baneginama, Manaen tauna guyau Herod mate a moraba tenağana, be Sol. ² Rağanine taudi Bada awai yarage be a widiwidinana, Arua Babau ya riuedina, “Banabas be Sol aubaiguma ġoøoe ko vinedina, baninama taudi è vinedina da yau noyama ta voiena.” ³ Be dabudine taudi a widina be a moiragina. Murine nimedima debedie a biridi be a riuporedina.

Banabas be Sol Saipras bonabonane a tavana be barau Elimas

⁴ Sol be Banabas taudi Arua Babau ya riuporedina aubainama, taudi rabuidi a dobi a nağona Selusiamma, be dabudine taudi kukakukae a nağona Saiprasma. ⁵ Rağanine taudi Salamisma a tavana, taudi Mamaitua riunama a rauguguyena Jius adi sinagogma nöpodie. Be dabudine taukaisagudima Jon-Mak mate.

⁶ Taudi Saipras bonabonanağā a babara nağona, naumeki da Paposma a tavana. Dabudine taudi Jius tauğominama a banavina, tauna peroveta kaikaiyovunama be banaga barabaraunama isanama Bar-Yesu. ⁷ Be tauna inam primia Sergius Polas turanama. Sergius Polas tauna banaga nu-anuauyauyanama be tauna Banabas be Sol ya riuedi da na vadae a sağana, baninama tauna Mamaitua riunama vaienama ya ġoegħoena aubainama. ⁸ Be taubarabara, Gurik bonane ta riuriuna Elimas, tauna taudi adi giuma ya riuriu tuatuağiedina, baninama tauna ya ġoegħoena da primia Sol be Banabas adi giuma nam sibo yai sumağedi.

⁹ Be Sol tawai isana Pol, tauna Arua Babau nöponama ya moğavu be taubarabara, ya kitadidi ¹⁰ be ya riuna, “Tam Diaboro natunama, tam nöpomma kaiyovu be gewagewa ya

* 13:: Uma gututunama Septa 11:30 isanama, uma dobudine yai kare munağena.

moğavuna, tam yaba matabudi veredima kwawai ġaviedi, be raġan patapatanama tam Bada riunama didimanidima kwa kawakawa barebaredina. ¹¹ Vutuna aubainama tam yodi Bada e kovogim da tam matamma e potana, be raġan bisanama nam suara matanama kwa kita.” Inam raġanine kupi be tadiwanawana ya ruputawa be tauna ya pomnaġona da aitau sibo ya banavi da nimane ya kaididi be sibo yai dokena. ¹² Raġanine primia aba ya tubutubuġana ya kitakitana, tauna Bada na waikatakataima ya basena aubainama yai sumaġana.

Pol be Banabas a naġona Antiockma Pisidia provins nopone

¹³ Raġanine Pol na banagama mate Papos a gosena, dabudine taudi kukae a naġona Perga meagaine, Pampilia provins nopone. Be inam dobudine Jon ya gosedi be ya munaġana Jerusalemma. ¹⁴ Be taudi Pergama be a naġona Antiock meagaine Pisidia provins nopone.

Be Sabat raġanine taudi a naġo sinagog nopone be a miana. ¹⁵ Dabudine sinagog babadidima tarawatu be peroveta adi bukama a sievidina, be murine taudi Banabas be Pol ai baġedi be a riuedina, “Taumi tuatuaġamaima, deġoda taumi rauduġu giunama banaga aubaidima ġaromie teika, naumeki da ko giu!”

¹⁶ Dabudine Pol ya midisuġu da nimanama ya kaisuġu be giu yai karena, “Taumi Israel banegimima be aitauġa Mamaitua kowai sumaġena, koi beavaia. ¹⁷ Israel banegidima adi Mamaituama tamatamadama ya vinedi be ya voiedi da banaga damnama ya morabana, be taudi vaġavāġai Ijiptma a miana. Be Mamaitua na rewapanama dosi vavasaġine tauna Ijiptma be yai doka dobiġedina. ¹⁸ Be taudi modi 40 nopone, avedi da taudi Mamaitua a kawakawa nuaġoraġorana, be yaġoro tauna ya rabedina dobu kavakavane. ¹⁹ Be muriġa tauna dam dosidima 7 Keinan dobune ya kawa gewegewedi be adi dobuma na banagama Israel banegidima ya utedi be ai buderiena. ²⁰ Uma kauidima matabudi modi 450 nopolie a tubutubuġana. Be uma kauidima muridie Mamaitua taurau etara ya utedina naumeki da peroveta Samuel na raġanie. ²¹ Be inam raġanine taudi guyau a ġoena. Vutuna aubainama Mamaitua Sol ya utedina, tauna Kis natunama, Benjiman damnama nopone. Be tauna modi 40 nopone yai guyauna. ²² Be Mamaitua Sol ya kaipore be e paiyanama Deivid ya vine da taudi adi guyuma. Be Mamaitua Deivid na kauama umanama ya giuena: ‘Taugu Deivid, Jese natunama ē banavina. Tauna tauġominama nuaguma e noġonoġotina maika, be tauna yaba matabuna ya ġoeġoedina tokare e voiedina.’

²³ “Naumeki da uma baneginama na dame, Tauwai yawasana Yesu ya riupore dobiġena Israel banegidima ġarodie, baninama noġone ya riuriuna maika. ²⁴ Muriġa da Yesu ya tavana, noġone Jon noġota viravira be babataito ya rauguguyena Israel banegidima ġarodie. ²⁵ Raġanine Jon na noyama yawai kovina tauna ya riuna: ‘Taumi ko noġonoġotina da taugu aitau? Agunai taumi ko noġonoġotina kabe taugu Tauwai yawasana, be ibewa. Tauna murigue e veraverauna e tavana, be taugu nam veregu da na kaġasumama yà kaiporaġa.’†

²⁶ “Taumi tuatuaġaguma Eibrahim natunatunama, be aitauġa Mamaitua kowai sumaġena, koi beavaia. Mamaitua yawasana varinama verenama uma ya riuporena tauda aubaidama. ²⁷ Jerusalem taumieninama be adi babadama mate taudi Yesu a nuababaġena. Taudi Yesu a vunuġina, be taudi Yesu a vunuġina raġanine, dabudine taudi peroveta adi giūma, Sabat patapatanama a siesievidina, a maġatara. ²⁸ Be avedi da nam aba gewagewanama Yesu ġarone ti banavina, be yaġoro taudi Paelat ai baġa da tauna sibo Yesu yai gurina.

²⁹ “Be raġanine taudi kauidima matabudi peroveta a giuguedina a voia kovina, naumeki da taudi kai bogane a kiroġa dobiġe be gubae‡ a boruna. ³⁰ Be Mamaitua gurie ya kawa midisuġuna. ³¹ Be taudi aitauġa tauna mate Galilima be Jerusalemma a naġonaġona, taudi ġarodie raġan toitoi ya maġatarana. Be inam banegidima taudi yodi tauna na matamatama, banaga ġarodie.

³² “Be yodi tauma vari verenama kai varimina: Aba Mamaitua Tamatamadama ya riuriuedina, ³³ tauna yodi tauda natunatudima aubaidama yai maġatarina, baninama tauna Yesu gurie ya kawa midisuġuna. Salamo wairabuinama nopone girugiruminama umanama:

‘Tam taugu Natuguma, be taugu tam Tamaġomimma.
Manaka taugu tam è tikam da tam taugu Natuguma.’

³⁴ Be mate Mamaitua umanama ya riuna: ‘Taugu yaba babau be kenakena nonoġidima yà utemina maika boni Deivid è riuriuena nama.’ ³⁵ Vutuna aubainama wari babae mate ya riuna umanama: ‘Tam nam kui aninana da am vinevinema Babaunama e bova.’ ³⁶ Be Deivid na raġanie tauna Mamaitua na ġoanama ya voivoiedina, be murine tauna ya guri be tubuġinama tamatamanama diedie a dobo, be ya bovana. ³⁷ Be uma baneginama Mamaitua gurie ya kawakawa midisuġuna, tauna nam i bovana.

† **13:25:** Uma giunama tauna maika dà waikaiwama: Tinaġemma sibo è gadoi.

‡ **13:29:** Uma gubanama taudi guri adi kaba sivudima.

³⁸ "Vutuna aubainama yau bana, yodi ka rarauguguyana ġaromie da taumi ko katai kaua da uma baneginama tauna teneteneğinama da ami gewagewama e noğota poredina. ³⁹ Be Mousis na tarawatuma nam teneteneğinā da tokare ami gewagewama e noğota pore be taumi e kawa didimanimi. Be aitaugā Yesu koi sumāgena, tauna ami gewagewama e noğota poredina be taumi e kawa didimanima. ⁴⁰ Ko kita kaua da aba peroveta a riuriuedina nam ġaromie ta tubuğā. Peroveta umanama a riuna:

⁴¹ 'Taumi waidibōğā banegimima, ko kita, ko base be ko gurina,

baninama taumi ami rağānie taugu noya yà voiena, be uma noyanama, avedi da aitau e riuemina, be taumi tokare yağoro nam koi sumāgena.'

⁴² Rağānine Pol be Banabas sinagog a dobidozi porena, banaga Pol be Banabas a riuedina da Sabat ġesaune sibo a verau munağā be uma yabedima sibo ġarodie a giu muñağedina. ⁴³ Taparoro murine Jius be eteni banegidima toitoi Pol be Banabas kedağā ai muriwatanedina. Be taudi aitaugā Bada awai sumāgena, Pol mate adi giuma ai sumāgedina. Be Pol be Banabas banaga a riu guratedi da taudi sibo Mamaitua waimuriwatanenama a kaiguratena.

Pol ya nağona eteni banegidima ġarodie

⁴⁴ Sabat ġesaune anikitanama meagai banegidima matabudi a rawateğeidina, Bada riunama vaienama aubainama. ⁴⁵ Be Jius banegidima nama ta kitana be banaga toitoi a veraverauna, dabudine taudi a unura be Pol na giuma a riutuatuağae be ai varavarana.

⁴⁶ Be Pol be Banabas ma raudebatoredi a paribeedina, "Tauma Mamaitua riunama kabe taumi ġaromie ka giue doke, be anikitanama taumi ko tuatuağaiena, be yawasana kenakena nonoğinama nam koma ġoeğoen aubainama, tauma yodi ka gosemi be ka nağona eteni ġarodie. ⁴⁷ Baninama Bada umanama ya riuemain:

'Taugu è voiemna da tam eteni banegidima adi yanama, da tam yawasana kwa kiroğā nawena, naumeki da dobu damone.'

⁴⁸ Rağānine eteni nama a vaivaiena, taudi nuedima ya vere kaua be Bada riunama a kaisuğusuğuna. Be aitaugā Mamaitua ya vinedi da yawasana kenakena nonoğine ta tavana, naumeki da taudi ai sumāgena. ⁴⁹ Be Bada riunama ya daberara be inam dobunama yai moğavuna.

⁵⁰ Be Jius banegidima, taudi tauwai sumāgena waiwaividima isedima dosidima, be meagai babadidima mate a kawa

nuamedimedidina. Be dabudine taudi adi dobue Pol be Banabas a raukivi gewegewedi be a tavu dobiğedina.⁵¹ Vutuna aubainama Pol be Banabas popokau kağedie a vayasayasaídina ġarodie,⁵² be a naġona Ikoniumma. ⁵² Dabudine tauwai sumāġa mosari be Arua Babau nopolima ya moġavuna.

14

Pol be Banabas Ikonium nopone

¹ Ikoniumma Pol be Banabas a naġona Jius adi sinagogma nopone. Be dabudine adi rauguguyama yai rewapania kauana, vutuna aubainama Jius be eteni banegidima ya toi kauana ai sumāġana. ² Be Jius aitaūġa waisumāġa nam ti ġoeġoena, taudi eteni banegidima a kawa nopalgedegederidina tauwai sumāġa ġarodie. ³ Pol be Banabas dabudine a taumia gurata be ma debatoredi Bada Yesu isane a giugiuna. Be Bada rewapania ya utedi da taudi mataira be voia dosidima a voiedina. Dabudine banaga a kita da Bada riunama wainuapaġopaġonama inam riukaua. ⁴ Inam meagaine banaga taudiġa a dariġa munaġedi da ġesaudima Jius a riu sagusagudina be ġesaudima apasol a riu sagusagudina.

⁵ Vutuna aubainama Jius be eteni banegidima adi babadama mate a rawateġeidi da apasol adi kasirama a tomna da sibo a raukivi gewegewedi be a rauyekudina. ⁶ Raġanine taudi adi kasirama a tomtomna ta vaivaiena, taudi a naġo moisiriedi be a naġona Listra be Derebe meagaidie, Likonia provins nopone. Be inam meagaidie be meagai diane,⁷ dabudine vari verenama a rauguguyena.

Pol Listrama a rauyekuna

⁸ Listra nopone tauġoma kaġa nuakudunama ya miamina. Tauna nama ya tubuġena, be nam airaġan i babababara rubuna. ⁹ Tauna Pol na giuma ya vaivaiena. Be Pol tauna ya kitadidi be raġanine e kitana, be nopone yawai sumāġana da tauna sibo ya yawasanana,¹⁰ naumeki da Pol bonanama dosine ya riuena, “Kaġame kwa midisuġu!” Be yai raġantenaġe da tauġoma ya poti be naġo yai karena.

¹¹ Raġanine patara Pol aba ya voivoiena nama a kitkitana, taudi Likonia bonane a yogo be a riuna, “Uma maituedima yodi a dobina, ai rawabanaga ġomana kitedima maika tauda!” ¹² Be Banabas ai isana ‘Sus’ be Pol ai isana ‘Hemes’, baninama tauna taugiugiu. ¹³ Be Sus na pirisima* tauna meagai diane be kau tautauġomidima be berana duriduridima ya verauġedi meagai kedanama matane be

§ 13:51: Popokau ya vayasayasaina, baninama deġoda nam yawasana ta banavi, inam taudiġa adi wavuma. * 14:13: Inam pirisi tauna Sus na taurau sewasewama.

na banagama mate a ġoeġoena da Pol be Banabas sibo a puyodina.

¹⁴ Raġanine apasol Banabas be Pol nama a vaivaiena, taudi adi garama a sikedi[†] be a manini a naġona patara nopolie be bonedima dosine ¹⁵ a riuna, “Tautauġoma, aba aubainama umanama ko voivoia? Tauma banaga ġoma maika taumi. Tauma vari verenama kē verauġena ġaromie da uma bariawidima nam banibiribiridi, ko gose poredi be ami yawasanama ko vitaredina Mamaitua mi-amia nonoġinama ġarone. Baninama tauna mara, dobu be egasi be yaba matabudi nopolie ya voiedina. ¹⁶ Boni tauna banaga matabudi ya gosedi be adi ġoane nama a naġonaġona. ¹⁷ Be yaġoro tauna yai kataimi da tauna e miamiana, baninama ġaromie na kiviverema ya voivoiedina. Tauna kusana gunume ya utemi be ya voie da ami kanima a gogogogo kauana, be maura ya uteutemi da taumi nuemima ya vereverena.” ¹⁸ Uma giunama ya kovikovina, banaga ġaubonaġa a rautamtamġotana. Be yaġoro ya piripiri kauana da sibo a riutuaġaedina puyo aubainama.

¹⁹ Dabudine Jius banegidima ġesaudima Antiok be Ikoniumġa tavetavedina adi giue patara a kawa nopolgedegederidina. Vutuna aubainama matabudi Pol a rauyeku be a soru dobigena meagai diane, baninama taudi ai noġotana kabe i guriguri. ²⁰ Be raġanine tauwai muriwatana a midi kwavivirona, tauna ya midisugu be ya munaġana meagaie. Pomainama tauna Banabas mate a naġona Derebema.

Pol be Banabas a munaġana Antiokma Siria Provins no-pone

²¹ Inam meagaine taudi vari verenama a rauguguye be banaga toitoi a voiedi da taudi Bada ai muriwatanena. Dabudine taudi a munaġana Listra, Ikonium be Antiokma. ²² Dabudine taudi tauwai muriwatana a duġudi be a kawa debatoredi be a riuedi da taudi adi waisumaġe nama sibo a miana, be taudi a riuedina, “Tauda muriġa da Mamaitua na waiguyauma nopoñe tà saġana, be noġone tauda ġoraġoranama tà siguena.” ²³ Be inam meagaidie a naġonaġona nopolie, Pol be Banabas, Mamaitua na damma nopolie, adi babadama a vinedina. Be muriġa taudi a moiragi, a widina be Bada ġarone ai maġataridina, baninama tauna vutuna awai sumaqena. ²⁴ Naumeki da taudi Pisidia provins nopoñaġa a naġonaġo da taudi Pampilia provinsne a tavana. ²⁵ Dabudine taudi Pega meagaine Mamaitua

[†] **14:14:** Adi garama a sikedina, baninama taudi ai nuaboyana aubainama.

riunama a rarauguguya kovina rağanine, taudi a dobi a nağona Atalia meagaine.

²⁶ Naumeki da dabudine kukakukae a munağga Antiokma. Inam meagaine noğone tauwai sumağga taudi Banabas be Pol Mamaitua nimane a biridina, be tauna e sagudi da uma noyanama ta voiena, vutuna noyanama umanema yodi damonama. ²⁷ Adi kaba tava munağge tauwai muriwatana matabudi a rawateğeidi be yaba matabudi Mamaitua eteni ğarodie ya voivoiedina ai varidina. Mamaitua yodi eteni adi kedama ya kaipore da taudi ai sumağana. ²⁸ Naumeki da taudi inam dabudine tauwai muriwatana mate a mia watanana.

15

Tauwai sumağga adi boruma dosinama Jerusalemma

¹ Tautauğoma ġesaudima taudi Judiağga a yovona Antiokma. Be dabudine tauwai sumağga umanama awai katakataidina, “Değoda taumi nam kopitom ko pağga maika Mousis ya riuriuna nama, taumi tokare nam yawasana ko pağga.”

² Uma giudima aubaidima Pol be Banabas taudi mate ai sağasağana. Vutuna aubainama tauwai sumağga Antiokma taudi Pol, Banabas be tauwai sumağga ġesaudima a vinedi da taudi sibo a nağona Jerusalemma. Be dabudine taudi apasol be babada uma kauinama sibo a giuena. ³ Naumeki da, Mamaitua na damma taudi a riupore nawedina. Be kedae Ponitia be Samaria nopodiğga a nağga be dabudine Pol be Banabas banaga tauwai sumağga a riuriuedina da eteni banegidima adi yawasanama a vitaredina. Be uma varinama aubainama tauwai sumağga matabudi nuedima ya verena.

⁴ Rağanine taudi Jerusalemma a tavatavana, dabudine Mamaitua na damma, apasol be babada taudi Pol be Banabas adi banagama mate ai kaiwedi be a rabedina. Dabudine Pol be Banabas Jerusalem banegidima, Mamaitua yaba matabuna ya voivoiedina, a riuedina. ⁵ Dabudine Parisi nopodie tauwai sumağga ġesaudima a midisüğü be a riuna, “Tauwai sumağga eteni nopodie, taudi naumeki da kopitom ta pağga be Mousis na tarawatuma ta voteyeteyena.”

⁶ Dabudine apasol be babada ai boru be kopitom kauinama a giu guratena. ⁷ Dabudine ai tarapiri guratana be muriğga Pita ya midisüğü be ya riuedina, “Yau bana! Taumi koya kataie da dokane poumie Mamaitua ya vinegu da taugu mudugue eteni banegidima vari verenama sibo a vaie be ai sumağana. ⁸ Be Mamaitua nopo matabudi ya kataiedina, be tauna yai kataiguna da eteni banegidima yai aninedina, baninama Arua Babau ya utedina maika tauda.

⁹ Be tauna nam i voie da taudi tabu be tauda tabu, baninama tauna nopolima ya koğedina, adi waisumağama aubainama. ¹⁰ Vutuna aubainama taumi nam sibo tauwai sumağā koya kawa nuarağerağedi, baninama tamatamadama bo tauda nam teneteneğina da uma vitanama tokare te kiroğī. Değoda nama ko voiana, taumi Mamaitua ko rara rubuna da tauna nuanama ei medina. ¹¹ Ibewa nam nama, tauda tài sumağā da Bada Yesu na raukiviveree tè yawasanana. Be teneğinama nama eteni banegidima.”

¹² Be borue banaga matabudi ai nuatuğutuğū be Banabas be Pol adi giuma awai beavaiedina nema Mamaitua mataira be voia dosidima taudie eteni ğarodie ya voivoiedina ai mağataridina.

¹³ Rağanine adi giuma awai kovina, dabudine Jeims ya riuna, “Yau bana, koi beavaiegu! ¹⁴ Saemon tauda kaite ya riuedana da Mamaitua na damma eteni nopolie ya vinedina. ¹⁵ Be peroveta adi giuma a girugirumina mate teneğinama, umanama a girumina:

¹⁶ ‘Rağan muriğā taugu yà verau munağā be Deivid na kapema pupunama yà keri munağena.

Be değō dobudima nuanukotovidima, taugu yà rawa vau munağedina.

¹⁷ Nama taugu yà voie da Israel banegidima tautaugosedima be eteni matabudi taugu è vinevinedina, taudi Bada tai muriwatanena.

Nama Bada ya riuna. Tauna uma yabedima ya voiedina.

¹⁸ Be inam kauidima yà giuguemina, boni banaga a kataiedina.’

¹⁹ Vutuna aubainama taugu è noğotina umanama: Değoda eteni banegidima aitaugā Bada tawai sumağena, naumeki da nam sibo tè tainuarağerağedi. ²⁰ Be tauda sibo leta tè girumidi be tè riuedi da taudi kani raurauobedima nam ta kani be nam ta rauwaivi yababayaba. Değoda tai nağına, inam naumeki adi visavisarama taudiğā mate, be nam waiwaivi ğesaudima mate. Be taudi nam musara gadonama kikikinama bo kosina ta kanidi, ²¹ baninama Mousis na tarawatuma boni da yodi meagai da meagai ta rauguguye be Sabat patapatanama sinagog nopolie ta siesievidina.”

Eteni waiwaisumeğidima adi letama

²² Naumeki da dabudine apasol, babada be Mamaitua na damma matabudi, nopolie taudi tautaugoma ğesaudima a vinedi da a riupore nawedina Antiockma Pol be Banabas mate. Taudi Judas awai isaisana Basabas, be Saelas a vinedina. Taudi rabuidi tauwai sumağā nopolie tauwai

kedadoka. ²³ Naumeki da apasol uma letanama taudi mate a riupore nawedina:

“Kapore eteni banegimima aitaugā kowai sumāgāna.

Tauma tuatuağemima apasol be babada, tauma uma letanama kè girumina taumi tauwai sumāgā Antiok, Siria be Silisia ma ġaromie.

²⁴ “Tauma kè vaiena da tauma ama damma nōpone banaga ġesaudima taudi adi giue a tainuarağerağemi be a tainuaboyemina. Be tauma nam ke riuedina da nama sibo a voia. ²⁵ Vutuna aubainama tauma matabumai kè aninana, da tautaugoma ġesaudima kè vinedi be taudi tauma ama banagama Banabas be Pol mate kè riuporedina ġaromie. ²⁶ Uma tautaugomidima taudi adi yawasanama ai utaedina dà Badama Yesu Keriso aubainama. ²⁷ Tauma Judas be Saelas ka riuriuporedina da aba letae kè girugirumina, taudi mududie ta giu yağemina.

²⁸ “Arua Babau be tauma kè anina da nam vita debe-mie ka boru. Be taumi sibo uma yabediġa koya voiedina: ²⁹ Kani raurauobedima nam ko kanidi be kosina bo musara gadonama kikikinama nam ko kanidi. Be nam ko rauwaivi yababayaba. Değoda koi naġina, inam naumeki ami visavisarama taudiġa mate, be nam wai-waivi ġesaudima mate. Değoda uma yabedima ko gosedina, taumi tokare naumeki.

“Ebom matabumi be ko mia kaua.”

³⁰ Dabudine tautaugoma a riuporedi be a dobi a naġona Antiokma. Raġanine taudi dabudi a dobido bina, naumeki da banaga matabudi ai rawateğeidi be leta a utedina. ³¹ Dabudine banaga leta a sievi be nuedima ya verena duġu giudima aubainama.

³² Judas be Saelas taudi peroveta be adi giue a duġudi be a voiedi da ai rewapanana. ³³ Taudi dabudine a rautapa mi-an, muriġa be taudi tuatuağedima ai aiainidi be suba mate a riupore munağedina aitaugā a riuriuporedina ġarodie. ³⁴ (-) * ³⁵ Be Pol be Banabas taudi Antiokma a mia kwasa be taudi banaga ġesaudima mate Bada na giuma awai katakatai be a rarauguguyena.

Pol na vaġaima wairabuinama

Pol be Banabas ai yamonedina

³⁶ A mia raġan bisanama be Pol Banabas ya riueno, “Agunai tà munaġa meagai matabudi nōpodiġa dego Bada riunama tè rarauguguyena, dabudi dà banagama tà vakitekitedi da taudi nema ta naġonaġo bako.” ³⁷ Dabudine

* **15:34:** Gurik baibol nōpone vers 34 nam ima kenakenana. Be inam umanama: Be Saelas dabudine ya mia kwasana.

Banabas ya ġoēgoena da Jon awai isaisana Mak taudi mate sibo a naġona.³⁸ Be Pol ya noġoti da nam i verena da taudi Mak mate ta naġo, baninama tauna noġone Pampiliama ya gose poredina. Be tauna nam taudi mate ti noyana.³⁹ Dabudine taudi uma kauinama aubainama ai kawa riuriu vavasaġa be ai daberaridina. Naumeki da Banabas Mak yai doke be kukakukae a davuna Saiprasma.⁴⁰ Be Pol tauna Saelas yai doke be a naġona. Be tauwai sumaġa a moiragi da Mamaitua Pol be Saelas e rabedina.⁴¹ Taudi Siria be Silisia nopolidga a naġo be Mamaitua na damma matabudi a voiedi da ai rewapanana.

16

Timoti, Pol be Saelas mate a naġona

¹ Tauna Debe be Listrama ya tavana. Dabudine tauwai muriwatana isanama Timoti ya miamiana. Tauna tinananama Jius baneginama be tauna tauwai sumaġa, be tamanama tauna Gurik baneginama.² Tauwai sumaġa matabudi Listra be Ikonium nopolie taudi a riuna da Timoti tauna banaga verenama.³ Vutuna aubainama Pol ya ġoēgoena da Timoti mate sibo a naġona. Inam dabudine Jius a miamiana be Pol kopitom Timoti ġarone ya voiena, baninama Jius banegidima kadi taiye, baninama taudi matabudi a kataiena da Timoti tamanama tauna Gurik baneginama.⁴ Muriġa taudi meagai da meagai a naġo be apasol be babada Jerusalem nophone abaġa awai aninedina, nama banaga a riu nawedina da taudi yabedima nama sibo a voteyeteyedina.⁵ Naumeki da Mamaitua na damma a voiedi da adi waisumaġama yai rewapanana be banaga raġaninama patapatanama sievinama ya moramorabana.

Mamaitua Pol ya riupore nawena Masedoniam

⁶ Pol na banagama mate taudi Pirigia be Galesia provins noponaġa a naġonaġona, baninama Arua Babau ya riutuāgiedina da taudi nam Mamaitua na giuma Eisia provins nophone sibo a rauguguye.⁷ Raġanine taudi Misia provinsne a tavatavana, taudi a raurubu da Bitinia provinsne sibo a naġona, be Yesu Aruinama ya riutuāgiedina.⁸ Dabudine taudi Misia ai muri be a dobi a naġona Troas meagaine.

⁹ Inam kupine Pol rauboni matae kitakitanama ya kitana. Tauna Masedonia baneginama ya kitana, noġone ya midi be yawai baġana, “Kwa verau Masedoniam be kwa sagumaina!”¹⁰ Uma rauboninama murine tauma* waiġapa kē vokaukauana Masedonia naġonama aubainama,

* **16:10:** Uma dabudine be nokoi ya naġona riu “tauma” yai karena, baninama dabudine Luk mate.

baninama tauma kè noğoti da Mamaitua ya yokoemaina da inam dabudine sibo vari verenama kè rauguguyena banaga ġarodie.

Lidia na yawasanama ya vitarena

¹¹ Tauma Troas kè gose be kukakukae kè nağona Samotres. Be pomainama kè davuna Neapolisma. ¹² Dabudine da tauma kè nağona Pilipi. Inam Masedonia adi meagaima dosinama be Rom banegidima adi kaba miama. Be dabudine tauma rağan bisanama kè miana.

¹³ Be Sabat rağanine tauma kè dobi kè nağona upae meagai kedanama matane. Dabudine tauma kè noğoti da Jius adi kaba moiragima gabunama[†] sibo kè banavina. Tauma kè mia be waiwaivi aitaugā dabudi awai rawateğeina ġarodie kè giuna. ¹⁴ Dabudine waivi tenağā isanama Lidia tauna Mamaitua taurauduneenama. Tauna Tayatira meagaine be gara gatugatunama taurau gimaredima. Be tauna uma giunama ya vaivaiedin, Bada tauna nuanama ya vitare be Pol aba ya giuguedina yawai beavaia kauedina. ¹⁵ Dabudine tauna be na vadama banegidima matabudi ai babataitodina. Muriğā tauna yai bağmaina, “Değoda taumi ko noğotina da taugu naumeki Bada yàwai sumağena, naumeki da ko verau be taugu mate tà miana yau vadae.” Dabudine tauna nuamaima ya riu vitarena.

Pol be Saelas dibure a biridina

¹⁶ Rağan tenağā tauma kè nağona Jius adi kaba moiragima gabune. Be kedae taunoya waivinama kè banavina, tauna nopone koitiri aruinama. Be inam aruinama tauna kaua nam anikaba kataiedi tauna yawai mağataridina. Be uma waivinama taupakinama taudi mane dosinama a pağopağona na koitirima aubainama. ¹⁷ Uma waivinama tauma Pol mate yai muriwatanemai be bonanama dosine umanama ya riuriuna, “Uma banegidima taudi Mamaitua sağasağā vavasağinama na taunoyama, be taudi yawasana kedanama ta riuriuemina.”

¹⁸ Uma kauinama rağan matabuna namağā ya voivoiana. Be rağan tenağā Pol tuninama ya tuağai da yai tautinamuri be koitiri aruinama ya riuena, “Yesu Keriso isane yà riuri vavasağemna: Uma waivinama kwa dobi pore!” Inam dabudine arua waivi ya dobi porena.

¹⁹ Rağanine waivi taupakinama ta kitana be adi manema anivoienama kedanama ya kovina, naumeki da taudi Pol be Saelas a vunuğidi be a soru nawedina anikune gabune etaredima aubainama. ²⁰ Taudi a verauğedina meagaie

[†] **16:13:** Değ meagaidima nam sinagog, Jius doğæ awai rawateğeidina moiragi aubainama.

gewagewa tauwai tarapiriedima ġarodie a verauġedi be a riuna, “Uma tautaugomidima taudi Jius banegidima, da meagaima ta kawakawa gewagewana.²¹ Baninama taudi vaivai tabudima tawai katakataidana, be tauda nam naumeki da tai aninedi be ta voiedi, baninama tauda Rom banegidama.”

²² Be dabudine patara ai rawateġeidi da Pol be Saelas a mediedina. Be gewagewa tauwai tarapiriedima taudi Pol be Saelas adi garama a sikedi be tautaugoma ġesaudima a riuedi da taudi a kwapudina. ²³ Be taudi a kwapudina raġan ya riba kaua be dibure a sivudi be dibura taubodamenama a riue da e rabe kauedina. ²⁴ Uma riunama aubainama taubodama dibura nopo vavasaġine ya biridi be kaġedima kaie yai ġavitadididina.

²⁵ Kupi poune nama Pol be Saelas a moimoiragi be a saresarena Mamaitua ġarone. Be dibura banegidima ġesaudima taudi awai beavaiedina. ²⁶ Yai raġantenaġe da yoyo dosinama ya tubuġa be dibura vadanama matabuna ya gusu da dibura matakededima matabudi a nuaporaporaġa be seini banaga a panipanidina matabudi a nuakuvesana. ²⁷ Be dibura taubodamenama ya ġosori da e kitana be dibura matakededima matabudi a nuaporaporaġana, dabudine tauna yai noġotana dibura banegidima matabudi kabe naira ti naġonago. Vutuna aubainama tauna na kwatikwativa ya soru tavaite be ya ġoēgoenā sibo taunaġa yai guri munaġena. ²⁸ Be Pol bonanama dosine ya riuna, “Nam kwai guri munaġem! Tauma matabumai uma.”

²⁹ Dabudine tauna kodam ya riuwane be ya manini naġona vada nopolidiga be Pol da Saelas noġodie ma nairina ya rauduneedina. ³⁰ Dabudine yai doka dobīġedi be yai taraviredina, “Yau bana, aba ya voie be yawasana ya banavi?” ³¹ Be taudi a paribeena, “Bada Yesu kwai sumaġe be tam kwa yawasanana. Tam be am vadama banegidima mate.” ³² Be Pol da Saelas Bada riunama tauna be na vadama banegidima mate a riuedina. ³³ Be inam raġanine kupie tauna yai dokedi da kerodima ya koġedi be waiġapa tauna be na sedama mate ai babataitodina. ³⁴ Dabudine taubodama yai doka nawedina na vadae be adi kanima ya vokaukauenā. Be tauna na sedama mate mosari nopolidima ya moġavuna, baninama taudi yodi Mamaitua tawai sumaġena.

³⁵ Pomainama raġan ya tom da gewagewa tauwai tarapiriedima babadidima taudi tauwai kwapu banegidima a riuporedina dibura taubodamenama ġarone be umanama a riuenā, “Inam banegidima kwa kaiporaġa be ta naġona.” ³⁶ Naumeki da dibura taubodamenama uma riunama Pol ya riuenā, “Gewagewa tauwai tarapiriedima a riuna da taumi sibo ē kaiporemi. Vutuna aubainama yodi ma nuasubemi

ko na gó!”³⁷ Be Pol tauwai kwapu ya riuedina, “Avedi da tauma Rom banegimaima be taudi nam ti katai kauemainā, be mate nam ama gewagewama ti kataie be patara nōpodie a kwapu yababemai be dibure a birimaina. Be yodi taudi ta ġoegoena moisirie ta kaiporemai, bo? Ibewa! Nam nama. Taudi ġomidima sibo a verau be ai doka dobiġemaina.”

³⁸ Be tauwai kwapu inam giudima gewagewa tauwai tarapiriedima ġarodie ai maġataridina. Raġanine taudi ta vaiena be Pol da Saelas taudi Rom banegidima, dabudine taudi a naira kauana. ³⁹ Naumeki da taudi a verau da Pol be Saelas ai kaiwedi be ai baġedi da sibo meagai a gose pore be a na góna. Naumeki da taudi dibure be ai doka dobiġedina. ⁴⁰ Raġanine Pol be Saelas dibura a dobidozi porena taudi a na góna Lidia na vadae. Dabudine taudi tauwai sumaġa a banavidi da a duġudi be muriġa taudi a na góna.

17

Rauguguya be raukivigewagewa Tesalonaika nōpone

¹ Raġanine taudi a babara na góna Ampipolis be Apolonia meagaidima, a gosed i be Tesalonaikama a tavatava, dabudine Jius adi sinagogma a kitana. ² Naumeki da Pol tauna nōpone ya na góna maika no góne na kaba voiama nama. Sabat rabuiteġa nōpodie tauna banaga mate buka poredima girugirumidima ai tarapiriedi ³ be ya giugiu waibatedina da Tauwai yawasana ei nuatoitoi be gurie e midisugu munaġana yawai maġataridina. Tauna umanama ya riuriuna, “Uma Yesunama taugu ġaromie yà rarauguguya tauna Tauwai yawasana”. ⁴ Naumeki da Jius banegidima ġesaudima ai sumaġa be Pol be Saelas ai muriwatanedina. Be tenegħinama nama Gurik banegidima Mamaitua tauraudunenama toitoi be waiwaivi isanaġġonaġodima bisanama.

⁵ Be Jius banegidima a unurana, vutuna aubainama banaga adi yawasanama gewegewedima anikune gabune a rawateġeidina, be taudi iġara inam meagaine ai karea. Taudi a na gó Jeison na vadae a saġana. Taudi Pol be Saelas a wanewanedina da sibo a dobiġedina banaga ġarodie. ⁶ Be taudi a wana rereġedina aubainama, Jeison be tauwai sumaġa ġesaudima a soru dobiġedina meagai babadidima no gódie, be bonedima dosine a riuna, “Uma tautauġomidima taudi gewagewa dobu matabuna a voivoiedina be yodi uma a tavana. ⁷ Be Jeison ya riuedi da na vadae ya saġedina. Be taudi Sisa na giumenta a rawaġaiġaqiedi be a riuna da banaga ġesaunama, tauna guyau, isanama Yesu.”

⁸ Rağanine taudi umanama giudima a vaivaiedina, patara be meagai babadidima ma medidi a na gó midisúguna.
⁹ Dabudine babada Jeison na banagama mate a riuedi da mane bisa a ġoeġoedina nama ai maesa be a riuporedi da a na góna.

Pol be Saelas a na góna Berea meagaine

¹⁰ Rağanine kупи ya tavatavana tauwai suma ġa Pol be Saelas a riupore nawedina Bereama. Dabudine a tavatavana, taudi Jius adi sinagogma nopone a na góna. ¹¹ Be banaga dabudi Bereama miemienidima taudi banaga veredima, nam Tesalonaika banegidima maika. Baninama taudi rağan matabuna Mamaitua riunama nuedima tabutabune a vaivaiе be a pa gópa góna. Dabudine taudi girugiruminama poranama rağan patapatanama a kitakita ya gedina, da aba Pol ya riuriuedina inam riukaua bo ibewa. ¹² Be Jius banegidima toitoi be Gurik waiwaividи be tautaugomidima isana góna a gódim a matabudi ai suma ġana.

¹³ Rağanine Jius banegidima Tesalonaikama ta vaiena be Pol Mamaitua riunama Bereama ya rarauguguyena, taudi mate dabudi a na gó be patara a kawa nopo gedegederidina. ¹⁴ Naumeki da tauwai suma ġa Pol wai ġapa a riupore nawena gerese, be Saelas be Timoti Bereama a mia kwasana. ¹⁵ Be tautaugoma aitau ġa Pol awai dokena taudi mate a na góna, naumeki da Aten paratinama. Be Pol na giuma a muna ġena Bereama da Saelas be Timoti ta riuedi be ya ġiyanina Pol murine ta na góna.

Pol Aten nopone

¹⁶ Rağanine Pol ya góro Saelas be Timoti Atensma ya raber-abedina, tauna yai nuaboya kauana, baninama e kitana be meagai nopenama kokoitau ya mo góvuna. ¹⁷ Tauna Jius be Gurik tauwai suma ġa banegidima mate sinagog nopone ai tarapirina, be rağan patapatanama anikune gabune aitau ġa a tavatavana mate awai tarapirina.

¹⁸ Dabudine tautaugoma nuanuauyauyedima Epikuria be Stoiki damdima, taudi Pol umanama a riu virevirena, “Inam baneginama giugiu buabuanama aba e giue?” Be banaga ġesaudima a riuna, “Anikitanama maika tauna wari dobu mamaituedima e giuguedina.” Nama taudi a riuna, baninama Yesu tauna gurie be ya midisúgu muna ġana, vutuna Pol ya rarauguguyena.

¹⁹ Dabudine taudi Pol ai doka nawena Areopagas oy-anama* debane be a riuenas, “Tauma sibo kè kataie da uma

* **17:19:** ‘Areopagas’ inam oya debane, be Aten banegidima nuanuauyauyedima adi kaba waiboruma gabunama.

waikatakatainama vaunama aba tam kwai katakataiedi? ²⁰ Tam am giuma vaiedima ditabu beamiae ta yovoyovona. Vutuna aubainama tauma ka ġoeġoena da am giuma pakanama sibo kē katai kauena.” ²¹ Naumeki Aten banegidima be vaġavāġai matabudi dabudi miemienidima taudi nam aba noyanama ti voivoiena, be taudi raġan matabuna a miaboni be giu vaudima a giuguedi be awai beavaiedina.

²² Dabudine Areopagas oyane adi kaba waiborue dabudine Pol ya midisūgu be ya riuna, “Yau bana! Taugu yà kitakitana da taumi bariawa tabu be tabu ko rarau duneedina, maika kabe Mamaitua. ²³ Taugu ami meagaiġa è babababara naġo raġanine, taugu olta tenaġa è banavina da debane umanama a girumana: UMA OLTANAMA TAUNA MAMAITUA NAM KATAKATAIENA TAUNA AUBAINAMA. Taumi uma Mamaituanama nam ko kataiena be ko rarau duneena. Tauna vutuna yodi yà rauguguyena ġaromie.

²⁴ “Inam Mamaituanama, tauna dobu be nōpone yaba matabuna ya voiedina. Be tauna mara be dobu ewai badedina, be tauna nam vada banaga nimedie a voivoiedina nōpodie ima miamiana. ²⁵ Be banaga nam teneġina da tauna tai kani be ta rabe, baninama tauna nam aba ġarode ima ġoeġoena. Ibewa! Tauna vutuna yaba matabuna e raberabedina, be tauna yawasana, yavutu be yaba matabudi e uteutedina. ²⁶ Tauna tauġoma tenaġa pakane yai tubuġina be taune dam matabudi dobue yai tubuġidina, baninama ya ġoena da banaga sibo dobu matabuna a miana. Be tauna banaga adi raġanima ya vinedi be adi kaba miama deġo dabudine sibo a miana mate ya vinedina.

²⁷ “Nama Mamaitua e voivoiana, baninama tauna e ġoeġoena da banaga ta wane be tai suratou gurata da ta banavina. Be tauna tauda diade be nam i naġo poredana. ²⁸ Baninama taune tà yawayawasana, tà naġonaġo be tà miamiana. Be ami sarema taubiridima ġesaudima taudi umanama a vatovatodina, ‘Tauda tauna natunatunama.’ ²⁹ Vutuna aubainama tauda deġoda Mamaitua Natunatunama, naumeki da tauda nam sibo tēi noġotana Mamaitua tauna kokoitau, banaga adi nuauyauya gold, siruva bo yekue a sarisaridina maika. ³⁰ Dokane Mamaitua bua ya kita poredina, be yodi banaga dobu matabuna e riuriuedina da nuedima ta vitaredina, ³¹ baninama tauna raġan ya vinena da airaġan tauna dobue banaga matabudi adi voiama ruvane ei tarapiriedina. Be tauna tauġoma tenaġa ya vinena da tauna uma kauinama ei badena. Uma baneginama Mamaitua gurie ya kawa midisūgu munaġena, da matabuda

sibo tè kataiena da Mamaitua uma noyanama tauna ya utena.”

³² Rağanine taudi gurie midimidisuğu muneğinama a vaivaiena, dabudine ġesaudima taudi ai kwatekwateve be ġesaudima a riuna, “Tauma ka ġoegoena uma riunama wari rağan kwa giu munaġe be ka vaiena.” ³³ Naumeki da Pol ya gosedi be ya naġona. ³⁴ Be tautaugħoma bisanama na giuma ai sumaġe be ai muriwatanena. Taudi nopolidie tauġoma tenaġa isanama Dionisus, tauna Areopagas oyanama baneginama. Be ġesau tauna waivinama isanama Damaris, be ġesaudima mate.

18

Pol Korint nokane

¹ Uma kauidima muridie Pol Aten ya gose pore be ya naġona Korint. ² Inam dabudine Jius tauġominama isanama Akwila ya banavina, tauna Pontasma ya tubuġana. Tauna na waivima Prisila mate maiġo ġoma Italima be a tavana, bainama Sisa Klaudias ya riu vavasaġana da Jius banegidima Romma ta gosena. Be Pol ya naġona kitedima aubainama. ³ Be na noyama teneğinama maika taudi. Vutuna aubainama taudi mate a mia be parai a voivoiedina vada aubaidima.

⁴ Be Sabat matabudi sinagog nokane yawai tarapirina, be ya rara rubuna da Jius be Gurik banegidima sibo nuedima a vitaredina. ⁵ Rağanine Saelas be Timoti Masedoniam be a tavana, dabudine Pol parai voienama ya gose be rağan matabuna Mamaitua riunaġa ya giugiu nonoġena, be Jius ġarodie yawai maġħatarana da Yesu tauna naumeki Tauwai yawasana. ⁶ Be Jius taudi tauna na giuma a riu virevire be a kunurena. Vutuna aubainama tauna na garae popokau ya rawakurukuruvidi* be ya riuedina, “Deġoda yawasana nam ko banavi, inam taumiġa ami wavuma. Be wavumima taumiġa ko paġo munaġena be nam taugu yau wavu. Yodi be nokoi ya naġona taugu yà naġona eteni ġarodie.”

⁷ Naumeki da Pol sinagog ya dobi pore be ya naġona Taitos Jastas na vadae sinagog diane. Inam baneginama tauna Mamaitua taurauduneenama. ⁸ Krispas sinagog tauwai badenama be na vadama banegidima matabudi Bada ai sumaġena. Be Korint banegidima toitoi nama a vaivaiena, taudi mate ai sumaġa be a babataitona.

⁹ Kupi tenaġa Pol Bada ya kitana, be Bada umanama ya riuena, “Nam kwa naira, tam naumeki da kwa giugiuna, nam kwai nuatugutuġu, ¹⁰ baninama taugu tam mate, be

* **18:6:** Popokau ya rawakurukuruvinha, bainama adi gewagewama ya ute munaġedina.

nam aitau tokare e midisūgu be e raukivi gewegegewem. Baninama yau banagama toitoi uma meagaine ta miamiana.”¹¹ Naumeki da Pol modi tenaḡa be nawaravi 6 dabudi ya mia be Mamaitua riunama banaga yawai katakataidina.

¹² Galio tauna Akaia provins nopone yawai primiana raḡanine, dabudine Jius banegidima a rawateḡeidi da Pol a vunuḡi be a verauḡena etara aubainama. ¹³ Taudi Pol ai wawu be a riuna, “Uma tauḡomināma tauna banaga nuedima ya riu vitaredi da taudi Mamaitua a rarau dunee be isanama a kaikai suḡuna. Be tauma ama tarawatuma nam nama ima kenakenana.” ¹⁴ Dabudine Pol ḡaubonaḡa sibo giu yai karena be Galio Jius ya riuedina, “Taumi Jius koi beavaia! Deḡoda uma baneginama gewagewa i voienna, naumeki da taugu sibo bonemima è paḡona. ¹⁵ Be uma kauinama tauna ya voienna, inam taumi ami waikatakataima na ruvae be ami tarawatuma isedie. Vutuna aubainama uma kauidima taumiḡa koi tarapiriedi be nam taugu yau noyama dabudi ima kenakenana.” ¹⁶ Vutuna aubainama tauna anietara vadane be ya tavu dobiḡedina. ¹⁷ Dabudine Jius banegidima matabudi sinagog tauwai badenama Sostenes a vunuḡi be Galio noḡone a riḡa yabayababena. Be Galio nam aba i riuenā.

Pol ya munaḡana Antiokma. ¹⁸ Be tauna Korintma ya mia guratana. Muriḡa na banagama yai kaiwedi be kukakukae, Prisila be Akwila mate a naḡona Siriama. Muriḡa da ya geruna tauna Kenkeriama debanama a maku porena, na saugama† Mamaitua ḡarone aubainama. ¹⁹ Taudi Epesesma a tava be dabudine Pol Prisila be Akwila ya gosedi be ya naḡona sinagog nopone be Jius banegidima mate ai tarapirina. ²⁰ Dabudine Jius banegidima tauna ai baḡana da mate a taumia gurata be tokare sibo ya naḡona. Be tauna ya tuaḡaina. ²¹ Naumeki da yai kaiwedi be ya riuedina, “Deḡoda Mamaitua e ḡoeguna, naumeki da tokare ya verau munaḡana.” Be dabudine tauna Epeses ya gose be kukakukae ya naḡona. ²² Raḡanine tauna Seserima ya tavana, tauna ya saḡana Jerusalemma Mamaitua na damma waikaiwedima aubainama, be muriḡa tauna ya dobi ya naḡona Antiokma.

Pol na vaḡaima wairabuiteḡanama

Apolos ya naḡona Epesesma

²³ Pol dabudine Antiokma ya taumia guratana. Muriḡa uma dobunama ya gose be tauna ya babara naḡona meagai

† **18:18:** Raḡanine banaga Mamaitua ḡarone a sausaugana, taudi debedima nam ti tomtomna. Be raḡanine sauga ya kovikovina, naumeki da debedima a makumaku poredina.

da meagai, Galesia be Pirigia provinsdima nopođiga, be tauwai muriwatana matabudi ya voiedi da taudi ai rewapana.

²⁴ Inam rađanine Jius tauđominama tenađa isanama Apolos, ya verauna Epeses meagaine. Tauna Alexandriama ya tubuđana, be tauna taugiuyađayađa be girugiruminama poranama tauna ya katai kauena. ²⁵ Be tauna Bada Yesu na yawasanama kedanama a giu kauena. Be na giuma vaiedima ai rewapana vavasađana. Avedi da tauna Jon na babataitoma taunađa ya kataiena, be yađoro Yesu na kauama ya giu yađeyajgedina. ²⁶ Tauna ma raudebatorana sinagog nophone ya giuna. Rađanine Prisila be Akwila tauna na giuma ta vaiena be taudi a riue be ai doka nawena adi vadae. Be dabudine taudi Mamaitua na yawasanama kedanama Apolos a giu yađena.

²⁷ Rađanine Apolos Akaia nađonama ya waitaina, naumeki tauwai sumađa Epesesma taudi leta a girumina Akaiama tauwai sumađa ġarodie da rađanine Apolos dabudine e tavana inam taudi nimedie. Apolos na kaba tavama rađanine, tauna tauwai sumađa ya sagu kauedina, waikatakatai puyonama tauna ġarone aubainama. ²⁸ Be na giuma wairewapana vavasađidie Jius banegidima adi giuma patara nopolie ya riđedina, be tauna girugiruminama porane ġarodie yai mađatarana da Yesu tauna naumeki Tauwai yawasana.

19

Pol be Jon tauwai babataito na tauwai muriwatana

¹ Rađanine Apolos tauna Korintma ya miamiana maika, Pol tauna oya tauridiđa kedanama ya pađona, naumeki da Epesesma ya dobina. Dabudine tauwai muriwatana ġesaudima ya banavidi ² be yai taraviredina, “Taumi koyawai sumađana rađanine, Arua Babau koya pađo bo ibewa?” Be taudi a paribeena, “Ibewa, tauma nam airađan deđo Arua Babau riunama ke vaia rubuna.” ³ Naumeki da Pol ya riuna, “Be taumi aba babataitonama koya pađo?” Be taudi a paribeena, “Jon na waibabataitoma.” ⁴ Dabudine Pol ya riuna, “Jon na waibabataitoma inam taudi aitauđa adi nođotama ta vitavitaredina aubaidima. Tauna banaga ya riuedina da, banaga murine e veraverauna, tauna tai sumađena, inam tauna Yesu.”

⁵ Taudi umanama giunama a vaivaiena, taudi Bada Yesu isane a babataitona. ⁶ Rađanine Pol nimanama debedie ya biribiridina, dabudine Arua Babau ġarodie ya yovona. Naumeki da taudi bona tabu be tabu giuedima ai kare be awai perovetana. ⁷ Inam tautauđomidima sievinama 12 nama.

⁸ Pol nawaravi rabuitegā nōpodie tauna ya nağōna sinagog nōpone, be Mamaitua na waiguyauma banaga ġarodie ma raudebatorana yawai mağataridi be nuedima ya riuriu vitaredina. ⁹ Be banaga gesaudima taudi a raukosogāigai be nam ti sumağana. Be patara noğodie riu gewegewedie Bada na yawasana kedenama a riuedina. Vutuna aubainama Pol taudi ya gosedi be tauwai sumağā gesaudima ya ragaudi ġarone, be rağan matabuna Tiranus na waikatakataima vadane awai tarapirina. ¹⁰ Uma kauinama nama ya kena nonoğana da modi rabui a kovina, vutuna aubainama Jius banegidima matabudi be Gurik aitaugā Eisia provins nōpone miemienidima matabudi Bada riunama a vaiena.

Banaga ginauri bukedima a gabu gorudina

¹¹ Be Epeses nōpone Mamaitua rewapanā Pol ya ute da tauna mataira dosi vavasağidima ya voiedina. ¹² Banaga taudi Pol na agesi be na garama a ragaudina, be banaga sidesidedima debedie a biridi da a yawasana be arua gewegewedima taudi a dobi poredina.

¹³ Be Jius banegidima gesaudima taudi ginauri tauvoienama a babaranago be a rara rubuna da arua gewegewedima banaga a kokukokudina ġarodie sibo Yesu isane a tavu dobiğedina. Taudi umanama a riuna, “Yà riuriu vavasağemna da Yesu, vutuna Pol e rara guguyena, tauna isane inam baneginama kwa dobi pore.” ¹⁴ Naumeki da Jius pirisidima adi badama isanama Skeva, tauna na sedama tautaugomidima matabudi 7, taudi umanama kauidima a rara rubudina. ¹⁵ Be arua gewagewanama ya riuna, “Taugu Yesu be Pol è kataiedina, be taumi aitau?” ¹⁶ Dabudine banaga arua gewagewanama kokukokunama ya raupoti, ya vunugidi da ya riğā yababayababedi be taudi ma kovekovedi be ma kosikosinidi naira a manini dobina.

¹⁷ Jius be Gurik banegidima matabudi Epesesma miemienidima uma kauinama a vaie be taudi matabudi a naira kaua be Bada Yesu isanama a kaisuğusuğuna.

¹⁸ Be banaga toitoi aitaugā awai sumağana, taudi a verau be adi voiama gewegewedima patara matedie a riu kuvekuvesidina. ¹⁹ Be banaga toitoi aitaugā ginauri voivoiedima taudi matabudi adi ginaurima moiragidima bukedima a rawateğeidi be patara matedie a gabu gorudina. Be rağanine taudi buka maesidima a sievidi, da mane sievinama ya sağā vavasağana, siruva 50 tausand nama. ²⁰ Umanama kauidie Bada riunama yai rewapanā, ya moraba be ya daberarana.

²¹ Inam kauidima muridie Pol Jerusalem nağonama yai nuanoğonoğotena da tauna Masedonia be Akaia nōpodığā

sibo ya nāgona. Be tauna ya riuna, “Taugu yà nāgona Jerusalemma, be murīga yà nāgona Romma.”²² Naumeki da tauna tausagunama rabui, Timoti be Erastas ya riupore nawe dokedina Masedoniama. Be Pol tauna dabudi Eisia provins nopone ya taumia guratana.

Igara Epeses nopone ya tubugana

²³ Naumeki da inam rāganine banaga ġesaudima a medina Bada na yawasanama kedama aubainama, be taudi waikawa riuriu dosinama ai tubugina. ²⁴ Taūgoma tenāga isanama Demetrias, tauna na noyama inam siruvae purapura ya voivoiedina. Tauna siruvae tempol ġaūgħaubodima ya voivoiedina, kitedima kokoitau waivinama isanama Aretemis na tempolma maika. Uma vadedima ġaūgħaubodima banaga a gimara da a ragaudi be a nāgonaġona. Tauna noya toitoi banaga ya utedi da taudi siruvae yaba tabu be tabu a voivoiedi be yabedie a rarau manena.

²⁵ Naumeki da Demetrias tauna na taunoyama be tausagudima ġesaudima mate, matabudi ya rawateġeidi be ya riuedina, “Yau bana, koya kataiena da tauda uma noyane, mane dosinama dà kaba paġoma. ²⁶ Be taumi koya kita be koya vaiena da uma baneginama Pol banaga toitoi nuedima ya riu vitaredina, baninama tauna ya riuna da mamaitua banaga nimedie voivoedima inam taudi nam Mamaitua. Uma kauinama nam Epeses taunaġa nopone i giuena, be Eisia provinsnama matabuna nopone nama ya giuguna. ²⁷ Uma giunama sabine yodi dà manema anipaġonama kedanama ewai kavena. Be ġesau inam umanama: Banaga tokare Aretemis na vadama ta noġota tuatuaġċien be Aretemis ġominama tauna Eisia be dobu matabuna nopone isanama dosinama banaga a rarau duneena, be yodi Pol e kawakawa kerebuna.”

²⁸ Rāganine na banagama nama a vaivaiena, taudi nuedima yai medi kaua be ma yogoyogodi a riuna: “Epeses Aretemisnama tauna saġasaġa vavasaġinama.” ²⁹ Dabudine meagai banegidima a tava yababayaba be kedae taudi Gaiyas be Aristakas mate a soru waimaninidi be a nāgona aniwai boru gabune, be nuedima ya rāgarraġana. Taudi rabuidi Masedonia banegidima be Pol na varoroma. ³⁰ Pol ya ġoegoena sibo ya nāgona patara nopodie be tauwai muriwatana nam ti aninena. ³¹ Be mate provins babadidima dosidima aitaūga tauna na banagama riu a riuporena ġarone da tauna nam sibo ya nāgo aniwai boru gabune.

³² Dabudine banaga matabudi a nuababaġa be banaga ġesaudima wari yaba a yogoyogoena, be ġesaudima wari

yaba a yogoyogoena. Be banaga toitoi nam ti kataiena aba aubainama inam dabudine a tava. ³³ Be Judia banegidima Alexandra a biusuriğā nawena, patara noğodie ai midiri da tauna aubaidima sibo ya giuna. Be Alexandra nimanama ya kaisuğū da Jius adi gudutarama sibo banaga ġarodie ya voiena, ³⁴ be banaga ta kitana be tauna Jius baneginama, naumeki da banaga matabudi suara awas rabuinama nopodie a yogotenağā be a riuriuna, “Epeses Aretemisnama tauna sağasağā vavasağinama!”

³⁵ Dabudine meagai tauwai badenama ya riutuağaeidi be umanama ya riuna, “Banaga dobu matabuna a kataiena da tauda Epeses banegidama, tauda Aretemis* na tempolma be yeku Aretemis maika kitanama marae be kurukuruvinama mate taurabedima. ³⁶ Nam aitau tokare uma giunama e riutuağae be teneteneğina, vutuna aubainama taumi matabumi koi nuatuğutuğū be nam ko voia yababayababa. ³⁷ Taumi uma tautaugomidima rabui koya sağe yababedina. Taudi nam aba da kaba raudunema vadane ti danene bo riu gewegewedie da mamaituama waivinama ti riuen. ³⁸ Değoda Demetrias be na taunoyama uma banegidima sibo ti wavudina, tauda babada ta miamiana da taudi ta etaredi be dabudine tai kawa wavuwavuna. ³⁹ Be değoda taumi giugesaudima ġaromie tima kenana, naumeki da tokare boru dosine ko giuedina. ⁴⁰ Aba da manaka ya tubutubuğana inam aninaira, tauda tokare uma kauinama aubainama tai wavudana. Be nam dego dà giuma verena da tokare tà gudutara. Be tauda nam dà giuma baniboruboruna da tokare tà riuedi.” ⁴¹ Uma giudima ya giugiu koviedina, tauna boru yai yamonedin.

20

Pol Epeses ya gose be ya nağona Troasma

¹ Rağanine iğara ya kovikovina, dabudine Pol tauwai sumağā ya rawateğeidi be ya duğudina. Naumeki da yai kaiwedi be ya gosedi da ya nağona Masedoniam. ² Inam dobudima tauna ya nağō rovoedi be banaga ya duğuduğudina. Naumeki da Grisma* ya tavana. ³ Dabudine nawaravi rabuiteğā ya mianana, be tauna ya ġoeğoen sibo ya nağona Siriama. Be Jius banegidima tauna kana kasirama a tomtomna, vutuna aubainama Pol ya munağana Masedoniam.

⁴ Inam vağaine banaga bisanama Pol mate ai varrona. Taudi isedima Sopata, tauna Berea banaginama

* 19:35: ‘Aretemis’ tauna kokoitau waivinama. * 20:2: ‘Gris’ inam Gurik banegidima adi dobuma.

Pirus natunama, Aristakas be Sekundas, taudi Tesalonaika banegidima, Gaiyas tauna Debe baneginama, be Timoti, Taikikas be Tropimas, taudi Eisia banegidima.⁵ Uma banegidima matabudi taudi a doka be Troasma a raber-abemaina.⁶ Be Buredi-Nam-Sasanina soinama murine tauma kukakukae kē davuna Pilipi. Be rağan 5 muridie kē rawateğeimaina banaga ġesaudima mate Troasma. Dabudine tauma rağan 7 kē miana.

Eutikas gurie a kawa midisuğu munağena.

⁷ Rağan Sande tauma kē rawateğeimaina turiya aubainama. Pol ġarodie ya rarauguguyana, be tauna pomainama na nağoma aubainama, tauna ya giuna da nubautua.⁸ Tauma vada vatavatara rabuiteğā, be vataraniwai rabuiteğāne tauma kē rawateğeimaina. Be inam dabudine kodam toitoi a karakaratana.⁹ Be tauğoma tenağā yaraginama isanama Eutikas tauna windoe ya miamiana, be tauna matanama ya yadoyadona kena aubainama. Be Pol tauna yağoro ya giugiuna. Be rağanine tauğominama ya kenakena nuakoana, tauna windoe be ya kuruva dobi da doğae ya ravusena. Be rağanine ta kaisuğu kabe da tauna kaite ya gurina.¹⁰ Pol ya dobi da nimane ya tika be banaga ya riuedina, "Koi nuatuğu, tauna yawayawasaninama."¹¹ Naumeki da tauna ya sağā ya munağana vada nopone. Dabudine taudi a turiya be murine Pol ya giu watanana da rağan ya tomna. Naumeki da tauna ya nağona.¹² Dabudine banaga tauğoma yaraginama ai doka nawena vadae yawayawasaninama, be taudi nuedima ya vere kauana.

Pol ya nağona Miletma

¹³ Tauma kē doka be kē nağona wagae. Be kukakukae kē nağona Asosma. Be tauma Pol sibo kē geruna, be bani-nama tauna kağanağā nağonama ya ġoena aubainama, tauna ya riuemainda tauna Asosma kai geruna.¹⁴ Rağanine tauna Asosma ya banavimaina, naumeki da kē geru be kē verauna Mitilenema.¹⁵ Be pomainama tauma kukakukae kē nağona Kiosma. Be mainokomgo tauma Samosma kē ġotana be mainokommai rağanine tauma Miletma kē tavana,¹⁶ baninama Pol tauna ya ġoegħoena da tauma sibo Epesesma kē nağona, be Pentekost rağaninama maida aubainama, tauna nam ei kabikabikoa be yawai paparanana da Jerusalemma e sağā makaina, muriġa da Pentekost.

Pol Epeses babadidima yai kaiwedina

¹⁷ Tauma Miletma be Pol riu ya riuporena Epesesma Mamaitua na damma babadidima ġarodie da taudi sibo a verauna.

¹⁸ Rağanine taudi a tavatavana tauna ya riuedina, “Taumi koya kataiena taugu pakane uma dabudine è tavana Eisia provins nopone be nema taumi mate rağan matabuna tè mia bakona ¹⁹ be Bada èi yaragena. Taugu voyağote be ma matasurugu Bada èi yaragena, avedi da Jius a rara rubuguna, baninama Jius banegidima yau kasirama a tom-tomna. ²⁰ Taumi koya kataiena da taugu nam ai giu tenağā e kaididi kwasena. Ibewa da giu matabudi anisagumima è rauguguya rovoedina ġaromie. Taugu patare be vada da vada èi katakataimina. ²¹ Taugu Jius be Gurik banegidima è riuedina da taudi matabudi nuedima ta vitaredi Mamaitua ġarone, be tai sumağana tauda da Badama Yesu Tauwai yawasana ġarone.

²² “Be taugu yodi Arua e sorusoruguna da yà nağona Jerusalemma. Be dabudine nam e kataiena da aba ġarogue e tubuğā. ²³ Be taugu è kataiena da taudi ta panigu be ta raukivi gewegeweguna, baninama nama meagai matabuna Arua Babau ya riuriueguna. ²⁴ Be inam naumeki, taugu nam guri ama nainairena, be tenağā, yau yawasanama kedanama be yau noyama Bada Yesu ya uteuteguna, yà raudamoedina. Uma noyanama inam Mamaitua na rauki-viverema varinama verenama taugu yàwai matematena.

²⁵ “Be yodi taugu è kataiena da taumi matabumi ġaromiġa è naġo be Mamaitua na waiguyauma è rarauguguya, nam aitau tenağā tokare e kita munağegu. ²⁶ Vutuna aubainama taugu yà riuriuemina: Değoda tam aitau nam yawasana kwa banavi, inam nam teneğinama da taugu koi wavugu, ²⁷ baninama taugu Mamaitua na ġoanama matabudi è riuemina, be nam aba riunama e kaididi kwasena.

²⁸ “Vutuna aubainama yodi ko kita kaua munağemi be banaga matabuna Mamaitua na dame. Uma banegidima matabudi tauna natunama kosinine ya gimeridina. Be Arua Babau ya vinemi da taumi Mamaitua na yosima taukita watanidima. ²⁹ Taugu è kataiena da rağanine taugu yà gosemmina tokare tabei ta sağā nopomie be yosi ta kawa gewegewedina. ³⁰ Be mate taumi ġomimima poumie tokare tautauğoma gesaudima ta midisuğu be Mamaitua riunama ta vitaredi da tauwai muriwatana tai doka godabarimi be taumi taudi koi muriwatanedina. ³¹ Vutuna aubainama ko kita kaua be ko noğoti da taugu modi rabuiteğā nopodie kupi da suara rağan patapatanama taugu ma matasurugu yawasana kedanama èwai kataimina.

³² “Yodi yà rarauguguya, vutuna e voiemi da koi rewapani be yawasana kenakena nonoğinama e utemina. Taumi babau banegimima matabumi.

³³ “Taugu nam aitau ġarone gold bo siruva bo gara ei kwinena. ³⁴ Taumi matabumi koya kataiena da nimaguma uma, taugu yau ġoana be yau varoroma adi ġoanama è voiedina. ³⁵ Be yaba matabudi è voivoiedie taumi èi kataimi da umanama noyedima dosidie taumi banaga gwaġegwāġedima sibo koya sagudina. Ko noġoti da Bada Yesu tauna umanama ya riuna: ‘Waiuta na wainuaverema dosi vavasaġinama, nam paġo na wainuaverema maika.’ ”

³⁶ Raġanine tauna nama ya riuriuna, tauna tuapikane ya raupari be matabudi a moiragina. ³⁷ Dabudine matabudi a ġaba be Pol a tika be ai suruvena. ³⁸ Aba ya kawa nuaboyedina inam uma riudima, taudi noġonama nam ta kita munage. Naumeki da taudi Pol mate a naġo tenaġħana wagae. Be dabudine Pol ya gosedi be ya naġona.

21

Pol ya munaġana Jerusalemma

¹ Raġanine tauma kë gosedina, tauma kukakukae kë naġona Kosma. Be pomainama tauma kë naġona Rodus, dabudine da kë naġona Patarama. ² Dabudine tauma waga kë banavina tauna ya nanaġona Poitia, naumeki da tauma wagane kë geruna. ³ Tauma Saipras kë kitakitana senimaima yauwanine kë gose be tauma kë naġo ġomana Siria provins nopone be Taiama kë ġotana, baninama dabudine waga taragai yai dobida. ⁴ Naumeki da inam waganama kë dobi pore be dabudine tauwai muriwatana ġesaudima kë banavidi da taudi mate dabudi raġan 7 kë miana. Uma tauwai muriwatandima Arue Pol a riuena da tauna nam sibo ya saġa ya naġo Jerusalemma. ⁵ Be tauma ama naġoma raġaninama ya tavatavana, naumeki da tauma meagai kë gose be ama vaġaima këi kare munaġena. Be tauwai muriwatana, adi visavisarama be adi sedama matabudi meagai kë gosedi da kë dobi be kë naġo tenaġħana gerese. Be dabudine tauma tuapikamaie kë raupari be kë moiragina. ⁶ Be murine këi kaiwedi da tauma wagae kë saġħana, be taudi a munaġana meagaie.

⁷ Be Taiama dabudine ama vaġaima këi kare munaġena, naumeki da Petoleisma kë ġotana. Dabudine tauwai sumaġa këi kaiwedi be taudi mate kë miana raġan tenaġħa. ⁸ Pomainama kë midisuġu munaġana, naumeki da Sesiriama kë tavana. Be Pilip tauna vari verenama taurau-guguyenama na vadae kë miana. Tauna tenaġħa tauwai kaisagu 7 noppodie. ⁹ Tauna natunatunama guguinidima matabudi 4 taudi Mamaitua riunama a giugiuena maika peroveta.

¹⁰ Tauma dabudi kè mianana rağan bisanama, be peroveta isanama Agabas tauna Judiama be ya yovona. ¹¹ Naumeki da ġaromaie ya verau be Pol na boretaima ya paǵo be taunaǵa nimanama be kaǵanama boretaine ya panidi be ya riuna, “Arua Babau ya riuna umanama, ‘Jius banegidima Jerusalemma uma boretainama tamanama umanama ta pani be eteni nimedie ta boruna.’” ¹² Tauma umanama kè vaivaiena, naumeki da dobunama banegidima be tauma Pol kèi baǵa guratena da nam sibo ya saǵa ya naǵo Jerusalemma.

¹³ Be Pol ya paribeedi be ya riuna, “Aba aubainama taumi ko ǵabaǵaba be taugu kowai nuaboyagu? Taugu è vokaukauana da Jerusalem nopone ta panigu bo tai gurguna, Bada Yesu isanama aubainama.” ¹⁴ Raǵanine tauma nam teneteneǵina da ke riutuaǵaie, naumeki da tauma kèi nuatuǵutuǵu be kè riuna, “Naumeki, Bada na ǵoanama nama e tubuǵana.” ¹⁵ Uma kauidima muridie tauma kè vokaukaua be kè saǵa, kè naǵona Jerusalemma. ¹⁶ Tauwai sumaǵa ǵesaudima Seseriamate kèi varorona, naumeki da Manason na vadae a saǵemainda dabudine sibo kè miana. Manason tauna Saipras tauǵominama be tauna tauwai muriwatana poranama.

Pol Jerusalemma ya tavana

¹⁷ Raǵanine tauma Jerusalemma kè tavatavana, tauwai sumaǵa ma nuaveredi ai doka nawemainda adi vadae. ¹⁸ Be pomainama Pol be tauma ǵesaumaima kè naǵona Jeims kitanama aubainama. Be Mamaitua na damma babadidima matabudi mate dabudi a tavana. ¹⁹ Pol matabudi yai kaiwedi be na noyae yaba matabudi Mamaitua eteni ǵarodie ya voivoiedina yai maǵataridina.

²⁰ Be taudi umanama riunama a vaivaiena raǵanine, taudi Mamaitua isanama a kaisuǵusuguna. Be dabudi taudi Pol a riuena, “Tuai, yodi kwa kita Jius banegidima sievinama tausand toitoi ai sumaǵana. Be matabudi taudi yaǵoro tarawatu mudurabidima.” ²¹ Be yodi banaga ǵesaudima taudi umanama a riuena, ‘Tam Jius matabudi eteni nopodie miemienidima kabe kuwai katakataidi be Mousis na tarawatuma kabe ti gosegose. Tam kabe ku riuedina da adi sedama nam kopitom ta paǵo bo nam Mousis na tarawatuma na vaivaie ta mia.’ ²² Yodi aba tà voie? Taudi tokare ta vaie da tam kuya tavana.

²³ “Yutuna aubainama tauma aba ka riuemna kwa voienna. Uma dabudine tautauǵoma 4 taudi sauga a voienna Mamaitua ǵarone. ²⁴ Inam tautauǵomidima kwa ragaudi be taudi

mate nopomima ko kawa vere munaġena.* Be tam adi puyoma kwa gimara be tokare taudi debedima ta makudina. Dabudine banaga matabudi ta kita da uma giudima matabudi inam nam riukaua. Be yaġoro tam tarawatu kwawai muriwatanena.

²⁵ “Be eteni nopolie aitaugħa awai sumaġħana, tauma adi letama kē girumidi da taudi kani raurauobedima nam ta kanidi be kosina bo musara gadonama kikikinama nam ta kanidi. Be nam ta rauwaivi yabayababa. Deġoda tai naġina, inam naumeki adi visavisarama taudīgħa mate, be nam waiwaivi gesaudima mate.” ²⁶ Dabudine pomainama Pol inam tautauġomidima ya ragaudi be tauna taudi mate nopolima a kawa vere munaġedina. Dabudine taudi a naġona tempol nophone be Pol pirisi ya riuedina da yodi sauga adi raġanima a kovina, be raġan 7 muridie taudi tenatenaġa nophokawa vere puyodima ta verauġedina.

Pol tempol nophone a vunuġina

²⁷ Raġan 7 ġaubonaġa sibo a kovina, Jius banegidima gesaudima Eisiama miemienidima, taudi Pol tempol nophone a kita be taudi banaga matabudi a kawa noppogedegederidi da tauna a vunuġina. ²⁸ Be taudi bonedima dosine a riuna, “Yau bana, ko sagumai! Uma tauġominama vutuna dobu matabuna banaga matabudi yawai katakataidina, be giu gewegewiedie dà banagama, dà tarawatuma be dà tempolma ya riuriuedana. Be tauna eteni banegidima mate ya saġedina dà tempolma nophone be ya voie da inam babau gabunama ya kawa miramirana.” ²⁹ Taudi nama a riuna, baninama dokane taudi Pol a kitana, Tropimas mate meagaiġa a naġonaġona. Be taudi a noġotina da Pol kabe Tropimas iwai doka nawe tempol nophone.

³⁰ Naumeki da meagai banegidima tabutabudima a kawa noppogedegederidi be a maninitava yabayababa be dabudine Pol tempol nophone a vunuġi be a soru dobigena. Be yai raġantenaġe da taudi matakedha a gududina. ³¹ Raġanine waigurinama awai taina, dabudine Rom adi torima matanama e vaiena be Jerusalemma iġara a ġaġaġaġarina. ³² Dabudine tauna waiġopha tauriġara be adi babadama a dobi be a manini a naġona patara nopolie. Be patara ta kitana be tauriġara adi babadama mate a yovoyovona, dabudine taudi Pol riġonama a gosena. ³³ Naumeki da tauriġara adi torima matanama Pol ya vunuġi be na tauriġarama ya riuedina da taudi seini rabui mate Pol sibo

* **21:24:** Pol puyo ei maesina, be dabudine ta kita be tai sumaġħa da tauna Mousis na tarawatuma yaġoro ewai muriwatanena, baninama tauna Jius baneginama aubainama.

a panina. Dabudine tauna banaga yai taraviredina, “Uma baneginama aitau, be aba ya voie?”³⁴ Dabudine banaga ġesaudima wari yaba a yogoyogoena, be ġesaudima wari yaba a yogoyogoena. Be tori matanama nam aba i banavina, aubainama na tauīgārama ya riuedi da taudi sibo Pol ai doka nawena adi kaba miae.³⁵ Raġanine Pol wawane ya tavatavana, dabudine iġara ya moraba vavasaġana aubainama, tauīgāra Pol a kiroġa ġomena gemodie,³⁶ baninama patara taudi ai muriwatanedi be bonedima dosine a riuriuna, “Koi guri!”

Pol ya gudutara munāġena

³⁷ Dabudine tauīgāra ġaubonaġa Pol sibo a nawena vadae, be tauna tori matanama yai baġana, “Naumeki bo ibewa da aba ġarome yà giue?” Be tauna ya paribeena, “Tam Gurik bonane giunama kuya kataie, bo?³⁸ Taugu è noġotina da tam kabe Ijipt banegim, tauna maiġone iġara yai tubuġi be banaga 4 tausand yai doka nawedina dobu kavakavane.”³⁹ Be Pol ya riuna, “Ibewa! Taugu Jius banegiguma be yau meagaima isanama dosinama Tasus, Silisia provins nōpone. Be yàwai baġamna da sibo kuyai aninegu be banaga ġarodie sibo è giu.”⁴⁰ Be tori matanama tauna yai anine da na ġoanama sibo ya voienna. Naumeki da Pol wawane ya midi be nimanama ya kaisuġuna da patara sibo ai beavaienā. Raġanine taudi matabudi awai nuatuġtuġu rovona, dabudine tauna Hibru bonane ya riuedina,

22

¹ “Yau banagama be tamatamaguma, yau gudutarama yodi koi beavaie.”² Raġanine taudi ta vaiena be Hibru bonane ya giugiuna, naumeki da taudi matabudi ai nuatuġu vavasaġana. Dabudine Pol ya riuna,³ “Taugu Jius banegiguma be Tasusma è tubuġana Silisia provins nōpone, be uma dabudine è morabana. Taugu Gamaliel na waibadama dibune, be tauna tamatamadama adi tarawatue yai katakatai kaueguna. Be taugu maika taumi, Mamaitua mudurabiguma.⁴ Taugu Yesu tauwai muriwatanedima è raraukivi gewegewedi be èwai guridina. Taugu tau-tauġoma be waiwaivi è vunuġidi be dibure è biribiridina.⁵ Be pirisi saġasāġa vavasaġināma be meagai baba-didima taudi a kataieguna da uma yabedima yà riuriuemina inam riukaua. Be taudi leta a uteguna, adi banagama Damaskasma miemienidima aubaidima da taudi a sagugu da tauwai sumāġa dabudi sibo kè vunuġidi, yodibe kè panidi be sibo è verauġedina Jerusalemma, kovoġidima aubainama.

⁶ “Dabudine taugu è naġonaġona Damaskasma be suaratopu nama yana marae waimatakanikaninama yai raġantenaġe be yai yana kwa viviroguna. ⁷ Be dabudine è beku da doġae è ravusegu da yà vaiena be bona marae ya riueguna, ‘Sol, Sol, aba aubainama kwa raraukivi gewegewegu?’ ⁸ Be taugu èi taravirena, ‘Tam aitau, Bada?’ Be tauna ya riuna, ‘Taugu Nasaret Yesunama, vutuna kwa raraukivi gewegeweguna.’ ⁹ Be aitaugħa mate kewai varorona, taudi yana a kitana, be banaga aitau mate kewai giuna bonanama nam ti kataiena. ¹⁰ Be taugu è riuna, ‘Bada, aba yà voie?’ Be tauna ya riuna, ‘Kwa midisuġu be kwa naġonaġona Damaskasma, be dabudine ta riuem da aba yau ġoanama kwa voienna.’

¹¹ “Naumeki da yau varoroma nimague a kaididi be ai doka naweguna Damaskasma, baninama yana yai matakaniġi vavasaġġana aubainama mataguma yai kupikupi da nam aba e kitana. ¹² Dabudine tauġoma isanama Ananaias ya saġġana ġarrogue. Tauna tarawatu tauvoteyeteyedima be Jius banegidima matabudi dabudi miemienidima tauna a vivivivirena. ¹³ Tauna diague ya midi be ya riueguna, ‘Tuai Sol, yodi kwai kita munaġġana!’ Be yai raġantenaġe da taugu Ananaias è kitana. ¹⁴ Dabudine tauna ya riueguna, ‘Tamatamadama adi Mamaituama ya vinem da na ġoanama kwa kataie be Banaga Didimaninama kwa kita be giu mudune kwa vaienna. ¹⁵ Baninama tam tokare tauna na matamatama banaga matabudi ġarrodie. Be tam yaba kuya kitekitedi be kuya vaivaledina, taudi kwa riuedina. ¹⁶ Be yodi nam kwai raba! Kwa midisuġu be kwa babataito. Be Yesu kwai baġa da am gewagewama e koġa poredina.’

¹⁷ “Taugu Jerusalemma è tava munaġġa be tempol nōpone è moimoiragina raġanine, taugu mata ġomigue rauboni è kitana. ¹⁸ Dabudine Bada è kita be ya riueguna, ‘Waīgħapa Jerusalem kwa gose makaie, baninama taudi tokare taugu kwa giueguna nam tai aninem.’ ¹⁹ Be taugu è paribeena, ‘Be Bada, taudi boni a kataiena da taugu tauwai sumaqemmha sinagog nōpodie è riġedi be dibure è biridina. ²⁰ Be am matamatama Stepen taudi awai gurina raġanine, taugu mate dabudi è midi be inam kauinama ēwqi aninena. Be aitaugħa Stepen tauwai gurinama adi garama è raberabedina, be yodi nam nama.’ ²¹ Dabudine Bada ya riueguna, ‘Kwa naġo! Taugu yà riuporemna madanie eteni ġarrodie.’ ”

²² Patara awai beavaie be rağanine Pol nama ya riuriuna, dabudine taudi a yogo be a riuna, “Ko nawetege be koi guri!”
²³ Dabudine taudi ma yogoyogodi adi garama ai porağā be popokau gunume ai yaraiedina.

²⁴ Vutuna aubainama tori matanama na tauirağāma ya riuedi da taudi sibo Pol a sağena vada nopone, be dabudine tauna sibo a kwapi be ai taravirevire da aba aubainama banaga tauna nama a raraugoe. ²⁵ Dabudine taudi Pol a panina kwapunama aubainama. Inam rağanine Pol tauığara adi badama ya riuena, “Taumi ami tarawatuma nama e riuriuem da Rom baneginama nam ko etare be ko kwapi yababe, bo?”

²⁶ Be tauığara adi badama inam riunama ya vaivaiena, tauna ya nağō tori matanama ġarone be ya riuena, “Tam aba kwai tubuğī? Uma Rom baneginama!” ²⁷ Dabudine tori matanama ya nağō be Pol yai taravirena, “Tam riukaua Rom banegim, bo?” Dabudine Pol ya riuna, “Ee, riukaua.” ²⁸ Be tori matanama ya riuna, “Taugu mane dosinama è boru da èi rawa-Romna.” Be Pol ya riuna, “Be taugu naumeki vutuna Rom ġomiguma.” ²⁹ Be taudi aitaüğa ġaubonağā sibo ai taravirevirena, naumeki da inam rağanine taudi a raukai gosena. Be tori matanama tauna ya naira kauana, baninama tauna Rom baneginama ya panina aubainama.

Pol Sanedrion noğodie

³⁰ Pomainama tori matanama ya ġoeğöena sibo ya katai kauena da aba aubainama Jius banegidima Pol awai wavy. Vutuna aubainama tauna Pol ya kaipore be pirisi adi babadama be Sanedrion ya rawategeidina boru aubainama. Yodibe Pol ya riue ya dobi da noğodie ya midina.

23

¹ Pol Sanedrion babadidima ya kitadididi be ya riuna, “Yau bana, taugu rağan matabuna aninoğotinama Mamaitua matane è mia kauana.”

² Dabudine pirisi sağasağā vavasağinama Ananaias aitaüğa Pol diane midimididima tenağā ya riuena da Pol mudunama sibo nimanama tabane ya riğana. ³ Dabudine Pol pirisi sağasağā vavasağinama ya riuena, “Mamaitua tam tokare e riğamna, tam banaga kaikaiyovumma. Tam yodi taugu kwai tarapirieguna tarawatu ruvane, be tam mate tarawatu kwawai kati kotovina, baninama tam kuya riuedina da ta riğaguna.” ⁴ Be aitaüğa dabudi a midimidina Pol a riuena, “Tam Mamaitua na pirisima sağasağā vavasağinama kwa ġasiğasie, bo?” ⁵ Be Pol ya riuna, “Yau bana, baninama taugu nam e kataiena da tauna

gode pirisi saḡasaḡa vavasaḡinama. Be taugu è kataiena da girugiruminama poranama nopone a girumina umanama: ‘Nam giu gewagewane am banagama adi badama kwa riue.’”

⁶ Be Pol e kitedina be banaga ġesaudima Sadisi be ġesaudima Parisi, vutuna aubainama tauna bonanama do-sine Sanedrion nopone ya riuna, “Yau bana, taugu Parisi tenaḡa be Parisi damnama nopone. Taugu yāwai sumaḡana da banaga guriguridima gurie ta midisuḡu munaḡana, be uma waisumeġinama aubainama taumi ko etaetareguna.”

⁷ Raḡanine nama ya riuriuna, naumeki da Parisi be Sadisi waīginana ai kare munaḡena. Dabudine borue ai daberaridi be dam rabui a tubuḡana. ⁸ Baninama Sadisi a riuriuna da banaga nam tokare gurie ta midisuḡu munaḡa, be nam deḡo anea bo arua. Be Parisi a riuriuna da uma yabedima matabudi inam ta kenakenana. ⁹ Dabudine banaga yogo yabayababa ai karea. Be tarawatu tauwai katakataidima Parisi damnama nopone taudi Pol murine a midi be a riuna, “Tauma uma baneginama ġarone nam aba gewagewanama ke banavina, agunai riukaua da tauna anea bo arua ġarone ya giuna.” ¹⁰ Naumeki da waīginana dabudine ya moramoraba guratana, be tori matanama nuanama ya rovona deḡoda Pol tima sika waiyamoni. Vutuna aubainama tauna na tauiḡarama ya riuedina da taudi a dobi a naḡo be ġarodie Pol a soru wiriti da adi vadae a nawena.

¹¹ Inam kupine Bada Pol diane ya midi be ya riuna, “Nam kwa naira! Nema uma dabudine Jerusalemma kwawai matemateguna, nama tokare Rom nopone kwai matemateguna.”

Pol kana kasirama a tomtomna sibo ai gurina

¹² Pomainama raḡanboiboi Jius banegidima ġesaudima Pol kana kasirama a tom be taudi a saugawapa munaḡedina da nam aba ta kani bo ta tego naumeki da taudi Pol tai gurina. ¹³ Uma saugawapanama nopone banaga sievidima 40 be ġesaudima mate. ¹⁴ Taudi a naḡo pirisi adi babadama be meagai babadidima ġarodie be a riuna, “Tauma kè saugawapana da nam aba ka tego bo ka kani naumeki da Pol kai gurina. ¹⁵ Vutuna aubainama yodi taumi Sanedrion mate tori matanama koi baḡa da tauna sibo Pol ya riuporena ġaromie. Ko kaiyovue da ko riuna kabe taumi Pol na giuma pakanama ko katai kaue. Be raḡanine e yovoyovoḡena tauma kedae kai gurina.”

¹⁶ Be Pol ġavunama e vaiena be Jius banegidima ġesaudima Pol kana kasirama a tomtomna, naumeki da ya naḡo deḡo Pol ya miamiae be yaba matabuna a giugiedina yai varina.

¹⁷ Dabudine Pol tauīgāra adi badama tenaōa ya yokoe be ya riuena, “Uma yaraginama kwai doka nawe tori matanama īgarone. Be tauna aba e riuena.”

¹⁸ Naumeki inam yaraginama yai doka nawena tori matanama īgarone be ya riuena, “Dibura tauōminama Pol ya yokoegu be yai baīgagu da uma yaraginama è saīgena īgarome, baninama tauna am riuma īgarone aubainama.”¹⁹ Dabudine tori matanama yaraginama nimane ya kaididi be yai doka nawe īgavoe be yai taravirena, “Aba riuna, be kwa riuegu!”²⁰ Naumeki da tauna ya riuna, “Jius banegidima taudi Pol kana kasirama a tomna da pomai tai baīgam da tam Pol kabe kwa nawe Sanedrion īgarodie, na giuma pakanama katai kauenama aubainama. Be inam matabuna kaiyovu,²¹ baninama taudi banaga 40 be īgesaudima mate a saugawapa da nam aba ta tego bo ta kani naumeki da Pol tai gurina. Be yodi taudi tabodabodama be tam bonamma ta raberabena. Vutuna aubainama tam nam Pol kwa riupore!”

²² Naumeki da tori matanama yaraga ya riupore be ya riuena, “Nam aitau kwa riue da uma giunama tam taugu kuya riueguna, kuya vaie?”

Pol a nawena Seseriana

²³ Naumeki da uma kauinama murine tori matanama tauīgāra babadidima rabui ya yokoedi be ya riuedina, “Taumi tauīgāra matabudi 200, hosi taugerunama 70 be kea banegidima 200 ko ragau wainonoōga da mateōga 9 okoroki kupie ko naīgona Seseriana.²⁴ Be hosi ko paōo da Pol debane koi geru be ko bobodi kauenama naumeki da primia Filiks īgarone.”²⁵ Be dabudine primia na letama ya girumi be umanama ya riuna:

²⁶ “Taugu Klaudias Lisias, tam primia saīgasāga vavasaīgimma Filiks, yāwai kaiwemna!

²⁷ Jius banegidima uma tauōmina a vunuōi be īgaubonaōga sibo ai gurina, be taugu yau tauīgarama mate kè dobi be kè kwayedina, baninama taugu è vaiena da tauna Rom baneginama aubainama.²⁸ Be taugu è īgoēgoena sibo è kataienia da aba aubainama taudi tauna awai wavu, vutuna aubainama taugu Pol è saīgena Sanedrion noīgodie.²⁹ Taugu è banavina da taudi adi voiama be adi tarawatuma aubainama Pol tawai wavuna, be nam aiyaba i voiema da sibo ya dibura bo ya guri.³⁰ Be raīganine taugu kana kasirama a tomtomna yà vaiena be waīgapa è riupore makaiena īgarome, be tauwai wavunama mate è riuedina da taudi tam ta riuemna da aba aubainama taudi Pol tawai wavu.”

³¹ Naumeki da tauīgāra adi tori matanama aba ya riuriuedina taudi nama a voiedina. Taudi Pol kupie ai dokena naumeki da Antipatrisma. ³² Be pomainama a munaḡana adi gabue be hosi taugerunama taudiḡa Pol mate a naḡona. ³³ Raḡanine taudi Seseriamma a tavatavana, taudi leta primia a utena, be Pol tauna ġarone a gosena. ³⁴ Dabudine primia leta ya sievi be tauna Pol yai taravire da tauna ai dobu baneginama. Dabudine e vaiena be tauna Silisia provins baneginama, ³⁵ be ya riuena, “Tam tauwai wavumma ta tava, yodibe taugu am giuma yài beavaiena.” Dabudine tauna ya riuna da Pol Herod na vadae taubodama ta rabena.

24

Pol Filiks ġarone ya etarana

¹ Raḡan 5 muridie pirisi adi badama Ananaias be meagai babadidima ġesaudima be giu taukai viranama isanama Tetulas a dobi a naḡona Seseriamma. Dabudine taudi adi waiwavuma primia Filiks ġarone ai maḡataridina. ² Dabudi Pol a yokosaġe vadae be Tetulas na waiwavuma yai karena Filiks noġone be ya riuna,

“Tauma am subae kēi nuaverevere guratana raḡan matabuna tam am waibadae, be yaba matabudi veredima a tubutubuġħana uma dobunama aniwai verenama aubainama. ³ Tauma uma kauidima kawai aninedina dobu matabuna be raḡan matabudi. Be nuamaima tabutabune tam primia Filiks kawai nuavereverena ġarome. ⁴ Taugu nam ama ġoegoena da tam am suarama yài yakare, vutuna aubainama yàwai baġamna da kivimma sibo ya vere da ama giuma sibo kuya vaiena. ⁵ Tauma uma baneginama kē banavina da tauna gewagewa tauwai tubuġinama, tauna dobu matabuna nopolie Jius banegidima e kawakawa nuaġoreġoredi be iġara tawai tubuġidina. Tauna Nasaretma raudune-kaikaiyovu-damnama* adi badama. ⁶ Be tauna tempol mate ya kawa miramirana, vutuna aubainama tauma kē vunuġina.† ⁷⁻⁸ Be tamḡa kwai taravirevire da dabudi riukaua kwa banavi da tauna aba aubainama kē vunuġi.”⁹ Be Jius banegidima dabudine turedima a kaisagu be a riuna, “Uma giudima matabudi riukaua.”

Pol na gudutarama Filiks ġarone

* **24:5:** ‘Raudune-kaikaiyovu-damnama’ inam sect. † **24:6:** Gurik baibol ġesaudima 6b-8a mate ta kenakenana. Inam versedima taudi umanama: 6b Tauma ka ġoegoena ma tarawatuma na ruvae sibo ke etarena. 7 Be tori matanama tauna isanama Lisijs, tauna na tauīgāramma mate a tava be tauma a rawabakobakokomai be nimamaie a kwayamaina. 8a Be Lisijs ya riuna, “Aitauġa Pol tauwai wavunama, taudi tam Filiks noġome ta tava da ta midimidi be tam Pol kwai etarena”.

¹⁰ Naumeki da primia nimanama ya kaisūgu da Pol sibo ya giuna. Be Pol ya riuna, “Taugu è kataiena da tam modi da modi tam uma dobunama banegidima adi tauwai tarapirima, vutuna aubainama taugu nuaguma vereverene yau gudutarama tam noğome yà voiena. ¹¹ Tokare kwa banavina da riukaua da taugu yodi rağan 12 a kovina, è sağà è nağona Jerusalemma, raudune aubainama. ¹² Be tauwai wavuguma nam ti kitagu da taugu aitau mate tempol nopone kèi kawa riuriu, bo aitau banegidima è kawa nopogedegederidina sinagog bo meagai nopodie. ¹³ Be taudi nam teneteneğina da awai wavuguna, inam wavunama banidima yodi tai mağataridi.

¹⁴ “Be uma yàwai mağatarimina da tamatamamaima adi Mamaituama taugu yàwai taunoyena, be yau waitau noyama yawasana kedanama taudi tawai isana raudune-kaiyovu. Taugu yaba matabudi tarawatu be peroveta a girugirumidina nopodie yàwai sumağedina. ¹⁵ Be taugu Mamaitua yàwai sumağena maika taudi, da tokare banaga veredi be gewegewedima matabudi tokare gurie ta midisügu munağana. ¹⁶ Vutuna aubainama taugu rağan patapatanama yà rarau rubuna da yau noğotama Mamaitua be banaga ğarodie e vere kauana.

¹⁷ “Be modi toitoi muridie, taugu yodi Jerusalemma è tavana da yau banagama waikaruwağewağedima yà sagudina, be taugu puyo Mamaitua ğarone yà voiena. ¹⁸ Taugu tempol nopone yau waikaiwama puyonama è voivoie be tauwai wavuguma a banaviguna. Be taugu nam banaga e kawakawa nuağoreğoredi bo iğara ewai tubuğidina. ¹⁹ Rağanine yau puyoma è voivoiedina, dabudine Jius banegidima Eisia provins nopone miemienidima, taudi a kitakitaguna. Be dabudine aba gewagewanama e voiena, naumeki da taudi sibo yodi uma dobudine a dobi be ai wavuguna. ²⁰ Be uma banegidima kaua ta midimidina kwai taraviredi taudi aba gewagewanama ğarogue a banavi, taugu sanedrion noğodie è midimidina rağanine. ²¹ Agunai taugu uma riunama ğarodie è vatona, aubainama tawai wavuguna: ‘Taugu yàwai sumağana da banaga guriguridima tokare gurie ta midisügu munağana, be uma waisumeğinama aubainama, taumi ko etaetareguna.’”

²² Be Filiks Pol na kaba waisumağama kedanama ya kataiena, aubainama tauna etara na rağanima ya taurie be ya riuna, “Rağanine tori matanama Lisias tauna e dobi, yodibe ami etarama taugu yài kare munağena.” ²³ Dabudine Filiks tori matanama ya riuena da tauna Pol dibure sibo ya boru be ya riuena, “Kwa voie da tauna nuanama e

verena. Değoda na banagama vakitanama bo na waiyabama ta verauğena, nam kwai ġakedi!"

Pol Filiks be Drusila noğodie

²⁴ Naumeki da rağan bisanama be Filiks na visarama Drusila mate a tavana, be na visarama tauna Jius banegina. Tauna Pol na riuma ya riuporena. Baninama tauna ya ġoegoena sibo waisumaġa Yesu Tauwai yawasana ġarone kedanama Pol ya giue be sibo ya vaiena. ²⁵ Naumeki da Pol giu yai kare da ya giugiuna. Be rağanine tauna didimana, rabe munaġa be rağan damonama na waitarapirima ya giugiuedina, dabudine Filiks ya naira be ya riuna, "Yodi naumeki, kwa naġo be wari rağan yau rağanima ya paġo kauena, tokare ya riu munaġem da kwa verau be tai giuna." ²⁶ Be rağanine Filiks giu ya vaivaiena maika, tauna nopone umanama yawai nuanoġonogotana, "Pol agunai ya gwaya da mane e utegu be dibura e dobi porena." Vutuna aubainama tauna rağan matabuna Pol mate awai giuna.

²⁷ Be rağanine modi rabui a kovina, naumeki da Filiks e paiyanama tauġoma isanama Porikius Festas ya saġana. Be Filiks tauna Jius banegidima anitai nuavereveredima aubainama Pol dibure ya goseporena.

25

Pol Festas noġone ai wavuna

¹ Festas Seseriamma ya tava be rağan rabuiteġa muridie tauna ya saġa be ya naġona Jerusalemma. ² Be dabudine pirisi adi babada be Jius babadidima taudi Festas ġarone a verau be adi waiwavuma Pol ġarone ai maġatarina. ³ Naumeki da taudi Festas ai baġana da adi ġoanama sibo ya voiena, da Pol sibo ya saġena Jerusalemma. Nama a riuna, baninama taudi sibo a ġoegoena da kedae a bodama be Pol sibo ai gurina. ⁴ Be Festas ya riuna, "Ibewa, Pol tauna Seseriamma e miana be taugu rağan ġaubonaġa be ya dobi ya naġona, ⁵ be taumi ami babadama ti ġoena, naumeki taudi mate sibo kē naġo be nove dabudine adi waiwavuma inam tauġominama ġarone sibo a voiena, değoda tauna aba ima voivoia waigewa."

⁶ Festas dobudine ya miana rağan 8 bo 10 nama, be muridie ya dobi be ya naġona Seseriamma. Be pomainama tauna etara yai kare be na tauiġarama ya riuedina da Pol sibo a verauğena ġarone. ⁷ Be rağanine Pol ya tavatavana, dabudine Jius banegidima aitaġa Jerusalemma yovoyovodima Pol a midi kwaviviro be ai wavu vavasaġena. Be inam waiwavudima nam banibiribiridi. ⁸ Dabudine Pol ya gudutara

munaġe be ya riuna, “Taugu nam aba gewagewanama e voiena Jius adi tarawatuma ġarone, be tempol ġarone bo Sisa ġarone.”

⁹ Be Festas ya ġoegoena sibo Jius adi ġoanama ya voiena. Vutuna aubainama tauna Pol yai taravirena, “Tam Jerusalem naġonama kwa ġoegħoe bo ibewa? Be dabudine sibo uma kauidima è etaremna.” ¹⁰ Be Pol ya paribeena, “Uma vadane yodi ya midimidina, vutuna tauna Sisa na vadama anietara aubainama. Be uma gabunama vutuna anietara gabunama be dabudine taugu kwa etareguna. Tam kuya katai kaueguna da taugu nam aba gewagewanama Jius ġarodie e voiena. ¹¹ Deġoda aiyaba gewagewa vavasaġinama e voie be waiguriguma ti ġoena, naumeki da sibo ai gurguna. Be deġoda uma yabedima matabudi tawai wavuguna kaiyovu, naumeki da nam aitau e riuporegu da noa banegidima ġarodie be tai gurigu. Taugu ya ġoegoena Sisa e etareguna.”

¹² Dabudine Festas na banagama mate oga a taraġi be ya paribeena umanama, “Tam Sisa kuya ġoena e etaremna aubainama, naumeki da kwa naġona meagai dosinama Romma, Sisa ġarone.”

Festas be Agripa

¹³ Raġan bisanama muridie guyau Agripa be Benis* a tavana Seseriam, Festas waikaiwenama aubainama.

¹⁴ Dabudine a mia guratana be inam raġanine Festas, Pol na kauama guyau yai varie be ya riuna, “Raġanine Filiks ya naġonaġona, tauna tauġoma tenaġħana dibure ya gose porena. ¹⁵ Be taugu raġanine Jerusalem è naġonaġona, dabudine pirisi adi babada be Jius babadidima taudi tauna awai wavu be a ġoegoena da sibo ai gurina. ¹⁶ Be taugu è riuedina: Tauma Rom banegimaima nam nama ama vaivai da banaga tauwai wavunama nimedie ka boru yababe. Tauna awai wavuna aubainama, noġone tauwai wavunama noġodie na gudutaraġħa e voia dokena.

¹⁷ “Be raġanine taudi uma dabudine a dobina, taugu nam e taivareġħa, naumeki da pomainama taugu etara ēi karena. Vutuna aubainama yau taunoyama è riuedi da taudi sibo Pol a saġena ġarogue. ¹⁸ Be raġanine tauwai wavunama a midisuġġu giu aubainama, be taugu ēi noġotana kabe aba gewagewanama Pol ġarone ta giu, be nam aba ti giuena. ¹⁹ Be taudi adi waiwavuma inam taudīgħa adi raudunema debane a giugiuna, be ġesaunama banaga isanama Yesu tauna ya

* **25:13:** Agripa isa ġominama inam ‘Herod Agripa II’, be Benis tauna nuvvunama. Be tamedima Apasol 12:1 nopone.

gurina, be Pol e riuriuna da tauna ya yawasanana.²⁰ Taugu uma kauidima è nuababağedina. Vutuna aubainama taugu èi taravirena da tauna sibo ya nağona Jerusalemma be dabudi sibo a etarena.²¹ Be Pol ya riuna da tauna e ġoeğöena Sisa e etarena uma kauidima aubaidima. Vutuna aubainama taugu uma dabudine è raberabena da sibo e riuporena Sisa ġarone.”

²² Dabudine Agripa Festas ya riuena, “Taugu mate yà ġoeğöena uma baneginama na giuma yà vaiena.” Be Festas ya paribeena, “Tam pomai tauna kwai beavaienā.”

Pol guyau Agripa noğone

²³ Pomainama Agripa be Benis a sağana kitedima yai mata veraverau vavasağana, be iğara babadidima dosidima be meagai babadidima mate. Matabudi a sağana anikaba etara gabune. Be rağanine Festas ya riuriuna, na taunoyama Pol ai doka sağena.²⁴ Be Festas ya riuna, “Guyau Agripa be taumi matabumi aitaüğa yodi uma dabudine, uma tauğominama ko kita! Jius matabudi rağan matabuna Jerusalemma be uma dabudi Seseriamma awai bağaguna da sibo uma tauğominama nam ya mia.²⁵ Be taugu è banavina da tauna nam aba gewagewanama i voiena da tauna sibo ya guri. Be Pol ya riuna da tauna e ġoeğöena Sisa e etarena. Vutuna aubainama taugu èi nuanoğonoğota da sibo è riuporena Romma.²⁶ Be taugu nam e katai kauena aba giunama sibo è girumi Sisa ġarone. Vutuna aubainama taugu è sağena taumi matabumi ġaromie be mate tam guyau Agripa ġarome. Be tài taravirevire da muriğtaugu aba sibo è kataie, yodibe sibo è girumana.²⁷ Baninama taugu è noğotina umanama: Değoda banaga nam aba gewagewanama i voiena, inam nam i verena da yà riupore yababe, be tauna e nağ Sisa ġarone etara aubainama.”

26

Pol tauna Festas be Agripa noğodie ya gudutarana

¹ Dabudine Agripa Pol ya riuena, “Tam yodi tamğta aubaimma kwa giuna.” Dabudine Pol nimanama ya kaisüğü be na gudutarama yai karea,² “Guyau Agripa, taugu nuaguma ya verena da manaka taugu tam noğome yà midi be Jius adi waiwavuma aubainama taugu yà gudutara muñağeguna.³ Taugu nuaguma ya verena, baninama tam Jius adi vaivaima be adi waiğinanama kuya katai kauedina. Vutuna aubainama taugu yàwai bağamna da tam kwai beavaia kaueguna.

⁴ “Jius matabudi a katai kaueguna yau yawasanama nema è mia bakona gomana ġaubogue da yodi. Pakane yau damma nopodie è miamiana, be muriġa è naġona Jerusalemma è miana. ⁵ Inam raġanine taugu Jerusalemma è miamiana, taudi a kataiegħu da taugu Parisi. Be Parisi adi tarawatuma ya bagibagi kauana. Be deġoda Jius taudi tima ġoe, naumeki da taudi ta riuemna da yau giumenta inam riukaua. ⁶ Be yodi taumi ko etaetareguna, baninama taugu nopoguma e riuriuna da Mamaitua yaba matabudi e voivoiedina tamata-madama ġarodie ya sausaugana nama. ⁷ Uma sauginama tauda dà damma sievinama 12 nopodima ya riuriuna da sibo ya tubuġa be a kitana. Vutuna aubainama taudi kupi da suara awai taunoyana Mamaitua ġarone. Be guyau, taugu yau waismagħama inam sauginama ġarone, vutuna aubainama Jius banegidima tawai wavuguna. ⁸ Abi aubainama taumi ko noġongoġota bekubeku da Mamaitua nam teneteneġina da banaga guriguridima e kawa midisūġu munaġedi?

⁹ “Taugu mate dokane nama è noġoti da Nasaret Yesunama isanama waiġavienama ya vere kauana. ¹⁰ Be inam kauinama nama Jerusalemma è voiana. Taugu pirisi adi babadama isedie tauwai sumaġa è vunuġidi be dibure è biridina. Be raġanine taudi waiguridima aubainama, taugu raġan matabuna èwai aninedina. ¹¹ Taugu raġan matabudi è naġo sinagognopodiġa be tauwai sumaġa è kovoġidi be è segeridi da taudi Yesu a kunukunurena. Taugu nuagħuma yai medi kauana ġarodie aubainama è naġona waridobue, meagħi dosidie da sibo è banavidi be è kovoġidina.

¹² “Raġan tenaġa taugu è naġonaġona Damaskasma, pirisi adi babadama isedie be adi wairewapanae. ¹³ Be suaratopunama be taugu marae yana waimatakanikani vavasaġinama è kitana, nam maika suara. Be taugu yau varoroma mate yai yana kwa viviromaina. ¹⁴ Dabudine tauma matabumai këbeku da doġae këravusemaina be taugu bona è vaie be Hibru bonane ya riueguna, ‘Sol, Sol, abi aubainama kwa raraukivi gewegewegu? Tam nam teneteneġina da taugu kwai iġara ġaregu.’ ¹⁵ Be taugu èi taravirena, ‘Tam aitau, Bada?’ Be tauna ya riuna, ‘Taugu Yesu, vutuna kwa raraukivi gewegeweguna. ¹⁶ Be yodi kwa midisūġu! Taugu è maġatarana ġarome, baninama taugu è vinemna da tam yau taunoyama be abi matame kuya kitakitana kwai matematena, be mate yaba ġesaudima muriġa yài kataimna. ¹⁷ Taugu yà riuporemna Jius be eteni banegidima ġarodie, be taugu ya midi ġaġarimna. Tam yà riuporemna ¹⁸ da matedima kwa rawakaya da taudi tadi-

wanawana ta gose be nuedima ta vitaredina yanae; inam baninama Seitan na rewapanama ta gose be nuedima ta vitaredina Mamaitua ġarone. Baninama deġoda taudi taugu tai sumaġġeguna, naumeki da Mamaitua adi gewagewama e noġota poredi be tokare marae adi buderima e utedina, Mamaitua na banagama vinevinedima mate.'

¹⁹ "Vutuna aubainama guyau, taugu mara kauidima a maġamaġatarana nam e rawaġaiġaedina, ²⁰ be taugu noġone Damaskasma è rauguguyana, muriġa Jerusalem, Judia dobunama matabuna be eteni mate ġarodie da taudi sibo nuedima a vitaredina Mamaitua ġarone. Be taudi adi voiama veredie sibo ai maġatara da taudi nuedima a vitaredina. ²¹ Baninama uma kauidima aubaidima Jius banegidima tempol nopone a vunuġigu be a ġoeġoena sibo ai guriguna. ²² Be Mamaitua ya kaisaguguna naumeki da yodi, vutuna aubainama taugu yodi umanema yà midimidi be banaga dosidi be banaga ġoma ġarodie yà rarauguguyana. Be taugu yaba matabuna yà giugiuena, inam matabuna peroveta be Mousis mudugabudima a riuna da sibo aba ya tubuġana. ²³ Be tauda da raġanine uma kauidima kaite a tubuġana, Tauwai yawasana yai nuatoitoi be tauna vutuna gurie ya midisuġu doka be yana ya rauguguyena na banagama be eteni ġarodie."

²⁴ Inam dabudine Pol yaġoro ya gudugudutarana, be Festas bonanama dosine ya riuna, "Pol, tam kuya buana! Am kataima dosinama ya rawabuamna!" ²⁵ Be Pol ya riuna, "Ibewa, bada Festas! Taugu nam e buana. Yaba matabuna yà giugiuena inam riukaua be yà giugiu kauana. ²⁶ Be guyau uma kauidima matabudi tauna ya kataiedina, vutuna aubainama taugu yà giu ġomena be nam yà naira. Be taugu yà noġonoġotadidina da uma kauidima matabudi guyau ya kataiedina, baninama nam ai kaua moisirie i tubuġana. ²⁷ Guyau Agripa, tam peroveta kwai sumaġedi bo ibewa? Taugu è kataiena tam kwawai sumaġedina."

²⁸ Dabudine Agripa Pol ya riuena, "Tam kwa voivoieguna ġaubonaġa da taugu yà rawa-Kuristenna." ²⁹ Be Pol ya riuna, "Taugu yà moimoiragina Mamaitua ġarone da raġan ġaubonaġa bo tokare, nam tamġa be matabumi aitauġa uma dabudine manaka kowai beavaieguna, taumi tokare taugu maika ko tubuġana, be nam uma seininama tunigue mate."

³⁰ Dabudine guyau, primia, Benis be aitauġa dabudi mate a miamiana, matabudi a midisuġuna. ³¹ Taudi anietara gabunama a gose pore be adi banagama mate a giu be a riuna, "Uma baneginama nam aba gewagewanama i voiena da sibo ai guri bo a pani." ³² Be Agripa Festas ya riuena,

“Tauda uma baneginama sibo tè kaipore da ya naǵona, be nam nama tà voie, baninama tauna e ġoeġoena da Sisa sibo ya etarena.”

27

Pol e naǵonaǵona Romma

¹ Raǵanine taudi a riuna da tauma sibo kè naǵona Italima, taudi Pol be dibura banegidima ġesaudima iġara banegidima adi badama isanama Julias nimane a biridina. Julias tauna iġeīgeridima adi debama awai isana ‘Augastas Deba’ adi badama. ² Tauma Adramitium banegidima adi wagama, ġaubonaġa sibo ya naǵona geresa meagaidima, matabudi Eisia provinsnama nōpodiġa, be tauma kè geru da kè naǵona. Be Aristakas tauna Tesalonaika baneginama Masedonia provins nōpone, tauna mate kè naǵona.

³ Pomainama tauma Saidonma kè ġotana. Be Julias tauna kivinama ya vere kauana Pol ġarone aubainama, yai anine da Pol na banagama ġarodie sibo ya naǵona, da taudi sibo tauna a rabena. ⁴ Naumeki da dobunama kè gose be kukakukae kè naǵona Saipras bonabona taurinaġa, baninama sive dosinama ya miditommaina aubainama. ⁵ Raǵanine tauma Silisia be Pampilia egasidima kè davudavuna, naumeki da tauma Mirama kè ġotana Lisia provins nōpone. ⁶ Dabudine tauiġara adi badama tauna Alexandria waganama ya banavina, tauna ya naǵonaǵona Italima. Vutuna aubainama tauma wagane yai gerumaina.

⁷ Raǵan toitoi nōpodie tauma mamareġa kè naǵonaǵona, be Knidusma tavanama ġaromaie ya piripiri kauana. Tauma deġo yauwanine kè naǵonaǵona, sive nam i aninemaina. Vutuna aubainama tauma Kret noǵonāġa kè naǵona Salmone dianaġa. ⁸ Tauma geresaġa kè naǵona ya bagibagi kauana, naumeki da dobu isanama Wopu-Waimatakanikaninama. Uma dobunama inam Lasea meagainama diane. ⁹ Raǵaninama toitoi kaite ai kovidina be widina raǵaninama mate ya kovina. Vutuna aubainama uma vaǵainama yai nuanainairana be Pol nuedima ya boru ¹⁰ be ya riuna, “Yau bana! Taugu ē kitana tauda dà vaǵaima tokare e gewagewana, be waga, taragai be tauda dà yawasanama mate ta kawa gewegewedina.” ¹¹ Be tauiġara adi badama tauna Pol aba ya giugiuena ya vaia tuaġiae be yabiyabi taupaǵona be waga taupakinama adi giuma yai muriwatandina. ¹² Be uma dobunama nam teneteneġina da waga sibo ya midi, baninama sive ya moraba kauana. Vutuna aubainama banaga toitoi a riuna da uma dobunama kè gose be tauma sibo kè naǵo ġomana Piniksma, be dabudine

tauma kè mia da sive rağaninama sibo ya kovina. Piniks inam meagai Kret bonabonane, be dabudine waga adi kaba midima. Piniks inam suara na kaba yovoma yauwanine.

Kaibitibiti yai karena

¹³ Rağanine sive ġaubonama ya manimaninina taudi ai noğotana yodi kabe rağan verenama nağō aubainama. Vutuna aubainama anika a soru tavaite be kukakukae Kret geresinağā a nağona. ¹⁴ Naumeki da a nağō nam dauna be kaibitibiti Kret yauwanine yai karena. ¹⁵ Be kaibitibiti waga ya pağō be tauma nam teneteneğīna da sive matane sibo kè nağō. Vutuna aubainama yabiyabi kè gose be sive taunağā waga ya suve be ya nawena.

¹⁶ Be rağanine tauma bonabona isanama Klauda kewai murina, inam rağanine taudi ġarodie ya bagibagi kauana da dinci sibo a soru tavaite. ¹⁷ Be rağanine a sorusoru tavaitena taudi waga bogane a panina.* Be muriğā taudi a nairana değoda waga Sirtis kiredima debedie ima raukaisağā. Vutuna aubainama taudi kuka dosinama a kaipore be taudi a tenam nağona.

¹⁸ Kaibitibiti ya moramoraba guratana aubainama, pomainama taragai waga nopone be ai porağā dobiğedina. ¹⁹ Be rağan aniwai rabuiteğane taudi waga purepuredim a porağā dobiğedina. ²⁰ Be inam rağandima toitoi nopolie tauma nam suara bo kipora ke kita rubudina, be kaibitibiti ya moramoraba vavasağana, naumeki da tauma ama noğotama ya kovina da nam tokare ka yawasana.

²¹ Banaga rağaninama daudaunama wagae a miamia watanana, be nam ti kani rubuna, dabudine Pol noğodie ya midisüğü be ya riuna, “Yau bana! Taumi taugu riuguma sibo koya pağona, taugu è riuemina da tauda nam sibo Kret tè gose. Inam rağanine tokare nam gewagewa te banavi bo taragai te kawa gewegewedi. ²² Be yodi ya riuriuemina da taumi debemima e torana, baninama nam aitau tokare kwa guri, be waga taunağā tokare e kawa gewagewana. ²³ Baninama kupie Mamaitua, vutuna ġaronama taugu be yawai yaragena, tauna na aneama diague ya midi ²⁴ be ya riueguna, ‘Pol, nam kwa naira! Tam tokare Sisa noğone kwa midina, be Mamaitua aitauğā tam mate ko nağonağona adi yawasanama ya utemna.’ ²⁵ Vutuna aubainama yau bana, debemima e torana, baninama taugu Mamaitua yáwai sumağena da yaba matabudi ya riuriueguna, nama ta tubuğana. ²⁶ Be tauda tokare wari bonabonae kirae tà raukaisağana.”

* **27:17:** Uma riunama baninama ġesau inam: Waga dosinama a pani kwavivirona, baninama ima nuabida nairinama.

Waga kirae ya raukaisaḡana

²⁷ Kupi aniwai 14 nama tauma yaḡoro Adria egasine kè tenatenamna. Be kipi poune nama waga banegidima awai noḡotana kabe gerese kè tavatava. ²⁸ Vutuna aubainama taudi yeku tai panipaninama a taikuruvi, be upa a ruva da doḡa na madanima 36 mitas. Be a naḡo ḡaubonaḡa be a ruva munaḡe da doḡa na madanima 27 mitas. ²⁹ Dabudine ta kitana be doḡa maida maida ya tavatavana, aubainama taudi a nairana, deḡoda kira debedie tima raukaisaḡa. Vutuna aubainama taudi anika 4 waga murine a taikuruvidi be a moimoiragina da raḡan sibo ya tomna. ³⁰ Dabudine waga banegidima taudi dingi a boru dobiḡena da taudi sibo naira a naḡona. Vutuna aubainama taudi awai kaikaiyovuna kabe taudi waga isune anika ḡesaudima kabe ta biridi. ³¹ Dabudine Pol tauīḡara be adi badama ya riuedina, “Deḡoda noa banegidima nam wagae ta mia, taumi nam tokare ko yawasana.” ³² Dabudine tauīḡara dingi barawinama a douraka be topae ya ravusena.

³³ Naumeki da raḡan ya tomtomna Pol banaga matabudi ya riuedina da sibo a kani. Tauna ya riuna, “Taumi naira ya kauemi da raḡan 14 a kovina taumi nam aiyaba ko kani rubuna. ³⁴ Yodi ya riuriu vavasaḡemina da kani ko kani, aniyawasana aubainama. Nam aitau tokare gewagewa ḡaubonama ko banavi rubu.” ³⁵ Umanama ya giugiu kovina, naumeki da buredi ya paḡo be matabudi noḡodie Mamaitua yai kaiwe be ya giva da kaninama yai karea. ³⁶ Dabudine banaga matabudi nuedima ya tora be taudi mate a kanina. ³⁷ Be inam dabudine banaga matabumai sievaima 276. ³⁸ Raḡanine taudi matabudi a kani siauana, murine witi baikidima topae ai poraḡa be waga a taitekana.

³⁹ Naumeki da raḡan ya tompore be taudi dobu a kita nuababaḡena, be taudi bei ḡaubonama ma gimorina a kitana. Dabudine taudi a ḡoeḡoena sibo a raurubu da waga gerese a tavaitena. ⁴⁰ Taudi anika taidima a dourakedi da egasie a goṣaḡa be yabiyabi taidima mate a dourakedi be kuka ḡaubonama waga noḡone a kaisuḡu da sive matane ai midirina. Naumeki da taudi geresa aubainama a naḡona. ⁴¹ Be waga kira ya riḡedi da debane ya raukaisaḡana be waga noḡonama ya rausane da nam i dagudagu munaḡana. Be waga murinama rabama yai mia mutuna.

⁴² Dabudine tauiraḡa adi ogama a taragi da dibura banegidima matabudi sibo ai guridina, baninama taudi tima yakanaḡo be naira tima naḡo aubainama. ⁴³ Be tauīḡara adi badama tauna nam Pol waigurinama i ḡoena. Vutuna aubainama inam ognama a tarataraḡina ya riutuaḡaiedina.

Taudi aitaugā yakeyakedima ya riuedi da taudi sibo a poti doka da a yaka nağona gerese.⁴⁴ Be banaga ġesaudima yaka nam katakataidi taudi waga debane kaitupo a ragaudi be kaitupo debedie a tenam nağona gerese. Umanama kauine banaga matabudi gerese a tava rovo be a yawasanana.

28

Taudi Malta bonabonane

¹ Tauma matabumai yawayawasanimaima gerese kè tavana rağanine, dabudi tauma kè kataie da uma bonabonama isanama Malta. ² Dabudi bonabona banegidima kividima ya vere kauana. Taudi a yokoemai ġarodie be kai a suvena, baninama kusana be tururu aubainama.

³ Pol kai pokidima ya ragaudi be kai matane ya biribiridi be kai poyanama sarama ya kara waidobi be Pol nimanama ya kaputina. ⁴ Rağanine bonabona banegidima ta kitana be Pol nimane mota ya dawedawena, taudiġa adi banagama mate ai giu vivivira be a riuna, “Uma tauğominama agunai banaga tauwai guridima. Tauna egasie nam i gurina aubainama, yodi Dike* biwa e pağopağona da ei gurina.” ⁵ Pol nimane sarama ya rawapairi be kai matane ya nağona. Be mota nam Pol nema i bakena. ⁶ Dabudine banaga awai rabana kabe tauna nimanama e sasana bo e beku be e guri, be ai raba rereġa be a kita da Pol ġarone nam aba i tubuğana. Vutuna aubainama taudi nuedima a vitare be a riuna, “Tauna agunai mamaitua.”

⁷ Deġo kè miamiana diedie bonabona kana badama isanama Publias, tauna na dobuma. Tauna ya riuemai da na vadae kè miana. Be tauma dabudine kè miana rağan rabuiteġa, be tauna kivinama ya vere kaua be ya rabe kauemainna. ⁸ Be tamanama tauna ya sida kaua be vadae ya kenakenana. Tauna poyapoya be dibukosina ya pağona. Dabudine Pol ya nağona kitanama aubainama, naumeki da ya moiragi be nimanama tauna debane ya biridi be yai yawasanina. ⁹ Rağanine umanama kauinama ya tubutubuğana, inam bonabonane banaga sidesidedima matabudi a tava be a yawasanana. ¹⁰ Be taudi puyo toitoi a utemainna, be tauma aba kè ġoeġoedina matabudi wagae a biridina vaġai aubainama.

Maltama be a nağona Romma

* **28:4:** Dike inam Gurik banegidima adi bariawama waivinama. Tauna biwa taupağonama.

¹¹ Nawaravi rabuiteğä muridie tauma Alexandria wagana ma isanama Dioskuros[†] ragane kè geruna. Uma wagana ma tauna kaibitibiti rağaninama aubainama bonabonae ya midi watanana naumeki da kaibitibiti ya kovina. ¹² Tauma Sirakusma kè góta be dabudine kè miana rağan rabuiteğä. ¹³ Dabudine kè kwavivirona da Regiumma kè tavana. Be pomainama sive egasie be ya tavana, vutuna aubainama mainokomğonama tauma Puteolima kè tavana. ¹⁴ Inam dabudine tauma tauwai sumağä gesaudima kè bavidina, be taudi ai bağamaina da taudi mate kè miana rağan matabudi 7. Be muriğä tauma kè nağona Romma.

¹⁵ Tauwai sumağä ama kaba verauma riunama a vaiena, aubainama taudi meagai Porum-API be Tres-Tabene paratinama a yovona verau bodebodemaima aubainama. Be rağanine Pol taudi ya kitekitedina tauna Mamaitua yai kaiwe be debanama ya torana.

¹⁶ Be rağanine tauma Romma kè tavana, taudi Pol ai anine da taunağä e miana tauiğara tenağä mate da tauna Pol e kita watanina.

Pol Romma ya rarauguguyana

¹⁷ Rağan rabuiteğä muridie Pol Jius babadidima matabudi ya riuedina da sibo a rawateğeidina. Be rağanine taudi awai rawateğeidina, dabudine Pol ya riuedina, “Yau bana! Taugu nam aba gewagewanama banaga, bo tamatamadama adi vaivaima ġarodie e kawa gewegewedina. Be yağoro taudi Jerusalemma a vunuğigu be Rom banegidima nimedie a boruguna. ¹⁸ Taudi a ġoeğoenä sibo a raukai gosegu be è nağona, baninama taudi nam aiyaba gewagewanama ġarogue ti banavina da sibo taugu è guri. ¹⁹ Be Jius banegidima taudi a riu raukosogaiğaina. Vutuna aubainama taugu è riuna da Sisa e etareguna, be nam taugu yau banagama Jius tokare yai wavudi. ²⁰ Uma kauinama noğotine taumi èi bağemi be koya tavana da ya riuriuemina. Be taugu, yaba Israel banegidima tawai rabena, vutuna è rarauguguyena aubainama seinie a paniguna.” ²¹ Be taudi a paribee be a riuna, “Nam aitau Judiağä leta i riupore ġaromaie be tam i giuemna. Bo ama banagama aitauğä a yovoyovona nam aba gewagewanama ġarome ti vato bo ti riuemina. ²² Be tauma ka ġoeğoenä da tam am noğotama kwa giuedi be tauma ka vaiedina, baninama tauma kè kataiena da banaga dobu matabuna inam raudune kedanama vaunama ta riuri tuatuağiena.”

[†] 28:11: ‘Dioskuros’ inam baribariawa rabui isedima, taudi rağarağä.

²³ Naumeki da taudi rağan a vine da airağan sibo ai rawategei munağedina. Inam rağanine banaga toitoi a tavana dego Pol na kaba miae. Inam rağaninama tabutabunama, rağanboiboi da ya nađo ravi ya tavana, Pol Mamaitua na waiguyauma ya giu kauedi be yaba matabudi yai mağataridina. Be tauna Mousis na tarawatue be peroveta adi giue ya raraubuna da Jius banegidima sibo nuedima a vitaredi be Yesu ai sumağena. ²⁴ Dabudine banaga ġesaudima Pol aba ya giugiuena, naumeki da taudi ai sumağana, be banaga ġesaudima nam ti sumağena, ²⁵ aubainama taudi Pol na giuma damonama yawai kovina rağanine, taudi a riu viravira be a nađona. Pol na giuma damonama umanama, “Arua Babau riukaua ya giuena tametamemima‡ ġarodie, rağanine peroveta Aisaia Arua Babau isane ya riuna:

²⁶ ‘Kwa nađo uma banegidima ġarodie be kwa riuedina:
Taumi tokare ko vaivaiena be nam ko kataie,
taumi ko kitakitana be nam ko kita kuae.

²⁷ Uma banegidima nuedima ya guduna. Be taudi beedima
nam timawai beavaia kauana, be taudi ai matapotana.
Taudi nama a voiana da nam aba matedie ta kita, bo beedie
ta vaie, bo nuedie ta kataie
da taudi nuedima ta vitaredi be taugu yài yawasanidi.’

²⁸⁻²⁹ Vutuna aubainama taugu yà ġoeġoemina da ko kataiena,
yodi Mamaitua uma vari verenama yawasana aubainama ya
riuporena eteni ġarodie be taudi ta vaiena.”§

³⁰ Pol dabudine ya miana modi rabui nopolie vada waiwai
maesinama nopone. Be banaga matabudi aitaugā ġarone a
veraverena vakitakanama aubainama, naumeki da tauna
yawai aninedina. ³¹ Be ma raudebatorana tauna Mamaitua
na waiguyauma ya rauguguye, be banaga toitoi Bada Yesu
Tauwai yawasana na kauama matabudi yai katakataidina.
Be nam aitau i riutuağaiena.

‡ **28:25:** Tametamedima inam ‘forefathers’. § **28:28-29:** Pol uma yabedima
ya giuguedina murine, Jius banegidima Pol na vadama a dobi pore be adi
banagama adi banagama mate ai kawa riuriuna.

Rom adi letama

Pol na waikaiwama

Kapore yau banagama Rom nopone miemienimima,

¹ Taugu Pol, Yesu Keriso na taunoyama, Mamaitua ya yokoegu be ya vinegu da taugu apasol Mamaitua varinama verenama yà rauuguguyena. ² Uma varinama verenama inam boni Mamaitua na perovetama ġarodie ya sauga be na bukama babaunama poranama nopone a girumi be e kenakenana. ³ Uma varinama verenama inam natunama dà Badama Yesu Keriso ya giuena. Tauna tubuġa ġoma yauwane, tauna Deivid natunama,* be ⁴ Arua Babau yauwane, tauna Mamaitua Natunama wairewapaninama. Nama Mamaitua yai maġataridana, baninama tauna natunama Arua na rewapanae, gurie ya midisūġu munaġana. Tauna vutuna Yesu Keriso, dà Badama. ⁵ Tauna na raukiviveree tauma apasol noyanama kē paġona, da eteni banegidima matabudi ka riuedi da taudi sibo Bada ai sumāġe be a voteyeteyena.

⁶ Be taumi mate uma damnama nopolie, baninama Mamaitua taumi ya vinemi da taumi Yesu Keriso ġaroġaronama. ⁷ Uma letanama yà girugirumina, taumi aitaugħa Rom nopone ġaromie. Mamaitua taumi yai nuapaġoemi be ya vinemi da banaga babaumima. Tamadama Mamaitua be Bada Yesu Keriso adi raukivivere be adi subama ġaromie e kenana.

Pol ya ġoena da sibo Mamaitua na damma Rom nopone ya vakitedina.

⁸ Noġone taugu yau Mamaituama yà kaiwena Yesu Kerisoe taumi matabumi aubaimima, baninama taumi ami waisumaġħama dobu matabuna banaga ta giugiuena. ⁹⁻¹⁰ Mamaitua tauna vutuna yau matamatama, da raġon matabuna taumi yau moiragie yà noġonoġotmina. Uma Mamaituanama taugu yà noyenoyena nuanuagħuma tabutabune, baninama natunama varinama verenama yà rarau guguyena. Be yodi taugu yà moimoiragina da Mamaitua na ġoena gavogavo i kenana, taugu sibo ē vakitemina. ¹¹ Taugu ē ġoe guratena da sibo ē kitemi da taugu puyo Arue sibo ē utemi da taumi sibo koyai rewapani, ¹² bo deġoda taumi be taugu dà waisumaġe sibo tèi kawa duġu vivirana.

* **1:3:** Uma baninama tauna Deivid damnama reresinama nopone ya tubuġana.

¹³ Be yà ġoegoena da taumi sibo koya kataiena da taugu taumi ġaromie veraunama èwai nuanoğonoğotena da taugu sibo è sagumi da ġaromie banaga ġesaudima sibo ai sumağana, nema eteni banegidima ġesaudima è sagudi be ai sumağana maika. Be taiparapara ya morabana aubainama nam e vakitemina. ¹⁴⁻¹⁵ Taugu yà ġoēgōe kauena da vari verenama taumi Rom ġaromie yà rauguguyena, baninama inam taugu yau noyama da banaga matabudi sibo ġarodie è rauguguyana, avedi da taudi eteni bo nam eteni, katakataidi bo nam katakataidi.

Vari verenama na wairewapanama

¹⁶ Be taugu vari verenama aubainama nam aitau tenaġa ama ninaire bo ama tunitunimayaġena, baninama inam Mamaitua na rewapanama da aitauġa tawai sumağana ei yawasanidina, noġone Jius banegidima ġarodie, be muriġa dobu ġesaudima. ¹⁷ Uma varinama verenama e riuriuedana da nema Mamaitua e vovo kaukauedana da tauna matane dà yawasanama e didimanana. Inam matabuna dà waisumaġe e voiedina. Baninama girugiruminama porane umanama a girumina, “Didimana baneginama tauna waisumaġe tokare yawasana e banavina”.

Banaga matabuda dà gewagewama

¹⁸ Mamaitua na medima marae e yovoyovona banaga matabudi aitauġa Mamaitua nam tima vivivivre be na ġoanama nam tima voivoiena ġarodie, be taudi ġarodie riukaua ta rawarawa koakoana, ¹⁹ baninama banaga matabudi Mamaitua na voiama matabuna a kataiena, baninama Mamaitua yaba ya voivoiedina tawai maġatāridana da tauna e miamiana. ²⁰ Baninama pakane be ya naġo da yodi avedi da Mamaitua e miamia moisirina be taudi yaġoro sibo a kataie da tauna e miamiana, baninama yaba matabuna ya voivoiedina, yaġoro matedie ta kitekitedina. Inam yabedima a kitedi be sibo a kataie da Mamaitua e miamiana, be na rewapanama kenakena nonoġine yaba matabuna ewai badedina. Vutuna aubainama taudi nam tokare ta gudutaraġa be teneteneġina.

²¹ Avedi da taudi Mamaitua a kataiena be yaġoro taudi nam isanama tima kaikai suġsuġuna da tauna Mamaitua, be mate nam tima waikaiwena, taudi adi noġotama ya kovi be nopodima kupi ya moġavuna. ²² Taudi ta riuriuna da taudi kabe nuauyauya banegidi, be ibewa da taudi nopodima bua ya moġavuna, ²³ baninama Mamaitua miamia nonoġinama ma neneġarina raudunenama a gosepore, be taudi kokoitau a voiedi be a rarau duneedina. Taudi kokoitau a voiedina kitedima maika banaga, kiu, musara

be musara daredaredima. Be inam yabedima matabudi waiwaikavedima Mamaitua ai gabu raupunana.

²⁴ Vutuna aubainama Mamaitua ya miatauriedi be ya voie da adi gewagewama yai rewapanana be inam gewagewanama taudi ewai badedi da tunidima tawai uta munāgedi da adi banaga mate yaba waitunimayamayağidima ta voivoiedina. ²⁵ Taudi Mamaitua na riukauama a gosepore be kaiyovu tawai kawa riukauena, be yaba Mamaitua yawai tubuğidina ta rarau duneedina, be nam tauwai tubuğinama tima rarau duneena. Tauna vutuna tà kaisuğu nonoğena. Inam riukaua!

²⁶ Vutuna aubainama Mamaitua adi gewagewae ya goseporedina. Be yodi waiwaivi adi babadama a gosağā be a nağō da adi banagama waiwaividima mate tawai kawa soğana.[†] ²⁷ Be inam nama kauinama teneğine, tautauğoma adi waiwaivima a gosedi be a nağō adi banagama tautauğomidima mate tawai kawa soğana. Naumeki da taudime tubuğidie adi kovoğama a pağona, adi voia waigewama aubainama.

²⁸ Naumeki taudi Mamaitua a gosena, vutuna aubainama Mamaitua ya miatauriedi be ya voie da adi noğotama gewegewedima yai rewapanana, be adi gewagewama taudi ei badedi da tunidima tawai uta munāgedi be adi banagama mate yaba waitunimayamayağidima ta voivoiedina. ²⁹ Taudi gewagewa be barabara matedima tabu be tabu tauvoienama banegidima. Taudi nopolima wai-gogo, gewagewa, waikwina, rauvunuğā, iğara, waiwavu kiroğā, gadoğai, nopo pikapika, inam yabedima matabudi nopolima ya moğavuna. Taudi tawai karakarakutu, ³⁰ be giu gewegewedie adi banagama tawai giuguedina, be Mamaitua tautuağaienama, be nopolima meditupo, seğara, be taudi banaga taukita tuağaiedima, be taudi yaba gewegewedima nopolide tawai tubuğidina. Be adi dosima ta rawarawa ğaiğaiedina. ³¹ Be taudi nam debedi, taudi nam waisumağā banegidi, taudi nam raunuatoi banegidi, be taudi inam biwa taupağonāma. ³² Avedi da taudi Mamaitua na tarawatuma a kataiena, da taudi aitauğā nama ta voivoiana tokare guri ta kita sağena. Be yağoro nama ta voivoiana. Be banaga gesaudima aitauğā uma yabedima tauvoiedima taudi mate adi banagama a kitedi be tawai aninedina.

2

Mamaitua na etarama

[†] **1:26:** Uma kauidima inam badara na waidigirima.

¹ Değoda tam banaga ġesaudima gewagewa ta voivoie be kwa riuriu matai ġomedina, naumeki tamġa kwa kawakawa gewagewamna, baninama tam uma yabedima mate kwa voivoiedina. Vutuna aubainama tam nam teneteneġina da kwa gudutara munaġem. ² Be tauma kē kataie da Mamaitua uma banegidima, aitaugħa uma yabedima nama ta voivoiedina taudi tokare e kovoġidina. Be tauna na etarama inam riukaua. ³ Yau tura, tam banaga ġesaudima gewagewa ta voivoie be kwa saġasaġaidina, be tam mate uma yabedima kwa voivoiedina. Tam kwa noġonogötina tokare Mamaitua na kovoġama nam kwa paġo, bo? ⁴ Tam Mamaitua na kiviverema kuya kitatuaġai, bo? Mamaitua sibo ya kovoġimna, be tauna kivinama ya verena aubainama raġan ewai rauriена da tam am noġotama kwa vitarena. Vutuna tam nam ku kataie, bo?

⁵ Be baninama tam am nopoladoma be nopolome nam kuma kuvekuvesana, aubainama Mamaitua na medima ġarome kwawai potona na medima raġanine. Inam raġanine Mamaitua na kovoġama riuriukauinama ei maġatarina. ⁶ Tauna banaga tenatenaġaġa aba a voivoiedina, ruvane nama tokare e utedina. ⁷ Aitaugħa raġan matabuna Mamaitua na ġoanama ta voivoie, be uma kauidima, neneġara, vivira, be yawasana kenakena nonoġinama ta wanewanedina, taudi tokare yawasana kenakena nonoġinama e utedina. ⁸ Be banaga ġesaudima, taudiġa adi ġoanama ta voivoiedina, taudi inam riukaua ta tuaġaiedi be gewagewa kededima tawai muriwatanedina, taudi tokare medi be kovoġa ta banavidina. ⁹ Piripiri be nuaboya banaga matabudi, aitaugħa gewagewa ta voivoiedina ġarodie. Noġone Jius banegidima ġarodie, be muriġa eteni banegidima ġarodie mate. ¹⁰ Be ġesaudima neneġari, vivira be suba, banaga matabudi, aitaugħa vere ta voivoiedina ġarodie. Noġone Jius banegidima ġarodie, be muriġa eteni banegidima ġarodie mate. ¹¹ Baninama Mamaitua taudi matabudi ewai nua-paġoedina aubainama.

¹² Aitaugħa Mousis na tarawatuma nam ġarodie, be gewagewa ta voienna, taudi mate tokare kovoġa ta banavidina, avedi da taudi tarawatu nam ġarodie. Be aitaugħa Mousis na tarawatuma ġarodie be gewagewa ta voienna, taudi mate tokare kovoġa ta banavidina, maika tarawatu nopolome ya girugirumina nama. ¹³ Baninama Mousis na tarawatuma tauwai beavaienama taudi nam Mamaitua matane didimanidi, ibewa da aitaugħa Mousis na tarawatuma tawai beavae be ta voienna, taudi Mamaitua matane didimanidi. ¹⁴⁻¹⁵ Avedi da banaga ġesaudima taudi nam Jius, be Mousis na tarawatuma nam ġarodie, be yaġoro tarawatu aba

ya riuriuena, nama ta voivoiena. Inam ewai mağatarana da taudi nopolie tarawatu e kenakenana, baninama Mamaitua nopolie tarawatu ya girumina. Vutuna aubainama adi noğotama e riuriuedina da dego tauna vere be dego tauna gewagewa.¹⁶ Be uma kovoğinama tokare e tubuğana rağanine, Mamaitua banaga adi noğotama waimoisiridima, e etaredina Yesu Kerisoe. Yau varima verenama mate nama e riuriuna.*

Mataira ġavoe be nopoe

¹⁷ Be tam ġesauamma nemanama? Tam kwa riuriu munägem da tam kabe Jius banegim, be kwa noğonogötina da yaba matabuna ġarome naumeki, baninama tam Mamaitua na tarawatuma ġarome, be tam kwa seğaseğarana da tam Mamaitua tura kaukauinama.¹⁸ Tam Mamaitua na ġoħnama kuya kataiena, be tam tarawatu ġarone katai kuya paġona da tam teneteneğinama da sibo didimana kuya voiena.¹⁹ Be tam kwa noğonogoti da banaga Arue matapotepeṭedima adi tauwai kedadokama be aitaugħa kupie miemienidima adi kodamma tam.²⁰ Be mate kwa noğonogoti da tam banaga buebuedima tauboru waididimanidima, be tam seda ġaúgħabodima adi tauwai katakataima. Inam riukaua, baninama tam Mamaitua na tarawatuma ġarome aubainama, tam Mamaitua na kataima be na riukauama kuya kataiena.

²¹ Inam naumeki, tam banaga ġesaudima kwawai katakataidina, be aba aubainama tamga nam kumawai katakatai munaġem? Banaga ġesaudima kwa riuriuedi da nam ta danene, be aba aubainama tam mate kwa danedanene?²² Banaga ġesaudima kwa riuriuedina da nam adi waiwaivi bo adi tautaugħomma debedie mui ta poraġa, be aba aubainama tam mate nama kwa voivioia? Tam kokoitau kwa riuriu tuaġħaiedina, be aba aubainama tam mate kokoitau kwa rauduneedi?²³ Tam tarawatu kwa seğaseğarena, be yaġoro tam Mamaitua isanama kwa kawakawa gewagewana, baninama na tarawatuma kwawai kati kotovina!²⁴ Banaga matabudi dobu ġesaudie Mamaitua tawai diboġina, baninama taumi kami taiye. Girugiruminama poranamanopone e riuriuna maika.

²⁵ Inam ami vaivaima da kopitom ko voivoiena, inam naumeki, be deġoda taumi tarawatu ko voteyeteyena inam ya vere kauana. Be deġoda tarawatu koi kati kotovina, inam vaivainama kopitom nam baniboruboruna.²⁶ Be deġoda banaga ġesaudima nam kopitom ti paġona be yaġoro tarawatu ta vovo teyeteyena, inam taudi Mamaitua matane maika kopitom banegidima.²⁷ Uma banegidima nam kopitom ti

* **2:16:** Vers 16 inam vers 12 e raraududutainina.

paǵona be yaǵoro tarawatu ta vovo teyeteyena, taudi tokare tam ta saǵaiǵomem, be ta riuemna, “Avedi da tam tarawatu be kopitom kuya paǵona, tam tokare nam kwa yawasana, baninama tam tarawatu tauwai katikotovidima.”

²⁸ Nam aitau ei rawa-Jius deǵoda tauna Jius adi vaivaima e voivoiena. Be kopitom nam tubuǵe taunaǵa. ²⁹ Riukaua Jiusnama matairinama inam nam tubuǵe, ibewa da nopoe. Be kopitom tubuǵe inam kavakavanama, baninama inam tarawatu na noyama. Be deǵoda nopodama kopitom e paǵona inam naumeki, baninama inam Arua na noyama. Inam nama baneginama tauna Mamaitua na kaisuǵusuǵuma e wanewanena, be nam banaga adi kaisuǵusuǵuma ima wanewanena.

3

Mamaitua banaga matabudi e etaredina

¹ Vutuna aubainama Jius be kopitom adi verema aba? ² Adi verema inam a toi kauana, baninama Mamaitua riunama Jius ya ute dokedina.

³ Be ǵesaudima taudi nam Mamaitua nuanama taupaǵonama banegidi. Tam kwa noǵonoǵotina da Mamaitua inam banegidima nam ei nuapaǵoedi, bo? ⁴ Ibewa ǵoma! Mamaitua na saugama e kaikaididina, avedi da tauda banaga kaikaiyovudama, dà saugama tawai kati kotovidina. Baninama girugiruminama porane umanama ya riuna, “Banaga ta kita da raǵan matabuna Mamaitua tam am giuma kwa giugiuna matabuna inam didimanine, riukaue.”

⁵ Be banaga ǵesaudima ta riuriuna, “Naumeki, deǵoda nama, tauda dà gewagewama ya vere kauana, baninama dà gewagewama kana taiye Mamaitua e tainoǵoti da tauna dà gewagewama e noǵota porena, inam kedane na saugama e kaikaididina. Vutuna aubainama inam nam i verena da Mamaitua sibo ǵarode nuanama yai medi.” ⁶ Ibewa, inam nam nama! Deǵoda nama e tubuǵana, tokare nema Mamaitua dobu matabuna e etara bake? ⁷ Be uma banegidima ta riuriuna, “Tauda dà yawasanama kaikaiyovudie banaga Mamaitua na riukauama ta kaikai suǵuna, tokare aba aubainama Mamaitua sibo e kovoǵida? Inam nam i verena, ⁸ agunai gewagewa tà kaigurate be Mamaitua tà sagu da vere e kaigurate.” Inam banegidima tawai tupakaiyovuna da taugu kabe nama e rarauguguya. Ya verena da taudi tokare kovoǵa ta paǵo.

Nam aitau tenaǵa didimana banegina

⁹ Be yodi nemanama? Tauma Jius veremai, nam banaga ǵesaudima maika, bo? Ibewa! Baninama kaite è riuna da

- Jius be banaga ġesaudima matabudi gewagewa banegidima.
¹⁰ Maika girugiruminama porane ya riuriuna nama,
 “Nam aitau tenaġa didimana banegina,
 naumeiki ibewa ġoma.”
- ¹¹ Be nam aitau tenaġa nuauyauya banegina,
 be nam aitau tenaġa Mamaitua na kedama ima wanewa-nena.
- ¹² Matabudi Mamaitua a mia tautauriena,
 be yodi matabudi nam banibiribiridi.”
- ¹³ “Taudi gayedima kokoaga gayedima maika be adi giuma kaikaiyovudi be gewegewedima.” “Taudi menedima maika mota sarama.”
- ¹⁴ “Taudi mududie waitaratautau be nopalima nuaġorāġora ya moġavuna.”
- ¹⁵ “Taudi tauwai guri makai banegidima,
- ¹⁶ be adi yawasanae raukivigewagewa be nuaboya ya moġavuna,
- ¹⁷ be suba kedanama nam ti kataiena.”
- ¹⁸ “Taudi Mamaitua nam tima vivivivirena.”
- ¹⁹ Yodi tè kataiena da aitaūga tarawatu ewai badedina taudi sibo tarawatu matabuna a voteyeteyedina. Vutuna aubainama taudi tokare nam ta gudutara be teneteneġina. Be ibewa da banaga dobu matabuna nopone Mamaitua na etarae tà miadiana. ²⁰ Vutuna aubainama aitaūga tarawatuġa tawai muriwatanena taudi Mamaitua matane nam didimanidi. Baninama tarawatu nam e voie da tauda didimana tà banavi, ibewa be tarawatu na noyama inam ei kataidana da deġo tauna gewagewa be deġo tauna vere.

Didimana inam waisumāġe

²¹ Be yodi didimana kedanama Mamaitua yai maġatarina inam ġavoe, be nam tarawatue. Be peroveta be tarawatu uma kedanama vaunama ai matematena. ²² Yodi Mamaitua banaga e kawa didimanidina, aitaūga Yesu Keriso ġarone tawai sumāġana, avedi da tauda noġone banaga vereda bo gewagewadama, ²³ baninama banaga matabuda gewagewa tè voienna aubainama nam teneteneġina da Mamaitua ġarone sibo tè tava.

²⁴ Vutuna aubainama Mamaitua na raukiviveree ya kawa didimanidana be inam kawa didimaninama ya ute yababedana, nam maesa mate. Nama e voivoiana, baninama Yesu Keriso yai yawasanidana. ²⁵ Mamaitua Yesu Keriso ya vine be ya guri da kosininama ya rauġini da banaga matabuda dà gewagewama e koġa porena deġoda tài sumāġena. Inam kedane Mamaitua yai kataidana da tauna didimaninama, baninama boni tauna banaga adi gewagewae ya kitakita poredina be nam i kovokovoġidina. Be yodi inam

gewegewedima Yesu kosinine yai maesidina. ²⁶ Be mate Mamaitua yai kataiedana da tauna didimaninama, baninama yodi rağanine banaga aitaugā Yesu tawai sumağena, taudi matabudi Mamaitua e kawa didimanidina.

²⁷ Be yodi teneteneğinama da sibo tauda tè seğarana, baninama tè yawasanana aubainama, bo? Ibewa! Baninama yawasana tè pağona nam dà noyama veredima aubaidi, ibewa da waisumağā Yesu Keriso ġarone yawasana tè pağona. ²⁸ Vutuna aubainama tauma ka riuriuna da banaga yawasana e pağopağona inam waisumağe, be nam dà noyama veredima aubaidi.

²⁹ Mamaitua tauna tenağā, Jius be eteni banegidima adi Mamaituama. ³⁰ Baninama Mamaitua tenağā aubainama, tauna Jius be eteni banegidima e kawa didimanidina, inam waisumeğinama teneğine. ³¹ Be ya riuriuna da waisumağā inam ya sağā guratana. Be yodi nemanama, tarawatu nam baniboruboruna, bo? Ibewa, waisumağe inam tarawatunama tà vovo teyeteyena.

4

Eibraham na waisumağe Mamaitua tauna ya kawa didimanina

¹ Eibraham tauna bonimai tamamaima. Be uma giudima ġarodie aba tauna ya banavi? ² Degoda Eibraham na noyama veredie Mamaitua i kawa didimanina, naumeki da banaga matedie sibo ya seğarana be nam Mamaitua matane. ³ Baninama girugiruminama poranama umanama ya riuna, “Eibraham Mamaitua yai sumağena, vutuna aubainama Mamaitua ya kawa didimanina”.

⁴ Rağanine banaga e noyanoyana, tauna na maesama e pağopağona, inam nam tà riuna ‘puyo’. Ibewa da tauna ya noyanoyana maesinama e pağopağona. ⁵ Be Mamaitua ġarone inam na tabu. Banaga aitau nam ima noyanoyana, be Mamaitua banaga gewegewedima taukawa didimanidima e waisumağena, tauna na waisumağama aubainama Mamaitua tauna ei yawasanina.

⁶ Be Deivid uma giunama teneğinama ya guiena da nuavere baneginama aitau Mamaitua e kawa didimana yababena, be nam na noyama maesina. ⁷ Tauna umanama ya riuna,

“Nuavere taudi aitaugā adi voia waigewama ya noğota poredina

be adi gewagewama ya tauriedina.

⁸ Be nuavere tauna aitau na gewagewama tokare Bada nam e noğota watane”.

⁹ Uma giunama Deivid ya giugiuena Jius banegidima aitaūga kopitom a paḡopaḡona taudiḡa aubaidi bo banaga ġesaudima kopitom nam ti paḡona mate aubaidi? Aba taugu è riuriueno ko noḡoti! Mamaitua tauna Eibrahim na waisumaġe ya kawa didimanina. ¹⁰ Be airaġan Mamaitua Eibrahim ya kawa didimani? Noḡone kopitom ya paḡo doke bo muriġa da kopitom e paḡona, be Eibrahim ya kawa didimani? Ibewa! Noḡone Mamaitua Eibrahim ya kawa didimani dokena, muriġa da kopitom ya paḡona.

¹¹ Be inam kopitomnama ya paḡona, baninama inam yai matairana da tauna noḡone didimana ya paḡona na waisumaġama aubainama. Tauna muriġa da kopitom ya paḡona, be noḡone Mamaitua tauna ya kawa didimana dokena. Vutuna aubainama banaga matabudi aitaūga kopitom nam ti paḡona, be tawai sumaġana, taudi tamedima inam Eibrahim, be Mamaitua inam banegidima ya kawa didimanidina. ¹² Be tauna inam kopitom banegidima mate tamedima, taudi nam kopitom taunaġa ti paḡona, ibewa da waisumaġa mate. Baninama inam waisumeġinama teneġinama tamadama Eibrahim ġarone be muriġa da kopitom ya paḡona.

Mamaitua na saugama waisumaġe tà paḡona

¹³ Mamaitua ya saugana da Eibrahim na parate da nokoi ya naġona natunatunama tokare dobu matabuna tai bud-erieno. Nama Mamaitua Eibrahim ya riuena, baninama Eibrahim na waisumaġama aubainama, be nam tarawatu, ibewa. Tauna na waisumaġe Mamaitua ya kawa didimani be inam sauginama ya utena. ¹⁴ Be deġoda Mamaitua na saugama aitaūga tarawatu tauvoteyeteyenama i utedina, naumeki da waisumaġa inam nam baniboruboruna, be na saugama inam kavakavanama. ¹⁵ Baninama tarawatu e voivoie da Mamaitua nuanama ewai medina tauda dà rawaġaiġaima aubainama. Be deġoda tarawatu nam e kena, tokare nam teneġinama da tà rawaġaiġai.

¹⁶ Uma vutuna aubainama aitaūga tawai sumaġana, Mamaitua ei yawasanidina. Inam kauine Mamaitua yawasana e uteute yababedana. Be Eibrahim natunatunama matabudi riukaua da Mamaitua na saugama ta paḡona, nam tarawatu tauwai muriwatanenama taudiġa, ibewa da aitaūga tawai sumaġana maika tamadama Eibrahim, taudi mate sauga ta paḡona. ¹⁷ Girugiruminama porane umanama ya riuna: “Taugu è voiem da tam dam toitoi tamedima.”

Vutuna aubainama Eibrahim tauna matabuda Tamadama Mamaitua matane, baninama tauna Mamaitua yawai

sumaġena. Mamaitua tauna yai rewapana kauana. Tauna banaga guriguridima ei yawasanidina, be tauna yaba nam adi kaba tubuġa, be mudune e vatodi da ta maġamaġatarana.

¹⁸ Eibraham yai sumaġa be ya noġotadidina, avedi da nam sibo ya tubuġa, be yaġoro nama ya tubuġana. Da tauna dam toitoi tamedima, maika Mamaitua ya riuriuena nama, “Am damma tokare ta toina, maika kipora.”

¹⁹ Eibraham ya kataie da tauna ġaubaġonaġa sibo ya gurina, baninama tauna kaite na modima 100 a kovina. Be na visarama Sera yai kaikaipoki be kaiteka yai rawa dosina. Be yaġoro Eibraham Mamaitua na saugama yai sumaġena da tokare na visarama Sera ei natunana, ²⁰ be tauna Mamaitua na saugama nam i noġota bekubekuena. Ibewa da na waisumaġama yaġoro yai rewapana kauana, baninama tauna Mamaitua ya kaikai suġuna. ²¹ Be Eibraham ya katai kauena da Mamaitua aba ya sausaugena tokare teneteneġinama da e voiena. ²² Baninama Eibraham na waisumaġedidima Mamaitua ġarone ya boruna, vutuna aubainama Mamaitua Eibraham ya kawa didimanina.

²³ Uma giudima, “Mamaitua Eibraham ya kawakawa didimanina nam taunaġa aubainama ti girumina”, ²⁴ ibewa da tauda mate. Baninama Mamaitua dà badama Yesu, guriguridima nopolie, be ya kawa midisuġu munaġena. Deġoda tài sumaġena, tauda mate e kawa didimanidana. ²⁵ Yesu tauna dà gewagewama aubaidima ai gurina. Be tauna gurie ya midisuġu munaġa da tauda e kawa didimanidana, Mamaitua ġarone.

5

Mamaitua be tauda poude suba e kenakenana

¹ Yodi Bada Yesu Keriso dà waisumaġe tauda ya kawa didimanidana, vutuna aubainama yodi tauda be Mamaitua poude suba e kenakenana. ² Dà waisumaġama aubainama Yesu Kerisoe tè verau be inam raukiviverenama Mamaitua ġarone tè paġona. Be yodi ma mosarida tàwgi rabana da Mamaitua neneġarinama e utedana.

³ Nam inam vutunaġa, be mate tài nuaverena dà wainuatoitoie, baninama tè kataiena da wainuatoitoi e voie da tokare tauda tà kaiguratena. ⁴ Be kaigurata e voie da tokare tauda tài rewapana kauana. Be rewapana e voie da waisumaġedidi e tubuġana. ⁵ Be uma waisumaġedidinama aubainama tokare nam tài nuaboya, baninama Mamaitua na wainuapaġoma Arua Babaue nopolie ya ġini porena, baninama tauna Arua Babau ya utedana.

⁶ Rağanine tauda yağoro gewagewae tè miamiana, tauda inam Mamaitua na ġavıama. Be rağan boruborune Keriso ya gurina aubaidama. ⁷ Banaga değoda tokare turanama tenaġa verenama aubainama e gurina. ⁸ Be Mamaitua na wainuapägoma ġarode yai maġatarina, inam tauda yağoro gewagewae be Yesu aubaidama ya gurina. ⁹ Tauna kosinine tauda ya kawa didimanidana Mamaitua ġarone. Vutuna aubainama yodi tè katai kauena da Mamaitua na medie Yesu tokare ei yawasanidana. ¹⁰ Rağanine tauda yağoro Mamaitua na ġavıama, be natunama Yesu na gurie ya voie da tauda Mamaitua mate yai rawateğei munägedana. Be natunama Yesu na yawasanama e voie da tauda yawasana dosinama tà paġona, baninama yodi tauda Mamaitua na banagama aubainama. ¹¹ Be nam inam yabediġa, be mate tài nuaverena Mamaitua ġarone, baninama tauna Yesu Kerisoe tauda yodi Mamaitua tèi turanena.

Adam be Keriso

¹² Gewagewa dobue ya verauna, inam banaga tenaġa kana taiye be uma gewagewane guri dobue ya verauna. Uma kauine guri banaga matabudi ġarodie ya verauna, baninama matabudi gewagewa a voienna. ¹³ Gewagewa dobue ya kenakena be muriġa tarawatu ya dobina. Be Mamaitua gewagewa ya kita poredina, inam raġandie tarawatu nam i kenakenana. ¹⁴ Be yağoro Adam na rağanie be ya naġo da Mousis na rağanie guri banaga yawai badedina. Avedi da aitauġa tarawatu nam ti kati kotovina, Adam tarawatu yai kati kotovina maika. Adam tauna banaga muriġa e verauna yawai matairena. ¹⁵ Be taudi rabui adi yawasanama nam teġenidi, baninama Mamaitua na puyoma nam maika Adam na gewagewama nama. Inam baneginama Adam na gewagewae banaga toitoi a gurina. Be Yesu Keriso tauna Mamaitua na raukiviveree noġotaporaġa ya verauġena banaga toitoi ġarodie. ¹⁶ Mamaitua na puyoma be Adam na gewagewama nam tai ruvaruva be teneteneġina. Baninama Mamaitua na puyoe banaga toitoi ya kawa didimanidina, avedi da taudi gewagewa toitoi a voiedina. Be Adam na gewagewae banaga toitoi ta gurigurina. ¹⁷ Uma baneginama tenaġa Adam na gewagewae, guri banaga matabudi yai badedina. Be banaga matabudi aitauġa Mamaitua ġarone noġotaporaġa puyonama dosinama tai anine be ta paġona, taudi tokare Yesu Keriso mate yawasana tai badedina.

¹⁸ Vutuna aubainama Adam gewagewa tenaġa ya voienna aubainama, banaga matabudi a gurina, be Yesu didimana tenaġa ya voienna aubainama, banaga matabudi Mamaitua ya kawa didimanidina da yawasana tà banavina. ¹⁹ Be

kauinama teneğine Adam na rawağaiğaima aubainama, banaga matabudi gewagewa ya ragaudina, be Yesu na voteyateyama aubainama banaga toitoi Mamaitua e kawakawa didimanidina.

²⁰ Mamaitua tarawatu ya utedana, baninama dà gewagewama na morabama ei mağatarina. Be değoda gewagewa e morabana, naumeki da Mamaitua na raukiviverema e moraba vavasağana. ²¹ Vutuna aubainama gewagewa gurie ewai badana, be teneğinama yodi Mamaitua na raukiviverema didimanae ewai badana, be yawasana kenakena nonoğinama tà pağona Yesu Kerisoe, tauna dà badama.

6

Tauwai sumağ̫a be gewagewa

¹ Be yodi nema tà voia bako? Gewagewa tà kaigurate be Mamaitua na raukiviverema e moraba, bo? ² Ibewa ġom̫a! Tauda gewagewae tè guri be yodi nemanama gewagewae tà mia bako? ³ Ko noğonoğoti bo ibewa da tauda aitaüğa Yesu Kerisoe tè babataitona, tauda yodi matabuda tè babataitona Yesu Keriso na gurima nopone. ⁴ Vutuna aubainama babataitoe tauda Yesu mate a dobodana. Be tauna gurie ya midisuğu munağana Mamaitua na rewapanama neneğarine. Be inam rewapaninama teneğine tauda mate, yawasana vaune tà mianana.

⁵ Tauna na gurie tauda tauna mate tenağ̫a. Vutuna aubainama na kaba midisuğue tauda tauna mate tenağ̫a. ⁶ Baninama tè kataiena da tubuğidama poranama Yesu mate a tuparatu tenağ̫ena. Vutuna aubainama tubuğidama gewagewa tauwai nuapağoenama yodi na rewapanama ya kovina, be tauda nam gewagewa ġarone tài yaraga munağ̫a, ⁷ baninama aitau da e gurina, gewagewa nam tauna e tauconi munağ̫e. ⁸ Be tauda tè kataiena da tauda Keriso mate tè gurina aubainama, Keriso mate tokare tà miana. ⁹ Be mate tè kataie da Keriso ya midisuğu munağana, tokare nam e guri munağ̫a, baninama guri nam na rewapanama Yesu ġarone ima kenakenana. ¹⁰ Be Yesu tauna rağan tenağ̫a kava ya gurigurina, gewagewa na rewapanama yai kovina. Be yodi tauna na yawasanama Mamaitua na yawasanae e miamiana. ¹¹ Vutuna aubainama taumi mate ko noğotimi da taumi gewagewae koya gurina, be Yesu Kerisoe ami yawasanama Mamaitua na yawasanae ko miana.

¹² Vutuna aubainama nam gewagewa koi anine da tubuğimima ei bade. Uma tubuğinama tokare e gurina. Nam gewagewa taumi e sorumi da taumi tubuğ̫a na ġoanama

gewegewedima koi muriwatanedi. ¹³ Nam tunimima aiyabina
nama koi anine da gewagewa ta voiedi. Be ibewa da ko ute
munağemina Mamaitua ġarone, baninama taumi gurie be
koya naġona yawasanae. Vutuna aubainama yodi tunimima
matabuna Mamaitua ko ute be koi anine da tunimima vu
tuna vere ta voiedina. ¹⁴ Naumeki da yodi gewagewa nam ei
bademi, baninama taumi nam tarawatu na waibadae koma
miamiana, ibewa da taumi Mamaitua na raukiviverema na
waibadae ko miamiana.

Tauda yodi nam gewagewa ei yarageda

¹⁵ Be yodi aba tà voie? Tauda Mamaitua na rauki
viverema na waibadae tà miamiana, be nam tarawatu
na waibadae tama miamiana. Vutuna aubainama yodi
gewagewa tà voie, bo? Ibewa ġoma! ¹⁶ Koya kataie
bo ibewa da taumi aitau ko voteyeteyena taumi inam
tauna na taunoyama? Vutuna aubainama deġoda taumi
gewagewa na taunoyama, taumi tokare ko gurina. Be
deġoda taumi Mamaitua ko voteyeteyena, taumi tokare Ma
maitua na taunoyama be tauna ei yawasanima. ¹⁷ Taumi
raġan tenaġa gewagewa yawai yaragmina, be Mamaitua
tai kaiwena da yodi nuemima tabutabunama koya vitaredi
be riukaua waikatakatainama yai katakataimi be taumi
ko vovo teyeteyedina. ¹⁸ Taumi gewagewae be Bada ya
kaiporemi da yodi riukaua na yarayaragama.

¹⁹ Taumi ami noġotama vovo gwaġegwaġedima
aubainama, yau giuma teketedie yà giugiuna da taumi ko
kataiena. Boni tunimima koyai utaedi da mira be gewagewa
dosidima ġarodie awai yaragana. Inam nama yodi tunimima
koi utaedi da yaba didimanidima ġarodie tai yaragana
yawasana babaunama aubainama.

²⁰ Taumi gewagewa ġarodie koyawai yaragana raġandie,
taumi didimana nam ko noġonoġotidina. ²¹ Inam yabe
dima koya voivoiedina yodi kowai kawa tunimayaġedina,
damodie aba koya banavi? Nam aiyaba da naumeki guri!
²² Be yodi taumi gewagewae be Bada ya kaiporemina da
taumi yodi Mamaitua na taunoyama. Vutuna aubainama
yodi taumi teneteneġinama da Mamaitua na ġoanama ko
voiedina, yodibe taumi tokare koi rawa babau be da
mone taumi yawasana kenakena nonoġinama ko paġona.
²³ Baninama dà gewagewama na maesama inam guri, be Ma
maitua na puyoma inam yawasana kenakena nonoġinama,
dà Badama Yesu Kerisoe.

7

*Rağanine banaga e gurina tarawatu na rewapanama nam
garone ima kenakenana*

¹ Yau bana, tarawatu ko noğoti. Banaga e miamiana, inam rağanine tarawatu tauna banaga ewai badena. ² Inam maika waivi wainağinama. Rağanine tauğoma yawayawasaninama e miamiana, inam rağanine waivi nam teneteneğina da na tauğomama e gose. Be değoda na tauğomama e gurina, inam rağanine tauna wainağı tarawatunama e dobidobi porena. ³ Vutuna aubainama değoda na tauğomama yawayawasaninama e miamia be waivi tauğoma ġesaunama e nağına, tauna na badama debane mui e poreporena. Be değoda na tauğomama e guri be waivi tauğoma ġesaunama e nağına, inam naumeki.

⁴ Yau bana, uma kauinama teneğinama taumi mate ġaromie. Taumi Keriso mate koya guri tenaġana! Vutuna aubainama tarawatu na rewapanama ġaromie nam ima kenakenana. Keriso gurie be ya midisuğu munaġana, be taumi yodi tauna ġaroġaronama, da taumi ko votana Mamaitua aubainama. ⁵ Rağanine tauda tubuġa yawai dokedana noğota gewegewedima dà yawasanae a noyanoyana. Uma noğotidima gewegewedima tarawatue a maġatarana. Vutuna aubainama tauda boni dà votavotama guri a tubutubuġana. ⁶ Baninama tauda Yesu mate tè gurina aubainama, tauda yodi tarawatu na rewapanae be Yesu ya kuvesidana. Vutuna aubainama yodi keda vaunama Arue tà noyana, be nam keda poranama tarawatu a girugirumina tà noye.

Tarawatu be gewagewa

⁷ Yodi aba tà giue? Tarawatu taunaġa inam gewagewa, bo? Ibewa ġoma! Taugu tokare nam sibo gewagewa e kataie, ibewa da tarawatu ewai maġatarana. Baninama taugu tokare waikwina nam e kataie, değoda tarawatu nam sibo i riuna, “Nam kwai kwina!” ⁸ Gewagewa na kedama tarawatue ya banavi be ya voie da nogue waikwina noğotidima ta tavatavana da tarawatu yawai kati kotovina. Baninama değoda tarawatu nam sibo i kenakena, tokare gewagewa na rewapanama yai kavena maika banaga gurigurinama.

⁹ Rağanine taugu ġaubogue taugu tarawatu nam e kataiena, taugu ma nuaveregu yawasanae è miamiana. Be muriġa tarawatu è paġopaġona rağanine, gewagewa ya naġo midisuğu be yau yawasanae ya saġana. ¹⁰ Dabudine è kataie da taugu è gurina. Tarawatu kabe yawasana i uteutegu da tauna guri ya uteguna. ¹¹ Gewagewa na kedama tarawatue

ya banavina, vutuna aubainama ya kaiyovuegu be inam tarawatune yai guriguna. ¹² Be tarawatu taunaḡa inam babaunama. Be uma riuvavasaḡinama, “Nam kwai kwina” tauna mate babaunama, didimana be vere.

¹³ Naumeki, deḡoda tarawatu inam yaba verenama, inam yabanama verenama ya voie da taugu e guri, bo? Ibewa ḡoma! Gewagewa uma tarawatunama verenama ya paḡo be tarawatune yai guriguna. Be tarawatue yodi tà kitakitana da gewagewa inam naumeki gewagewa vavasaḡinama.

Gewagewa banaga ewai badedina

¹⁴ Tauda tè kataien da tarawatu inam Mamaitua ḡarone be ya yovona. Be tauda banaga tarawatu waimuriwatanenama tè gwaḡana aubainama, gewagewa tauda ewai badedana. ¹⁵ Be yaba barebaredimà yà voivoiedina, taugu nam e kataien da aba aubainama yà voivoiedi. Taugu yaba veredima è ḡoeḡoedina sibo è voiedina, be yabedima nam ama voivoiedina. Be taugu yaba yau kaba tuaḡaiedima, vutudi taugu yà voivoiedina. ¹⁶ Be deḡoda yaba barebaredimà nam ama ḡoeḡoedina, be taugu yà voivoiedina, inam taugu yàwai aninana da tarawatu inam riukaua. ¹⁷ Vutuna aubainama nam taugu inam yabedima barebaredimà ama voivoiedina, ibewa da gewagewa nōpogue e kenakenana, tauna vutuna e voivoiedina.

¹⁸ Baninama è kataie da nōpogue nam aba verenama ima kenakenana. Nōpogue ḡoana riukaua da e kenakenana da vere sibo è voiena, be nam rewapanā ḡarogue da yà voie. ¹⁹ Baninama yaba yà voivoiedina, taudi nam yau ḡoana da sibo è voiedi. Be yaba voiedima nam yau kaba ḡoedi, inam yabedima yaḡoro da yà voivoiedina. ²⁰ Be deḡoda yaba yà tuatuḡaiedina, be yaḡoro yà voivoiedina, inam kauidima tawai kataigu da nam taugu inam yabedima ama voivoiedina, be ibewa da gewagewa nōpogue e kenakenana, tauna vutuna e voivoiedina.

²¹ Dobudine è kita da raḡan matabuna inam umanama e tubutubuḡana: Raḡanine è raurubu da kabe vere è voivoie, da gewagewaḡa è voivoiena. ²² Naumeki nōpogue Mamaitua na tarawatuma yà ḡoeḡoe kauena, ²³ be Mamaitua na tarawatuma nōpogue e kenakenana. Be taugu è banavi da tarawatu ḡesaunama tunigue yai rewapanā vavasaḡa be e panipaniguna, be Mamaitua na tararawatuma ewai ḡaviena. ²⁴ O kapore, wainuatoitoiguma! Aitau e kaisagugu, be tubuḡa uma gurigurinama yà gose pore? ²⁵ Baninama nōpogue taugu Mamaitua na tarawatuma yà

vovo teyeteyena, be tunigue taugu gewagewa na tarawatuma yà vovo teyeteyena. Be Mamaitua yài kaiwena, baninama taune dà Badama Yesu Kerisoe ya kuvesiguna.

8

Yawasana vaunama Arua Babaue

¹ Vutuna aubainama taudi aitaugā Yesu Kerisoe ta miamiana, taudi tokare nam kovoğā ta banavi. ² Baninama tarawatu Arua Babaue vutuna yawasana Yesu Kerisoe ya uteguna da gewagewa be guri adi tarawatue ya kuvesiguna. ³ Tarawatu nam teneteneğina da sibo yai yawasanida, baninama tauda tarawatu waimuriwatanenama ġarone tè gwağā kauana. Vutuna aubainama Mamaitua Natunama ya riupore yovoğe be tubuğā ya utena maika, tauda tubuğidama gewagewa tauvoienama. Be Mamaitua Yesu tubuğā ya utena, be inam tubuğine tauda dà gewagewama kovoğinama ya pağona, be yodi ġarode gewagewa na rewapanama ya kovina. ⁴ Vutuna aubainama değoda tauda Arua Babau na ġoane tà miana, be nam tubuğā na ġoane, inam rağanine tauda tenegínama da Mamaitua na tarawatuma tà voteyeteyena.

⁵ Be taudi aitaugā tubuğā na ġoane ta miamiana, taudi adi noğotama matabuna tubuğā na ġoane e kenakenana. Be taudi aitaugā Arua Babau na ġoane ta miamiana, taudi adi noğotama matabuna Arua Babau na ġoane e kenakenana. ⁶ Değoda tubuğā na ġoanama tà noğota guratena, damonama guri tà banavina. Be değoda Arua Babau na ġoanama tà noğota guratena, damonama yawasana be suba tà banavidina. ⁷ Nama ta tubutubuğāna, baninama tubuğā na wainua noğonoğotama inam Mamaitua na ġavıama, be değoda tauda tubuğā na wainua noğonoğotama tài muriwatanena, tauda tokare Mamaitua na tarawatuma nam tà voteyeteye. Be nam tokare tà voie be teneğina. ⁸ Taudi aitaugā tubuğā na ġoane ta miamiana, taudi nam Mamaitua timawai nuaverena.

⁹ Be taumi nam tubuğā na waibadae koma miamiana. Ibewa! Değoda Mamaitua Aruinama nopomie, naumeki da taumi Arua Babau na waibadae ko miana. Be değoda aitau Keriso Aruinama nam tauna nopone e mia, naumeki da tauna nam Keriso ġarona. ¹⁰ Be değoda Keriso nopomie, tubuğimima ya gurina be Arua Babaue yawasana ko pağona, baninama Mamaitua ya kawa didimanima. ¹¹ Mamaitua Aruinama Yesu gurie be ya kawa midisuğu munağena. Değoda inam Aruinama nopomie e miana, naumeki da tokare tauna vutuna, taumi tubuğimima guriguridima mate

e kawa midisugudina. Baninama tauna Aruinama nopomie e miamiana.

¹² Vutuna aubainama yau bana, tubuğā na ġoanama nam na noyama aba ġarode ima kenakenana. ¹³ Baninama deġoda taumi tubuğā na ġoanama koi muriwatana nonoġena, taumi tokare ko gurina. Be deġoda Arua Babaue tubuğā na ġoanama gewegewedima koi guridina, taumi tokare yawasana ko banavina. ¹⁴ Baninama taudi aitaugā Mamaitua Aruinama ewai dokedina, taudi vutudi Mamaitua natunatunama.

¹⁵ Be Mamaitua Arua Babau ya utemina inam nam e voiemi da taumi taunoya yababa da sibo ko nainaira. Ibewa! Be tauna Arua Babau ya utemina e voiemi da taumi Mamaitua natunatunama. Vutuna aubainama taumi yodi Mamaitua ġarone ko riuna, “Mamai”!* ¹⁶ Mamaitua Aruinama tauda aruidama e riuriuena da tauda riukaua Mamaitua natunatunama. ¹⁷ Yodi tauda Mamaitua natunatunama, vutuna aubainama tauda tokare Keriso mate Mamaitua na buderima tà paġona. Deġoda tauna na wainuatoitoie tauda mate tài nuatoitoi saguna, tokare Mamaitua neneġarine Keriso mate tà mia tenaġana.

Raġan muriġa na yawasanama

¹⁸ Taugu yà kitakitana da wainuatoitoi yodi tà banabavidina taudi yawasana tokare e veraverauna ġarode e tavana, nam mate tài ruvaruva be teneteneġina, ibewa. ¹⁹ (-)

²⁰⁻²¹ Mamaitua yaba matabuna yawai tubuġidina ta guriguri be ta bovabova yababana, vutuna aubainama ma nuaboyedi ta miamiana. Be inam nam taudi adi ġoana, be tauwai tubuġidima na ġoane nama. Be yaġoro nopolimma ewai noġotana da raġanine Mamaitua na damma neneġarine ta saġana, taudi mate neneġara ta paġo da guri be bova adi raġanima e kovina. (v 19) Vutuna aubainama, yaba matabuna Mamaitua yawai tubuġidina, taudi tawai raba be keda ta kitakitana da uma yawasaninama saġasaġa vavasaġinama Mamaitua na sedama e utedina, dobue yaba matabuna matedie. ²² Tauda tè kataiena da pakane da yodi yaba matabuna ta yakeyakeina maika waivi raġanine ewai tikana tunimuyanama nama. ²³ Be nam yabedima taudiġa, be tauda mate, avedi da puyo Arua Babau tè paġona, be yaġoro tà yakeyakei be tħawwi rabana da Bada ei kawa natunedha be tubuġidama ei yawasanidina. ²⁴ Raġanine Bada yai yawasanidana tauda tà noġonogotina, da tokare tà naġona marae. Be tauda deġoda sibo kaite marae tè naġona, yodi nam tama noġonogotina da sibo marae tè

* **8:15:** Aramaic bonane ‘Abba’ inam ‘Mamai’.

naōo. Baninama nam aitau yaba kaite ya paōo be yodi ima ġoeġoena e paōo munaġe. ²⁵ Be yodi yaġoro mara nam te kitana, vutuna aubainama tauda nuatauġa tħawai rabana da marae tà naġona.

²⁶ Be mate Arua Babau dà vogwaġagwaġae e sagusagudana. Baninama tauda nam moiragi kaua te kataiena, vutuna aubainama Arua Babau Mamaitua ġarone aubaidama moiragie giu e vatovatodina, baninama tauda nam teneteneġina da tà vatodi. ²⁷ Arua Babau tauda aubaidama e moimoiragina Mamaitua na ġoanama ruvane. Be aba Arua Babau Mamaitua e riuena, tauna kaite ya kataiena, baninama Mamaitua banaga babaudama nopodama ya kawai kauena. ²⁸ Tauda tè kataie da banaga aitauġa Mamaitua tawai nuapaġoena, taudi ġarodie yawasana matabudi veredima, be piripiri ta tubutubuġana inam vere taudi aubaidima. Uma banegidima taudi vutudi Mamaitua bonimai ya vinedina na ġoanama ruvane. ²⁹ Be banaga aitauġa Mamaitua ya vineviniedina, taudi ya voiedina maika natuġominama Yesu, be Yesu tauna tautuaġa. ³⁰ Be aitauġa Mamaitua ya vineviniedina, taudi ya yokoedina da sibo a verauna tauna ġarone. Be aitauġa tauna ya yokoyokoedina, taudi ya kawa didimanidina. Be aitauġa tauna ya kawakawa didimanidina, taudi yawasana verenama marae ya utedina.

Mamaitua na wainuapaġoe nam aba tokare e dariġeda

³¹ Yodi aba tà giue? Deġoda Mamaitua tauda muride e midimidina, aitau tokare ei ġavieda? ³² Avedi da natuġominama be nam i rabe kwasena, be yaġoro yai utaena tauda matabuda aubaidama. Be teneġine nama tauna na raukiviveree yaba matabudi e uteutedana.

³³⁻³⁴ Vutuna aubainama nam aitau teneteneġina da ei wavuda, baninama Mamaitua kaite ya kawa didimanidana. Be mate Yesu Keriso vutuna ya guri be ya midisuġu mu-naġana, tauna Mamaitua kasaune e mia be aubaidama e moimoiragina.

³⁵ Be yodi Keriso na wainuapaġoe nam aba tokare e dariġeda. Nam nuaboya, nam naira, nam raukivigewagewa, nam meiġara, nam waikaruwaġawaġa, nam iġara.

³⁶ Girugiruminama porane ya girugirumina nama, “Tam kamtaie raġon matabuna tauma raukivigewagewa ka banabanavidina, be ta vunuvunuġimaina maika musara.”[†]

³⁷ Be avedi da nuaboya tà banabanavidina, be yaġoro tà

[†] 8:36: Gurik bonane ya riuna ‘sipu’, be nam ‘musara’.

vaisuba vavasağedina Yesu Kerisoe, tauna vutuna ewai nuapağedana.

³⁸ Baninama taugu è katai kauena da Mamaitua na wainuapağoe nam aba tokare e dariğeda, nam guri, nam yawasana, nam anea, nam penama, nam yaba yodi ta tubutubuğana bo tokare ta tubuğana, nam aba rewapanidi, ³⁹ nam arua gunume bo dobue, nam aba Mamaitua yawai tubuğidina, nam aba tokare Mamaitua na wainuapağoe e dariğeda, ibewa! Yesu Kerisoe Mamaitua yai kataidana da tauna ewai nuapağedana.

9

Mamaitua be Israel banegidima

¹ Taugu Yesu Keriso matane yà riuriu kauana, be nam ama kaikaiyovuna. Arua Babau nogue nama e riuriueguna. ²⁻³ Israel banegidima nam adi waisumağ, vutuna aubainama taugu nogue èi nuaboya da èi nuaboya kauana, be è noğoti da Mamaitua taugu sibo ya raukivi gewegewegu be taudi sibo yai yawasanidina. ⁴ Baninama taudi Mamaitua ya vinedina da tauna natunatunama be taudi neneğarinama a kita be na saugama ġarodie ya boruna. Taudi Mousis na tarawatuma a pağ be tempol nophone ta tapataparorona, be Mamaitua ya riuedina da tokare ei yawasanidina. ⁵ Be taudi ġarodie dede pakanama banegidima,* be inam damne Yesu Keriso ya tubuğana, tauna vutuna Mamaitua, be rağan matabuna ta kaikai suğu nonoğenä! Inam riukaua.

Aitaugā Mamaitua na damma nophone?

⁶ Taugu yà riuriuna da Mamaitua na saugama nam i kavena. Israel banegidima nam matabudi Mamaitua na dam. ⁷ Avedi da taudi Eibrahim natunatunama, yağoro nam matabudi Mamaitua na seda, ibewa. Mamaitua Eibrahim umanama ya riuena, “Aisik na dame taugu tokare am sedama è sausaugemna yà utemna.” ⁸ Inam baninama umanama: Avedi da taudi Eibrahim natunatunama, yağoro taudi nam Mamaitua natunatuna, be aitaugā Mamaitua na saugama tauwai sumağenama, taudi inam riukaua Mamaitua natunatunama. ⁹ Mamaitua na saugama Eibrahim ġarone inam umanama ya riuna, “Taugu yau rağanima è boruborue taugu yà yovo munağana, yodibe Sera gomana tauğominama tokare e tikana.”

¹⁰ Be teneğinama nama Rebeka ġarone. Rebeka na sedama tautauğomidima tamedima tenağā Aisik, tauda mate

* **9:5:** Dede pakanama banegidima inam: Eibrahim, Aisik be Jeikob.

tamadama. 11-12 Be Rebeka muriā da seda rağarağā e tikedi da yawasana veredi bo gewegewedima ta voiedina, be noğone Mamaitua Rebeka umanama ya riuena: "Gomana tautuağā tokare tasinama ġarone ei taunoyana." Mamaitua nama ya riuna, inam tauda sibo tè kataie da Mamaitua na ġoane banaga e vinevinedina, be nam adi noyama debane. 13 Vutuna aubainama girugiruminama porane umanama ya riuna, "Jeikob nuaguma e pağopağona be Iso è tuağaiena."

14 Be yodi nema tà riu bako? Mamaitua nam didimana baneginā, bo? 15 Mamaitua Mousis umanama ya riuena,

"Taugu yau raunuatoima banaga yà ġoeğöena nama yà raunuatoiena,

be yau raukiviverema banaga yà ġoeğöena nama ġarone yà raukivi verena."

16 Vutuna aubainama banaga yawasana ta pağona, be nam adi ġoane bo adi noyama veredima aubaidi, ibewa, be Mamaitua taunağā e ġoeğöena nama e raukivi verena ġarodie.

17 Be guyau Pero ġarone ko kita. Mamaitua tauna ġarone ya riuna umanama, "Taugu è voiem da guyau kuya tubuğana, inam taugu yau rewapanama ġarome yai mağatari da dobu matabuna ta kita be isaguma ta kaisuğuna." 18 Vutuna aubainama Mamaitua na raukiviverema banaga e ġoeğöena, nama ġarone e raukiviverena. Be mate Mamaitua e ġoeğöena nama, banaga nophonama e kawa badona.

19 Be tokare banaga ġesaumima umanama ko riueguna, "Değoda Mamaitua na yawasanama nama, aba aubainama tauna e riuriuna da tauma gewagewa banagimai? Tauda nam teneteneğina da na ġoanama tài ġake."

20 Tam am rewapanama aba da Mamaitua e giugiu be kwa riuite munäge? "Gurewa nam tokare aitau tauvoienama e riuena: Aba aubainama umanama kitaguma kuya voiegu?"

21 Gurewa tauvoienama doğa teneğinama e pağ be na ġoane nama gurewa verenama be kamai guregurewa e voivoiedina. 22 Be inam kauinama teneğinama nama. Mamaitua guyau Pero be Ijipt banegidima ya vinedi da ġarodie na medima be na rewapanama ei mağatarina. Be avedi da Mamaitua ya vinedina da taudi sibo a gurina, be tauna yağoro mareğā ewai rauriedina. 23 Be banaga ġesaudima ya vinedina da taudi neneğarinama maumaurinama tokare a pağona. Vutuna aubainama Mamaitua na raukiviverema be na rewapanama taudi ġarodie yai mağatarina. 24 Be inam banegidima inam tauda, tauna Jius be eteni nopodie ya vinedana.

25 Maika Mamaitua peroveta Osea ya riuriuena nama, "Taugu tokare eteni banegidima yà vinedi

be yà voiedi da taudi yau banagama.
 Be taudi nuaguma ta paǵona,
 avedi da yodi nuaguma nam tima paǵopagaǵona.”
 26 Be mate Osea ya riuena,
 “Deǵo è riuedina, ‘Taumi nam taugu yau banaga’,
 yodi tokare yà riuedina, ‘Taumi Mamaitua miamia
 nonoginama natunatunama.’”
 27 Be peroveta Aisaia Israel aubaina ya riuna umanama,
 “Avedi da Israel banegidima sievidima maika gimori gerese,
 be raubisaǵa tokare ei yawasanidina.
 28 Baninama Mamaitua na ogama ya tarataragaǵina nama,
 tokare e voia makaie be e voia rovona.”
 29 Inam maika Aisaia kaite ya vatona,
 “Deǵoda Bada wairewapanā vavasaǵinama banaga
 raubisaǵa sibo nam i gosedi,
 tauda tokare Sodom be Gomora banegidima tè ruvedi be
 tè guri rovona.”†

Israel banegidima nam waisumaǵa ǵarodie

30 Be yodi tà kita da eteni banegidima avedi da didimana
 nam ti wanewanena, be yaǵoro Mamaitua adi waisumaǵe ya
 kawa didimanidina. 31 Be Israel banegidima taudi didimana
 nam ti banavina, baninama taudi didimana tarawatue a
 wanewanena aubainama. 32 Aba aubainama didimana nam
 ti banavi? Baninama taudi a noǵoti da adi noyama veredie
 kabe didimana ta banavi, be nam waisumaǵe. Taudi yeku‡
 adi kaba saǵaivitarema a saǵai vitarena. 33 Ya girugirumina
 nama:
 “Ko kitana, taugu Saionma yeku yà boruboruna,
 be vutuna banaga e voiedi da ta saǵai vitare be ta
 bekuna.
 Be aitau uma yekunama ewai sumaǵena,
 tauna tokare nam tunimayaǵe e mia.”

10

1 Yau bana, taugu nuaguma e ǵoeǵoe kaue be Mamaitua
 yàwai baǵana da tauna sibo Israel banegidima yai yawasanidina.
 2 Taugu è kataiena da taudi ta rara rubu guratana
 da Mamaitua sibo a tainuaverena, be tauna anitai nuaverenama
 na kedama, nam ti katai kauena. 3 Taudi Mamaitua
 na didimana kedanama a riutuaǵaie, be taudi adi noǵotama
 nama na ruvae didimana kedanama a wanewanena. 4 Be
 taudi nam ti kataiena da Keriso ya voie da tarawatu na
 raǵanima ya kovina. Be aitau da Keriso ewai sumaǵena,
 tauna tokare didimana e banavina.

† 9:29: Sodom be Gomora adi gututuma ko sievidina. (Genesis 19:1-29) ‡ 9:32:
 ‘Yeku’ inam Yesu Keriso.

⁵ Mousis didimana tarawatue umanama ya giuedina, “Aitauğɑ̄ uma kauidima yà giugiuiedina e voiedina, tauna tokare ġarodie yawasana e banavina.” ⁶ Be didimana waisumäge inam umanama ya giuedina, “Nam nopolomie ko riuna, ‘Aitau e sağɑ̄ e nağō marae be Keriso e yovoğe?’” ⁷ Bo “Aitau e yovo e nağō guriguridima adi gabue be Keriso e sage?” Ibewa! ⁸ Inam kauidie nam tokare yawasana ko banavidi. Be you, didimana waisumäge umanama ya giuedina, “Yawasana riunama inam ġaromie; mudumie be nopolomie.” Inam riunama vutuna waisumäge riunama tauma ka rarauguguyena.

⁹ Inam giudima banidima umanama, Değoda tam mudume kwa riuna, “Yesu tauna Bada” be nopolome kwai sumağɑ̄ da Mamaitua Keriso gurie be ya kawa midisüğü munağena, tam tokare yawasana kenakena nonoğinama kwa banavina. ¹⁰ Baninama dà waisumäge tokare Mamaitua e kawa didimanidana, be değoda mudude Yesu Keriso tà giuena, tauda tokare Mamaitua ei yawasanidana. ¹¹ Vutuna aubainama girugiruminama umanama ya riuna, “Aitau tauna ġarone ewai sumağana, tauna tokare nam tunimayağe e mia.” ¹² Yodi uma giunama mayanama maika banaga matabuda, tauda Jius be eteni banegidima matabuda e riuriuedana, baninama Bada tauna tenağɑ̄, be banaga matabuna ewai badedina, be vere dosidima aitauğɑ̄ tauna ġarone sagu tawai bağena e uteutedina, ¹³ baninama girugiruminama nama ya riuna, “Aitauğɑ̄ Bada ġarone yawasana tawai bağena, taudi tokare ei yawasanidina.”

¹⁴ Be nema taudi sagu tai bağe bake, değoda taudi Bada nam tai sumağe? Be nema Bada tai sumağɑ̄ bake, değoda varinama nam ta vaie? Be nema vari verenama ta vaia bake, değoda nam aitau ġarodie e rauguguya? ¹⁵ Be nema taudi ta rauguguya bako, değoda Keriso taurauguguya nam e riuporağɑ̄? Girugiruminama umanama ya riuna: “Banaga tawai nuavere kauana rağanine taurauguguya ta verau be vari verena be suba giunama ta rarauguguyena.”

¹⁶ Be nam Israel banegidima matabudi vari verenama ti pağona. Inam maika peroveta Aisaia ya riuriuna nama: “Bada, nam banaga toitoi ama giuma ti sumağena.” ¹⁷ Be yağoro Keriso banaga ya riuporedina rauguguya aubainama be adi rauguguya banaga ta vaie, be tai sumağana.

¹⁸ Be Jius banegidima nemanama? Taudi vari verenama nam ti vaie, bo? Ibewa da taudi kaite a vaiena. Baninama girugiruminama porane ya riuna umanama:

“Taudi a rarauguguyana varinama dobu matabuna yai moğavuna,

be dobu damodie mate.”

¹⁹ Bo agunai Jius banegidima a vaiena be baninama nam ti katai kaue, bo? Ibewa, taudi a kataienia. Uma kauinama vutuna aubainama Mamaitua Mousis umanama ya riuena: “Avedi da eteni banegidima buebuedima taudi nam Jius, be tokare yà vinedina.

Yodibe taumi tokare ko unuredi be ko mediedina.”

²⁰ Be Aisaia mate umanama ya riuna:

“Aitaugā taudi nam ti wanewaneguna,
taudi ġarodie è maġatara be a banaviguna.”

²¹ Be Israel banegidima aubaidima umanama ya riuna:

“Raġan daudaunama taugu aubaimima èwai rabana da sibo
ġarogue koya tavana,
be taumi nam ko tavana, baninama taumi banaga
beapotepotemi be raraukosogħajgħimima.”

11

Israel banegidima tautaugosedima

¹ Be yodi nemanama? Mamaitua na banagama ya tuaġġaiedi, bo? Ibewa! Taugu mate Israel banegiguma, Eibrahim natunama, be Bendiman na damma nopone.

² Mamaitua na banagama boni ya vinevinedina nam i tuaġġaiedina, ibewa! Elaija na gututuma ko noġoti, raġanine tauna Mamaitua ġarone ya riubona badobadona Israel banegidima kadi taiye. ³Tauna umanama ya riuna: “Bada, taudi am perovetama matabudi ai guri rovodi be am oltama a katiweidina. Be yodi tauguġa yà miamiana, be taudi ta ġoegħoe da taugu mate tai guriguna.”

⁴ Be Bada umanama ya paribeena: “Taugu banaga 7 tausand aubaiguma è taugosaġġana, baninama taudi nam kokoitau Bal ġarone ti raudunena.”

⁵ Be yodi uma raġanine kauinama teneġinama nama. Mamaitua na raukiviveree banaga tautaugosedima ya vinedina. ⁶Tauna na raukiviveree ya vinedina be nam adi noyama debane. Be deġoda adi noyama debane i vinedina, agunai raukivivere nam baniboruboruna.

⁷ Be yodi tà kita, Israel taudi didimana a wanewane guratena be nam ti banavina. Be Mamaitua na vinevinema banegidima taudiġa didimana a banavina, be Israel banegidima ġesaudima Mamaitua ya kawa nopobadodina ⁸maika girugirumina porane ya riuriuna nama:

“Mamaitua arua gewagewanama ya utedi,

be uma aruinama taudi ya kawa debabuedi
be ya voiedi da matedie nam timawai kita

be beedie nam timawai beavaiana naumeki da yodi.”

⁹ Be Deivid umanama ya riuna:

“Taudi adi puyoma soidima sibo ya tikona munağedi,
be a sağai vitaredina, baninama inam adi kovoğama.

¹⁰ Taudi sibo arue matedima ai kupikupi da taudi nam sibo
ai kita,
be rağan matabuna sibo ġayawa a kwarina.”

Eteni banegimima taumi nam ko rauuguyaguyau

¹¹ Yodi yài taravira munağemina. Mamaitua na banagama ya tuağai vavasağedi, bo? Ibewa! Israel banegidima Mamaitua a mia tautauriena, aubainama Mamaitua eteni banegidima ei yawasanidina da Israel banegidima sibo a unurana eteni banegidima ġarodie. ¹² Be uma ko noğoti, Israel banegidima taudi Yesu Keriso a tuağaiena, aubainama eteni banegidima dobu matabuna yawasana a banavina, Israel banegidima matabudi Yesu tawai sumağena rağanine, eteni banegidima tokare waiaiaina dosinama ta pağona.

¹³ Be taumi aitaüğa nam Jius, taumi yodi yà riuemina: Taugu ei nuaverena da Mamaitua ya riuporeguna taumi eteni banegimima ġaromie da vari verenama yà rauuguyena. ¹⁴ Be uma kauine Jius banegidima nuedima ei medi be taudi mate tai sumağana. ¹⁵ Be yodi ko kita da, rağanine Mamaitua Jius banegidima ya riuriu tuağaiedina, inam rağanine dobu matabuna adi gewagewama ya noğota poredina, be rağanine Mamaitua Jius banegidima ei anina munağedina, aba tokare e tubuğa? Inam rağanine banaga guriguridima ta midisuğu munağana. ¹⁶ Baninama değoda Mamaitua Jius adi dedema pakanama banegidima yai aninedina, naumeki da taudi adi sedama mate Mamaitua tokare ei aninedina. Inam kauinama teneğinama maika kai olip. Değoda kai olip waraminama yai aninena, naumeki da kai ragedima mate tokare ei aninedina.

¹⁷ Be yodi rağandie Mamaitua uma kainama ragedima ġesaudima ya kotovidina, be taumi avedi da dobira olip-nama, be ya ragaumi da olip ragedima ya kotokotovidina kividie ya pani wairatumina. Be yodi taumi olip waraminama bodinama na rewapanae taumi ko gogogogona. ¹⁸ Vutuna aubainama olip ragedima midimididima noğodie nam ko seğara! Be ko noğoti da warama nam na yasima taumi. Taumi ami yasima inam warama.

¹⁹ Be agunai taumi umanama ko riuna, “Mamaitua kai olip ragedima ġesaudima ya kotovidina, kividie tauma e pani wairatumaina aubainama.” ²⁰ Inam riukaua, be ko noğoti da taudi nam tiwai sumağana aubainama Mamaitua ya kotovidina, be taumi Keriso kowai sumağena aubainama Mamaitua taumi ya pani wairatumina. Vutuna aubainama

nam nōgodie ko sēgara, avedi! Be taumi sibo koya nairana,
²¹ baninama dēgoda Mamaitua kai ragedima veredima i
 kotovidina, taumi mate tokare ya kotovimina, dēgoda taumi
 nam koi sumāgāna.

²² Be yodi tauda Mamaitua na raukiviverema be na
 raukivigewagewama t̄a kitana. Tauna na raukivigewage-
 wama taudi aitaugā nam Mamaitua tima vovo teyeteyena
 āgarodie, be dēgoda rāgan matabuna koi sumāgena, na rauki-
 viverema taumi āgaromie e kenana, be dēgoda ibewa, taumi
 mate e kotova poremina. ²³ Be dēgoda Jius banegidima
 waisumāga tai kare munāgena, taudi tokare Mamaitua e
 pani wairatu munāgedina, baninama na rewapanama e
 kenakenana da nama e voiana.

²⁴ Be avedi da taumi dobira olipnama, be yāgoro Mamaitua
 ya pāgom i da olip verenama bogane ya pani wairatumina.
 Vutuna aubainama tauna tokare tenetenēginama da olip
 verenama ragedima ya kotokotova poredina, kividie e pani
 wairatu munāgedina.

Mamaitua tokare Israel banegidima ei yawasanidina

²⁵ Yau bana, uma inam riukaua semosemonama yà riuri-
 uemina da taumi ko kataie be nam ko kawa sāge munāgemi
 Israel banegidima nōgodie. Inam riukaua da Mamaitua
 Jius banegidima āgesaudima ya kawa nopobadodi da nam
 ti sumāgāna. Inam kauinama nama Mamaitua ya voie
 da eteni banegidima sievinama ya nōgonogötina paratine
 nama ei yawasanidina, ²⁶ yodibe Israel banegidima mate
 ei yawasanidina maika girugiruminama poranama ya riuri-
 una nama:

“Tauwai yawasana Jerusalem̄ga e verau

be e voie da Jeikob na damma Mamaitua tai nuapāgo
 munāgena.

²⁷ Be taugu waianina yà uteutedina rāganine,
 adi gewagewama yà nōgota poredina.”

²⁸ Yodi taudi vari verenama a tuāgaiena, vutuna
 aubainama taumi eteni banegimima yawasana ko pāgona,
 be Jius taudi Mamaitua na āgviama. Baninama Mamaitua
 Jius adi dedema pakanama banegidima ya vinedina, taudi
 kadi taiye Jius banegidima yāgoro tauna na banagama,
²⁹ baninama Mamaitua na giu be na puyoma nam airāgan
 nuanama e vitaredi be e kaiporāga munāgedi. ³⁰ Taumi
 nōgone eteni banegimima, taumi Mamaitua koya rawarawa
 āgaīgaiena. Be yodi taumi Mamaitua na raunuatoima
 koya pāgona, baninama Jius banegidima Mamaitua a
 rawāgaīgaiena aubainama. ³¹ Be tokare taudi mate
 Mamaitua na raunuatoima ta pāgona, avedi da taudi yodi ta

rawarawa ġaiġaiena, baninama Mamaitua na raunuatoima taumi ġaromie aubainama. ³² Be yodi tà kita da banaga matabuna adi rawaġaiġie Mamaitua ya panidina, inam kedane tokare matabudi Mamaitua na raunuatoima ta paġona.

Pol Mamaitua e kaikai suġusuġuna

³³ O kapore! Aba kam Mamaituama tam kuya vere ġaġa kè banavim. Am nuauyauyama be am kataima ya saġa vavasaġa be ya yovo guratana. Tauda nam teneteneġina da Mamaitua na yawasana be na kovoġama tà kataiedi. ³⁴ “Aitau Mamaitua na noġotama ya kataie? Be aitau teneteneġina da Mamaitua e raukure?” ³⁵ Bo “Aitau aba Mamaitua ya ute da yodi Mamaitua tauna ei maesi munāġe?” ³⁶ Yaba matabuna taune da ta tubutubuġana, be tauna na rewapanae ta kenakenana. Tauna tà kaisuġusuġu nonoġena. Inam riukaua!

12

Dà yawasanama sibo Mamaitua tè utena

¹ Yau bana, yodi Mamaitua na raunuatoie yà riuriu vavasaġemina da tubuġimima Mamaitua ko utena. Be raġanine tubuġimima Mamaitua ko uteutena, inam vutuna puyo babau yawayawasaninama. Dabudine Mamaitua ei nuaverena, baninama uma kauinama inam riukaua taparonama, Arua Babau nama e ġoegħoena. ² Be nam dobu banegidima adi vaivaie ko mia, avedi! Be Mamaitua koi baġa da ami noġotama e vitaredi be taumi ami yawasanama e rawavaudina. Yodibe taumi tokare teneteneġinama da Mamaitua na ġoana be na verema ko kataiedina. Be Mamaitua na ġoanama inam ya vere vavasaġana.

³ Taugu Mamaitua na apasolma, vutuna aubainama yà riuriu vavasaġemina: Nam ko noġota munaġemi da taumi koya saġa guratana, ibewa da Mamaitua taumi tenatenaġaġa ami waisumaġama ya uteutemina, na ruvae nama ko noġota munaġemina. ⁴ Tauda tubuġidama tenaġa be ragaragadama toitoi, be raga tenaġaġa adi noyama tabu be tabu. ⁵ Be uma kauinama teneġine tauda toitoi be tubuġa tenaġa Yesu Kerisoe, be taune tauda matabuda tèi rawa teġeidana.

⁶ Be matabuda dà noyama tabu be tabu, Bada puyo tabu be tabu ya uteutedana na ruvae nama. Aitauġa da tauwai peroveta, naumeki da tai perovetana adi waisumaġama ruvane. ⁷ Aitauġa da tauwai sagu, naumeki da tai saguna, be aitauġa da tauwai katakatai, naumeki da tai katakataina, ⁸ be aitauġa da taurauduġu, naumeki da ta rauduġuna, be aitauġa da taupaipairu, naumeki da riukaue ta pairuna, be

aitauāga da tauwai bada, naumeki da nuedima tabutabune tai kedadoka kauana. Be aitauāga da taurau nuatoi, naumeki da ma nuaveredi banaga ta sagudina.

Kuristen na yawasanama

⁹ Ami wainuapaāgoma ami banagama īgarodie nam kaiyovue. Yaba gewegewedima ko tuaāgāiedi be yaba veredima ko kaidididina. ¹⁰ Nuemima tabutabune ami banagama mate koi nuapaāgo be koi kawa vivira munaāga! ¹¹ Be nam airāgān matemima e gayawa, be rāgān matabuna nuemima tabutabune Bada aubainama ko noya!

¹² Ko noōgoti da rāgān tenāga taumi tokare ko naāgona marae, vutuna aubainama koi nuavere! Be piripiri rāgāndie ko vataradidi be ko moiragi nonoāga! ¹³ Mamaitua na banagama waikaruwaāgewāgedima ko sagudi! Be deōgoda vaāgavaāgai be ya tavana, ko rabe kauena!

¹⁴ Aitaūāga da ta raraukivi gewegewemina, naumeki da taudi aubaidima ko moiragi be Bada ei aiainidi! Taumi banaga koi aiainidina be nam koi taratautauedi! ¹⁵ Deōgoda aitaūāga tawai nuaverena, naumeki da taumi mate koi nuaverena, be deōgoda aitaūāga ta īgabāgabana, naumeki da taumi taudi mate ko īgabana. ¹⁶ Taumi subae ko mia be nam ko rauguyaguyau, be nam ko kawa saāge munaāgemi! Kamai banabanaga mate koi turaturanana. Be nam ko noōgoti da taumi banaga katakataimi!

¹⁷ Gewagewa nam gewagewae koi maesi. Be ko kita kaua da banaga matabudi matedie taumi didimanae ko miana. ¹⁸ Ko raurubu da banaga matabudi mate subae ko miana. ¹⁹ Yau bana, nam biwa ko paāgo, be ko gose da Mamaitua taunaāga e raubiwana, baninama girugiruminama poranama ya riuna umanama,

“Bada ya riuna, ‘Taugu taurau biwa be taugu tokare ami biwama yā paāgona’.

²⁰ Deōgoda am īgaviamā kani e karatina, naumeki da kani kwa utena

be deōgoda nuanama e raukasakasana, naumeki da upa kwa ute!

Deōgoda am īgaviamā īgarone nama kwa voiana,

debane upa kwa īgini pore be tauna e tunimayaāgana.”

²¹ Gewagewa nam tam e vaisubam, be tam veree gewagewa kwa vaisubana!

13

Gabeman ko voteyeteyedi

¹ Banaga matabuna sibo gabeman a voteyeteyena, baniama gabeman matabudi adi rewapanama inam Mamaitua

ya utedina. ² Vutuna aubainama aitau gabeman ġarodie e paripari viravirana, tauna Mamaitua ġarone mate e paripari viravirana, tauna tokare kovoġa e banavina. ³ Tam deġoda vere kwa voivoiena, inam raġanine tam tokare nam pirisiman kwa nairedina. Be deġoda gewagewa kwa voienna, inam raġanine tam tokare pirisiman kwa nairedina. Vutuna aubainama tam deġoda naira kwa tuaġaiena, naumeki da vere kwa voie be taudi tokare tam isamma ta kawa saġena. ⁴ Baninama Mamaitua gabeman ya riuporedina da taudi tam ta sagumna aubainama, be deġoda tam gewagewa kwa voienna, inam raġanine taudi kwa nairedina, baninama Mamaitua rewapana ya utedina da taudi tam tokare ta kovoġimna. ⁵ Vutuna aubainama gabeman aba ta riuriuena, naumeki da kwa voienna, inam raġanine am noġotama tokare verenama e kenana. Be mate tam tokare nam kovoġa kwa banavi.

⁶ Raġan matabuna gabeman ta noyanoyana Mamaitua aubainama, vutuna aubainama taumi teks koi maesidina. ⁷ Nama banaga matabudi adi kauama ko utedina. Deġoda teks sibo koyai maesidina, naumeki da koi maesina, be aitauġa sibo koya voteyeteyedina, naumeki da ko voteyeteyedina, be aitauġa sibo koya viviredina, naumeki da ko viviredina.

Wainuapaġo na riuvavasaġama

⁸ Nam aitau na maesama ko rabe kwase. Be raġan matabuna umanama koi nuapaġo vivirana. Baninama deġoda banaga ġesaudima koi nuapaġoedina, inam vutuna taumi tarawatu ko vovo teyeteyena. ⁹⁻¹⁰ Be inam raġanine tokare nam aba gewagewanama taudi ġarodie ko voie. Maika riuvavasaġa e riuriuna nama, “Nam turamma debane mui kwa pore, be nam kwa rauvunuġa, nam na purapurama kwa danenedi, nam kwai kwina”. Be riu vavasaġa ġesaudima mate, matabudi a rawateġeidina giu tenaġa nopone, be giunama inam umanama: “Turamma turamma nuamma e paġona, maika tamġa kwawai nuapaġo munaġemna nama” Vutuna aubainama deġoda banaga ġesaudima ġarodie koi nuapaġona, inam vutuna taumi tarawatu ko vovo teyeteyena.

Yanae ko miana

¹¹ Naumeki da nama ko voiiana, be yodi raġandima kitedima ko katai kauedina. Baninama Bada na raġanima kaiteka e tavatavana, nam maika boni raġandie tauda waisumaġa tèwai karee nama. Vutuna aubainama matemima e kaya. ¹² Kupi ġaubonāġa e kovina, be raġan kaiteka e tomtomna. Vutuna aubainama kupi na voiama tà gosedi, be yana na

madama tà ragaudina. ¹³ Tauda matabuda didimanae tà miana, maika banaga suare e miamiana nama. Tauda nam kaua gewegewedima soidima tà voiedi, nam tà tego bua, nam tài soga yababayaba, nam tà iğara yababayaba, bo tà unura. ¹⁴ Inam yabedima avedi, be Yesu Keriso na ġoane nama ko miana. Be nam gewagewa ko wanewanedi da tubuġimima na ġoanama kededima gewegewedima ko voiedi, avedi!

14

Banaga adi waisumaġama gwaġegwaġedi be wairewapanidima

¹ Aitauġa da ami waisumaġama wairewapanidima taumi ami banagama ġesaudima adi waisumaġama vogwaġegwaġedima sibo koya kaisagudina. Be nam adi wainua noġonogotama debedie koi kawa riuriu! ² Banaga aitauġa adi waisumaġama wairewapanidima, taudi nam ai kani tima widiwidinena, ibewa da taudi kani matabuna ta kanikani yababayabedina. Be banaga ġesaudima aitauġa adi waisumaġama vogwaġegwaġedima, taudi nam musara tima kanikanina.* ³ Vutuna aubainama aitau da kani kanikani yababayabinama, tauna banaga musara tautuaġaienama, nam sibo ya kita tuaġie. Be aitau da nam musara taukanina, tauna banaga kanikani yababayabinama nam sibo ya etare, baninama taudi adi waisumaġama ruvane Bada yai aninedina. ⁴ Tam aitau da Bada na taunoyama kwa etaredi? Tam nam dobudi am noyama aba ima kenakenana. Taudi Bada na taunoyama aubainama taunaġa ya kataiedina, da taudi a beku bo ibewa. Be taudi tokare nam ta beku, baninama taudi Bada na rewapanae ta midimidina.

⁵ Banaga adi waisumaġama gwaġegwaġedima taudi raġan dosidima vinevinedima ta viviviviredina. Be banaga ġesaudima ta noġonogotina da raġan dosidi be raġan ġoma matabudi teneteneġidima. Be banaga tenatenāġa nuane ei nuanoġonogota da dego tauna ġorone ya vere. ⁶ Aitau da raġan dosidima vinevinedima e viviviviredina, naumeki da tauna nama e voienna, Bada isanama anikaisuġunama aubainama. Be aitau nam kani matabudi ima kanikanidina, bo aitau da kani matabudi e kanikanidina, naumeki da matabudi nama ta voiana Bada isanama anikaisuġunama aubainama, baninama noġone taudi ta moiragi be ta

* **14:2:** Banaga aitau adi waisumaġama vogwaġegwaġedima, taudi nam musara ti kanikanina, baninama taudi nam ti katai kauena deġoda inam musara veredi bo boita a puyopuyodina museridi. Be aitauġa adi waisumaġama wairewapanidima, taudi musara a kanikani yababayabedina. Be uma kauinama teneġinama vers 5 nopone, dabudine nam musara be raġan vinevinedima.

kanikanina aubainama. ⁷ Tauda nam aitau mabide tama mimia bo mabide tama gurigurina, ⁸ ibewa da tauda tà mimia bo tà gurigurina, inam matabuna Bada aubainama, baninama tauda inam tauna ġaroġaronama. ⁹ Vutuna aubainama Keriso ya guri be ya midisūgu munaġana, da banaga yawayawasanidi be guriguridima, matabudi ewai badedina.

¹⁰ Be yodi tam aba aubainama turamma kwa etare? Bo aba aubainama turamma kwa kitakita tuaġie? Tauda matabuda tokare Mamaitua noġone tà midi, be taunaġa tauda tenatenaġaġa e etaredana, ¹¹ maika girugiruminama porane Mamaitua ya riuriuna nama:

“Taġu Mamaitua mimia nonoġiguma, be ya riuriu kauem-
ina

da tokare banaga matabudi kaġapakague tuapikedima
tai tutumidiridi da ta rauduneegu

be matabudi mududie tai maġatarigu be ta riuna: “Tam
riukaua Mamaitua.”

¹² Be yodi tà kita da tauda tenatenaġaġa tokare dà kauama matabudi Mamaitua noġone tai maġataridina. ¹³ Vutuna aubainama nam turamma turamma kwa etare, avedi! Be kwa kita da nam anibeku kauide turamma kwa voie da na waisumaġe e beku.

¹⁴ Bada Yesu ya riuegu be è katai kauena da nam aba kaninama Mamaitua matane i miramirana. Be deġoda aitau e noġoti da aba kaninama ya miramirana, naumeki da tauna ġarone uma kaninama ya miramira kauana. ¹⁵ Be deġoda am kani yababayababama aubainama turamma kwai nuaboyana, inam kauine tam nam turamma kumawai nuapaġoena. Nam am kani yababayababama aubainama turamma kwa voie da na waisumaġe e beku. Baninama Yesu ya gurina tauna mate aubainama. ¹⁶ Be raġanine am ġoanama nama uma yabedima kwa voivoiedina, kwa kita da am banagama nam tai giuguem.

¹⁷ Mamaitua na waiguyaue kani be tego inam nam banniboruboruna. Ibewa da didimana, suba be mosari Arua Babaue, inam vutudi yaba dosidima. ¹⁸ Be deġoda uma kauide Keriso ġarone koi taunoyana, inam vutuna Mamaitua ewai aninemina, be banaga ta viviremina. ¹⁹ Tauda vutuna aubainama tà raurubu gurata da suba yabedima tà voiedi be yaba ġesaudima mate tà voiedi da, dà waisumaġama tài rewapanana.

²⁰ Nam kani kadi taiye Mamaitua na noyama ko kawa gewegewedi! Kani matabudi inam veredima be deġoda yaba tenaġa kuya kanikani be turamma kuya voie da na waisumaġe ya bekuna, inam tam gewagewa kuya

voiena. ²¹ Vutuna aubainama deḡoda tam musara kuya kanikani bo bia[†] kuya tegotego, bo aiyaba ġesaudima kuya voivoiedi, be inam yabedie turamma na waisumaġama vogwaġagwaġanama kuya voie da ya bekuna, ya verena da uma kauidima nam kwa voiedi. ²² Deḡoda uma kauidie am waisumaġama ewai rewapanana kauana, naumeki da tam be Mamaitua taumiġa ġaromie e kena kwasana. Ya verena da uma kauidie tam nam kwa noġota bekubeku, baninama tam kuya kataiena da uma kauidima matabudi inam naumeki. ²³ Be tam deḡoda uma kauidie kwa noġota bekubekuna, tokare Mamaitua e etaremna, baninama tam nam waisumaġe uma yabedima kuma kanikanidina. Yaba matabuna nam waisumaġe kwa voiedi, inam taudi gewagewa.

15

¹ Tauda aitaūga dà waisumaġama wairewapaninama, naumeki da aitaūga adi waisumaġama gwaġegwaġedima sibo tè sagudina, be nam taudaġa tā sagusagu munaġeda. ² Be tauda tenatenaġaġa sibo dà banagama tè sagudi da adi waisumaġe sibo ai rewapanana. ³ Baninama Keriso nam taunaġa i sagu munaġena, ibewa da girugiruminama porane umanama ya riuna: “Banaga tam a künüremna be inam künurinama taugu mate a künureġuna.” ⁴ Riuwai noġota matabudi boni a girugirumidina, inam taudi waikatakataidama aubainama, da e duġuda be waisumaġe tāi rewapanana da tokare tā naġona marae.

⁵ Mamaitua, vutuna e duġuduġumi be e sagusagumina da ami waisumaġe piripiri matabudi ko dami poredina, tauna ya voiemi da taumi nuemima tenaġa Keriso koi muriwattena. ⁶ Yodibe taumi tokare teneteneġinama da Mamaitua isanama ko kaisuġusuġu tenaġena. Vutuna tauna dà Badama Yesu Keriso Tamanama.

⁷ Taumi ami banabanagama koi aninedina, maika Keriso taumi yai aninemina. Uma kauine nama taumi tokare Mamaitua isanama ko kaikai suġusuġuna. ⁸ Ko noġoti da Yesu Keriso ya yovo be ewai maġatarana da Mamaitua na saugama Jius adi dedema pakanama banegidima ġarodie inam riukaua. Be inam kauine nama Jius banegidima e sagusagudina. ⁹ Be mate tauna ya yovona da eteni banegidima ei yawasanidina, da taudi sibo Mamaitua isanama a kaisuġusuġuna na raukiviverema aubainama, maika girugiruminama porane umanama ya riuna: “Vutuna aubainama taugu eteni banegidima noġodie isamma yà kaisuġuna.

[†] **14:21:** Gurik bonane inam “waen”.

Be taugu yà sarena isamma anikaisuġunama aubainama.”

¹⁰ Be mate ya riuna,

“Taumi eteni banegimima matabumi tauna na banagama mate ko mosari tenaġħana.”

¹¹ Be mate ya riu munaġħana,

“Taumi eteni banegimima matabumi Bada isanama ko kaisuġu,

be matabumi isanama anikaisuġunama saredima ko saredina.”

¹² Be peroveta Aisaia ya riuna,

“Guyau vaunama Jese na dame e tubuġħana, be tauna tokare banaga matabudi ei badedi,

be eteni banegidima matabudi tauna tai sumaġena.”

¹³ Vutuna aubainama taugu yà moimoiragina taumi aubaimima da taumi Bada koi sumaġe, be Mamaitua tauna mosari be suba nopomima ei moġavuna. Be dabudine Arua Babau na rewapanama mate nopomima ei moġavuna. Be taumi ko kataie da tokare Mamaitua neneġarinama e utemina.

Pol uma letanama ya girugirumina, ya giuena

¹⁴ Yau bana, taugu è katai kauena da taumi banaga veremima be uma giudima koya katakatai kauedina be taumi teneteneġinama tokare ami banagama mate koi kawa raukuravivirana. ¹⁵ Taugu uma letanama ma raudebatoragu è girumina taumi ġaromie, da uma yabedima yà riuwainoġotimina aubainama. Taugu nama è voiana, baninama Mamaitua na raukiviveree ¹⁶ taugu Yesu Keriso na taunoyama. Taugu maika pirisi, baninama eteni banegidima ġarodie Mamaitua varinama verenama yà rauguguyena, be taugu yà ġoeġoena da eteni banegidima yà verauġedina Mamaitua ġarone maika puyo, nama Mamaitua e ġoeġoena. Be Arua Babau e voiedi da taudi Mamaitua na banagama ta tubuġħana. ¹⁷ Taugu Mamaitua na taunoyama, be nuaguma ya verena da Yesu Keriso ya riuporeguna, vari verenama yà rauguguyena aubainama. ¹⁸⁻¹⁹ Be yodi taugu nam yaba ġesaudima ama giugiumina, be abaġa Keriso ya voivoiedina, vutudiġa yà giuedina: Arua na rewapanae taugu mataira be voia dosidima è voiedina, be inam kauine Bada Yesu rewapanae ya uteguna da eteni banegidima yà katakataidi da taudi Mamaitua ta voteyeteyena. Be taugu Jerusalemma Keriso varinama rauguguyenama èi karena, naumeiki da Ilirkumma è tavana.

²⁰ Taugu raġan matabuna yà ġoeġoena da vari vere-nama yà rauguguyena banaga aitauġa Yesu Keriso nam ti katakataiena ġarodie. Be aitauġa Yesu Keriso varinama

a vaivaiena, taudi ġarodie nam yà naġo, baninama taugu nam banaga na tuatuama yawai midiri dokena nonoġinama debane vada yà keri. ²¹ Taugu yà voiena maika girugirumina porane ya riuriuna nama,

“Taudi aitaūga rauguguya nam ti vaivaiena, taudi tokare ta vaie be ta kitana.

Be aitaūga da nam varinama ti vaivaiena, taudi tokare ta kataienā.”

²² Vutuna noġotine raġan toitoi verau è raurubuena da sibo ġaromie è verauna, be nam teneteneġina.

Pol Rom naġonama e ġoeġoena

²³ Be yodi uma dobudine yau noyama ya kovina. Suara da suara taugu è ġoeġoena da taumi sibo è kitemina, ²⁴ vutuna aubainama yodi taugu yàwai ogana da yà kitemina Spein naġonama raġanine. Be raġanine taugu ġaromie yà tavana, dabudine taugu taumi mate tài nuavere be tà miana raġan ġaubonaġa. Be muriġa taugu yà ġoeġoena taumi ko sagugu da Speinma yà naġona.

²⁵ Be yodi taugu yà naġonaġona Jerusalemma, Mamaitua na banagama kaisagudima aubainama. ²⁶ Baninama Masedonia be Akaiama tauwai sumāga banegidima ma nuaveredi mane a uteguna da taugu Jerusalemma tauwai sumāga ġesaudima waikaruwaġewaġedima sibo è utedina. ²⁷ Taudi riukaua, ma nuaveredi mane a uteguna. Be taugu yà noġonoġotina da inam naumeki nama a voiana, baninama eteni banegidima taudi varinama verenama Jius ġarodie a paġona, vutuna aubainama naumeki da tubuġe sibo a sagudina. ²⁸ Be raġanine Jerusalemma tauwai sumāga waikaruwaġewaġedima mane ya utedi e kovikovina murine, taugu yau vaġaima yài karena Spein aubainama. Be inam raġanine taugu yà vakitemina. ²⁹ Taugu è kataienā da raġanine ġaromie yà veraverauna, Keriso waiaiaina dosinama e uteguna taumi aubaimima.

³⁰ Yau bana, Bada Yesu Keriso isane be Arua na wainu-apäoe taugu yàwai baġa vavasaġmina da yau pirpirie ko sagugu da Mamaitua ġarone aubaiguma ko moiragina. ³¹ Ko moiragi da Mamaitua e midi ġaġarigu da Judia banegidima gewegewedima nam sibo a vunuġigu. Be mate ko moiragi da yau noyama Jerusalem nopone tauwai suamaġa sibo ai aninena. ³² Yodibe Mamaitua na ġoane taugu ma nuaveregu yà tavana taumi ġaromie da yà sipere, be taumi mate tài nuavere tenaġana. ³³ Mamaitua, suba tauvoienama taumi matabumi ġaromie. Inam riukaua.

16

Pol na waikaiwama

¹ Taugu nuvudama Fibī ġaromie yàwai maġatarina. Tauna Senkiria ekalesia adi taunoyama waivinama. ² Be yàwai baġemina da tauna ko rabe kauena, nema Bada na taunoyama ġesaudima ko raberabe kauedina nama. Baninama tauna banaga toitoi e sagusagu kauedina be taugu mate.

³ Yau banagama Prisila be Akwila* ko riuedina yàwai kaiwedina, taudi Yesu Keriso na noyae taukaisaguguma. ⁴ Be mate taudi adi yawasanama a tuaġaiedi be ai uta munaġedi da ai sasaranana, saguguma aubainama. Be inam kauinama aubainama taugu yàwai kaiwa vavasaġedina, nam tauguġa be eteni nopodie ekalesia matabudi mate kawai kaiwedina uma kauinama aubainama. ⁵ Be ekalesia Prisila be Akwila adi vadae tawai rawateġeidina mate yàwai kaiwedina.

Be tura yaġaguma Epainetas mate ko riuena yàwai kaiwena, tauna vutuna Eisia provinsnama nopone yai Kuristen dokana. ⁶ Meri ko riuena yàwai kaiwena, tauna vutuna aubaimima ya noya guratana. ⁷ Andronikus be Junias ko riuedina yàwai kaiwedina. Taudi rabui taugu yau damma nopone be dibure a biri tenaġemina. Apasol matabudi taudi rabui a vivivivira kauedina, taudi Keriso ai sumaġa dokena, muridie taugu ēi sumaġana. ⁸ Ampliatas ko riuena yàwai kaiwena, baninama Bada na wainuapaġoe tauna turaguma. ⁹ Urbanus ko riuena yàwai kaiwena, tauna Yesu Keriso na noyae taukaisagumaima. Be tura yaġaguma Stakis mate, ko riuena yàwai kaiwena.

¹⁰ Apeles ko riuena yàwai kaiwena, tauna na waisumaġama Kerisoe a kita da yai rewapana kauana. Be Aristobulus na vadama banegidima mate ko riuedina da yàwai kaiwedina. ¹¹ Herodion ko riuena yàwai kaiwena, tauna yau damma nopone. Be Nasisus na vadama banegidima mate ko riuedina yàwai kaiwedina, taudi matabudi Bada tauwai sumaġenama. ¹² Tiripina be Tiriposa ko riuedina yàwai kaiwedina, inam waiwaividima rabui taudi Bada ġarone ta noyanoya guratana. Be turaguma Parisi mate ko riuena yàwai kaiwena, inam waivinama mate Bada ġarone ya noya guratana. ¹³ Rupas ko riuena yàwai kaiwena, tauna Bada ya vinena, be tinanama mate ko riuena yàwai kaiwena, baninama tauna ya rabeguna maika kabe tinaġomigu.

¹⁴ Asinkiritas, Pelegon, Hemes, Patorobas ko riuedina matabudi yàwai kaiwedina. Be Hemes na banagama

* **16:3:** ‘Prisila’ tauna waivi, be na badama ‘Akwila’.

ḡesaudima ġarone, mate ko riuedina da yàwai kaiwedina. ¹⁵ Pilogolus, Julia, Nereus be nuvunama mate, be Olimpas be tauwai sumaġa matabudi tauna ġarone, ko riuedina da matabudi yàwai kaiwedina. ¹⁶ Be Keriso na ekalesiama matabudi adi waikaiwama taumi ġaromie. Be wainuapaġoe koi kaiwa vivirana waisuruva mate.

Pol na giuma damonama

¹⁷ Yau bana, yà riuriu vavasaġemina da ko kita kauana, banaga aitaugā eklesia taudariġedima, nam koi turanedi. Baninama aba waikatakatainama koya paġopaqona, inam banegidima ami waisumaġe tokare ta kawa gewegewemina. ¹⁸ Inam banegidima taudi nam Yesu Keriso na noyama tima voivoiena, be taudiġa ta sagusagu munaġedina. Adi giu yaġayaġae be adi gwayae taudi banaga adi noġotama vogwaġegwaġedima tawai kedadoka waigewedina. ¹⁹ Banaga matabudi a vaiemi da taumi matabumi Bada ko vovo teyeteyena. Vutuna aubainama nuaguma ya vere kauana. Be taugu yà ġoegoena da taumi raġan matabuna vere adi kedama ko katai kauedina. Be gewagewa kedane nam ko naġo. ²⁰ Raġan ġaubonaġa Mamaitua suba tauvoienama tauna e voiemi da Seitan kaġemie e vapisana. Be dà Badama Yesu na raukiviverema ġaromie e kenana.

²¹ Timoti Yesu Keriso na noyae taukaisaguguma, tauna ewai kaiwemina. Be yau damma banegidima Lusias, Jeson be Sosipata, taudi mate tawai kaiwemina.

²² Taugu Tertius, vutuna Pol aba e giugiuena yà girugirumina, Bada isane yàwai kaiwemina.

²³ Be Gaiyas mate ewai kaiwemina, tauna na vadae taugu be eklesia kawai rawateġeimina. Be Erastas tauna uma meagaine mane taurabenama, be turadama Kwatius, taudi mate tawai kaiwemina. ²⁴ Bada Yesu Keriso na raukiviverema matabumi ġaromie e kenana. Inam riukaua![†]

Bada isanama tà kaisuġuna

²⁵ Taugu yodi vari verenama ġaromie è rauguguyena, aubainama Mamaitua nimane yà biribirimina, da tauna vutuna e rabe kauemi be e voiemi da ami waisumaġe koi rewapanana Bada isane. Inam Mamaitua na ogama taumi eteni ġaromie da yawasana ko paġona. Pakane boni uma kauinama semosemonama. ²⁶ Be yodi Mamaitua ya riu vavasaġana da inam varinama verenama dobu matabuna tà rauguguyena da banaga matabudi Keriso tai sumaġe be ta voteyeteyena. Peroveta nama a girumina. ²⁷ Mamaitua taunaġa nuauyauya baneginama. Tauna Yesu Kerisoe yaba

[†] **16:24:** Gurik baibol ḡesaudine uma versnama 24 nam ima kenakenana.

matabudi ya voiedina. Vutuna aubainama tauda isanama tà kaisuğusuğu nonoğena. Inam riukaua.

Korint 1 adi letama pakanama

Pol na waikaiwama

Kapore yau banagama Korint nopone miemienimima,

¹ Taugu Pol, Yesu Keriso na taunoyama, Mamaitua ya yokoegu be ya vinegu da taugu apasol, Mamaitua varinama verenama yà rauguguyena. Taugu be turadama Sostenes ² mate uma letanama ka girugirumina, taumi Mamaitua na ekalesiama Korint nopone miemienimima ëaromie. Mamaitua tauwai suma  a dobu matabuna ya vinedina, taudi vutudi Keriso isane tawai suma  a be ta moimoiragina. Be taumi mate Yesu Keriso ya kawa babaumi be ya vinemi da taumi tauna ëaro  aronama. Tauna taudi be tauda matabuda d   Badama.

³ Mamaitua Tamadama be Bada Yesu Keriso adi raukivivere be adi subama ëaromie.

⁴⁻⁵ Ra  an matabuna taugu Mamaitua y  wai kaiwena taumi aubaimima, baninama tauna Yesu Kerisoe puyo toitoi ya utemina. Tauna yai guyauemi da taurauguguya veredima ya utemina, be taumi ami kataima ya morabana. ⁶ Koya kita, boni è riuemina da Keriso uma yabedima aubaimima e voiedina. ⁷ Tauna Arua puyonama matabudi ya utemina, be yodi taumi nuatau  a koi rabana naumeki da Yesu Keriso d   Badama e verau muna  ana. ⁸ Tauna e kawa rewapanimi da ami waisuma  e nam ko beku, be na ra  anie tokare nam aitau tenetene  ina da ei wavumi. ⁹ Mamaitua tauna patupatutunama, be ya vinemi da taumi natunama d   Badama Yesu Keriso mate koi rawate  eimina.

Dari  a eklesia nopone

¹⁰ Yau bana, d   Badama Yesu isane y   riuriu vavasa  emina da nam taumi  a koi kawa riuriu. Taumi sibo koyai anina tena  a da nuenuemima be ami no  otama sibo koyai tena  edina, be nam sibo koya dari  a muna  em. ¹¹ Banaga   esaudima Kloi na vadae miemienidima ai variguna da taumi kowai kawa riuriuna. ¹² Taugu aba y   riuriuemina inam uma:   esaumima ko riuriuna, “Taugu Pol y  wai muriwatanena”; be   esaumima, “Taugu Apolos y  wai muriwatanena”; be   esaumima, “Taugu Pita* y  wai muriwatanena”; be   esaumima, “Taugu Keriso y  wai muriwatenena”. Taumi inam aba kowai tubu  i? ¹³ Keriso nama ya dari  a muna  e,

* 1:12: Gurik bonane ya riuna: Kepas

bo? Pol tauna vutuna aubaimima a tuparatu, bo? Taumi Pol isane koya babataito, bo? ¹⁴ Taugu èi nuavere da nam aitau ei babataitonā, be Gaiyas da Krisipas taudīgā èi babataitodina, ¹⁵ be nam aitau tenaḡā dobudi kwa riuna da taugu isague kuya babataito. ¹⁶ O riukaua, taugu yodi è noḡotina da Stepen be na vadama banegidima mate èi babataitodina. Be uma taudi muridie nam aitau e noḡotina da èi babataitonā, ibewa.

Korosi varinama

¹⁷ Keriso nam waibabataito aubainama i riuporeguna, ibewa da vari verenama rauguguyenama aubainama. Be taugu nam nuauyauya banegidima maika yau rauguguye yà gwayemi. Ibewa, nam i vere da taugu banaga yà gwayedi be tai sumaḡegu, ibewa be taudi korosi varinama verenama vutuna sibo ai sumaḡena, baninama vari verenama inam yai rewapanana vavasaḡāna. ¹⁸ Be katai banegidima ġarodie korosi varinama kitama maika kabe giu yababayaba. Be tauda Mamaitua yai yawasanidana, tauda tè kataienā da uma vari-nama inam Mamaitua na rewapanama ewai maḡatarina. ¹⁹ Be girugiruminama poranama umanama ya riuna,

“Taugu tokare banaga adi nuauyauyama yà kawa gewegewedi,
be adi kataima mate taugu yà vayaḡotidina be tai kavena.”

²⁰ Ko kita, raḡān matabuna katai be nuauyauya banegidima Mamaitua na kedama tauwanenama, taudi yodi deḡo? Mamaitua ya voie da taudi adi nuauyauyama ya kawa buedina, ²¹ vutuna aubainama taudi adi nuauyauyae nam Mamaitua ti banavina. Avedi da vari verenama kitānāma maika wainua buabuanama, Mamaitua ya voie da banaga vari verenama a rauguguyenā, be dobudine aitaūga awai sumaḡāna, taudi yawasana a banavina. ²² Jius banegidima taudi mataira kitānāma ta ḡoeḡoena, be eteni banegidima nuauyauya ta wanewanena, ²³ be tauda Keriso tupatuparatunama tā rarauguguyenā. Vutuna aubainama Jius taudi nuedima tawai medina, be eteni banegidima ta noḡonoḡotina da tauda kabe tè buabua. ²⁴ Be tauda Jius be eteni banegidama aitaūga Mamaitua ya yokoyokoedana tauda Kerisoe, Mamaitua na rewapanana be na nuauyauyama tè kataienā. Baninama Kerisoe tauda Mamaitua tè banavina. ²⁵ Mamaitua na kedama kitedima maika kabe wainua buebuedi, be yaḡoro tauda ġarode na kataima ya saḡa vavasaḡāna. Be avedi da Mamaitua na rewapanama kitānāma kabe vogwaḡegwaḡedi, be

yaḡoro tauna yai rewapanama vavasaḡana, nam banaga adi rewapanama maika.

Mamaitua nema banaga e vinevinedi

²⁶ Yau bana, ko kita munaḡemi, taumi aitaugā Mamaitua ya yokoyokoemina. Banaga matedie taumi nopomie nam banaga toitoi katakataidi, bo banaga dosidi, bo aitau waiguyaue tubutubugina. ²⁷ Mamaitua banaga buebuedima ya vinedina da katai banegidima ei tunimayaḡidina, be kamai banabanaga ya vinedina da waibada dosidima banegidima ei tunimayaḡidina. ²⁸ Be kitatuaḡai banegidima Mamaitua ya vinedina da banaga dosidima e kawa gewegewedina. ²⁹ Mamaitua nama ya voiana, baninama tauna noḡone nam aitau e kawa saḡe munaḡena.

³⁰ Mamaitua ya voiemi da taumi Yesu Kerisoe ko mi-amiana. Taune nuauyauya tè banavina, baninama taune Mamaitua ya kawa didimanida, ya kawa babauda be yai yawasanidana. ³¹ Vutuna aubainama girugiruminama e riuriuna, nama tā voiana:

“Nam aitau taunaḡa e kawa saḡe munaḡe,

ibewa be Bada tauna e kawa saḡena yaba matabuna aubainama.”

2

Keriso tupatuparatumana varinama

¹ Yau bana, raḡanine taugu ḡaromie è tavana, taugu nam gwaya giudima be nuauyeuyedima e ragaudi be ḡaromie Mamaitua varinama e rauguguyena. ² Ibewa, be yau ogama è taraḡina da Keriso tupatuparatumana, taunaḡa sibo è rauguguyena. ³ Be raḡanine taugu taumi ḡaromie mate, taugu ma nairigu be ma gusugusugu. ⁴ Be vari è rarauguguyena, nam nuauyauya banegidima maika è rarauguguyana da sibo è gwayemi. Ibewa da taugu Arua Babau na rewapanama ḡaromie èi maḡatarina. ⁵ Baninama taugu yà ḡoeḡoena da ami waisumaḡama Mamaitua na rewapanae e tubuḡana, be nam taugu yau nuauyauya.

Arua na nuauyauyama

⁶ Tauwai sumaḡa aitaugā adi noḡotama bagibaginama taudi a kataien da yau giūma nopone inam Mamaitua na nuauyauyama ya moḡavuna, be nam uma dobunama na nuauyauyama, bo dobu babadidima adi nuauyauyama, ibewa. Taudi tokare matabudi ta nuayaḡotana. ⁷ Mamaitua na nuauyauyama taugu yà rauguguyena. Muriḡa da Mamaitua dobu ya voiena, tauna na ogama ya taraḡina da tokare tauna na waiguyauma e dariḡedana. Be uma organama bonideḡo be

semosemoe ya kenakenana. ⁸ Dobu babadidima matabudi Mamaitua na nuauyauyama nam ti kataiena, be değoda ti kataiena, tokare nam sibo neneğara Badanama a tuparatu. ⁹ Be taudi nam ti kataiena, baninama girugiruminama porane e riuriuna nama,

“Mamaitua yaba veredima ya vokaukauedina,
taudi aitaugā tauna tauwai nuapağoenama aubaidima.
Be uma yabedima nam airağan aitau i kita bo i vaiena.

Be nam aitau yabanama i nuanoğongoğotena.”

¹⁰ Be tauda ġarode uma yabedima Arue Mamaitua yai mağataridina, baninama Arua Babau tauna Mamaitua na noğotama semosemodima matabudi ya kataiedina. ¹¹ Inam kauinama teneğinama nama banaga. Nam aitau banaga noponama ima katakataiena, ibewa da banaga na aruama taunağā. Be inam kauinama teneğine nama Mamaitua. Nam aitau Mamaitua noponama ima katakataiena, ibewa da Aruinama taunağā. ¹² Be tauda aba Mamaitua e uteutedana tokare tà kataiedina, baninama tauna Aruinama ya utedana aubainama be nam dobu aruine. ¹³ Vutuna aubainama nam banaga adi nuauyauyae kama rarauguguyana, ibewa da Mamaitua Aruinama aba ewai kataiemaina, nama Arua na riukauama ka rarauguguyena. ¹⁴ Banaga aitaugā ġarodie nam Arua Babau, taudi yaba Mamaitua Aruinama ġarone be ta yovoyovona, taudi nam timawai aninedina, baninama taudi ġarodie anikitanama kabe yaba wainua buebuedi, vutuna aubainama nam tima katakataiedina. Mamaitua na kauama matabudi Arue sibo tè kita wairuvedina. ¹⁵ Banaga aitau nopone Arua Babau e miamiana, tauna tokare banaga be yaba matabudi e kita wairuvedina, be nam ai banaga teneteneğina da tauna ta kita wairuva.

¹⁶ “Aitau Bada na noğotama ya kataie da tauna sibo Bada ya raukure?”

Be Keriso na noğotama Arue tauda tè pagona.

3

Tauwai sumağā adi noğotama yağoro nam i porana

¹ Yau bana, taugu noğone è tavana, taugu nam e giuemina maika Arua banegidima ġarodie è giugiuna nama, ibewa da yau giuma maika dobu banegidima ġarodie, baninama Kerisoe taumi yağoro wawaimima. ² Vutuna aubainama susu* è utemina, be nam kani badobadonama e utemina, baninama taumi nam teneteneğimi. Be yodi taumi yağoro ami noğotama nam teneteneğina. ³ Taumi yağoro dobu banegidima maika, baninama taumi yağoro nopomima

* 3:2: ‘Susu’ be ‘kani badobadonama’ inam waikatakatai.

unura be waikawa riuriu ya moğavuna. Taumi ko miamiana kitemima maika kabe banaga ġoma. ⁴ Değoda waria kwa riuna, “Taugu Pol yàwai muriwatanena”, be waria kwa riuna, “Taugu Apolos yàwai muriwatanena”, inam kauine taumi ko voivoiana maika kabe banaga yababayaba.

⁵ Naumeki da yodi Apolos tauna aitau? Be Pol tauna aitau? Tauma taunoya ġoma. Tauma kè kaisagumi da taumi kowai sumağana. Tauma tenatenaġaġa ama noyama aba Bada ya riuriuemaina nama ka voivoiedina. ⁶ Taugu pesi è kumana, be Apolos tauna pesi yai kutuvina, be Mamaitua yai gogona. ⁷ Vutuna aubainama aitau da taukuma be tauwai kutuva, taudi inam nam aiyaba, be Mamaitua tauna pesi tauwai gogonama, tauna vutuna inam kaua dosinama. ⁸ Taukuma be tauwai kutuva taudi ta noya tenaġana da adi noyama votanama e tubuġana, be tokare adi noyama na ruvae nama adi maesama ta paġona. ⁹ Naumeki da tauma yodi Mamaitua na taunoyama. Be taumi Mamaitua na sipi, be you na vadama.

¹⁰ Mamaitua na raukiviveree kamda noyanama ya uteuteguna da taugu Mamaitua na tuatuama yeku èi midiridina, be banaga ġesaudima uma yekunama debane vada a keridina. Be tauda matabuda sibo tè kita kae da nema sibo vada tè keri bakedina. ¹¹ Be Mamaitua na yekuma inam Yesu Keriso. Vutuna aubainama nam aitau teneteneġina da yeku ġesaudima ei midiridi ekalesia kerinama aubainama. ¹² Be yodi tauwai sumağ tabu be tabu uma yekunama debane Mamaitua na vadama a kerina. Ĝesaudima adi rauvada kerima purepuredima inam gold, siruva be yeku waimatakanikanidima. Be ġesaudima adi rauvada kerima purepuredima inam kai, mui pokidima be reġi. ¹³ Be Bada na raġanie tokare uma noyedima adi verema tà kitedina. Dobudine Mamaitua adi noyama kai karakaratine e raurubudina, be banaga tenatenaġaġa adi noyama na verema e kitedina. ¹⁴ Be değoda aitau na vadama kai nam e kara goru, tauna tokare na maesama e paġona. ¹⁵ Be aitau na vadama kai e kara goruna, naumeki da na noyama matabuna ya kovina. Tauna kabe kai menane be i tavatava, taunaġa tokare e yawasanana be na noyama matabuna kai e kara goruna.

¹⁶ Koya kataie bo ibewa da taumi Mamaitua na vadama, be Aruinama taumi nopomie e miamiana? ¹⁷ Be aitau da Mamaitua na vadanama e kawa gewagewana, Mamaitua tauna mate e kawa gewagewana. Baninama Mamaitua na vadama inam babaunama, be inam vadanama vutuna taumi.

Mara nuauyauyana be dobu nuauyauyanama[†]

¹⁸ Nam koi kaikaiyovu munağemi! Değoda tam aitau kwa noğonoğotina da banaga matedie tam nuauyauya banegimma. Naumeki da tam sibo banaga matedie kuya voia munağem da tam kabe buabuam, yodibe Mamaitua matane tam tokare nuauyauya banegimma kwa tubuğana.

¹⁹ Baninama Mamaitua matane banaga adi nuauyauyama inam ya bua kauana. Maika girugiruminama porane ya riuna umanama,

“Mamaitua taudi adi nuauyauyae ya tikonidi be a bekuna”; ²⁰ be,

“Bada banaga adi noğotama ya kataiedina da taudi a bua kauana.”

²¹ Vutuna aubainama banaga ami nuauyauyama aubainama nam ko seğara munağemi, avedi! Yaba matabudi inam taumi ġaromima. ²² Avedi da Pol bo Apolos bo Pita bo dobu bo yawasana bo guri bo yaba yodi ta tubutubuğana bo tokare ta tubuğana, matabudi inam taumi ġaromima, ²³ be taumi inam Keriso ġaroğaronama, be Keriso tauna Mamaitua ġaronama.

4

Bada taunağā apasol e kitakita wairuvedina

¹ Taumi sibo koya kitamaina maika Keriso na taunoyama. Tauna ya birimai da Mamaitua na riukauama semosemodima taurabedima. ² Tauma tauwai rabaraba. Vutuna aubainama sibo kèi patutu kauana. ³ Be değoda taumi ko etaregu bo banaga ġesaudima ta etaetareguna, inam nam ama siesievina. Be taugu mate nam ama etaetara munağeguna. ⁴ Be avedi da yau noğotama didimaninama, be yağoro tokare Mamaitua e kita wairuvaguna da taugu naumeki bo ibewa.

⁵ Vutuna aubainama nam ko etara dokadoka, be koi raba da Bada na kaba verauma rağaninama e tavana. Rağanine Bada e dobina, tauna yaba matabudi waikupikupie kenekenedima e rawayanedi be banaga matabudi ta kitana, da banaga tenatenağāga nuanama nponama nema maika kitana. Yodibe banaga matabuna ta kataie da aba aubainama tauda Bada na noyama tè voivoie. Dobudine Mamaitua tauda tenatenağāga dà noyama na ruvae nama e kawa sağedəna.

⁶ Yau bana, taugu yà ġoēgoena da ami noğote yà sagumina. Vutuna aubainama taugu inam giunama Apolos be taugu

[†] **3:17:** Vers 18-23 nōpone ‘dibu nuauyauyanama’ inam banaga aitauğā dibu na ġoanama kauidima tauvoiedina. Maika soi, bo maika boita taurauduneedima, bo maika vaivai tauwai tarapiriedima, be nama dibu kauidima ġesaudima mate.

tunimaie è boruna da taumi tauma rabui ko noğotimai, be buka aba e riuriuena, nama koi muriwatanena. Vutuna aubainama taumi nam banaga tenağɑ isanama ko kawa sağe be ġesaunɑma isanama ko boru waiyovoğe. ⁷ Yau bana, nemanama? Tam aitau ya voiem da banaga dosimma kabe ku miamia? Tam yaba matabuna Mamaitua ġarone kuya pağona. Be aba aubainama yodi kwa voivoiena da kabe tam mabime ku pağopağō?

⁸ Taumi ko noğonogötina da Arua na puyoma matabudi kabe kaite koya ragaudi? Taumiğɑ agunai Mamaitua matane koyai guyauna, be tauma ibewa. Taugu yà ġoeğoenɑ da taumi sibo koyai rawaguyau, yodibe tauma mate sibo kèi rawaguyauna. ⁹ Anikitanama taugu ġarogue, tauma apasol Mamaitua ya voiemaina da tauma kabe kamai banabanaga. Anea be banaga matabudi ta kitamai be ta riuriuemaina da tauma gurigurimaima.

¹⁰ Taumiğɑ banaga nuanuauyayemima be Keriso kana taiye tauma banaga buabuamaima. Taumi ami waisumağɑma agunai yai rewapanā kauana, be tauma ama waisumağɑma ya gwağɑna, bo? Banaga taumi ta viviviviremina be tauma ta kitakita tuağɑiemaina. ¹¹ Rağan totoi tauma kani e karakaratimai, nuamaima e ġasağasara, ama garama ta gewagewa, banaga ta riğarıga vireviremaina. Nam ama kaba miama değο, ¹² be rağan matabuna nimamaie ka noyanoya gurata da aba ka banabanavina. Rağanine banaga ta kunukunuremaina, tauma waiaiaina ka uteutedina, be rağanine banaga ta raraukivi gewegewemaina, tauma ka kenakena porena. ¹³ Rağanine banaga tawai menemaina, tauma giu veredie taudi mate ka giugiuna. Tauma maika uma dobunama na yoğiyogima, be banaga matedie tauma maika mui.

¹⁴ Taugu uma yabedima yà girugirumidina nam sibo yà voiemi da ko tunimayağɑ, ibewa! Taugu yà girugirumana taumi nuemima yà boruna, baninama taumi taugu yau seda yağɑma aubainama. ¹⁵ Avedi da taumi taurabemima 10 tausand nama, be tametamemima nam ti toina. Be taugu rağanine vari verenama ġaromie è rarauguguyena, inam rağanine Yesu Kerisoe taugu taumi tamemima è tubuğana. ¹⁶ Vutuna aubainama yà riuriu vavasağemina da taumi taugu koi tupotupoğɑneguna.

¹⁷ Inam vutudi aubaidima taugu natuguma Timoti, nuaguma taupağonama, è riuporena ġaromie. Tauna patutu baneginama Bada ġarone be tauna taugu yau yawasana matabuna Yesu Kerisoe ei kataimina, inam vutuna ekalesia matabudi nopodie è rarauguguyedina.

¹⁸ Taumi ġesaumima ko rarau guyaguyau be ko noġonoġotina da taugu nam kabe ġaromie yà tava. ¹⁹ Ibewa, deġoda Bada e ġoena nama, taugu raġan ġaubonaġa taumi ġaromie yà tavana. Yodibe taugu rauguyaguyau banegidima yà kitedina da taudi ġarodie rewapanama mate bo ta giugiu yababayaba. ²⁰ Baninama Mamaitua na waiguyauma inam nam giu taunaġa. Ibewa da rewapanama mate. ²¹ Yodi taumi aba ko ġoeġoe? Taugu yà verau be yà kovoġimi, bo wainuapaġo be voyaġota mate yà verau?

5

Waikawa badara ekalesia nōpone

¹ Taugu varimima è vaiena da taumi nōpomie banaga tenaġa e ġeraġerana. Tauġoma tenaġa na kavarama mate tawai kawa badarana. Inam kauinama ya gewagewa vavasaġana, eteni banegidima nam nama tima voivoiana. ² Be taumi yaġoro ko rarau guyaguyau, bo? Taumi inam kauinama aubainama sibo koyai nuaboya kaua, be inam tauġominama sibo ekalesiae be koya boru dobiġena.

³ Avedi da taugu nam tubuġe ġaromie be Arue taugu taumi mate be kaite uma tauġominama è etarena. ⁴ Raġanine taumi dà Badama Yesu isane kowai rawateġeie, taugu Arue taumi mate be dà Badama Yesu na rewapanama mate poude, ⁵ dobudine inam tauġominama Seitan nimane ko boru da Seitan tauna tubuġinama e kawa gewagewana. Be Bada na raġanie Mamaitua inam tauġominama aruinama tokare agunai ei yawasanina.

⁶ Inam kauinama aubainama nam i verena da taumi sibo koya rauguyaguyau. Koya kataie bo ibewa da yist ġaubonama tokare buredi matabuna e sasanana? ⁷ Vutuna aubainama yist ko kaipore da taumi maika buredi ġoma ko miana, be nam yist mate. Ko noġoti da Keriso tauna Naġopore puyonama, be tauna taumi ġaromie ya gurina da yodi taumi inam maika buredi ġoma, nam yist mate. ⁸ Vutuna aubainama yist matabuna ko kaiporena, inam vutuna gewagewa be mira. Be ko miana waipatutu be riukaua banegidima maika.

⁹ Taugu è girumana taumi ġaromie da ġera banegidima nam sibo mate koyai popo. ¹⁰ Taugu yodi nam eteni banegidima ama giuguedina, ibewa. Avedi da taudi ta ġeraġera, tawai gogo, ta danedanene bo kokoitau ta rarau duneedina. Deġoda nama sibo è riuemina, taumi tokare uma dobunama sibo koya dobi porena. ¹¹ Ibewa, be aitauġa ta riuriu munaġedina da taudi Keriso tauwai sumaġenama, be yaġoro taudi ta ġeraġera, tawai gogo, kokoitau ta rarau

duneedi, tawai mena, ta tegotego bua bo ta danedanenena, taudi vutudi nam taumi mate sibo koyai popo bo nam mate koya kani gogona.

¹² Tauda eteni banegidima nam sibo tè kita wairuvedi, be ekalesia banegidima taudi sibo tè kita wairuvedina.

¹³ Mamaitua taunağā eteni banegidima e etaredina. Be inam tauğominama ġerağeranama inam taumi ami noyama da ko etare be ko boru dobiğena.

6

Tauwai sumağā nam sibo adi banagama ġesaudima a etaredi

¹ Değoda taumi aitaugā turamma turamma ġarone piripiri e kenakenana, taumi sibo tauwai sumağā ġesaudima ġarodie koya nağō da taudi ai tara piriemina. Be gewagewa tauwai tarapirienama nam waiwaisumeğina ġarone nam ko nağō da ei tarapiriemi. ² Koya kataie bo ibewa da taumi Mamaitua na damma tokare dobu matabuna ko etarena? Be yodi taumi nam teneteneğina da piripiri ġauğaubodima sibo ġaromie koyai tarapiriedi, bo? ³ Ko noğoti da tauda tokare anea tà etaredina! Vutuna aubainama taumi mate piripiri ġauğaubodima ġaromie, sibo koya kawa didimanidina. ⁴ Be yodi değoda turamma turamma ġarone piripiri e kenakenana, aba aubainama banaga nam waiwaisumeğima ko vinevinedinia da taudi sibo a etaremina? Inam kauinama nam i verena, baninama taudi nam ekalesiae tima mi-amiana. ⁵ Uma kauinama aubainama taumi sibo koya tunimayağana, baninama taumi nopomie nam aitau tenağā teneteneğina, da tauna tokare tauwai sumağā ei tara piriedi. ⁶ Aba aubainama taumi tauwai sumağā taumiğā ko etaetara munağemi? Be aba aubainama uma kauinama eteni banegidima noğodie ko voivoiedi? Inam kauinama ya gewagewa kauana.

⁷ Taumi ko etaetara munağemina, uma kauinama ewai mağatara da ami waisumağe kaite koya bekuna. Rağanine banaga gewagewa ta voivoiena ġaromie, taumi tokare nam koya dami pore? Bo değoda banaga ta kaikaiyovuemina, taumi tokare nam koya vaia pore? ⁸ Be avedi da taumi tauwai sumağā, be taumi yağoro ko kawakawa gewegewemi, be kowai kaikaiyovu munağemina.

⁹ Ko noğoti da banaga gewagewa tauvoienama taudi tokare nam Mamaitua na waiguyauma nopone ta sağā. Nam koi kaikaiyovu munağemi! Değoda banaga ta badabadar, kokoitau ta rarau duneedi, ta ġerağera, bo değoda tautauğoma taudiğā tawai kawa soğā, bo waiwaivi

taudiğā tawai kawa soğā, ¹⁰ bo taudanedanene, tauwai gogo, tautegotegobua, tauwai mena bo tauwai kaikaiyovu, uma banegidima matabudi tokare nam Mamaitua na waiguyauma nopone ta sağā. ¹¹ Be noğone ġesaumima uma kauidima nama koya voivoiedina. Be yodi taumi Yesu Keriso kosinine ya koğemina, be Arua Babau nopolomie e miamiana. Vutuna aubainama Mamaitua yodi yai aninemina.

Tubuğidama inam Arua Babau na vadama

¹² Banaga ġesaudima ta riuriuna umanama: “Yaba matabuna Bada nam imawai ġakedina, taugu ġarogue teneteneğinama da aiyaba yà voiena.” Inam riukaua, be nam yaba matabudi tokare ta sagumi da ko mia kaua. Taugu teneteneğinama da uma yabedima matabudi yà voiedina, be taugu nam ama ġoēgoena da uma yabedima tai badegu. ¹³ “Kani inam kapo aubainama, be kapo inam kani aubainama”. Inam riukaua, be Mamaitua inam taudi tokare e kawa gewegewedina. Be badara inam kaua ġesau. Tubuğidama inam nam badara aubaina, ibewa! Tubuğidama inam Bada na noyama aubainama, be Bada tubuğidama ewai badena. ¹⁴ Mamaitua na rewapanae tauna Bada Yesu gurie be ya kawa midisüġu munaġena, aubainama tauna tokare tauda mate e kawa midisüġu munaġedana. ¹⁵ Ko noğoti da tubuğimima inam Keriso ragaraganama. Vutuna aubainama nam airaġan taubadabadar mate koi rawateğei, baninama tubuğimima inam Keriso ragaraganama. ¹⁶ Taumi koya kataie bo ibewa da banaga aitau tubuğinama taubadabadar mate tai rawateğeidina, inam yodi tubuġe taudi tenaġa. Baninama girugiruminama poranama umanama e riuriuna, “Taudi rabuidi tokare tubuġe tenaġa.” ¹⁷ Be aitaüğa Bada mate ta rawateğeidina, taudi tokare Arue tenaġa.

¹⁸ Vutuna aubainama badara, naumeiki da ko gose pore! Gewagewa ġidoidima taudi ġavoe ta kenakenana, be yaġoro gewagewa. Be badara inam tubuğimie e kenakenana, aubainama tubuğimima ko kawakawa mira vavasaġena. ¹⁹ Tubuğimima inam Arua Babau na vadama. Mamaitua tauna Arua ya utemina, be yodi inam Aruinama nopolomie e miamiana. Taumi nam mabimie komawai bademina. ²⁰ Taumi maesimima ya moraba kauana, be Yesu Kersio ya gimerimina. Vutuna aubainama tubuğimie Mamaitua ko vivirena.

Nagi na kauama

¹ Taumi letae aba koya riuriueguna, vutuna yodi yà paribeemina:

Inam ya verena deḡoda banaga nam tai naḡi. ² Be bani-nama badara yababayaba kana taiye, naumeki da tauḡoma sibo mabine na waivima ya naḡina, be waivi sibo mabine na tauḡomama ya naḡina.

³ Be tauḡoma sibo naḡi na yawasanae na waivima ġarone ya miana, be waivi sibo naḡi na yawasanae na tauḡomama sibo ġarone ya miana. ⁴ Waivi tubuḡinama nam tau-naḡa imawai badena, ibewa da tauḡoma ewai badena. Be teneġinama nama tauḡoma, tubuḡinama nam taunaḡa imawai badena, ibewa da waivi ewai badena. ⁵ Nam tamḡa kwa taudidi munaḡem! Be deḡoda koi anina mu-naḡemina, naumeki da dobudine raḡan ġaubonaḡa ko tau-miana, moiragi aubainama. Be murine koi rawategei mu-naḡemina da Seitan ami gwaḡae nam e raurubumi, be taumi tokare nam badare ko beku. ⁶ Uma kauinama nama yà riuriuemina, inam sagumima aubainama. Be inam nam Bada na riuvavasaḡa, ibewa. ⁷ Taugu yà noḡonoḡotina da banaga matabudi sibo maika taugu, be banaga tenatenaḡaḡa adi puyoma tabu be tabu Mamaitua ya utedina.

⁸ Be aitaugā da kaiyababa bo nam wainaḡidi, taudi inam ya verena da nam sibo ai naḡi, be taudi sibo a mia ḡomana maika taugu. ⁹ Be aitaugā da adi noḡotama e vovo gwaḡagwaḡana, naumeki da tai naḡina. Baninama ya verena da taudi tai naḡina be nam badara nuedima e raupotipotie.

¹⁰ Be naḡi banegidima aubaidima inam Bada na riuvavasaḡama yà riuriuedina: Waivi na badama nam sibo ya gose. ¹¹ Be deḡoda tauna na tauḡomama kaite ya gosena, naumeki da nama sibo ya miana, be nam sibo tauḡoma ġidoi ya naḡi munaḡe. Be ya verena da na tauḡomama mate sibo ai nuavere munaḡa be a mia tenaḡana. Be teneġinama nama tauḡoma na waivima nam sibo ya gose.

¹² Be avedi da Bada uma kauinama nam i giuena, be yaḡoro ġesaumima taugu yodi yà riuemina umanama: Deḡoda aitau tauwai sumaḡa na waivima nam tauwai sumaḡa, be tauna yaḡoro e ġoeġoena da na badama mate sibo a mianana, inam naumeki da tauḡoma na waivima mate nam tai gosaḡa. ¹³ Be deḡoda aitau tauwai sumaḡa waivinama na tauḡomama nam tauwai sumaḡa, be tauna yaḡoro e ġoeġoena da na waivima mate sibo a mianana, inam naumeki da waivi na tauḡomama mate nam tai gosaḡa. ¹⁴ Be deḡoda tauḡoma nam waisumegħina, tauna yaḡoro banaga babaunama, baninama na visarama tauna tauwai sumaḡa aubainama. Be deḡoda waivi nam waisumegħina, tauna yaḡoro banaga babaunama, baninama na tauḡomama tauna tauwai sumaḡa aubainama. Be deḡoda uma kauinama nama

ibewa, ami sedama Mamaitua matane a miramirana, be yodi taudi seda babaudima. ¹⁵ Be değoda nam waisumağā baneginama waigosağā e ġoena, naumeki da e nağō. Değoda uma kauinama nama e tubuğāna, dobudine tauwai sumağā tauna nam sibo yai kaikaididi. Mamaitua e ġoeğoenā da tauda subae tà mianana. ¹⁶ Baninama tam waivi nam ku kataiena da am badama kwai yawasani bo ibewa. Be mate tam tauğoma nam ku kataiena da am visarama kwai yawasani bo ibewa.

Mamaitua ya vinevinemina, ruvane nama ko miana

¹⁷ Tenatenağāğā Mamaitua ya riuriuemī, be ami puyoma ya uteutemina, nama ruvane ko miana. Banaga matabuna ekalesia nopolie yà riuriuedina da umanama sibo a voiana. ¹⁸ Aitau da kopitom ya pağona, naumeki da tauna nama sibo ya miana. Be aitau da kopitom nam i pağona, naumeki da tauna nama sibo ya miana. ¹⁹ Mamaitua matane kopitom inam nam aba, vutuna aubainama değoda banaga kopitom ya pağō bo ibewa, inam nam aba. Be Mamaitua na riuvavasağāma sibo tè voteyeteyedina, inam vutuna yaba dosinama.

²⁰ Taumi tenatenağāğā Mamaitua ya vinevinemina, nama ko miana. ²¹ Değoda Mamaitua ya vinem da tam taunoya yababa, inam naumeki, nam kwai nuaboya. Be değoda tam keda kwa wanewanena da tam waitau noyayababa sibo kuya gosena, naumeki da nama kwa voiana. ²² Rağanine banaga taunoya yababayababa, be Bada ya vinedi da taudi tauna na banagama, inam rağanine Mamaitua matane taudi nam banaga adi taunoya yababa, ibewa da taudi yodi Keriso na taunoyama. Be teneğinama nama, aitaüğā nam banaga adi taunoya, be tauna yağoro Keriso na taunoyama. ²³ Maesimima ya moraba kauana, be Yesu Kersio ya gimerimina. Vutuna aubainama taumi nam sibo banaga aubaidima koyai taunoya yababayababa. ²⁴ Yau bana, vutuna aubainama taumi tenatenağāğā Mamaitua ya vinevinemina, nama ko miana.

Yarayaraga be guguini adi giuma

²⁵ Yarayaraga be guguini aubaidima Bada na waiğakama nam ġarogue ima kenakenana da yà riuedi. Be Mamaitua na raukiviveree tauna ya sagugu da taugu banaga waipatutuguma. Vutuna aubainama umanama yà raukuremina: ²⁶ Baninama yodi rağan piripiridima aubainama, ya verena da taumi sibo nam koyai nağı. ²⁷ Değoda kaite kuyai nağina, nam am waivima kwa gose. Be değoda nam kui nağina, naumeki da nam waivi kwa wane. ²⁸ Be değoda tam yaraga be kwai nağina, inam nam gewagewa kuma voivoiena.

Be teneğinama tam guguini be kwai nağina, inam nam gewagewa kuma voivoiena. Be değoda taumi koi nağina, tokare taumi piripiri ko banavidina. Be taugu yà ġoeğoe da uma kauidie yà duğumina, da uma piripiridima tokare nam ko banavidi.

²⁹ Yau bana, yau giuma baninama umanama: Rağan kaite e tupotupona. Vutuna aubainama aitaugā kowai nağina, ko kita kaua da naği nam ei bademi. ³⁰ Be aitaugā kowai nuaboyana, ko kita kaua da nuaboya nam ei bademi. Be aitaugā kowai nuaverena, ko kita kaua da nam nuavere ei bademi. Be aitaugā yaba ko gimagimarana, ko kita kaua da inam yabedima nam tai bademi. ³¹ Be aitaugā dobu na ġoanama ko voivoiedina, ko kita kaua da inam kauidima nam tai bademi. Baninama uma dobunama tokare e samoana. ³² Taugu yà ġoeğöena da nam ko kawa nuarağerağemi. Yaraga tauna Bada na ġoanama e noğonogötina da nema Bada e noya bake be ya kawa nuaverena. ³³ Be değoda tauna ei nağina, tauna dobu na ġoanama e noğonogötidina, da nema sibo na visarama e noya bake da na visarama ei nuavere. ³⁴ Be inam rağanine tokare na noğotama rabui ta tubuğana. Be teneğinama nama guguini, tauna e noğonogötina da nema sibo Bada ya noya bake da Bada ya kawa nuaverena, baninama tauna na yawasanama matabuna Bada ya utena. Be değoda tauna ei nağina, tauna dobu na ġoanama e noğonogötidina da nema sibo na tauğomama ya noya bake da na tauğomama yai nuaverena.

³⁵ Inam kauidie sagumima aubainama yà riuriuemina, be nam ama waiğakemina. Taugu yà ġoeğöena da taumi yawasana didimanine ko miana, be nam ko noğota raburabui. ³⁶ Be aitaugoma na ġoopaparama ġarone nuanama e raraу potipoti da sibo ya nağina, inam naumeki da tai nağina be inam nam gewagewa. ³⁷ Be aitaugoma nopenama bateturinama be na ġoopaparama ġarone nuanama nam ima raupotipotina da sibo ya naği, naumeki da na ogama e taragi da tauna tokare nam ei naği. Ya verena da taudi nam tai naği. ³⁸ Vutuna aubainama değoda banaga tai nağina, inam ya verena, be aitau da nam ei naği, o, inam ya vere kauana.

³⁹ Tauğoma tauna na waivima e panipanina. Be değoda tauğoma e gurina, yodibe kaiyababa tauna na ġoanama nama tauğominama ei naği. Be tauna sibo tauğoma waisumeğinama ya nağina. ⁴⁰ Be taugu è noğotina da kaiyababa nama sibo ya mia yababana, tauna tokare yai nuavere kauana. Be taugu mate yà noğonogötina da Mamaitua Aruinama nama ya riueguna.

8

Boita kanidima tà kanidi bo ibewa?

¹ Yodi musara kokoitauuteutename, vutuna na kauama yà paribeemina: Matabuda tè kataiena da kokoitau nam ti rewapanana. Be uma katainama ya voiemina da taumi ko rarau guyaguyauna. Be rauguyaguyau tokare nam e sagumi, ibewa! Be ami banagama sibo koyai nuapañoedina, inam wainuapañoone tokare ekalesia banegidima ko sagudina. ² Banaga aitau e noñongoñotina da tauna yaba matabuna ya kataiedina, inam baneginama tauna Mamaitua matane na kaitaima nam teneteneñina. ³ Deñoda banaga Mamaitua nuanama e pañona, inam baneginama vutuna Mamaitua ewai aninena.

⁴ Be yodi nemanama? Inam naumeki bo ibewa da kokoitau museridima tà kanidi? Tauda tè kataiena da dobu kokoitaudima taudi nam Mamaitua, baninama Mamaitua tauna tenañga, be tauna vutuna Mamaitua riuriukauinama. ⁵ Taugu è kataiena da gunume be dobue arua gewegewedima ta riuriu munagedina da taudi kabe mamaitua. Be avedi da uma mamaituedi bo babadidima toitoi dobue ta miamiana, ⁶ be tauda yañgoro tè kataiena da Mamaitua riuriukauinama tauna tenañga, tauna vutuna tåwai sumage be tåwai muriwatanena. Be tauna vutuna Tamadama, be pakane yaba matabudi taune da a tubuñana, be taune da tauda yodi tà miamiana. Be dà Badama tenañga e miamiana, tauna Yesu Keriso. Be tauna vutuna yaba matabudi ya voiedi be tauna dà yawasanama ewai badena.

⁷ Be uma kauidima banaga gesaudima nam ti kataiena. Taudi boni kokoitau awai muriwatanedina. Vutuna aubainama yodi deñoda taudi kokoitau museridima ta kanikanidi be ta noñongoñota bekubeku, be noñotabekubeku e voiedi da adi noñotama e vovo gwañagwañana, vutuna aubainama taudi Mamaitua matane a mirana. ⁸ Be Mamaitua nam kani kana taiye imawai aninedana. Vutuna aubainama deñoda tauda kokoitau museridima tà kanidi bo ibewa, inam kauidima nam timawai badana da tauda banaga vereda bo ibewa.

⁹ Be kwa kita kaua da nam am waisumañgama kana taiye anibeku kediedie turamma kwa voie da na waisumañge e beku. ¹⁰ Baninama deñoda turamma aitau na noñotama vovogwañagwañanama, be ya kitam da tam kokoitau museridima kwa kanikanidina, agunai tauna tokare mate kokoitau museridima e kanidina, ¹¹ be dabudine tauna tokare e noñota bekubekuna. Baninama tam am waisumañgama wairewapaninama aubainama, tam tauna na waisumañgama kuya kawa gewagewana. Be kwa noñoti

da tauna mate aubainama Keriso ya gurina. ¹² Değoda tam turamma nama nuanama kwa kawa miramira be na noğotama kwa kawa gewagewana, tam Keriso ġarone mate gewagewa kwa voivoiena. ¹³ Vutuna aubainama değoda aba kaninama taugu è kanikani be turaguma è voie da na waisumaġe ya bekuna, naumeki da inam muserinama nam yà kani munaġe. Inam raġanine turaguma na waisumaġe nam e beku.

9

Pol na noyama aubainama maesa nam i ġoena

¹ Taugu riukaua apasol, be nam aitau dobue imawai badeguna! Taugu dà Badama Yesu mataġomigue è kitana. Be taugu yau noyama na banima inam yodi taumi Bada kowai sumāġena. ² Be avedi da banaga ġesaudima ġarodie taugu nam apasol, be taumi ġaromie inam taugu apasol, baninama taumi taugu yau matamatama.

³ Aitaugħa yau noyama ta paripari virevirena, taudi ġarodie umanama yà riuriuna: ⁴ Tauma nam ka kani be ka tego, bo? ⁵ Tauma ama vaġiae nam waisumaġa waivinama ka naġi be mate ka naġo, maika apasol ġesaudima nama, bo? Bada tasitasinama be Pita nama a voiana. ⁶ Taumi apasol ġesaudima ko sagusagudina, be taugu be Banabas taumāġa yodi ama yawasanama aubainama ka noya munaġemai, bo? ⁷ Ko noğoti da nam airaġan tauiġara taunaġa na manee iġara purepuredima i gimarana. Be nam aitau sipi e kuma be kaninama tokare e tuaġiae. Be nam aitau musara e yosidi be kanidima tokare e tuaġiedi. ⁸⁻⁹ Be uma kauidima matabudi nam ama giugiu yababedina, ibewa da Mousis na tarawatuma e riuriuna nama, “Kau kaikaivainama ami noyama e voivoiena raġanine, nam mudunama ko panitom, ko gose da tauna e kanina.” Ko noğoti da Mamaitua kau yai nuaboyedi be nama ya riu, bo? ¹⁰ Ibewa da tauda banaga e giuguedana. Aitau na sipima ya kumana tauna e noġonogötina da tokare kani e kanina.

¹¹ Be tauma pesi Arue nopomie kë Kumana da taumi yodi tauwai sumāġa. Vutuna aubainama taumi sibo tauma yodi gara be kani sibo koya sagumaina. ¹² Taumi banaga ġesaudima ġaromie a raraug guguyana ko sagusagudina, be aba aubainama tauma nam koma sagusagumai? Taumi sibo tauma koya sagusagu kauemaina, baninama tauma ami ekalesiama pakanama këi karena. Be tauma nam airaġan kamawai baġmina da taumi sibo koya sagumai. Ibewa

da rağan matabuna tauma ama ġoanama kè dami poredina, baninama nam kama ġoeġoena da Keriso varinama kedanama sibo kè kawa barabara.

¹³ Taumi koya kataie bo ibewa da aitaugā tempol nōpone ta noyanoyana, taudi adi kanima tempol nōpone ta paġopaġodina. Be pirisi aitaugā olta debane ta puyopuyona, taudi olta puyonama nevanama ta pagona. ¹⁴ Be inam kauinama teneġine nama Bada ya riu vavasaġa da aitaugā vari verenama ta rauguguye be banaga tawai sumaġana, naumeki da tauwai sumaġa sibo taurauguguya a sagudina. ¹⁵ Be taugu nam airaġan uma yabedima aubaidima ei baġa rubuemina. Be mate taugu nam uma yabedima ama girugirumidina da taumi sibo taugu ko sagugu, ibewa. Be nuaguma ya verena da nam airaġan ġaromie aba ei baġena. Agunai da taugu noġone yà guri, be muriġa da aiyaba ġaromie yà baġena. ¹⁶ Nam vari verenama rauguguyenama aubainama ama rarauguyu. Inam taugu yau noyama. Be vari verenama rauguguyenama yà tuaġaiena, taugu tokare gewagewa yà banavina.

¹⁷ Deġoda tauguġa yau ġoane e rarauguyana, naumeki da maesa sibo è paġona. Be taugu nam yau ġoane ama rarauguyana, ibewa da Mamaitua ya vineguna da noyanama sibo è voiena. ¹⁸ Yodi yau maesama inam aiyaba? Taugu yau maesama inam vutuna vari verenama yà rarauguyena, be nam tokare mane yà paġo.

¹⁹ Vutuna aubainama taugu nam aitau imawai badegu. Be yaġoro taugu banaga matabudi adi taunoyama da toitoi sibo è verauġedina Keriso ġarone. ²⁰ Jius banegidima ġarodie taugu è voiegu da maika Jius banegiguma. Be aitaugā Mousis na tarawatuma tawai muriwatenena taudi ġarodie, taugu è voiegu da kabe taugu mate Mousis na tarawatuma ēwai muriwatane, avedi da taugu nam inam tarawatunama tauwai muriwatanena. Be nama yà voivoiana da taudi sibo è verauġedina Keriso ġarone. ²¹ Be eteni banegidima ġarodie, taugu avedi da nam eteni banegigu, be è voia munaġegu da taugu kabe eteni banegigu, avedi da taugu tauwai sumaġa, be Keriso na tarawatuma tauwai muriwatanena. Inam nama yà voivoiana da taudi sibo è verauġedina Keriso ġarone.

²² Be aitau adi waisumaġama gwaġaqwaġanama, taudi ġarodie taugu è voia munaġegu da maika kabe yau waisumaġama gwaġaqwaġana da sibo è verauġedina Keriso ġarone. Banaga matabudi ġarodie taugu è voivoia munaġeguna maika kabe taudi da sibo toitoi è verauġedina Keriso ġarone. ²³ Vari verenama kana taiye taugu uma

yabedima matabudi è voivoiedina, be banaga Bada Yesu tawai sumaġena raġanine, taugu yài nuavere kauana.

Reisis ekalesiae wainasinama

²⁴ Ko kataie da reisis nopone tauwai reisis ta manimanina, be banaga tenaġa e tava dokana, tauna tokare maesa e paġona. Vutuna aubainama taumi yodi ko manini gurata da tokare maesa ko paġona. ²⁵ Tauwai reisis matabudi taudi yaba ġesaudima ġarodie ta widiwidinedina be tawai prektas guratana da tokare maesa sibo a paġona, be inam maesinama tokare e nuayaġotana. Be tauda dà maesama marae inam kenakena nonoġinama. ²⁶ Vutuna aubainama taugu nam ama manimanini yababayababana, be nam amawai paipaidena. ²⁷ Ibewa, be taugu kopiguma yà riġariġa be yàwai badena, baninama nam ama ġoeġoena da taugu banaga ġesaudima ġarodie yà rarau guguya be tokare yà beku. Inam tokare Mamaitua yau maesama banaga ġesaunama e utena.

10

Ko kita kaua da nam raurubu na raġanie ko beku Israel banegidima maika

¹ Yau bana, bonidego dobu kavakavane aba dà dosima ġarodie ya tubutubuġana, nam airaġan nuemima e koa. Mamaitua giyou ya riupore da uma banegidima yai dokedina. Be taudi egasi noponaġa yai doka nawedina. ² Raġanine taudi giyou ai muriwatane be egasi noponaġa a naġonāġona, inam raġanine taudi Mousis isane a babataitona. Uma babataitonama ewai maġatarana da taudi inam Mousis na damma. ³ Be Mamaitua mara kaninama ya utedi be matabudi a kanina. ⁴ Be mate Mamaitua yekue mara upanama ya utedi be matabudi a tegona. Be uma yekunama inam Keriso, tauna vutuna mate a naġonāġona. ⁵ Be taudi yaġoro Mamaitua a kawa nuamedimedina, vutuna aubainama taudi dobu kavakavane Mamaitua matabudi yai guri yaraidina.

⁶ Uma kauidima a tubuġana, inam mataira ewai maġatarina tauda ġarode. Be ewai kataidana da tauda nam sibo gewagewa voiedima tèi nuanoġonoġotedi maika taudi a voivoiana nama. ⁷ Nam kokoitau ko rauduneedi maika taudi. Girugiruminama poranama e riuriuna nama, “Banaga a mia, a kanikani be a tegotegona, be a midisuġu da kokoitau a bigabiga kwavivirona.” ⁸ Be nam tài kawa badara maika taudi. Be uma kauine raġan tenaġa nopone banaga matabudi 23 tausand a gurina. ⁹ Nam sibo Bada raurubue tè boru taudi a voiana maika, be mota Israel banegidima

toitoi ai guridina. ¹⁰ Be nam ko momodu taudi maika, be tauwai guri aneanama yai guridina. ¹¹ Uma kauidima Israel banegidima ġarodie a tubuġana a girumidina, tauda nuadama aniborunama aubainama, da tauda nam uma kauidima yodi raġan damodie sibo tè voiedi.

¹² Vutuna aubainama taumi deġo da ko noġonoġotina ami waisumaġe ko vava taradidina, naumeiki da ko kita kaua da nam ko beku. ¹³ Raurubu matabudi ko banabanavidina inam raurubu ġoma. Inam raurubudima banaga ġesaudima mate ta banabanavidina. Tokare agunai raurubu ġesaudima ko banavidina. Be nam ko naira, baninama Mamaitua patupatutunama e kitakita watanimina da ami rewapanama na ruvae raurubu ko banavidina. Be mate raurubu raġanine tauna keda ei kataimi da raurubu ko vaisubana, be nam sibo raurubue koya beku.

Kokoitau adi soima be Bada na soima

¹⁴ Vutuna aubainama yau bana, kokoitau ko gose poredi be nam airaġan ko rauduneedi. ¹⁵ Taumi noġota banegimima, aubainama yau giuma aba ya giuemina mayanama ko paġo. ¹⁶ Keyaka ko noġoti. Uma keyekinama Yesu na soie tè tegote-goe be Mamaitua tewai kaiwena. Be raġanine keyaka tè rarau tegoena, tauda Keriso kosinine tèi rawateġeidana. Be buredi tè givana. Be raġanine tè kanikanina tauda Keriso tubugine tèi rawateġeidana. ¹⁷ Avedi da tauda toitoi, be buredi tenaġa tà kanikanina, vutuna aubainama tauda matabuda tubuġa tenaġa. ¹⁸ Tauda Israel adi kauama tà noġoti. Taudi musara olta debane a gabudi be a kanikanidina, inam raġanine taudi inam oltanama mamaituanama mate awai rawateġeidina.

¹⁹ Taugu nam ama riuriuna da kokoitau bo adi puyoma inam yaba dosina. ²⁰ Ibewa, be ko noġoti da aiyaba eteni banegidima ta rarau puyoedina, inam vutuna taudi penama ġarodie ta puyopuyona, be nam Mamaitua ġarone. Be taugu nam ama ġoēgoena da taumi penama mate koi rawateġeimi. ²¹ Nam Mamaitua na keyake be penama adi keyake ko rautego tenaġana. Be mate nam Mamaitua na kani be Seitan na kanima taumi ko kani tenaġedi. Avedi! Uma kauidima Mamaitua nam ima ġoēgoedina. ²² Tauda Bada tà rarau rubuna da ġarode sibo ya medi, bo? Tauda dà rewapanama tauna na rewapanama e saġa pore, bo?

Nam taudaġa sagudama tà noġoti, be dà banagama mate sagudima tà noġotina

²³ Yaba matabudi teneteneġinama da tà voiedina, be inam yabedima nam matabudi tokare ta saguda. Be mate yaba matabudi teneteneġinama da tà voiedina, be inam yabedima

nam matabudi tokare ta voieda be dà waisumāgē tai rewapana. ²⁴ Nam taudaḡa sagu munaḡedāma tà noḡoti, avedi. Be dà banagama mate sagudima tà noḡotidina.

²⁵ Musara anikune nopone ta gimagimaredina inam ko kanidina, be nam koi taravira be ko riuna, “Uma kokoitau muserina, bo ibewa?”. ²⁶ Baninama girugiruminama porane umanama ya riuna, “Dobu be nopone yaba matabuna inam Bada ġaronama.”

²⁷ Deḡoda nam waisumāgē baneginama kani aubainama e kokonem, be aba kaninama e uteutemna, inam naumeiki da kwa kani yababedina be nam kwai taraviravira. ²⁸ Be deḡoda inam baneginama sibo umanama i riuemna, “Uma muserinama inam kokoitau museridima.” Naumeiki da tam uma baneginama ya riuriuemna tauna kana taiye tam musara nam kwa kanidi. ²⁹ Nam i verena da tauna e noḡonoḡotina da tam kabe gewagewa ku voivoie.

Be yodi aba aubainama banaga ġesauñama na noḡotama sibo yai badem? ³⁰ Be tam yodi agunai umanama kwawai noḡotana, “Deḡoda taugu Mamaitua yài kaiwe be yà kanikanina, naumeiki da aba aubainama banaga ġesauñama na noḡotama sibo èi bade, be nam sibo è kani?” ³¹ Naumeiki da am noḡotama, baninama yodi yà utemna. Inam baniñama yaba matabudi tam kwa voivoiedina, kwa kanikani bo kwa tegotegona, inam Mamaitua isanama anikaisuḡunama aubainama. ³² Vutuna aubainama tam nam turamma kwa voie da na noḡote e beku, avedi da tauna Jiu, eteni bo Kuristen baneginama. ³³ Taugu mate nama yà voivoiena. Yà rara rubu gurata da banaga matabudi yàwai nuaveredina. Taugu nam tauguḡa ama sagusagu munaḡeguna, be banaga ġesaudima mate yà sagusagudina da banaga toitoi tokare Bada Yesu ei yawasanidina.

11

¹ Taugu aba Keriso ya voivoiena yàwai muriwatanena, vutuna aubainama taumi sibo taugu yà voivoiana, nama sibo koyai muriwataneguna.

*Tautauḡoma be waiwaivi adi vaivaima taparoro nopone**

² Taugu isemima yà kaikai suḡuna, baninama taumi raḡan matabuna ko noḡonoḡotigu, be yaba matabuna èwai katakataimina taumi kowai muriwatanedina aubainama. ³ Be yodi yaba tenaḡa yà riuemina: Waivi debanama inam tauḡoma, be tauḡoma debanama inam Keriso, be Keriso debanama inam Mamaitua.

* **11:1:** Debasuma inam Gurik banegidima adi vaivaima.

⁴ Vutuna aubainama deḡoda tauḡoma ma debasumana e moimoiragi bo Mamaitua riunama e giugiuena, tauna Keriso ewai diboḡina. ⁵ Be waivi deḡoda nam ma debasumana be e moimoiragi bo Mamaitua riunama e giugiuena, tauna na tauḡomama ewai diboḡina, baninama tauna e voivoiana maika kabe tauḡoma. Tauna e voivoiana kabe waiwaivi badabadaridima debedima makumaku poredima maika. ⁶ Vutuna aubainama deḡoda waivi nam debanama e suma, naumeiki da tauna sibo deba vuvuḡinama a maku pore be tauna sibo ya tunimayaḡana. Be deḡoda waivi debanama makuporenama e tunimayaḡena, naumeiki da tauna sibo debanama ya sumana. ⁷ Be tauḡoma tauna nam sibo debanama ya suma, baninama tauna kitanama maika Mamaitua. Be tauḡoma tauna Mamaitua na waibadama ewai maḡatarina. Be waivi tauna tauḡoma na waibadama ewai maḡatarina. ⁸ Baninama tauḡomae da Mamaitua waivi yai tubuḡina, be Mamaitua nam waivie tauḡoma i tubuḡina. ⁹ Be tauḡoma nam waivi sagunama aubainama i tubuḡana, ibewa. Be waivi tauna tauḡoma sagunama aubainama ya tubuḡana. ¹⁰ Vutuna aubainama waivi debanama sibo ya sumana. Inam na matairama da tauna na tauḡomama na waibadae e vivivivirena. Uma kauinama anea ta kitakita watanena.

¹¹ Be Keriso matane waivi be tauḡoma taudi matabudi teneğidima, be taudi sibo ai kawa sagu vivirana, ¹² baninama avedi da pakane tauḡomae da waivi ya tubuḡana, be yodi waivie da tautauḡoma ta tubutubuḡana. Be taudi matabudi Mamaitua yai tubuḡidina.

¹³ Taumiḡa mayemima ko paḡo munaḡena, waivi debanama nam i suma be e moimoiragina, inam ya vere bo ibewa? ¹⁴ Ami vaivaima ko noḡoti. Deḡoda tauḡoma deba vuvuḡinama e dau kauana, inam nam i verena, be kitanama yai tunimayamayaḡana. ¹⁵ Be deḡoda waivi deba vuvuḡinama e dau kauana, inam ya vere kauana, baninama deba vuvuḡinama inam maika na debasumama. ¹⁶ Be deḡoda aitau uma kauinama aubainama e riuriu viravirana ġarogue, naumeiki da taugu yà riuriuna da tauma be ekalesia ġesaudima mate ama vaivaima inam nama, be nam aba vaivai ġesaunama ġaromaie ima kenakenana.

Turiya na kauama

¹⁷ Be yodi kaua ġesaunama ġaromie yà guiena. Mamaitua matane taumi gewagewa ko voivoiena, raġanine taumi taparoroe kowai rawateġeimina. ¹⁸ Baninama taugu è vaiena da taparoroe koi rawateġeimina raġanine, ko daridariġa munaġmina. Be taugu yà noġonoġotina da inam riukaua.

19 Naumeki da uma dariġinama ei maġatara da aitaugā didimana banegidima tà kitedina.

20-21 Taumi turiya aubainama kowai rawateġeimina raġanine, taumi kani kowai paparanena, be ami banagama nam koma raberabedina. Vutuna aubainama ġesaumima ko kanikani gurata be ko tegotego buana, be ġesaumima ma kanigurimi ko naġonaġona. Inam nam nama turiya na kaua! 22 Uma kauinama nemanama? Taugu isemima ya kaisuġu, bo? Ibewa ġoma! Taumi sibo ami vadae inam nama kaninama koya kanikani be koya tegotegona. Taumi sibo Mamaitua na damma koya viviviviredina, be ami banagama wainuatoitoidima kowai tunimayaġidina, inam nam i verena.

23 Taugu turiya na kauama Bada yawai kataiguna, vu-tuna taumi ēi kataimina. Inam umanama: Raġanine Judas Bada Yesu ya boruboru dobigena, inam kupinama tenegħine Bada buredi ya paġo, 24 Mamaitua yai kaiwe da ya giva be ya riuna, "Uma inam taugu tubuġiguma taumi aubaimima. Raġanine uma ko kanikanina, taugu aninoġotiguma aubainama. 25 Be kani murine tauna keyaka ya paġo be ya riuna, "Uma inam Mamaitua na waianinama vaunama, kosiniguma e rauġinina aubainama. Raġanine ko tegotegona taugu aninoġotiguma aubainama. 26 Be raġanine taumi uma buredinama ko kanikani be uma keyekinama ko tegotegona, taumi Bada na gurima ko rauġuguyena naumeki da tauna na kaba yovo munaġġama raġanine.

27 Vutuna aubainama aitau da uma buredinama kwa kanikani yababe be uma keyekinama kwa tegotego yababena, inam Bada na gurima be kosininama ya darorona tam mate wavunama kwa kiroġina. 28 Vutuna aubainama taumi mayemima ko paġo munaġġena, muriġa da buredi ko kani be keyake ko tegona. 29 Baninama deġoda taumi Bada tubuġinama ko kanikani be kosininama ko tegotego be nam koma noġonogota kauena da inam Bada tubuġinama be kosininama, naumeki da taumiġa ko kovokovoġa munaġemina. 30 Vutuna aubainama nopomie banaga toitoi ta sidasida, tubuġidima ta vovo gwaġġawġa, be ġesaudima ta gurigurina. Turiya inam nam maika waikanikani ġoma.

31 Be deġoda tauda tà kita wairuva munaġeda be tà turiyana, tauda tokare nam kovoġa tà banavi. 32 Be deġoda Bada e kovoġidana, inam waikatakatai e uteutedana da tokare tauda nam gienae tà naġo dobu banegidima mate. 33 Vutuna aubainama yau bana, taumi turiya aubainama kowai rawateġeimina raġanine, ami banagama ko rabedi be nam taumi kani koi paparane. 34 Be aitaugā da kani

e karatimina, taumi ami vadae sibo koya kani nonoġana, muriġa da sibo koyai rawateġeimina. Inam tokare Bada nam e kovoġimi.

Taugu yà tavana ġaromie raġanine, yaba ġesaudima mate yà kawa didimanidina.

12

Arua Babau na puyoma

¹ Be yodi yau bana, puyo Arua Babaue na kauama yà riuemina, inam kauinama sibo koya kataiena aubainama.

² Ko noġoti da taumi nam kowai sumāġana raġanine, taumi kokoitau awai bademina, be uma kokoitaudima taudi nam giugiudi be taudi awai keda doka waigewemina. ³ Be yodi deġoda banaga ko banabanavidina aitaugħa Mamaitua na kauama ta giugien, taumi nema ko katai bake da uma banegidima ta riuriu kaua bo ta kaikaiyovu? Naumeiki da umanama tokare ko kataiena: Deġoda ai banaga Arue e giugiuna, tauna tokare nam aba gewagewanama Yesu ġarone e giue. Be teneġinama nama aitau da Arua Babau garone, tauna tokare e riuna, “Yesu tauna Bada.”

⁴ Arua Babau tenaġħa, be puyo tabu be tabu banaga e uteutedana. ⁵ Be noya inam tabu be tabu, be Bada tenaġħa aubainama tà noyanoyana. ⁶ Be Mamaitua tenaġħa, be noya tabu be tabu banaga nopode e voivoiedina. ⁷ Uma kauidima Arua tauwai sumāġħa e uteutedana da ekalesia anisagudima aubainama.

⁸ Arua tauwai sumāġħa tenatenaġħa ġa umā puyodima e uteutedina:

Waria nuauyauya tauguedima,
waria katai tauguedima,

⁹ waria tauwai sumāġħa,

waria Tauwai yawasana,

¹⁰ waria mataira tauvoiedima,

waria tauwai peroveta,

waria arua tabu be tabu adi yawasanama taukataied-
ima,

waria bona tabu be tabu tauguedima,

waria bona tabudima tauvitaredima.

¹¹ Arua Babau tauna tenaġħa, be uma kauidima matabudi na ġoane nama tauwai sumāġħa tenatenaġħa ġa umā uteutedina.

Tubuġħa tenaġħa be ragaraganama toitoi

¹² Tubuġħa tenaġħa be ragaraganama toitoi. Be avedi da ragaraganama toitoi, tubuġħa yaġoro inam tenaġħa. Be kauinama teneġinama nama Keriso ġarone, ¹³ baninama Arua Babau tenaġħa. Be inam Arua babaune tauda matabuda

tè babataitona da tauda yodi tubuğɑ tenağɑ, avedi da noğone tauda Jiu, bo Gurik banegidama, bo taunoya yababa bo değο da nam taunoya. Matabuda Arua teneğinama tè pağona.

¹⁴ Tauda tè kataie da tubuğɑ nam raganama tenağɑ, ibewa da ragaraganama toitoi. ¹⁵ Değoda yodi sibo kağɑ ya riuna, "Taugu nam nima, vutuna aubainama taugu nam tubuğɑ ġaronama." Be inam nam nama. Kağɑ yağoro tubuğɑ ġaronama. ¹⁶ Be değoda yodi sibo bea ya riuna, "Taugu nam mata, vutuna aubainama taugu nam tubuğɑ ġaronama." Be inam nam nama. Bea yağoro tubuğɑ ġaronama. ¹⁷ Be yodi ko noğoti, değoda tubuğɑ matabuna i rawamatana, nema tokare kuyai beavaia bako? Be değoda tubuğɑ matabuna i rawabeana, nema tokare pana bo ġabu kuya vaia bakedi?

¹⁸ Be Mamaitua tubuğɑ ya voiена be na ġoane nama rageragedima tabu be tabu ya biridina. ¹⁹ Değoda rageragedima matabudi sibo raga tenağɑ, tubuğɑ tokare değο? ²⁰ Vutuna aubainama raga toitoi, be inam yağoro tubuğɑ tenağɑ. ²¹ Mata nam teneteneğina da nima sibo ya riuena, "Taugu è tuağaiemna." Be deba nam teneteneğina da kağɑ sibo ya riuena, "Taugu è tuağaiemna."

²² Ibewa, be tubuğɑ raganama anikitana maika kabe nam aiyaba, ibewa da adi noyama yağoro ta kenakenana. ²³ Be değο ragedima tà noğonogoti da nam aniviviviredi, taudi tà vivira kauedina. Be değο ragedima waitunimaya-mayağıdima, tawai gara kauedina, ²⁴ be değο ragedima nam waitunimayamayağıdi, tauda nam tamawai gara kauedina. Be teneğinama nama Mamaitua tubuğɑ rageragedima yai rawateğeidi da taudi tubuğɑ tenağɑ, be raga ġesaudıma kamai ragaraga ya voiedi da banaga ta viviviviredina. ²⁵ Mamaitua nama ya voiена, baninama nam sibo tubuğɑ ya daberara be raga matabuna sibo turanama turanama mate ai rabaraba vivirana. ²⁶ Vutuna aubainama değoda raga tenağɑ ei nuatoitoina, naumeki da raga ġesaudıma mate tai nuatoitoi saguna. Be değoda raga tenağɑ isanama banaga ta kaisuğuna, naumeki da raga ġesaudıma mate tai nuaverena.

²⁷ Be yodi ya riuemi da taumi matabumi inam Keriso tubuğinama, be taumi tenatenağɑga inam raganama. ²⁸ Be ekalesia nopone Mamaitua noya tabu be tabu tauwai sumağɑ ya utedina:

Noğone apasol noyanama,
murine waiperoveta noyanama,
murine tauwai katakatai noyanama,
da mataira tauvoiedima,
da Tauwai yawasana,
da tauwai sagu,

da waibada noyanama,
da bona tabu be tabu taugiuuedima.

²⁹ Be yodi banaga matabudi inam apasol, bo? Bo matabudi tauwai peroveta? Bo matabudi tauwai katakatai? Bo matabudi mataira ta voivoiedi? ³⁰ Bo matabudi Tauwai yawasana? Bo matabudi bona tabu be tabu taugiuuedi? Bo matabudi bona tabudima tauvitaredi? Ibewa! ³¹ Ko raurubu gurata da puyo dosidima ko ragaudina.

Be yodi keda vere vavasağinama yài kataimina da nema sibo inam puyodima koya noya bakedina.

13

Wainuapaño

¹ Değoda taugu banaga bo anea adi bonae sibo è giugiuna, be değoda taugu wainuapaño nam ġarogue, taugu inam maika toutou yababa bo maika boīgatu yà gugugugura yababayabana. ² Bo değoda taugu waiperoveta puyonama ġarogue be Mamaitua na kauama moimoisiridima matabudi sibo è kataiedina, be değoda katai ġesaudima mate sibo è kataieno, be değoda yau waisumağama dosi vavasağinama da taugu sibo oya è riue be ya tauriana, be değoda taugu wainuapaño nam ġarogue, naumeki da taugu inam nam aiyaba be Mamaitua ya kita tuağieguna. ³ Bo değoda yau purapurama matabuna banaga waikaruwağewağedima yà utedina, bo değoda vari verenama kana taiye tubuğiguma sibo a gabu goruna, be değoda taugu wainuapaño nam ġarogue, inam tokare nam yau maesa.

⁴⁻⁶ Wainuapaño baneginama tauna banaga ġarodie ewai nuabagibagi be e raraukivi verena.

Tauna nam ima unuunura.

Tauna nam ima seğaseğara.

Tauna nam ima rarau guyaguyau.

Tauna nam kivinama gewagewana.

Tauna nam taunağā ima noğonoğota munağē.

Tauna nam meditupo banegina.

Tauna nam gewagewa nuapikanama nopone ima noğonoğotina.

Tauna nam gewagewa kauidima ima ġoeğeoedina, be tauna riukaua e ġoeğoe kauena.

⁷ Tauna rağan matabuna ġarone piripiri ewai dami poredina.

Be rağan matabuna na banagama ewai sumağedina, be e noğonoğoti da tokare yaba matabuna naumeki.

Be rağan matabuna piripiri nopodie tauna e kaikai guratena.

⁸ Baninama wainuapaño tauna kenakena nonoġinama. Be waiperoveta tokare e kovina, be bona tabu be tabu giuenama tokare e kovina, be waikatakatai giunama tokare e kovina. ⁹ Baninama yodi tauda aba tè kataienam inam ġaubo ġominama, be aba tawai perovetena inam ġaubo ġominama. ¹⁰ Be tokare Bada na kaba verauma raġanine, aba ġaubo ġominama tè kataie be tawai perovetana, tokare e kovina.

¹¹ Raġanine taugu ġaubogue taugu yau giuma inam gomana maika. Be yau noġotama gomana maika, be taugu yaba matabuna è kitakita wairuvedina gomana na noġote. Be taugu è moramorabana raġanine, taugu seda adi kauama è gose poredina. ¹² Be teneġinama nama yodi tauda Mamaitua na kauama, nam tama kitakita kauena maika garasi gapugapunama nama. Be tokare taugu Bada noġonama mataġomigue yà kitana. Yodi ġaubo ġominama è kataienam be tokare yaba matabudi yà katai kauedina, maika yodi Mamaitua nōpoguma ya katai kauena nama.

¹³ Be raġan ġaubonaġa yodi uma yabedima rabuiteġa ta kenakenana: Waisumaġa, noġota bagibaginama be wainuapaño. Be nōpodie wainuapaño inam ya saġa guratana.

14

Waiperoveta be bona tabu be tabu puyonama

¹ Vutuna aubainama wainuapaño sibo koya wane guratena, yodibe Arua Babau puyonama ko wanena. Be ko raurubu da waiperoveta puyonama ko paġona. ² Baninama taumi aitauġa bona tabu tabu ko giugiuna, taumi nam banaga ġarodie koma giugiuna be Mamaitua ġarone, baninama aba ko giugiuna banaga nam ti kataienam. Be taumi Arue giu moimoisiridima ko giugiuna. ³ Be deġoda banaga aitauġa tawai perovetana, taudi inam banaga ġarodie ta giugiuna, da arue sibo ai rewapania, a duġudi be a riu wainuasubesubedina. ⁴ Aitauġa bona tabu be tabu ta giugiuna, taudiġa ta sagusagu munaġedina, be aitauġa tawai perovetana, taudi ekalesia ta sagusagudina.

⁵ Bona tabu be tabu giuedima inam matabuna naumeki, be taugu yà ġoeġoe guratena da taumi matabumi sibo koyai perovetana. Tauwai peroveta tauna banaga dosinama, nam maika bona tabu tabu taugiuenama nama. Be deġoda bona tauvitarena mate, inam naumeki, baninama ekalesia tokare sagu ta banavina.

⁶ Naumeki yau bana, deġoda ġaromie yà verau be bona tabu yà giuemina, taumi tokare nam sagu ko banavi. Ibewa da taugu waimaġatara giuna, bo Mamaitua na giuma, bo

waiperoveta, bo waikatakatai giunama, nama sibo è riuemina, tokare sagu koya banavina. ⁷ Turai bo gita ko noğotidi, taudi nam banaga maika tima yavuyavutuna, be yağoro ta gugugugurana. Be değoda banaga turai bo gita digirienama nam i katai kauena, tokare nema bonanama ġaroronama kwa vaia bake? Be değoda waidigirienama e kataie be e pa gó vitavitaredina, tokare bonedima ġaroronama kwa vaiena. ⁸ Be mate bogigi değoda nam ta suve yağe, tokare nema banaga ta rawateğei bako? ⁹ Be tenegínama nama ġaromie. Değoda ami giuma matabudi ne gó, tokare banaga nema ta katai bake da taumi aba ko giugiu? Taumi inam ko giugiu yababana.

¹⁰ Be yağoro è kataiena da dobu matabuna nopone bona matabudi banidima mate. ¹¹ Vutuna aubainama değoda banaga e giugiu be taugu na giuma baninama nam yà kataie, naumeki da taugu wari dobu banagiguma, be tauna wari dobu banaginama. ¹² Be tenegínama nama taumi ġaromie. Değoda puyo Arue ko ġoedina, naumeki ko kita da inam puyodima ekalesia sibo ya sagudina.

¹³ Naumeki da banaga aitau bona tabu e giugiuena, tauna Mamaitua sibo yai bağá da rewapana ya ute, da uma giudima ya vitaredi be ya kawa negenegedina. ¹⁴ Taumi uma kauinama ko noğoti: Değoda taugu bona tabune è moiragina, inam taugu yau aruama e moimoiragina, be taugu nam aba ama noğonoğotina, ibewa.

¹⁵ Naumeki da yodi aba yà voie? Taugu arue yà moimoiragi be yau noğote mate yà moimoiragina. Taugu arue yà saresare be yau noğote mate yà saresarena. ¹⁶ Be değoda tam Mamaitua isanama arue kwa kaikai suğuna, tokare banaga ġesaunama “Inam riukaua” nema e vato bake? Baninama tam aba kwa giugiuena tauna nam i kataiena.

¹⁷ Tam agunai moiragi verene kwa moimoiragina Mamaitua ġarone, be you, uma moiraginama banaga ġesaudima nam ima sagusagudina.

¹⁸ Taugu Mamaitua yài kaiwe da taugu bona tabudima toitoi yà giuguedina, nam maika taumi. ¹⁹ Be taparoro nopone è noğoti da ya vere kauana da taugu giu raubisağá negenegedima yà vatodi da banaga ta kataiedina, be nam giu toitoi da banaga tokare nam ta kataiedi.

²⁰ Yau bana uma kauide nam seda maika kowai noğota, ibewa da banaga batuturidima adi noğote koi noğotana. Be gewagewa noğotidima ta tavatavana rağandie, naumeki da taumi seda wawaiidima maika sibo koya miana. ²¹ Girugiruminama porane Bada umanama ya riuna,

“Tokare taugu wari dobu banegidima yà riuporedina Israel banegidima ġarodie.

Be uma banegidima wari bonae ta giuna Israel banegidima ġarodie,
taudi yaġoro tokare nam tai beavaiegu.”

²² Vutuna aubainama yodi tà kita da bona ġesaudie giugiunama, inam mataira eteni banegidima aubaidima, be nam banaga e sagudi da tai sumaġa. Be waiperoveta giunama inam vutuna banaga e sagudi da adi waisumaġama ei rewapanana. ²³ Deġoda taumi taparoroe ami wairawateġeima raġanine, be matabumi bona tabudie tabudie ko giugiu be eteni baneginama i saġa nopomie be i vaiemina, tauna agunai tokare ya riuwai buebuemina. ²⁴ Be deġoda matabumi Mamaitua varinama ko giugue be eteni baneginama nopomie i saġa be i vaiena, dabudine ami giuma tokare nponama ya tiremi be ya kataie munāġe da tauna gewagewa baneginama. ²⁵ Be na noġotama semosemodima matabudi ta maġatara be tauna tuapikane e raupari be Mamaitua isanama e kaisuġusuġu be e riuna, “Riukaua da Mamaitua nopomie e miamiana.”

Taparoroe yaba matabudi na didimanae sibo a voiedina

²⁶ Vutuna aubainama yau bana, uma yabedima yà giuguedina, matabudi tà rawatupetupedina. Be ami wairawateġeima raġanine banaga ġesaudima tausaresare, be ġesaudima tauwai katakatai bo Mamaitua aba ewai kataidina tauguedima, be ġesaudima bona tabu be tabu tauguedima, be ġesaudima bona tabudima tauwai toropetaenama. Be yaba matabudi ko voivoiedina inam eklesia anisagunama aubainama. ²⁷ Deġoda banaga bona tabu be tabu tauguedima, naumeki da banaga rabui bo rabuiteġa, be nam ġesaudima mate. Dabudine waria sibo ya giu ya kovi da waria. Be nam matabudi ta giugiu tenaġa. Be waria sibo adi giuma yai toropeta da banaga sibo a kataiena. ²⁸ Be taparoro npono deġoda toropeta ibewa, naumeki da matabudi sibo nam a giu. Be aitau e ġoena, naumeki da taunaġa nuane Mamaitua mate sibo ai giuna.

²⁹ Be tauwai peroveta rabui bo rabuiteġa sibo a giuna, be banaga ġesaudima taudi adi giuma sibo a kita wairuva yaġedi da adi giuma inam naumeki bo ibewa. ³⁰ Be deġoda aitau baneginama miemieninama Mamaitua noġota e utena, inam naumeki da tauna e giuna, be turanama giugiunama sibo yai nuatuġuna. ³¹ Inam kauine tauwai peroveta matabudi tokare ta giuna, wari peroveta e giu e kovi be wari peroveta e giugiuna. Inam nama banaga matabudi tai katakataidi be ta sagudina. ³² Be uma kauinama ko

nōgoti: Dēgoda banaga aitau Mamaitua nōgota ya utena, naumeki da tauna rewapana ġarone e kenakenana da ei nuabagibagi be ei rabana, naumeki da na giu rāganinama e tavana, yodibe e giuna.³³ Inam baninama Mamaitua tauna suba baneginama, be tauna nam ima ġoeġoena da yaba tà voia yababayabedi, avedi.

Ekalesia matabudi adi vaivaima inam³⁴ rāganine adi wait-aparoroma nopone waiwaivi nam sibo a giugiu yababayaba, be waivi na taūgomama na waibadama dibune sibo ya miana maika tarawatu e riuriuna nama.³⁵ Dēgoda taudi aba waitaraviranama ġarodie e kenana, naumeki da taudi sibo a nāgo vadae be adi tautaūgomama sibo ai taraviredina. Baninama inam yai tunimayamayaġana da waiwaivi adi wainua nōgonogotama ta giuedina taparoro nopone.

³⁶ Naumeki da uma giudima ko katai kauedina, baninama Mamaitua na giuma nam taumi ġaromie i tubuġana, be nam taumi koma waibadena, be na giuma nam taumiġa aubaimi.³⁷ Dēgoda taumi aitaugā ko nōgonogotina da taumi Mamaitua na perovetama bo puyo Arue koya paġona, naumeki da taumi taugu aba ġaromie è girugirumina sibo koya katai kauena da inam Mamaitua na riuvavasaġama.³⁸ Be dēgoda aitau uma giudima e riuwai kaikaiyovuedina, naumeki da tauna mate ko riuwai kaikaiyovuna.

³⁹ Vutuna aubainama yau bana, Bada koi baġa da ami taparoroe taumi sibo Bada na giuma koyai perovetaena. Be nam bona tabu be tabu giuenama ko riuntuatuaġcie,⁴⁰ be yaba matabudi adi didimanae sibo koya voia yaġedina.

15

Keriso na midisuġu munaġama

¹ Yau bana, pakane vari verenama è rarauguguyena, taumi yodi koyai aninena be debane ko midimidina, vutuna yodi ya riuwai nōgotmina.² Dēgoda uma varinama ko kaiguraten, taumi yawasana kenakena nonoġinama ko banavi, dēgoda ibewa, naumeki da ami waisumaġama inam kavakavanama.

³ Taugu aba da Mamaitua ġarone è paġopaġona inam kaua dosinama, vutuna taumi è utemina. Be inam varinama inam umanama: Yesu Keriso dà gewagewama aubainama ya gurina, maika girugiruminama poranama e riuriuna nama,⁴ da taudi a dobo be rāġan aniwai rabuiteġane Mamaitua ya kawa midisuġu munaġena, maika girugiruminama poranama e riuriuna nama.⁵ Be murine Bada Yesu Pita ġarone ya maġatarana, da apasol 12 ġarodie mate tauna ya maġatarana.⁶ Be murine tauna rāġan

tenaǵa tauwai sumaǵa 500 be ǵesaudima mate ǵarodie ya maǵatarana. Be banegidima ǵesaudima yaǵoro ta miamiana, be ǵesaudima a kovina. ⁷ Be muriǵa tauna Jeims ǵarone ya maǵatarana, da murine apasol matabudi ǵarodie ya maǵatarana. ⁸ Be matabudi muridie, avedi da taugu muriǵa ǵoma Arue è tubuǵana, be yaǵoro Bada Yesu taugu ǵarogue ya maǵatarana, ⁹ baninama taugu apasol nopolie è yovo guratana aubainama, nam apasol ǵesaudima maika. Be taugu nam veregu da sibo ai isaguna apasol, baninama taugu boni Mamaitua na damma è raraukivi gewegewedina aubainama.

¹⁰ Be Mamaitua na raukiviveree taugu yodi apasol. Be na raukiviverema nam i ute yababeguna, ibewa da taugu è noya guratana, nam apasol ǵesaudima maika. Be uma noyanama nam tauguǵa yau rewapanae e voivoiedina, ibewa da Mamaitua na raukiviveree. ¹¹ Be avedi deǵoda apasol ǵesaudima ta noyanoya gurata bo taugu yà noyanoya guratana, be matabumai inam vari teneǵinama ka raraugugyena, inam vutuna taumi kowai sumaǵena.

Tauda dà kaba midisuǵuma

¹² Tauma Keriso gurie be ya midisuǵu munaǵana vari-nama kè raraugugyena, be taumi uma varinama koyai sumaǵena. Be yodi ǵesauimma nemanama da ko riuriuna da banaga guriguridima tokare nam ta midisuǵu munaǵa?

¹³ Deǵoda inam riunama riukaua, naumeiki da Keriso mate tokare nam ya midisuǵu munaǵa. ¹⁴ Be deǵoda Keriso nam i midisuǵu munaǵa, naumeiki da tauma ama raugugyama be ami waisumaǵama inam nam banibiribiridi. ¹⁵ Be deǵoda inam nama, tauma tokare Mamaitua na matamatama kaikaiyovumaima. Baninama tauma noǵone kè riuemina da Mamaitua tauna Keriso gurie be ya kawa midisuǵu munaǵena. Be deǵoda banaga guriguridima tokare nam ta midisuǵu munaǵa, naumeiki da vari kè raraugugyena inam kaiyovu. ¹⁶ Baninama deǵoda banaga guriguridima tokare nam ta midisuǵu munaǵa, naumeiki da Keriso mate tokare nam ya midisuǵu munaǵa. ¹⁷ Be deǵoda Keriso nam i midisuǵu munaǵa, naumeiki da ami waisumaǵama inam kavakavanama, be taumi yodi yaǵoro sibo gewage-wae koya miamiana.

¹⁸ Be mate taudi aitaúga Keriso tauwai sumaǵenama banegidima a gurigurina, taudi tokare nam yawasana ta banavina. ¹⁹ Deǵoda tauda dobuǵa na yawasanama aubainama Kerisoe tài sumaǵana, o kapore wainuatoitoidama, tunidaǵa tà kwapukwapu yababena.

²⁰ Be Mamaitua riukaua da Keriso gurie be ya kawa midisuǵu munaǵena. Tauna banaga guriguridima nopolie

be Mamaitua ya kawa midisuğu dokena. ²¹ Banaga tenağā kana taiye guri ya tubuğāna, tauna vutuna Adam. Be kauinama teneğinama nama banaga tenağā kana taiye midisuğu munağā ya tubuğāna, tauna vutuna Keriso. ²² Vutuna aubainama Adam kana taiye matabuda tà gurigurina. Be Keriso kana taiye matabuda tà yawasanana. ²³ Be tauda dà rağanima boruborune nama tà midisuğu munağāna. Noğone Keriso ya midisuğu dokana, be murine na kaba verau munağama rağanine, Keriso na banagama ta midisuğu munağāna, ²⁴ yodibe rağan damonama e tavana. Inam rağanine Seitan be banaga adi rewapana be adi waibadama matabudi Keriso e kawa gewegewedina. Be murine tauna na waiguyauma Tamanama e utena. ²⁵ Be Yesu Keriso ei badana, naumeki da Mamaitua Keriso na ġaviamma Yesu kağanama dibune e biridina. ²⁶ Be na ġaviamma damonama inam guri vutuna e kawa gewagewana. ²⁷ “Mamaitua yaba matabudi Keriso kağanama dibune ya biridina.” Be tà katai kaue da yaba matabudi Keriso kağanama dibune ya biridina, be nam tauname mate. ²⁸ Rağanine Mamaitua yaba matabudi Keriso kağanama dibune e biribiridina, murine Keriso tauna mate Tamanama na waibadama dibune e miana. Yodibe Mamaitua tauna vutuna yaba matabudi ei badedina.

²⁹ Be değoda banaga guriguridima nam ta midisuğu munağā, naumeki da taudi aitaugā adi banagama guriguridima aubaidima a babababataitonā, tokare nema ta voia bako? Bo aba aubainama taudi adi banagama guriguridima aubaidima a babataito? ³⁰ Be tauma nemanama? Banaga toitoi uma noyanama ka voivoiena debane ta ġasiġasiemina, be rağan matabuna ta ġoegħoena da sibo ai gurimaina. Değoda banaga gurie nam ta midisuğu munağā, naumeki da tauma aba aubainama uma varinama sibo kè naġo be banaga ġarodie kè rauguguya nawe? ³¹ Yau bana, riukaua yà riuriuemina da tauma rağan matabuna guri ka kitakita saġena. Be tauma Bada Yesu Kerisoe ka raraugħ guyagħuyauemina. ³² Değoda gurie midisuğu munağā ibewa, naumeki da taugu Epeses nopone nam sibo guri è kita saġesaġe. Değoda inam nama, naumeki da

“Tauda yodi tà kani, tà tego,
be pomai tà gurina.”

³³ Ko kita kaua da nam aitau ei kedadoka waigewemi. Değoda gewagħwa banegidima koi turanedina, taumi mate tokare ko gewagħewana. ³⁴ Noğota viravira ko paġo be bua giudima ko gose poredi. Be gewagħwa mate ko gosedi! Taumi ġesaumima Mamaitua nam ko kataienā, uma riunama yà riuriuemina da taumi sibo koya tunimayağħana.

Midisuġu munaġa murine tubuġa nema maika kitana?

³⁵ Yodi ġesaumima agunai ko riuriuna, “Guri taudi nam tubuġa ġarodie be nema ta midisuġu munaġa bako?” ³⁶ Taumi buebuemi, bo? Pesi koya kumana tokare nam e gogo, ibewa da noġone e guri dokana, muriġa da e gogona. ³⁷ Be pesi kuya kumakumana tubuġinama inam semoe pesi nopone e kenakenana. Be pesi kwa kumakumana raġanine, nam pesi tubuġinama kuma kumakumana, ibewa da pesiġa kwa kumakumana, yaġoda bo pesi ġesaudima maika. ³⁸ Be Mamaitua uma pesidima tokare na ġoane nama pesi tubuġidima e utedina. Be nama pesi ġesaudima mate adi tubuġe adi tubuġe e utedina. ³⁹ Be uma kauinama teneġinama nama tauda ġarode. Tubuġa matabudi inam nam teneġidi. Banaga tubuġidima natabu, musara natabu, kiu natabu be iyana natabu.

⁴⁰ Be tubuġa marae be tubuġa dobue mate ta kenakenana. Be mara na tubuġama kitanama tabu be dobu na tubuġama kitanama tabu. ⁴¹ Suara kitanama natabu, nawaravi natabu be kipora kitanama natabu. Be kipora tabu be tabu kitedima tabu be tabu.

⁴² Be inam kauinama teneġinama nama raġanine tauda gurie be tà midimidisuġu munaġa raġanine, tubuġa doġa nopone boruborunama tokare e bovana. Be tubuġa midimidisuġu muneġinama tauna tokare nam e bova, ibewa be kenakena nonoġinama. ⁴³ Tubuġa doġa nopone tà boruboruna, kitedima nam ti verena. Be tubuġa e midimidisuġu munaġana, tauna kitanama ya vere vavasaġana. Tubuġa doġa nopone tà boruboruna, inam ya gwaġagwaġana, be tubuġa e midimidisuġu munaġana, tauna yai rewapana kauana. ⁴⁴ Tubuġa doġa nopone tà boruboruna, inam dobu na tubuġama, be tubuġa e midimidisuġu munaġana, inam tubuġa arue. Deġoda dobu na tubuġama e miana, naumeki da tubuġa arue mate e miamiana.

⁴⁵ Baninama girugiruminama porane umanama e riuriuna, “Banaga pakanama inam Adam, tauna dobu yawasaninama ya paġona.” Be Adam wairabuinama muriġa ya tubutubuġana, tauna vutuna yawasana arue tauwai utaenama. ⁴⁶ Arua baneginama nam i dokana, ibewa da dobu baneginama. Muriġa da arua baneginama e tavana. ⁴⁷ Pakane Adamnama tauna doġa popokaune ya tubuġana, be Adam wairabuinama tauna marae be ya yovona. ⁴⁸ Tauda matabuda dobu banegidama. Vutuna aubainama tubuġidama inam Adam tubuġinama maika. Be deġoda tauda Kerisoe mara banegidama te tubuġana,

naumeki da tauda tokare tubuğidama Keriso tubuğinama maika.⁴⁹ Yodi tauda kitadama dobu baneginama maika, be tokare kitadama mara baneginama maika.

⁵⁰ Yau bana, yà riuriu kauemina da dobu na tubuğe, tauda tokare nam tà na gó marae be Mamaitua na waiguyauma tài buderie. Uma tubuğinama tokare e bovana be nam e kena nonoǵa.⁵¹ Be yodi koi beavaie be taugu giu semosemonama yà riuemina: Tauda nam tokare matabuda tà guri, ibewa da tà tubuğá vitarana.⁵² Uma kauinama bogigi damodamone e riuriuna raǵanine, ei raǵantenqge da e tubuğana, mata tautaugabana maika. Bogigi e riuriuna raǵanine banaga guriguridima ta midisuğu nonoǵana be nam ta bova munaǵa. Be yawayawasanidama tauda tà tubuğá vitarana.⁵³ Tubuğidama poranama tokare e guri be e bovana, be tubuğá vaunama tokare nam e guri be e bova.

⁵⁴ Be tubuğá vaunama tà paǵona raǵanine, dabudine peroveta na giuma e tubuğana. Na giuma inam umanama: “Vaisuba guri ya tonoǵina.”

⁵⁵ “Guri, am vaisubama deǵo?

Guri yodi am rewapanama deǵo?”

⁵⁶ Gewagewae guri na rewapanama e paǵopaǵona. Be tarawatue gewagewa e maǵamaǵatarana.⁵⁷ Be Mamaitua tài kaiwe da Yesu Kerisoe anivai suba ya utedana.

⁵⁸ Vutuna aubainama yau bana, ami waisumaǵe ko midi da bagibaginaǵa, be nam aba e kawa dagudagumi. Raǵan matabuna Bada aubainama ko noya guratana, be ko kataie da ami noyama Bada ǵarone inam nam kavakavana.

16

Mane taminama Mamaitua na damma Jerusalemma aubaidima

¹ Naumeki be yodi mane taminama Mamaitua na damma aubaidima yà riuemina: Galesia banegidima è riuedi be nema a voivoia bakona, nama taumi sibo koya voiana.

² Sande patapatanama taumi tenatenaǵaǵa wiki nopone ami maesama ko paǵopaǵona na ruvae, rauǵaubonaǵa sibo koya boruboruna. Uma manenama koya boruboruna sibo koya vokaukaue be koya boru yaǵe da ya kenana. Be taugu yà tavana raǵanine nam mane yà tama.³ Be mane kawakawa nonoǵinama yà paǵo be taumi banaga ko vinedi da ami manema yà utedi be yà riupore nawedina Jerusalemma, leta mate.⁴ Be deǵoda na gó ǵarogue e verena, naumeki da matabumai ka na gó tenaǵana. Pol na vaǵaima yai ogaeña.

⁵ Taugu Masedonia provinsnaǵa yà verauna, be muriǵa da taumi ǵaromie yà dobina.⁶ Agunai taumi ǵaromie raǵan

bisanama yà rautapa miana. Bo deḡoda bodubodu raḡanine taumi mate tà mia, be murine taumi yau vaḡaie ko saguguna. ⁷ Taugu nam yà tava ġaromie be yà naḡo ġoma, ibewa da yà ġoeġoena taumi mate tà rautapa mia guratana, deḡoda Bada ei anineguna nama. ⁸ Be yodi taugu Epesesma yà miana naumeki da Pentekost raḡaninama e tavana, ⁹ avedi da banaga toitoi tawai ġavieguna be yau noyama kedanama verenama ya nuaporaġa aubainama, taugu yaḡoro uma dabudine yà miana.

¹⁰ Deḡoda Timoti ġaromie e tavana, naumeki da ko rabe kauena, tauna nam ma nuaboyana ġaromie sibo ya mia, baninama tauna Bada na noyama e voivoiena maika taugu. ¹¹ Be nam aitau e riutuatuāgaie, be ma nuasubana ko riupore verauġe da ġarogue e tavana. Taugu Timoti na banagama mate yà raberabedina.

¹² Be turaguma Apolos taugu è riu vavasaġena da tauna na banagama mate sibo a verauna ġaromie, be tauna ya tuaġaina. Be tauna na ġoane nama tokare e verauna ġaromie.

¹³ Koi kita kauana banaga kaikaiyovudima ġarodie. Ami waisumaġe ko midi da bagibaginaġa. Debemima e tora be koi rewapanana. ¹⁴ Yaba matabuna ko voiedina wainuapaġoe.

¹⁵ Akaia provins nopone Stepanas be na vadama nopone banegidima taudi Bada Yesu ai sumaġa dokena. Be taudime ai uta munaġedi da raġan matabuna tauwai sumaġa aubaidima a noyanoya guratana. Vutuna aubainama yau bana, ¹⁶ taumi inam nama banegidima, aitauġa eklesia nopone a noyanoya guratana aubaimima, taudi vutudi ko voteyeteyedina. ¹⁷ Taumi nam ġarogue ko tavana, aubainama taugu è tauwai nuaboyana. Be ami banagama Stepanas, Fotunatas be Akaikas ġarogue a tavatavana raḡanine, taugu nuaguma ya vere kauana, ¹⁸ baninama taudi, taumi be taugu a duġuda be taugu nuaguma ya verena. Inam nama banegidima, taudi vutudi ko viviredina.

Pol na waikaiwama

¹⁹ Mamaitua na damma matabudi Eisia provins nopone tawai kaiwemina. Be Akwila be Prisila mate Bada isane tawai kaiwa vavasaġemina, be aitauġa adi vadae awai rawateġeidina taparoro aubainama, taudi mate tawai kaiwemina. ²⁰ Be tawai sumaġa uma dobudine, taudi mate tawai kaiwemina. Be wainuapaġoe koi kaiwa vivirana.

²¹ Uma waikaiwa giunama inam taugu Pol nimague è girumina. ²² Aitau da Bada nam ei nuapaġoe, Bada tauna tokare ei tara tautauena.

O Bada, kwa yovo!

23 Bada Yesu na raukiviverema ġaromie e kenana.

24 Be Yesu Kerisoe taumi matabumi yàwai nuapaġoemina.

Korint 2 adi letama wairabuinama

Pol na waikaiwama

Kapore yau banagama Korint nopone miemienimima.

¹ Taugu Pol, Yesu Keriso na taunoyama, Mamaitua ya yokoegu be ya vinegu da taugu apasol Mamaitua varinama verenama yà rauguguyena. Taugu be turadama Timoti mate uma letanama yà girugirumina, taumi Mamaitua na ekalesiam Korint nopone miemienimima ġaromie, be mate tauwai sumāga Akaia nopone miemienidima ġarodie. Taugu be Timoti kawai kaiwemina.

² Mamaitua Tamadama be Bada Yesu Keriso adi raukivivere, be adi subama ġaromie.

Riuwai nuasubasuba Mamaituanama

³ Mamaitua dà Badama Yesu Keriso Tamanama, tauna vutuna isanama ka kaisuğusuğuna, baninama tauna raunuatoi be riuwai nuasubasuba Mamaituanama. ⁴ Tauma ama piripirie tauna e riuriuwai nuasubasubamaina da tauma uma riuwai nuasubasubanama teneğine tokare banaga gesaudima adi piripirie tauma mate taudi ka riuwai nuasubesubedina. ⁵ Tauma Kerisoe wainuatoitoi, toitoi ka banabanavidina, be rağan matabuna Kerisoe e riuriuwainuasubasubamaina. ⁶ Tauma piripiri ka banabanavidina, taumi anisagumima da yawasana ko banavina aubainama. Be değoda tauma Mamaitua na riuwai nuasubasubama ka banabanavidina, inam mate taumi aniriuwai nuasubesubemima aubainama da taumi tokare teneğinama da piripiri ko damiporedina, maika tauma. ⁷ Tauma kè kataiena da taumi tokare ami waisumäge nam ko beku, baninama taumi piripiri ko banabanavidina adi ruvae Mamaitua na riuwai nuasubasubama tokare ko banavidina.

⁸ Tauma ka ġoēgoena da taumi sibo koya kataiena da tauma Eisia provins nopone piripiri dosi vavasağidima kè banavidina. Be tauma nam teneteneğin da piripiridima sibo kè damiporedi, be ġaubonağ sibo kè gurina. ⁹ Tauma kè noğotina da yodi ama gurima rağaninama ya tavana. Uma kauinama ya tubuğana, baninama Mamaitua yai kataiemaina da tauma nam sibo ama rewapanama kèi sumağe, ibewa be Mamaitua na rewapanae sibo kèi sumağana, baninama tauna vutuna tokare banaga guriguridima e kawa midisuğu munağedina. ¹⁰ Tauma ġaubonağ sibo kè gurina, be tauna yai yawasanemaina. Be uma kauinama teneğine tauma ka noğonogota guratena da tauna

tokare ei yawasana munağemaina. ¹¹ Be taumi mate ami moiragie ko sagumaina. Be Mamaitua tauna banaga toitoi adi moiragima e vaiedi, yodibe tauma e sagumaina, be banaga toitoi ta kita be matabudi Mamaitua tai kaiwena yaba matabudi ya voiedina sagumaima aubainama.

Pol na vağaima oganama ya vitaredina

¹² Tauma kawai nuaverena yaba tenağā ġarone, be ama noğotama e riuriuemaina da inam riukaua. Tauma rağan matabuna Mamaitua na ġoane be na raukiviveree be riukaue ka miamiana. Be tauma taumi mate tà miamiana rağanine, tauma nam ama nuauyauyae kama miamiana, be nam airağān kama kaikaiyovuemina. ¹³ Vutuna aubainama yaba matabudi ka girugiruma wainege nedina ġaromie da taumi ko sievidi be ko kataiedina. Be taugu yà noğonoğotina da tokare yau giuma banidima debemie ta sağana. ¹⁴ Yodibe dà Badama Yesu na kaba verauma rağanine taumi koi nuaverena tauma ġaromiae, maika taudi ġesaudima nama. Be tauma kai nuavere taumi ġaromie.

¹⁵⁻¹⁶ Uma kauinama aubainama taugu è ġoena da Masedonia nağonama aubainama taumi sibo è vakitemina, be mate yau kaba verau munağama rağanine sibo è vakita munağemina da taumi waiaiaina rabui sibo koya ragaudina. Yodibe taumi sibo koya kaisagu naweguna Judiama.

¹⁷ Taumi koyai noğotana taugu uma vağainama èwai ogena taumi kaiyovuemima aubaina, bo? Bo taugu dobu banegidima maika yàwai kaikaiyovuemi, bo? Taugu nuaguma tuağaine be yaba yawai anina yababedi, bo? ¹⁸ Ibewa ġoma! Mamaitua ya kataiena da taugu yà riuriu kauana. Taugu nam nuaguma tuağaine yài anina yababa be muriğā tokare nam e tubuğā. Taugu aba èi aninena, inam e tubuğana. ¹⁹ Timoti, Saelas be taugu Yesu Keriso Mamaitua Natunama kè rauguguyena ġaromie. Be tauna nam nuanama tuağaine ei anina yababa be muriğā tokare nam e tubuğā, ibewa. Aba tauna ya riuena, tokare e tubuğana. ²⁰ Mamaitua na saugama matabudi Yesu Kerisoe a tubuğana tauda aubaidama. Be tauma banaga matabudi kè riuedina da tauna riukaua patupatutunama, vutuna aubainama isanama ka kaisuğusuğuna. ²¹ Mamaitua taumi be tauma ya voiedana da dà waisumağama Yesu Kerisoe ei rewapanana. ²² Mamaitua Arua ya utedana inam ya pusidana. Mamaitua ġarode Arua Babau ya boru waidevana, be muriğā tokare yaba matabudi e utedana.

²³ Taugu sibo ġaromie è tavana, be nam e tavana baninama nam e ġoena da sibo è tainuaboya munağemi. Uma kauine Mamaitua yau matamatama. ²⁴ Taumi kaite ami waisumağe

naumeki ko midimidina, be deḡoda muriḡa yà verauna, nam yài badabada ġaromie, ibewa. Be taugu yà voiemi da taumi koi nuaverena.

2

¹ Vutuna aubainama èi oga da nam sibo ġaromie è verau munaḡa, be è voiemi da sibo koyai nuaboyana. ² Baninama deḡoda taugu yà tainuaboyemina, aitau tokare e tainuaveregu? Nam aitau da taumi. ³ Vutuna aubainama ġaromie è girumana da taumi yaba matabudi sibo koya kawa didimanidina, yodibe sibo ġaromie è tavana. Deḡoda ġaromie yà tavana, nam ama ḡoeḡoena da anitai nuavereguma banegidima, be ta voiegu da ta tainuaboyagu. Taugu è kataiena taumi taugu mate tokare tài nuavere tenaḡana. ⁴ Taugu maiḡone leta ġaromie è girumina, inam ġarogue ya piripiri kauana, taugu ma nuaboyagu be ma matasurugu. Be nam tai nuaboyemima aubainama è girumana, ibewa da sagumima aubainama, baninama taumi sibo koya kataie kauena da taumi taugu nuaguma koya paḡopaḡo kauena.

Aitau na gewagewama ewai maḡataridina, naumeki da tauda tà noḡota poredina

⁵ Taugu inam tauḡoma aitau gewagewa tauvoienama na voiamma è girugirumina ko noḡotina. Tauna nam tauḡa i nuaboyaguna, be matabumi mate. Ibewa, be nam matabumi, agunai bisaḡa. ⁶ Be taumi aitauḡa kovoḡa tauna koya uteutena, yodi agunai naumeki. ⁷ Be na gewagewama ko noḡota poredi, ko riuwai nuasubasuba be koi anina munaḡena, be nam ko voie da na nuaboyama koi moraba vavasaḡe. ⁸ Be yàwai baḡa guratemi da taumi patara matedie sibo koyai anina munaḡe, be tauna e katai munaḡe da taumi yaḡoro tauna kowai nuapaḡoena.

⁹ Taugu èi nuavere da yau letae aba è girugirumina taumi koya voteyeteye, be inam baneginama kovoḡa koya utena. Yodi è katai kauena da taumi yau waibadama yaḡoro kowai aninena. ¹⁰ Inam baneginama tauna nam ġarogue gewagewa i voiena. Be deḡoda taumi na gewagewama ko noḡota porena, naumeki da taumi kami taiye taugu mate Keriso matane yà noḡota porena, ¹¹ uma kauine Seitan nam ei yapayapateda. Baninama tauda Seitan na waikaikaiyovuma tè kataiena.

¹² Raḡanine taugu è naḡona Troasma Keriso yau kedama ya kaiporena vari verenama rauguguyenama aubainama. ¹³ Be baninama turaguma Taitos nam e banavina aubainama, taugu nam ei nuavere kauana. Vutuna aubainama taugu banaga èi kaiwedi be è naḡona Masedoniamma.

Keriso tauvai suba

¹⁴ Mamaitua yawai kaiwena, baninama rağan matabuna tauna Keriso na vaisubae ewai dokedana. Değō değō tà nağonağona, Mamaitua na kataima tawai daberarina pi-upiu ġabunama maika. ¹⁵ Tauda Keriso mayanama* tawai daberarina. Be banaga matabudi mate inam mayanama ta damidamina, avedi da taudi tokare yawayawasanidi bo guriguridi. ¹⁶ Banaga aitaugā da nam timawai sumağana, uma mayanama e riuriuedina da taudi inam guriguridima. Be banaga aitaugā da tawai sumağana, uma mayanama e riuriuedina da taudi inam yawayawasanidima. Be aitau yodi teneteneğina da uma noyanama dosinama e voie? ¹⁷ Tauma nam maika taudi aitaugā ta nağō babara be Mamaitua riunama ta rauguguye be mane ta pağopağona nama, ibewa. Tauma Keriso na taunoyama be Mamaitua ya riuporemaina da tauna matane tauma riukaue ka rarauguguya.

3

¹ Be tauma nam kama boruboru tavaitemaina. Be tauma ama noyama aubainama nam reprens pepedima ġaromie kama ġoeğöena banaga ġesäudima maika, ibewa. Be mate tauma reprens pepedima banaga ġarodie nam ke ġoedina taumi aubaimima, ibewa. ² Taumi vutuna tauma ama reprens pepama, be nopomaie ka noğonoğota watanimina. Be banaga matabudi ta kitekitemina da taumi ami yawasanama koya vitaredina. ³ Tauma ama noyama votanama inam taumi. Vutuna aubainama taumi inam maika Keriso na reprens pepama, baninama Mamaitua yawayawasaninama riunama nam pepae ke girumina, ibewa da Arua na rewapanae taumi nopomie kè girumina.

⁴ Tauma umanama ka giugiuna, baninama Kerisoe Mamaitua ya voiemaina da uma noyedima ka voiedina. Be tauma kè kataienia da Mamaitua tauna e sagusagumaina da tauma na noyama ka voia kauedina. ⁵ Taumağā tokare nam uma noyedima ke voiedi, ibewa da Mamaitua na rewapanae ka voivoiedina. ⁶ Tauna vutuna ya voiemaina da tauma banaga nema ei yawasana bakedina kedanama vaunama sibo kè riuedina. Değoda banaga tarawatu tawai muriwatanena, taudi tokare nam yawasana ta banavi, ibewa. Be Arua Babaue tokare yawasana ta banavina. Yawasana kedanama porane banaga a raurubu da riuvavasağā 10 a voteyeteyedina, be matabudi guri a banavina. Be yawasana kedanama

* **2:15:** Pol na bonae ya riuna ‘ğabu’. Inam taudi adi giuma na ruvae be tauda inam ‘maya’.

vaunama inam banaga Keriso tawai muriwatanena taudi tokare Keriso na Arue yawasana ta banavina.

Yawasana kedanama vaunama inam ya vere kauana, nam poranama maika

⁷ Uma ko nođoti. Mamaitua banaga tarawatu ya utedina. Avedi da Mamaitua ma borumina uma tarawatudima yeku bogedie ya girumidina, be yađoro uma tarawatudima ta voie da banaga ta gurigurina. Uma boruminama aubainama Mousis nođonama ya yana vavasađana, be Israel banegidima taudi nam teneteneđina da Mousis nođonama sibo a kitadidi. Be inam yananama ya nuayađotana. ⁸⁻¹⁰ Be Arua Babau tauna yawasana kedanama vaunama yai kataiedana, inam kedane banaga didimana be yawasana ta banabananavida. Vutuna aubainama na borumama ya sađa da ya sađa vavasađana, nam tarawatu boruminama maika, baninama tarawatue banaga guri ta banabananavina. ¹¹ Yawasana kedanama poranama ya nuayađotana vutuna aubainama na borumama mate ya nuayađotana. Be Yawasana kedanama vaunama kenakena nonođinama aubainama, na borumama dosinama.

¹² Inam kauidima kè katai kauedina aubainama, tauma ma raudebatoramai ka rarauguguyana. ¹³ Mousis tauna nođonama ya rupuna, baninama Israel banegidima nam ti ġoena da neneđara boruminama Mousis nođone ya nuanua yađotana sibo a kita. Be tauma ama borumama nam maika Mousis. ¹⁴⁻¹⁶ Be Israel banegidima nopodima ya badona naumeki da yodi. Rađanine Mousis na tarawatumata ta siesievina taudi nuedima yađoro rupurupunama, vutuna aubainama aba ta siesievina, baninama nam tima pađopapāgo kauena. Be aitau Bada ewai sumađena, inam rađanine rupu e nuaporađa be tauna Mamaitua riunama ta siesievina, baninama e pađopapāgon. ¹⁷ Be Bada tauna vutuna Arua Babau. Be deđoda Bada Aruinama nopode e miamiana, taune tokare tarawatu na rewapanama ġarode e kovi be kuvesa tà banavina. ¹⁸ Be tauda tauwai sumađa nođode nam rupu ima kenakenana. Vutuna aubainama tauda Bada na borumama tà kitakitana, be Arua Babau e rawarawa vaudana da kitadama tauna maika.

¹ Mamaitua na raukiviveree tauna rauguguya noyanama ya utemaina. Vutuna aubainama tauma nam kama tunitunituāgaina. ² Be tauma kaua semosemodi be waitunimayamayagidima kē gosaāgāna. Be banaga nam kama kaikaiyovuedina, be Mamaitua na giuma nam kaiyovue kama giugiu yababayabedina, ibewa. Da raāgan matabuna tauma Mamaitua matane riukaua ka rarauguguyena da banaga matabudi sibo a kataiemai da tauma riukaua banegimaima.

³ Tauma vari verenama ka rarauguguyena be aitaūgā da guri kedanama ta watawatanina, taudi uma varinama nam tima paāgopāgona, ⁴ baninama dobu mamaituanama kaikaiyovunama taudi nopolima ya kawa kupikupina, da taudi vari verenama na yanama nam tima katakataieno. Baninama Mamaitua boruminama matabuna natunama Yesu Keriso īgarone e rawarawa maāgatarina, be taudi uma kauinama nam ti katai kauena. ⁵ Baninama tauma nam taumāgā kama rarauguguyena munaāgemaina, ibewa. Yesu Keriso tauna Bada, vutuna tauma ka rarauguguyena. Be Yesu kana taiye tauma taumi ami taunoyama. ⁶ Mamaitua ya riuna, “Yana waikupikupie sibo ya yana.” Be inam Mamaituanama tauna vutuna nopolima yai yanana, be yodi tauma Mamaitua na borumama Kerisoe ka kitakitana.

Tauma maika gurewa

⁷ Be tauma tubuāgimaima maika gurewa be yaāgoro Mamaitua varinama verenama tauma nopolimaie e kenakenana. Vutuna aubainama banaga sibo a kataie da vari verenama na rewapanama dosi vavasaāginama inam nam tauma īgaromai, ibewa da Mamaitua īaronama.

⁸ Gewagewae a īgakiākimaima be nam ke nuagoruna, a kawa nuaraāgāraāga kauemaina, be yaāgoro keda kē banavidina. ⁹ Banaga a raraukivi gewegewemaima be Mamaitua nam airāgan i gosemaima. Be awai mia bakokomaina be tauma kē midimidisuū munaāgāna. ¹⁰ Tauma raāgan matabuna ma kaba babare tubuāgimaima guri ka kitakita saāgena, teneāginama maika Yesu. Be mate Yesu na yawasanama tauma tubuāgimaima ewai maāgataridina.

¹¹ Vutuna aubainama avedi da tauma banaga yawayawasanimaima be Yesu kana taiye tauma raāgan matabuna guri ka kitakita saāgena, da Yesu na yawasanama tauma tubuāgimaima ewai maāgataridina. ¹² Taumi ami yawasanama kana taiye tauma raāgan matabuna gewagewa be guri ka banabanavidina.

¹³ Tauma ma raudebatoramai aba kawai sumāgena nama ka rarauguguyena, maika girugiruminama poranama e riuriuna umanama, “Taugu yāwai sumāgāna aubainama yā

giugiuna.”¹⁴ Baninama tauma kè kataienia da Mamaitua Bada Yesu gurie be ya kawakawa midisuğu munağena, tauna vutuna tauma mate e kawa midisuğumaina, be tokare tauma taumi mate e nawe tenağedana tauna ġarone.¹⁵ Uma kauidima matabudi inam taumi anisagumima aubainama da Mamaitua na raukiviverema e daberarana banaga toitoi ġarodie. Be tokare taudi Mamaitua tai kaiwa kauena be isanama ta kaisuğusuğuna.

¹⁶ Vutuna aubainama tauma nuamaima nam e beku. Be avedi da tubuğimaima e vovo gwaġaqwaġa be nopomaima raġan patapatanama e rawarawa vauna.¹⁷ Be tauda dà piripirima uma dabudine a tupotupo be a tekatekana, be uma piripiridima ta voie da tauda tokare maesa saġasaġa vavasaġinama tà paġona, gewagewa mate nam tài tarapate be teneteneġina.¹⁸ Vutuna aubainama yaba kitekitedima ġarodie nam tài kita, ibewa, be yaba nam anikitakita ġarodie tài kitana. Baninama yaba anikitakita taudi tokare tai kavena, be yaba nam anikitakita taudi tokare ta kena nonoġana.

5

Dà vada ġomama marae

¹ Tauda tè kataienia da uma dobunama kapene yodi mate tà miamiana tokare e gewagewana. Be Mamaitua vada ġesaunama tauda e utedana. Inam vadana* marae kenakena nonoġinama be nam banaga nimedie ti kerina.² Yodi tauda tà noġonoġota guratena da tauda tokare marae dà vadama tà paġona,³ be raġanine tà gurina aruidama nam sibo ya mia yababa, tauna naumeki da na vadae sibo ya miana.⁴ Yodi raġanine dobu tubuġine tà mia be tà yakeyakeina, baninama tauda piripiri toitoi tà bana-banavidina aubainama. Be tauda nam tama ġoeġgoena da sibo tè guri, baninama raġanine tà gurina aruidama inam maika kabe iwai kovakova. Vutuna aubainama tauda tà ġoeġoe guratena da nam sibo tè guri be mara tubuġinama vaunama sibo tè paġona. Inam kedane yawasana kenakena nonoġinama tauna yawasana samosamoinama tokare e tonoġina.⁵ Mamaitua tauna vutuna tauda ya voiedana uma kauidima aubaidima. Be tauna ġarode Arua Babau ya boru waidebana, be muriġa tokare tubuġidama vaunama e utedana.

* **5:1:** Uma dobunama kapenama inam tauda tubuġidama vovogwaġaqwaġanama yodi tà miamiana. Be vada ġesaunama inam tubuġa vaunama tokare marae tè paġona. Inam yai rewapania kauana.

⁶ Vutuna aubainama tauda rağan matabuna tawai nuaverena, baninama tè kaitaiena da tokare tubuğvaunama tà pagona. Be tauda uma dobunama tubuğine tà miamiana rağanine, tauda inam nam Bada diane tama miamiana. ⁷ Avedi da tauda uma yabedima nam tama kitekitedina, be waisumağe tà katakataiedina. ⁸ Değoda tauda tà gurina inam naumeki, baninama tubuğporanama tà gosena rağanine, tauda tokare Bada mate tà mia kauana. ⁹ Vutuna aubainama avedi da tauda tubuğporane bo tubuğvaune, be rağan matabuna tà rara rubu da Bada tawai nuaverena. ¹⁰ Baninama tokare tauda tenatenağaga Keriso noğone tà midi be yaba veredi bo gewegewedima uma dobune tè voivoiedina adi ruvae tauna tokare e etareda be ei maesidana.

Mamaitua Kerisoe suba ya utedana

¹¹ Tauda sibo Bada tè nairena, vutuna aubainama tauma banaga toitoi kè giu yağeyağedina da sibo Bada ai muriwatanena. Mamaitua ya kataienada tauma riukaua banegimaima be tauma ka noğonogötina da taumi mate nama ko noğonogotima. ¹² Be tauma nam kama boruboru tavatavaite munagemaina, ibewa. Be tauma ama noyama verenama aubainama taumi sibo koya rauguyaguyaue-maina. Yodibe taumi banaga aitaugaya yaba matae kitekitedima ta rara guyaguyauedina sibo koya kawa didimanidina, baninama taudi nam didimana banegidi. ¹³ Değoda riukaua banaga ta riuna, tauma ama voia be ama giuma bua maika, inam naumeki. Tauma Mamaitua na noyama ka voivoie. Be değoda tauma ama noğotama e didimanana inam naumeki, taumi anisagumima aubainama. ¹⁴ Bada na wainuapağoe ewai dokedana, baninama tauma kè kataienada tauna ya gurina tauda matabuda aubaidama. Vutuna aubainama tauda matabuda dà yawasanama poredie Keriso mate tè guri tenağana. ¹⁵ Be tauna ya gurina tauda matabuda aubaidama. Vutuna aubainama yodi nam taudame dà góane tama miamiana, ibewa da tauna na góane sibo tè miana. Baninama tauda kada taiye tauna ya guri be ya midisuğu munagana aubaidama.

¹⁶ Noğone tauma Keriso na yawasanama tubuğe kè kitakita wairuvana, be yodi inam ibewa. Yodi tauma nam airağan banaga adi yawasanama tubuğe kama kitakita wairovedina, dobu banegidima maika. ¹⁷ Vutuna aubainama aitau da Keriso górone e miamiana, tauna inam tubuğvaunama. Yawasana poranama ya nağona be yawasana vaunama ya tavana.

¹⁸ Inam yabedima matabudi Mamaituae ta tubutubuġana. Tauna Yesu Kerisoe yai taurana munaġedana. Be tauma ya riuporemaina da banaga ġesaudima mate ka verauġa munaġedina tauna ġarone. ¹⁹ Mamaitua banaga matabudi Yesu Kerisoe yai turana munaġedina, be tauna banaga adi gewagewama nam i sievidina. Be tauna ya riuemaina da inam waitureninama banaga ġarodie sibo kē rauguguyena. ²⁰ Tauma Keriso epaiyanama be Mamaitua taumaie taumi ġaromie e giugiuna. Vutuna aubainama tauma Keriso kē rauepaiye be ka riuriuemina umanama, “Mamaitua koi turanena.” ²¹ Keriso gewagewa nam i voiedina, be dobu banegidama kada taiye Mamaitua dà gewagewama Yesu Keriso na korosima debane ya biridina da Mamaitua tauda sibo ya kawa didimanidana.

6

¹ Tauma Mamaitua na taunoyama be ka riu vavasaġemina: Taumi Mamaitua na raukiviverema koya paġona, be nam inam raukiviverenama ko voia yababena. ² Mamaitua umanama ya riuna,

“Tauguġa taumi ami raġanima è boruna da yai yawasanima.

Be inam raġanine taugu ami ġabama è vaie be è sagumina.”

Koya vaie, inam raġaninama yodi ya tavana da Mamaitua vere e voiena ġarode.

Pol na piripirima ya giuedina

³ Tauma nam aiyaba gewegewedima kama voivoiedina da banaga tauma ama noyama ta riutuatuġaie, ibewa, ⁴ be yaba matabudi ka voivoiedina sibo banaga a kitamai be ai kawa riukauemai da tauma naumeki Mamaitua na taunoyama. Be raġan matabuna tauma piripiri be gewagewa matabudi ka damidami poredina. ⁵ Banaga a riġariġamai, dibure a birimai, patara a ġasiemai, kē bagibagi gurata, nam kena kaua, kani kē gurina. Inam yabedima matabudi kē dami poredina. ⁶ Tauma raġan matabuna nam aba gewagewanama banaga ġarodie ke voiena, ibewa. Be tauma raġan matabuna Arua Babaue banaga kēti nuapaġoedi be nuatauġa raukiviveree kē noyanoyana. ⁷ Tauma raġan matabuna Mamaitua na rewapanae riukaua kē rarau guguyena. Didimana vutuna tauma ama tuniġaġara be ama madama. ⁸ Banaga ġesaudima ta viviviviremaina, be ġesaudima nam tima viviviviremaina, ta kunukunuremaina be ġesaudima isamaima ta kaikai suġusūġuna. Ĝesaudima ta riuriu waikaikaiyovuemaina, be yaġoro tauma riukaue

ka giugiuna. ⁹ Uma dobunama inam e nuanuababağemaina be Mamaitua e katakataiemaina. Rağan matabuna guri ka kitakita sağesägena, be yağoro ka miamiana. Banaga ta riğarığamaina be nam timawai gurimaina. ¹⁰ Banaga tawai nuaboyamaina be rağan matabuna tauma kawai nuaverena. Tauma waikaruwağawağamaima, be banaga toitoi ka sagudi da tawai guyauna. Tauma nam waipurapuramai be yağoro yaba matabudi inam tauma ġaromaima.

¹¹ Taumi yau banagama Korint, taugu nam ġaromie giu ei dağasieno, ibewa da yau giuma didimanidie è giuemina. Taugu nopoġuma è rağā porena taumi ġaromie. ¹² Taugu nuaguma nam taumi ġaromie ama guduguduna, be taumi taugu ġarogue nuemima ko guduguduna. ¹³ Taumi yau sedama aubainama, yàwai bağemina da taumi mate sibo nopoġima koya kaiporena ġarogue.

Banaga nam waisumegidi nam mate koi rawateğeimi

¹⁴ Waisumaġa banegimima nam kupi banegidima mate koi rawateğeimi. Baninama vere nam gewagewa mate tai rawateğeidi be teneteneğina. Be yana nam kupi mate tai rawateğeidi be teneteneğina. ¹⁵ Be Keriso nam Seitan mate tai rawateğeidi be teneteneğina. Waisumaġa banegidima nema kupi banegidima mate tai rawateğei bakedi? ¹⁶ Be Mamaitua na vadama kokoitau mate nema tai rawateğei bakedi? Be tauda Mamaitua yawayawasaninama na vadama, baninama tauna umanama ya riuna:

“Taugu taumi mate tà mia

be tà babarana.

Taugu taumi ami Mamaituama

be taumi taugu yau banagama.”

¹⁷ “Vutuna aubainama taumi kupi banegidima ko gosedi be ġavoe ko mia.

Nam kaua miremiredima ko rabedi,

inam rağanine taugu tokare yài aninemina.”

¹⁸ “Taugu taumi Tamemima

be taumi taugu yau sedama.

Nama Bada wairewapana vavasaġinama ya riuna.”

7

¹ Yau bana, yodi uma sagidima ġarode Bada ya voiedina, aubainama yaba gewegewedima matabudi tauda tubuġidama be aruidama ta kawakawa miremiredina sibo tè gosaġana. Be Mamaitua anivivirenama aubainama tauda rağan matabuna tè raurubu da veree sibo tè miana.

Korint banegidima Pol ai turana munaġena aubainama, nuanama ya verena

² Yau bana, nopolima ko kaiporena ġarogue. Tauma nam aitau ġarome aba ke kawa gewagewana. Be nam aitau kei kedadoka waigewamna. Be nam aitau ke kaikaiyovuemna. ³Taugu nam uma yabedima taumi waiwavumima aubainama ama giuguedina, ibewa. Taugu noġone è riuemina da taumi nuaguma ko paġopaġona. Be avedi da tà mia tenaġa bo tà guri tenaġana, yaġoro nuaguma ko paġopaġona. ⁴Taugu yàwai sumaġa guratemi be yàwai guyaguyauemina Taitos ya duġumina aubainama. Vutuna aubainama yau piripirie taugu raġan matabuna yàwai nuavere guratana.

⁵ Be tauma Masedoniamma kè tavana raġanine piripiri ya moraba kauana, be nam deġo suba ke banavina. Tauma banaga a riu vireviremai be naira nopolima ya moġavuna. ⁶ Be Mamaitua tauna vutuna banaga wainuatoitoidima ewai nuasubedina, tauna tauma yai nuasubamaina Taitos na kaba veraue. ⁷ Be taumi Taitos koyai nuasubana, aubainama tauma kèi nuaverena. Taitos ya riueguna da taumi ko ġoeġoe guratena da taugu sibo koya kitaguna. Be ami giuma gewegewedima ġarogue koya riuriueguna, aubaidima yodi kowai nuaboyana. Be mate taumi taugu koya midi ġaġariguna. Vutuna aubainama taugu yodi èi nuavere da èi nuavere vavasaġana.

⁸ Deġoda yau letama ima kawakawa nuaboyemi inam naumeki, taugu nam ama siesievimina. Noġone è siesievimina, baninama yau letama raġan ġaubonaġa ya kawa nuaboyemina aubainama, be yodi ⁹taugu èi nuaverena. Nam ami wainuaboyama aubainama èi nuaverena, ibewa. Be taugu èi nuaverena, baninama ami wainuaboyama ya voiemi da taumi ami noġotama koya vitarena. Vutuna aubainama taumi Mamaitua na ġoane naumeki da koyai nuaboyana. Be tauma nam aba gewagewanama ġaromie ke voiena, ibewa. ¹⁰ Deġoda Mamaitua na ġoane nuaboya ta tubutubuġana, inam ya verena, baninama inam nuaboyedima ta voie da banaga adi noġotama ta vitaredi be yawasana ta banabanavidina. Vutuna aubainama banaga sibo ai nuaverena, deġoda uma nuaboyedima ta banabananavidina raġanine. Be deġoda dobu na ġoane nuaboya ta tubutubuġana, inam nuaboyedima ta voie da banaga guri ta banabanavina.

¹¹ Taumi ami nuaboyama Mamaitua na ġoane tubutubuġinama yodi na verema e voiena ko kitana: Taumi ami gewagewanama koya kawa didimanidina, taumi taugu koya midi ġaġariguna, taumi banaga gewagewanama kana taiye nuemima yai medina, be taumi taugu ko nainairegħuna. Taumi ko ġoeġoe guratena da taugu sibo koya kitaguna,

be taumi banaga gewagewanama na kovoğāma koya ute makaiena. Inam yabedie taumi yodi kowai mağatara munağemina da taumi gewagewae be yodi koya kawa vere munağemina.¹² Taugu ami letama è girugirumina rağanine nam tauğoma gewagewa tauvoienama na kauama aubainama è girumina, bo nam gewagewa ġarogue a tubutubuğana aubainama è girumima, ibewa. Taugu è girumana da taumi Mamaitua matane sibo koyai mağatara munağemina da taumi taugu yağoro murigue ko midimidina.¹³ Uma kauidima a tubuğana aubainama taugu nuaguma ya vere kauana.

Be kaua wairabuinama inam taumi Taitos koyai nuasubana. Vutuna aubainama tauna ma nuaverena ġaromaie ya tava munağana, be tauma këi nuavere kauana.¹⁴ Noğone taugu ami kauama be ami voiama veredima matabudi Taitos è riue be isemima mate è kawa sağena. Uma giudima matabudi Taitos ġarone a tubuğana aubainama taugu nam e tunimayağana. Aba da taumi kë giugiuemina, inam matabuna riukaua. Be teneğinama nama, aba da tauma Taitos kë riuriuena, inam matabuna riukaua.¹⁵ Taumi Taitos na giuma koya voteyeteye, be koya raurubu guratana da nema sibo tauna koyai nuavere bakena, vutuna Taitos yağoro e noğonogötimi be ewai nuapaġo vavasagmina.¹⁶ Be taugu ei nuavere kauana, baninama yodi è kaitai kauena da taumi taugu murigue ko midimidina.

8

Uta na kauama

¹⁻² Be yodi yau bana, ekalesia Masedoniam koi nuanoğonogötedi. Taudi adi piripirima a moraba kauana be ai karuwaġawaġa guratana. Be Mamaitua na raukiviverema aubainama taudi banaga paipairudima. Vutuna aubainama mane toitoi ma nuaveredi ai utana.³ Taugu matague è kita kauedina da taudi adi waiutama na ruvama ya kenana, be debane a boru munaġe be awai utana. Tauma nam ke riuedina da taudi nama sibo a voia, ibewa da taudīga adi ġoane nama a voivoiana.⁴ Taudi a ġasakiriemaina da adi manema sibo kë paġo nawena Jerusalemma tauwai sumaġa anisagudima aubainama.⁵ Taudi nam tauma aba ke noğonogötina na ruvae nama ti voiana. Ibewa da Mamaitua na ġoane nama noğone taudime ai uta munağedina Bada ġarone, yodibe taudi tauma ai aninemai, be a voteyeteyemaina.

⁶ Vutuna aubainama Taitos ei bağə guratena da tauna ġaromie sibo ya tavana, da Mamaitua na raunuatoima noyanama* Taitos noğone yawai karena ġaromie, vutuna sibo ya kaiğavutina be manenama koya vovo kaukauena sibo ya pağona. ⁷ Taumi yaba matabudi ġarodie ko moramoraba guratana. Ami waisumağama, ami giuma, ami kataima, ami noğotama veredima be ami wainuapağoma ġaromaie. Vutuna aubainama ami waiutama mate sibo ya moraba guratana. ⁸ Taugu nam ama riuriu vavasağemina, ibewa da ami wainuapağoma Masedonia banegidima mate yàwai ruvaruvana da taumi ami wainuapağoma yà kitana, riukaua bo kaiyovu.

⁹ Dà Badama Yesu Keriso ko noğoti. Tauna na raunuatoima ya moraba guratana. Tauna guyau, be taumi kami taiye tauna ya voia munağe da yai karuwağawağana. Tauna na waikaruwağawağae taumi yodi kowai guyauna.

¹⁰ Be yodi yà riuemi da nema sibo koya voia bakona. Maiğò modine taumi noğone uma noyanama koyai kare doke da mane borunama koyai karena. ¹¹ Vutuna aubainama waiuta noyanama noğone ma nuaveremi koyawai ogena, naumeki da yodi ma nuaveremi ko kaiğavutina. Taumi ami ruvae, nama koi utana. ¹² Değoda waiuta ko ġoena, naumeki da am maesama na ruvae nama rauğaubonağā kwai utana, be yağoro tokare Mamaitua am waiutama ei annena. ¹³⁻¹⁴ Taugu nam banaga sagudima aubainama taumi ġaromie sibo yaba matabudi è ragaudina. Ibewa da yodi taumi ġaromie toitoi aubainama, naumeki da taumi taudi ko sagudina, be rağanine taudi ġarodie e toina, naumeki da taumi ta sagumina. Uma kauine matabumi ko voie da teneteneğinama. ¹⁵ Maika girugiruminama poranama ya riuna umanama, “Aitau da toitoi ya ragauna, tauna ġorone nam ti toi kauana. Be aitau da raubisağā ya ragauna, tauna ġorone nam ti raubisağā kauana.”

Jerusalem adi puyoma taunawenama

¹⁶ Taugu Mamaitua yàwai kaiwena da taugu taumi nema yà noğonoğota bakemina, noğotinama teneğinama nama Taitos taumi e noğonoğotmina. ¹⁷ Taitos èi bağana da taumi sibo ya vakitemina. Be tauna mate ġaromie veraunama ya ġoeğöena, be rağanine taugu èwai bağana naumeki da tauna ya kayo waianinana. ¹⁸ Be tauma tauğoma tenağā mate ka riuriuporedina. Tauna vutuna vari verenama taurauguguyena, be eklesia dobū matabuna tauna isanama ta kawakawa sağena. ¹⁹⁻²⁰ Uma baneginama

* **8:6:** ‘Mamaitua na raunuatoima noyanama’ inam mane borunama Bada na noyama aubainama.

tauna vutuna ekalesia a vinena da tauna tauma mate puyo ka kiroga nawena Jerusalemma da nam aitau tauma tai karakara kutuemai be tai wavumai, baninama puyo dosinama aubainama. Uma kauine tauma Mamaitua isanama ka kawa sagena. Be banaga matabudi ta kataiemai da tauma riukaua banaga wainuatoitoidima sagudima ka goegoena. ²¹ Tauma ka goegoena da yaba matabuna didimanidie ka voiedina, nam Mamaitua tauna ga matane, be banaga mate matedie.

²² Be taugomā gesaunama mate ka riuriuporena garomie. Tauna mate tauwai sumaga verenama. Tauma raigan toitoi ke raurubu be ke kita da tauna noya taupa godidinama baneginama. Taugu tauna è riuena da taumi puyo kaite koya vokaukauena, vutuna aubainama tauna na go ya goe kauena. ²³ Be Taitos tauna taugu turaguma be matabumi taumi aubaimima ka noyanoyana. Be tautaugoma gesaudima rabui taudi ekalesia ta raraupaiyedina, be taudi adi yawasanae Bada isanama ta kaikai su gusu guna banaga matedie. ²⁴ Vutuna aubainama taumi yaba matabudi veredima uma banegidima garodie ko voiedi da ami wainuapa goma taudi garodie koi magataridina. Yodibe ekalesia matabudi ta kitemi be ta kataie da aba aubainama tauma taumi garomie kawai nuaverena.

9

¹ Taugu nam Mamaitua na damma sagudima aubainama sibo è giruma be è riuemina, ² baninama taugu è kataiena da taumi waisagu ko goegoena. Be raigan matabuna taugu taumi isemima Masedonia banegidima garodie è kawa sa gemi be umanama è riuedina, "Maigo modine Akaia banegidima" taudi a vokaukaua wainono gana waiuta aubainama." Be ra gane Masedonia banegidima uma giunama nama a vaivaiena, taudi nuedima ya karati be a goegoena da taudi mate sibo ai utana. ³ Vutuna aubainama uma banegidima ya riuriupore veraugedina garomie da taudi ta kitemi da taumi naumeki riukaua koya vokaukauana. Taugu uma kauinama ya voivoiena, baninama ya goegoena da Masedonia banegidima garodie aba è giugiuena nama e tubugana, be nam ei kave. ⁴ Be degoda Masedonia banegidima gesaudima mate tokare garomie ka tavana, be ta kita da taumi nam waiuta aubainama ko vokaukauana, inam ra gane tauma be taumi mate tunimaya ga e kawa guridana, baninama no gone tauma uma kauinama aubainama taumi isemima ke kawa sage

* **9:2:** Korint meagainama inam Akaia provinsnama nopone.

yababena. ⁵ Maiō modine koya saugana da ami pairue puyo dosinama ko voiena. Vutuna aubainama taugu yau banagama yà riuriupore dokedina da ta vakitemi be ta sagumi da ami puyoma ko kaiğavuğavutidina. Yodibe ami puyoma tokare kawakawa nonoğinama ko raupuyoena. Be banaga matabudi ta kita da taumi riukaua nuemima tabutabune kowai utana. Be değoda taumi nam ko vokaukaua wainonoğā, banaga tokare tai noğotana da taumi nam nuemima tabutabune uta koma ġoeğöena.

Kuristen banegidima nema sibo ai uta bakona

⁶ Yau bana, uma kauinama ko noğoti: Aitau da sipi ġaubonama ya kumana, tauna na maurama ġaubonama e banavina. Be aitau da sipi dosinama ya kumana, tauna na maurama dosinama e banavina. ⁷ Vutuna aubainama banaga tenetenäğäga sibo nuane yai nuanoğonogota da na ġoane nama sibo mane ya boruna. Be nam banaga ġesaudima adi ġoane a suvedidi be sibo ya boru, baninama Mamaitua ya ġoeğöena da banaga nuane ma nuaverena ei utana. ⁸ Be Mamaitua tauna teneteneğinama da rağan matabuna ami ġoanama yabedima matabudi be yaba ġesaudima mate e utemina. Be taumi tokare teneteneğinama ami banagama ġesaudima mate ko sagudina, ⁹ maika girugiruminama porane e riuriuna nama:

“Tauwai sumağā baneginama na pairuma dosine banaga waikaruwağewağedima e paipairuedina.

Vutuna aubainama na verema banaga ta noğonogota watanena rağan matabuna.

Be na maesama marae Mamaitua e utena.”

¹⁰ Be Mamaitua tauna pesi ya utemina kumanama aubainama, be kani ya utemina inam kaninama aubainama. Be tauna pesi yağoro e uteutemina da ami noyama veredima ta maurana.

¹¹ Mamaitua rağan matabuna yaba totoi e utemi da taumi rağan matabuna ko pairu nonoğana. Be yodi tauma ami puyoma ka nawena Jerusalemma ekalesia waikaruwağewağedima ġarodie. Be taudi tokare Mamaitua tai kaiwe, be isanama ta kaisuğuna ami raupuyoma aubainama. ¹² Uma noyane yaba veredima rabui tokare ta tubuğana. Tenağā inam: Taumi banaga waikaruwağewağedima ko sagusagudina. Be wairabuinama inam: Banaga aitaüğā ko sagusagudina, taudi tokare Mamaitua tai kaiwa vavasağena. ¹³ Be taudi Mamaitua isanama ta kaisuğuna, baninama taumi kowai mağatara munağemina da taumi Keriso riunama nam koma rarauguguya yababena, ibewa da yaba ko giuguedina nama

ta tubutubuğana. Be mate taudi tokare nuedima e verena, baninama ami waisaguma taudi be banaga ġesaudima mate ġarodie aubainama. ¹⁴ Vutuna aubainama Jerusalem banegidima nuedima tabutabune ta moimoiragina taumi aubaimima, baninama Mamaitua na raukiviverema taumie da taudi ġarodie e maġomaġatarana.

¹⁵ Uma puyonama Mamaitua ya uteutedana inam ya moraba vavasağana, be tauda tokare nam tà giue be teneteneğina. Vutuna aubainama tauda Mamaitua tài kaiwena uma puyonama aubainama.

10

Banaga Pol na noyama waibekunama a ġoegħoena, be taunağay a giu raukosogħajgħaina

¹ Yodi taugu yau kauama Kerisoe nuatauğā yà giuemina. Taumi ġesäumima ko riuriuna, “Pol raġanine madanie tauna debanama torane e giugiuna, be raġanine uma dabudine e tavatavana tauna tauda matade giu e moġimogħigħina.” ² Yà riuriuemina da raġanine taugu ġaromie yà tavana, nam ko voiegu da taugu yà raudebatora. Be taudi aitauğā taugu tai giugiegu be umanama ta riuriuna, “Pol raġan matabuna e voivoiana maika kabe tauna waisumağā banegħina, be yaġoro tauna dobu na ġoane e miamiana.” Taugu inam banegidima mate waigiunama, nam ama nainairedina. ³ Inam riukaua da taugu dobue yà miamiana, be taugu nam dobu banegidima maika ama iġaiġarana. ⁴ Taugu Mamaitua na madae yà iġaiġarana, be nam dobu banegidima adi madae. Be Mamaitua na madama taudi ai rewapanava vavasağana da tokare kupi adi rewapanama matabudi e kawa gewiegħedina. ⁵ Be mate giu be waikatakatai kaikaiyovudima ē kawa gewiegħed be yaba gewiegħedima ġesaudima Mamaitua na kedama ta għudugħidu yà vamutudina. Be noġota matabudi yà boinidi da Keriso ta voteyeteyena. ⁶ Be taumi Keriso ko vovo teyeteyena raġanine, taugu banaga rawarawa ġaiġaidima yà kovoġidina.

⁷ Taumi tubuğigħuma ġavoe ko kitakitana, be nogue nam koma kitakitana. Be tam aitau kwa noġon oġġotimna da tam Keriso ġaronama, tam sibo kuya kataie da taugu mate Keriso ġarone. ⁸ Taugu yau waibadama Bada ya utegħuna, aubainama agunai tauguğā ġaubaonağā yà kawakawa saġe munaġegħuna. Be taumi sibo koya noġoti da yau waibadama inam sagumima aubainama, be nam kawa gewiegħemima aubaina, ibewa. Vutuna aubainama taugu nam aiyaba tokare yà tunimayaġe.

⁹ Taugu nam ama ġoegōena da banaga tai noġotana da taugu kabe yau letae yàwai nainairimi. ¹⁰ Taumi ġesaumima ko riuriuna da taugu yau letama nopone yau giuma anikitedima maika a bagibagi be ai rewapanan kauana. Be mate matabudi kabe waigiugiu yababa, be yau rauguguyama mate ġarodie a gewagewa kauana. ¹¹ Vutuna aubainama yodi raġanine ġaromie yà tavana taudi aitaūga a riuriueguna ġarodie bonaguma bagibagine yà riuedina, maika nema letae bonaguma bagibagine è giuguedina nama.

¹² Yà riuriu kauemina da taugu nam inam banegidima taudi aitaūga ta kawakawa saġe munaġedi, be isedima ta kaikai suġu munaġedina maika. Taudi a bua kauana, bainama taudi adi ġoanama ruvane nama tawai ruvaruvana, be adi yawasanama adi banagama adi banagama mate tawai ruvaruva munaġedina.

¹³ Deġoda taugu yaba nam e voiena, naumeki da nam inam yabanama aubainama yà kawa saġe munaġegu. Be taugu yau noyama Mamaitua ya utegu da vari verenama ġaromie è verauġena, uma noyanama aubainama taugu yà kawakawa saġe munaġeguna. ¹⁴ Taugu yà kawakawa saġe munaġeguna, bainama yàwai bademina aubainama. Be inam naumeki bainama taugu noġone Keriso varinama è verauġena ġaromie aubainama. Deġoda taugu nam ei doka nawemi Keriso ġarone, naumeki da taugu nam taumi sibo ġaromie èi badabada. ¹⁵ Baninama banaga ġesaunama na noyae taugu nam yài badabada yababa be yà kawa saġe munaġegu, ibewa. Be taugu yà noġonogoġtina da taumi ami waisumaġama ei rewapanan be taugu yau noyama ġaromie e morabana, ¹⁶ be tokare dobu ġesaudima murimie mate Keriso varinama yà rauguguya nawena dego nam aitau noġonama i boruboruna. Inam raġanine nam aitau tokare teneteneġina da e riuna, taugu kabe banaga ġesaunama na noyae yà kawakawa saġe munaġegu. Taugu banaga ġesaudima adi noyae nam yà kawa saġe munaġegu, vutuna yà tuatuāġaiena.

¹⁷ “Aitau da kawa saġe munaġenama e ġoena, naumeki da tauna sibo aba Bada ya voivoiena, vutuna sibo ya kawa saġena.”

¹⁸ Baninama Bada aitau e riuriuena da tauna taunoya verenama, naumeki da tauna vutuna verenama, be nam aitau taunaġa e riu munaġe be e riuna, “Taugu taunoya vereguma.”

11

Pol apasol kaikaiyovudima e riutuaġaiedina

¹ Yau bana, yàwai bağemina da taumi sibo koyai aninegu da rağan ġaubonaġa taugu bua banegidima maika sibo yau giue è kawa saġe munaġeguna. ² Taugu èi nuapaġo guratemina maika Mamaitua ewai nuapaġomina nama. Vutuna aubainama taugu nuaguma e rovorovona, deġoda taumi gewagewae koma naġo. Be taugu vutuna èi ririvuemina Keriso ġarone. Vutuna aubainama yà ġoegoena da yodi taumi matatapu yà veraugemina Keriso ġarone. ³ Taugu nuaguma e rovorovona, deġoda taumi Keriso waimuri-watanenama ko gose be gewagewae koma naġo, nema mota Ivi ya gwaya be yai kedadoka waigewana maika. ⁴ Taugu nuaguma e rovorovona, baninama taugu Yesu Keriso è rarauguyena inam natabu. Be waria e tava be Yesu ġesaudima e rarauguyedina taumi inam Yesudima kowai aninedina. Arua Babau noġone koya paġona. Be raġanine arua ġesaudima ta tavatavana taumi inam aruidima kowai aninedina. Noġone vari verenama è rauguguyena ġaromie da yawasana sibo koya banavina. Be raġanine apasol kaikaiyovudima vari ġesaudima ta rarauguyedina ġaromie, taumi inam varidima kowai aninedina. ⁵ Taugu nam ama noġonoġota kauena da uma “apasoldima dosidima” adi verema maika taugu. ⁶ Agunai taugu yau giuma nam diniboruboruna, be è kataiena aiyaba yà giuguedina. Be taumi sibo koya kataie da taugu vari verenama è katai kauena. Baninama raġan toitoi taumi èi kataimina.

⁷ Taugu vari verenama ġaromie è rauguguyena raġanine, taugu nam ami manema e paġona. Taugu nama è voiena sagumima aubainama. Inam kauinama gewagewa, bo? ⁸ Taugu ekalesia ġesaudima mane a sagugu be taumi ġaromie è noyanoyana. ⁹ Be taugu raġanine taumi mate, taugu nam aba ġaromie e ġoena. Be taugu nam aitau airaġan ġaromie aiyaba e kiġiena, ibewa. Be yau ġoanama matabudi è ġoegoedina, inam Masedonia banegidima taudiġa a sa-gusaguguna. Be taugu nam airaġan taumi aiyaba ei baġa rubumina da sibo koya utegu, be nam airaġan nama yà voia. ¹⁰ Be taugu Yesu Kerisoe yà riuriu kauemina da taugu èi nuavere kaua da nam airaġan taumi ġaromie mane e paġona. Be Akaia provinsnopone nam aitau uma riunama aubainama kwai ġakegu, aba aubainama? ¹¹ Nuaguma nam koma paġopaġo, bo? Ibewa, Mamaitua ya kataiena da taumi nuaguma ko paġopaġona.

¹² Be taugu nam airaġan ami manema yà paġo. Nama raġan matabuna yà voiana, baninama taugu nam ama ġoegoena da inam “apasoldima kaikaiyovudima” maika yà voia, be ta riuemina da taudi kabe taugu maika. ¹³ Inam

banegidima taudi matabudi apasol kaikaiyovudima, be taudi adi gwayae banaga tawai kedadoka waigewedina. Taudi ta voivoiana maika kabe Keriso na taunoyama.¹⁴ Be taugu uma kauidima nam yà basedi, baninama Seitan nama e voivoiana. Tauna e voivoiana maika kabe Mamaitua na anea,¹⁵ vutuna aubainama Seitan na taunoyama ta voivoiana maika kabe Bada Yesu na taunoya. Be na damone tokare adi noyama na ruvae adi kovoğama ta banavina.

Pol raukivigewagewa ya banavidina vari verenama aubainama

¹⁶ Yà riuriu munağemina: Nam aitau ko noğotigu da taugu banaga buabuagu. Be değoda tam aitau nama kwa noğotiguna, naumeki da yàwai bağemina da taumi sibo koyai aninegu da rağan ğaubonağtaugu sibo yau giue è kawa sağe munağeguna.¹⁷ Bada nam i riueguna da umanama sibo è voia. Be taugu yodi yà giuna banaga buebuedima maika.¹⁸ Banaga toitoi ta kawakawa sağe munağedina dobu banegidima maika. Vutuna aubainama taugu yodi mate nama yà voiana.¹⁹ Taumi ko noğonoğotina da taumi kabe nuauyauya banegimi, be yağoro taumi uma banegidima buebuedima adi giuma ko vaiedi be kowai aninedina.²⁰ Avedi da aitaüğa ğaromie tawai badabadana, ta kwayek-wayemina, ta gwayegwayemina, bo ta kitakitatuağıemina, be ta riğeriğemina. Taumi matabumi ma nuaveremi uma banegidima kowai aininedina.²¹ Agunai taugu mate sibo uma kauidima è voiedina, be inam riukaua uma kauidima gewegewedima aubaidima taugu giu è moğigina.

Be değoda uma banegidima ti kawa sağe munağedina, naumeki da taugu mate tokare banaga buebuedima maika yà kawa sağe munağeguna.²² Taudi değoda Hibru? Taugu mate Hibru! Taudi değoda Israel banegidima? Taugu mate Israel banegiguma. Taudi değoda Eibrahim na sedama? Taugu mate Eibrahim natunama.²³ Yodi riukaua taugu yà giuna banaga buebuedima maika. Taudi Keriso na taunoyama? Taugu mate Keriso na taunoyama, be taugu è vere vavasağana, nam maika taudi. Taugu è noya vavasağana, nam maika taudi. Taugu rağan toitoi dibure è nağona, be taudi ibewa. Rağan toitoi banaga a kwapukwapuguna. Be rağan matabuna guriğà yà kitakita sağesağena.²⁴ Jius banegidima adi kovoğama a uteguna, inam kwapue a riğà gurateguna rağan matabudi 39. Uma kauinama ğarogue ya tubuğana rağan matabudi 5.²⁵ Be rağan matabudi 3 banaga boreboree a kwapu gurateguna. Be rağan tenağà a rauyekuguna. Be rağan matabudi 3 wagae è monuna, be rağan tenağà nopone taugu kupi da suara

egasi poune è tenamna. ²⁶ Rağan matabuna taugu vağaiğā ya voivoiena, be dego dego ya nağonağona yaba wainua nainairidima nopodiğā ya nağonağona, değoda taugu timai gurigu. Kabaita è banabanavidi, banaga danedanenedima è banabanavidi, yau banaga ġomama Jius banegidima a raraukivi gewegeweguna, eteni banegidima a raraukivi gewegeweguna, meagai bo dobira banegidima matabudi a raraukivi gewegeweguna, tauwai sumağā kaikaiyovudima a raraukivi gewegeweguna, be mate egasie taugu ġaubonağā sibo è gurina. ²⁷ Taugu è noya da è noya guratana, be rağan toitoi taugu nam e kanikanina, nam e kenakenana, be kani ya karakaraguna, nuaguma ya raukasakasana, è turutururu kauana be nam yau rupu da sibo èi rupugu.

²⁸ Be inam yabedima matabudi yāwai nuaboyedina, be mate rağan patapatanama taugu nuaguma e rovorovona, baninama ekalesia dobu matabuna nam sibo adi waisumağē a beku. ²⁹ Değoda taudi adi waisumağāma e gwağāna, naumeki da taugu tokare nuaguma ei poyana taudi ġarodie. Be aitau dego gewagewa e voienna, taugu tokare nuaguma ei meidina.

³⁰ Değoda taugu kawa sağe munağeguma ya ġoena, naumeki da taugu yau vogwağagwağae sibo è kawa sağeguna. ³¹ Mamaitua dà Badama Yesu Keriso Tamanama, taugu isanama ya kaisuğusuğuna. Tauna ya kataieguna da taugu nam ama kaikaiyovuna. ³² Rağanine taugu Damaskas meagaine, be dabudine guyau Aretas ya miamiana. Be primia na tauiğarama banegidima matakedae a bodabodamana vunuğiguma aubainama. ³³ Be yau banagama siriga nophone a borugu be garigari bogane gaure ai dawe dobiğeguna. Be inam kedane taugu è yawasanana.

12

Pol mara ya kitana

¹ Taugu yağoro agunai ya kawa sağe munağeguna, avedi da taugu yau kawasağema nam banibiribiridi. Taugu yodi Mamaitua na matairama rauboni maika e mağamağatarana, vutuna ya riuemina. ² Taugu Kuristen baneginama tenağā è kataien, Mamaitua tauna ya nawena mara wairabuiteğane be ya yovoğā munağena.* Be inam kauinama ya tubuğana, yodi modi matabudi 14 a kovina. Inam baneginama tauna tubuğe ya nağō bo arue ya nağō taugu nam e kataien, be Mamaitua tauna ya kataien. ³ Be taugu è kataien da inam baneginama riukaua ya nağona paradaisie. Tauna tubuğe ya nağō bo arue ya nağō taugu nam e kataien, be Mamaitua

* **12:2:** Pol taunağā e giugiu munağena.

tauna ya kataienā. ⁴ Be dabudine tauna yaba ya vaivaiedina tauna nam teneteneğina da sibo ya giu waibatedi. Be mate Mamaitua nam tauna i aninena da sibo ya giuedi. ⁵ Baninama inam baneginama aubainama, taugu tokare yà kawa sağe munağeguna. Be taugu nam yau verema aubainama yà kawa sağe munağeguna, ibewa da taugu yau vogwağagwağama aubainama yà kawa sağe munağeguna. ⁶ Değoda taugu yà kawa sağeguna, taugu nam banaga buebuedima maika, baninama taugu aba da yà giuguedina, inam matabudi riukaua. Be yağoro taugu kawa sağe munağeguma nam ama ġoeğoenā. Baninama taugu nam ama ġoeğoenā da banaga tai noğotana kabe taugu banaga dosigu. Banaga ġarogue aba matedie a kitakitana, be beedie a vaivaiena, nama sibo a noğota wairuvaguna. ⁷ Mamaitua mara yabedima vereveredima toitoi yai kataiguna. Be tauna nam ima ġoeğoenā da taugu inam yabedima yà kitedi, yà rauguyaguyauedi, be yà kawa sağe munağegu. Vutuna aubainama tauna yaba gewagewanama ya uteguna maika kabe kea tunigue i midimidi. Uma yabanama inam Seitan na aneama, be tauna rağan matabuna taugu e kawakawa piripiriguna. Inam aneanama e voivoieguna da taugu nam teneteneğigu da yà kawa sağe munağegu.

⁸ Taugu Bada rağan rabuiteğä èi giriena da uma kauinama gewagewanama sibo ġarogue ya kaiporena. ⁹ Be tauna ya paribeegu be umanama ya riuna, “Ibewa, yau raukiviverema tam aubaimma, inam naumeki. Baninama banaga adi wairewapanae ta noyanoyana aubainama, taugu yau wairewapanama ta semosemona, inam vutuna taugu nam ama ġoeğoenā. Be değoda taudi nam adi wairewapanae ta noya, naumeki da taugu yau wairewapanama e mağatarana.” Vutuna aubainama yau bana, taugu yau vogwağagwağama aubainama yà kawa sağeguna. Baninama inam kauine Keriso na rewapanama nopolgue e mağamağatarana. ¹⁰ Vutuna aubainama taugu yàwai nuavere kauana yau vogwağagwağama rağanine. Maika kunura, piripiri rağandie, wainuatoitoi be raukivigewagewa ġesaudima rağandie. Vutuna aubainama taugu yàwai nuavere kauana, baninama taugu yau vogwağagwağama rağanine taugu yàwai rewapanana.

Pol na wainuapağoma Korint banegidima ġarodie

¹¹ Taugu è giugiuna bua maika. Taumi koya vaiegu da nama è giuna. Taumi vutuna taugu koya kawa sağeguna sibo, be nam taugu. Avedi da taugu nam banaga dosigu, be inam apasoldima kaikaiyovudima adi verema nam taugu yau verema maika. ¹² Taugu taumi mate rağanine, taugu

nuatauḡa mataira toitoi dosidima è voiedina da taumi sibo koya kitedi be koya kataie da taugu riukaua apasol. ¹³ Be yaba tenaḡa dobu ġesaudie ekalesia ġarodie è voienna, be taumi ġaromie nam e voienna. Inam nam ami manema bo ami waiyabama e paḡona. Ebom, yau gewagewama uma ko noḡota porena.

¹⁴ Be taugu yodi è vokaukauana da raḡan aniwai rabuiteḡanama yà vakitemina. Taugu nam mane bo aiyaba paḡonama aubainama ġaromie ama veraverauna. Ibewa da taugu taumi aubaimima yà verauna. Taumi yau sedama. Vutuna aubainama taumi nam sibo aiyaba koya utegu, be taugu sibo aiyaba taumi è utemina, baninama Kerisoe taugu tamemima aubainama. ¹⁵ Vutuna aubainama taugu ma nuaveregu yà sagu munaḡeguna. Be mate ami ġoane yà sagumina. Deḡoda taugu nama yà voiana, taumi tokare ko tuaḡaiegū bo ibewa? ¹⁶ Taumi yodi koya kataiena da taugu nam aba ġaromie e paḡona. Be ġesaumima koyai wavuguna da taugu kabe semoe mane è ragaragaudi. ¹⁷ Inam nemanama sibo è voia bake? Bo banaga è riuriuporedina ġaromie, taudi ami manema a ragaudi, bo? ¹⁸ Taugu Taitos èi baḡana da tauna ġaromie sibo ya verauna turamaima tenaḡa mate. Be inam raḡanine Taitos mane ġaromie ya paḡo, bo? Ibewa, baninama tauma matabumai Arua Babau ġaromaie, be keda teneḡine ka naḡonaḡona.

¹⁹ Taumi agunai kowai noḡotana da taugu matemie kabe yà gudugudu taraḡa munaḡegu. Be inam nam nama. Mamaitua matane taugu Kerisoe yà riuriu kauana. Yaba matabudi ġaromie è voivoiedina inam taumi sagumima aubainama da ami waisumaġe sibo koya midi bagibagina. ²⁰ Taugu nuaguma e rovorovona, baninama raḡanine taugu ġaromie yà verauna, taugu nam yau ġoanama yabedima ġaromie yà kitedi be teneḡine, taumi nam ami ġoanama yabedima ġarogue ko kitedi. Taugu nuaguma e rovorovona, deḡoda taumi nopomie yaba gewegewedima ama bannidi, maika waikawa riuriu, unura, medi, kanitoku, ġasi, waikarakarakutu, rauguyaguyau be tai nuabababaḡa. ²¹ Taugu nuaguma e rovorovona, deḡoda ġaromie yà verauna nam ama ġoeġoena Mamaitua e voiegu da yà tunimayaḡa be yà ġaba, baninama taumi aitauḡa noḡone mira, badara be yaba ġesaudima waitunimayamayaġidima koya voivoiedina, inam gewegewedima nam ko noḡota poredina.

13

¹ Yodi yau rağanima aniwai rabuiteğanama yà vakitemina. Be rağanine ġaromie yà tavana, inam gewegewedima matabudi kadi matamatama rabui bo rabuiteğä mate, da tà kawa didimanidina. ² Taugu maiğone yau verauma aniwai rabuine, dabudine banaga aitaugä noğone gewagewa a voivoiedina è riuedina da nam sibo gewagewa a voia munağedi. Yodi taugu madanie be yağoro yà riuriu muñağedina. Be rağanine taugu dabudine yà tavana, tokare taudi be banaga gesaudima aitaugä gewagewa a voivoiedina mate nam yà kaiyawasidi, tokare yà kovoğä tenağedina.

³ Inam kauine taugu yà kataimi be ko kataie da Keriso taugue taumi ġaromie e giugiuna. Be Keriso tauna kawa didimanimima tokare nam e gwağe, ibewa. Tauna tokare na rewapanama dosine e kawa didimanimina. ⁴ Keriso tubuğinama vogwağagwağanama korosie a tuparatuna. Be yodi tauna Mamaitua na rewapanae e miamiana. Be inam kauinama teneğinama, nama taugu. Taugu tubuğiguma vogwağagwağanama be yodi Mamaitua na rewapanae taugu yà mia, be yà noyana taumi aubaimima.

⁵ Taumi mayemima ko pağō munağemi da taumi naumeki tauwai sumağä bo ibewa. Taumi Yesu Keriso mayanama ko pağopağō bo kowai kaikaiyovu? ⁶⁻⁷ Taumi ġesaumimä agunai ko noğonoğotina da taugu gewagewa è voiedina. Be taugu yà noğonoğotina da taumi koya kataieguna da taugu yau raurubue nam e bekuna, be taugu riukaua Keriso ġaronama. Vutuna aubainama yà moimoiragina da taumi nam sibo aba gewegewedima koya voia munağedi. Inam nam taugu yau verema aubainama ama moimoiragina, ibewa da taumi ami verema aubainama. ⁸ Taugu yau noyae riukaua nam ama tuatuağaiena, ibewa da rağan matabuna riukaua aubainama yà noyanoyana. ⁹ Taugu tokare yà nuavere kauana be nam yà riu bona badobadoemi, değoda taumi ami waisumağama ei rewapanana. Be tauma ka moimoiragina da taumi ami waisumağama ei rewapanana, be e didimana kauana. ¹⁰ Taugu uma letanama yà girugirumina ġaromie da rağanine taugu ġaromie yà tavana, taugu nam ama ġoeğöena da yà ġasiemi bo yà kovoğimi. Bada rewapanana ya uteuteguna, inam nam taumi kovoğimima aubainama i uteguna, ibewa da sagumima aubainama ya uteguna.

Pol na waikaiwama

¹¹ Yau bana, yau giuma damonama inam umanama: Koi nuaverena, ko raurubu da ko mia kauana, aba è riuemina nama ko voiedi be ma nuasubemi ko miana. Yodibe wainuapağō be suba Mamaituanama ġaromie e miana.

¹² Taumi wainuapāgoe koi kaiwa vivirana. ¹³ Tauwai sumāga matabudi uma dabudine taumi tawai kaiwemina.
¹⁴ Bada Yesu Keriso na raukiviverema, Mamaitua na wainuapāgomā be Arua Babau na saguma matabumi āgaromie ta kenana.

Galesia adi letama

Pol na waikaiwama

¹ Taugu apasol Pol, uma letanama yà girugirumina ġaromie. Taugu nam banaga ti vineguna. Ibewa da Yesu Keriso be Tamanama Mamaitua taudi taugu a vineguna. Tauna vutuna natunama Yesu Keriso gurie be ya kawa midisuġu munaġena.

² Be dà banagama aitaūga ġarogue mate, tauma matabu-mai taumi ekalesia Galesia provins nopone matabumi kawai kaiwemina.

³ Tamadama Mamaitua be dà Badama Yesu Keriso adi raukivivere, be adi subama ġaromie e kenana. ⁴ Yesu tauna vutuna tubuġinamà yai uta munaġe be dà gewagewama aubainama ya gurina. Tauna nama ya voiana da kupi dobune ei yawasanidana, baninama Tamadama Mamaitua nama na ġoanama. ⁵ Vutuna aubainama tauda matabuda isanama sibo tè kaisuġusuġu nonoġena, Inam riukaua!

Vari verenama tenaġa kavakava Kerisoe

⁶ Taugu è base kauemina da taumi waiġapa Mamaitua koya gose pore be waikatakatai tabudima kowai muri-watanedina. Yesu Keriso na raukiviveree Mamaitua ya vinemina da taumi na damma. Be yodi taumi ko miamia tautauriena. ⁷ Be waikatakatai tabudima matabudi kaiyovu. Be banaga ġesaudima Keriso varinama ta vitavitaredi be ta tatai nuaraġeraġemina.

⁸ Be deġoda taugu waikatakatai tabu è riuemina, bo anea marae i yovo be waikatakatai tabu i riuemina, nam maika noġone è riuriuemina nama, naumeki da tauma tokare kovoġa ka banavina gienae. ⁹ Yodi yà riu munaġemina: Deġoda taugu waikatakatai tabu è riuemina, bo anea marae i yovo be waikatakatai tabu i riuemina, nam maika noġone koya paġopaġona nama, naumeki da tauma tokare kovoġa ka banavina gienae.

¹⁰ Taumi uma riudima nema ko noġonogota bakedi? Taugu banaga nuedima anisorudima aubainama nama è giu? Bo Mamaitua aniwai nuaverenama aubainama nama è giu? Taugu banaga yà gwayegwayemi, bo? Ibewa, taugu deġoda banaga è gwayedina, naumeki da taugu tokare nam Keriso na taunoya.

Bada Pol ya vinena da tauna na apasolma

¹¹ Yau bana, taumi vari verenama yà rarauguguyena sibo koya katai kauena da inam nam banaga nuedie ti tubuğina. ¹² Bo nam aitau ġarone e paġo bo i kataiguna. Ibewa da Yesu Keriso tauna vutuna ġarogue ya maġatara be yai kataiguna.

¹³ Taumi noġone koya vaiegu da taugu Jius muridie è midi be Mamaitua na damma è raraukivi gewegewedi be è rarauguguyena rubuna da sibo èi guri rovodina. ¹⁴ Taugu yatayataguma Jius adi tarawatuma matabudi è kitakita yaġed, be èwai muriwatana kauedina, nam yau kimtama banegidima ġesaudima maika.

¹⁵⁻¹⁶ Be Mamaitua na ġoane natunama ġarogue yai maġatarina raġanina, taugu yau yawasanama è vitarena. Baninama muriġa da è tubuġana, Mamaitua na raukiviveree ya vineguna da taugu tauna riunama eteni ġarodie yà rauuguguyena. Be rauuguguya aubainama taugu nam aitau èi baġana. ¹⁷ Be mate taugu nam e naġo Jerusalemma be apasol dokedima èi baġedina rauuguguya aubainama. Ibewa da taugu didimaninama è naġo ġomana Areibia provinsne. Muriġa da è munaġana Damaskasma. ¹⁸ Be modi rabuiteġa muridie è saġa è naġona Jerusalemma Pita kitanama aubainama da tauna sibo ya kataiegħu be taugu tauna è kataiena. Be dabudine kē miana raġan matabudi 15. ¹⁹ Inam dabudine nam aba apasolnama e banavina, be apasol Jeims taunaġa è banavina, tauna vutuna Bada tasinama. ²⁰ Taugu Mamaitua matane aba yà riuriuemina, inam nam kaiyovu. ²¹ Muriġa è naġona Siriama be Silisiama. ²² Judia nopone Keriso na ekalesiama taudi taugu nam ti kataiegħu. ²³ Be taudi variguġa a vaie be a riuna, “Taugħoma boni yai ġavieda be ya raraukivi gewegewedana, tauna yodi waisumaġa e rarauguguyena.” ²⁴ Inam vutuna aubainama taudi matabudi Mamaitua isanama a kaisuġusuġuna.

2

Apasol ġesaudima Pol ai aninena

¹ Be modi 14 a kovikovina muridie taugu è saġa è mu-naġana Jerusalemma. Inam raġanina Banabas be Taitos mate èi dokedina. ² Mamaitua ya riuegħuna, vutuna aubainama dabudi è naġona. Dabudine taugu babada taudiġa mate kēi boru da aba eteni banegidima ġarodie è rarauguguyedina, vutudi èi maġataridina da babada sibo a kitana deġoda inam naumeki bo ibewa. Taugu nama è voiana, baninama yau noyama nam sibo ya kavakava. ³ Be raġanina taugu be yau varoroma Taitos mate tauma dabudine, be avedi da tauna nam Jius baneginama, be babada nam kopitom aubainama aba ti giuena Taitos ġarone.

⁴ Inam kauinama ya tubuğana, baninama Kuristen banegidima kaikaiyovudima a sağā da ta kitana be tauma tarawatu nam kewai muriwatenena, baninama Keriso tarawatu na rewapanae, be ya kuvesimaina. Vutuna aubainama taudi babada a suramuduedi be a riuna da Taitos sibo kopitom ya pağona, baninama taudi a góena da tarawatu sibo yai badedana. ⁵ Be tauma taudi adi giuma nam kei anina rubuedina, baninama tauma nam ka tainuarağerağemi. Be taumi koya kataiena da waisumağe tokare Mamaitua ei yawasanidana, be nam tarawatue.

⁶ Be taugu aba ġaromie è rarauguguyena, apasol dosidima ai aninena, be nam aba ġesaunama ti vatona. Be taugu nam ama siesievina taudi babada dosidi bo nam dosidi. Baninama Mamaitua matane tauda matabuda teneteneğidama. Tauna nam tubuğe ima kitakita wairuvana, ibewa da nopoe. ⁷ Vutuna aubainama apasol taudi nam aba ġesaunama ti vatona, baninama taudi yodi a kataiena da Mamaitua ya riuporeguna eteni ġarodie yà rauguguyana aubainama, maika Pita ya riuporena da Jius ġarodie vari verenama e rarauguguyena. ⁸ Be Mamaitua Pita rewapana ya ute da Jius ġarodie e rarauguguyana, be nama Mamaitua taugu rewapana ya utegu da eteni ġarodie yà rarauguguyena. ⁹ Be ekalesia babadidima Jeims, Pita be Jon taudi a kita da Mamaitua na waiaiainama ġarogue ya yovoyovona. Vutuna aubainama taudi ai kaiwemai be ai anina da taugu be Banabas sibo kè rauguguya nağona eteni ġarodie, be taudi sibo Jius ġarodiğā a rauguguya nağona. ¹⁰ Taudi yaba tenağā a riuemainda da nam sibo nuamaima ya koa. Inam ekalesia waikaruwağewağedima Jerusalemma sibo kè sagudina. Be taugu inam yabanama rağan matabuna yau kaba voiema.

Pol Pita ya riumataiena

¹¹ Pita Antiokma vakitaguma aubainama ya tavana. Dabudine taugu è riumatai ġomena, baninama tauna ya voia waigewana aubainama. ¹² Muriğā da Jeims na banagama a tavana Antiokma, dabudine Pita tarawatu nam i muriwatanena, be rağan matabuna eteni banegidima mate a mia gogona be a kanikanina. Be Jeims banegidima a tavatavana rağanine, Pita ya naira be eteni ya gosedi da ġavoe ya mia be ya kanikanina Jius tarawatunama e riuriuna ruvane. Umanama ya voienna, baninama Pita kopitom banegidima ya nairedina. ¹³ Pita na voia waigewama aubainama tauwai sumağā ġesaudima mate ai kaikaiyovu be Pita awai muriwatanena, be Banabas mate taudi yai muriwatanedina.

¹⁴ Taugu yà kitana be taudi vari verenama nam tiwai muriwatana kauena, dabudine taugu patara matedie Pita è riumatai be è riuena, “Tam Jius banegimma be eteni adi yawasanae kwa miamiana. Be yodi aba aubaina eteni banegidima kwa riuriuedi da taudi Jius adi tarawatuma tai muriwatanedi?” ¹⁵ Tauda tè tubuğana Jius banegidama, be nam eteni, gewagewa tauvoiedima. ¹⁶ Be tauda tè kataiena da banaga tarawatue taudi tokare nam yawasana ta banavi, ibewa da waisumağä Yesu Kerisoe tokare yawasana tà banavina. Vutuna aubainama tauda mate Keriso tàwai sumağena da taune tauda yawasana tà banavina, be nam tarawatue. Baninama tarawatue tauda tokare nam yawasana tà banavi.

¹⁷ Değoda tauda tarawatu tà gose be Kerisoe yawasana tà wanena, inam Jius banegidima matedie anikitanama kabe maika Kerisoe gewagewa tè voivoie. Yodi nemanama? Keriso gewagewa ewai anine, bo? Ibewa da ibewa ġoma! ¹⁸ Tauda tarawatue nam yawasana te banavina, vutuna aubainama tauda tarawatu tè gose be Keriso taunağä tàwai muriwatanena. Be değoda yodi tarawatu tài muriwatana munağena, inam vutuna gewagewa tà voivoieno. ¹⁹ Be tarawatu ya voiegu da taugu è gurina. Be yodi taugu tarawatu è guri porena, vutuna aubainama tarawatu na rewapanama ġarogue nam ima kenakenana. Be yodi taugu Mamaitua na ġoane yà miana. ²⁰ Baninama yau yawasanama poranama Keriso mate korosie a tuparatuna. Vutuna aubainama taugu è gurina, be yodi Keriso nopalogue è miamiana. Yodi yaba matabudi uma dobune taugu yà voivoiedina, inam yabedima matabudi waisumağe. Taugu Mamaitua Natunama yàwai sumağena, baninama tauna yai nuapağoege be na yawasanama yai utaena taugu saguguma aubainama. ²¹ Taugu Keriso na gurima nam yà voie da kitana maika kabe guri yababa. Baninama değoda tauda tarawatue didimana sibo tè banavina, naumeki da Keriso na gurima inam nam baniboruboruna.

3

Nema tà mia bako, tarawatue bo waisumağe?

¹ Taumi Galesia banegimima buebuemima! Aba aubainama waisumağä koya gose pore? Banaga a giribemi, bo? Taugu è riu kauemina da Yesu Keriso taumi kami taiye a tuparatuna. ² Yodi koi beavaia be yaba tenağä yà riuemina: Taumi tarawatu koyawai muriwatanena, aubainama Arua Babau koya pağó? Bo waisumağä giunama koya vaivaie be koya pağó? ³ Taumi agunai koya bua kauana. Taumi ami

yawasanama Arua Babau na rewapanae koyai karena, be yodi taumiġa ami rewapanae ko rarau damoena.⁴ Taumi vari verenama kana taiye raukivi gewagewa totoi koya banavidina. Uma raukivi gewegewedima koya banava yababedi, bo? Taugu yà noġonoġotina da nam ko banava yababedina.

⁵ Aba aubainama Mamaitua tauna Arua Babau ya utemi? Be aba aubainama Mamaitua mataira dosidima ġaromie e voivoiedi, taumi tarawatu koyawai muriwatanena aubaina, bo? Ibewa, Mamaitua nama ya voiana, baninama taumi Keriso koyawai sumāġena aubainama.

⁶ Eibraham ko noġoti. Girugiruminama porane umanama ya riuna: “Eibraham Mamaitua yawai sumāġena, vutuna aubainama Mamaitua yai anine be ya riuna da Eibraham tauna yodi naumeki.” ⁷ Vutuna aubainama taumi sibo koya kataie da aitauġa tawai sumāġana, taudi inam Eibraham natunatunama.

⁸ Girugiruminama porane ewai kataidana da Mamaitua eteni banegidima tokare adi waisumaġe e kawa didimanidina. Vutuna aubainama tauna Eibraham ġarone umanama ya riuna: “Tame banaga matabudi ġarodie tokare vere yà voiedina.” ⁹ Vutuna aubainama yodi aitauġa da Keriso tawai sumāġena, taudi tokare ġarodie Mamaitua vere e voiedina, maika tauwai sumāġa Eibraham.

¹⁰ Aitauġa tarawatue ta mia be tawai muriwatanena, taudi tokare gewagewa dosinama ta banavina. Baninama girugiruminama poranama umanama ya riuna: “Aitauġa tarawatu tawai muriwatane be nam matabudi tima raber-abe kauedina, taudi tokare kovoġa dosinama ta banavina.” ¹¹ Aitauġa tarawatue ta mia be tawai muriwatanena, taudi Mamaitua tokare nam e kawa didimanidi, baninama girugiruminama porane umanama ya riuna: “Didi-mana banegidima taudi tokare waisumaġe ta yawasanana.”

¹² Tarawatu nam waisumaġe ima midimidina, baninama girugiruminama porane umanama ya riuna: “Aitauġa tarawatu matabuna ta vovo teyeteyedina, taudi tokare yawasana ta banavina, be nam aitau tokare tarawatu matabuna e voteyeteye be teneteneġina.” ¹³ Be Keriso tauda ya midi ġaġaridana da tauda tarawatue nam tà guri. Baninama tauna vutuna tauda ya rauepaiyada, be ya gurina. Girugiruminama porane umanama ya riuna: “Aitau kaie e dawena, tauna gewagewa kovoġinama vutuna ya banavina.” ¹⁴ Tauda gewagewae be Yesu kosinine ya gimeridana. Vutuna aubainama Mamaitua na waiaiainama Eibraham ġarone, be yodi Yesu Kerisoe be e naġonaġona eteni ġarodie. Be yodi tauda waisumaġe Arua tà paġona.

Sauga yai rewapana vavasağana, nam maika tarawatu

¹⁵ Yau bana, yau giuma sauga ġarone yà boru be ko kitana. Deġoda banaga ya saugana, tokare nam aitau teneteneğina da e vitare bo aba ġesau e vato. Be Eibraham ġarone inam kauinama teneğinama. ¹⁶ Mamaitua Eibraham natunama mate ya saugedina da tokare veree ei aiainidina. Girugiruminama porane nam i riuna: “Eibraham natunatuna” ibewa, inam giunama baninama seda toitoi. Be tauna umanama ya riuna: “Eibraham natunama” inam giunama baninama gomana tenaġa Eibraham na damma nopone. Be tauna vutuna Keriso. ¹⁷ Aba yà giugiuena inam umanama: Mamaitua sauga Eibraham ġarone ya voiena, be modi 430 a kovina murine, Mamaitua tarawatu Mousis ya utena. Be na saugama Eibraham ġarone ya boruboruna yaġoro e kenakenana. Be tarawatu na rewapanama nam ima kenakenana da inam sauginama e kawa koakoa. ¹⁸ Be deġoda tarawatue sibo tè yawasanana, naumeki da sauga tokare nam baniboruboruna. Be Mamaitua na raukiviveree waiaiaina Eibraham ya utena, baninama tauna ya saugana aubainama.

¹⁹ Be yodi tarawatu na noyama aba? Mamaitua tarawatu ya riuporena banaga adi gewagewama sibo a gosedina. Baninama tarawatu banaga ei kataidi da deġo tauna gewagewa be deġo tauna vere. Be tarawatunama ya kenana naumeki da Tauwai yawasana ya dobina. Baninama Mamaitua Eibraham ya sausaugena nama. Mamaitua be banaga poudie taumidinama inam Mousis. Vutuna aubainama Mamaitua na aneama tarawatu Mousis a utena, be tauna banaga ya utedina. ²⁰ Be raġanine Mamaitua Eibraham sauga utenama aubainama, inam taunaġa ya voiena, nam poune taumidi aitau, anea bo Mousis i riuedi be ti voiena, ibewa.

²¹ Be yodi nemanama? Tarawatu Mamaitua na saugama e riuriutuatuwaġie, bo? Ibewa ġoma! Be deġoda Mamaitua i ġoe be tarawatue sibo i yawasanidana, inam naumeki nama e voiena. Be yaġoro tauna nam nama i voiana. Vutuna aubainama tarawatu nam teneteneğina da ei yawasanida. ²² Be girugiruminama porane ya riuna da banaga matabuda tauda gewagewa ya panidana. Vutuna aubainama aitaugħa Yesu Keriso tawai sumaġħa, taudiġa tokare yawasana ta banavina, Mamaitua nama ya saugana.

²³ Muriġa da waisumaġa ya tavana, tauda tarawatu ya panida be tè miana, naumeki da waisumaġa riunama ya maġatarana.

Mamaitua natunatunama

²⁴ Mamaitua tarawatu ya biridi da taudi a rabedana naumeki da Keriso ya tavana, be yodi tauda dà waisumaġe

Yesu tokare e kawa didimanidana. ²⁵ Be waisumaḡa ya tavana aubainama, tauda yodi nam tarawatu na rewapanae tama miamiana. ²⁶ Ibewa da waisumaḡa Kerisoe tauda yodi Mamaitua natunatunama. ²⁷ Baninama matabumi aitaūga Yesu Kerisoe koya babataitona, taumi inam Keriso koya kotena gara maika. ²⁸ Vutuna aubainama yodi matabuda teneteneḡidama. Avedi da tam Jius bo eteni, avedi da tam taunoya bo banaga dosim, avedi da tam tauḡoma bo waivi, tauda matabuda tenaḡa Yesu Kerisoe. ²⁹ Taumi yodi Keriso ḡaroḡaronama, vutuna aubainama taumi riukaua Eibraham natunatunama, be Mamaitua aba Eibraham ya sausaugena, taumi mate tokare e utemina.

4

¹ Uma ko noḡoti. Deḡoda tamanama ya guri be buderī taupaḡonama yaḡoro ḡaubonama, inam raḡanine tauna kitānāma maika banaga ḡoma, avedi da buderī matabuna tauna ḡaronama. ² Tauwai rabaraba yaḡoro gomana be na purapurama e raberabedina, naumeki da na raḡaninama boruborune e tavana, yodibe na buderima e ragaudina.

³ Be inam kauinama tenegiñama tauda nama. Tauda raḡanine nam waisumaḡe te miamiana, inam raḡanine tauda gomana ḡaubonama maika, be dobu adi rewapanama* awai badedana. ⁴ Be raḡankaua ya tavatavana raḡanine, Mamaitua Natunama ya riuporena. Tauna waivie ya tubuḡana, be tauna Jius adi tarawatue ya miana. ⁵ Mamaitua nama ya voiana da tauna banaga tarawatu ya panipanidina ya kuvesidina. Be tauda yodi tauna natunatunama tè tubuḡana. ⁶ Vutuna aubainama Mamaitua Natunama Aruinama ya riupore yovoḡena nopomie e miana. Yodi tauda Arue tokare “Mamai” tè vatona. ⁷ Vutuna aubainama taumi yodi nam panipani banegimi, ibewa da taumi yodi Mamaitua Natunatunama aubainama, taumi tokare na buderima ko pagona.

Pol na nuaraḡaraḡama Galesia ḡarodie

⁸ Boni taumi Mamaitua nam ko kataiena raḡanine, taumi boita be arua gewegewedima a panipanimina. Taudi inam nam Mamaitua. ⁹ Be yodi taumi Mamaitua koya kataiena, be tauna ya kataiemina. Be aba aubainama taumi ko munaḡa be ami kauama gewegewedima poredima kowai muriwatanedi? Inam kauidima taudi nam wairewapanidi, be nam banibiribiridi. Taumi ko ḡoegoena inam kauidima ta pani munaḡemi, bo? ¹⁰ Taumi aba aubainama taparoro

* **4:3:** Deḡoda banaga tarawatu tawai muriwatanedina, dobu kauidima ḡarodie tawai taunoyana.

rağandie, tarawatu tabu tabu banaga a voivoiedina kowai muriwatanedi? Be mate nawaravi, modi be iri tabu be tabu adi tarawatuma kowai muriwatanedi! Baninama aba? Inam nam i verena! ¹¹ Taumi kowai nuaboyaguna, be nuaguma e rovorovona, değoda yau noyama è voivoiedina ġaromie matabuna kavakavanama teika.

¹² Yau bana, dokane taugu inam taumi maika, be yodi taugu tarawatu è gosağana. Vutuna aubainama yàwai bağemina da taumi yodi sibo taugu maika koya tubuğ'a, be tarawatu sibo koya gosağana.

Taugu boni ġaromie è tavana rağanine ko noğoti. Taumi nam ko kawa nuaboyaguna, ¹³ avedi da taugu ma sidagu ġaromie è tava be è rarauguyana rağanine, taumi taugu nam ko tuağieguna. ¹⁴ Yau sidama ya raurubumina, be taumi nam ko sigabueguna, ibewa be taumi koyai aninegu be koya rabe kaueguna maika taugu kabe anea marae bo Yesu Keriso ġominama maika. ¹⁵ Noğone taumi koyawai nuavere kauana. Be inam wainuaverenama yodi değoya nağ? Taugu è katai kauena inam rağandie değoda ko ġoena, taumi agunai tokare matemima koya kaiporağ'a be matague sibo koya biridina. ¹⁶ Be yodi nemanama? Vari riuriukauinama yà riuriuemina, aubainama taugu yodi ami ġavia, bo?

¹⁷ Be tauwai katakatai kaikaiyovudima inam ta raraubu guratana da ta soru nawemina taudi ġarodie. Be taudi nam tokare taumi ta sagumi, ibewa! Taudi aba ta ġoeğöena inam ta dariğeda be taudi muridiğ'a ko nağ be adi ġoanama ko voiedina. ¹⁸ Değoda banaga ġaromie vere ta voivoiena inam naumeki, avedi da taugu nam dabudine, taudi yağoro vere sibo na didimanae a voienna ġaromie. Be nam gewagewa aubainama sibo a gwayemi. ¹⁹ O kapore yau sedama, taugu yau nuaboyama ġaromie ya moraba kauana nema waivi ewai natunana myayanama maika. Uma nuaboyanama e kenakenana, be rağanine Keriso mayanama nopomie ei rewapanayà kitana, yodibe yau nuaboyama e kovina. ²⁰ Taugu è ġoeğ guratena da yodi sibo taumi ġaromie mate, be bonaguma bigayağane sibo è riuemina. Be taugu yodi è nuababağana be nam e kataiena aba sibo ġaromie è voie.

Heiga be Sera

²¹ Taumi aitaüğ'a tarawatu kowai muriwatanena, taugu yodi aba yà riuemina. Taumi tarawatu aba e riuriuena ko katakataie, bo ibewa? ²² Girugiruminama porane e riuriuna da Eibrahim natunatunama tautauğomidima rabui. Gomana

tenaḡa Heiga ya tikana, tauna panipani waivinama. Be gomana ġesaunama Sera ya tikana, tauna Eibraham na visara ġomama. ²³ Gomana panipani waivinama ya tikatikana, tauna ya tubuḡa ġomama maika banaga tawai tika ġomama nama. Be Eibraham na visara ġomama ya tikatikana, tauna Mamaitua na saugama ruvane ya tubuḡana.

²⁴⁻²⁵ Inam gututunama inam Mamaitua na kedama rabui, banaga anisagudima ewai nasiena. Keda tenaḡa inam na tarawatuma oya Sainai debane ya utedina da sibo ai muriwatanena. Be oya Sainai inam Arabia dobunama nopone, be tauna vutuna Heiga ewai gabu raupunana. Heiga tauna panipani waivinama isane. Be Heiga Jerusalem ewai gabu raupunana, baninama Jerusalem inam tarawatu meagainama. Vutuna aubainama Jius banegidima matabudi taudi panipanie ta miamiana. ²⁶ Be keda wairabuinama inam Jerusalem ġesaunama marae. Inam dobudine tarawatu nam ima kenakenana. Vutuna aubainama inam Jerusalem-nama, vutuna tauda tinadama. ²⁷ Baninama girugiruminama porane ya riuna umanama:

“Tam waivi waikakaipokimma, nam seda ku tikedina,
kwai nuaverena!

Kwa taukaina,

avedi da tam nam airaḡan wainatuna tunimuyanama ku
damina,

baninama tam waivi gosegose poremma, tam tokare am
sedama toitoi,

nam maika waivi ġesaunama ma tauḡomina.”

²⁸ Vutuna aubainama yau bana, taumi Arue koya tubuḡana Mamaitua na saugama aubainama, Aisik maika.

²⁹ Eibraham na raḡanie gomana tubutubuḡa ġominama, tauna tasinama Mamaitua na saugama ruvane Arue tubutubuḡinama, ya raukivi gewegewena. Be yodi raḡandie inam kauinama teneġinama.

³⁰ Be inam kauinama debane girugiruminama porane nema ya riu bako? Ya riuna umanama: “Panipani waivinama natunama mate kwa tavu poredi! Baninama taugu natuguma na buderima nam airaḡan tauna natunama mate tai buderie.” ³¹ Vutuna aubainama yau bana, yodi koya kita da tauda nam panipani waivinama natunatuna, ibewa da tauda Eibraham na visara ġomama natunatunama, baninama tauna nam panipani waivina.

¹ Keriso tarawatu na rewapanae be ya kuvesidana! Vutuna aubainama taumi yodi āgavoe nama ko miana, be nam tarawatu koi muriwatana munaāge. Bo nam tarawatue ko pani munaāgemi. ² Yà riuriu kauemina, değoda tarawatu koi muriwatana munaāge be kopitom ko voiena, tokare Keriso nam e sagumi. ³ Yà riuriu munaāgemina, değoda taumi kopitom ko voiena, naumeki da tarawatu matabudi ko voia rovodina. ⁴ Taumi aitaūga ko rara rubu da tarawatue kabe didimana ko banavi. Inam kauine taumi Kerisoe ko daridariūga munaāgemi be Mamaitua na raukiviverema ko dobidobi porena.

⁵ Be tauda dà waisumaāge tāwai rabana da Mamaitua Arue e kawa didimanidana. Nama dà noğotama e riuriuedana. ⁶ Değoda tauda Keriso tāwai sumāgena, avedi da tauda kopitom tè paño bo ibewa, inam nam aiyaba. Be dà waisumaāge dà banagama sibo nuadama a pañona, inam vutuna yaba dosinama.

⁷ Maiğone taumi koya nağonaāgo kauana. Be aitau yodi ya kawa barebaremi, be keda verenama koya gose pore? ⁸ Inam nam Mamaitua i kawa barebaremina ibewa, Mamaitua taumi ya vinemina da keda verene sibo koya nağona. ⁹ Yaba kerebunama isanama yist parawa nopone ta boru be e sasasasanana. Inam kauinama teneğinama nama banaga kaikaiyovunama poumie e midisugu be taumi matabumi ewai kedadoka waigewemina. ¹⁰ Be taugu yà noğonogötina da Mamaitua taumi e sagumi da taugu yau waisumaāgama maika nama taumi koi sumāgana. Be banaga aitau da e kawakawa barebaremina, tauna tokare Mamaitua e kovoğina, avedi da tauna nema maika kitnama.

¹¹ Yau bana, taugu waisumaāga Yesu Kerisoe vutuna yà rarauguguyena, be nam kopitom. Vutuna aubainama Jius banegidima ta raraukivi gewegeweguna. Baninama taudi korosi varinama vaienama ta tuatuaāgi kauena. ¹² Taugu yà noğonogötina da inam banegidima taudime sibo a kaivai munaāgedina.

¹³ Yau bana, Bada Yesu gewagewae be ya kuvesimina. Be nam ko noğoti da tauna ya kuvesimina aubainama yodi gewagewa āgesaudima ko voiedi, avedi! Taumi sibo wainuapaāgoe koyai sagu vivirana. ¹⁴ Tarawatu matabudi riuvavasaāga tenaāga āgarone ya rawateğeidina, inam umanama: “Turamma nuanuamma e pañona maika nema tam kwa āgoēgœe munaāgemina nama.” ¹⁵ Nam koi kawa suramudu be koi kawa āgasigasi dağadağasi maika! Ko kita kaua değoda taumiāga ami yawasanae koma kawa gewagewa munaāgemi.

¹⁶ Vutuna aubainama taugu yà riuriuemina da Arua Babau ami yawasanae sibo yai dokemina. Değoda taumi nama ko voiana, naumeki da taumi tokare nam tubuğɑ na ġoane ko nağō. ¹⁷ Baninama tubuğɑ na ġoanama inam nam Arua na ġoanama maika. Be Arua na ġoanama inam nam tubuğɑ na ġoanama maika, baninama Arua be tubuğɑ taudi tawai ġinanana aubainama. Be Arua nam imawai dokemina, vutuna aubainama, yaba ami kaba tuağɑiedima, taumi yodi ko voivoiedina. ¹⁸ Be değoda Arua sibo i dokemina, naumeki da tarawatu nam yai bademi.

¹⁹ Dà yawasanama poranama na gewagewama matabuda tè kataieno, taudi inam: badara, kaua miremiredima, ġera, ²⁰ kokoitau raudunedima, ġasi, yabune bo barau, waisuramudu, unura, medi, kanitoku, waikawa ġasiğası, waikawa dariğɑ munağɑ, ²¹ waikwina, tegobua, soi genogeno, be yaba ġesaudima nama kitedima yatoi rereğena. Taugu boni è riuwai nonoğimina, değoda uma yawasanidima ko voiedina, taumi tokare nam Mamaitua na buderima ko pa gó.

²² Be Arua na votavotama inam: wainuapa gó, wainuaveré, suba, nam medi makai, raukivivere, vere, waipatutu, ²³ voya góta be wainuabagibagi. Tarawatu uma yabedima nam imawai ġakedina. ²⁴ Be aitaugɑ da Yesu Keriso ġaroğaronama, taudi adi yawasanama poredima be tubuğidima na ġoanama gewegewedima matabudi korosie a tuparatudina. ²⁵ Yodi tauda Arua na rewapanae tà miamiana, aubainama tauda Arua na ġoane nama sibo tè nağona. ²⁶ Be nam sibo tè rauguyaguyau bo dà banagama dà banagama tè tainuamedimedidi, bo tè unuredi.

6

Waikai sagu vivira

¹ Yau bana, değoda aitau nopomie gewagewa e voienna, naumeki da taumi aitaugɑ Arue ko midimidina, inam baneginama nuataugɑ sibo koya kai saguna, be gewagewae koya kawa didimanina. Be ko kita kaua da nam taumi mate ko beku. ² Ami banagama ami banagama mate ami nuaboya rağanine koi kawa kaisagu vivirana. Inam kauine taumi Keriso na tarawatuma ko vovo teyeteyena. ³ Değoda aitau taunağɑ e kawakawa sağe yababena, inam baneginama tauname e kaikaiyovu munağena.

⁴ Banaga tenatenağɑ taunağɑ na yawasanama e kaivira munağena. Nam turamma na yawasanama tam am yawasanama mate kwawai ruvaruva. Be değoda am yawasanama Mamaitua matane e verena, vutuna kwai

nuavereena. ⁵ Banaga tenatenaḡāḡa tamḡa sibo am yawasanama kuya kita watanina.

⁶ Be aitau da Bada na giuma e rarauguyuena, tauna aba na ḡoanama, naumeki da taumi ko kaisaguna.

Dà yawasanae pesi verenama sibo tè kumana

⁷ Abāḡa è giruma be è riuriuemina, vutudi ko noḡota kauedina, baninama tauda nam Mamaitua tài kaikaiyovue be teneteneḡina, ibewa. Deḡoda tauda aba pesinama dà yawasanae tè kumakumana, vutuna tokare votanama tà banavina. ⁸ Aitau da tubuḡa na ḡoane gewagewa pesinama e kumakumana, tauna tokare gewagewa dosinama e banavina. Be aitau da Arua na ḡoane vere pesinama e kumakumana, Arua tokare yawasana kenakena nonoḡinama tauna e utena. ⁹ Raḡan patapatanama vere sibo tè kaiwatanina, be nam tunidama ya tuaḡai, baninama raḡan e veraveraurauna tauda tokare vere tà banavina, deḡoda tè kaiguratena. ¹⁰ Vutuna aubainama deḡoda aba raḡandima veredima sibo tè banabanavidina, naumeki da tauda vere banaga ḡarodie sibo tè voivoiedina. Be vere dosinama dà banagama Mamaitua na damma ḡarodie sibo tè voiedina.

Pol na giuma damonama be na waikaiwama

¹¹ Yodi ko kita, yau girumama dosidie ami letama yà girugirumina nimague.

¹² Koya vaie! Inam tauwai katakatai kaikaiyovudima ta riuriu raukosogaiḡaina da taumi sibo kopitom koya paḡona. Taudi nama ta voivoiana, baninama taudi ta ḡoeḡoena da banaga kabe taudi isedima ta kawa saḡedi. Taudi ta naira be umanama tawai noḡotana, “Nam i verena da Jius banegidima ta riuna da tauda kabe Keriso na korosima tèwai sumaḡe. Inam kauine tauda tokare ta raukivi gewegewedana.” ¹³ Be inam banegidima avedi da taudi kopitom a paḡona, be taudi nam tarawatu timawai muriwatanena. Be yaḡoro taudi ta ḡoeḡoena da taumi sibo kopitom koya paḡona, taudi inam kabe adi waibadae ta seḡara munaḡedi, aubainama nama ta riuriuna.

¹⁴ Be taugu nam rauguyaguyau munaḡeguma ama ḡoeḡoena. Ibewa, be dà Badama Yesu Keriso korosie ya guri, be yau gewagewama ya noḡota poredina, vutunaḡa yà rarauguyauena. Yesu na gurie dobu yawasanidima nopogue mate a gurina, vutuna aubainama taugu inam yawasanidima nam ama ḡoeḡoedina. Be Yesu na gurie, inam maika kabe taugu mate è guriguri, vutuna aubainama taugu yodi dobu yawasanidima nam teneteneḡina da yà muriwatanedi. ¹⁵ Deḡoda kopitom tè paḡo bo

ibewa, inam nam aiyaba. Tauda yodi Kerisoe tè tubuġa vitarana, inam vutuna yaba dosinama.¹⁶ Taumi aitaugā uma giunama kowai aninena, taumi inam riukaua Jius banegimima, Mamaitua na damma. Be taugu aubaimima yà moimoiragina da Mamaitua suba e utemi be mate na raunuatoima ġaromie e kena.

¹⁷ Be yodi yau bana, nam aitau piripiri kwa utegu bo kwa kawa nuaboya munaġegu. Baninama taugu pire totoi tunigue ta kenakenana. Inam piredima tawai maġatarana da taugu riukaua Bada Yesu na taunoyama.

¹⁸ Yau bana, dà Badama Yesu Keriso na raukiviverema ġaromie e kenana. Inam riukaua.

Epeses adi letama

Pol na waikaiwama

¹ Taugu Pol Mamaitua na ġoane da Yesu Keriso na apsolma. Taugu uma letanama yà girugirumina taumi tauwai sumāġa aitaūġa Epesesma ko miamiana ġaromie. Taugu è kataie da taumi patupatutumima Yesu Kerisoe.

² Taugu aubaimima yà moimoiragina da Tamadama Mamaitua be Bada Yesu Keriso suba ta utemi be mate adi raunuatoima ġaromie e kenana.

Mamaitua waiaiaina Kerisoe e uteutedana

³ Tauda Mamaitua isanama tà kaisuġuna. Vutuna dà Badama Yesu Keriso Tamanama. Tauda naumeki da isanama tà kaisuġuna, baninama Mamaitua Arue mara waiaiaininama matabudi e uteutedana, baninama tauda Kerisoe aubainama. Nama tauna e voivoiana, baninama aruidama anisagunama aubainama. ⁴ Boni muriġa da Mamaitua dobu matabuna ya voienna, wainuapaġoe ya vine dokedana da tauda sibo Mamaitua matane banaga viviredama be nam aba wavunama te kiroġi. ⁵ Tauna boni ya vineda be tauna na ogama ya tarägiñ da Yesu Kerisoe tokare ei kawa natuneda be natunatunama tà tubuġana. Inam vutuna tauna na wainuaverema be na ġoanama dosinama.

⁶ Vutuna aubainama Mamaitua isanama tà kaisuġusuġuna na raukiviverema tauda ġarode aubainama. Baninama Mamaitua Natunama Yesu nuanama taupaġonama, be tauda Yesu ġarōġaronama. ⁷ Be Yesu ya gurigurina, kosinine tauda ya kuvesidana be dà gewagewama ya noġota poredina. Baninama Mamaitua na raukiviverema ya moraba kauana aubainama. ⁸ Mamaitua na raukiviveree tauna nuauyauya be waikatakatai ya ġini pore vavasaġena tauda ġarode da tauda sibo tè kataie da tauna aba ġarode e voivoienia.

⁹⁻¹⁰ Mamaitua na noġotama semosemonama yai maġataridina tauda ġarode, baninama nama tauna na ġoanama. Be na noġotama semosemonama inam umanama: Raġankaua e tavana raġanine, tauna tokare yaba matabuna marae be dobue Keriso na waibadama dibune e rawateġeidina. ¹¹ Tauna bonideġo na ogama ya tarägi be ya vinedana, da tauda Yesu Kerisoe Mamaitua na banagama. Nama tauna na ġoanama. ¹² Vutuna aubainama tauda aitaūġa Keriso tèwai sumāġa dokena, tauda sibo isanama tè kaisuġusuġuna, na borumama matabuna aubainama. ¹³ Be

yodi taumi riukaua varinama koya vaiena da Mamaitua tokare taumi ei yawasanimina. Be taumi Keriso koyawai sumāgena rağanine, tauna Arua Babau boni ya sausaugena ya utemina, inam na ġipima.¹⁴ Be uma Arua Babaune tauda ya borutawadana da tokare na buderima tà pağona. Be yodi tauda tài rabana, naumeki da Mamaitua tokare e nawedana marae, be dabudine tauna mate tà mia nonoğana. Vutuna aubainama tauda isanama tà kaisuğusuğuna.

Pol ya moiragina Epeses banegidima aubaidima

¹⁵⁻¹⁶ Taugu è vaiemi da taumi Bada Yesu kowai sumāge be Mamaitua na damma kowai nuapağedođina. Vutuna aubainama taugu rağan patapatanama Mamaitua yàwai kaiwena, be yà moimoiragina taumi aubaimima.¹⁷ Be tauge yağoro yà moimoiragina da Mamaitua nuauyauya be katai sibo ya utemi da taumi Mamaitua sibo koya katai kauena. Tauna vutuna dà Badama Yesu Keriso na Mamaituama be Tamanama boruboruminama.¹⁸ Be mate tauge yağoro yà moimoiragina da taumi nopomima Mamaitua sibo ya rawayananana. Yodibe taumi sibo koya katai kauena da aitauğà Mamaitua ya vinevinedina, taudi tokare yawasana vere vavasağinama ta banavina. Be mate taumi sibo koya katai kauena da Mamaitua na buderima boruboruminama, inam yaba dosi vavasağinama. Inam vutuna tauna na banagama tokare e utedina.

¹⁹ Be mate tauge yağoro yà moimoiragina da taumi na rewapanama dosinama sibo koya katai kauena. Inam vutuna tauda tauwai sumāge ya utedana.²⁰ Uma rewapanine Mamaitua Yesu Keriso ya kawa midisügū munağe, be marae Mamaitua na kaba miane kasaunama yauwanine yai mienina.²¹ Be tauna yodi guyaguyau isa nağonağodima be waibabada dosidima adi rewapanama, be rewapanina ġesaudima dobue be gunume, matabudi ya sağà poredina, yodi rağandie be rağan ta veraverauna ta tavana.²² Be Mamaitua yaba matabudi Keriso na waibadama dibune ya biridi be ya voie da Yesu ekalesia matabuna ewai badedina.²³ Baninama ekalesia matabuna inam Keriso tubuğinama, vutuna aubainama Keriso tauna gunuma, dobu, ekalesia, be yaba matabudi nopalidima ya moğavuna.

2

Tauda Kerisoe tà yawayawasanana

¹ Boni taumi ami rawağaiğai be ami gewagewama aubainama taumi arue koya gurina. ² Inam rağandie taumi dobu aruidima gewegewedima adi badama Seitan koyawai muriwatanena. Inam aruinama teneğinama

yodi banaga rawarawağaiğaidima ewai badedina. Be tauna vutuna wairewapaninama gunuma be dobu nōpodiğā e bababarana nam tama kitakitana.³ Nōgōne tauda matabuda nama Seitan tēwai muriwatane, be dà wainua nōgōnoğotama tē voivoiedi, be tubuğidama adi ġoane tē miamiana. Tauda boni gewagewa nopone tē tubuğana. Vutuna aubainama Mamaitua na medie tē miamiana. Inam kauinama teneg̫inama nama, yodi banaga rawarawağaiğaidima Mamaitua na medie ta miamiana.

⁴ Be Mamaitua na raunuatoima dosinama aubainama tauna yai nuapagoedana. ⁵ Tauda dà rawağaiğai be dà gewagewama aubaidima tauda arue tē gurina. Be Mamaitua Keriso mate yai yawasana tenağedana. Tauna ya kuvesidana na raukiviverema dosinama aubainama. ⁶ Tauda Yesu Keriso nopone. Vutuna aubainama Mamaitua tauda Keriso mate ya kawa midisugu tenağeda be yodi tauda marae na kaba mianama boruborumine Keriso mate tà miamiana. ⁷ Mamaitua Yesu Kerisoe ewai nuapagoedana. Vutuna aubainama uma kauine tauna na raunuatoie yaba veredima tauda ġarode e voivoiedina. Baninama tauna e ġoeğgoena da tokare banaga matabudi tauna na raukiviverema dosima ta kitana.

⁸⁻⁹ Rağanine taumi waisumağā koyawai karena, Mamaitua na raukiviveree yai yawasanima. Uma kauinama nam taumi ami noyama debane ko pağona, ibewa. Inam Mamaitua na puyoma taumi aubaimima. Vutuna aubainama taumi nam ko seğara yababa. ¹⁰ Mamaitua tauda ya voiedana. Tauda Yesu Kerisoe yai tubuğidana da sibo noya veredima tē voiedina. Inam noyedima veredima Mamaitua ya vokaukaua wainonoğidina tauda aubaidama, da sibo tē voiedina.

Kerisoe tauda matabuda tenağā

¹¹ Taumi eteni banegimima uma ko nōgoti. Taumi boni Jius banegidima awai isemina “Nam kopitom banegimi”, be taudi awai isa munağedina “Kopitom banegidama”. Taudi kopitom a seğaseğara yababena. Be nōpodima kavakanama. ¹² Ko nōgoti da inam rağandie taumi madanie, nam Keriso diane. Taumi nam Mamaitua na damma Israel nōpodie, ibewa, be mate taumi Mamaitua na saugama nam ko kataiedina. Taumi dobue nam Mamaitua ko kataienia, koya miamia nuababağana. ¹³ Boni taumi madanie, nam Mamaitua diane. Be yodi Keriso kosinine, taumi ya verauğemina Mamaitua diane.

¹⁴ Keriso ya voie da nōpodama yai subana, vutuna aubainama tauda yodi dà banagama mate tà miamia kauana. Nōgōne tauma Jius banegimaima, be taumi eteni

banegimima, tauda tèwai miataurina. Uma waimiataurinama inam maika gana. Inam gananama dam rabui ya daridariğedāna. Be Keriso tubuğine inam gananama ya katiweina. Inam kauine tauda dam rabui, be yodi ya rawateğeidāna da tauda inam dam tenağā. ¹⁵ Jius banegidima taudi tarawatu toitoi ġarodie, be Keriso na gurie uma tarawatudima adi waibadama yodi yai kovidina. Inam kauine boni tauda dam rabui, be yodi ya rawateğeida be tauda dam tenağā, na subae tà miamiana. ¹⁶ Yesu Keriso korosie ya gurigurina rağānīne, tauda dam rabui tèwai miataurina ya kawa veredana. Tauna ya rawateğeida da tauda yodi tubuğā tenağā. Boni tauda Mamaitua na ġaviamā, be yodi Keriso ya voie da tauda Mamaitua na banagama. ¹⁷ Keriso suba varinama verenama ya rauguguyena, taumi eteni banegimima ġavoe miemienimima ġaromie, be tauma Jius Mamaitua diane miemienimaima ġaromaie. ¹⁸ Be yodi tauda matabuda Arua Babau teneğine tokare tà verauna Tamadama ġorone, baninama aba Yesu Keriso aubaidama ya voiena aubainama.

¹⁹ Vutuna aubainama eteni banegimima taumi yodi nam wari banaga, ibewa da taumi Mamaitua na damma, mara banegimima. ²⁰ Taumi Mamaitua na tempolma, be Mamaitua apasol be peroveta adi noyama debedie ya keridana. Taudi tuatua maika. Be Yesu Keriso inam maika yeku, tuatua pakanama Mamaitua e ramaramana. ²¹ Taune tauwai sumağā matabudi ya rawateğei yağedāna da Mamaitua na tempolma ya tubuğāna. ²² Vutuna aubainama taumi eteni banegimima mate yodi nopomie Mamaitua na kaba miama, be Arue tauna taumi nopomie e miamiana.

3

Pol tauna Mamaitua na ogama yawai mağataridina

¹ Taugu Pol Keriso varinama è rarauguguyena ġaromie aubainama dibure a boruguna. ² Taumi agunai koya kataiena da Mamaitua na raukiviveree taugu uma noyanama ya uteguna taumi sagumima aubainama. ³ Taugu uma letanama nopone kaite è riuwai nonoġimina da Mamaitua na noġotama semosemodima ġarogue yai mağataridina. ⁴ Değoda uma letanama ko sievina, taumi tokare ko kataie da riukaua taugu Keriso na noyama semosemonama è kataiena. ⁵ Uma kauinama boni kimta poredima nam ti kataiena, be yodi rağāndie Mamaitua Arue yai mağatarina, na apasolma babaudima be na perovetama ġarodie.

⁶ Keriso na noyama semosemonama inam umanama: Değoda banaga vari verenama tai sumağena, avedi da taudi Jius banegidi bo eteni banegidi, taudi tokare Mamaitua na buderima ta pağona. Jius be eteni banegidima taudi noğone dam rabui be yodi taudi Kerisoe tubuğə tenağə be Mamaitua na waiaainama ta pağona. ⁷ Mamaitua na raukiviveree, na rewapanama ya uteguna da taugu vari verenama yà rarauguguyena. ⁸ Taugu avedi da banaga yababa Mamaitua na damma nopolie, be tauna ya vineguna da eteni banegidima ġarodie yà rauguguyana da taudi tokare Kerisoe, waiguyau ya moraba vavasağana ta pağona. ⁹ Uma kauinama boni Mamaitua na ogama semosemonama. Be yodi tauna ya vineguna da banaga matabudi ġarodie Mamaitua na ogama matabudi yà giu waibatedina. Mamaitua tauna vutuna yaba matabuna tauvoiedima.

¹⁰ Mamaitua e ġoegöena da Jius be eteni banegidima e rawateğeidi, be ekalesia tenağə e tubuğana. Yodibe guyaguyau be babada dosidima marae Mamaitua na nu-ayuayama ta kita be ta kataiena. ¹¹ Uma inam tauna na ogama boni nama kenakenanama. Be yodi Mamaitua na ogama banidima, dà Badama Yesu Kerisoe ta tubutubuğana.

¹² Vutuna aubainama yodi Keriso tàwai sumağena aubainama, tauda yodi teneteneğinama da Mamaitua ġarone ma raudebatorada tà nağona, be nam ma nairida. ¹³ Vutuna aubainama taumi nam sibo koyai nuaboyegu yau wainuatoitoima aubainama. Ibewa da taumi sibo koyai nuaverena, baninama taugu taumi aubaimima yàwai nuatoitoina.

Pol e moimoiragina Epeses banegidima aubaidima

¹⁴ Vutuna aubainama taugu rağan matabuna tuapikague è raupari be è moimoiragina Tamadama ġarone, ¹⁵ tauna vutuna yaba matabuna marae be dobue ġarone yawasana tà pağopağona. ¹⁶ Tamadama ġarone yaba veredima toitoi. Vutuna aubainama taugu yà moiragi be Tamadama yàwai bağana da tauna Aruine e voiemi da koi rewapanana. ¹⁷ Be yàwai bağana da Keriso ami waisumäge nopomie e miana, dabudine ami waisumägama ei rewapanana. Be mate yàwai bağana da ami wainuapağoma e moraba gurata, be waramimima wainuapağoe e yovo guratana maika kai waraminama doğa nopone e yovoyovona nama. ¹⁸ Be mate yàwai bağana da taumi be Mamaitua na damma, matabumi Yesu na wainuapağoma sibo koya katai kauena. Inam wainuapağonama na morabama, be na dauma, be na sağə guratama, be na yovo guratama sibo koya katai kauena. ¹⁹ Tauda banaga tokare nam teneteneğina da Keriso na

wainuapaġoma na morabama matabuna tà katai rovodi. Be taugu yà moimoiragina da taumi Keriso na wainuapaġoma ko katai kae, be mayanama ko dami kauena. Yodibe taumi nopomima Mamaitua na yawasanama be na rewapanama ei moġavuna.

²⁰ Mamaitua na rewapanama nopode e noyanoyana. Vutuna aubainama aba da tài nuanoġonogotena bo tài baġena, tauna tokare teneteneġinama e utedana. Be deġoda i ġoena, tauna tokare dosi yababinama ya utedana. ²¹ Yesu Kerisoe tauda tauwai sumaġa, Mamaitua isanama tà kaisuġusuġu nonoġena. Inam riukaua!

4

Wairawateġei Keriso tubuġine

¹ Taugu Pol Keriso varinama è rarau guguyena aubainama dibure yà miamiana. Vutuna aubainama yodi yà riuriu vavasaġemina da koi beavaiegu. Ami yawasanama didimanidie ko miana, baninama Mamaitua ya vinemina aubainama, tauna na ġoane ko miana. ² Taumi ko voyaġota be ko mia nuetau. Be nam ami banagama ko nuamedi makaiedi, be wainuapaġoe nuemima ko taibagina. ³ Raġan matabuna Arue koi rawateġeimi be subae ko mia tenaġana.

⁴ Baninama tauda matabuda inam tubuġa tenaġa. Be Arua tenaġa matabuda nopode e miamiana. Be dà gewage-wama matabudi Mamaitua ya noġota poredina aubainama, matabuda dà noġotama tenaġa, da inam raġanine tokare marae tà naġona. ⁵ Bada inam tenaġa, be waisumaġa inam tenaġa, be babataito inam tenaġa. ⁶ Be mate inam Mamaitua tenaġa, matabuda Tamadama. Tauna vutuna matabuda ewai badedana, tauna vutuna matabuda nopode, be taude tauna na noyama e voivoiedina. ⁷ Be tauda tenatenaġaġa Keriso na ġoanama ruvane Mamaitua Arua puyonama ya utedana. ⁸ Baninama girugiruminama porane umanama e riuriuna:

“Tauna note ya saġa ya naġo guratana.

Be panipani banegidima toitoi mate yai doka nawedina.

Be na banagama puyo ya utedina.”

⁹ Ko noġoti da noġone ya riuna, “Tauna note ya saġa ya naġona”. Uma riunama ewai kataidana da tauna noġone note be ya yovona dobue, deġo tauda yodi tà miamiana.

¹⁰ Tauna vutuna ya yovoyovona, teneġinama ya saġa ya naġo guratana mara matabudi muridie, be tauna yodi mara be dobu yai moġavudina.

¹¹ Tauna vutuna ekalesia nopodie puyo tenatenaġaġa ya ute nawedina. Ĝesaudima apasol, ġesaudima peroveta,

ḡesaudima taurauguguya, ḡesaudima ekalesia taurabedima be ḡesaudima tauwai katakatai. ¹² Uma banegidima taudi adi noyama da tauwai sumāga ta sagudi, be tauwai sumāga Mamaitua na noyama ta voiedina. Be inam kauine Keriso na ekalesiama, vutuna tauna tubuğinama, ei rewapanan be e morabana, ¹³ naumeki da tauda dà waisumağe tài rawateğeida be Mamaitua Natunama tà katai kauena. Yodibe tauda tokare Kerisoe nuadama e pora be tauda dà yawasanama, Yesu na yawasanama maika ta tubuğana.

¹⁴ Yodibe tauda dà waisumağe tà midi bagibagina, nam seda ḡaüğaubodima maika. Be banaga kaikaiyovudima nam ta kaiyovueda be dà waisumağe ta kawa barabarada, waga rabama e rawarawa tagetagerina maika. ¹⁵ Ibewa da Mamaitua na riukauama wainuapağoe tài muriwatanena. Dabudine tauda tokare Keriso tà miaratuna, tauna vutuna ekalesia debanama. Ekalesia inam Keriso tubuğinama. ¹⁶ Yesu Keriso na waibadae tubuğinama raganinama e rawatègei yağedina. Be raga tenatenağaga adi noyama ya utedina da ta voiena. Inam kauine raga tenatenağaga adi banagama mate tai kawa kaisagu be ta gogogogona. Be inam kauine Keriso tubuğinama tokare wainuapağoe e yawasanana.

Yanae ko miana

¹⁷ Bada isane taugu yà riuriuemina da nam eteni banegidima adi miane, ko mia. Taudi adi noğotama barebaredim aubainama ¹⁸ nopolima tadiwanawana ya moğavuna. Vutuna aubainama taudi nam Mamaitua na yawasanama diane, ibewa, be taudi a bua be a kawa nopolabobadodina. ¹⁹ Taudi nam vere bo gewagewa tima siesievina. Taudi gewagewa adi yawasanama matabudi ewai badedina. Taudi adi yawasanae badara dobido bi ta góegoena.

²⁰ Be taumi waisumağa koyawai karena rağanine, taumi koya kataiena da Keriso inam yabedima gewegewedima nam ima góegoedina. ²¹ Taumi koya vaiena da Yesu vari-nama matabuna inam riukaua. ²² Vutuna aubainama taumi ami yawasanama poredima gewegewedima matabudi koya gosağana. Inam yawasanidima a gewagewa vavasağana, vutuna aubainama a kawakawa gewegewemina. ²³ Nopomima be ami noğotama sibo Arue koya rawavaudina. ²⁴ Taumi sibo yawasana vaunama koya kotena. Uma yawasaninama e voiemi da taumi riukaua babau be didimana banegimima ko tubuğana, maika Mamaitua.

²⁵ Vutuna aubainama waikaikaiyovu ko gosağga be riukaue ami banagama ko riuedina, baninama Yesu Keriso tubuğine, tauda matabuda tenağga. ²⁶ Nam ami medima e voiemi da

gewagewa ko voie. Be ami medima nam nopomie e kena gurata da ravi e tava. ²⁷ Nam Seitan na kaitetema ko boru.

²⁸ Taumi aitaugā taudanedanene, danene ko gose pore be nimemie ko noya gurata be yaba veredima ko voiedi da banaga waikaruwağewağedima ko sagudina. ²⁹ Nam ġasi bo waisabona mudumie e dobi. Ibewa da ami banagama anitai nuaveredima aubainama, taumi sibo mudumie giu verediġa a dobidočina.

³⁰ Be nam Arua Babau ko voie da ei nuaboya. Baninama inam tauna Bada Yesu na ġipima ya boruna, da na kaba verauma raġanine, taumi tokare ei yawasanimina.

³¹ Vutuna aubainama uma kauidima sibo koya gose pore-dina: nuağorağora, keamedi, meditupo, kunura, waimena be waimiatauri. ³² Ami banagama ġarodie kivimima sibo ya verena, be nopomie raunuatoi sibo ya kenana, be ami banagama adi gewagewama sibo koya noğota poredina. Maika nema Mamaitua ami gewagewama Yesu Kerisoe ya noğota poredina nama.

5

¹ Taumi Mamaitua na sedama ewai nuapağoemina. Vutuna aubainama taumi tauna maika sibo koya tubuğana. ² Be wainuapağoe sibo koya miana maika Keriso yai nuapağoeđa, be dà gewagewama aubainama ya gurina. Be Keriso ya gurigurina, inam tipa verenama Mamaitua ġarone ya voiena, tauda aubaidama.

³ Ko kita kaua da nam banaga badabadaridima, bo gewagewa banegidi, bo waigogo banegidima nopomie ta mia. Inam kauidima gewegewedima Mamaitua na damma ġarodie nam sibo a kena. ⁴ Be taumi nam sibo uma yabedima koya voiedi: waisabona, bua giudima, bo tarakori gewegewedie koya tarakori. Inam yabedima sibo avedi, be taumi sibo raġan matabuna Mamaitua koyawai kaiwena.

⁵ Taumi uma kauinama ko katai kauena: banaga aitaugā badabadaridima, bo yawasana miremiredima tauvoiedima, bo waigogo banegidima, inam nama baneginama nam na gabuma Keriso be Mamaitua adi waiguyauma nopone ima kenakenana. Waigogo banegidima inam kokoitau taurauduneedima, baninama taudi uma dobunama purepuredima ta raraū duneedina. ⁶ Ko kita kaua da nam aitau giu kaikaiyovudie e boru waideğemi, baninama inam kauidie tokare Mamaitua na medima dosinama e yovona banaga rawarawağaiğaidima ġarodie. ⁷ Vutuna aubainama inam kauidie taudi mate nam koi popo. ⁸ Baninama taumi boni tadiwanawanae koya miamiana, be yodi taumi Bada na yanae ko miamiana, vutuna aubainama taumi naumeki da

yana banegidima adi yawasanae nama sibo koya miana.⁹ Be yana na votama inam vere, didimana be riukaua.

¹⁰ Vutuna aubainama taumi sibo koya raurubu gurata da Bada na *goanama* yawasanidima sibo koya katai kauedina. ¹¹ Be tadiwanawana na kauama nam sibo koya voiedi. Inam yabedima nam banibiribiridi, be taumi sibo banaga koyai kataidi da inam yabedima, taudi yaba gewegewedima. ¹² Inam yabedima banaga rawarawağaiğaidima semoe ta voivoiedina, be giuedima yai tunimayamayağā kauana. ¹³ Be rağanine inam yabedima yanae ta mağatarana, tokare banaga matabudi ta kitedi be ta kataiedi da inam yabedima matabudi gewagewa. ¹⁴ Be rağanine voia gewegewedima yanae ta mağatarana, inam rağanine inam voiedima gewegewedima tokare tai kavena. Vutuna aubainama banaga umanama a riuna:

“Tam gurie kenakenamma
kwa midisügu
be Keriso ei yanam.”

Arua na rewapanae ko miana

¹⁵ Be ami yawasanae ko kita kauemi da nema ko miamia bako. Nam banaga buebuedima maika ko mia, ibewa da nuauyauya banegidima adi miane ko miana. ¹⁶ Uma rağaninama e kenakenana da Mamaitua na noyama ko voienna. Be yodi gewagewa rağandima, vutuna aubainama ko kita kaua, da inam rağandima veredima nam koi yakaredi. ¹⁷ Vutuna aubainama nam koi taukoakoa, avedi, be Bada na *goanama* ko kataiena. ¹⁸ Nam ko tego bua be tegobuanama e voiemi da ami yawasanama e kawa gewagewa. Ibewa da Arua Babau sibo nopomima ya moğavuna,¹⁹ be Bada riune be sare mate koi kawa duğu vivira. Be mate sibo koyai gita be Arua saredima sibo nuemima nopone koya riğeriğedina Bada ğarone. ²⁰ Rağan matabuna Tamadama Mamaitua sibo koyai kaiwena yaba matabuna aubainama dà Badama Yesu Keriso isane.

Tautauğoma be adi waiwaiivima

²¹ Keriso vivirenama aubainama ami banagama ami banagama mate koi kawa vivira be ko voteyeteyedina. ²² Taumi waiwaiivi ami tautauğomama ko viviredi be ko voteyeteyedina, Bada Yesu ko vovo teyeteyena maika. ²³ Baninama tauğoma tauna vutuna waivi debanama. Uma kauinama teneğinama nama Keriso tauna ekalesia debanama. Be ekalesia tauna vutuna Keriso tubuğinama. Be Keriso tauna vutuna ekalesia tauwai yawasaninama. ²⁴ Vutuna aubainama taumi waiwaiivi ami tautauğomama ko

viviredi, be ko voteyeteyedina, maika ekalesia Bada Yesu ta vovo teyeteyena nama.

²⁵ Taumi tautauğoma ami waiwaivima koi nuapañoedina, maika Keriso ekalesia yai nuapañoedi be, tauname na yawasanama yai uta munağena. ²⁶ Mamaitua riune Yesu upae* ekalesia ya koğedi, be ya voiedi da tauna na banagama a tubuğana. ²⁷ Tauna nama ya voiana da ekalesia kitanama e vere vavasağana aubainama, nam mira, bo nam pire, bo nam aba gewagewa ġesau ġarodie e kena. Ibewa da taudi babau. ²⁸ Inam kauinama teneğine taumi tautauğoma sibo ami waiwaivima koyai nuapañoedina, maika nema taumi tubuğimima nuenuemima e pağopağona nama. Baninama değoda am waivima kwai nuapañoena, inam tamğā kwawai nuapaño munağemna. ²⁹ Nam aitau tenağā taunağā tubuğinama ima tuatuağaiena. Ibewa da tauna tubuğinama ewai kani bagibagi be e raberabe kauena, maika Keriso ekalesia ġarone nama e voivoiana, ³⁰ baninama tauda ekalesia inam Keriso tubuğinama.

³¹ Vutuna aubainama girugiruminama porane umanama ya riuna: “Tauğoma tamanama be tinanama e gosedi be na waivima mate tai rawateğeidi da taudi rabui inam tubuğā tenağā.” ³² Inam giunama baninama ya moraba kauana. Baninama uma giunama ewai kataidana da tauda ekalesia be Keriso inam tubuğā tenağā. ³³ Vutuna aubainama yà riuriu munağemina: Taumi tautauğoma sibo ami waiwaivima koyai nuapañoedina, maika nema taumi tubuğimima nuemima e pağopağona nama. Be waiwaivi taumi sibo ami tautauğomama koya viviredina.

6

Seda be adi dosima

¹ Seda taumi Keriso ġaroğaronama aubainama, ami dosima ko voteyeteyedina. Inam kaua verenama. ² Girugiruminama porane umanama ya riuna, “Tamamma be tinamma kwa viviredina!” Inam riuvavasağine, Mamaitua sauga mate ya boru dokena. ³ Be sauga inam umanama, “Tam tokare uma dobune yaba matabuna ġarone am yawasanae e verena, be niura kai daudaunama kwa raukaisağana.”

⁴ Be taumi tametamedima ami sedama nam ko voiedi da ko kawa nuaboyedi bo ko kawa nuamedimedidi. Ibewa da taumi kaua veredima ko voiedina Mamaitua matane be koi katakatai yağedi be Bada riune koi giunidina.

Taunoya adi babadama sibo a viviredina

* **5:26:** Uma upanama baninama inam waibabataito.

⁵ Taumi taunoya ami babadama uma dobune ko viviredi be ko voteyeteyedina, nuemima tabutabune maika nema Keriso ko vovo teyeteyena nama. ⁶ Taumi nam ami babadama anitai nuaveredima aubaidima ta kitekitemi be noğonairidie ko noyanoya. Inam avedi, be taumi rağan matabuna nuemima tabutabune ko noyana, Bada Yesu anitai nuaverenama aubainama. ⁷ Rağan matabuna ma nuaverem noya ko voiena, baninama inam nam banaga ġoma aubainama koma noyanoyana, ibewa da inam Bada matane tauna aubainama ko noyanoyana. ⁸ Be ko noğoti da Bada tokare banaga tenatenağāğā na noyama ruvane maesa e utena, avedi da tam taunoya bo taunoya na badama.

⁹ Be mate taumi babada ami taunoyama ko rabe kauedina, be nam ko riuwai nainairidi. Baninama taumi be taunoya, taumi matabumi ami Badama tenağā, tauna vutuna marae e miamiana. Be tauna matane taumi matabumi inam teneğimima.

Mamaitua iğara taragaidima ya uteutemina ko kotedina

¹⁰ Yodi yau giuma damonama inam, Bada na rewapanama dosine taumi koi rewapanana. ¹¹ Mamaitua iğara taragaidima ya uteutemina matabudi ko kotedi, be ko midi da bagibaginağā, yodibe Seitan na kaiyovuma gewegewedima koi ġaviedina. ¹² Tauda uma dobune nam banaga ġoma tamawai ġaviedina, ibewa. Tauda arua be penama gewegewedima miamia moisiridima, vutudi tàwai ġaviedina. Taudi vutudi adi babadama, be rewapanā gesaudima mate uma dobunama waikupikupinama tawai badena, aubainama tàwai ġaviedina.

¹³ Vutuna aubainama Mamaitua iğara taragaidima ya uteutemina, matabudi ko ragaudi da tunimie ta sağā rovona, yodibe gewagewa e tavatavana rağanine, taumi Seitan koi ġavienā. Inam rağanine taumi tokare nam ko beku, be yağoro ko midina. ¹⁴ Vutuna aubainama ko midi da bagibaginağā be riukaua ko pağō be bogemie koi boretaienā, be Mamaitua na didimanama ko pağō da nuakademima koi rauğāgarina. ¹⁵ Rağan matabuna ko vokaukauana vari verenema rauguguyenama aubainama. Be banaga sibo koya riuedi da Mamaitua na subae a miana. Uma vokaukauinama inam maika ami kağasumama ko vovo kaukauedina, nağō aubainama. ¹⁶ Be mate waisumağā ko pağō da ami guduma, aniwai rauğāgarimima aubainama. Inam gudune taumi tokare Seitan na keama menarageragettinama e veraverauna ko kati gabana. ¹⁷ Be ami yawasanama Bada ya uteutemina koi kunuboboe. Be Mamaitua riunama ko pağona, inam vutuna Arua Babau na iğarama kwatikwatinama. ¹⁸ Be rağan

matabuna Arua Babaue ko moiragina, be ami ġoanama na ruvae Mamaitua ġarone sagu koi baġena. Raġan matabuna koi neneġanana ami moiragie, tauwai sumaġa matabudi aubaidima.

¹⁹ Be taugu mate aubaiguma ko moiragi da ma raudebatoragu vari verenama waimoisirinama yà rauguguyena.

²⁰ Taugu yodi a panigu da dibure yà miamiana, be ko moiragina aubaiguma da taugu yaġoro ma raudebatoragu vari verenama yà rauguguyena. Inam taugu yau noyama.

Pol na waikaiwama

²¹ Taugu Taikikas è riuporena ġaromie. Tauna banaga patupatutunama Bada matane, be mate nuaguma tau-paġonama. Taugu nema yà miamia bakona, tauna tokare yaba matabuna ei varimina. ²² Vutuna aubainama taugu è riuporena ġaromie da nema yà miamia bakona sibo yai varimi da koya kataiena, be mate tauna e duġumina.

²³ Taugu Tamadama Mamaitua be dà Badama Yesu Keriso yàwai baġedina da suba, wainuapaġo be waisumaġa sibo a utemina. ²⁴ Be mate adi raukiviverema taumi aitauġa Yesu Keriso kowai nuapaġo nonoġena sibo a utemina. Uma yau giumenta damonama.

Tauwai sumāgā Pilipi meagaine adi letama

¹ Taugu Pol be Timoti, tauma Yesu Keriso na taunoyama uma letanama ka girugirumina taumi aitaūgā tauwai sumāgā Pilipi meagaine ko miamiana ġaromie. Be mate uma letanama Mamaitua na damma babadidima be dikon mate aubaidima. ² Tamadama Mamaitua be Bada Yesu Keriso adi raukiviverema be adi subama ġaromie e kenana.

Pol Mamaitua yai kaiwena Pilipi banegidima adi waisumaġama aubainama

³ Taugu yà noġonoġotimina raġanine, yau Mamaituama yàwai kaiwa kauena, ⁴ be ma nuaveregu yà moimoiragina taumi aubaimima. ⁵ Baninama taumi koya kaisagugu be vari verenama tèi daberarina, raġanine waisumaġā koyawai karena, naumeki da yodi. ⁶ Be taugu è katai kauena da Mamaitua noya verenama nopomie yawai karena tokare nam e gose, naumeki da Yesu Keriso na kaba verau munaġama raġanie.

⁷ Taugu è kataie da aba yà riuriuemina inam riukaua, baninama taumi taugu nuanuague ko miamiana. Avedi da taugu dibure bo deġo yà miamiana, yaġoro vari verenama aubainama yà giugiu raukosogħajnejda riunama ei rewapanana. Be tauda matabuda Mamaitua na raukiviverema tà kitakitana. ⁸ Mamaitua ya kataie da taugu nopoguma e ġoegħoe kaue da taumi sibo è kitemina, baninama taugu yau wainuapaġoma ġaromie, teneġināma nama Yesu Keriso taumi ewai nuapaġoemina. ⁹ Taugu yau moiragima na banimax inam uma: Taugu yà moimoiragi da taumi ami wainuapaġoma sibo ya moraba da ya moraba guratana. Inam kedane taumi tokare ami kataima be ami nuauyauyama e morabana, ¹⁰ yodibe tokare vere be gewagewa kitedima ko kataie da deġo tauna yawasana verena, be deġo tauna yawasana gewagewana. Be yawasana miramiranama tokare nam mate ko babara, be Yesu na kaba verauma raġanine, taumi tokare nam e etaremi. ¹¹ Be mate Yesu Kerisoe didimana votavotanama nopomima koi moġavudina. Inam raġanine banaga tokare ta kitedi be Mamaitua isanama ta kaisuġusuġuna.

Pol dibure a boruna aubainama vari verenama e dabel-aberarana

¹² Yau banagama matabumi, taugu yà ñoeñoena da taumi yodi sibo koya kataie da aba ñarogue e tubutubuñana, vutuna aubainama vari verenama ya daberarana. ¹³ Baninama banaga matabudi uma dibure be guyau na tauigarama mate a kataie da taugu yàwai nuatoitoina Keriso aubainama. ¹⁴ Rañanine tauwai sumaña a kitagu da taugu dibure a boruboruguna murine, tauwai sumaña toitoi ma raudebatoredi vari verenama a rarauguguyena, be nam ti nairana.

¹⁵ Be yañoro è kataie da banaga ñesaudima nopalima unura mate ta rarauguguyana, be ñesaudima riukaue ta rarauguguyana. ¹⁶ Be ñesaudima nam unura mate, taudi wainuapaño nopalima ya moñavu be ta rarauguguyana, baninama taudi a kataiena da taugu dibure yà miamiana, baninama taugu vari verenama è giugiu raukosogaiñgaiena aubainama. ¹⁷ Be unura banegidima taudi Keriso ta rarauguguyana, baninama ta ñoeñoena da taudime isedima ta kawa sañe munagedina. Be mate adi rauguguye taudi ta raraugrubuna, da kabe yau piripirima dibure ta kawa morebi, ¹⁸ be inam nam aba. Avedi da taudi kaiyovue bo riukaue ta rarauguguyana, be yañoro Keriso varinama tawai daberarina, inam vutuna taugu yàwai nuaverena. Be yañoro da yài nuavere watanana, ¹⁹ baninama è kataiena da taugu tokare Mamaitua ei yawasaniguna, baninama taumi rañan matabuna ko moimoiragina aubaiguma. Be yañoro Yesu Keriso Aruinama inam taugu mate.

²⁰ Taugu nuaguma e riuriuna da dibure nam piripiri ei gwañagu da yau waisumäge yà beku. Ibewa da Bada Yesu isanama ma raudebatoragu sibo patare è kawa sañesagena, avedi da tai gurigu bo ibewa, yañoro Bada yà kaisuguna. ²¹ Baninama deñoda yawayawasaniguna yà miana, inam ñarogue naumeki, taugu Keriso na ñoñanama voienama aubainama yà miana. Be deñoda yà gurina, taugu yàwai nuavere kauana, baninama inam rañanine taugu yà nañgo marae be Bada mate ka miana. ²² Be deñoda yà miana, taugu yà noya gurata da banaga Keriso ñarone yà veraugedi da tai sumañana. Be taugu nam e kataiena da taugu aba kedanama yà vine, yawasana bo guri. ²³ Yau noñotama tawai taisoruna. Noñota ñesau e ñoeño da taugu sibo è guri be è nañgo Keriso mate kè mia tenañana, inam vutuna ya vere vavasañana. ²⁴ Be you, taumi kami taiye inam ya vere vavasañana da taugu yà miana.

²⁵ Vutuna aubainama taugu è katai kauena da tokare yà miana, taumi kaisagumima aubainama. Be ami waisumäge yai morebidi be koi nuaverena. ²⁶ Yodibe

rağanine yà verau munağana ġaromie, taumi tokare Yesu Kerisoe ko mosari guratana taugu yau noyama aubainama.

Piripiri nōpodie waisumağe ko midi bagibagina

²⁷ Be kaua dosinama inam uma: Ko rabe kauemi da Keriso varinama verenama e riuriuna ruvane, nama ko nağona. Yodibe yà verau yà kitemi bo değoda yà mia kwasana taugu varimiğā yà vaie be yà kataie da taumi kaite koya vadidi be ko midimidina. Be ami noğotama koyai tenağe da vari verenama aubainama kowai ġaviana da banaga sibo ai sumağena da nam waikatakatai kaikaiyovudima sibo ai muriwatane. ²⁸ Be aitauğā tawai ġaviemina, nam ko nairedi. Dabudine taudi tokare ta kataie da Keriso taudi e mutu rovodina, be taumi tokare Mamaitua ei yawasan-imina. ²⁹ Baninama taumi Keriso ya vinemina da tauna kowai sumağena, be mate ya vinemi da piripiri ko bana-banavidina Keriso kana taiye, be nam waisumağā taunağā. ³⁰ Be taumi ami piripirima inam teneğinama, maika taugu piripiri noğone è banabanavidina nama. Be yodi yağoro e nağonağona da inam vutuna letanama yodi ko siesievina.

2

Keriso maika sibo koya miana

¹ Uma kauidima veredima ġaromie ta kenakenana, vutuna aubainama taugu yàwai nuaverena. Taumi Kerisoe ami banagama mate kowai kawa duğu vivira, be taumi wain-uapağoe ami banagama mate kowai riu nuasubasubana, be taumi Arua Babaue kowai turaturana vivira, be taumi raunuatoi ġaromie e kenakenana. ² Be you, yağoro yài nuaveren kauana değ da taumi kowai debatenağana nuapağoe, be nam waikawa dariğā ġaromie ima tubutubuğana.

³ Be mate nam koi gogo bo ko kawa sağe munağemi, ibewa da ko ġaubo munağā be ami banagama ġesaudima ko kawa sağedina, be nam taumi. ⁴ Nam taumiğā sagu munağemima ko noğonoğotidi, ibewa da banaga ġesaudima mate ko noğotidi.

⁵ Taumi ami noğota be ami voiama sibo Yesu Keriso na noğota be na voiama maika. Tauna na noğota be na voiama inam umanama: ⁶ Tauna avedi da Mamaitua be tauna nam Mamaitua maika i miana. Be yağoro mara ya gose porena, Mamaitua ya ġoegoena nama, ⁷ be yai rawabanaga ġomana, maika tauda. Be ya voia munağe da kitana banaga yababa ya tubuğana. ⁸ Inam kedane tauna ya ġaubo munağā da kitana banaga ġoma maika, be Mamaitua ya voteyet-eye da ya gurina, be mate korosie na gurima rağanine ya voteyateyana. ⁹ Inam vutuna aubainama Mamaitua tauna

ya kawa sağe vavasağe be isanama dosinama ya utena. Be yodi tauna isanama, banaga, anea be arua matabudi ya sağə poredina.¹⁰ Tauda matabuda dobue, Anea marae be arua doğa dibune miemienidima, matabuda Yesu noğone tuapikadama doğae tài tutumidiridi,¹¹ be tà riuna, "Yesu Keriso tauna vutuna Bada." Be inam kauine Mamaitua Tamadama isanama tà kaikai suğusuğuna.

Kipora maika ko yanana

¹² Vutuna aubainama yau bana, avedi da taugu taumi mate bo ibewa, be taumi rağan matabuna Bada riunama è giugiuena ko vovo teyeteyena maika noğone koya voivoiana. Be yodi yà riuriuemina da yawasaninama ġaromie kenakena nonoginama ko kaigurate, be Mamaitua vivirenama be nairenama mate nopomie e kenana.¹³ Baninama Mamaitua vutuna taumi nopomie e noyanoyana. Be tauna e voiemi da na ġoanama kauidima ko ġoeġoedina, be mate e sagumi da na ġoanama ko voivoiedi be tauna kowai nuaverena.

¹⁴ Yaba matabuna ko voivoiedina, nam waisuramudu bo riuviravira mate ko voiedi,¹⁵ inam rağanine taumi tokare Mamaitua na sedama didimanimima be wavu nam ġaromie e kena. Be dobu banegidima barebaredi be godabaridima nopolie taumi tokare ko yanana maika kipora.¹⁶ Be taumi yawasana riunama ko kaididi! Yodibe Bada Yesu banaga matabudi e etaredina rağanine, taugu yài nuavere kauana yawasana riunama koya kaididina aubainama, taugu è kataie da yau bagibagima nam ei yakarena.¹⁷ Be Taumi ami waisumağama Bada Yesu ġarone, inam vutuna taumi Mamaitua ġarone ami puyoma. Be taugu yodi tokare kosiniguma e rauğinina taumi ami puyoma e taidin yağena. Be avedi da kosiniguma e rauğinina, be yağoro yàwai nuavere tenağana.¹⁸ Vutuna aubainama taumi taugu mate tài nuavere tenağana.

Pol na tausaguma Timoti be Epaprodaitas

¹⁹ Değoda Bada Yesu ima ġoe, taugu rağan ġaubonağga agunai Timoti yà riupore verauğena ġaromie, yodibe taumi nema ko miamia bakona, vutuna taugu èi variguna aniwai nuavereguma aubainama.²⁰ Timoti tauna yau varoro kauama, baninama tauna na yawasanama nam maika aitau. Tauna nuanama ewai poya guratana taumi aubaimima.²¹ Be ġesaudima taudiğä ta noğonoğota munağedina, be Yesu Keriso na kauama nam tima noğonoğotidina.²² Rağanine Timoti taugu mate vari verenama kè rarauguguyena, dabudine banaga a kita da tauna banaga kaua. Tauna taugu mate kè noyana kabe gomana tamagominama mate ti noyanoya.

²³ Be rağanine dibura taurabedima aba giunama tima riuegu, değoda dibure ya mia kwasa bo ya dobi, taugu waigapa tauna ya riupore verauge ġaromie be nuemima e boruna. ²⁴ Be ya noğonoğotina da taugu ġomiguma ya verau makai be ya vakitemina.

²⁵ Taumi ami puyoma Epaprodaitas nimane koya sivudi be ya veraugedina ġarogue. Tauna taugu mate kè noya tenaġa be kē ġavia tenaġana. Be yodi ya noğonoğoti da turaguma ya riupore munaġena ġaromie, ²⁶ baninama tauna nuanama ewai poya guratana da e kita munaġemina. Be mate yai nuaboyana, baninama taumi riunama koya vaiena, da tauna ya sidana. ²⁷ Inam riukaua da tauna ya sidana, ġaubonaġa sibo ya gurina. Be Mamaitua na raukiviveree yai yawasanina aubainama, raukiviverenama teneġine taugu yau nuaboyama nam i morebina.

²⁸ Vutuna aubainama taugu waiġapa ya riupore verauġena ġaromie da ko kita be nuemima e verena, be taugu mate nuaguma e subana. ²⁹ Bada isane ma nuaveremi koi kaiwena. Be banaga ġesaudima adi yawasanama maika Epaprodaitas ko vivira kauedina, ³⁰ baninama Epaprodaitas ġaubonaġa sibo ya gurina Keriso na noyanama kana taiye. Be tauna nam guri i nairena, be na yawasanama yai uta munaġe da taumi ya rauepaiyemi be taugu ya saguguna, baninama taumi madanie aubainama.

3

Vaivai kitekitedima nam tai muriwatanedi

¹ Yau bana, Bada ġarone koi nuavere! Avedi da yau giuma noğone letae è riuemina, be yodi ya riuriu munaġemina, be nam debaguma ima subasubana. Ya riuriuemina da ami waisumaġe ko vadidi kauana.

² Taumi inam banegidima adi voiama daġadāġasi maika ko kita kauedina. Taudi kopitom ta ġoegoe kauena, agunai taugu è noğoti da taudime sibo a tom munaġedina. ³ Be tauda aitauġa Mamaitua Aruinama nopode be tà rarau duneena, tauda vutuna riukaua Mamaitua na dam ġomoma. Baninama tauda nam dà vaivaima tà noyenoyedi be marae tà tava, ibewa da Bada Yesu tài sumaġe be isanama tà kawakawa saġena, inam rağanine Mamaitua ei aninedana.

⁴ Taugu boni inam vaivaidima teneġidima ġarogue. Banaga ġesaudima ta noğonoğotina da Jius adi vaivaima tai sumaġedi be kabe marae ta tava. Be taugu vaivai èwai muriwatanedina, nam taudi maika. Vutuna aubainama taugu yodi ya giu munaġa be ko kita. ⁵ Taugu è tubuġana murine rağan aniwai 8-ne kopitom è paġona, taugu vutuna

Israel banegiguma, Benjiman na damma nopone. Taugu vutuna Hibru banegidima a tikaguna. Be taugu vutuna Parisi banagiguma, tarawatu èi muriwatana guratena.⁶ Be taugu tarawatu taupağodidinama, be Mamaitua na damma è raraukivi gewegewedina, taudi tarawatu a gose be Yesu Keriso awai muriwatanena aubainama. Be tarawatu na babae taugu nam ai tarawatu ei kati kotovi rubuna.

⁷ Inam kauidima boni è kitekitedi da kabe ta sagugu, be yodi Kerisoe taugu yà kitakita tuağaiédina. ⁸ Taugu nam inam vaivaidima kopitom taudığa ama kitakita tuağaiédina, ibewa da yaba matabuna ġesaudima mate taugu è kita tuağaiédina da Yesu Keriso yau Badama sibo è katai kauena. Taugu yabedima matabudi è kaiporağga be yodi yà kitekitedina taudi maika megü. Nama è voia da Keriso mate kèi rawateğeimai⁹ be kè mia tenağana. Be nam tauguğga sibo yau kedama è wane be didimana è banavi. Ibewa da waisumağga Kerisoe vutuna e kawa didimaniguna Mamaitua matane.¹⁰ Taugu yà ġoeğoe da Keriso yà katai kauena. Tauna vutuna kokoagae be Mamaitua na rewapanae ya kawa midisuğu munağena. Be yà ġoeğoe da midisuğu munağga na rewapanama vutuna taugu mate yà katai kauena. Be mate yà ġoeğoe da Keriso wainuatoitoi ya pağopağona taugu yà pağga sagu be tauna ya guri be ya midisuğu munağana, taugu nama, nemanama da sibo è guri,¹¹ be kokoagae è midisuğu munağana.

Parata aubainama tà maninina

¹²⁻¹³ Taugu inam kauidima nam ġarodie e tavana, ibewa. Taugu yau piripirima yağoro ta kenakenana, be yà rara rubu gurata be yà manimaninina da parate sibo è tavana. Inam vutuna aubainama Yesu Keriso yai yawasaniguna.

Be yau bana, taugu nam yodi ama riuriuna, da inam paratine è tavana, ibewa. Be aba yà voienna, inam yaba matabuna murigue yà gose be noğogue yà nağda inam paratine yà tavana.¹⁴ Yesu Keriso ya vinegu, da Mamaitua maesa tokare marae e uteguna. Vutuna aubainama yà manimaninina da inam paratine yà tavana.

¹⁵ Taugu è noğoti da taumi aitaüğga Arue noğota bagibaginama ġaromie, taumi uma kauidima ko kita yağedina, maika taugu. Be değoda ibewa, Mamaitua tokare ei kataimi da ko kitana.¹⁶ Be aba kaite dà waisumağge tè pağona, nam tà raukai gose, be naumeki da tà kaididina.

¹⁷ Yau bana, taugu koi tupotupoğanegu be mate aitaüğga da taugu yau voiama didimanidima tawai tupotupoğanena, taudi mate ko kitedi be nama ko voianna.¹⁸ Baninama taugu boni rağan patapatanama è riuriu nonoğemina, be

yodi ma matasurugu yà riuriu munağemina da banaga ya ribana adi yawasanama ewai mağatara da taudi korosi na ġaviamta tubutubuğana.¹⁹ Taudi adi damonama tokare gienae ta naġo rovona, be taudi adi mamaituama inam kani be tego. Be yaba waitunimayamayağidima ta rarauguyau yababedina. Be taudi dobu na yawasanama ta noġonoġota guratedina.²⁰ Be tauda dà waduboġomama inam marae, deġo Tauwai yawasana Yesu Keriso e miamiae dobudi. Be tauda vutuna na kaba verauma tħawri rabena.²¹ Inam raġanina tauna tokare tubuğidama gwaġegwaġedima e boru vitaredi be e rawavaudina, tauna tubuġinama ma neneġarina e miamiana maika. Be inam tokare na rewapanama dosine nama e voiedina, be yaba matabuna na waibadama dibune e verauġedina.

4

¹ Vutuna aubainama yau bana, taugu nopoguma e ġoegħoe kauena da taumi sibo ē kitemina, baninama taugu yau wainuapaġoma ġaromie. Taumi aubaimima yàwai nuavere kauana. Be taugu yau noyama votavotanama inam vutuna taumi. Be taumi Bada ġarone sibo koya vadidi be koya midina.

Raukura na rauduġuma

² Be ġaromie inam waiwaivi rabui isedima Yuodia be Sintike, taudi Yesu tauwai muriwanenama. Be yà riuriu vavasaġedi da taudi awai miataurina yodi sibo ai nuavere munağana.³ Be mate tura kaukauiguma tam yàwai baġamna da uma waiwaividima rabui sibo am raukurae kuya sagudina. Baninama boni taugu, Klement be yau tausaguma ġesaudima, isedima marae yawasana bukanama nopone ta kenakenana, vari verenama kē rarauguguyena. Be inam waiwaividima rabui mate a sagumai be kē rauguguyana.

⁴ Raġan matabuna koi nuaverena Bada ġarone! Be yà riuriu munağemina: Koi nuavere!⁵ Banaga matabudi sibo a kataie da taumi voyaġota banagimima. Bada ġaubonaġa e verau munağana.

⁶ Vutuna aubainama nam nuaboya ġesaudima nopomima ta kawa nuaraġeraġedi! Be yaba matabuna aubainama ko moiragi be ami ġoanama kauidima matabuna Mamaitua koi baġana. Be mate koi kaiwena yaba matabuna aubainama.⁷ Yodibe Mamaitua na subama nopomima ei subana, deġoda Yesu Keriso nopone tħa miana. Be inam subanama ya saġa guratana, nam maika suba tauda tè katakataiena nama.

⁸ Be ami wainua noġonoġote uma yabedima koi nuanoġonoġotedina. Riukaua, vivira, didimana, nam

yawasana miremiredi, kaua wainuapağopağodima, didimana giudima, voiakaua, be aba banaga matedie e verena, vutudi koi nuanoğonoğotedina. ⁹ Yaba matabuna èi katakataimi be ġarogue koya kitakita bo koya vaivaiena, nama ko voiedina. Be Mamaitua suba Badanama, tokare taumi mate ko mia tenağana.

Polyai kaiwana adi waisaguma aubainama

¹⁰ Taugu Mamaitua ġarone èi nuavere guratana, baninama taugu noğotiguma ya moraba kauana taumi ġaromie, aubainama waisagu koyai kare munağena. Vutuna aubainama Bada isanama yà kaisuğusuğuna. Taugu è kataiena da saguguma koya ġoeğöena, be nam keda ġesau i kenana da sibo koya sagugu. ¹¹⁻¹² Uma giunama yà giugiuna, nam taugume sagu munağeguma aubainama ama giugiuna, ibewa. Değoda kaniguri bo nam kaniguri, bo aba ya maruabiena, inam naumeki. Be değoda ġarogue teneteneğina bo nam teneteneğina, inam matabuna naumeki. Taugu inam yawasanidima matabudi è marağamedina. ¹³ Taugu teneteneğinama da uma yawasanidima nopodie yà miana, baninama Yesu Keriso na rewapanama e uteuteguna. ¹⁴ Be yağoro ya vere kauana da ami puyoma koya riuporena, saguguma aubainama.

¹⁵ Be boni ko noğoti, rağanine Masedonia è gosena murine, taugu vari verenama è rauguguya dokena ġaromie. Inam rağandie Mamaitua na damma ġesaudima nam ti saguguna, be taumi Pilipi banagimima, taumiğā mane koya uteguna. ¹⁶ Be mate rağanine taugu Tesalonaikama, be yağoro yau puyoma tenağā be rabui rağan toitoi koya riuriu porağana, baninama aba è marumaruabiena aubainama. ¹⁷ Be nam ko noğoti da ami manema ama ġoeğöena, ibewa da aba yà ġoeğöena inam ami waiutama na damone sibo votanama koya kitana. Yodibe maesa tokare sibo koya pağona.

¹⁸ Epaproditas tauna ami puyoma matabuna ya uteguna. Be taugu aba è ġoeğöena, vutuna koya saguguna, be you, taumi ya moraba vavasağana koya voiена. Ami puyoma matabudi inam Mamaitua koyai nuavere kauena, be inam puyonama vutuna Mamaitua ewai aninena. ¹⁹ Be yau Mamaituama na waiguyauma nopone tauna yai maura kauana. Be aba ko marumaruabiena, tokare teneğinama e utemina Yesu Kerisoe, be ġaromie e maurana. ²⁰ Mamaitua Tamadama neneğari be kaisuğusuğū ġarone e kena be e kena nonoğā. Inam riukaua!

²¹ Tauwai sumaḡa matabudi yàwai kaiwedina. Be mate uma yau banagama ġesaudima ġarogue tawai kaiwemina.
²² Be tauwai sumaḡa matabudi uma tawai kaiwemina, be aitauḡa guyau Sisa na vadae ta noyanoyana, mate tawai kaiwemina.

²³ Be Bada Yesu Keriso na raukiviverema naumeki da nopolomie e kenana.

Tauwai sumaḡa Kolosia meagaine adi letama

¹ Taugu Pol, Mamaitua ya vinegu da taugu Yesu Keriso na apasolma, be turaguma Timoti mate, ² tauma uma letanama ka girugirumina taumi aitaugā Kerisoe tauwai sumaḡa babaumima be patupatutumima Kolosia meagaine ko miamiana ġaromie. Tamadama Mamaitua na raukivivere be na subama ġaromie e kenana.

Pol Mamaitua yai kaiwena Kolosia banegidima adi waisumaḡama aubainama

³ Tauma raġanine ka moimoiragina taumi aubaimima, raġan matabuna Bada Yesu Keriso Tamanama Mamaitua kawai kaiwa kauena. ⁴ Baninama tauma kè vaie da taumi Yesu Keriso kowai sumaġena, be tauwai sumaḡa matabudi mate kowai nuapaġoedina. ⁵ Baninama taumi noġota marae koya boruna da tokare yawasana verenama ko paġona. Be uma riukauinama taumi kaiteka koya vaiena, raġanine vari verenama a verauġe be a raraugħ guguyena raġanine. ⁶ Uma varinama ġaromie ya tavatavana, vutuna dobu matabuna e dabedaberarana, be banaga toitoi adi yawasanama e vitavitaredina. Be kauinama teneġinama nama taumi boni ġaromie ya tavatavana, taumi Mamaitua na raukiviverema koya katai kauē be ami yawasanama ya vitaredina.

⁷ Vari verena be Mamaitua na raukiviverema boni taumi koya kataiena, baninama Epapras ġaromie ya raraugħ guguyana. Epapras tauna Keriso na taunoyama patupatutunama nuamaima e paġopaġona. Tauna vutuna ya rauepaiyemi be yodi e sagusagumaina. ⁸ Be tauna yai varimai da Arua wainuapaġo taumi ya utemina.

⁹ Vutuna aubainama raġanine tauma nama kè vaivaiena, tauma aubaimima moiragi nam ke gosena. Be Mamaitua kèi baġa da na ġoanama sibo taumi yai katakataimi be Arua na nuauyauyama nopolomie sibo ya boruna. ¹⁰ Yodibe taumi koya katai kaua, da ami yawasanae nema sibo koya mia bako da Mamaitua sibo yai aninembe yai nuaverena taumi ġaromie. Be noya veredima sibo koya voiedi be votedima koyai maġataridina. Inam raġanine taumi tokare Mamaitua ko katai da ko katai kauena.

¹¹ Be mate ka moimoiragi da Mamaitua na rewapanama dosi vavasaġine e kawa rewapanimi da nuemima sibo koya

taibagina, be aba ġaromie ta tubuġana sibo koya damipore-dina. ¹² Be ma nuaveremi raġon matabuna Mamaitua koi kaiwena. Tauna vutuna ya voiemi da taumi tokare na buderie ami sikerema ko paġona, tauwai sumaġa ġesaudima na yanae ta miamiana mate. ¹³ Baninama boni tauda tadiwanawana na rewapanae tè miamiana, be Mamaitua ya kuvesida be natunama nuanama taupaġonama Yesu na waibadama nopone ya biridana. ¹⁴ Tauna vutuna kosinine ya gimerida be dà gewagewama ya noġota poredina.

Keriso taunaġa ya saġa vavasaġana

¹⁵ Mamaitua tauna nam anikitakita, be Keriso tauna vutuna na yawasanama teneġinama maika Mamaitua be tauna e maġatarana. Be Yesu tauna kaevou be yaba matabudi tauna ewai badedina, baninama tauna ya voiedina. ¹⁶ Avedi da marae bo dobue, avedi da yaba anikitakita bo nam anikitakita, avedi da anea bo penama wairewapanidima, bo guyaguyau, waibabada dosidima, yaba matabuna Yesu tauname aubainama ya voiedi da yodi ewai badedina. ¹⁷ Tauna boni noġone nama miemieninama, be muriġa yaba matabudi ya voiedi be na rewapanae ta kenakena.

¹⁸ Be Mamaitua na damma inam Keriso tubuġinama, be Yesu tauna vutuna inam dam debanama. Be tauna vutuna midisuġu munaġa yai karena guriguridima nopodie. Vutuna aubainama Keriso taunaġa ya saġa vavasaġana. ¹⁹ Yesu nophonama Mamaitua ġominama ya moġavu ²⁰ be Kerisoe, yaba matabudi be tauda, Mamaitua ya verau munaġeda be tauna ġarone ya rawateġeidana, avedi da marae miemiendi bo dobue miemienidama. Tauna vutuna kosininama korosie ya daroro be suba ya voienna. ²¹ Be taumi mate boni madanie koya miamiana raġanine, taumi Mamaitua na ġavijama, baninama ami noġotama miremiredi be ami gewagewama aubaidima. ²² Be yodi Keriso ya verauġa munaġemina Mamaitua ġarone, baninama tauna tubuġa ġominama korosie ya gurina aubainama, yodi ya voiemi da taumi Mamaitua na sedama babaumi be didimanimima tauna matane, be wavu nam ġaromie e kena. ²³ Be taumi sibo koya kaigurate da uma riukauine koya vadidina, be nam ami waisumaġama koya gose. Taumi vari verenama koya vaie da ami noġotama marae koya boruna, da tokare yawasana verenama ko paġona. Be nam nuemima e votuatuāġai da ami waisumaġe ko beku. Taugu Pol uma varinama verenama na taunoyama, be inam varinama vutuna banaga ġesaudima mate dobu matabuna a rarauguguya naġona.

Pol Mamaitua na damma adi taunoyama

²⁴ Taugu nuaveree tubuğiguma ewai nuatoitoina taumi aubaimima, baninama yau wainuatoitoie, Keriso tubuğinama yodi ewai nuatoitoina anikai ġavutinama aubainama yà sagusaguna. Be Keriso tubuğinama inam vutuna Mamaitua na damma. ²⁵ Be Mamaitua yau noyama ya uteguna da taugu riunama yà rauguguya yağedi be yà kawa mağataridina, be inam kedane yà sagumina. ²⁶ Baninama uma giunama boni da yodi semoe ya kenakenana, be banaga nam ti katakataieno. Be yodi yai mağatarina tauwai sumağā ġarodie. ²⁷ Be uma giunama taumi sibo koya katai kaue da giunama vutuna tokare banaga matabuda e sagudana. Be uma giunama semosemonama, inam vutuna yodi Keriso nopolie e miamiana, avedi da taumi eteni banegimima, vutuna aubainama taumi tokare marae Bada Yesu mate ko miana. ²⁸ Vutuna aubainama tauma dobu matabuna ka naġo be Keriso ka rarauguguya. Be Mamaitua na nuauyauye banaga ka riuriu vavasağedi be kawai katakataidina da sibo Kerisoe banaga didimanidima a tubuğana, Mamaitua matane. ²⁹ Inam vutuna taugu yau bagibagima be yà noyanoya guratana, baninama Keriso na rewapanama nopalie e noyanoyana aubainama.

2

¹ Taugu yà ġoeğoe da taumi sibo koya kataie da taugu sagumima aubainama yà noyanoya guratana. Be Laodisia banegidi be aitaugā taugu nam ti kitagu be ti kataieguna mate aubaidima yà noyanoya guratana. ² Taugu aba yà ġoeğoenä inam taumi sibo wainuapağoe koyai rawateğeimi be koyai kawa duġu vivirana, be Mamaitua sibo koya katai kaue da ami waisumağama sibo yai rewapanana. Be mate yà ġoeğoe da taumi Mamaitua riunama semosemonama sibo koya katai kauena. Be riunama semosemonama, inam vutuna Keriso, ³ tauna ġarone nuauyauya be katai matabudi ta kenakenana. ⁴ Uma kauidima yà riuriuemina da tokare nam aitau adi giu ġaroroe sibo a boru waideğemi. ⁵ Avedi da taugu nam taumi mate, be arue yağoro taugu taumi mate. Be yàwai nuavere kauana da ami waisumağama Keriso ġarone koya boru be tauna na sague ko midimidi bagibagina. Inam nama raġan matabuna ko miana.

Waikatakatai kaikaiyovudima nam koi muriwatani

⁶ Taumi kaite Yesu Keriso koya paġo da tauna Bada nopolie e miamiana. Vutuna aubainama taumi raġan patapatanama Keriso na yawasanae nama sibo koya miana. ⁷ Be waramimima tauna nopolie e yovo da ei yasi kaididi, be

ko kaigurate da ami waisumağe koi rewapanana, maika boni awai katakataimina nama. Be Mamaitua waikaiwenama nam ko gose.

⁸ Ko kita kaua da nam aitau adi giu īgarōgaroroe ta gwayemi be ta boru waideğemi. Baninama taudi adi waikatakataima inam nam Kerisoe tima veraverauna, ibewa. Inam waikatakataidima matabudi dobu adi waikatakataima, be arua gewegewedima banaga adi noğote ta sağa be uma banegidima adi banagama tawai katakataidina. ⁹ Be Keriso nponama Mamaitua ya moğavuna, be Mamaitua īgominama tauna nam anikitakita, be Keriso tubuğine Mamaitua ewai mağatarina. ¹⁰ Be teneğinama nama Kerisoe taumi mate Mamaitua na yawasanama nopomima ya moğavuna. Be Keriso yaba matabuna wairewapanidima be Seitan be babada dosidima matabudi debedie, Keriso tauna vutuna ewai badana. ¹¹ Rağanine taumi Keriso koyawai sumağena, dobudine taumi kopitom arue koya pağona, be nam kopitom īgoma tubuğimima ta tomtomna nama, ibewa da Yesu ami gewagewama ya tom porena, ¹² baninama ami babataitoe, inam taumi Keriso mate a dobo tenağemina. Be mate Mamaitua na rewapanae gurie be ya kawa midisuğu munağemina ami waisumağama aubainama. Teneğinama nama Mamaitua Keriso gurie be ya kawa midisuğu munağena.

¹³ Boni taumi ami gewagewama aubainama koya gurina, baninama ami gewagewama yağoro nam tomtom porena. Be mate babataitoe Mamaitua taumi Keriso mate yai yawasana tenağemina, be ami gewagewama ya noğota poredina. ¹⁴ Baninama dà gewagewama pepanama e riuriu da tauda Yesu na etare sibo tè midina, be Mamaitua inam pepanama ya kaipore be korosi bogane ya tuparatuna. ¹⁵ Mamaitua inam kedane Seitan be penama wairewapanidima matabudi nimedie īavia purepuredimaya rawadaberaridina, be patara matedie korosie Seitan be penama yai tunimayağidina.

¹⁶ Vutuna aubainama aba ko kanikani bo ko tegotegona, nam aitau e riutuağaiemi, bo taparoro rağandima dosidima bo Sabat rağandima değoda nam koi muriwatanedi, bo nawaravi soidima nam koi muriwatanedi, dobudine nam aitau sibo ya riutuağaiemi. ¹⁷ Uma kauidima matabudi inam yawasana muriğda e verauna, be keyau kavanağtaudi awai muriwatanedina. Be Keriso tauna vutuna yodi yaba bani īgominama. ¹⁸ Banaga kaikaiyovudima taudime ta voiedi da kabe voyağota banegidi, be raubonie anea ta kitekitedi be ta riuriu vavasağemina da taumi sibo anea koya rarau duneedina. Ko kita kaua da uma banegidima nam ta boru waideğemi, baninama adi noğotama miremiredima ya

voiedi da taudi moraba nopolima ya moḡavuna.¹⁹ Taudi Keriso a raukaigosena, tauna vutuna Mamaitua na damma debanama. Be Keriso ya voie da Mamaitua na ġoane na damma ya moraba be yai rewapanana. Maika nama debadama tauna tubuġidama e raberabena nama. Be mate waro tubuġidama matabuna e kaikaididi tenaġena.

²⁰ Taumi Keriso mate koya guri tenaġana, be tauna uma dobune arua gewegewedima adi rewapanae be ya kuvesimina. Be aba aubainama taumi yaġoro uma dobunama tarawatudima kowai muriwatanedi. ²¹ Maika: “Uma nam ko voiedi!” bo “Nam ko kanidi!” bo “Nam ko taukonidi!”. ²² Uma yabedima matabudi banaga ġoma adi tarawatu be adi waikatakataima. Inam yabedima raġan ġaubonaġa tài muriwatenedina, be tokare tài kave mu-naġedina. ²³ Inam tarawatudima anikitedima maika kabe yaba veredi, raudune aubainama, uma banegidima taudime tubuġidima ta kovokovoġa munaġedi, be uma kauidie ta voivoia munaġedi da taudi kabe voyaġota banegidi. Be uma yabedima matabudi kaikaiyovudima, taumi a voiemi da nopolima ai moḡavuna. Be uma yabedima tokare nam ta saguda da tubuġa ġoendima tà vaisubedi.

3

Nema Keriso sibo tēi muriwatana bake?

¹ Be taumi Kerisoe gurie be ya kawa midisuġu mu-naġemina. Vutuna aubainama yodi marae, dego Keriso e miamiae, Mamaitua kasaune, dabudi taumi nuenuemima sibo a kenakenana. ² Be mate ami noġotama nam yaba dobue koi nuanoġonogoġotedi, ibewa da yaba marae koi nu-anogoġonogoġotedina. ³ Baninama taumi koya gurina, be ami yawasanama yodi Keriso mate Mamaitua nophone ya moisi-rina. ⁴ Keriso vutuna ami yawasanama ġarone e kenakena. Raġanine tauna na kaba verau munaġe, taumi tokare tauna mate neneġarine ko yana tenaġana.

⁵ Vutuna aubainama dobu adi yawasanama gewegewedima ġaromie ko tom poreporedina. Uma yabedima inam: Waisoġa yababayaba, yawasana miremiredima, badara, ġoana gewegewedima. Be waigogo mate, inam kauine taragaie Mamaitua na gabuma kowai gabu raupunana. Be taragai tawai rawakokoitauna. ⁶ Banaga aitauġa inam yabedima ta voivoiedina, tokare Mamaitua na medima ġarodie e tubuġana. ⁷ Boni taumi nam kowai sumaġana raġanine, taumi mate inam yawasanidima koya voivoiedina. ⁸ Be yodi nuaġoraġora, medi, nopolikapika, waitupadeġa be giu waibeawarewaredima, matabudi ko gose poredi. ⁹ Be nam

ami banagama ami banagama ġarodiġa koi tupadeġa naġo, baninama taumi ami yawasana poranama na voiama kaite koya gosena,¹⁰ be yawasana vaunama koya kotena. Inam vutuna Keriso raġan patapatanama e rawarawa vaudana. Inam kedane dà yawasanama tokare tenegħinama maika yawasana tauwai tubuġinama na yawasanama e ruvana maika.¹¹ Inam yawasaninama vaunama nopone tauda banaga matabuda namaġa. Avedi da tauda etenī bo Jius, bo kopitom banegida bo nam kopitom banegida, avedi da tauda banaga nam katakataida bo taunoya yababa, bo taunoya adi babadama. Tauda matabuda Mamaitua matane inam teneteneġinaġa, baninama Keriso tauna matabuda nopode e miamiana.

¹² Be mate ko noġoti da taumi nuaguma taupaġonāma be Mamaitua ya vinemi da yodi taumi banaga babaumima. Vu-tuna aubainama uma yabedie sibo koyai garemina: Raunuatoj, raukivivere, ġaubomunaġa, voyaġota be damiporaġa.¹³ Be taumi sibo ami banagama mate koyai kawa voyaġota vivira, be noġotaporaġa ġarromie sibo ya kenana ami banagama ami banagama mate, nema Bada ami gewagewama ya noġota poredina nama.¹⁴ Be waigesuunama yaba matabuna ya saġa poredina inam wainuapaġo. Inam vutuna yaba matabuna e soru gogonidi be wainuapaġoe ewai rawateġeidina.

¹⁵ Bada Keriso na subama nopomie e kena be ei bademina, baninama taumi matabumi tubuġa tenaġa. Inam vutuna aubainama Mamaitua ya vinemi da taumi na subae ko miana. Be Mamaitua koi kaiwena.

¹⁶ Be Keriso riunama nopomie e moraba be e maura! Yodibe nuauyauyae banaga koi katakataidi be ko raukuredina. Be ma waikaiwimi Mamaitua ġarone ko sarena, sare Salamo nopolie, kaisuġu saredi be aba Arua e riuriuemina, nama ko sarena.¹⁷ Be abaġa ko giuguedi bo ko voivoiedina, matabuna sibo Bada Yesu isane koya voiedina. Be tauna isane Mamaitua Tamadama koi kaiwena.

Bada isane koi bada kauana

¹⁸ Taumi waiwaivi ami tautauġomama adi waibadama dibune ko mia! Uma kauinama nama Bada matane inam ya vere kauana.¹⁹ Taumi tautauġoma ami waiwaivima koi nuapaġoedina, be nam ko riu badobadoedi.²⁰ Taumi seda ami dosima ko voteyeteyedina. Baninama Bada e ġoegħoe da nama sibo koya miana.²¹ Taumi dosi ami sedama nam ko kawa nuaboyerdi da taudi ta sirawa.

²² Taumi taunoya yaba matabuna ġarone ami babadama ko voteyeteyedina. Be taumi nam ami babadama anitai nuaveredima aubaidima ta kitekitemi be noġonairidie ko noyanoya. Inam avedi, be nuemima tabutabune ko voteyeteyedina Bada Yesu anitai nuaverenama aubainama. ²³ Raġan matabuna aba ko voivoiedina, nuemima tabutabune ko voiedina. Inam nam banaga ġoma aubainama koma noyanoyana, ibewa da inam Bada aubainama ko noyanoyana. ²⁴ Be ko noġoti da ami noyama maesinama Bada tokare na buderima e utemina. Taumi vutuna Bada Keriso ġominama ko noyenoyena. ²⁵ Be deġoda yawasana barabaranama ko voiena, tokare maesinama kovoġa ko paġona be nam buderi. Aba gewagewanama koya voivoiena, tokare Mamaitua ruvane e utemina, avedi da taumi banaga dosimi bo nam dosimi, tokare teneġinama ko paġona.

4

¹ Babada, ami taunoyama ko kita yaġedi be yaba na didimanae ami taunoyama ġarodie ko voiena. Be ko noġoti da matabumi ami Badama marae e mia be matabumi e rawarawa tetemina.

Bada na ġoane ko miana

² Raġan matabuna koi neneġana, be ko kita kaua da Mamaitua ġarone ko moiragi nonoġama waikaiwa mate. ³ Be mate tauma aubaimaima ko moiragi da Mamaitua keda e kaipore be tauma Keriso na giūma ka rauguguyena. Uma giunama boni semoe ya kenakenana, be yodi ya maġatarana. Be banaga uma giunama vaienama nam ti ġoena aubainama, taugu dibure a boruguna. ⁴ Be mate aubaiguma ko moiragi da taugu vari verenama sibo è rauuguguya yaġena. ⁵ Banaga nam waisumeġidima ġarodie koi kita kaua da ami yawasanama didimanidiġa taudi matedie ko voiedina. Inam raġandima vutudi nam koi yakaredi, taumi sibo Keriso na yawasanama inam banegidima nam waisumeġidi sibo koya waikataidina. ⁶ Raġan matabuna ami giūma veredīga ko giu da banaga matabudi beedie vaienama e verena. Ami giūma sibo raġan matabuna dini boruborunama, maika buta kani e tatai dinina nama. Yodibe taumi tokare banegidima aba ta kaikai nuababaġena ko giu waibatedina.

Waikaiwa damodamodima

⁷ Taikikas tauna vutuna yodi nema yà miamia bakona, tokare ei varimina. Tauna banaga patupatutunama Bada matane, be mate taukai saguguma be nuaguma tau-paġonama. ⁸ Taugu yà riuriuporena ġaromie da tauna nema

yà miamia bakona sibo yai varimina, be mate tauna e duğumina. ⁹ Be Onesmas tauna tauwai sumaǵa patupatutunama, be nuaguma taupaǵonama, tauna Taikikas mate ta veraverauna ǵaromie. Be taudi uma dabudine aba ta tubutubuǵana tokare tai varimina.

¹⁰ Be Mak tauna e waikaiwemina. Be turaguma Aristakas uma dibure mate ewai kaiwemina. Mak tauna vutuna Banabas tasinama,* be raǵanine ǵaromie e tavana, ko riue da ǵaromie e miana. ¹¹ Be Josua tawai isana “Jastas” tauna mate ewai kaiwemina. Tauwai sumaǵa Jius nopolidie inam banegidiǵa taugu ta sagusaguguna Mamaitua na waiguyauma aubainama. Taudi vutudi taugu dibure be a riuriu sagusaguguna. ¹² Be Epapras taumi ǵaro ǵomimima mate ewai kaiwemina. Tauna Yesu Keriso na taunoyama verenama, be raǵan matabuna e moimoiragi guratana aubaimima da taumi sibo ami waisumaǵe koya vadidi da koya midi be Mamaitua na ǵoanama sibo koya katai kauena. ¹³ Taugu yà riuriu kauemina da Epapras tauna e moimoiragi be e noyanoya guratana, taumi Laodisia be Hirapolis† banegimima aubaimima. ¹⁴ Be turamaima Luk tauna dogeta, be Demas, taudi matabudi tawai kaiwemina. ¹⁵ Be yau banagama tauwai sumaǵa Laodisia nopone ko riuedi da yàwai kaiwedina. Be Nimpa na vadae Mamaitua na damma tawai rawateǵeidina mate yàwai kaiwedina.

¹⁶ Raǵanine uma letanama ko siasiava rovona murine, ko riupore nawena Mamaitua na damma Laodisiama ǵarodie be taudi ta sievina. Yodibe taudi adi letama è girugirumina, ta riupore verauǵena ǵaromie da taumi ko sievina.

¹⁷ Be Arikipas umanama ko riuena, “Noya Bada ǵarone kuya paǵopaǵona kwa kaigurate da kwa raudamoena, be nam poune kwa gose pore.”

¹⁸ Uma letanama nopone waikaiwa, inam taugu Pol nima ǵomigue è girumidina. Ko noǵotigu da taugu dibure yà miamiana, be nam ko noǵota poregu. Be Bada na rauki-viverema ǵaromie e kenana.

* **4:10:** Gurik bonane ya riuna: ‘Cousin’. † **4:13:** ‘Laodisia’ be ‘Hirapolis’ inam meagai isedima.

Tesalonaika 1 adi letama pakanama

Pol na waikaiwama

¹ Taugu Pol, Saelas be Timoti uma letanama ka girugirumina taumi aitaūga Mamaitua na damma Tesalonaika meagaine ko miamiana ġaromie. Mamaitua Tamadama, be Bada Yesu Keriso taumi ġaroġaronama. Taudi adi raukiviverema be adi subama ġaromie e kena nonoġana.

Pol Mamaitua ewai kaiwena, Tesalonaika banegidima adi waisumaġama aubainama

² Tauma raġan matabuna ama moiragie isemima ka vato be Mamaitua ka waikaiwa kauena, ³ baninama waisumaġa e voiemi da ko noyanoyana, be wainuapaġo e voiemi da yaba matabudi ko voivoiedina. Be ami noġotama Bada Yesu Keriso ġarone koya boru be kowai raba nuetauna Bada na kaba verau munaġama aubainama.

⁴ Yau bana, tauma kè kataie da Mamaitua yai nuapaġoemi be ya vinemi da taumi tauna ġaroġaronama. ⁵ Baninama tauma vari verenama ġaromie kè rarauguguyena nam giuġa, ibewa da rewapano mate, be nuemima nopone Arua Babau ya riuemi da inam matabuna riukaua. Be tauma taumi mate nema tè mia bakona ama yawasanama, taumi koya kataiena, ⁶ be tauma be Bada ama yawasanama taumi koya ruvedi be nama kivimaiġa ko naġonāġona. Avedi da ami piripirima dosinama, be yaġoro Arua Babau ya voiemi da vari verenama ma nuaveremi koyai aninena. ⁷ Vutuna aubainama tauwai sumaġa Masedoniam be Akaia nopone mataira veredima ġaromie a kitedi, be nama ta naġonāġona. ⁸ Be yodi Mamaitua na riuma taumie e dabedaberarana banaga matabudi ġarodie be dobu ġesaudie mate ta vaivaiena. Be deġo deġo ka naġonāġona, taumi ami waisumaġama Mamaitua ġarone, taudi ta giuemai be ka vaivaiena. Be tauma nam aba taumi varimima taudi kama riuriuedina. ⁹ Taudiġa taumi ami yawasanama ta giugiuena da taumi nema tauma koyai aninemaina, be nema kokoitau rauduneedima koya gosed, be Mamaitua riuriukauina be miamia nonoġinama yodi kowai muriwatane be aubainama ko noyanoyana. ¹⁰ Be mate taudi ta giugiuna da taumi kowai raba nuetauna da Mamaitua Natunama marae be e verau munaġana. Tauna vutuna Yesu, gurie be Mamaitua ya kawa midisuġu munaġena. Mamaitua na medima e

veraverauna sibo ya kovoğidana, be Yesu tauna vutuna ewai yawasanidana.

2

Pol Tesalonaika nopone ya noyana

¹ Yau bana, taumi koya kataiena da rağanine tauma taumi mate tè miamiana, inam nam miana kavakavana, ibewa da ama mianama banibiribiridima. ² Muriğda vari verenama ġaromie kè rauguguyena, tauma piripiri be wainuatoitoi dosinama Pilipi meagaine kè banavidina. Be avedi da banaga toitoi patara noğodie, matamaie a raukani dawe be a kunukunuremaina, be yağoro Mamaitua ya sagumai be vari verenama kè rauguguyena ġaromie. ³ Tauma kè rarauguguyana rağanine, tauma nam kaiyovu ke giue bo nam aiyaba ke voia waigewa be kei kedadoka waigewemina.

⁴ Ibewa da tauma Mamaitua yai aninemai be ya vinemai da vari verenama ka rarauguguyana. Be tauma nam banaga noğonairidie ke rauguguya gagabana. Ibewa da Mamaitua aniwai nuaverenama aubainama kè rarauguguyana, baninama tauna vutuna nopo taukitanama. ⁵ Mamaitua ya kataiena da tauma nam airağan ke gwayemi bo ke giugiu regareğäuna da mane sibo koya utemai. ⁶ Be mate tauma nam kawasağe kedanama ke wanewanena da taumi be banaga ġesaudima mate sibo koya kawa sağemai, ibewa. ⁷ Tauma Keriso na apasolma. Vutuna aubainama tokare teneteneğinama aba ġaromie sibo kè pağona, be tauma nam nama ke voiana, tauma inam maika tina, natunatunama e raberabedi be nam aiyaba na sedama ġarodie ima pağopağona. ⁸ Taumi nuamaima koya pağona aubainama, tauma nam Mamaitua riunağda ke giuena ġaromie, ibewa da tauma kèi uta munägemai be aubaimima ka noyanoyana.

⁹ Yau bana, ko noğoti da tauma kupi da suara Mamaitua riunama verenama rauguguyenama aubainama, be tauma tunimaima kè kwapu guratena, be nam kewai vadasağana da sibo kè tainuaboyemi. ¹⁰ Taumi matemie be Mamaitua matane tauma banaga babaumai, didimanimai be nam aiyaba ke voia waigewana da taumi tauwai sumağda sibo koyai wavumai. ¹¹ Be ko noğoti da tauma tenatenağäga kè rabemina, maika tauğoma na sedama e raberabedina nama. ¹² Tauma kè rarauguguyana kuremi, kè riuwai nuasubesubemi be kè riu vavasağemina da taumi Mamaitua na sedama be na ġoane nama ko miana, baninama tauna ya vinemina da taumi tokare na waiguyauma neneğärine ko miana.

¹³ Be tauma yağoro Mamaitua kawai kaiwena, baninama taumi Mamaitua riunama ġaromae koya pağda be koyai

aninena. Taumi koya kataienā da inam nam banaga ġōma adi giu, ibewa da inam Mamaitua na giuma. Be yodi inam giunama taumi aitaūga tauwai sumāga, nopomie e noyanoyana.

¹⁴ Be yau bana, taumi Mamaitua na damma Judia nopone koya ruvedina, baninama taumi piripiri ami banaga ġōmama ġarodie koya banabanavidina, teneğinama nama Mamaitua na damma Judia nopone taudi piripiri Jius ġarodie a bana-vidina.

¹⁵ Jius banegidima taudi vutudi peroveta be Bada Yesu ai guridina, be tauma mate a raukivi gewegewemaina. Taudi Mamaitua ta tatai tuaġai, be banaga matabudi tawai ġaviedina. ¹⁶ Be raġon matabuna taudi ta riuriu tuaġaiemaina da tauma nam sibo vari verenama eteni ġarodie kē rarauguguye da sibo a yawasana. Inam kedane taudi adi gewagewama ta tatai potopotodina. Vutuna aubainama Mamaitua ya medi be adi kovoġama ya utedina.

Pol Tesalonaika banegidima vakitedima ya ġoena

¹⁷⁻¹⁸ Yau bana, tubuġe taumi raġon ġaubonaġa kē tau-gosemina. Be ama noġote yaġoro tauma taumi mate, be kē ġoe kae be kē raraubu rubu guratana da sibo kē verauna ġaromie. Be mate taugu Pol ē raraubu rubu gurata da sibo ē vakitemina be Seitan ama kedama ya miditomna. ¹⁹ Yesu Keriso na kaba verauma raġonine aiyaba Bada kai katai da tauma taunoya veremai? Tauma tokare taumi ami waisumaġa vutuna tauna kai kataienā. ²⁰ Baninama taumi inam ama noyama votanama, be taumie tauma tokare ka kawa saġemaina.

3

¹ Tauma varimima vaienama kēi raba rereġa da ġaromaie nam teneteneğina, vutuna aubainama ama ogama kē taraġi da taumaġa Atensma kē miana ² be Timoti kē riu porena ġaromie. Timoti tauna turamaima, Mamaitua na taunoyama. Tauna Keriso varinama tauwai daberarinama, be kē riuporena ġaromie da ami waisumaġe e duġumi be koi rewapanana, ³ be ami waisumaġe e sagumi da nam aitaūraurubue bo piripirie kwa beku. Mamaitua ya vinedana da tauda tokare piripiri tà banavidina. ⁴ Tauma taumi mate tē miamiana raġonine, tauma raġon patapatanama kē riuriuemina da tokare piripiri tà banavidina. Be yodi aba ta tubutubuġona taumi kaite koya kataienā.

⁵ Vutuna aubainama taugu ē mia rereġa be ġarogue nam teneteneğina, vutuna aubainama Timoti ē riuporena

garomie da ami waisumağama sibo ya kitana. Taugu nuaguma ya rovona, değoda tauraurubu ima raurubumi be ami waisumağe koma bekubeku. Değoda nama i tubuğana, naumeki da tauma ama noyama inam këi yakarena, be inam noya kavakavanama.

Timoti Tesalonaika varidima ya verauğena

⁶ Be Timoti yodi garomiae ya tava munağä be yai varimaina da ami waisumağä be ami wainuapağoma yağoro e kenakena be ewai rewapanana. Tauna yai varimaina da taumi dokane kë vava kitemina yağoro ma nuaveremi ko noğonogötina, be yodi ko noğonogötä guratemaina da sibo kë vakita munağemina. Be tauma mate ka noğonogötä guratemina da sibo kë vakita munağemina. ⁷ Vutuna aubainama yau bana, avedi da tauma nuaboya be piripiri toitoi nopodie, be rağanine Timoti ami waisumağama yai varimai be kë vaivaiena, tauma nuamaima ya subana. ⁸ Yodi anikitanama rewapanana kë pağona, baninama taumi ami waisumağama Bada garone koya boru be ko midimidi bagibagina.

⁹ Vutuna aubainama tauma yodi Mamaitua kawai kaiwena, baninama taumie tauma Mamaitua matane kawai nuaverena. ¹⁰ Kupi da suara tauma ka moimoiragi guratana da taumi agunai ka kita munağemina, be ami waisumağe aba da ko marumaruabiena ka sagumina.

¹¹ Tauma ka moimoiragina da Tamadama Mamaitua be dà Badama Yesu keda sibo a yokaukaue be tauma kë verauna garomie. ¹² Be mate Bada Yesu ami wainuapağoma sibo yai morebi be ya daberarana banaga gesaudima mate garodie, maika nema tauma kawai nuapağemina nama. ¹³ Be mate tauna nopomima sibo ya voiedi da ai rewapanana be taumi banaga babaumima sibo koya tubuğana. Be Bada Yesu na banagama babaudima mate adi kaba verau munağama rağanine, taumi nam wavu sibo garomie ya kena Tamadama Mamaitua matane.

4

Mamaitua na ġoane ko miana

¹ Yau bana, tauma ka riuriuemina da nema sibo koya mia bako da Mamaitua koyai nuaverena. Tauma kaite kë kataiena da taumi nama ko miamiana, be yağoro Bada Yesu isane kawai bağemina da inam yawasaninama ko kaiguratena. ² Abağä Bada Yesu isane kewai katakataimina, vutudi ko noğotidina!

³ Mamaitua na ġoanama inam umanama: Taumi sibo banaga babaumima koya tubuğana. Nam koi soğä yababayababa ⁴ be mabimime ami waiwaivima ko nağidi be Mamaitua

matane ami waiwaivima taudīga ġarodie sibo koya mia kauana.⁵ Be nam ko badara yababayaba eteni banegidima maika, taudi Mamaitua nam ti kataiena aubainama nama ta voivoiana.

⁶ Be turamma nam debane mui kwa pore, bo turamma na waivima aikedae taunaġa kuya banavina, nam noġotā gewagewa kwa kote. Banaga aitauġa inam nama ta voivoiana, tokare Mamaitua e kovoġidina. Uma kauidima maiġone kē giuem i be nuemima kē boruna.⁷ Mamaitua ya vinedana da tauda banaga babaudama sibo tē miana, be nam sibo yawasana miremiredie tē miamia, avedi.⁸ Vutuna aubainama aitau da uma tarawatudima e riuntuatuaġaiedina, tauna nam banaga ima riuriu tuaġaiena, ibewa da Mamaitua e riuriu tuatuaġaiena, tauna vutuna Arua Babau e uteutemina.

⁹ Be wainuapaġo aubainama tauma nam aba ke girumina, baninama Mamaitua kaite yaba matabuna yai kataimi¹⁰ be taumi tauwai sumaġa Masedoniamma kowai nuapaġoedina. Be ka riuriu vavasaġemina da inam kauinama ko kaiguraten. ¹¹ Be taumi sibo koya mia genuana be koya rabe munaġemina. Be nimemima sibo yai dagudaguna anisagħimma aubainama, maika boni kē riuriu vavasaġemina nama. ¹² Inam kauine banaga nam waiwaisumeġidi taudi ta kitemi be ta viviremina, be nam banagaġa nimedima ko raberabe da ko tainuaraġeraġedina.

Bada na kaba verauma

¹³ Yau bana, tauma ka ġoeġoena da taumi banaga guriguridima adi riukauama sibo koya kataiena. Inam raġanina taumi tokare nam koyai nuaboya be koya ġaba gurata, banaga nam waisumeġidi adi voiama maika, baninama taudi tokare nam marae ta naġo. ¹⁴ Tauda tħawri sumaġħana da Yesu Keriso gurie be ya midisuġu munaġħana. Be mate tħawri sumaġħana da aitauġa Yesu Kerisoe a gurigurina taudi tokare Yesu mate, Mamaitua e verauġa tenaġđedina.

¹⁵ Bada na waikatakataie umanama ya riuna: Na kaba verauma raġanina tauda yawayawasanidama nam banaga guriguridima tħad doka sasaridi. ¹⁶ Bada na kaba verauma raġanina, Mamaitua bonanama dosine e riuna, be anea adi badama dosinama e yokona, da Mamaitua na bogigima e riuna. Inam raġanina Bada mara e gose be e yovona. Inam raġanina tauwai sumaġa guriguridima ta midisuġu dokana,¹⁷ yodib tauda yawayawasanidama mate gunume tħalli rawateġeida be Bada tħallu verau bodena. Dabudine tauda Bada mate tħalli rawateġeida be tħallu mia nonoġħana.¹⁸ Vutuna aubainama una giudie ami banagħam ko riuwai nuasbesubedina.

5

¹ Yau bana, tauma nam tokare ġaromie ka giruma be ka riuemi da aba raġandie uma kauidima ta tubuġa. ² Ibewa da taumi sibo koya katai kauena da Bada na kaba verauma inam banaga danedanenena ma kipie e tavatavana maika. ³ Yaba matabuna e kenakena nuetauna raġanine, banaga ta riuna, "Yodi suba tè banavina, be yaba matabuna inam naumeki." Inam raġanine ei raġantena ġe da gewagewa tabu be tabu dobu matabuna ei verautatena. Maika waivi bogabogana kana tauma e surusuruna nama. Inam raġanine nam deġo aniwai moisiri ima kenakenana.

⁴ Be yau bana, taumi nam tadiwanawanae koma mi-amiana da uma raġaninama sibo ya tainuababaġimi, tau-danedanene maika. ⁵ Taumi matabumi yana natunatuna-nama, be tauda nam kupi bo tadiwanawana natunatuna. ⁶ Vutuna aubainama tauda nam sibo banaga keneke nedima tè ruvedi, ibewa da tauda sibo matadama a kaya be noġota didimanidima debade sibo a kenana. ⁷ Be aitaugħa da keneke nedima taudi kupie ta kenakenana, be taudi aitaugħa tegotego buedima taudi kupie ta tegotego buana. ⁸ Be tauda yana ġaroġaronama aubainama, tauda sibo noġota didimanidima debade sibo a kenana. Vutuna aubainama waisumaġa be wainuapaġo tāi kade, be ami yawasanama Bada ya uteutemina koi kunuboboena. ⁹ Baninama Mammaitua ya vinedana da tauda nam na medie kovoġa sibo tè banavi, ibewa da dà Badama Yesu Kerisoe yawasana sibo tè paġona. ¹⁰ Tauna aubaidama ya gurina aubainama. Na kaba verauma raġanine, avedi da tauda gurigurida bo yawayawasanida, tauda matabuda tauna mate tā mia nonoġana. ¹¹ Vutuna aubainama Bada riune koi kawa duġu vivira be koi rewapanana, maika yodi ko voivoiena nama.

Pol na raukurama damonama

¹² Yau bana, aitaugħa Bada na noyae tawai badana, taudi ko viviredina, baninama taudi ġaromie ta noyanoya guratana, be ta rarau kuremina. ¹³ Koi nuapaġo guratedi be ko vivira kauedina, baninama ta noyanoya guratana aubainama. Be ko kita da ami banagama mate subae sibo koya mia kauana.

¹⁴ Be yau bana, ka riuriu guratema da aitaugħa matagayagayawidima ko riuwai noġotidina, be aitaugħa moġimōġiġidima ko riu sagusagudina, be aitaugħa adi waisumaġe ta vovo gwaġagwaġana ko sagudina. Be ami banagama mate ko voyaġota vivirana.

¹⁵ Be ko kita da nam aitaū gewagewa, gewagewae ei maesi. Raġan matabuna ko raurubu da vereġa ami banagama ami

banagama ġarodie ko voiedina, be banaga ġesaudima ġarodie mate.

¹⁶ Raġan matabuna koi nuaverena! ¹⁷ Ko moiragi nonoġana raġan matabuna! ¹⁸ Abaġa ġaromie ta tubutubuġana, raġan matabuna Mamaitua koi kaiwena! Inam vutuna Mamaitua na ġoanama taumi aitaugħa Yesu Keriso tauwai sumaġenama ġaromie.

¹⁹ Arua Babau kai maika e karakaratina, nam koi tiriri gaba! ²⁰ Aitaugħa tawai perovetana, nam ko riutuatuġaiedi, ²¹ be adi giu ma matabuna ko raurubudi da ko kitana, inam riukaua bo ibewa. Veredima da ko ragaudina, ²² be gewegewedima da ko gosaġħana.

Pol na waikaiwa damonama

²³ Mamaitua tauna vutuna suba Badanama, tauma kawai baġana da tauna sibo ya kawa babaumina. Be mate kawai baġana da aruimima, noppomima be tubuġimima nam wawu e paġo, naumeki da Yesu Keriso dà Badama na kaba yovo munaġama raġaninama e tavana. ²⁴ Tauna patupatutunama ya vinemina da tokare nama e voienā.

²⁵ Yau bana, aubaimaima ko moiragina.

²⁶ Wainuapaġoe ami banagama koi kaiwedina.

²⁷ Bada isane yà riuriu vavasaġmina da uma letanama tauwai sumaġa matabudi ġarodie ko sievina.

²⁸ Dà Badama Yesu Keriso na raukiviverema ġaromie e kenana.

Tesalonaika 2 adi letama wairabuinama

Pol na waikaiwama

¹ Taugu Pol, Saelas be Timoti uma letanama ka giru-girumina, taumi aitaūga Mamaitua na damma Tesalonaika meagaine ko miamiana ġaromie.

Mamaitua Tamadama, be Bada Yesu Keriso taumi ġaroġaronama. ² Mamaitua Tamadama, be Bada Yesu Keriso adi raukiviverema be adi subama ġaromie e kenana.

Etara Yesu na kaba verauma raġanine

³ Yau bana, tauma raġan matabuna Mamaitua kawai kaiwena taumi aubaimima. Be inam nama ya verena, baninama ami waisumaġama e moramoraba be ami wain-uapaġoma ami banagama ġarodie mate e moramorabana.

⁴ Vutuna aubainama Mamaitua na damma dobu ġesaudima ġarodie, tauma ka rarauguyauemina. Baninama taumi ġaromie piripiri be nuaboya a moraba kauana, be yaġoro taumi koya damiporedi be ami waisumaġe yaġoro ko kaikai guratena. ⁵ Mamaitua na waiguyauma kana taiye, taumi nuaboya be piripiri ko banabanavidina. Be uma nuaboyedie be piripiridie tauda yodi tà kita da Mamaitua na etarama, inam vutuna didimana. Baninama inam kedane e vovo kaukauemina, na waiguyauma aubainama, da tokare na waiguyauma nopone ko saġana. ⁶ Mamaitua banaga adi kovoġama tokare e utedina, vutuna aubainama aitaūga taumi ta raraukivi gewegewemina, taudi tokare e kovoġidina. ⁷ Be Bada gunume e maġatara be e yovovona raġanine, taumi aitaūga yodi piripiri be nuaboya ko banabanavidina, tokare suba be sipere Mamaitua e utemina. Be tenegħinama nama tauma e utemainā raġanine, Bada e maġatara be e yovona kai menamenanama maika, na aneama wairewapanidima mate. ⁸ Be taudi aitaūga Mamaitua nam ti kataie be dà Badama Yesu na giumenti nam tima vovo teyeteyena, taudi tokare e kovoġidina. ⁹ Taudi Bada na rewapanama be na yanama ta dobi pore ġavoe be kovoġa kenakena nonoġinama ta paġona. ¹⁰ Be tauwai sumaġa babaudima matabudi inam raġanine tai nuaverena, be isanama ta kaisuġusuġuna. Be taumi mate, baninama ama rauguguyama koya vaie be koyai sumaġana.

¹¹ Mamaitua ya vinemina da taumi tauna natunatunama. Vutuna aubainama ka moimoiragina da raġan matabuna Mamaitua matane, taumi sibo na ġoane nama koya mia

kauana. Be mate ka moimoiragina da Mamaitua rewapana e utemi da ami waisumağe aba veredima ko noğonogötidina, vutudi sibo koya voivoiedina.¹² Inam rağanine taumie da banaga matabudi tokare Bada Yesu isanama ta kaisuğusuğu, be taumi ta viviremina nama Yesu ta vivirena. Inam kauidima Mamaitua be Bada Yesu Keriso adi raukiviverema aubainama nama ta tubutubuğana.

2

*Mamaitua tauwai ġavienama**

¹ Yau bana, Bada Yesu Keriso na verauma, be nema tauda mate tài rawateğei bakona, vutudi ya riuemina. ² Nam aitau e riuwai gusumi bo e tainuaboyemi be umanama e riu, “Bada na rağanima kaiteka ya tavana.” Avedi da taudi rauboni kaikaiyovudie adi giuma kabe ti pağopagō, bo tauma kabe leta kè girumi be umanama kè riuriuedi, “Bada na rağanima kaiteka ya tavana.” Inam matabuna kaiyovu.

³ Nam aitau ei buemi be koi sumağe.

Bada na rağanima nam tokare e tava makai. Noğone banaga toitoi adi waisumağama ta gosedi be Mamaitua ta mia tautauriena. Inam rağanine Mamaitua tauwai ġavienama e mağatarana. Tauna vutuna gewagewa tauwai tubuğidima. ⁴ Tauname e kawa sağe munağe, be Mamaitua be yaba matabudi banaga ta raraу duneedina e riutuatuağiedina, be Mamaitua na tempolma nopone e sağda e mia, be tauname e riu munağe be e riuna, “Taugu vutuna Mamaitua.” ⁵ Ko noğoti da taugu taumi mate tè miamiana rağanine, uma yabedima matabudi è riuwai nonoğimina. ⁶ Be Mamaitua tauwai ġavienama yodi sibo ya verauna, be aba inam baneginama e kaididi be e raberabena, taumi koya kataienia.

⁷ Mamaitua taumia tautaurienama na rewapanama kaiteka mareğe waimoisirie e noyanoyana, be aitau da taukaididinama ya kaididi be e raberabena, naumeki da na rağanima boruborune, e raukai gose be e variana. ⁸ (v8a) Yodibe inam baneginama Mamaitua tauwai ġavienama e mağatarana. ⁹ Mamaitua tauwai ġavienama tauna tokare Seitan na rewapanae e mağatara da Seitan na noyama e voiedina. Be Seitan rewapanae e ute da inam baneginama voia be mataira dosidima e voiedi da banaga sibo ya kaiyovuedina. ¹⁰ Be yaba toitoi e voiedi be banaga kwakokwakodima e boru waideğedina, baninama taudi Mamaitua na riukauama a tuağiae, be nam ti sumağena

* 2:: ‘Mamaitua tauwai ġavienama’ Gurik bonane ya riuna: Tarawatu tautuağienama. Uma baneginama tauna noğone e nağonagona, be tarawatu matabuna tauriutuatuağienama.

da yawasana sibo a banavi. ¹¹ Inam kauidima aubainama Mamaitua banaga e voiedi da taudi kaiyovu tai sumaġedi be tai muriwatanedina. ¹² Yodibe matabudi adi kovoġama dosinama ta paġona, baninama riukaua nam ti sumaġena, be taudi gewagewa awai nuapaġo guratena aubainama. (v8b) Be Bada Yesu na kaba verau munaġama raġanine, yavutune Mamaitua tauwai ġavienama e suve waibakoko, be Yesu neneġarine e kawa gewagewa be e kawa koakoana.

Ko midi da bagibaginaġa

¹³ Yau bana, Bada ewai nuapaġoemina aubainama, tauma raġan matabuna sibo Mamaitua k睇 kaiwena, baninama tauna noġone ya vine dokemina da na yawasanama ko paġona. Uma yawasaninama koya paġopaġona maika, Arua ya voiemi da taumi banaga babaumima, be mate taumi Mamaitua na riukauama koyai sumaġena. ¹⁴ Inam baninama tauma ama rauguguyama aubainama, taumi ya vinemina da tokare Bada Yesu Keriso neneġarine ko miana.

¹⁵ Vutuna aubainama yau bana, ko midi da bagibaginaġa, be aba mudumaie bo letae kewai katakataimina, vutudi ko kaidididina.

¹⁶ Tauda dà Badama Yesu Keriso, be Tamadama Mamaitua isedima tauma ka kaisuġusuġuna, baninama taudi ai nuapaġoeda be adi raunuatoie a duġudanā da tauda tokare marae tà mia nonoġana. ¹⁷ Be mate tauma ka moimoiragina da tauna yaġoro e duġumina, be rewapani e utemi da taumi ami giumenta verediġa be ami voiama verediġa ko voiedina.

3

Pol moiragi yai baġena

¹ Yau bana, yodi inam kawai baġana da aubaimaima ko moiragi da Bada varinama sibo ya daberara makai be banaga sibo a vivirena, maika taumi ġaromie. ² Be mate ko moiragi da banaga gewegewedima nimedie be sibo Mamaitua yai yawasanima. Baninama nam banaga tabutabunama i sumaġana, be ³ Mamaitua tauna vutuna patupatutunama, tauna tokare rewapani e utemina, be mate Mamaitua tokare tauraukivigewagewa na rewapani be e midi ġaġarimina. ⁴ Tauma Bada isane ka noġonogħotina da taumi aba ġaromie k睇 riuriu vavasaġemina nama ko voivoiedina, be yaġoro da ko voiedina. ⁵ Be ka moimoiragi da Bada nopolimma sibo yai keda dokena Mamaitua na wainuapaġoe, be Kerisoe sibo koya midi da bagibaginaġa.

Nam ko matagayawa!

6 Be yau bana, yodi Bada Yesu Keriso isane ka riuriu vavasağemina da rağan matabuna tauwai sumağā mata-gayagayawidima ko voredina, baninama taudi nam ama waikatakataima ruvane tima miamiana. ⁷ Taumi ama voiam koya kataiedina, vutuna aubainama taumi sibo koya ruvamai, be nama koya miana. Tauma taumi mate tè miamiana rağanine, tauma nam ke matamatagayawana, ⁸ ibewa, tauma kupi da suara kè noyanoya guratana be nam ami kanima ke kanikani yababena. Ibewa da tauma ama noyae kani kè pa gó be kè kanikanina, be nam aitau ke tainuaboyamna. ⁹ Tauma ama didimanama e kenakenana da taumi sibo tauma koyai kani bagibagimaina. Be tauma nam nama ke voiana, baninama tauma kè góe góena da mataira verenama sibo kè voie be koya kitana. ¹⁰ Be tauma taumi mate tè miamiana rağanine, tauma umanama kè riu vavasağemina, de góda aitau nam ima noyanoyana, naumeki da tauna nam e kani.

¹¹ Be tauma kè vaiena da banaga ǵesaudima ǵaromie mata-gayagayawidima ta miamiana. Taudi nam tima mia genuana, be tubuǵidima anisagunama noyanama tima voivoiena, ibewa da taudi tai vadasaǵa be tawai karakarakutu naǵona. Taudi inam tunidiǵa ta kwapukwapi yababena. ¹² Tauma Bada Yesu Keriso isane inam nama banegidima kawai baǵedi bo ka riuriu vavasaǵedina da taudi sibo a mia genuanana, be mabidie a noya da sibo adi kanima a banavina. ¹³ Be taumi yau banagama, rağan matabuna sibo vere koya voivoiedina be nam tunimima ya tuaǵai.

¹⁴ De góda aitau riumaima uma letanama nōpone nam ei muriwatane, naumeki da inam baneginama ko kita porena, be nam tauna mate koi rawateǵeimi. Inam kauine tauna tokare e tunimayaǵa be ¹⁵ de góda tokare na noǵotama e vitarena. Be nam ko voie da ami ǵaviam e tubuǵa, ibewa da ko raukurena, baninama inam taumi turemima.

Waikaiwa damodima

¹⁶ Yau bana, suba Badanama rağan patapatanama suba sibo ya utemina, yaba matabuna ǵarone. Bada taumi ǵaromie e miana.

¹⁷ Taugu Pol, uma waikaiwinama taugu nimaǵomigue è girumina. Yodi taumi ko kataie da uma letanama riukaua taugu nimakiviguma. Uma inam taugu yau girumama.*

¹⁸ Dà Badama Yesu Keriso na raukiviverema ǵaromie e kenana.

* **3:17:** Leta tabutabunama Pol na taugirumama ya girumina. Be vers 17 da 18 taudıǵa inam Pol taunaǵa nimane ya girumidina.

Timoti 1 na letama pakanama

Pol na waikaiwama

¹ Mamaitua tauwai yawasanidama be Yesu Keriso, taudi a vinegu be a riu vavasağegu da taugu Pol apasol è tubuğana. Be Yesu Keriso tauna vutuna tà raberabena da tokare tà kitana.

² Tam Timoti ġarome uma letanama yà girugirumina. Am waisumağe tam taugu natuğomiguma.

Tamadama Mamaitua be dà Badama Yesu Keriso adi raukiviverema, adi raunuatoima be adi subama ġarome ta kenana.

Tauwai katakatai kaikaiyovudima kwai ġakedina

³ Rağanine taugu Masedonia provinsnama nağonama aubainama, taugu è riu vavasağemna da tam Epeses meaginama nopone kwa mia be tauwai katakatai kaikaiyovudima matabudi kwai ġakedi da nam kaiyovue banaga tai katakataidi. ⁴ Be mate taudi nam giu poredima kaikaiyovudie* bo kimta poredima ġarodie sibo yawasana a kerikeri wanedi. Inam kauidie taudi adi rağanima tawai yakaredina. Taudi nam sibo inam yabedima ai tarapiriedi be a kawa nuarağerağedi, baninama inam kauidie waikawa sağasağta tubutubuğana. Inam kauidima tokare nam dà waisumağe ta saguda, be Mamaitua tài muriwatane, ibewa. ⁵ Yau riuvavasağama yà riuriuemna tokare na damonama inam wainuapaño. Be inam wainuapağonama inam nopalima vereverene be adi noğotama vereverene tai nuapağona. Yodibe adi waisumağama tokare ei rewapanan, be tauwai katakatai kaikaiyovudima nam tai muriwatanedi.

⁶ Be banaga ġesaudima inam yabedima veredima kaiteka a gosedi, be giu kavekavedima tawai tarapiriedina. ⁷ Taudi ta noğonoğota munağedina da taudi kabe tarawatu tauwai katakataidima veredi, be ibewa. Be avedi da adi giuma vaiedima ai rewapanan kauana, be yağoro taudi aba ta giuguedina, banidima nam ti kataiedina. ⁸ Tauda tè kataiena da tarawatu inam yaba verenama, değoda tarawatu banaga tà giu waibatedina. ⁹ Be mate tè kataiena da Mamaitua tarawatu ya voiena nam banaga veredima aubaidi, ibewa da banaga gewegewedima aubaidima,

- taudi aitaağta tarawatu tauwai katikotovidima,

* **1:4:** Giu poredima maika wamba kumakuma, be ġesaudima mate.

- aitaugā tarawatu taurawağāigāiedima,
- aitaugā Mamaitua tauriutuatuağaienama,
- aitaugā gewagewa tauwai nuapağoenama,
- aitaugā nopo miremiredima,
- aitaugā Mamaitua tauwai diboğinama,
- aitaugā tametamedi, tinetinedima be banaga ġesaudima mate tauwai guridima.
- Bo aitaugā¹⁰ tauwai soğā yababayababa,
- aitaugā monamonağedima ta gosedi be ta nağō waiwaiivi adi banagama waiwaiivi mate be tautauğoma adi banaga tautauğoma mate tawai kawa soğana,
- taudi aitaugā banaga ta danenedi be ta rarau gimaredina,
- taudi aitaugā tawai kaikaiyovu be etare tawai bovibovina,
- be taudi aitaugā yaba toitoi gewegewedima ta voivoiedina, be inam yabedima Mamaitua na waikatakataima didimanidima nopolie nam tima kenakena.

Inam nama banegidima aubaidima Mamaitua tarawatu ya voiedina.¹¹ Be waikatakatai riuriukauinama inam vari verenama nopone e kenakenana. Inam varinama vutuna Mamaitua ya utegu be ya rarau guguyena. Tauna vutuna boruboruminama, be ya vere vavasağana.

Pol Mamaitua yai kaiwena na raunuatoima aubainama

¹² Taugu èi nuavere kauana, baninama dà Badama Yesu Keriso rewapania ya utegu be ya noğoti da taugu patupatutuguma, vutuna aubainama ya vinegu da taugu na noyama ya voivoienä,¹³ avedi da taugu boni sorukeakea banegiguma, Keriso èwai diboğī, be tauwai sumağenama è raraukivi gewegewedina. Be Yesu Keriso ya raunuatoieguna, baninama inam rağanine taugu nam e kataiena aba è voivoie. Inam rağanine taugu yağoro nam ewai sumağana.¹⁴ Be dà Badama na raunuatoima ġarogue ya yovo be ya voiegu da tauna èi sumağe, be wainuapağō nopoliguma ya moğavuna. Değoda tauda dà Badama Yesu Keriso mate tà mia tenağana, inam kauidima nama tokare ġarode ta tubuğana.

¹⁵ Banaga matabudi sibo a kataie da taugu aba ya giuena inam giu riuriukauinama be taudi sibo ai aninena: Yesu Keriso dobue ya yovona, banaga gewegewedima ei yawasanidina aubainama. Be matabudi nopolie taugu naumeki è gewagewa vavasağana,¹⁶ vutuna aubainama Yesu Keriso ya raunuatoieguna da tokare banaga matabudi ġarogue ta kita be ta kataie da tauna ewai raba neutauna da gewagewa banegidima tokare yawasana kenakena nonoğinama e utedina, değoda taudi Keriso tai sumağena

rağanine. ¹⁷ Mamaitua tauna guyau miamia nonoġinama. Tauna miamia moisirinama be guri nam i kataiena, tauna taunaġa vutuna Mamaitua, be banaga matabuda sibo tauna isanama tè kawa saġe be tè kaisuġusū nonoġena. Inam riukaua.

Pol Timoti nuanama ya boruna

¹⁸ Timoti natuguma, uma giudima taugu yà riuemna: Aba noġone awai perovetaena ġarome ta tubuġana, vu-tudi kwa noġotidina. Tam inam riudima kwa ragaudi be vari verenama aubainama kwai ġavia kauana. ¹⁹ Be am waisumaġama kwa kaididi da badonaġa, be noġota didimanidima aba nuama e riuriuemna nama kwa voiedina, inam kedane tokare kwai ġavia kauana. Banaga ġesaudima taudi noġota didimanidima aba nuedima ya riuriuena nama nam ti voiedina, be tauwai katakatai kaikaiyovudima awai muriwatanedina. Vutuna aubainama adi waisumaġama ya kovina, maika waga kabe kira debane i raukaisaġa be i monumonu. ²⁰ Tautauġoma rabui isedima Himeneas be Alexandra taudi mate inam banegidima nopolie. Vutuna aubainama Seitan nimane è biridina, dabudine taudi sibo a kataie be nam Mamaitua sibo ai diboġa munaġe.

2

Pol Timoti ya riuena da nema sibo ai taparoro bakona

¹ Taumi aba sibo koya voia dokena inam umanama: Noġone taumi banaga be Mamaitua poudie ko midi be banaga aubaidima ko moiragi be Mamaitua koi baġa da e sagudina. Be mate Mamaitua koi kaiwena banaga matabudi aubaidima. ² Inam kauinama teneġine nama ko moiragina guyaguyau be waibabada aubaidima, da tauda tokare subae tā mia genuana be Mamaitua tā voteyeteye be tài kawa vivirana. ³ Uma inam kaua verenama Mamaitua tauwai yawasanidama, inam kauine ewai nuaverena. ⁴ Baninama tauna e ġoeġoġena da banaga matabudi yawasana kenakena nonoġinama sibo a banavi be riukaua waikatakatainama sibo a kataiena. ⁵ Baninama Mamaitua inam tenaġa, be banaga tenaġa Mamaitua be banaga poude e midimidina, inam Yesu Keriso, ⁶ tauna vutuna banaga matabuda tau-midiġaġaridama, baninama Mamaitua raġon ya boruborue Yesu Keriso na yawasanama yai utaena banaga matabudi aubaidima, be yodi Mamaitua nuanama ya subana. ⁷ Taugu yà riuriu kauana be nam ama kaikaiyovuna, inam kauinama aubainama Bada ya vinegu da taugu apasol be vari vere-nama yà rauguguyena. Be taugu riukaua waikatakatainama eteni banegidima yài kataidi be tai sumaġana.

Tautauğoma be waiwaivi adi giuma

⁸ Taugu yà ġoeġoena taumi değō değō ami kaba wairawateğeima rağanine, tautauğoma nimedima ta kaisuğu be ta moimoiragina rağanine, taudi sibo nopodima vereverene a moimoiragina, be nam medi bo ġası mate. ⁹ Be mate yà ġoeġoena da waiwaivi sibo ai gara kaua be tubuğidima sibo a semo kauedina. Be nam yaba waimataveraveraudie debedima a waisiedi, be nam anibasa yabedima sibo a kotedi maika gara waimataveraveraudima, bo waisia ġesaudima tabutabu maika posaru bo komakoma, inam avedi. ¹⁰ Değoda taudi Mamaitua tawai sumaġena, naumeki da taudi voia veredie nopodima sibo ai siana, inam nama waisianama Mamaitua matane ya verena.

¹¹ Taparoro babadidima tawai katakataina rağanine, waiwaivi sibo a voyağota, a kayokoa be ai beavaia ġomana, be tautauğoma adi waibadama dibune sibo a miana. ¹² Be taugu nam waiwaivi amawai aninedina da taudi tautauğoma sibo ai katakataidi, ibewa da taudi sibo ai nuatuğutuğu, be nam sibo tautauğoma adi gabuma a pağō be ai bada. ¹³ Baninama Mamaitua noğone Adam ya voia dokena, be muriġa Ivi. ¹⁴ Be Seitan Ivi ya kaiyovue da ya beku be gewagewa ya voienna, be nam Adam. ¹⁵ Be waiwaivi adi noyama naumeki da sibo ai natunatunana. Be mate adi waisumaġama Keriso ġarone, be adi wainuapağoma sibo a kaiguratedi, be a mia kauana Mamaitua na ġoane nama. Inam kedane tokare Mamaitua ei yawasanidina.

3

Ekalesia babadidima adi giuma

¹ Uma giunama yodi aba yà riuemina inam riukaua: Değoda aitau ekalesia debanama waibadenama e ġoeġoena, inam naumeki tauna noya verenama e ġoeġoena. ² Be inam baneginama tauna na yawasanama sibo umanama:

- Tauna yawasana didimanine miemieninama,
- be nam aba e voia waigewa da banaga tai giugie.
- Be tauna waivi tenaġa e naġi be vutunaġa e rabena,
- be inam baneginama miamia genuaninama, be nam voivoia yababayabrina,
- be tauna na noğotama matabudi didimanidiġa,
- be tauna voyağota be vivira baneginama,
- be banaga na vadae ta tavatavana taurabe kauedima.
- Be tauna Mamaitua na damma tauwai katakataidima,
- ³ be nam tegobua banegina,
- be nam sorukeakea banegina.
- Tauna vovoyaġotinama be nam kayokayo medimedina,

- be nam mane tauwai nuapañoenama banegina.
 - ⁴ Tauna na vadama banegidima ei bada kauedina keda verene, be e kita da na sedama tauna ta voteyeteyena.
 - ⁵ Be degóda tauna na vadama banegidima ġarodie nam ei bada kaua, inam tokare nam teneteneğina da Mamaitua na damma ġarodie ei bada.
 - ⁶ Be tauna nam sibo waisumaġa vaunama banegina, baninama degóda tauna nöponama rauguyaguyau e moġavu, be tokare kovoġa e banavina maika Seitan.
 - ⁷ Be banaga nam waiwaisumeğidi mate tauna sibo a vivivivirena be a kawakawa saġena, be degóda ibewa, inam tokare banaga tai giugue be Diaboro na kwaroe e raukaisaġa be e tikonina.
- ⁸ Be kauinama teneğinama ekalesia taurabedima nama.
- Banaga matedie taudi banaga viviviredima,
 - be nam banaga tauriu waimatakoedi.
 - Be nam tegobua banegidi,
 - be nam kaiyovue a rarau mane bo a rarau purapura.
 - ⁹ Taudi adi noġotama didimanine waisumaġa waikatakataidima ta kaididina. Inam vutuna Mamaitua yai maġatarina ġarode.
 - ¹⁰ Noġone ko kita wairuvedi, be degóda nam aba gewagewanama ġarodie ko banavi, naumeki da taudi Mamaitua na damma ta rabedina.
- ¹¹ Be kauinama teneğine adi waiwaivima nama.
- Banaga matedie taudi waiwaivi viviviredima,
 - be nam tawai mena bo tawai karakarakutu.
 - Be taudi miamia genuanidima, be nam voivoia yababayababedi,
 - be taudi waiwaivi patupatutudima.
- ¹² Be ekalesia taurabenama tauna waivi tenaġa kavakava ya naġina. Be tauna na sedama be na vadama banegidima ei bada kauedina keda verene. ¹³ Degóda ekalesia taurabenama e noya kauana, banaga tauna tokare ta kawa saġe, be tauna ma raudebatorana Bada Yesu Keriso ei matematena banaga noġodie.

Mamaitua waikatakatai riuriukauinama ewai maġatarina

¹⁴ Taugu yà noġonogötina da raġan ġaubonaġa yà verauna ġaromie, be taugu yaġoro uma letanama yà girugirumina tam ġarome, ¹⁵ baninama degóda taugu nam yà verau, tam kaite kuya kataiena da Mamaitua na vadae tauwai sumaġa nema sibo a vivira bakona. Taudi vutudi riukaua Mamaitua miamia nonoġinama na damma, vutuna aubainama taudi Mamaitua na waikatakataima kadi tuatuama.

¹⁶ Mamaitua waisumaḡa riuriukauinama yai maḡatarina ġarode, nam aniriuriu nuababaġe, baninama inam umanama,

Keriso tubuġe ya maḡatarana,

be Arua Babau ewai maḡatarana da Keriso tauna naumeki didimana baneginama.

Be anea tauna a kitana.

Be tauwai sumaḡa dam matabuna ġarodie tauna a rau-guguyena,

be banaga dobu matabuna tauna ai sumāġe,

be Mamaitua ya nawena marae.

4

Tauwai katakatai kaikaiyovudima

¹ Arua Babau umanama e riuriu yaġedana, da raġan damodie tauwai sumaḡa ġesaudima tokare waisumaḡa ta gosedi be arua kaikaiyovudima tai muriwatanedina. Be mate taudi penama adi waikatakataima tai sumāġedi be tai muriwatanedina. ² Banaga kaikaiyovudima taudi inam waikatakataidima kaikaiyovudima tawai daberaridina, baninama noġota veredima taudi ġarodie matabudi a yanis-arana.

³ Inam banegidima tawai katakataina da banaga nam sibo ai naġi. Be mate ta riuriuna da kani ġesaudima banaga sibo a widinedina. Be inam nam nama. Mamaitua kani matabudi ya voiedina anikani aubainama, be aitauġa riukaua tawai sumāġena, taudi Mamaitua tai kaiwe be inam kanidima ta kanidina. ⁴ Yaba matabuna Mamaitua ya voivoedina inam taudi yaba veredima, be nam sibo tè riutuāġaiedi. Tauda Mamaitua sibo tèi kaiwe be muriġa da tè kanina, be Mamaitua matane inam kanidima matabudi veredima, ⁵ baninama inam kanidima Mamaitua riune be moiragie tokare kani babaudima ta tubuġana.

Ekalesia babadidima nema sibo a mia be a noya bakona

⁶ Deġoda inam giudima nama tauwai sumaḡa kwai katakataidina, naumeki da tam inam Yesu Keriso na taunoyama veremma. Inam kedane tokare banaga ta kataiem da tam Bada kwawai sumāġena, be riunama vutuna kwawai muriwatane be kwa kanikani bagibagiena. ⁷ Giu poredima kaikaiyovudima be bua giudima kwa gosedina. Be kwa kita da tam kwa kaigurate be Mamaitua na ġoane nama kwa miana. ⁸ Be yawasana tubuġe tà kaiguratena inam naumeki, be tokare damone nam aba. Be yawasana Arue tà kaiguratena, inam ya vere kauana, baninama damone yawasana kenakena nonoġinama yodi da nokoi tokare tà banavina. ⁹ Riu matabudi è riuriuemna inam riukaua,

be inam riudima sibo kuyai aninedi be kuya ragaudina. ¹⁰ Tauda tà noyanoya guratana da Mamaitua riunama tài daberarina da banaga tài sumāge be yawasana tà banavina. Baninama tauda Mamaitua yawayawasaninama tâwai sumāgena. Tauna vutuna banaga matabudi ei yawasanidina, değoda taudi tai sumāgena.

¹¹ Inam kauidima banaga kwa riu vavasağedi be kwai katakataidina. ¹² Tam banaga vaumma, be nam aitau sibo ya kita waiyovoğem. Tam banaga matedie voia verediğā kwa voiedina, am giue, am yawasanae, am wainuapağoe, am waisumağe, yodibe banaga tokare ta kitam be tai muriwatanemna. Be yawasana miremiredima nam kwa voiedi. ¹³ Be girugiruminama poranama be vaunama patara noğodie kwa siesievidi, kwa rarauguguyedi be banaga kwawai katakataidi be taugu yà verau munağana.

¹⁴ Be puyo Arue Mamaitua ya utemna nam kwa gose. Rağanine ekalesia babadidima nimedima debame a boru be am noyama awai perovetaena, dabudine inam puyonama kuya pağona. ¹⁵ Uma kauidima matabudi è riuriuemna kwa voiedina nuama tabutabune, dabudine banaga tokare ta kita da tam am waisumağama e moramorabana. ¹⁶ Am yawasanama be am waikatakataima rağan matabuna kwa kita yağedina, baninama değoda nama kwa voiana, tokare tam be tauwai beavaia mate kwai yawasana tenağemina.

5

¹ Nam airağan bada poranama kwa riu badobadoe, avedi, be nuatauğa ğarone kwa giuna maika kabe tam tamağomim. Be tautaugoma vaudima ğarodie kwa giuna maika kabe tam tasitasim. ² Be waiwaivi poredima ğarodie kwa giuna maika kabe tam tinatinam, be guguini ğarodie kwa giuna maika kabe tam nuvunuvum, be nam noğota miremiredima mate.

Kaiyababa kadi raukurama

³ Değō kaiyababidima nam aitau taurabedi, inam taudi kwa rabe kauedina. ⁴ Be değoda kaiyababa na sedama bo yatayatanama tima miamia, naumeiki da taudi sibo noğone Mamaitua a vivire be adi dosima a rabe kauedina. Inam kauine taudi adi dosima be yateyatedima adi wairabarabama tawai maesina. Inam kauine Mamaitua ewai nuaverena.

⁵ Be değoda kaiyababa taunağā e miamiana, be nam aitau taurabena, tauna na noğotama matabuna Mamaitua ğarone ya boru, be kupi da suara e moiragi be sagu ewai bağena. ⁶ Be değoda kaiyababa tubuğinama e rarauguyaguyauena, inam waivinama kaite arue ya gurina, avedi

da yawayawasaninama e miamiana. ⁷ Inam giudima banaga kwa riu vavasağedina. Yodibe tokare nam aitau ei wavudi be e riuna, “Tam nam dosi kuma raberabe kauedina.”

⁸ Be değō baneginama na vadama banegidima be na dosima nam e rabe kauedi, inam banaginama tauna na waisumağama e kawakawa koakoana. Inam baneginama na gewagewama ya moraba vavasağana, nam eteni banegidima maika.

⁹ Değoda ai kaiyababa e verauna isanama pepae boru sağenama aubainama, kwa kita da tauna na modima 60 be nokoi ya nağona. Tauna isanama kwa girumina da tauna sibo sagu ya pağona. Be mate kwa kita da tauna na tauğomama tenağā kavakava, ¹⁰ be banaga ta vivivirena tauna na voiama veredima aubainama, maika seda ya yosiyosidi bo banaga na vadae a tavatavana taurabe kauedima, be tauna voyağote tauwai sumağā ġarodie yawai taunoyana. Be banaga adi nuaboyae ya sagusagudi, be yaba veredima toitoi mate ya voivoiedina. Inam kaiyababinama isanama kwa girumina.

¹¹⁻¹² Be banaga vaudima tawai kaiyababana, taudi nam isedima pepae kwa girumidi. Baninama avedi da taudi adi saugama kaite a boru da kabe nam tai nağı munağā. Be yağoro taudi vaudima aubainama tokare tubuğā na ġoanama e raurubudina, taudi tokare aba Keriso ġarone a sausaugena ta noğota tuağae be değoda wainağı munağā ta ġoena. Be inam kedane adi saugama tokare tai kati kotovi, be kovoğā ta banavina. ¹³ Nam vutunağā be mate taudi matagayawa, be vadağā ta nağō babara tawai karakarakutu, be banaga mududie giu ta ragaudi be ta giugiu nawedina kabe taudi adi giu. ¹⁴ Uma kauinama sabine yau raukurama kaiyababa vaudima ġarodie ya boruboruna da taudi sibo ai nağı, ai natunatuna be adi vadama a rabedina. Inam kedane na ġaviamma tokare nam teneteneğina da ġarone ei mena. ¹⁵ Be kaiyababa ġesaudima kaiteka Keriso a gose be Seitan tawai muriwatanena.

¹⁶ Değoda ai waivi Bada Yesu tauwai sumağenama, be na vadae kaiyababa e miamiana, naumeiki da tauna sibo inam kaiyababinama ya rabe kauena, be nam ekalesia vita e utedi. Be kaiyababa ġesaudima wainuatoitoidima nam aitau da sibo a sagudi, naumeiki da ekalesia taudi vutudi sibo a sagudina.

Mamaitua na damma babadidima adi giuma

¹⁷ Değoda ekalesia babadidima Mamaitua na damma tawai doka kauedina, naumeiki da ko vivira kauedi be koi maesidina. Be aitauğā da ta rarauguguya be tawai

katakataina, taudi naumeki da maesa verenama ko utedina.
¹⁸ Baninama girugiruminama porane umanama ya riuna,
 “Kau kaikaivainama ami noyama e voivoiena rağanine, nam
 mudunama ko panitom, ko gose da tauna e kanina.”

be mate Bada Yesu ya riuna, “Taunoya naumeki da na
 maesama sibo ya pağona.”

¹⁹ Ekalesia kana badama nam kwai wavu yababe, be değoda
 banaga rabui bo rabuiteğə tai matamatana, inam naumeki.
²⁰ Be aitau da gewagewa e voienna, tauna patara matedie kwa
 riu matai ġomena, dabudi banaga ġesaudima mate ta kita be
 ta nairana.

²¹ Mamaitua be Yesu Keriso be na aneama vinevinema
 matedie ya riuriu vavasägemna da uma giudima kwa
 voteyeteyedina, be nam aitau kwai muri nağonągo. ²²(v22a)
 Nam kwai paparana be ekalesia badanama vaunama de-
 bane nimamma kwa boru be kwai anina makaie, değoda
 na gewagewama tam mate tokare wavunama kwa pağona.
²³ (-) ²⁴ Baninama kwa noğoti da banaga ġesaudima adi
 gewagewama banaga matabudi ta kitedi be ta katakataieno
 da inam banegidima tokare kovoğə ta banavina. Be
 banaga ġesaudima adi gewagewama semoe ta kenakenana, be
 yağoro tokare ġavoe ta mağatarana. ²⁵ Be teneğinama nama
 banaga ġesaudima adi voiama veredima banaga matabudi ta
 kitedi be ta katakataieno. Be banaga ġesaudima adi voiama
 veredima semoe ta kenakenana, be yağoro tokare ġavoe ta
 mağatarana.

(v22b) Kwa kita da tam veremma, nama Mamaitua matane
 kwa miana. (v23) Nam upa taunağə kwa tegotego, be
 waen ġaubonama mate kwa tegona kapomma anisagunama
 aubainama, baninama tam kana rağanie kwa sidasidana
 aubainama.

6

Taunoya adi giuma

¹ Taunoya taudi adi babadama sibo a vivira kauedina. Inam kauine tokare Mamaitua isanama be dà
 waikatakataima nam ta kawa gewegewedi. ² Be değoda
 ami babadama waisumeğidima, naumeki da ko vivira kauedi
 be nam ko noğota tuatuağaledi be ko riuna, “Aa, inam
 tuatuağadama, nam bonedima tà vaie.” Inam avedi, be
 ġarodie ko noya guratana, baninama taumi matabumi
 tauwai sumağə, be inam kauine taumi taudi ko sagudina.

Waikatakatai kaikaiyovudima be waiguyau riuriukauinama

Inam riukauidima kwai katakataidi, be tauwai
 sumağə matabudi kwa riu guratedi da taudi sibo inam

riudima a voteyeteyedina. ³ Deġoda aitau waikatakatai tabu ewai katakataimi, be dà Badama Yesu Keriso na waikatakataima nam e ruva, bo Kuristen na mia kauama waikatakatainama nam e ruva, ⁴ inam baneginama nam aiyaba i kataiena, ibewa, tauna nopenama rauguyaguyau be sida ya moġavuna. Vutuna aubainama raġan matabuna giu banidima debedie ewai saġasaġana. Be inam waisaġasaġanama damone nuaraġaraġa, waikawa ġasigħasi, unura be waikarakarakutu ta tubutubuġana. ⁵ Inam nama banegidima raġan matabuna gewagewa tauwai tubuġidima. Baninama taudi adi noġotama a sidana, be nopedima waitupa kaiyovu a moġavuna, be nam riukaua ti kataiena. Taudi tawai noġotana waikuristen inam kabe waiguyau anipaġonama kedana.

⁶ Waikuristen nopen deġoda aba tè paġona inam naumeki, baninama tauda inam Arue tèi guyauna. ⁷ Baninama tinadama yawai tubuġidana raġanine, tauda nam aiyaba te paġo be mate uma dobune te tubuġana. Vutuna aubainama dà kaba gurima raġanine, nam tokare aiyaba tè paġo be mate tè naġo. ⁸ Be deġoda kani be gara tè banavidina, inam naumeki. ⁹ Taudi aitauġa da waiguyau ta ġoegħoe guratena, taudi raurubue ta bekubekuna, maika kwaro kabe i tikotikonidi. Inam raġanine taudi nopedie noġota gewegwedima be buebuedina toitoi ta saġasaġana. Inam kauidie taudi gewagewae ta naġonaġona. ¹⁰ Baninama mane wainuapaġoenama ko noġoti da inam gewagewa tabu be tabu waramidima. Banaga ġesaudima adi waisumaġġa a gosedina, baninama taudi mane ragaudima a ġoe guratena, aubainama a voia munaġedi da nopedima nuaboya da nuaboya ya moġavuna.

¹¹ Be tam Mamaitua ġaronama aubainama, inam yawasanidima kwa goсаġa be kwa raurubu gurata da yawasana didimanidie kwa miana. Be mate Mamaitua na ġoane kwa miana, be waisumaġġa, wainuapaġo, damipore be voyaġota, vutudi kwa ragaudi da ġarome. ¹² Be waisumaġġa aubainama waiġavia verene kwai ġaviana, yodibe yawasana kenakena nonoġinama kwa paġona tam aubaimma. Tam matamata toitoi noġodie kuya midi be kuya riuna da Keriso kuyai sumaġġena, inam raġanine Mamaitua ya vinemna da inam yawaninama kwa paġona. ¹³ Mamaitua yaba matabuna yawasana tauutenama, be Yesu Keriso, tauna vutuna Pontis Palet noġone ya midi be riukaue ya giuna. ¹⁴ Taudi matedie taugu yà riuriu vavasaġġenna da uma giudima matabudi kwai muriwatanedina da tam tokare nam aitau aba gewagewanama ġarome e vato. Nama kwa miana,

naumeki da rağan boruborune dà Badama Yesu Keriso e mağatarana.¹⁵ Inam rağaninama Mamaitua boni ya vinena, tauna vutuna Mamaitua vere vavasağinama. Be taunağā riukaua Bada be guyaguyau matabudi adi guyauma, be babada matabudi adi Badama.¹⁶ Tauna taunağā nam airağan e guri. Be na kaba miama inam yana boruminama yai rewapanā vavasağana, nam aitau teneteneğina da na kaba miama diane e nağō. Be nam aitau değō, boni da yodi i kita rubuna. Tauna isanama tà kaisuğū nonoğena, be rewapanā tauna ġarone e kenakena nonoğana. Inam riukaua.

¹⁷ Banaga waiguyaudima uma dobune kwa riu vavasağedi da taudi nopolie nam sibo a rauguyaguyau, bo adi noğotama adi waiguyaue a biridi, avedi, baninama inam yabedima matabudi tokare ta samoana. Be taudi Mamaitua vutuna tai sumağena. Tauna vutuna yaba totoi veredima nuadama aniwai nuaveredima aubainama e uteutedana.¹⁸ Be kwa riu vavasağedi da taudi vere ta voiedi be tai guyauenā. Be nuedima tabutabune adi banagama ġarodie ta pairuna.¹⁹ Inam kauine taudi ta vovo kaukauana adi waiguyauma rağan muriğā aubainama da taudi tokare yawasana ta pağona, be inam yawasaninama tauna riuriukuinama.

²⁰ Timoti, kwa rabe kauem be am noyama aba Mamaitua ya uteutemna, vutunağā kwa kita watanina. Be banaga adi giuma kaikaiyovudima nam kwa ragaudi. Inam giudima nam Mamaitua na riukauama timawai muriwatanena. Taudi Mamaitua tauwai diboğinama, be taudi ta riuriuna da inam vutuna kabe Mamaitua na katai, inam matabuna kaiyovu.²¹ Be taudi ta riuriuna da Mamaitua na riukauama kabe ti katakataie, ibewa da taudi waisumağā riuriukuinama a yakasina.

Mamaitua na raukiviverema ġaromie e kenana.

Timoti 2 na letama wairabuinama

Pol na waikaiwama

¹ Taugu Pol, Yesu Keriso na apasolma Mamaitua na ġoane ya riuporeguna da yawasana ya sausaugena yà rau-guguyena. Be aitaūga Yesu Kerisoe ta miamiana, taudi inam yawasaninama ta paġona.

² Tam Timoti ġarome uma letanama yà girugirumina. Am waisumäge tam taugu natuġomiguma. Tamadama Mamaitua be dà Badama Yesu Keriso adi raukiviverema, adi raunuatoima be adi subama ġarome ta kenana.

Waipatutu rauduġunama

³ Timoti, taugu Mamaitua yàwai kaiwena tam aubaimma. Tauna vutuna yau noġotama verene yàwai taunoyena, maika nema waġawaġaguma waġewaġedima a voivoiana nama. Be taugu raġan matabuna kupi da suara aubaimma yà moimoiragina. ⁴ Tam be taugu tèwai yamonedana raġanine, matasurumma yaġoro yà noġonogoġotina. Vutuna aubainama taugu yà ġoeġoe guratena da sibo è kita munaġem be nu-aguma ya verena.

⁵ Taugu è kataiena da tam Bada kwawai sumaġa guratena, maika nema boni yatamma Rois be tinamma Yunis awai sumaġana nama. ⁶ Vutuna aubainama taugu nimaguma debame è boruboruna raġanine, Mamaitua na puyoma ya utemna, vutuna kwa noġotina. Be inam puyonama kwa suve waikarakarati da e morabana, vutuna aubainama taugu yà riuriu guratenna. ⁷ Mamaitua nam aninaira bo anitunimayaġa aruinama i utedana, ibewa da tauna Arua ya utedana inam rewapania, wainuapaġo be rabemunaġedama aubainama.

⁸ Vutuna aubainama dà Badama Yesu varinama giuenama banaga ġarodie nam kwa tunimayaġa. Be mate taugu Bada isane è diburana nam kwa tunimayaġegu. Be naumeki da tam kwai nuatoitoi saguguna vari verenama aubainama. Inam vutuna aubainama Mamaitua rewapania ya utedana.

⁹ Tauna vutuna yai yawasanida be ya vinedana da yawasana babaune tà miana. Baninama nam taudame dà verema aubainama i yawasanidana, ibewa da Mamaitua na raukiviverema be na ogama ruvane. Inam raukivivernama Yesu Kerisoe ya utedana, muriġa da yaba matabudi yai tubuġidina. ¹⁰ Be yodi Tauwai yawasana Yesu Keriso ya yovoyovona raġanine, inam ogedima ya voivoiedina

ewai mağataridina. Yesu Keriso tauna vutuna guri ya vaikoakoana, be vari verenama nopone yawasana kenakena nonoğinama kedanama yai kataidana.¹¹ Mamaitua taugu ya vineguna da inam varinama verenama yà rauguguyena, be mate ya vinegu da taugu apasol be tauwai katakatai.

¹² Vutuna aubainama yodi uma dibure yàwai nuatoitoina. Be taugu yodi nam vutuna ama tunitunimayağena, bani-nama taugu è kataiena da Yesu vutuna yàwai sumağena. Be è katai kauena da tauna teneteneğinama da inam noyanama nimague ya boruboruna e rabe kauena, naumeki da rağan boruborune yà tavana.

¹³ Aba ġarogue kuya vaivaie be kuya kitakitana, kedanama teneğinama kwai muriwatanena. Be Yesu Kerisoe kwa miana, waisumağe be wainuapağoe. ¹⁴ Be Arua Babau tauna vutuna nopode e miamiana na sague, Mamaitua riukaua ya uteutemna kwa rabe kauena.

¹⁵ Be tam kuya kataiena da tauwai sumağä Eisia provinsne veraveraudima, taudi yau waikatakataima a tuağaiena, vutuna aubainama taudi a gose poreguna, be Paigelas be Emogenas taudi mate a goseguna. ¹⁶ Be Bada na rauki-viverema Onesporos be na vadama banegidima ġarodie sibo ya kenana, baninama tauna rağan matabuna ya vakitagü be yawai nuavereguna. Avedi da taugu dibure, be tauna yağoro vakitaguma nam i nairana. ¹⁷ Be tauna Rom nopone ya tavatavana rağanine, tauna yai wanawana gurata da taugu ya banaviguna. ¹⁸ Bada sibo Onesporos yai anine be ya raunuatoienna, Keriso na kaba verauma rağanine. Tam kuya kataiena da tauna Epesesma ya sagu kaueguna.

2

Yesu Keriso na taunoyama verenama

¹ Be tam Timoti natuguma, kwa moiragi da Yesu Keriso na raukiviveree Mamaitua e voiem da kwai rewapanana.

² Aba taugu èwai kataimna banaga toitoi noğodie, vutudi banaga patupatutudima be waikatakataiyağä banegidima kwai kataidina, be taudi mate banaga ġesaudima tokare tai kataidina.

³ Tam Keriso na tauwai ġaviamä veremma, vutuna aubainama piripiri matabuna kwai dami poredina maika taugu. ⁴ Tam Keriso na tauwai ġaviamä aubainama nam uma dobunama na yawasanama ta taiparaparam, bani-nama değoda, tokare tori matanama nam kwa tainuavere. ⁵ Teneğinama nama reisis banegidima tokare prais nam ta pağö yababe, ibewa da noğone reisis raukurana sibo a

voteyeteyedina. Be teneğinama nama tam, Bada na raukura-rama sibo kuya voteyeteyedina. ⁶ Be nama tausipi kwa noğoti: Aitau da e sipisipi guratana, tauna ġarone maura e kenakenana, be tauna sibo ya kani dokana. ⁷ Uma kauidima aba yà riuriuemna, vutudi kwai nuanoğonoğotedina, be Bada e sagum da yaba matabudi tokare kwa katai kauedina.

⁸ Nam airağan nuamma e koa da Yesu tauna vutuna guyau Deivid na dame ya tubuğana, tauna ya guri be Mamaitua ya kawa midisuğu munağena. Inam vari verenama vutuna taugu yà rarauguguyena. ⁹ Vutuna aubainama banaga taugu a panigu be dibure yàwai nuatoitoina maika kabe taudanedanene. Be Bada riunama taudi tokare nam ta pani be teneteneğina. ¹⁰ Taugu piripiri matabudi yà damidami poredina, baninama yà ġoeğöena da Mamaitua na vinevinema banegidima yawasana boruboruminama be kenakena nonoğinama Yesu Kerisoe ta pağona.

¹¹ Uma riudima yà riuemina inam riukaua:
Değoda tauda tauna mate tè guri tenağana,
 naumeiki da tauda tokare tauna mate tà mia tenağana.
¹² **Değoda** piripiri tà dami poredina,
 naumeiki da tauda tokare tauna mate tài bada tenağana.
Değoda tauna tà boviena,
 naumeiki da tauna tokare nama e boviedana.
¹³ **Değoda** tauda aba Keriso ġarone ta saugana, be inam sauginama değoda tokare tài kati kotovina,
 be tauna aba ġarode ya sausaugena, inam sauginama tokare nam ei kati kotovi.
 Baninama tauna tokare nam teneteneğina da tauname e bovi munağe.

Waikatakatai kaikaiyovudie kwa rabe kauemna

¹⁴ Banaga matabudi uma riudima kwa riuwai noğotidina. Taudi Mamaitua isane kwa riu vavasağedi da nam giu gesaudima kaikaiyovudima debedie tawai sağasağ. Baninama inam nama giudima nam banibiribiridi, be tauwai beavaia ta kawakawa nuababağıdi be adi waisumağama ta kawakawa gewagewana. ¹⁵ Mamaitua na noyae kwa kaiguratena, yodibe tauna e kitam be e riuna, "Tam taunoya veremma." Inam rağanine tam tokare nam kwa tunimayağ, baninama tam kaite Mamaitua riunama didimanae kwawai katakataina. ¹⁶ Banaga giu miremiredima be kavekavedima tauguedima nam kwai beavaiedi, avedi. Baninama banaga nama ta voivoiana, taudi tokare Mamaitua ta mia tautaurie, ¹⁷ be adi waikatakataima gewagewanama e daberarana sida guriguri maika. Be inam damnama nopone inam Himeneas be Piletas taudi mate, ¹⁸ baninama taudi riukaua a vakaiyati

be ta riuriuna da gurie be midisuġu munaġa inam bonika ya tubuġa be ya kovina. Taudi inam giudie taudi banaga ġesaudima adi waisumaġama ta kawakawa gewegewedina.

¹⁹ Be Mamaitua na giūma riuriukauinama yaġoro bagibag-ināġa ta midimidina, tuatua keritau maika. Be inam tuatuanama bogane Mamaitua na giūma umanama e kenakenana: "Mamaitua ya kataiedina aitauġa tauna ġarōġaronama". Be: "Aitau da e riuna tauna Mamaitua ġarōġaronama, naumeki da tauna gewagewa matabudi e gose poredina."

²⁰ Vada dosinama nopone taragai tabu be tabu ta kenakenana. Taragai veredima inam gold be siruvae a voiedina. Be ġesaudima inam kaie be doġae a voiedina. Taragai veredima inam taudi raġan dosidima aubaidima, be taragai ġesaudima inam raġan ġoma aubaidima. ²¹ Vutuna aubainama tam aitau deġoda Mamaitua matane kwa kawa vere munaġemna, inam raġanine tam babaumma taragai verenama maika, tam tokare Mamaitua e paġomna na noyama verenama voienama aubainama.

²² Be yarayaraga be guguini adi yawasanama gewegewedima kwa naġo poredina. Be aitauġa noppodima verene Mamaitua tawai sumaġena, taudi mate koi rawateġeimi be didimana, waisumaġa, wainuapaġo be suba kededima, vutudi koi muriwatanedina.

²³ Tam banaga adi giūma kaikaiyovudie be buebuedie tawai saġasaġana nam kwai beavaiedi, avedi. Baninama inam giudima damodie waikawa riuriu be waikawa ġasiġosi ta tubutubuġana. ²⁴ Bada na taunoyama tauna nam ei kawa riuriu, avedi. Be tauna kivinama e verena banaga matabudi ġarodie, tauna sibo tauwai katakatai verenama, be piripiri taudamiporedima. ²⁵ Bada na taunoyama tauna avedi da ta riuriu tuatuġaiena, be tauna yaġoro mareġa tauriu tuatuġaienama ei katakataidina. Dabudine deġoda Mamaitua e voiedi da nuedima ta vitaredi be Mamaitua na riukauama tai aninena. ²⁶ Inam raġanine taudi tokare matedima e kaya be Seitan na kwaroma ta vorena. Tauna vutuna na kwaroe ya vunuġidi be na ġoane nama ya nawenawedina.

3

Raġan damonama na piripirima

¹ Be uma kwa noġoti, raġan damone tokare piripiri be nuaboya dosidima ta tubuġana. ² Inam raġandie banaga tokare

- taudime tai nuapaġo munaġedina,
- mane tai nuapaġoena,
- ta kawa saġe munaġedina,
- ta rauguyaguyauna,

- tai diboğana,
- adi dosima ta rawağaiğaiédina,
- vere nam taikaiwa ġaredi,
- yawasana babaudima ta tuağaiédina,
- ³ nam tai nuapaño,
- nam noğotaporağā ġarodie e kena,
- tai menamena guratana,
- ta voia yababayabana,
- kividima e korokoro vavasağana,
- vere ta tuağaiena,
- ⁴ adi banagama ta biri dobiğedina,
- nam noğota kaua ġarodie e kena,
- noğota poupouta ġarodie e kenana,
- tubuğā na ġoanāma tai nuapañoena be nam Mamaitua,
- ⁵ ta voiana maika kabe Kuristen, be Mamaitua na rewapanama nam ti kataiena.

Inam nama banegidima nam mate koi popo. Inam kauidima matabudi aubaidima rağan damone piripiri be nuaboya dosidima ta tubuğana,⁶ baninama taudi vadağā ta na gó be waiwaiivi nuateketekedima ta karakarava nawedina. Be inam waiwavidima taudi gewagewa nopolima ya moğavu taritarina, be gewagewa tabu be tabu e kawakawa neğeneğedina.⁷ Inam nama waiwavidima waikatakatai tabu be tabu tawai muriwatanedina, be nam airağan aiyaba tima katakatai rubuena.⁸ Inam tauwai katakataidima kaikaiyovudima taudi maika Janes be Jambes* taudi boni Mousis a riuriu tuatuağaiena. Be yodi uma tauwai katakataidima kaikaiyovudima teneğināma nama Mamaitua na giuma riuriukauinama ta riuriu tuatuağaiena. Taudi adi noğotama ya sidana, be adi waisumağama inam matabuna kaiyovu.⁹ Taudi tokare nam aikedae ta potitava, baninama banaga matabudi tokare adi sidama ta kitana.

Avedi da piripiri tam yağoro kwa rauguguyana

¹⁰ Taugu aba aubainama yà noyanoyana inam tam kuya kataiena, be yau waikatakataima be yau yawasanama matabudi tam kuya kataiedi be kwawai muriwatanedina. Be yau waisumağama, yau mianuetama, yau wainuapağoma, yau wainuabagibagima, matabudi tam kuya kataiedina.¹¹ Be Antiok, Ikonium be Listra meagaidie nema a raukivi gewagewa bakegu be ei nuatoitoina, inam matabudi tam

* **3:8:** Exodus 7:11, 22 ko kita nema ya riu bakona. Be inam yabedima tauvoiedima banegidima isedima inam 'Yanes' be 'Yambes'. Taudi inam guyau Pero na banagama.

kuya kataiedina. Taugu taudi nimedie be Bada yai yawasani-guna. ¹² Be riukaua da banaga Yesu Keriso tawai muriwata-nena, taudi mate tokare raukivigewagewa ta banavidina. ¹³ Be banaga gewegewedi be kaikaiyovudima taudi ta na gó be banaga ta kaiyovuedi be ta biribiri waideğedina. Vutuna aubainama Seitan taudi mate e kaikaiyovuedina. Inam kauine taudi adi gewagewama ta tatai morebidina.

¹⁴ Be Timoti, tam kuya kataienia da tauwai katakataimma tama patutu banegimaima. Vutuna aubainama aba kewai kataim be kuyai sumágena, vutuna kwa kaididina, bani-nama tam kuya kataienia da inam vutuna riukaua. ¹⁵ Tam rağanine ġaubome da yodi, Mamaitua riunama girugiru-minama kuya kataienia. Be inam giudie tam nuauyauya kwa pa gó da kwai sumága be yawasana Yesu Kerisoe kwa pa góna. ¹⁶ Baninama Girugiruminama matabuna inam Mamaitua riunama. Mamaitua vutuna banaga no góta ya utedi da riunama a girumina. Inam riunama aniwai katakatai aubainama, be banaga ei kataidi da de gó tauna gewagewa be de gó tauna vere be anikawa didimana, be mate ewai kataidana da nema sibo didimanæ tè mia bakona. ¹⁷ Vutuna aubainama tauda Mamaitua na ba-nagama, be yodi teneteneğinama da na ġoanama veredima matabudi tà voiedina.

4

¹ Be Yesu Keriso e mağatarana rağanine, tauna tokare banaga yawayawasanidi be guriguridima matabudi e etare-dina. Inam rağanine Bada na waiguyauma dobue banaga ta kitana. Bada Yesu be Mamaitua matedie taugu yà riuriu vavasağemna ² da rağan matabuna tam Mamaitua riunama kwa rauguguyena, avedi da banaga adi ġoana bo nam adi ġoana, tam yağoro ġarodie kwa rauguguyena. Waikatakatai verene banaga kwa duğudi, kwa kawa didimanidi be gewagewa tauvoienama kwa riutuağiedina. Inam yabed-imma matabudi voyağote kwa voiedina.

³ Rağan e veraveraura e tavana, inam rağanine ba-naga tokare waikatakatai riuriukauinama waibeavaienama nam ta ġoe. Ibewa da taudi beedima ei ġarağarana tauwai katakatai kaikaiyovudima adi giuma vaienama aubainama. Inam vutuna aubainama taudi mabidie adi tauwai katakataima ta wanedi be tawai beavaiedina. ⁴Taudi waikatakatai riuriukauinama waibeavaienama ta tuağie be giu poredima kaikaiyovudima waibeavaiedima ta ġoedina.

⁵ Be tam Timoti, yaba matabuna ġarone kwa kita kaua da nam banaga ta kawa nuarağarağam. Tam naumeki da piripiri matabuna kwa dami poredi be am noyama da vari

verenama kwa rauguguyena. Inam vutuna am noyama Mamaitua ya utemna, kwa voie da kwa raudamoena.

Pol na giuma damonama

⁶ Be taugu kaiteka yau gurima *rağaninama* e tavatavana da yà gurina. Be kosiniguma e rauğinina waen olta debane ta rarau puyoena maika. ⁷ Taugu *waiğavia* verene Bada aubainama èi *ğaviana*. Taugu reisis èi kovina, yodi parata boruborune è tavana, be taugu yau waisumağama è kaididina naumeki da yodi. ⁸ Vutuna aubainama yodi Bada yau maesama ya kaididi be e raberabena. Be maesa inam umanama: Bada ya riueguna da taugu banaga didimaniguma tauna matane. Be Bada tauna vutuna didimana tauwai tarapirienama, be na kaba verau munağama *rağanine* yau maesama e uteguna. Inam nam tauguğä, ibewa da banaga aitaugä na kaba verau munağama ta *ğoeğoe* gurate be ta raberabena, taudi mate e utedina.

⁹ Timoti kwa kita da *waiğapa* *ğarogue* kwa tavana. ¹⁰ Baninama Demas tauna uma dobunama yai nuapağō guratena aubainama, ya gose poregu be ya nağona Tsalonnaikama. Be Kresens ya nağona Galesia be Taitos Dalmasiama ya nağona. ¹¹ Yodi Luk taunağä taugu mate ka miamiana. Tam kwa veraverauna *rağanine* Mak mate kwai doka verağena *ğarogue*, be tauna uma dabudine yau noyae e saguguna. ¹² Taugu Taikikas è riupore nawena Epesesma. ¹³ Be kwa veraverauna *rağanine*, yau kwamama Troasma Kapas na vadae è gosena mate kwa pağona. Be yau bukama be yau pepama *ğesaudıma* è girugirumidina, mate kwa ragaudina.

¹⁴ Irama tauvoiedima Alexandra, tauna gewagewa totoi *ğarogue* ya voiedina. Be Bada tokare na kovoğama e utena. ¹⁵ Be tam mate kwa kita kaua da nam gewagewa *ğarome* e voie, baninama tauna dà waikatakataima ewai *ğavia* guratena.

¹⁶ Banaga etareguma awai karena *rağanine*, yau banagama matabudi a naira poreguna, be nam aitau i kaisaguguna. Bada naumeki da adi gewagewama e noğota porena. ¹⁷ Be Bada tauna vutuna diague ya midi be rewapania ya utegu da taugu vari verenama tabutabunama yà rauguguyena eteni banegidima *ğarodie* da taudi ta vaiena. Inam *rağanine* taugu sibo è gurina, be Bada yai yawasana munağeguna. ¹⁸ Taugu è katai kauena da aitau gewagewa *ğarogue* e veraverağena *rağanine*, Bada tokare ei yawasanguna. Be tauna tokare ei doka nawe kaeuguna marae be dabudine na waiguyaue tauna mate ka miana. Tauna

vutuna Bada isanama sibo tè kaisuġu nonoġena. Inam riukaua.

Pol na waikaiwama damonama

¹⁹ Prisila be Akwila yāwai kaiwedina, be Onesporos na vadama banegidima mate. ²⁰ Erastas tauna Korintma è gosena be Toropimas ma sidana Miletasma è gosena. ²¹ Be tam kuya raurubu gurata da sibo ġarogue kuya tava makaina, muriġa da bodubodu. Yubulas, Pudens, Linas, Klaudia be tauwai sumaġa matabudi uma dabudine, tam tawai kaiwemna.

²² Bada aruimma e rabena. Be na raukiviverema matabumi ġaromie e kenana.

Taitos na letama

Pol na waikaiwama

Kapore Taitos,

¹ Taugu Pol, Mamaitua na taunoyama be Yesu Keriso na apasolma. Bada taugu ya vineguna da Mamaitua na vinevinema, banegidima yà sagudi da adi waisumağoma èì rewa panana. Be mate riukaua yà katakataidi da taudi Mamaitua na ġoane ta miana. ² Inam waisumeğine tauda tè kataiena da tokare yawasana kenakena nonoġinama tà paġona, vutuna Mamaitua boni ya sausaugena, muriġa da yaba matabuna yai tubuġidina. Be Mamaitua nam airaġan e kaiyovueda. ³ Be raġan boruborune tauna inam varinama yai maġatarina. Be Mamaitua tauwai yawasanidama ya vineguna da taugu inam varinama banaga ġarodie yà rau-guguyena.

⁴ Tam Taitos ġarome uma letanama yà girugirumina. Am waisumäge tam taugu natuġomiguma. Tamadama Mamaitua be tauwai yawasanidama Yesu Keriso adi rauki-viverema be adi subama ġarome ta kenana.

Taitos Kret nopone ekalesia babadidima e vinedina

⁵ Tam Kret bonabonane è gosemna, baninama dà noyama kwa kaiġavutinama aubainama, tam meagai da meagai nopođiga kwa naġo be ekalesia adi babadama kwa vinedina. ⁶ Be ekalesia debanama tauwai badenama tauna sibo tauġoma, be tauna na yawasanama sibo umanama:

- Tauna yawasana didimanine e mia be nam aba e voia waigewa da banaga tai giugie.
- Be tauna waiwi tenaġa e naġi be vutunaġa e rabena.
- Be na sedama sibo waisumeğidima be nam beapotepotedi be rawarawa ġaiġäidi.
- ⁷ • Be mate ekalesia debanama tauwai badenama tauna Mamaitua noya ya utena aubainama umanama yawasanidie sibo ya miana.
- Tauna yawasana didimanine e miana, be nam aba sibo ya voia waigewa da banaga ai giugie.
- Be tauna nam e kawa saġe munaġe be banaga matedie e rauguyaguyau,
- be nam meditupo banegina,
- be nam tegobua banegina,
- be nam sorukeakea banegina,
- be nam kaiyovue e raraū mane bo e raraū purapura.

- 8 Be banaga na vadae ta tavatavana taurabe kauedima.
- Be tauna yawasana veredima taugoedima.
- Be inam baneginama tauna miamia genuaninama, be nam voivoia yababayabrina,
- be tauna na noğotama matabudi didimanidiga,
- be tauna Mamaitua na ġoane nama e mianana,
- be na yawasanae tauname e rabe munaġena.
- 9 Ekalesia debanama tauwai badenama tauna Mamaitua riunama awai katakataina, vutudi e kaidididi da bagibaginaġa. Inam raġanine tauna tokare teneġinama da inam waikatakataidie sibo banaga ġesaudima mate yai katakataidi be ya riutuaġaiedina. Be riukaua tauriutuatuġaienama banegidima, dabudi ta kita be ta kataie da taudi inam ta kaikaiyovuna.

¹⁰ Baninama banaga toitoi riukaua tauriutuatuġaienama be taboru waideġa banegidima ta miamiana. Inam kaua Jius banegidima adi voia ġomama nama, taudi ta riuriuna da banaga tarawatu tai muriwatanena, yodibe yawasana ta paġona. Be inam giudima matabudi kaiyovu. ¹¹ Inam banegidima kwa riutuaġaiedina, baniġama taudi adi waikatakataima kaikaiyovune dam toitoi adi waisumaġama ta kawakawa gewegewedina. Inam tauwai katakatai kaikaiyovudima maneġa tawai matanedina. ¹² Boni nuauyauya baneginama tenaġa Kret nōpone tauna umanama ya riuna, “Kret banegidima taudi matabudi kaikaiyovudima, kivikorokorodima, matagayagayawidima be kaniposa banegidima.” ¹³ Inam riukaua. Vutuna aubainama kwa riutuaġai vavasaġedi be kwa voiedi da adi waisumaġama Bada ġarone ei rewapanana, ¹⁴ be nam Jius adi giuma kaikaiyovudima bo adi tarawatuma tai beavaiedi. Be banaga aitauġa riukaua taumia tautaurienama nam adi giuma ta vaiedi be tai muriwatanedi.

¹⁵ Aitauġa nōpodie nam mira, taudi ġarodie yaba matabudi nam miremiredi. Be aitauġa nōpodie mira be nam timawai sumaġana, taudi ġarodie yaba matabudi miremiredima, baniġama taudi nōpodima be adi noğotama a mirana. ¹⁶ Taudi ta riuriuna da Mamaitua kabe ti katakataie, be adi yawasanama ewai maġataridina da taudi Mamaitua nam ti kataiena. Taudi rawaġaġai banegidima be banaga tawai mataravuġeidina. Taudi nam tokare aiyaba verenama ta voie be teneteneġina, ibewa ġoma.

¹ Waikatakatai verenama ruvane, nama banaga kwai katakataidina. ² Tautaugōma poredima kwai katakataidi da taudi sibo a mia genuanana be nam a voia yababayaba. Be taudi banaga viviviredima sibo a mia be taudime a rabe munağedina. Be adi waisumağama sibo yai rewapanana be nopolima wainuapaño ya moğavuna, be piripiri rağandie nuedima sibo a taibagina.

³ Be kauinama teneğinama waiwaivi poredima nama kwai katakataidi da taudi sibo viviviredima a miana, Bada na tauwai muriwatanama maika. Be taudi nam sibo awai mena be nam sibo a tegotego bua, inam avedi. Be taudi waikatakatai veredima sibo a voivoiedina. ⁴ Uma waiwaividima poredima taudi sibo waiwaivi vaudima ai katakataidi da taudi sibo adi tautaugōmama be adi sedama ai nuapañoedina, ⁵ be mate taudime sibo a rabe kauedi be nam tautaugōma ġesaudima mate ai nađo dobira. Be mate adi vadae sibo ai rabaraba kauana. Rağan matabuna kividima sibo a vere, be adi tautaugōmama adi waibadama dibune sibo a miana. Inam kauine banaga tokare Mamaitua riunama nam tai kwatekwateve.

⁶ Be kauinama teneğinama yarayaraga kwai katakatai yađedi da taudime sibo a rabe kauedina. ⁷ Be tam yawasana veredima kwa voiedi da taudi dabudine ta kita be tai muriwatanemna. Waikatakataidima rağanine, tam didimanae be riukaue kwai katakataina, be bonama ei rewapanana nam kwai digidigiriedi. ⁸ Be am waikatakataima sibo ya didimana be ya vere vavasağana. Inam rağanine banaga tokare nam teneteneğina da ta riu tuatuağiem. Be tauriu tuatuağiem tokare ta tunimayağana, baninama taudi nam aba gewagewanama ġarome ti vaiena da ta giue.

⁹ Taunoya yababa kwai katakataidi da yaba matabuna ġarone adi babadama adi waibadama dibune sibo a miana. Be taudi a raurubu da adi babadama sibo a kawa nuaveredina, be nam ġarodie a riu viravira. ¹⁰ Be taudi nam adi babadama ġarodie sibo a danedanene, avedi. Be taudi adi yawasanae adi babadama sibo a kitedi be a kataiedi da taudi naumeki taunoya patututudima. Inam kauine tokare Mamaitua tauwai yawasanidama riunama banaga nuedima e soruna.

¹¹ Mamaitua na raukiviverema kaite ya mağatarana banaga matabudi ġarodie. Be inam raukiviverene banaga tokare yawasana ta pađona. ¹²⁻¹³ Inam kedane Bada e riuriuedana da gewagewa be dobu adi wainuaverema nam sibo tèi muriwatanedi avedi, be didimanae tà mia be tà rabe munağedana. Be Yesu Keriso, tauna vutuna Mamaitua dosinama be tauwai yawasanidama tà raberabena maika, tauda uma dobune Mamaitua na ġoane nama tà miana.

Tauda tè kataien da tauna ma borumina be ma neneğarina e mağatarana.¹⁴ Tauna vutuna na yawasanama yai uta munağena tauda aubaidama, be dà gewagewae ya kuvesida be nopodama ya koğa porena. Inam kedane tauda yodi tauna na banaga ġomama tè tubuğana, aubainama tauda vere voiedima tà ġoegħoe kauedina.

¹⁵ Inam giudima vutudi banaga kwai katakataidi be kwa duğudina. Be değoda aitau gewagewae e nağonağona, tauna kwa riutuağaiena, baninama tam rewapanā ġarome. Be nam aitau e kita waiyovoğem.

3

Vere ko voie

¹ Banaga kwa riu wainoğotidi da waibabada be gabeman adi waibadae sibo a mia be a voteyeteyedina. Be taudi rağan matabuna sibo yaba verediġa a voivoiedina. ² Be taudi nam aitau ġarone sibo awai mena bo nam awai kawa ġasigasi, avedi. Be taudi adi banagama mate sibo a voyaġota be ai turana kauana.

³ Tauda mate boni bua na miane tè miamiana. Inam rağanine tauda Mamaitua tè rawarawa ġaiġiae be banaga awai kedadoka waigewadana. Be tauda dobu be tubuğ aди ġoane tèwai yaragana. Be dà yawasanama gewegewedima maika unura be waikawa gadoğai nopodama ya moğavuna. ⁴ Be Mamaitua tauwai yawasanidama na raukiviverema, be na wainuapaġoma ya mağatarana rağanine, ⁵ tauna yai yawasanidana. Inam nam dà verema aubainama i yawasanidana, ibewa da na raunuatoie yai yawasanidana. Mamaitua dà gewagewama ya koğa porena rağanine, tauda tè tubuğ a vitara be Arua Babaue yawasana vaunama ya utedana. ⁶ Baninama Yesu Keriso tauwai yawasanidama aubaidama ya gurina aubainama, tauna Arua Babau debade ya ġini porena. ⁷ Tauna na raunuatoie ya kawa didimanidana, aubainama yodi tè kataien da tauda tokare yawasana kenakena nonoġinama tà paġona. ⁸ Uma giudima ya riuriuemna, inam matabudi riukaua. Be taugu ya ġoegħoena da inam giudima kwa giu guratana aitaugħa Mamaitua tawai sumağena ġarodie, yodibe taudi ta kita kaua da rağan matabuna yaba verediġa ta voiedina. Inam yabedima veredima vutudi tokare banaga ta sagudina.

⁹ Be banaga giu buebuedima debedie tawai saġasaġana, nam kwai beavaiedi. Be mate aitaugħa kimta poredima ġarodie yawasana ta kerikeri wanedi be Mousis na tarawatuma mate debedie tawai kawa riuriuna, nam kwai beavaiedi. Inam giudima nam banibiribiridi, be giudima tokare nam aitau ta sagu. ¹⁰ Be banaga aitau da ekalesia

e daridariġena, inam baneginama raġan tenaġa bo rabui nama kwa riutuġaiena. Be deġoda e raukosogaiġaina, naumeki da kwa kita yababena, be nam mate koi popo. ¹¹ Tam kuya kataiena da inam nama banegidima taudi gewagewa da gewagewa nopolima ya moġavuna, vutuna aubainama taudime adi gewagewama ewai maġatarana da taudi gewagewa banegidima.

Pol na giuma damonama

¹² Raġanine taugu Atemas bo Taikikas yà riuporena ġarome, kwa raurubu da Nikopolasma ġarogue kwa tavana, baninama yau ogama è taraġina da bodubodue taugu inam dabudine yà miana. ¹³ Kwa kita da tarawatu kana badama Senas be Apolas adi ġoanama matabuna kwa sagudina vaġai aubainama. ¹⁴ Tauda dà banagama aitauġa waisumeġidima, taudi nam sibo a mia yababayaba. Taudi vere sibo voiedima a kataie da banaga waikaruwaġgedima sibo a sagusagudina.

¹⁵ Banaga uma dabudine ka miamiana, matabudi tam tawai kaiwemna. Be inam dabudi aitauġa waisumaġe tawai nuapaġoemaina, kwa riuedina tauma kawai kaiwedina.

Mamaitua na raukiviverema matabumi ġaromie.

Pirimor na letama

Pol na waikaiwama
Kapore Pirimon,

¹ Taugu Pol, Yesu Keriso isane è diburana, be Timoti turadama. Tauma uma letanama ka girugirumina tam Pirimon turamaima be taunoya sagumaima ġarome, ² be mate nuvudama Apia, be tauwai ġavia sagudama Arikipas, be ekalesia aitaugā am vadae tawai rawategeidina matabumi ġaromie. ³ Mamaitua Tamadama be Bada Yesu Keriso adi raunuatoima be adi subama ġaromie ta kenana.

Waikaiwa be moiragi

⁴ Taugu yà noġonoġotimna raġanine, raġan matabuna moiragie yau Mamaituama yàwai kaiwena, ⁵ baninama taugu è vaie da tam am waisumaġama Yesu Keriso ġarone, be am wainuapaġoma Mamaitua na banagama matabudi ġarodie aubainama. ⁶ Taugu yà moimoiragina da tam am waisumaġe sibo kuyai rewapanana, be inam waisumeġinama sibo kuyai daberarina banaga ġesaudima ġarodie, inam kauine yawasana matabudi veredima Yesu Kerisoe tè ragaragaudina tokare kwa katai kauedina. ⁷ Tam am wainuapaġoma aubainama nuavere dosinama be duġu kuya uteguna, baninama tam turaguma, tam Mamaitua na damma nuedima kuya taigidevina.

Pol Pirimon yai baġana da sibo Onesmas ya verauġa munaġena

⁸ Vutuna aubainama Keriso isane ma raudebatoragu è riuem da aba sibo kuya voiena, be nam yà riuem, ⁹ baninama nuaguma kwa paġopaġona aubainama. Taugu Pol yodi èi dosina, be mate Yesu Kerisoe è diburana.

¹⁰ Taugu yàwai baġamna natuguma Onesmas aubainama, taugu dibure è miamiana raġanine arue tauna èi natunena. ¹¹ Boni tauna nam i sagum be noya veredima i voivoiedina, ibewa. Be yodi tauna banaga verenama ya tubuġana tam be taugu anisagudama aubainama. ¹² Taugu Onesmas yà riuriupore munaġena ġarome. Tauna vutuna nuanuguma be è riupore da e veraveraura.

¹³ Taugu uma dibure yà miamiana vari verenama kana taiye. Be taugu è ġoegħoena da Onesmas sibo uma dibure è rabe kwase da sibo ya saguguna tam epaiyamma. ¹⁴ Be taugu nam e ġoegħoena da tauna sibo è rabe kwase yababe,

be deḡoda tam kui aninana, inam naumeki. Be mate taugu nam ama ḡoeḡoena da tam sibo è segerim be Onesmas kuyai anine, saguguma aubainama. Ibewa da tamḡa am ḡoane nama.¹⁵ Anikitanama Onesmas raḡan ḡaubonaḡa ya rautapa gosemna, be yodi tokare agunai da mate ko mia nonoḡana.¹⁶ Be tauna yodi nam taunoya yababa boni maika, ibewa be tauna yodi Yesu Kerisoe turaguma, be tam tura vavasaḡimma.

¹⁷ Vutuna aubainama taugu deḡoda tam turamma, naumeki da Onesmas kwai aninena maika kabe taugu.¹⁸ Be tauna deḡoda ḡarome aba ima voivoia waigewa bo ima danedanene, naumeki da vitanama taugu yà paḡona.¹⁹ Taugu Pol nimague è girumana kwa sievi: Taugu tokare yài maesimna. Be taugu yawasana kedanama èi kataim be èi yawasanimna, vutuna inam yau sipoma ḡarome. Be inam dabudine tokare nam aba yà riuem.

²⁰ Tam turaguma, vutuna aubainama aba Bada isane èi baḡamna, naumeki da sibo kuya voie, be taugu nuaguma sibo kuyai subana.²¹ Taugu uma letanama è girumina ḡarome. Be è kataiena da aba èwai baḡamna na ruvama e kenana, be tam tokare ya moraba vavasaḡana kwa voienna.

²² Yodi yaba ḡesau yà riuem: Bada ami moiragima e pariparibeena da taugu tokare yà verauna ḡaromie. Vutuna aubainama tam am vadae yau gabuma kwa vokaukaua wainonoḡi be e kenakena.

²³ Epapras ewai kaiwemna. Tauna taugu mate Yesu Keriso isane kè diburana.²⁴ Be yau banagama tausaguguma Mak, Aristakas, Demas be Luk mate tawai kaiwemna.

²⁵ Bada Yesu Keriso aruimima e rabedina. Be na rauki-viverema taumi ḡaromie e kenana.

Hibru adi letama

Yesu Keriso tauna ya sağā guratana, nam anea maika

¹ Boni rağandie Mamaitua keda tabu be tabu* ġarodie rağan toitoi wağawağadama Israel ġarodie ya giugiuna. Be inam giudima matabudi peroveta ya riuedi be taudi yatayatadama Israel ġarodie a rarauguguyana. ² Be yodi rağan damodie tauna natuğominama ya vine be ya riupore da tauna Mamaitua na giuma ġarode ya rarauguguyena. Tauna vutuna Mamaitua ya vinena da yaba matabudi ei buderiedi be ei badedina, be mate taune Mamaitua dobu be yaba matabuna ya voiedina. ³ Be Mamaitua neneğarinama matabuna natunama ġarone e rawarawa mağatarina, be tauna na yawasanama teneğinama maika Mamaitua. Be tauna riunama wairewapanine yaba matabuna ta kenakena watanana. Be rağanine tauna banaga adi gewagewama ya koğakoğa porena murine, tauna ya nağō marae be Mamaitua wairewapanana vavasağinama kasaune ya miana.

⁴ Vutuna aubainama tauna Bada dosinama ya tubuğana, be anea matabudi tauna ewai badedina. Be tauna isa wairewapanana vavasağinama ya pağona, be isanama ya sağā guratana nam anea isedima maika.

⁵ Mamaitua ya riuna,

“Tam taugu natuğomiguma, manaka taugu tam è tikam da tam taugu Natuguma.”

Ko noğoti da inam riunama nam anea ġarodie nama i riuna, ibewa. Be mate Mamaitua ya riuna,

“Tauna Tamanama taugu, be tauna taugu natuğomiguma.”

⁶ Be rağanine natunama kaevou ya riuporena dobue, mate ya riu munağana, “Mamaitua na aneama matabudi tauna natunama sibo a rauduneena.” ⁷ Be anea adi giuma inam umanama,

“Mamaitua na aneama taudi inam taunoya ġoma be è riuriuporedina rağanine, taudi maika sive bo kai.”

⁸ Be tauna natuğominama aubainama umanama Mamaitua ya giuna,

“Tam Mamaitua, be am waibadama e kena da e kena nonoğana.”

Be am waiguyaue didimanae banaga kwai badedi be kwa voiedi da taudi mate didimanae ta miana.

* **1:1:** Keda tabu be tabu ġarodie Mamaitua ya giugiuna inam umanama: Tauna rauguguye ya giugiu, raubonie, mataire, anea, be ya toi rereğena.

⁹ Tam didimana kuyai nuapaḡoe be yawasana barebaredima
kuya tuaḡiedina.

Vutuna aubainama Mamaitua, am Mamaituama ya
vinem

be ya kawa saḡem da am waibadama dibune mara
banegidima ya biridina.

Inam kedane tauna ya kawa saḡem be nuavere dosi-
nama ya utemna.”

¹⁰ Be mate Mamaitua ya riuna,

“Bada, boni pakane tam dobu kuyai tubuḡina, be mara
matabudi nimame kuya voiedina.

¹¹ Be taudi matabudi tokare tai kavedina, be tam kwa mia
nonoḡana.

Taudi tokare gara maika ta gwamatu, ¹² be kwa viri
kudukududi da kwai poraḡana.

Be tam tokare teneğimma nama kwa mia nonoḡana, be
nam airaḡan kwa boru vitarem.”

¹³ Mamaitua nam aba aneanama umanama i riuen,

“Kasaugue kwa mia, be am ḡaviamma kaḡamma dibune yà
biridi be kwa vadididina.”

¹⁴ Ibewa da anea taudi arua be tawai taunoyana, tauda
aitauḡa Bada yawai yawasanidana ḡarode sagudama
aubainama.

2

Nam parata tà pare be wari kedaḡa tà naḡo

¹ Tauda vari verenama tè vaivaiena naumeki da tà kaididi
da bagibaginaḡa. Inam kedane tokare dà paratama noḡode
e kenakenana, nam tà pare be wari kedaḡa tà naḡo, ibewa!

² Baninama ko noḡoti da boni Mamaitua na giuma anea
a paḡo be banaga ḡarodie a giuguedina, be aitauḡa anea
adi giuma nam tiwai beavaiedi be ti vovo teyeteyedina,
taudi adi kovoḡama a banabanavidina. ³ Be yodi Mamaitua
yawasana dosi vavasaḡinama ya utedana. Be inam yawasan-
inama varinama Bada ḡominama ḡarode ya giuedina, be nam
anea. Be tauma aitauḡa inam giudima Bada mudune kè
vaivaiedin, tauma ka riuriuna da inam giudima matabudi
riukaua. Vutuna aubainama deḡoda inam riudima nam tài
beavaiedi be nam tài muriwatanedi, ko noḡonoḡotina tokare
na kovoḡama tà vore, bo? ⁴ Be Mamaitua inam varinama
verenama kawa rewapaninama, aubainama mataira be voia
dosidima mate ya voivoiedina. Be tauna na ḡoane puyo
Arua Babau banaga ya utedina. Inam kauidima matabudi ya
voivoiedina banaga sibo a kataie da inam varinama riukaua.

*Yesu waiyawasanidama aubainama yai rawabanaga
ḡomana*

⁵ Tauma kè riuemina da dobu vaunama e veraverauna, tokare e tavana. Be uma dobunama vaunama tokare nam anea tai bade, ibewa. ⁶ Baninama girugiruminama porane umanama ya riuna,

“Banaga adi verema aba da tam sibo kuya sagudi? Be banaga adi sedama aba aubainama kwa raberabe kauedi?

⁷ Tam kuya voiedi da taudi rağan ġaubonaġa anea adi rewapanama dibune a rautapa miana,
be muriġa tam kuya kawa saġedi da neneġara be vivira kuya utedina.

⁸ Dabudine yaba matabudi tauna na waibadama dibune kuya biridina.”

Mamaitua yaba matabuna Yesu na waibadama dibune ya biridina, be nam aiyaba mabine ima raberabe munaġena, ibewa. Avedi da inam kauidima yodi nam te katai kauedi be tama kitakita kauedina, be yaġoro da taudi Yesu na waibadama dibune ta miamiana. ⁹ Be yodi tà kita da Yesu tauna rağan ġaubonaġa anea adi rewapanama dibune ya rautapa miana, baninama Mamaitua na raukiviveree Yesu banaga aubaidama ya mariyawa be ya gurina. Vutuna aubainama yodi Mamaitua tauna neneġara be vivira dosidima Yesu ya utena. ¹⁰ Mamaitua tauname aubainama yaba matabuna ya voiedina, be yodi na rewapanae e raberabedina. Mamaitua na ġoana kauama da tauna na sedama matabudi e nawedi marae be ta mia kauana. Vutuna aubainama Mamaitua Yesu ya riupore be yai nuatoitoina. Be inam wainuatoitoine Mamaitua Yesu ya voie da banaga bateturinama ya tubuġħana. Yesu tauna vutuna taukuvesa.

¹¹ Yodi Yesu tauna banaga babaunama, be taudi aitauġa ya kawakawa babaudina, taudi matabudi yodi tamedima tenaġa. Vutuna aubainama Yesu debanama torane taudi e riuriuedina da tauna tasitasinama, ¹² be mate Yesu umanama ya riuna,

“Tam isamma taugu tasitasiguma tokare yài kataidina,
be taparoro nopone isamma taugu yà kawa saġena.”

¹³ Be mate tauna ya riuna, “Taugu Mamaitua yàwai sumaġena. Yodi ko kita, taugu umanema Mamaitua na sedama uteuteguna mate.”

¹⁴ Mamaitua na sedama taudi banaga ġoma, taudi visiġodi be kosnidima ta kenakenana. Vutuna aubainama Yesu mate yai rawabanaga ġoma be banaga tubuġidama ya paġona. Baninama inam kedane tauna teneteneġinama da e gurina. Be ya gurigurina rağanine tauna guri taupakinama na waibadama ya kawa gewagewana, guri taupakinama tauna vutuna Diaboro. ¹⁵ Inam kedane taudi aitauġa noġone guri

na waibadama dibune a mia be a nainairana, matabudi ya kuvesidina.

¹⁶ Be tauda tè kataie da Yesu ya verauna Eibraham na sedama sagudima aubainama, be nam anea sagudima aubaidi. ¹⁷ Vutuna aubainama tauna yai rawabanaga ġomana, tasitasinama tauda maika. Be inam kedane tauna ya raunuatoieda be pirisi dosinama patupatutunama ya tubuġana, be dabudine Mamaitua noġone banaga adi gewagewama maesinama ya paġona. ¹⁸ Baninama tauna ġominama mate boni raurubu be wainuatoitoi Seitan ġarone ya banavidina. Vutuna aubainama yodi aitauġa da Seitan e rarau rubudina, Yesu tokare teneteneġinama da e sagudina.

3

Yesu tauna ya saġa guratana, nam maika Mousis

¹ Vutuna aubainama yau bana, aitauġa Mamaitua ya vinevinemina, yodi Yesu ko noġotina, tauna Mamaitua ya riupore be tauda dà pirisima dosinama ya tubuġana. Tauna vutuna tħawġi sumaqe be tħiġiġuena. ² Mamaitua Yesu ya vinena, be Yesu Mamaitua ġarone yai patutu kauana maika Mousis. Nama Mousis Mamaitua na vadama ġarodie yai patutuna. ³ Ko noġoti da vada verenama banaga tokare ta kawa saġena, be you vada taukerinama tokare ta kawa saġe vavasaġena, nam maika na vadama. Be teneġinama nama Mamaitua Mousis ya kawa saġena, be you Yesu tauna vada taukerinama aubainama, Mamaitua Yesu ya kawa saġe guratena, nam maika Mousis, baninama Mousis tauna taunoya ġoma. ⁴ Vada matabudi taukerinama banegidima ta miamiana, be Mamaitua tauna yaba matabudi taukeridima.

⁵ Mousis tauna Mamaitua na taunoyama be Mamaitua na vadama ġarodie yaba matabuna ya noya kauedina. Be Mamaitua muriġa da tokare aba e vatona, Mousis noġone yawai maġatari dokedina. ⁶ Be Keriso tauna nam Mousis maika, ibewa. Keriso tauna vutuna vada taupakinama natuġominama, vutuna aubainama Mamaitua na vadama ġarodie Keriso e noyanoya kauana. Be yodi tauda aitauġa waisumeġidama, naumeki da nuadama torane tħiġi midi da bagibaginaġa, baninama tauda vutuna Mamaitua na vada ġomma. Inam noġitinama vutuna ma nuavereda tħiġi noġota watanena naumeki da, dà raġanima damone.

Mamaitua aba e riuriuena nam ko raukosogħajnej

⁷ Vutuna aubainama Arua Babau umanama e riuriuena, “Manaka taumi yau giumenti vaivaiena, ⁸ nam ko kawanopobadomi, maika boni waġewaġġemima a voivoiana nama.

Inam rağanine⁹ wağewağemima taudi modi 40 nopolie yau
voiama dosidima a kitedina,
be yağoro taudi a raukosoğaiğai be dobu kavakavane a
raraubuguna.

¹⁰ Vutuna aubainama taugu nuaguma yai medi kaua be
ğarodie umanama è riuna,
'Taudi rağan matabuna adi "goane nama ta nağonağona,
be taugu yau kedama nam tima katakataie be timawai
muriwatanena.'

¹¹ Naumeki da taugu nuaguma yai medi be umanama è
sauga wapanā,
'Taudi nam airağan yau gabuma ğaukune ta tava be ta
sipere'."

¹² Yau bana, ko kita kaua da rağan matabuna Mamaitua
koi sumağena, be nopolie nam gewagewa e kena da
Mamaitua yawayawasaninama ko mia taurie, avedi.

¹³ Vutuna aubainama yau bana, taumi manaka rağandie
rağan matabuna ami banagama ami banagama mate koi
kawa duğu vivira da gewagewa nam sibo ya boru waideğemi
be ya kawa nopoladomi. Inam vutuna aubainama Ma-
maitua ya riuna, "Manaka taumi yau giumenta ko vaiena".

¹⁴ Tauda waisumağatèwai karena rağanine, tauda Keriso na
banagama tè tubuğana, be dà waisumağama yai rewapan
kauana. Be yodi tà kita kaua da dà waisumağatè midi
da bagibaginağga, be nam tauna tà gose pore, naumeki da
damone. ¹⁵ Vutuna aubainama Mamaitua na giumenta, kaite è
riuriuemina yodi yà riu munağemina,

"Manaka taumi Mamaitua na giumenta ko vaivaiena,
nam ko kawa nopoladomi,
maika boni koya voivoiana nama."

¹⁶ Abağga banegidima boni Mamaitua riunama a vaie be
a raraubuguna? Inam aitaugaa Ijiptma be Mousis yawai
doka dobıgedina, taudi vutudi. ¹⁷ Be modi 40 nopolie
boni abağga banegidima ğarodie Mamaitua nuanama yawai
medi? Inam aitaugaa gewagewa a voivoiedi be muriğga dobu
kavakavane a gurina, taudi vutudi. ¹⁸ Be abağga banegidima
ğarodie boni Mamaitua ya sauga wapa be umanama ya
riu? "Taudi nam airağan yau gabuma ğaukune ta tava be
ta sipere." Inam aitaugaa Mamaitua a rawarawa ğaiğaiena,
taudi ğarodie. ¹⁹ Yodi tà kita da aba aubainama taudi
Mamaitua na gabuma ğaukune nam ti tava. Inam baninama
nam tauna ti sumağena.

¹ Be Mamaitua na saugama yaḡoro e kenakenana, da na damma gabu ġaukune sibo a tavana. Be Israel banegidima Mamaitua na gabuma ġaukune nam ti tavana be na saugama yaḡoro e kenakenana. Vutuna aubainama tauda inam gabunama tà paġona. Be tà kita kaua da tauda dà waisumaġe nam inam banegidima maika kedae tà guri rovo. ² Tauda inam riunama verenama tè vaivaiena teneġināma maika taudi. Be taudi inam riunama nam ti sumaġena aubainama, inam riunama na verema nam ti banavina. ³ Baninama tauda aitauġa tà waisumaġana, inam gabunama ġaukune tokare tà saġana. Be aitauġa nam timawai sumaġana, Mamaitua umanama ya sauga wapa be ya riuedina,

“Taugu nuaguma yai medi da è sauga wapa be è riuna:

Taudi nam airaġan yau gabuma ġaukune ta tava be ta sipere.”

Mamaitua boni dobu yawai tubuġie da yodi tauna gabu ya vokaukaua wainonogi da e kenakenana, be yaḡoro taudi tokare nam inam gabune ta saġa be ta sipere. ⁴ Baninama raġan aniwai 7-nama na giuma Mamaitua umanama ya riuna, “Mamaitua yaba matabuna ya voivoiedina yai kovidi be raġan aniwai 7 ne ya siperena.” ⁵ Be muriġa ya riuna, “Taudi nam airaġan yau gabuma ġaukune ta tava be ta sipere.” ⁶ Be yodi tà kita da Mamaitua na saugama yaḡoro e kenakenana, da na damma gabu ġaukune sibo a tavana. Be tauna riunama verenama Israel banegidima ġarodie a rauguguya dokena, be taudi a rawaġaiġaiena, aubainama nam dabudi ti tavana. ⁷ Vutuna aubainama Mamaitua raġan ġesau vaunama ya boruna da na damma gabu ġaukune sibo tè tavana. Be inam raġaninama tauna yai isana, ‘Manaka’. Be riu ‘Manaka’ boni Deivid ġarone ya vatovatona, inam vutuna kaite è riuemina,

“Manaka taumi yau giuma ko vaivaiena,
nam ko kawa nopoladomi.”

⁸ Be Josua Israel banegidima nam Mamaitua na gabuma ġaukune i doka tavaitedina, ibewa. Deġoda inam gabune sibo i doka tavaitedina, naumeki da Mamaitua tokare nam raġan ġesau vaunama sibo ya boru. ⁹ Vutuna aubainama yodi tà kita da Sabat siperenama yaḡoro kaikaiporenama e kenakenana Mamaitua na damma aubaidima. ¹⁰ Be aitau da Mamaitua na gabuma ġaukune e saġasāġana, na noyama ya voivoiena mate siperenama e paġona, maika Mamaitua na noyama damone ya siperena nama. ¹¹ Vutuna aubainama tà raurubu gurata da inam gabunama ġaukune tà saġana, be nam aitau e rawarawa ġaġġai be e beku, Israel banegidima maika.

¹² Mamaitua riunama inam yawayawasanima be waire-wapana vavasağinama, kватиквати menanama murine be karone gamgam kaukauinama maika. Tauna banaga nudama e tiremi be kaninopodama e nigonigo wanena. Be mate nopo na ġoanama be na noġotama e kaikai viredina. ¹³ Be Mamaitua matane nam aiyaba moisirie ima kenakena rubuna, ibewa. Yaba matabudi tauna matane, neganegae ta kenakenana. Be tauna dà voiama matabudi tokare e kaiviredina.

*Yesu tauna dà pirisima dosinama**

¹⁴ Be yodi waisumaġa tà giugiuena, vutuna tà kai-didi da bagibaginaġa, baninama tauda dà pirisima dosi vavasağinama marae e miamiana, tauna vutuna Yesu, Mamaitua Natunama. ¹⁵ Be tauda dà pirisima dosinama Yesu tauna dà vogwaġaqwaġama ya kataiedina, be tokare teneteneğinama da e raunuatoiedana, baninama tauna mate boni raurubu tabu be tabu ya banavidina, maika tauda yodi tà banabanavidina nama. Be tauna na raurubue nam gewagewae i beku rubuna, ibewa. ¹⁶ Vutuna aubainama tauda yodi ma raudebatorada raukivivere Mamaituanama ġarone tà naġona, be dabudine tauna na raunuatoie e sagudana dà piripirima raġandie.

5

¹ Pirisi dosinama uma dobue na voiama inam umanama: Tauna nam tauname ima vinevine munaġena, ibewa da Mamaitua e vine be tauna banaga aubaidima poune e midimidina, be adi puyoma e ragaudi be gewagewa aubaidima e tipatipana Mamaitua ġarone. ² Be tauna banaga kwakok-wakodi be buebuedima adi vogwaġaqwaġae e rarau nuatoiedina, baninama tauna mate nama kitanama maika taudi. ³ Vutuna aubainama tauna puyo e ragaudi be Mamaitua ġarone e tipatipana, tauname na gewagewama aubaidi be banaga adi gewagewama aubaidima. ⁴ Be ko noġoti da dobue nam aitau tauname ima kawa saġe be pirisi dosinama ima tubutubuġana, ibewa da Mamaitua tauna e vine be e kawakawa saġena, maika boni Eron ya vinena nama.

⁵ Be yodi Keriso ġarone tà kita da tauna nam tauname i vine munaġe be pirisi dosinama i tubuġana, ibewa da Mamaitua tauna ya vine be umanama ya riuena,
“Tam taugu natuġomiguma, manaka taugu tam è tikam da tam taugu Natuguma.”

⁶ Be gabu ġesaune buka nopone ya riuna,
“Tam pirisi miamia nonoġimma, Melkisedek maika.”

* **4:13:** Pirisi matabudi debedie inam tauna pirisi dosinama.

⁷ Yesu uma dobue ya miamiana rāgānīne, tauna moiragie ya īgaba be ma matasuruna Mamaitua yawai bağāna da tauna sibo na gurie Mamaitua yai yawasanina. Be Mamaitua tauna na moiragima ya pağona, baninama Yesu Mamaitua ya vivira kaue be na waibadama dibune ya miana. ⁸ Be avedi da tauna Mamaitua Natūgominama, be yağoro tauna na wainuatoitoie ya raurubu da voteyateya ya kataiena. ⁹ Inam kedane Mamaitua Yesu ya voie da banaga batuturinama ya tubuğā be ya voie da tauna yodi Tauwai yawasana ya tubuğāna. Be nama yodi aitaugā ta vovo teyeteyena, taudi tokare inam yawasaninama kenakena nonoġināma ta pağona, ¹⁰ baninama Mamaitua Yesu ya voie da tauna pirisi dosinama ya tubuğāna maika Melkisedek.

Nam seda wawaídima maika ko mia

¹¹ Inam kauidima adi giúma a toina ta kenakena, yağoro sibo kèi katakataimina, be nam teneteneğīna da kai katakataimi, baninama taumi ami noğotāma yakukuridima nam komawai beavaia kauana. ¹² Taumi yodi uma paratine sibo koyawai katakataina, be taumi nam aba ko kataiena, aubainama naumeki da taumi ko munağā pakane be seda adi waikatakataie Mamaitua na giúma sibo ai katakatai dokemina. Taumi seda wawaídima maika, yağoro susu ko kanikanina, be nam kani bagibaginama koma kanikanina. ¹³ Aitau da yağoro susu e kanikanina, tauna inam gomana wawainama maika be Mamaitua na waikatakataima didimanidima nam i kataiedina. ¹⁴ Be kani bagibaginama inam banaga nōpodima batuturidima aubaidima. Taudi a raurubu be a kaikai guratena damone vere be gewagewa yodi kitedima a katai kauedina.

6

¹ Vutuna aubainama banaga nōpodima batuturidima aba awai katakataimina, vutudi sibo taumi koya kataiedina. Be nam Kuristen koyawai karena na waikatakataie ko miamia watana, inam seda adi waikatakataima. Inam waikatakataidima taudi keda anisepanama, maika voia gewegewedima damodie guri ta kenakenana sibo tē gosedina, be waisumağā Mamaitua īgarone na waikatakataima, ² babataito na waikatakataima, waiaiaina na waikatakataima, gurie be midisuğū munağā na waikatakataima be maraetara be kovoğā kenakena nonoġināma adi waikatakataima. Inam waikatakataidima matabudi taudi keda anisepanama aubainama. ³ Vutuna aubainama Mamaitua na īgoane yodi waikatakatai īgesaudima tà kitedina.

⁴ Değoda Mamaitua banaga i rawayanedi, be tauna na puyoma ti ragaudi be Arua Babau ti pağona, ⁵ be Mamaitua na giuma verenama be na waibadama na rewapanama tokare e veraverauna e tavana, taudi kaite a dami be a kataien, ⁶ be inam banegidima waisumağɑ ta gose pore be Mamaitua ta mia tautaurien, taudi tokare nam teneteneğinɑ da ta verau munağɑ be tai sumağɑ. Baninama taudi Mamaitua Natunama ta tupatuparatu munağe be patare tawai dibogina.

⁷ Baninama ko noğoti da rağanine biga e dobi be sipi ei kutuvi da sipi e banibani kauana, inam sипинама Mamaitua na waiaiainama e pağopağona. ⁸ Be değoda sipi nопонама mui ta gogo be e burouna, inam sипинама nam dauna da taudi tokare ta riu tuağai be kai e kara goruna.

⁹ Be yau bana, tauma umanama giudima yodi ġaromie ka giugiuna nam taumi tunimie e rawakarati, ibewa da tauma yağoro ka noğonoğotina da taumi ami waisumağe tokare yawasana ko banavina. ¹⁰ Mamaitua tauna didimanae yaba e voivoiedina. Be taumi tauna koyai nuapağoe be ami noyae banaga waisumeğidima koya sagusagudina, be yodi yağoro da kowai saguna, Mamaitua nam aitau maika da tokare nuanama e koa, ibewa. ¹¹ Vutuna aubainama tauma ka ġoegoena da taumi inam yawanidima ko kaiguratedina naumeki da ami rağanima damone. Be aba kowai nuanoğonoğotena, tokare teneteneğinama ami maesama ko pağona. ¹² Be tauma nam kama ġoegoe da taumi ami noyae ko matagayawa, ibewa da banaga waisumeğidi be wairaba nuetau banegidima ko ruvedi be segoye be Mamaitua aba ya sausaugena tokare ko pağona, baninama taudi nama tokare sauginama teneğinama ta pağona.

¹³⁻¹⁴ Maika Mamaitua na saugama Eibrahim ġarone ko noğoti. Mamaitua umanama ya sauga wapana,

“Taugu tam yài aiainim,

be yatayatam be nosinosimma toitoi tokare yà utemna.”

Be inam sauginama Mamaitua tauname isane ya sauga wapana, baninama nam aitau Mamaitua maika i sağɑ guratana da sibo isane Mamaitua ya sauga wapa. ¹⁵ Naumeki da Eibrahim inam sauginama ya pağɑ be yai raba nuetauna da damone inam sauginama ya tubuğana.

¹⁶ Banaga sauga wapa e ġoena rağanine, tauna banaga bo aiyaba ġesau dosinama isane e sauga wapa be inam sauginama ei rewapanana, be dabudine banaga ta kataie da inam sauginama tokare e tubuğana, be riunuababağɑ matabudi e tom poredina. ¹⁷ Be Mamaitua ya ġoena da na buderima aitauğɑ ta pağona sibo a katai kaue da tauna na saugama

bagibaginama e kenakenana, be nam tokare e vitare. Vutuna aubainama tauna nam waria isane i sauga wapana, ibewa da tauname isane ya saugana.¹⁸ Mamaitua na giuma bagibaginama, be na saugama ya biridina, inam giudima rabui ta kena nonoġana, be nam tokare nuanama e vitare, baninama Mamaitua nam teneteneġina da e kaiyovueda. Inam kedane tauda nuadama e duğuduğu kauena, be tà noġonoġotina da tokare yawasana kenakena nonoġinama tà paġona.

¹⁹ Inam noġotinama bagibaginama waga ewai anikina maika, nopodama marae yai yasi kaididi be dà waisumaġe tà midimidina,²⁰ baninama Yesu tauda aubaidama kaite ya doka ġome be ya saġa ya naġona. Inam vutuna aubainama Tempolnopone gara waisaurinama ya nuatiri be mara kedanama ya kaiporena. Be Mamaitua Yesu ya voie da tauna pirisi dosinama ya tubuġana, Melkisedek na derima nopone.

7

Pirisi Melkisedek

¹ Mamaitua tauna guyau saġasāġa vavasaġinama. Be Melkisedek tauna Mamaitua na pirisima. Be mate tauna Salem kana guyauma. Be Eibrahim ko noġoti, raġanine guyaguyau ġesaudima yai ġaviedi be ya munamunaġana raġanine, Melkisedek ya banavina. Be dabudine Melkisedek Eibrahim yai aiainina. ² Be Eibrahim yaba matabudi ġavianopone ya ragaragaudina, tauna ya rawadamdamdi da matabudi 10, be aniwai 10-nama Melkisedek ya utena. Be isa 'Melkisedek' baniġominama inam 'didimana guyaunama'. Be isa 'Salem' baniġominama inam 'suba'. Vutuna aubainama Melkisedek mate tauna 'suba kana guyaunama'. ³ Be nam aitau Melkisedek tamana bo tinanama i kataiena. Be mate deġo be ya verauna, bo airaġan ya tubuġa be airaġan ya gurina nam aitau tenaġa i katai rubuena. Melkisedek tauna pirisi noyan e miamia watanana, Mamaitua Natuġominama maika.

⁴ Yodi tà kita da Melkisedek tauna banaga dosi vavasaġinama aubainama, Eibrahim tauna dede pakanama yaba matabudi ġavianopone ya ragaragaudina ya rawadamdamdi da matabudi 10, be aniwai 10-nama Melkisedek ya utena. ⁵ Tautauġoma Livai damnama nopone pirisi noyanama sibo a paġona. Be Mousis na tarawatuma e riuriuna da Israel banegidima taudi yaba matabudi sibo a rawadamdamdi da matabudi 10, be aniwai 10-nama inam pirisidima sibo a utedina, avedi da taudi tamedima teneġinama Eibrahim. ⁶ Be Melkisedek tà kita da tauna nam Livai damnama nopone, be yaġoro tauna Eibrahim

na utama aniwai 10-nama ya paǵo be tauna Eibraham yai aiainina, tauna vutuna Mamaitua na saugama ya paǵona.⁷ Matabuda tè kataiena da aitau rewapanana ya paǵo be banaga ǵesau ewai aiainina, tauna inam banaga dosinama, nam maika tauna aitau waiaiaina e paǵopáǵona nama.

⁸ Noǵone tè kita da piripirisi uta aniwai 10-nama banaga ǵarodie a ragaragaudina. Be inam pirisidima tokare ta mia nam dauna da ta gurina, be Melkisedek tauna tokare e mia watanana, be nam e guri. ⁹⁻¹⁰ Be Livai damnama taudi uta aniwai 10-nama banaga ǵarodie tauragaudima. Be inam raǵanine taudi nam ti tubuǵana raǵanine, tamedima Eibraham na utama aniwai 10-nama Melkisedek ya utena, dabudine yodi anikitanama da Livai damnama taudi mate a raupuyo tenaǵana, avedi da dobue nam ti tubuǵana, taudi yaǵoro gwenagwena vegane.

Keriso tauna pirisi vaunama

¹¹⁻¹³ Boni Israel banegidima taudi tarawatu a paǵona. Be inam tarawatunama ya riuna da tautauǵoma dam Livai nopone pirisi noyanama sibo a paǵona. Be Livai pirisidima taudi nam teneteneǵina da sibo banaga a kawa didimanidi Mamaitua matane. Vutuna aubainama Mamaitua pirisi vaunama ǵesau Melkisedek maika ya riuporena sagudama aubainama. Be inam pirisinama vaunama tauna vutuna dà Badama. Be yodi inam umanama: Deǵoda Mamaitua pirisi adi vaivaima e vitaredina, naumeki da tauna tarawatu mate e vitavitedina. Be dà Badama tauna nam dam Livai nopone, maika Eron, ibewa. Yesu tauna Juda na damma nopone ya tubuǵana. ¹⁴ Be Mousis na tarawatuma nam aba i riuena da Juda banegidima pirisi noyanama sibo a paǵo, ibewa.

¹⁵ Be yodi pirisi vaunama maika Melkisedek ya tubuǵana. Yodi tè katai kae da ¹⁶ tauna nam Livai adi vaiviae i rawapirisina, ibewa da taunaǵa na yawasanama wairewapanine yai rawapirisina. Be tauna tokare nam teneteneǵina da tai guri munage. ¹⁷ Vutuna aubainama Mamaitua umanama ya riuena,

“Tam pirisi miamia nonoǵimma, maika Melkisedek.”

¹⁸ Be Livai pirisidima Mamaitua yodi ya gose poredina, baninama adi vaivaima poredima nam banibiribiridi, be ¹⁹ Mousis na tarawatuma nam ti rewapanana da banaga ta kawa didimanidi. Vutuna aubainama Mamaitua yodi keda vaunama verenama ya utedana, be inam kedane tauda yodi tè katai kauena da Mamaitua ǵarone tokare tå tavana.

²⁰ Be mate Mamaitua e sauga wapana da Yesu ei pirisina. Be ǵesaudima awai pirisina taudi nam Mamaitua na sauge

tiwai pirisina, ibewa. ²¹ Be Yesu aubainama Mamaitua umanama ya riuna,

“Bada ya sauga wapana da tam pirisi miamia nonoġimma.

Be Bada aba ya sausaugena, nam tokare na noġotama e vitare.”

²² Inam sauginama aubainama Yesu tauna waianina vau-nama verenama ya utedana, tauna tokare e kawa didi-manidana Mamaitua matane, nam waianina poranama maika.

²³ Be yaba ġesaunama inam umanama: Boni taudi pirisi toitoi yavayava a miamiana, be deġoda raġanine ġesau ya gurina na epaiyama ġesau ya saġasaġana. ²⁴ Be Yesu ġarone inam natabu. Tauna e miamia nonoġana aubainama nam na yavayavama ġesaudima tima miamiana. Tauna inam pirisi miamia nonoġinama. ²⁵ Vutuna aubainama tauna yodi teneteneġinama da tauda aitauġa Yesu Kerisoe Mamaitua ġarone tà naġonaġona tokare Yesu ei yawasanidana, bani-nama tauna miamia nonoġinama, be aubaidama Mamaitua ġarone ewai baġana.

²⁶ Inam nama pirisinama dosinama tauda tà ġoegħoena. Tauna inam banaga babaunama, tauna wavu nam ġarone, tauna nam yawasana miremiredima tauvoiena, be tauna nam banaga gewgewedima mate timawai popona. Be Mamaitua tauna ya kawa saġe vavasaġena marae, be tauna na waibadama dibune yaba matabudi ta miamiana. ²⁷ Be Yesu tauna nam pirisi dosidima ġesaudima maika, ibewa. Pirisi dosidima ġesaudima taudi pomai pomai musara a ragaudi be Mamaitua ġarone a tipatipana, taudime adi gewagewama be mate banaga adi gewagewama aubaidima. Be Yesu inam tauname tubuġinama yai uta munaġe be raġan tenaġa kavakava banaga adi gewagewama aubainama tubuġine ya tipa tenaġħa, nam muriġa e tipa munaġa. ²⁸ Be Mousis na tarawatuma ya riuna da banaga ġoma sibo tè vinedi be ai pirisina. Be inam pirisidima dosidima taudi adi vogwaġaqwaġae ta bekubekuna. Be inam tarawatunama murine Mamaitua ya sauga wapana da tauna natuġominama e vine be e voie da tauna pirisi dosinama verenama be miamia nonoġinama.

8

Keriso tauna dà pirisima saġasaġa vavasaġinama

¹ Be taugu aba è giuguedina baniġominama inam uma: Tauda dà pirisima dosinama tauna marae ya saġa be Mamaitua wairewapana vavasaġinama na kaba miae kasaunama yauwane e miamiana. ² Be dabudine tauna

riukaua taparorona ma vadana ma nopone e noyanoyana.
Inam vutuna Bada ya kerina, be nam banaga ġoma.

³ Pirisi dosidima dobue adi noyama inam puyo a ragaudi
be a tipatipana Mamaitua ġarone. Vutuna aubainama
naumeki da tauda dà pirisima dosinama Yesu, tauna mate
e tipana. ⁴ Be deġoda tauna uma dobue sibo i miamiana,
tauna tokare nam yai pirisi, baninama pirisi ġesaudima
kaite dobue ta miamiana, tarawatu e riuriuna maika.
⁵ Taudi taparoro vadane ta noyanoyana inam aba marae
e kenakenana, vutuna keyaunama uma dobue tawai tupo-
tupoġanena. Vutuna aubainama boni Mamaitua Mousis
nuanama ya boru be ya riuna, "Kwa kita kaua da oya
debane nema taparoro vadana kerinama èwɔi kataimna,
nama ruvane kwa kerina." ⁶ Be Yesu pirisi noyanoyana ya
paġona inam ya vere kauana, nam pirisi ġesaudima adi
noyama maika. Be mate Yesu tauna waianina vaunama
ya utedana. Tauna vutuna tauda be Mamaitua poude e
midimidina. Be waianina vaunama inam yai rewapano be
ya vere vavasaġona, nam maika waianina poranama nama.
Be waianina vaunama nopone Mamaitua yaba veredima e
sausaugedana, nam maika waianina poranama nama.*

⁷ Uma ko noġoti, deġoda waianina poranama
teneteneġinama da banaga sibo i kawakawa didimanidina,
naumeki da waianina vaunama tokare nam poranama na
gabuma sibo ya paġo. ⁸ Be Mamaitua na banagama ya
riutuaġaiedi be umanama ya riuna,

"Raġan e veraverauna e tavana, taugu tokare waianina
vaunama yau banagama Israel be Juda ġarodie yà
boruna.

⁹ Be inam tauna nam maika waianina poranama
tametamedima ġarodie è boruboruna maika,
raġanine taugu Ijiptma be èi doka dobiġedina.

Be you, inam raġanine taudi waianina poranama a
rawaġaiġaiena aubainama, taugu è mia tautauriedina.

¹⁰ Be waianina vaunama yau damma Israel ġarodie yà
boruna inam umanama:

Taugu tokare yau tarawatuma nuedie yà girumi be taudi
nopodie e kenana.

Be taugu tokare taudi adi Mamaituama, be taudi taugu
yau banagama.

¹¹ Inam raġanine taudi nam tokare adi damma bo adi
banagama adi banagama tai katakataidi da sibo Bada
a kataie.

* **8:6:** Waianina vaunama inam Mamaitua ya saugedana da gewagewa e noġota
poredi be na tarawatuma nopode e girumina. Vers 12 nopone ko kitana.

Baninama inam rağandie kamai banabanaga be banaga dosidima, taudi matabudi tokare taugu ta kataieguna.

¹² Be taugu tokare adi voiama barebaredima ya noğota poredina, be adi gewagewama nam airağan ya noğota munąđedi.”

¹³ Be waianina vaunama vutuna Mamaitua yai isana ‘Keda vaunama’. Vutuna aubainama waianina poranama inam yodi yai rawakita porağana. Be rağanine yaba aba tawai rawakita porağana, taudi tokare ta kena nam dauna da ta samoana.

9

Boni pirisi musara kosinine a tipatipana

¹ Be waianina poranama nopone Mamaitua Israel banegidima waitaparoro tarawatudima toitoi ya utedina. Be Israel adi kaba waitaparorama vadana inam dobue.

² Be vadana inam noponama kitanama inam umanama: Inam vadana inam nopone rum rabui, noğone be murine a kenakenana. Be noğone rumnama inam rum babaunama. Be inam rumnama nopone inam kendoro kaidima a midimidina. Be vatara debane buredi babaudima a kenakenana. ³ Be gara waisaurinama murine inam rum ġesau ya kenakenana. Be inam rumnama inam rum babau vavasağinama. ⁴ Be inam rumnama nopone olta goldie voivoienama ya midimidina, be debane piupiu adi kaba gabuma. Be mate waianina bogesinama ya kenakenana. Bogesinama kopinama matabuna goldie voivoienama. Be bogesinama nopone yaba a kenakenana inam:

Keyaka goldie voivoienama. Be keyekinama nopone kani isanama ‘Mana’ ya kenakenana.

Be Eron na diğoninama, inam diğoninama vutuna boni ya busona.

Yeku tabatabanama debane Mamaitua na waianinama riunama girugiruminama.

⁵ Be boges debane anea borborumidima rabui isedima ‘Kerubim’ a midimidina. Taudi mapedima ai rauyaya be poudie noğotaporağ a gabunama a rupurupuna. Be uma yabedima yodi nam tokare matabudi ka giu waibatedi.

⁶ Be rağanine yaba matabudi a vokaukauedi be a kovikovina murine, pirisi rağan patapatana noğone rumnama nopone ya sağ a be na noyama yawai karena. ⁷ Be murine rumnama inam pirisi dosinama taunağ a modi matabuna nopodie rağan tenağ a kavakava ya sağasağana. Tauna musara kosinama mate ya pağ o be Mamaitua ya uteutena, tauname na gewagewama aubainama, be banaga adi voia nuababağ a mate aubaidima. ⁸ Inam kauine Arua Babau

ewai kataidana da banaga ġoma nam teneteneğina da gabu babau vavasağine sibo a sağā, baninama waianina poranama yağoro keda ya guduguduna.

⁹ Waianina poranama boni inam mataira maika tawai katakataidana da aba yodi rağanine ta tubuğana aubainama. Banaga puyo be musara Mamaitua ġarone ta tipatipana, nam teneteneğina da nopodima e kawa vere. Taudi yağoro Mamaitua ġarone ma nairidi ta miamiana, baninama inam puyodima nam teneteneğina da adi gewagewama e kaipore. ¹⁰ Inam puyodima taudi nam wairewapanidi, taudi inam anikani be anitego ġoma. Inam kauidima be mate wainimakoğā, taudi matabudi tarawatu kitekitedima ta voivoiedina. Be yodi waianina vaunama ya tavana aubainama, inam yabedima adi rağanima a kovina.

Keriso tauname kosinine aubaidama ya tipana

¹¹ Be yodi Keriso dà pirisima dosinama ya tubuğana, tauna vutuna waiaiaina veredima yodi e uteutedana. Be tauna gabu babaune be riuriukauine ya sağana. Inam gabunama nam banaga nimedie ti kerina, be inam gabunama nam uma dobune ima kenakena. ¹² Be rağanine Yesu inam gabune ya sağasağana, tauna nam musara kosinidima mate i sağana, ibewa da tauname kosininama ya pa gó be Mamaitua ġarone aubaidama ya tipa tenağana, be tokare nam airağan e tipa munağā. Inam kedane tauna yai yawasanidana, be yodi tokare tà mia nonoğana.

¹³ Boni pirisi taudi musara kitedima maika gote, burumakau be burumakau natunatudima mate kosinidima a ragaudi be kavu mate banaga debedığa awai yaraiedina, tubuğe kawa veredima aubainama. ¹⁴ Be Keriso kosininama inam yai rewapana kauana, nam maika musara kosinidi. Keriso nam aba gewagewanama ġarone, be Arua Babau miamia nonoğinama na rewapanae Yesu tauname yai uta munäge be ya tipana Mamaitua ġarone, be Yesu e voivoiemina da gewagewa voiedima ko gosedina. Be inam gewegewedima taudi ta voivoiemina da taumi tokare tai gurimina. Be yodi taumi teneğinama da Mamaitua yawayawasaninama koi yaragena. ¹⁵ Be aitaúga Mamaitua ya vinedi be ya yokoyokoedina, yodi taudi tokare teneteneğinama da Mamaitua na saugama tai buderie be ta mia nonoğana. Be yodi tauna na gurie waianina porane gewagewa ya panipanidana tauna ya kuvesidana. Vutuna aubainama yodi tauda be Mamaitua poude Keriso e midimidina. Inam vutuna yodi waianina vaunama.

¹⁶ Be uma ko noğoti. Rağanine banaga e miamiana, rağanine tauna na saugama e boru be e riuna, “Rağanine

taugu deđo, uma vokaidima ko ragaudina.”¹⁷ Be deđoda banaga e gurina rağanine, inam giudima tai rewapana be ta tubuğana. Be deđoda banaga yağoro yawayawasaninama e miamiana, inam giudima tokare nam tai rewapana be ta tubuğā.

¹⁸ Be teneğinama nama waianina porane, rağanine kosina e rauğinina, waianina rewapana e pağona. ¹⁹ Vutuna aubainama rağanine Mousis Mamaitua na tarawatuma Israel ya riuriuedina murine, tauna musara kosininama ya pağō be upa mate ya rawateğeina. Yodibe Mousis berana ya virigasi be vuvuğā sabasabanama mate ya pani tenağē be kosina nopone yai sonomna. Murine buka be banaga debediğā yai rautepotepo nawe²⁰ be umanama ya riuna, “Uma inam waianina kosininama be Mamaitua aba ya riuriuemina, vutuna sibo koya voteyeteyena.” ²¹ Be teneğinama nama taparoro vadana be nopone taparoro purepuredimə matabudi debediğā yai rautepotepo nawedina. ²² Tarawatu e riuriuna da anikitanama yaba totoi tokare kosina e kawa veredina. Baninama deđoda kosina nam e rauğini, tokare Mamaitua gewagewama nam e noğota poredi.

²³ Be marae yaba riuriukuidima keyaudima uma dobue, inam naumeki da musara kosinidie ya kawakawa veredina. Be yaba riuriukuidima marae, taudi Keriso kosinine ya kawa veredina, be nam musara kosinidie. ²⁴ Baninama gabu babaunama dobue inam banaga nimedie a voiena. Be Keriso nam inam gabune i sağana, ibewa. Inam gabunama tauna yaba marae riuriukuinama vutuna keyaunama. Be Yesu tauna gabu babau vavasağine marae ya sağana. Inam gabunama riuriukuinama be dabudine tauna yodi Mamaitua noğone e miamiana, sagudama aubainama. ²⁵ Be Keriso marae ya sağana, nam tubuğine modi patapatanama aubaidama e tipatipa watana, pirisi dosidima dobue a voivoiana maika. Taudi musara kosinidima a ragaudi da modi patapatanama taparoro vadane a sağā be Mamaitua ğarone a tipatipana. ²⁶ Be deđoda Yesu modi patapatanama sibo aubaidama i tipatipa watanana, naumeki da dobu pakane da yodi tauna sibo yawai nuatoitoi watanana. Be yodi rağan damone tè tavatavae, Yesu ya mağatara be tauname tubuğine ya tipana dà gewagewama kaiporenama aubainama.

²⁷ Tauda banaga rağan tenağā kavakava tà gurina, be murine tokare etare tà midina. ²⁸ Inam kauinama teneğinama nama Keriso rağan tenağā kavakava tauname tubuğine ya tipana banaga totoi adi gewagewama kaiporenama aubainama. Be rağanine e verau munağana, tauna

nam gewagewa kaiporenama aubainama e verau, ibewa da taudi aitaūga na kaba verauma ta raberabena, taudi yawasana e utedina.

10

Keriso rağan tenağā kavakava aubaidama ya tipana

¹ Taparoro yabedima riuriukuidima taudi marae ta kennakenana, tokare ta verauna. Be inam yabedima riuriukuidima keyau kavedima Mousis na tarawatuma uma dobue ewai tupotupoğanedina. Vutuna aubainama avedi da modi patapatanama Mamaitua ġorone musare ta tipatipana, be tokare nam didimana ta banavi. ² Değoda musare ti tipatipa be didimana sibo ti banavina, dabudi tokare tipa a gose pore be nuedima ya subana. Be nam nama i tubuğana.

³ Inam museridima modi da modi ta tipatipana, taudi adi gewagewama yağoro da e tatai noğonogötidina. ⁴ Baninama musara kosinídima tokare nam gewagewa e kaipore be teneteneğina, maika burumakau bo gote, ibewa. ⁵ Vutuna aubainama Keriso dobue ya yovona rağanine tauna umanama ya riuna,

“Banaga musare ta tipatipa be ta rarau puyona, tam yabedima nam kuma ġoeğedina.

Tam tubuğiguma kaite kuya vokaukaua wainonoğina.

⁶ Gewagewa aninoğotaporenama tam tipa be puyo kuya tuağaedina.

⁷ Vutuna aubainama taugu è riuna, ‘Taugu umanema, girugiruminama porane aubaiguma ya riuriuna nama.

Taugu è verauna Mamaitua am ġoanama ya voiena aubainama.”

⁸ Yodi koya kita, uma giudima nopodie aba Keriso ya vato dokena inam, “Banaga musare ta tipatipa be ta rarau puyona, tam yabedima nam kuma ġoeğedina, tam kuya tuağaedina”. Tauna nama ya riuna, avedi da tarawatu ya riuriuna da banaga nama sibo a voiena. ⁹ Be murine tauna ya riuna, “Taugu umanema. Taugu è verauna Mamaitua am ġoanama ya voiena aubainama.” Inam kedane tauna waianina poranama ya varia pore be epaiyanama waianina vaunama waianina poranama yai gabu raupunana. ¹⁰ Vutuna aubainama Mamaitua na ġoanama ruvane tauda yodi banaga babaudama tè tubuğana. Baninama Yesu Keriso tubuğine aubaidama ya tipa tenağana, be nam airağan e tipa munağga.

¹¹ Pirisi tenatenağā adi vaivaie taudi pomaipomai tipanama teneğidima a rarau puyo watanedina. Be inam puyodima nam teneteneğina da gewagewa sibo a kaipore.

¹² Be uma pirisinama Yesu tauna rāgān tenaḡā kavakava dà gewagewama aubainama ya tipana, be murine tauna Mamaitua kasaune ya miana. ¹³ Dabudine yodi tauna e mia be ewai rabana, naumeki da Mamaitua Yesu na ḡavīama e ragaudi be Yesu kaḡānāma dibune e sivudi be e vadididina. ¹⁴ Baninama inam tipanama tenaḡā kavakava ḡarone banaga aitaūḡā Mamaitua yawai aninedina, tauna ya kawa babaudina. Be yodi taudi tokare ta mia nonoḡāna.

¹⁵ Be mate uma kauidima ḡaromae Arua Babau ya kawa neganega yaḡedi be umanama ya riu dokana,

¹⁶ “Taugu tokare waianina vaunama yau damma Israel ḡarodie yà boruna, nama Bada ya riuna.
Taugu tokare yau tarawatuma nopolie yà biridi be nuedie yà girumina.”

¹⁷ Be mate ya riuna,

“Adi gewagewa be adi voiama barebaredimā nam airaḡān yà noḡota munaḡedi.”

¹⁸ Vutuna aubainama taugu yodi nam tipa ḡesaudimā ama ḡoeḡoedina, baninama adi gewagewama kaite ya noḡota poredina.

Ami waisumaḡe ko kaiguratana

¹⁹ Vutuna aubainama yau bana, tauda yodi tokare nuadama torane marae gabu babau vavasāgīne tà naḡona, baninama Yesu kosininama ya rauḡinina aubaidama. ²⁰ Inam vutuna yodi keda vaunama be yawayawasaninama aubaidama kaikaiporenama e kenakenana, baninama matakedae gara waisaurinama ya nuatirina. Be inam garanama vutuna Keriso tubuḡināma yai matairena.

²¹ Be yodi tauda aubaidama pirisi dosinama Mamaitua na vadama ewai badena. ²² Vutuna aubainama tauda nopolama riuriukauine Mamaitua ḡarone tà naḡona dà waisumaḡe. Be nam tà noḡota bekubeku, baninama Yesu kosinine mira nopolie ya kawa vere be tubuḡidama upa verene ya koḡedinā. Vutuna aubainama yodi Mamaitua ḡarone nam nuadama e vonainaira.

²³ Be dà noḡotama deḡo tè boruboruna, vutuna tà kaididi da bagibaginaḡa, baninama Mamaitua tauna patupatutunama, be tokare teneteneḡinama da na saugama e voiedina.

²⁴ Be ami banagama ami banagama ko riu sagusagudi da tai nuapaḡo vivira be voia veredima ta voiedina. ²⁵ Be wairawateḡei nonoḡa nam ko gose pore, banaga ḡesaudimā ta voivoiana maika. Taumi koya kita da Bada na raḡanima kaiteka maida e tavatavana. Vutuna aubainama dà banagama dà banagama mate waikawa duḡu vivira tà kaiguratena.

²⁶ Be deḡoda riukaua tè kataiena, be yaḡoro da gewagewa tāwai boruditina, tauda nam deḡo dà tipama ġesau ima kenakenana da noḡotaporqātà banavi, ²⁷ ibewa da etara e tavana raḡanine, tam am kovoḡāma dosinama aubainama tokare kwa naira da kwa naira kauana. Baninama inam raḡanine Mamaitua na ġaviamma kaimenanama dosi vavasaḡine e kawa gewegewedina. ²⁸ Ko noḡoti da boni aitau Mousis na tarawatuma ya riuriu tuatuaḡaie be matamata rabui bo rabuiteḡa inam baneginama a kita be ai samanina, dabudine inam baneginama na kovoḡāma ya paḡopāḡona. Be banaga matabudi inam baneginama ai gurina, be nam ti raunuatoiena. ²⁹ Vutuna aubainama aitaugā Mamaitua Natunama ta riuriu tuatuaḡaienā, taudi adi kovoḡāma tokare ya moraba vavasaḡāna ta paḡona, nam Mousis na raḡanie maika. Deḡoda Mamaitua Natunama ko mia tautaurie be kosininama vutuna waianina vaunama ya kawa veremina ko kita waidibodibogina, taumi ami kovoḡāma dosi vavasaḡinama tokare ko paḡona. Be mate deḡoda Raunuatoi Aruinama ko kunurena, naumeki da teneḡinama nama tokare ami kovoḡāma dosi vavasaḡinama ko paḡona, nam maika Mousis na raḡanie nama.

³⁰ Ko noḡoti da Mamaitua ya riuna,
“Taugu tauraubiwa, aubainama biwa yà paḡona.”
Be mate ya riuna,
“Bada tokare na banagama e etaredina.”

³¹ Inam ya gewagewa ġaḡa da Mamaitua yawayawasani-nama na tausukuma ġarome e paḡona.

³² Ami noḡotama e munaḡa da yanae koya saḡasaḡana raḡaninama ko noḡoti. Inam raḡandie taumi piripiri toitoi nopolie koyai nuatoitoi kauana, be you yaḡoro da koya vadidina. ³³ Raḡan ġesaudie patara matedie a kunuremi be a raraukivi gewegewemina. Be wari raḡan aitaugā a raraukivi gewegewedina, taumi koya midimidi waituni bagidina. ³⁴ Be raḡanine taumi ami banagama ġidoidima dibure a sivusivudina, taumi koya raunuatoiedi be koya sagusagudina. Be mate raḡanine banaga a kwayemi be ami purapurama a ragau viviridina, taumi yaḡoro ma nuaveremi koya damiporedina. Baninama taumi koya kataiena da tokare marae yaba veredie koi purapurana. Be inam pure-puredima tokare ta kena nonoḡāna.

³⁵ Vutuna aubainama inam raudebatoranama nam ko gose pore, taumi naumeki da ko midi bagibagina, baninama ami maesama dosinama tokare ko paḡona. ³⁶ Be ya verena da taumi inam piripiridima ko dami poredina. Inam kedane taumi Mamaitua na ġoanama ko voivoiena, be damone tokare Mamaitua aba ya sausaugena ko banavina.

- 37 "Be rağan ġaubonağā tauna aitau verau ewai taina, tokare e verauna, be nam ei riuriukoa.
- 38 Be didimana baneginama tauna waisumağē tokare yawasana e banavina.
Be değoda tauna e naira be ei tautinamurina, taugu tokare nam ġarone yài nuavere."
- 39 Be tauda nam aitau maika da muride tà munamunağā da Mamaitua gienae e pore nawedana, ibewa da tauda tàwai sumağāna aubainama, Mamaitua ei yawasanidana.

11

Waisumağā inam aiyaba?

¹ Waisumağā inam umanama: Yaba aba nam tama kitakitana, be nopode tè katai kuae da inam yabanama riukaua be tokare teneğinama da tà pağona. Be aba tauda tàwai nuanoğongoğotedina, inam tè katai kauenā da tokare ta tubuğana. Inam vutuna waisumağā. ² Bonimai banaga nama awai sumağāna, aubainama Mamaitua yai aninedina.

³ Nama tauda dà waisumağē tè kataie da Mamaitua bonane mara be dobu matabudi yai tubuğidina. Be yaba nam mağamağataridi, vutudi Mamaitua ya voiedi da yaba yodi tà kitekitedina a tubuğana.

⁴ Be Eibol na waisumağāna aubainama tauna na puyoma Mamaitua matane ya verena, nam maika Kein na puyoma nama. Tauna na waisumağāna aubainama Mamaitua na puyoma yai animena, dabudine yodi tè kataie da Eibol tauna banaga didimaninama. Be avedi da tauna kaite ya gurina, be na waisumağāna aubainama tauna yağoro da ewai katakataidana.

⁵ Be Inok tauna nam i gurina, na waisumağāna aubainama Mamaitua ya nawena marae, be banaga tauna nam ti banavina. Vutuna aubainama yodi tè kataiena da Inok muriğā da Mamaitua ya nawena marae, noğone tauna na yawasanae Mamaitua yai nuavere dokena. ⁶ Değoda aitau nam ima waisumağāna, tokare nam Mamaitua ei nuavere be teneteneğina, ibewa. Be aitau da Mamaitua ġarone e nağonağona, naumeki da inam baneginama sibo yai sumağā da Mamaitua e miamiana. Be aitaüğā nopodima tabutabune Mamaitua ta wanewanena, taudi adi maesama tokare e utedina.

⁷ Be Mamaitua Noa nuanama ya boru be ya riuena da yaba aba e veraverauna tokare e tubuğana. Be avedi da Noa inam yabedima nam matane i kitedina, be tauna na waisumağāna aubainama, yağoro Mamaitua ya voteyeteye be waga ya voienā na sedama waiyawasanidima aubainama. Be mate

na waisumaḡama aubainama Mamaitua ya riuna, “Tam Noa banaga didimanimma.” Raḡanine Mamaitua nama ya riuriuna, kipi banegidima neganegae a maḡatara be a midi poredina, be murine gewagewa a banavina.

⁸ Be Mamaitua Eibraham ya saugena da tokare dobu vau-nama e utena. Be Eibraham na waisumaḡama aubainama, tauna Mamaitua ya voteyeteye da na dobuma ya gose be vaḡai yai karena, avedi da nam i kataiena tauna aikedae e naḡonaḡona e tava, be tauna yaḡoro da ya naḡona Mamaitua ya riuriuena nama. ⁹ Be na waisumaḡama aubainama, raḡanine inam dobune ya tavatavana, tauna parai nopolidīa ware adi miane ya miamia naḡona. Be muriḡa kauinama teneteneḡinama nama Aisik be Jeikob a voivoiana, baninama taudi mate Mamaitua na saugama ḡarodie ya boruna. ¹⁰ Eibraham nama ya voivoiana, baninama tauna yawai sumaḡana da meagai bagibaginama marae Mamaitua tokare e voienna, vutuna kana naḡoma ya naḡonaḡona.

¹¹ Be Eibraham na waisumaḡama aubainama tauna na visarama Sera mate ai natunana. Avedi da tauna yai dosi kaua be Sera kaikaipoki dosinama, be yaḡoro tauna yai natunana, baninama tauna Mamaitua na saugama yai sumaḡena da tokare teneteneḡinama aba ḡarone ya sausaugena e voienna. ¹² Vutuna aubainama tauna tenaḡa be yai natunatuna da yodi na sedama sievidima atoi kauana, maika kipora bo gimirri gerese nama. Be nam aitau teneteneḡina da Eibraham na sedama bo yatayatanama e sievidi be teneḡina. Be avedi da Eibraham tauna guri na parate ya tavana, be yaḡoro da yawai natunatunana.

¹³ Inam banegidima matabudi tà giugiuuedina, taudi Mamaitua na saugama nam ti paḡona, be adi waisumaḡe a miamia da a gurina. Be taudi adi waisumaḡe yaḡoro a kataie da Mamaitua aba ya sausaugena yaḡoro noḡodie ya veraveraina, avedi da madanie. Vutuna aubainama taudi ai nuavere be adi waisumaḡe nam ti bekuna. Be maraudebatoredi a riuriuna da taudi uma dobune vaḡaḡai ta naḡonaḡona, be adi gabuma nam uma ima kenakenana. ¹⁴ Banaga inam nama giudima ta giugiuna, taudi adi gabu ḡomama deḡo e kenakenana, vutuna ta wanewanena. ¹⁵ Taudi adi vaḡaie gabu muridie a gosegosedina nam vutuna ti wane be ti naḡonaḡona, ibewa. Baninama deḡoda inam dobudima a gosegosedina sibo ti wanena, taudi tokare teneteneḡinama sibo a munaḡana. ¹⁶ Be taudi nam ti munaḡana aubainama, inam tawai kataidana da taudi gabu ḡesau vere vavasaḡinama marae, kana naḡoma a naḡonaḡona. Vutuna aubainama raḡanine deḡoda Mamaitua

garone tai kawa mamaina, tauna tokare nam debanama e suba. Baninama taudi adi meagaima Mamaitua kaiteka ya vokaukaua wainonogi be e kenakenana.

¹⁷⁻¹⁸ Be Mamaitua Eibraham na waisumağama ya rara rubuna rağanine, Eibraham na waisumağama aubainama tauna ya vokaukauana da nuanama natunama Aisik sibo yai guri be Mamaitua garone ya tipana. Avedi da Mamaitua Eibraham garone umanama ya saugana, "Aisik na dame tokare am sedama è sausaugemna ya utemna." ¹⁹ Be Eibraham yağoro yai sumağda Mamaitua teneteneğinama da tokare Aisik gurie be e kawa midisuguna. Be anikitana da Aisik guri maida, be Mamaitua ya paço munağena.

²⁰ Be Aisik na waisumağama aubainama tauna Jeikob be Iso yai aiainidina adi yawasanama rağan muriğä aubainama.

²¹ Be Jeikob rağan gaubonağda sibo nuanama ya tauyakasi be ya gurina, tauna na waisumağama aubainama digona yai tupu yasi da ya midi be noğone Mamaitua ya kawa sage dokena, be mate Jousep natunatunama tenatenağaga yai aiainidina.

²² Be mate Jousep rağanine gaubonağda sibo nuanama ya tauyakasi be ya gurina, tauna na waisumağama aubainama Israel banegidima nema Ijiptma be ta dobina adi giuma ya giu dokena. Be mate tauna ya riuwai nonogidina da rağanine Ijipt ta dobidobi porena, tauna turiğinama mate ta kiroğidi be ta nağda ta dobodina.

²³ Be Mousis na dosima adi waisumağama aubainama taudi Mousis ya tubutubuğana murine, tauna a semona naumeki da nawaravi rabuiteğä a kovina. Baninama taudi a kita da Mousis tauna nam kamai gomagomana i tubuğana, be guyau Pero aba ya riuriuena taudi nam ti nairena.

²⁴ Be Mousis ya moramoraba porağana rağanine, banaga a riuriuna da guyau Pero natunama waivinama kabe Mousis i tikatika. Be tauna na waisumağama aubainama ya riutuağiedi da nam nama sibo a riu. ²⁵ Be Mousis na góanama da Mamaitua na banagama mate tai nuatoitoi tenağana, be tauna nam gewagewa na wainuaverema rautupo góminama nuanama ti soruna. ²⁶ Be Mousis waivaravara matabuna Kerisoe tunine ya biridi be ya dami poredina. Baninama inam waivarevaredima vutudi tauna ya góegoedina, be nam Ijipt na waiguyauma taukaiedima i góena. Be tauna yawai nuaverena da tokare Mamaitua maesa e utena. ²⁷ Be na waisumağama aubainama Ijipt ya gosena, be guyau Pero na medima matabudi murine ya sivudi be nam i nairena. Be Mousis tauna naumeki da Mamaitua waimuriwatane-nama ya kaiguratena, maika kabe matağomine Mamaitua i

kita be iwai muriwatane. ²⁸ Be Mousis na waisumağama aubainama, tauna Nağopore soinama ya voie be sipu kosinide matakeda ya rodedina da tauwai guri aneanama nam Israel sededima kaevoudima sibo yai guridi.

²⁹ Israel banegidima adi waisumağama aubainama, taudi egasi sabasabanama a davuna maika kabe dobu ġasağasarine ti nağonągo. Inam rağanine Ijipt banegidima ai sinedi da muridiğä kabe ta nağö da a monu rovona.

³⁰ Israel banegidima adi waisumağama aubainama, Jeriko meagainama rağan 7 nopolie taudi ai verau kwaviviro be adi waisumäge inam garibabanama ya rauburirina.

³¹ Be toretore waivinama isanama Reiheb, tauna na waisumağama aubainama tauwai neneğana rabui ya sagudina. Vutuna aubainama Israel banegidima tauna nam ti gurina, rawarawağaiğaidima ġesaudima ai guridina maika.

³² Be aba ġesauenama sibo yà riuemi? Nam gavogavo ima kenakenana da banaga ġesaudima adi giuma sibo è riuemi maika, Gidion, Barak, Samson, Jepta, Deivid, Samuel be peroperoveta ġesaudima. ³³ Taudi vutudi adi waisumäge guyaguyau ġesaudima adi tauiğarama ai gwağedina. Be taudi adi waisumäge didimanae awai badana. Be ġesaudima Mamaitua aba ġarodie ya sausaugena, taudi a pağona. Be ġesaudima laion iğeigeridima a kawa gaugaudina. ³⁴ Be ġesaudima adi waisumağama aubainama kai menamenane be nam ti kara gorudina. Be mate tauiğara ġesaudima nam teneteneğina da sibo taudi ai guridi. Be adi vogwağagwağae ai rewapana, be adi ġaviamä ai gwağedi be a tavudina. ³⁵ Be waiwaivi ġesaudima adi banagama guriguridima peroveta ai yawasanidi be a ragau munağedina.

Be tauwai sumağä ġesaudima piripiri dosidima a bavidina. Banaga gewegewedima tauwai sumağä ġesaudima waiguri makaiedima nam ti ġoena. Baninama taudi adi ġoanama da ta kovoğä da ta kovoğä guratedi, be muriğä da tai guri ġomedina. Be a riuriuedina, “Değoda Mamaitua ko riutuatuağaiena, tokare ka riuporemi be ko nağona” Be tauwai sumağä taudi Mamaitua riutuatuağaienama nam ti ġoena, baninama taudi a kataiena da tokare midisuğu munağä na rağanie taudi mate ta midisuğu be yawasana vere vavasağinama ta pağona. Vutuna aubainama taudi waiguri makaiedima a tuağai be noğone a kovokovo guratedina, muriğä da awai guri ġomedina. ³⁶ Be tauwai sumağä ġesaudima ai dibögidi, a kwapudi, a rauseinidi be dibure a biribiridina. ³⁷ Be ġesaudima a rauyekudi da a gurigurina, be ġesaudima soae a soasoa rakedina, be ġesaudima a rarau kwatikwatidina. Inam banegidima waisumeğidima, taudi

gara ragoragodima a kote kotedina maika sipu bo gote kopidima. Be taudi waikaruwağawağā banegidima, be banaga taudi a raraukivi gewegewedi be a kawakawa gewegewedinā. ³⁸ Banaga gewegewedima tauwai sumağā a kauedi da adi kaba miama dobu kavekavedie, oya debediğā, guba be dom nōpodiğā a miamia nağona. Inam nama banegidima waisumegidima uma dobunama nam i raukitedina da sibo a mia.

³⁹ Inam banegidima Mamaitua yai aninedi be e kawakawa sağedina adi waisumağāma aubainama. Be yağoro da Mamaitua aba ġarodie ya sausaugena nam ti pağona. ⁴⁰ Baninama Mamaitua na ogama verenama ya tarağina da yawasana kenakena nonoğinama nam taudiğā sibo a pağō doke. Ibewa da taudi tauda ta raberabedana, naumeki da tauda taudi mate tāwai rawateğeina rağanine, Mamaitua aba ya sausaugedana baniğominama, tokare matabuda tà banavina.

12

Matadama tà pore da Yesu taunağā tà kita didina

¹ Yodi tè kita da waisumağā kana matamatama toitoi dobu matabuna yai verau kwaviviro da ya tava munağana. Vutuna aubainama abağā kauidima ta panipanida be ta sorusoru waitinamuridana, vutudi tà kaiporaporağana. Be mate gewagewa tà gose poredina, be tauda naumeki da waireisis nopone tà manini kauana. ² Be matadama tà pore da Yesu taunağā tà kita didina. Tauna vutuna dà waisumağāma yai kare be parate e tavaitedana. Tauna nuavere dosinama pağonama aubainama guri waimata warawaranama korosie ya dami porena. Be yodi tauna Mamaitua na waiguyauma gabune, kasaunama yauwane e miamiana. ³ Ko noğoti da tauna banaga gewegewedima adi pariviravirama matabudi yai niuredina. Vutuna ko noğoti da taumi tokare nam ko tunigari be nuemima e beku.

Mamaitua natunatunama e kwapukwapudina

⁴ Taumi gewagewa ko waiğaviena inam naumeki, be yağoro nam piripiri ko banavi be kosinimima i darorona. ⁵ Mamaitua na sedama ġarodie aba ya riuriuna nuemima ya koa, bo? Tauna duğumima aubainama umanama ya riuna, “Taukui, rağanine Bada waikatakataimma aubainama e kwapukwapumna, nam kwai nuaboya.

Be rağanine aba kuya voivoie be e riutuağaiemna, nam nuamma e beku.

⁶ Baninama Bada aitaugā ewai nuapağgoedina taudi vutudi e kwapukwapudina.

Be aitauāga da ewai kawa natunedina, tauna e kovokovoğidi be ewai katakataidina."

⁷ Değoda piripiri ko banabanavidina, naumeki da ko dami poredi be ko noğoti da inam Mamaitua e kwapukwapumina, baninama taumi na sedama aubainama. Baninama tamatamadama matabudi adi vaivaima inam nama. ⁸ Mamaitua na sedama matabudi e kwapukwapudina. Be değoda Mamaitua tam nam e kwapum, tam inam nam tauna natuğomina. Tam maika keda gomenimma, be nam tamam. ⁹ Tauda matabuda tamatamadama uma dobue ta kwapuda be tà vivivivedina. Vutuna aubainama Mamaitua mate tà vivire be tà yawasanana. Baninama tauna tauda aruidama matabudi tamedima.

¹⁰ Rağanine tauda ğaüğaubode tamatamadama uma dobue taudi adi ġoane nama modi bisanama nopolie a rautapa kwapudana. Be Mamaitua e kwapukwapudana, inam tauda sagudama aubainama, da tauda tokare tauna maika banaga babaudama ta tubuğana. ¹¹ Be Mamaitua e kwapukwapudana rağanine, tauda nam tamawai nuaverena. Be tauna na waikwapuma banidima tokare tà kataiedina, inam kawapudima damodie didimana be suba tà banavidina.

¹² Vutuna aubainama nimemima ko kawa didimanidi, be kağemima koya nokudi be ko miamiana, ko midisüg be ko varoronidi da tai rewapanu munağā. ¹³ Be ami waisumäge nağō koi karena keda didimanine. Inam kedane tokare nam ko beku, ibewa da ko yawasanana.

Mamaitua nam ko miatautaurie

¹⁴ Ko raurubu gurata da banaga matabudi mate subae ko miana. Be mate taumi sibo yawasana babaunama banagimima koya tubuğana, baninama değoda taumi nam nama ko tubuğā, taumi tokare Bada nam ko kita. ¹⁵ Ko kita kaua da ġaromie nam aitau Mamaitua na raukiviverema e miatautaurie. Baninama değoda inam baneginama tokare pesi gewagewanama e tubuğā, be gewagewa ġesaudima mate e sağedi be banaga e kawa miremiredina. ¹⁶ Be mate ko kita kaua da nam aitau ġaromie e badara yababayababa. Be mate nam Mamaitua ko noğota tuağiae maika Iso, baninama Iso tauna yaba gewagewanama ya voiena. Iso tauna tautuağā aubainama, rağan muriğā tamanama na waiguyauma sibo yai buderiena. Be kaniguri yai sina da na waiguyauma tasinama ya utena, be tasinama ġarone kani ya pağona. ¹⁷ Be ko noğoti da muriğā tauna tamanama na waiaiainama ya ġoena be you, tamanama Iso ya riutuağaiena. Be tauna nam keda dego i banavina da na voia waigewama sibo ya kawa didimani, avedi da ma ġabana keda ya wanewanena, be nam teneteneğina.

¹⁸ Be taumi Mamaitua ġarone koya naġo be koyawai sumaqena raġanine, dabudine taumi yodi Mamaitua nam koma nainairena, Israel banegidima maika. Taudi boni oya Sainai diane a midi be oyanama debane kai ya remremna a kitana, Mamaitua Mousis mate a giugiuna raġanine. Dabudine dobu yai kupikupi be kaibitibiti dosinama ya tavana. ¹⁹ Naumeki da bogigi ya riuriuna murine, bona dosinama a vaiena maika parere. Dobudine taudi a naira da a naira kauana, vutuna aubainama taudi Mousis a riuena da tauna Mamaitua sibo yai baġana, baninama taudi Mamaitua bonanama vaienama nam ti ġoena. ²⁰ Dabudine Mamaitua ya riuna, “Deġoda ai banaga bo ai musara uma oyane e naġona, taudi ko rauyekudi da ta gurina. Dabudine nama a vaivaiena, taudi a naira da a naira kauana.” ²¹ Be abaġa taudi a kitekitedina inam ai nuanainaira kauana. Vutuna aubainama Mousis ya riuna, “Taugu naira e kawakawa kaġagusugusuguna.”

²² Be taumi inam nam nama. Taumi oya Saionma, Mamaitua yawayawasaninama na meagaie koya tavana. Inam vutuna Jerusalem marae be dabudine anea ġumnamā nam anisiesievi ma mosaridi a rawateġeidina, dabudine taumi koya tavana. ²³ Be mate taumi Mamaitua na damma ġarodie koya tavana. Taudi vutudi kaevoudima yai yawsana dokedina. Taudi isedima Mamaitua marae ya girumi be ta kenakenana. Be mate taumi Mamaitua ġarone koya tavana, tauna vutuna tokare banaga matabudi e etaredina. Be mate taumi didimana banegidima aruidima ġarodie koya tavana. Taudi vutudi Mamaitua ya voiedi da banaga batuturidima a tubuġana. ²⁴ Be mate taumi Yesu ġarone koya tavana, tauna vutuna waianina vaunama ya utedana. Yesu tauna Mamaitua be tauda poude e midimidina. Be kosininama dà gewagewama ya koġa poredina. Yesu kosininama nopone vari verenama e kenakenana, nam Eibol kosininama maika.

²⁵ Vutuna aubainama ko kita kaua da Mamaitua aba e giugiuena ko voteyeteyena, be nam ko vaia pore. Baninama boni Israel nama uma dobue Mousis Mamaitua na giuma ya giugiuena, taudi a vaia pore be kovoġa dosinama a banavina. Be yodi inam mara banaginama e giuguedana, be deġoda riunama tà rawaġaġaiġiena, tokare dà kovoġama ya moraba da ya moraba vavasaġana tà paġona. ²⁶ Boni Mamaitua ya giugiuna, bonane dobu ya gusuna. Be yodi tauna na saugama ya boru munajje be ya riuna, “Taugu tokare raġan ġesaune gunuma be dobu yà gusu waidaberara munajġedina.” ²⁷ Be inam giunama: “Raġan ġesaune e voia munajġena”, baniġominamā inam umanama: Tauna doğae be gunume, yaba matabudi boni ya voivoiedina, vutudi e gusu

waidaberaridi be ta samoana. Be nam teneğidima nama ta kenakena. Be değō yabedima nam e gusu waidaberaridi, taudi tokare ta kena nonoğana, be nam ta samoan.

²⁸ Be tauda sibo naumeki da Mamaitua tèi kaiwena, baninama tauda na waiguyauma wairewapana vavasağinama tokare tà pağona. Be inam waiguyaunama tokare bagibaginama e midina, be nam ta gusu waidaberari. Vutuna aubainama tauda Mamaitua ġarone ma vivirida be ma nairida tà rauduneena. ²⁹ Baninama tauda dà Mamaituama tauna maika kai yaba matabuna tauwai karamutunama.

13

Kuristen banagidama nema sibo tè mia bakona

¹ Ko kaigurate da Kuristen wainuapağone ami banagama ami banagama koi nuapağoe. ² Be vağavağai sibo koyai aninedi da ami vadae sibo a sağana, baninama banaga gesaudima nama a voivoiana, muriğā anea a kayowai doka sağedina adi vadae. ³ Be ami banagama dibure miemienidima nam ko noğota poredi, baninama ko noğoti da taumi mate kabe dibure ko dibudibura tenağā. Be banaga tawai nuatoitoina mate nam ko noğota poredi, baninama ko noğoti da taumi mate kabe nama kowai nuatoitoi.

⁴ Be matabumi nağı sibo koya vivira kauena. Be nam am visarama bo am tauğomama debane mui kwa pore. Baninama aitaüğā nama ta voivoiana, Mamaitua tokare etare e sivudina, be teneğinama nama banaga badabadaridima ġarodie e tubuğana.

⁵ Ami yawasanae mane nam koi nuapağoe. Değoda aiyabağā ġaromie tima kenakena inam sibo naumeki, baninama Mamaitua umanama ya riuna,

“Taugu tokare tam nam yà gosem be nam nuaguma e koa.”

⁶ Vutuna aubainama tauda nuadama torane umanama tokare tà riuna,

“Bada tauna vutuna yau tausaguma. Taugu tokare nam yà naira. Aitau tokare nema e bakegu?”

⁷ Aitaüğā boni aubaimima ai bada be Mamaitua riunama ġaromie a giugiuena, vutudi ko noğotidi. Be adi yawasanae nema awai patutuna, vutuna koi nuanoğonogotedi be adi waisumağama koi tupotupoğanena.

⁸ Yesu Keriso tauna vutuna teneğinama boni, yodi be nokoi ya nağona e miamia nonoğana. ⁹ Waikatakatai tabu be tabu kaikaiyovudima nam taumi tai doka waigewemi. Be verenama da Mamaitua na raukiviverema nopodama sibo ya kawa rewapanina, be nam kani adi tarawatu. Kani adi tarawatuma inam nam banibiribiridi.

¹⁰ Tauda dà oltama riuriu kauinama inam marae. Be pirisi aitauğā dobue tarawatu poredima tawai muriwatanedina, taudi nam teneteneğina da inam oltane kani ta sana rubu. ¹¹ Boni pirisi dosinama tauna musara kosinidima ya kiroğā nawe gabu babaune, be dabudine musara kosinidie Mamaitua ġarone ya tipatipana, tauna be banaga adi gewagewama aubaidima. Be musara banikavediğā ġavoe meagai diane a gabugabu gorudina. ¹² Be kauinama teneğinama nama Yesu ġarone, tauna kosinine na banagama ya kawa babaudina, be meagai diane yai nuatoitoina. ¹³ Vutuna aubainama tauda mate nama, yodi ġavoe tà nağona tauna ġarone. Be değoda dobu e tuağaieda be Yesu isanama aubainama tai varavaradana, naumeki da inam waivarevaredima tunide tà biridi be tà dami poredina. ¹⁴ Baninama tauda dà meagaima kenakena nonoğinama nam uma dobune ima kenakenana. Ibewa da tauda dà meagaima kenakena nonoğinama tokare e veraverauna e tavana, vutuna yodi tà wanewanena.

¹⁵ Vutuna aubainama rağan matabuna Yesu Kerisoe tauda dà puyoma kaisuğusuğu Mamaitua tà utena. Inam vutuna tauda mudude Yesu Keriso tåwai mağatarina. ¹⁶ Be mate nam nuemima e koa da ami banagama ġarodie vere ko voie be koi saguna. Inam waisagudima vutudi taudi puyo, be inam puyodima vutudi Mamaitua ta voie da ewai nuaverena.

¹⁷ Taumi eklesia ami babadama ko voteyeteyedi be aba ta riuriuemina, naumeki da ko voiedina. Baninama taudi vutudi ta raberabemina da ami waisumağe nam ko beku, be nema ġaromie ta noyanoya bakona, tokare Mamaitua e kaiviredina. Vutuna aubainama ko voteyeteyedi da adi noyae ma nuaveredi ta noyana, be nam ko tainuaboyedi. Baninama değoda ko tainuaboyedina, tokare nema ta sagu bakemi?

¹⁸ Yau bana, aubaimaima ko moiragi nonoğana, baninama tauma ama noğote nam aba ima tatai paraparamaina, be tauma ka rara rubu guratana da yaba matabuna ġarone sibo yawasana verene kè miana. ¹⁹ Be yau waibağama tenağā ġaromie ya boruboruna da aubaiguma ko moiragi da taugu waiğapa sibo ġaromie è tava munağana.

²⁰ Tauda dà Badama Yesu, tauna sipu taurabenama wairewapaninama. Tauna kosinine waianina vaunama ya kawa rewapani be yodi e kenakena nonoğana. Vutuna aubainama tauna gurie be Mamaitua ya kawa midisuğu munağena. Be yodi taugu ya moimoiragina Mamaitua suba tauvoienama ġarone, ²¹ da tauna sibo ya voiemi da taumi yawasana matabuna ġarone tauna sibo koyai nuaverena. Yodibe

taumi teneteneğinama da na ġoanama ruvane nama voia veredima sibo Yesu Kerisoe koya voiedina. Tauna vutuna tà kaisuğusuğu nonoġena. Inam riukaua!

22 Yau bana, yàwai baġa guratemina da yau raukurama matabudi ko ragau kauedina. Baninama taugu yau letama rautupo ġominama ġaromie è girumina.

23 Be yài varimi be ko kataie da turadama Timoti dibure be a kaiporena. Deġoda waiġapa ġarogue e tavana, naumeki da tokare ka verau be ka vakitemina.

24 Ekalesia babadidima matabudi ko riuedina tauma kawai kaiwedina. Be mate Mamaitua na damma matabudi kawai kaiwedina. Be Itali banegidima mate taumi tawai kaiwemina.

25 Mamaitua na raukiviverema sibo matabumi ġaromie ya kenana.

Jeims na letama tauwai sumaḡa matabudi ḡarodie

Jeims na waikaiwama

¹ Taugu Jeims, Mamaitua be Bada Yesu Keriso adi taunoyama uma letanama yà girugirumina taumi aitaūga Jius banegimima tauwai sumaḡa koya daberara be dobu matabuna nopolie ko miamiana ḡaromie, taumi matabumi yàwai kaiwemina.

Piripiri be raurubu

² Yau bana, taumi piripiri tabutabu ko banabanavidina raḡandie, taumi sibo koyai nuaverena, ³ baninama raurubu ami waisumaḡama e voie da taumi koi rewapanana. Vu-tuna aubainama raurubu ko damipore da e naḡo kwasana. ⁴ Be deḡoda raurubu ko damiporena, taumi tokare ami waisumaḡe ko kaiguratena, be kaigurata e voie da taumi tokare nuemima e bagibagi, ei rewapanana be tokare nam aba ko maruabie.

⁵ Be tam aitau nuauyauya kwa ḡoeḡoena, naumeki da Mamaitua kwai baḡa be tauna tokare e utemna, baninama tauna nuanama vereverene e paipairuna banaga ḡarodie. ⁶ Be tam Mamaitua kwawai baḡana raḡanine, naumeki da kwai sumaḡana, be nam kwa noḡotabekubeku, baninama aitau da e noḡonogota bekubekuna, tauna inam maika rabama sive e riḡariḡa waibabarina maika. ⁷ Inam nama baneginama na waibaḡama tokare Bada nam e vaie be na ḡoanama e ute, ⁸ baninama tauna noḡota raḡaraḡa baneginama aubainama. Tauna na noḡotama ta naḡonago yababayababana, be nam gabu tenaḡa tima kenakenana.

⁹ Be tauwai sumaḡa aitaūga waikaruwaḡewaḡedima sibo ai nuaverena, baninama Mamaitua matane taudi waiguyau banegidima. ¹⁰ Be taudi aitaūga waiguyaudima, taudi sibo a kataie da Mamaitua matane inam waiguyaunama kavakavanama, be inam waiguyaunama tokare ei kavena dobira beraninama busonama maika. ¹¹ Baninama suara e raranana raḡanine, mui ta poki be inam beraninama mate busonama e poki da e kuruvana. Be beraninama kurinama noḡone tè kitakitana tokare ei kavena. Inam kauinama teneḡinama nama banaga waiguyaudima, taudi tokare adi yawasanae a waiguyauna mate tai kavedina.

¹² Nuavere tauna aitau raurubue e midimidi bagibagina, be nam ima bekubekuna. Tauna tokare na mae-sama yawasana kenakena nonoġinama e paġona. Inam vutuna Mamaitua ya saugana da banaga aitaūga tawai nuapaġoena e utedina. ¹³ Be aitau da raurubu e banabanavina raġanine nam sibo ya riuna, “Uma inam Mamaitua e raraubuguna”, inam avedi. Baninama Seitan tokare nam teneteneġina da Mamaitua e raurubu da gewagewa e voie, be mate Mamaitua tokare nam aitau e raurubu da gewagewae e beku. ¹⁴ Ibewa da banaga nopolie, wainua noġonogota gewegewedima e soru nawedi be e gwayegwayedina. ¹⁵ Be wainua noġonogota gewegewedima ta moramorabana damone, gewagewa ta tubutubuġana. Be gewagewa damodie guri ta tubutubuġana. ¹⁶ Vutuna aubainama yau bana, nam aitau sibo yai kedadoka waigewemi.

¹⁷ Yaba veredi be wainua vaivaidima matabudi note Tamadama ġarone be ta yovoyovona. Tauna vutuna yana Tamanama, be tauna nam maika vaguru da ewai kati vitavitate. ¹⁸ Mamaitua na riukauama ya utedana, aubainama taunaġa na ġoane tauda ya vinedana da tauda tauna na sedama tē tubuġana. Be yaba matabudi ya voivoiedina nopolie, tauda tē saġa guratana.

Tà vaie be tà voienna

¹⁹ Yau bana, uma giunama ko noġoti: Taumi waibeavaia, naumeki da koi beavaia kauana, be nam giu koi paparane, be nam ko medi makai. ²⁰ Baninama medie tam tokare nam Mamaitua na ġoanama kwa voie be didimanae kwa mia, ibewa.

²¹ Vutuna aubainama yawasana miremiredi be gewegewedima ko gose poredina. Be Mamaitua riunama nopolie ya kumakumana, vutuna voyaġote ko paġo be ei yawasanima.

²² Nam na giuma ko vaivaia ġome, ibewa da taumi aba koya vaivaiena, naumeki da ko voienna. Be deġoda vaienaġa ko vaivaiena be nam koma voivoieni, inam taumiġa kowai kedadoka waigewmina. ²³ Tam deġoda Mamaitua riunama vaienaġa kwa vaivaiena, be nam kuma voivoieni, tam inam maika banaga garasie noġonama kabe i kitakita, ²⁴ be garasi e gosegose porena raġanine, tauna noġonama kitinama nuanama ya koana. ²⁵ Mamaitua na tarawatuma vaunama, inam Keriso varinama vere vavasaġinama, inam vutuna banaga e kuvekuvesidina. Be aitau da inam tarawatunama vaunama e kitakita nonoġe be e voivoieni, Mamaitua inam baneginama tokare na voiama matabudi ġarodie ei aiainina.

Baninama tauna aba ya kitakitana, nam nuanama ima koakoana.

²⁶ Aitau e riuriu munaġena da tauna Kuristen be menanama nam ima raberabe kauena, inam baneginama tauname ewai kedadoka waigewa munaġena, be na waikuristenma inam kavakavanama. ²⁷ Tamadama Mamaitua matane, Kuristen vere vavasaġinama inam umanama: Kedakeda be kaiyababa adi nuaboyae ko sagudina. Be ko rabe kauemi da nam dobu na yawasanae koi yogimi.

2

Nam banaga verediġa ko rauneneedi

¹ Yau bana, taumi dà Badama Yesu Keriso boruborumi-nama kowai sumaġena, aubainama nam banaga verediġa ko rauneneedi.

² Deġoda taumi koyawai taparoro be banaga rabui sibo ti saġana, banaga tenaġa na garama veredima be na waisiama maesidima dosidima, be banaga ġesaunama waikaruwaġawaġanama na garama ragoragodima. ³ Be taumi deġoda banaga waiguyaunama taunaġa ko raunenee be ko riuena, “O turaguma, kwa verau uma guni verene kwa mia.” Be banaga waikaruwaġawaġanama ko riuena, “Aii, tam noa dabudine ġavoe kwa midi.” bo “Murigue doğae kwa mia, be nam gunie.” ⁴ Taumi aba kowai tubuġi? Taumi inam noġota gewegewedie banaga ko kitakita wairuvedi, be inam kauine Bada tubuġinama ko daridariġena.

⁵ Yau bana, koi beavaia. Dobu banegidima adi waikitae banaga waikaruwaġewaġedima taudi kabe banaga yababa. Be Mamaitua inam banegidima ya vinedina da taudi adi waisumaġama ei rewapano be na waiguyauma tai bude-riena. Inam waiguyaunama vutuna Mamaitua ya saugana da aitauġa tauna tawai nuapaġoena ta paġona. ⁶ Be taumi banaga waikaruwaġewaġedima ko riuriu saisairedina, taudi nam aiyaba ġaromie tima voivoia waigewana. Be waiguyau banegidima taudi vutudi taumi ta kawakawa gewegewemina. Taudi vutudi ta etaetaremi, ⁷ be ami Badama isanama verenama tawai diboġina.

⁸ Mamaitua tauna vutuna dà guyauma. Be girugirumi-nama porane tauna umanama ya riuna, “Turamma nuanuamma e paġona, maika nema tam kwa ġoegħoe munaġemna nama.” Be deġoda taumi inam giunama koi muriwata-nena, taumi naumeki da vere ko voivoiena. ⁹ Be deġoda banaga ġesaudima ko rauneneedina be ġesaudima ibewa, taumi inam gewagewa ko voivoie be tarawatu kowai kati kotovina. ¹⁰ Baninama deġoda tarawatu matabudi kwawai

muriwatanedina, be nopolie tenaḡa kuyai kati kotovina, tam inam tarawatu tabutabudima kuyai kati kotova rovdina. ¹¹ Mamaitua ya riu vavasaḡa be umanama ya riuna, “Nam kwa rauwaivi bo kwa rautaugomā”, be mate ya riuna, “Nam kwa vunuḡa”. Vutuna aubainama tam deḡoda nam ku rauwaivi bo ku rautaugomana, be deḡoda kuya vunuḡana, tam inam yaḡoro tarawatu tauwai kati kotovinama.

¹² Mamaitua na tarawatuma vaunama, inam Keriso vari-nama vere vavasaḡinama, inam vutuna banaga e kuvekuvesidina. Inam tarawatune taumi tokare e etaremina, vutuna aubainama aba da ko vatovato be ko voivoiedina, ko kita kauana. ¹³ Vutuna aubainama ami raunuatoima banaga matabudi ḡarodie sibo ya kenana. Deḡoda ibewa, etara raḡanine taumi mate Mamaitua tokare nam e raunuatoiemi. Tam yodi deḡoda raunuatoi ḡarome e kenana, naumeki da tokare nam kovoḡa kwa banavi.

Waisumaḡa voia mate

¹⁴ Yau bana, deḡoda tam aitau kwa riuna, “Taugu waisumaḡa banegiguma”. Be deḡoda inam waisumeḡinama nam baninama mate, inam nama waisumeḡinama tokare ei yawasanim, bo? Inam waisumeḡinama kavakavanama. ¹⁵ Deḡoda turamma ḡarone nam gara bo nam kani ¹⁶ be tam kuya riuena, “Yau tura, ebom, kwai garagara kauana, Bada e rabem; kwa mia kauana.”, be tam turamma nam aba ku utena, inam waikaiwinama tokare turamma e sagu, bo? ¹⁷ Be inam kauinama teneḡinama nama, deḡoda waisumaḡa taunaḡa be nam baninama mate, inam waisumaḡa gurinama.

¹⁸ Deḡoda aitau yodi sibo umanama ya riueguna, “Banaga ḡesaudima taudi Keriso tauwai sumaḡenama, be ḡesaudima voia veredima tauvoiedima”. Naumeki da taugu inam baneginama yodi umanama yà paribeena, “Deḡoda tam Keriso kwawai sumaḡena, be am waisumaḡama nam baninama mate, taugu nema yà katai bake da tam am waisumaḡama riuriukauina? Be taugu waisumaḡa baninama yà voiedi be ko kitedi. Yodibe ko kataie da taugu yau waisumaḡama inam riuriukauinama.”

¹⁹ Tam kwawai sumaḡana da Mamaitua tenaḡa e miamiana. Inam naumeki. Be penama mate tawai sumaḡana da Mamaitua tenaḡa e miamiana, be taudi Mamaitua ta naire be naira e kawakawa gusugusudina. ²⁰ Tam kuya bua kauana! Taugu yodi yà kataim da waisumaḡa nam baninama mate inam waisumeḡinama kavakavanama.

²¹ Bonimai waḡadama Eibraham kwa noḡoti. Mamaitua Eibraham na yawasanae ya kawa didimanina, baninama

na voiama aubainama. Tauna natunama Aisik raupuyo aubainama ya pani be olta debane ya boruna, waigurinama aubainama.²² Yodi ko kita, Eibraham na waisumağama be na voiama ta noyanoya tenağana. Eibraham na voiama tauna na waisumağama yawai kawa riukauena.²³ Inam kauine girugiruminama porane umanama ya riuriuna, ya kawa neganegana, "Eibraham Mamaitua yai sumağena, aubainama Mamaitua Eibraham ya kawa didimanina." Vutuna aubainama a riuriuna, "Eibraham Mamaitua turanama".²⁴ Yodi ko kita be ko kataie da Mamaitua banaga nam adi waisumağama taunağ'a aubainama i kawa didimanidina, ibewa da adi voiama mate aubainama ya kawa didimanidina.

²⁵ Inam kauinama teneğine, toretore waivinama isanama Reiheb, tauna Josua na tauwai neneğanama ya sagudi be muriğ'a semoe wari kedâga ya riupore nawedina. Vutuna aubainama Mamaitua tauna ya kawa didimanina.²⁶ Değoda tubuğ'a ġarone arua ibewa, naumeki da inam tubuğinama ya gurina, be kauinama teneğinama nama, değoda waisumağ'a nam baninama mate, naumeki da inam waisumağ'a gurinama.

3

Menamma kwa tom

¹ Yau bana, nam matabumi tauwai katakatai ko tubuğ'a, baninama ko noğoti da tauma aitaúğ'a tauwai katakatai tokare Bada e etare vavasağemaina, nam taumi ġesaumima maika.

² Tauda matabuda yaba toitoi ġarodie tà bekubekuna. Be aitau da menanama e tomtomna, tauna banaga vere-nama, be tokare teneteneğinama da na yawasanama e rabe kauena.³ Banaga hosi ta gerugeruena rağanine, taudi hosi mudunama taie ta nigori, be inam tainama ġaubonama ta sorusoruna ruvane hosi dosinama e voteyateya be nama e nağonağona.⁴ Be mate waga ko noğoti, tauna sive dosinama e suvesuve waibabarina. Be yabiyabi ġaubo ġominama inam waganama dosinama e boruboru waididimanina, kapena na ġoanama ruvane e nağonağona.⁵ Inam kauinama teneğinama nama mena, mena inam yaba ġaubo kokonama tunide e kenakenana. Be inam menanama ġaubonama e voieda da tà seğaseğara be piripiri dosidie tà tavatavana. Be kodara ko noğoti, kodara pakana-nama inam kai menanama ġaubonama, be e voie da kodara dosinama e tubuğ'a be dobira matabuna noponama e karakaratina.⁶ Vutuna aubainama mena inam maika kai. Menadama inam gewagewa na dobuma tunide e kenakenana. Mena e

kawakawa gewagewada, be e voie, da tauda dà yawasanama matabuna e gabugabu gorudana. Seitan tauna vutuna kai menade ya boru be e karakaratana.

⁷ Banaga tokare teneteneğinama da musara matabudi, maika kiu, musara daredaredima be iyana tà kawa marağamidina, ⁸ be nam aitau teneteneğina da tokare mena e kawa marağami. Mena inam yaba gewagewanama mota sarama maika, banaga e karakaratidi be ta gurigurina.

⁹ Tauda menade dà Badama bo Tamadama isanama tà kaikai suğusuğuna, be inam menanama teneğine dà banagama tawai tara tautauedi be tawai tara mosikedina. Inam banegidima taudi Mamaitua ya voiedina, kitedima tauna maika. Be tauda yağoro tà kunukunuredina. ¹⁰ Yau bana, mududama tenağga kavakava, be nopone kaisuğusuğu be kunura ta dobidobi tenağana. Inam nam nama sibo tè voivoia. ¹¹ Bigabiga tenağga nopone tokare nam teneteneğina da upa verena be upa górağoranama ta tava tenağga. ¹² Be mate yau bana, uma ko noğoti: Damaya tokare nam e vota be gobara e tubuğga, bo gobara tokare nam e vota be niura e tubuğga. Be inam kauinama teneğinama egasi nopone, tokare nam upa góma kwa redu be teneteneğina.

Nuauyauya riuriukauina be kaikaiyovunama

¹³ Ğaromie aitau da nuauyauyanama, be Mamaitua na yawasanama ya kataiena, naumeki da tauna sibo na yawasanae ġaromie vere yai mağatarina. Tauna vere sibo ya voivoiedina, be inam kauidie banaga ta kita da tauna voyağota be nuauyauya baneginama. ¹⁴ Be değoda tauna nopone unura, nuağorağora be moraba ta kenana, naumeki da tauna nam sibo ya kawa sağe munäge be ya riuna, "Taugu nuauyauya banegiguma." Inam matabuna kaiyovu be riukaua ta riuriu tuatuağaiena. ¹⁵ Uma nuauyauyanama inam nam marae be i yovona. Ibewa, inam dobu, tubuğga be Diaboro adi nuauyauyama. ¹⁶ Vutuna aubainama değoda aitau ġarodie unura be moraba ta kenakenana, inam banegidima yawasana kedanama nam ti kataiena. Be inam kauidie voia yababayaba be gewagewa ya moğavuna.

¹⁷ Be nuauyauya marae yovoyovonama inam na tabu. Inam nuauyauyanama e voieda da tauda vere tà votedina, inam suba, miagenuana, voteyateya be raunuatoi. Be mate riukaue tà giuna, be nam tà noğota raburabui, be nam noğota miremiredima ġarode ta kena. ¹⁸ Suba tauvoiedima taudi adi banagama ta sagusagudina da subae ta miana. Vutuna aubainama taudi adi waikai saguma votanama tokare vere be didimana adi banagama ġarodie ta banavidina.

4

Mamaitua na waibadama dibune ko miana

¹ Taumi koya kataie bo ibewa, da aba aubainama kowai kawa riuriu be kowai kawa ġasiġasi? Inam waikawa ġasiġasidima ta tubutubuġana, baninama tubuġa na ġoana be noġota veredima nopomie tawai ġavīġaviana. ² Taumi ami ġoanama yabedima kadi taiye banaga kowai guridi, be yaġoro inam yabedima tokare nam ko ragaragaudi. Taumi banaga adi purapurama ko kitedi, be ko unuunuredina. Vutuna aubainama taumi ami banagama mate kowai kawa riuriu be kowai kawa ġasiġasina, be yaġoro inam yabedima tokare nam ko ragaragaudi. Be aba aubainama inam yabedima nam koma ragaragau? Inam baninama, taumi Mamaitua nam komawai baġana aubainama. ³ Be deġoda Mamaitua kowai baġa be ami ġoanama nam e utemi, inam baninama taumi ami noġotama gewegewedie Mamaitua kowai baġana. Taumi Mamaitua kowai baġana da tauna ami ġoanama kabe e utemi, be inam yabedima yawasana wainua vaivaidie kabe koi yakaredi, inam nam i verena.

⁴ Taumi aitauġa Mamaitua ko tuatuġaiena, taumi inam waivi na tauġomama mui debane e poreporena maika. Aba aubainama taumi dobu na ġoanama kowai muriwatane? Koya kataie bo ibewa, deġoda dobu yawasanidima koi nupaġoedina, taumi inam Mamaitua ko tuatuġaiena. Deġoda taumi dobu yawasanidima koi turanedina, taumi inam Mamaitua na ġavīama. ⁵ Girugiruminama porane aba ya riuriuena inam giu kavakavana, bo? Girugiruminama porane umanama ya riuna, “Mamaitua Aruinama ya uteda benopode e miamiana, be tauna inam Aruinama debane dobu yawasanidima e koukouburredina.” ⁶ Be Mamaitua raukiviverere baneginama aubainama girugiruminama porane umanama ya riuna,

“Mamaitua banaga rarauguyaguyaudima e biri dobigeđina, be e raukiviverena voyaġota banegidima ġarodie.”

⁷ Vutuna aubainama Mamaitua na waibadama dibune ko miana, be Diaboro ko riutuaġiae da tauna e gosemi be naira e naġona. ⁸ Taumi ko verauna Mamaitua di-anne, yodibe Mamaitua e verauna taumi diemie. Taumi gewagewa banegimima, nopomima ko koġa be ko kawa veremina, maika nema nimemima ko koġakoġana nama, be nam noporaburabui nopomie e kena. ⁹ Ami gewagewama aubainama koi nuaboya be ko ġabana. Koya kwatekwatvana, yodi ko gose be ko ġabana. Koyawai nuaverena, yodi ko gose be koi nuaboyana. ¹⁰ Bada matane ko ġaubo munaġa, be tauna e kawa saġemina.

¹¹ Yau bana, ami banagama nam koi karakara kutuedi bo koi tara piriedi. Değoda tam aitau turamma kwai tara piriена, tam inam Mamaitua na tarawatuma kwawai diboğina. Tam Mamaitua na tarawatuma nam sibo kuyai tara pirie, avedi! Tam sibo tarawatu kuya voteyeteyena. ¹² Tauwai tarapiri inam Mamaitua taunağā, nam tam. Tauna vutuna tarawatu ya utedana, aubainama tauna taunağā na ġoane nama tokare banaga ei yawasanidi bo e kawa gewegewedi, inam taunağā ewai badena. Tam nema maika kitam, be turamma kwawai tarapirie, wa?

Seğara dokadoka avedi

¹³ Taumi aitaugā umanama ko giugiuna, “Tauda manaka bo pomai tà naġo taonie da modi tenağā tà mia be tài bisnis da mane dosinama tà voienna.” Inam nama banegimima ami giuma yodi yà riuemi be ko vaiena. ¹⁴ Taumi nam ko kataienia da aba mateğā bo pomai e tubuğā. Taumi ami yawasanama inam kai basunama maika, yodi raġan ġaubonağā ko kitana, be murine ei kave munağħana. ¹⁵ Vutuna aubainama taumi sibo umanama koya riuriuna, “Değoda Bada e ġoena, naumeki da tauda tà mia be umanama umanama yabedima tà voiedina.” ¹⁶ Taumi ko raraу guyaguya be ko seğaseğarana. Inam kauinama ko gose pore. Seğara dokadoka inam yaba gewagewanama.

¹⁷ Taumi değoda vere koya kataienia be nam ko voie, inam tauna gewagewa.

5

Waiguyau banegimima ko kita kauana

¹ Taumi banaga waiguyaumima yodi koi beavaia kauana. Taumi tokare pripiri ko banavidina, vutuna aubainama yodi koi nuaboya kaua be ko ġabana. ² Taumi ami waiguyauma matabuna a bova be kwarikwari ami garama a kanidina. ³ Ami manema niranira a kanidi be a raubusabusāğħana. Be inam raubusebuseğinama tokare ei mağħatarana da taumi keda koya parena. Be inam niranirana taumi mate tubuğimima tokare e kani rovo be gienae kai e kara gorumina. Raġan damonama kaiteka e tavatavana, be taumi uma taragai be mane kowai dam raka yababena. ⁴ Ko kita! Taumi ami taunoyama ami sipie a noyanoya be nam kowai maesidina, vutuna aubainama adi bekurama yodi Bada wairewapana vavasağinama e vaivaiena.

⁵ Taumi dobue yaba toitoi tabutabu koyai dam raka yababedi be taumiğā kowai nuaverena. Taumi koya kani kapoteu be moraba ko nuanua sarisarina, taumi maika

bawa tokare raġan damone ta vunuġimi be ta nigomina. ⁶ Taumi banaga veredima koyai tara tautauedi be koya vunuġidina, avedi da taudi nam aba gewagewanama ġaromie ti voiena.

Koi raba nuetau be ko moiragina

⁷ Yau bana, koi raba nuetauna naumeki da Bada e verau munaġana. Tausipi ko noġoti, tauna ewai raba nuetauna da kusana e dobi da kani ta gogo be maura e tubuġana. ⁸ Be teneġinama nama taumi mate. Koi raba nuetau be piripiri raġandie ko midi da bagibaginaġa, baninama Bada na kaba verauma kaiteka maida.

⁹ Be nam ami banagama mate koi suramudu, avedi, inam kauine tokare Bada e kovoġimina. Baninama tauwai tarapiri tauna kaiteka maida.

¹⁰ Yau bana, peroperoveta ko noġotidi, taudi piripiri be wainuatoitoi raġandie ai nuabagibagi be Bada isane a giugiuna. ¹¹ Mamaitua inam nama banegidima yai aiainidina, baninama taudi piripiri nopolie nam ti bekuna, be ai nuabagibagina. Joub ko noġoti. Tauna piripiri dosidima ya banavina be yaġoro yai nuabagibagina. Vutuna aubainama Bada yai aiainina, baninama Bada tauna raunuatoi banegidina.

Waisaġina be rausaġi adi giuma

¹² Be mate, yau bana, nam ko rausaġi. Nam mara banegidima isedie, bo dobu bo yaba ġesaudima isedie ko rausaġi, avedi. Taumi deġoda koi aninana, naumeki da koi anina ġomana, be deġoda tuaġai, naumeki da ko tuaġai ġomana. Nam i verena deġoda tokare etare ko midi be gewagewa dosinama ko banavina.

Waisumäge ko moiragi

¹³ Deġoda tam aitau kwawai nuatoitoina, naumeki da kwa moiragina. Be deġoda tam aitau kwawai nuaverena, naumeki da tam kwa sare be Bada isanama kwa kaisuġusuġuna.

¹⁴ Deġoda tam aitau kuya sidana, naumeki da ekalesia babadidima kwa riuedi da Bada isane aubaimma ta moiragi be oeri debame ta ġinina. ¹⁵ Be moiragi waisumäge, tokare Bada inam baneginama sidasidanama ei yawasanina. Be deġoda inam baneginama ġarone gewagewa, naumeki da Bada tokare inam baneginama na gewagewama e noġota porena.

¹⁶ Vutuna aubainama ami banabanagama mate ami gewagewama koi kawa kuvesa be ko moiragi vivirana, yodibe taumi tokare ko yawasanana. Be didimana baneginama na moiragima inam yai rewapani kaua be bani

biribiridima. ¹⁷ Elaija ko nōgoti, tauna banaga āgomā maika tauda. Be tauna nuanama tabutabune marakapo aubainama ya moiragina da nam sibo kusana ya dobi. Be inam rāganine kusana nam i dobina naumeki da modi rabuitēga be nawaravi 6 a kovina. ¹⁸ Murīga ya moiragi munāga da kusana ya āgōgo, be dubue kani a tubūgana.

¹⁹ Yau bana, taumi dēgoda aitau tenāga āgaromie riukaua waimuriwatenenama sibo i gose be tam aitau inam baneginama ku veraūga munāgena Bada āgarone, tam inam voia verenama kuya voiena, ²⁰ baninama uma ko nōgoti, tam aitau da gewagewa baneginama tauna gewagewa kedane ya nāgonāgo be tam kuya veraūga munāgena, tam inam baneginama gurie be kuyai yawasana munāgena. Be na gewagewama toitoi Mamaitua ya nōgota poredina.

Pita 1

leta pakanama ya girumina

Pita na waikaiwama

¹ Taugu Pita, Yesu Keriso na apasolma. Uma letanama yà girugiuroma taumi tauwai sumaga aitauga koyai daberarimi be Pontas, Galesia, Kapadosia, Eisia be Bitinia provins-diga ko miamiana garomie. Taumi mara banegimima be nam uma dobunama garona aubainama vaagi dobu matabuna ko naonga. ² Tamadama Mamaitua bonidego ya vinemina da taumi Yesu Keriso ko voteyeteyena. Tauna kosinine ya kogemi be Arua Babau ya voiemi da taumi banaga babaumima koya tubugana.

Bada na raukiviverema be na subama garomie ta maura be ta kena nonogana.

Nogota yawayawasaninama

³⁻⁴ Da Badama Yesu Keriso Tamanama Mamaitua ta kaisugusuguna, baninama na raunuatoima ya moraba kauana aubainama, tauna ya voieda da te tubuga vitara be yawasana vaunama ya utedana. Yodi nogota yawayawasaninama nopode e kenakenana da tokare marae ta naonga, inam dabudine da buderima Mamaitua e raberabena. Be inam buderinama marae e kenakenana aubainama, tokare nam e bova bo e gewagewa, ibewa da e kena nonogana. Inam kauidima matabudi Mamaitua ya utedana, baninama Yesu Keriso gurie be ya midisugu munaogana. ⁵ Taumi ami waisumaagma aubainama, Mamaitua na rewapanama ya midi gaigarimi be e raberabemina, naumeiki da yawasana e veraverauna tokare raigan damone e magatarana. ⁶ Inam kauidima aubaidima taumi ko mosari guratana, avedi da yodi raigan gaubonama nopone piripiri tabu be tabu garomie ta tubutubugana, be yagoro da taumi koi nuaverena.

⁷ Be piripiri tabu be tabu garomie ta tubutubugana inam baninama Mamaitua sibo ya kitana degoda ami waisumaagma inam riukaua bo ibewa. Inam piripiridima maika gold banaga kai matane ta gabugabu vunegidina maika. Be gold tauna yaba samosamoinama, be na verema nam ami waisumaagma maika. Be degoda ami waisumaagma inam riukaua, naumeiki da tokare nam e samo. Be taumi tokare ami waisumaagma votedima ko banavidina, Yesu Keriso e magatarana raiganine. Tauna tokare e kawa sagemi, be boruma da vivira e utemina.

⁸⁻⁹ Aruimima Mamaitua ewai yawasanidina, inam vutuna parata ya boruborue yodi ami waisumaäge koya tavana. Avedi da taumi Yesu Keriso nam ko kitana, be yağoro da kowai nuapagoena; nam ko kitana be yağoro kowai sumağena, be ma mosarimi kowai nuaverena.

¹⁰ Boni peroperoveta a riuna da taumi tokare ġaromie inam yawasaninama e mağatarana. ¹¹ Boni Keriso Aruinama taudi nopolie ya giugiuna da Tauwai yawasana tokare ei nuatoitoina be murine tauna na yawasana borobruminama e mağatarana. Be peroperoveta a wanawana rereğena da sibo a katai kauena airağan uma kauidima ta tubuğä, be nema ta tubuğä bako.

¹² Mamaitua inam giudima peroperoveta yai kataidina, nam taudime sagu munağedima aubaina, ibewa da taumi aubaimima inam kauidima a giuguedina. Inam giudima vutudi taurauguguya ġaromie a verau be Arua Babau na rewapanae vari verenama a rauguguyena. Inam Aruinama vutuna Mamaitua marae ya riupore yovoğena ġarodie. Be anea mate inam kauidima ta ġoeğoe kauena da sibo a katai kauena.

Taumi sibo banaga babaumima koya miamiana

¹³ Vutuna aubainama ami noğotama ko vokaukaua wainonoğedina noya aubainama. Be mate ko rabe kauemina, be tokare Yesu Keriso e mağatarana rağanine, Mamaitua na raukiviveree tokare yaba veredima e utemina. Ami noğotama vutuna ġarone ko boru be koi rabana. ¹⁴ Taumi ko miana Mamaitua na sedama vovoteyeteyedima maika, be nam ami ġoanama kauidima gewegewedima koi muriwatanedi. Inam yawasanidima taumi boni bua na miane koya miamiana rağanine nama koya voivoiana. ¹⁵ Tauna tauvinemima tauna banaga babaunama, vutuna aubainama ami yawasanae yaba matabuna ko voiedina, tauna taunağä na ġoanama ruvane ko voiedina. ¹⁶ Baninama Mamaitua umanama ya riuna, “Taugu banaga babauguma, vutuna aubainama taumi mate sibo banaga babaumima koya mi-amiana.”

¹⁷ Be ko noğoti da taumi mara banegimima be Tamemima ġarone ko moiragi be kowai kawa mamaina, tauna tokare banaga tenatenağä abäga veredi bo gewegewedima a voivoiedina, ruvedie nama e kaiviredina. Avedi da banaga dosidi bo kamai banabanaga, matabudi tokare e kaiviredina. Vutuna aubainama taumi vağavağai uma dobune ko nağonağona Mamaitua ko vivira kauena. ¹⁸⁻¹⁹ Baninama tauna nam yaba samosamoidima maika goldie bo manee i gimara dobiğemina, ibewa da Keriso kosinine ya gimara

dobiġemina. Keriso tauna vutuna Mamaitua na tipama vere vavasaġinama maika sипу natunama. Be taumi ami yawasanama yateyatemima ġarodie be a yovoyovona, inam yawasana kavekavedima.²⁰ Muriġa da dobu ai tubuġina, be noġone Yesu vinevinenama nama ya miamiana, be yodi raġan damodamodie tauna taumi kami taiye ya kawa maġatarina.

²¹ Yodi taune taumi Mamaitua kowai sumāġena, be ami noġotama Mamaitua ġarone koya boru be kowai rabana. Baninama tauna vutuna Yesu gurie be ya kawa midisugħu munāġe be na borumama ya utena.²² Be taumi riukaua koyawai muriwatanena raġanine, taumi nopomima koya kawa veredina Mamaitua matane. Vutuna aubainama yodi taumi ami banabanagama nuenuemima tabutabune kowai nuapaġoedina. Be inam yawasaninama naumeki da ko kaiguratena raġan matabuna.

²³ Mamaitua na pesima nopomie ya kumana aubainama koya tubuġa vitarana, be yodi yawasana vaunama nopomie e kenakenana. Be Mamaitua na pesima tokare nam ei kave pesi ġesaudima maika, ibewa. Be Mamaitua na pesima nopomie ya kumakumana, inam tauna riunama yawayawasaninama be kenakena nonoġinama. Vutuna aubainama taumi mate tokare yawasanama vaunama no-pone ko mia nonoġana.

²⁴ “Be banaga matabudi taudi maika mui, be borumidima inam maika berana.

Baninama mui tokare ta poki makaina be berana tokare boedima nam nama ta kena dauna da tokare ta kuruva poraġana,

²⁵ be Bada riunama tokare e kena nonoġana.”

Inam vutuna tauma kē rarau guguyena ġaromie.

2

¹ Vutuna aubainama ġaromie yawasana gewegewedima maika: Waikarakarakutu, kaiyovu, unura be waitupadeġa ko kaiporaporaġana. Inam nama yabedima matedima tabu be tabu ġaromie ta kenakenana ko gosedi.²⁻³ Taumi kaite koya kita da Bada tauna banaga verenama, vutuna aubainama taumi ami kanima sibo Bada riunama koya ġoegħe guratena, maika gomana wawainama susu e kanikani nonoġena nama. Inam kedane taumi ko katai kauena da Mamaitua riukaua yai yawasanimina.

Yesu tauna yeku yawayawasaninama

⁴ Ko verau Yesu Keriso ġarone. Tauna vutuna yeku yawayawasaninama banaga a tuaġaġiena, be Mamaitua ya vine be noġotinama tauna ġarone ya moraba kauana.

⁵ Be taumi mate yeku yawayawasanimima be Mamaitua ya vinemina da tauna Aruinama kana vadama taumi e raraau vadaemina. Be tauna ya voiemi da taumi Mamaitua na pirisima babaumima be Arua Babaue taumime koi uta munağemina maika puyo. Inam puyonama vutuna Yesu Kerisoe Mamaitua ewai aninena. ⁶ Maika girugiruminama porane ya riuriuna nama:

“Taugu yeku Saionma yà boruboruna ko kitana, inam yeku-nama vutuna vada yasinama.

Be yekunama noğotinama ġarogue ya moraba kauana.

Be aitau uma yekunama ewai sumağena, tauna tokare nam tunimayağe e mia.”

⁷ Taumi tauwai sumağā ġaromie inam yekunama noğotinama ya moraba kauana. Be aitauğā nam timawai sumağena, taudi adi giuma umanama girugiruminama porane ya riuna, “Yeku vada taukerinama a tuağaiena, be yekunama vutuna Mamaitua ya voie da na vadama yasinama ya tubuğana”

⁸ Be mate ya riuna,

“Inam yekunama vutuna banaga e voiedi da ta sağai vitare be ta bekubekuna.”

Taudi Mamaitua na giuma ta riuriu tuatuağaiena, vutuna aubainama taudi tokare ta bekuna maika Mamaitua ya vinevinedina nama.

⁹ Be Mamaitua taumi ya vinemina da taumi tauna na banagama babaumima, taumi guyaguyau be na pirisima, vutuna aubainama taumi Mamaitua ġaroğaronama. Yodi taumi isanama ko kawakawa sağesägena, baninama taumi noğone tadiwanawana nopone, be tauna yai doka dobiğemina tauna na yanama vere vavasağinama nopone.

¹⁰ Noğone taumi nam Mamaitua na damma nopone, be yodi taumi na damma nopone ko miamiana.

Noğone Mamaitua na raunuatoima nam ko kataiena, be yodi taumi na raunuatoima koya kataie be koya pağona.

Banaga matedie nema sibo tè mia bako?

¹¹ Yau banaga vavasağama, taumi mara banegimima be nam uma dobunama ġarona aubainama, vağai dobu matabuna ko nağonağona. Taumi vağavağai uma dobune ko babababarana, vutuna aubainama taugu yà riuriu vavasağemina da taumi ġoana gewegewedima ko gosedina, baninama inam ġoendima vutudi aruimima tai ġavie be tawai gwağana. ¹² Banaga nam waisumeğidimə matedie taumi ami yawasanama didimanidie ko miana. Be voia verediğā taudi matedie ko voiedi be ta kitedina, avedi da

taudi tawai wavu yababemina da taumi kabe gewagewa ko voivoie. Be tokare Bada etara aubainama e veraverau munağana rağanine, taudi tokare Mamaitua isanama ta kawa sağena ami voiama veredima aubainama.

¹³ Banaga adi waibadama tabu be tabu dibudie taumi ko miana Bada isanama aubainama. Dобу guyaguyaудима* тауди adi waibadama dibune gabeman tawai badana, vutuna aubainama ko voteyeteyedina. ¹⁴ Be guyaunama na gabegabemanima mate adi waibadama dibune ko miana, baninama taudi guyau ya riuporedina da gewagewa tauvoiedima naumeki da sibo a kovoğidina, be aitauğā da vere tauvoiedima isedima ta kawa sağedina.

¹⁵ Be inam Mamaitua na ġoanama da taumi sibo vere koya voivoiedina, be veree inam banegidima nam aba ti kataie be ta giugiu yababayababana, ko rawanuatugudina. ¹⁶ Bada Yesu gewagewae be ya kuvesimina. Be nam aitau kwa riuna, "Yodi nam aiyaba ima panipaniguna, aubainama yau ġoane nama ya voia yababayababana". Inam avedi! Taumi sibo koya miana Mamaitua na taunoyama maika. ¹⁷ Banaga matabudi ko viviredi, Mamaitua ko naire be na damma banegidima koi nuapañoedina. Be mate dobu guyaunama ko vivirena.

Piripiri sibo tè dami poredina Keriso maika

¹⁸ Taunoya, ami babadama ko viviredi be ko voteyeteyedina. Nam babada vovoyağotidi bo veredima taudiğā ko voteyeteyedi, ibewa da babada kivi korokorodima mate ko voteyeteyedina. ¹⁹ Değoda banaga nam aba i voia waigewana, be a raukivi gewagewa yababena, be tauna Mamaitua ewai sumağe be ewai nuapañoena aubainama, naumeki da inam piripirinama e dami porena Mamaitua anitai nuaverenama aubainama. Inam kauinama Mamaitua matane ya vere kauana. ²⁰ Be değoda taumi gewagewa koya voie be a raukivi gewegewemi be koya dami porena, inam naumeki da ami voia waigewama kovoğinama koya pağona. Be değoda vere koya voivoie be banaga a raukivigewagewa yababemi, be taumi inam raukivigewaganama koya dami porena, inam kaua dosinama Mamaitua matane koya voienja.

²¹ Tauna ya vinemina inam vutuna aubainama. Baninama taumi kami taiye Keriso mate ya mariyawa be piripiri matabudi ya dami poredina. Naumeki da tauna na wainuatoitoie keda yai kataimina da taumi nama sibo murinağā koya nağona. ²² "Tauna nam aba gewagewanama tenağā maika i voia rubuna. Be nam waitupa kaiyovu mudune

* **2:13:** Uma dobudine dobu guyaguyaудима inam nam Seitan. Taudi maika 'king' bo 'queen'.

i dobi rubuna.”²³ Banaga a kunukunurena rağanine, tauna nam i kunura ġaredina. Be a raraukivi gewegewena rağanine, tauna nam i riuwai nainairidina. Ibewa da na nuaboyama be na yawasanama matabuna Mamaitua ni-mane ya biridina, baninama tauna ya kataiena da Mamaitua tokare inam kauidima e kawa didimanidina.²⁴ Tauna tubuğā ġomine dà gewagewama ya kiroğā nawedina korosie. Inam kedane tauda gewagewae be ya kuvesidana, da yodi Mamaitua na ġoane yawasana didimanidie tà miana, be gewagewa na rewapanama nam ġarode ima kenakenana. Keriso na keroe taumi koya yawasanana.²⁵ Baninama boni taumi sipu kwakokwakodima maika ami ġoane koya nağonağō yababayababana. Be yodi taumi sipu taurabenama ġarone koya verau munağana. Tauna vutuna ei dokemi be e rabe kauemina.

3

Banaga wainagidima adi giuma

¹⁻² Be kauinama teneğinama nama, taumi waiwaivi ami tautaugomama ko viviredi be adi waibadama dibune ko miana. Inam kedane ami tautaugomama ġesaudima aitaugā vari verenama nam timawai sumağena, taudi tokare ami yawasanama veredima ta kitedi be adi noğotama ta vitared-inā.

³ Be anikawa veremima aubainama nam tubuğē koi siemi, maika waidebaviri bo komakoma kibokiboridima bo gara waimatakanikanidima. ⁴ Ibewa da yawasana veredima nopomie maika voyağota be miagenuana, vutudi ami waisiama. Inam waisiedima veredima tokare nam ta samo. Inam yawasanidima vutudi Mamaitua matane a moraba kauana. ⁵ Boni waiwaivi Mamaitua tauwai sumağenama taudi uma kauidie ai siedina. Taudi adi tautaugomama a viviredi be adi waibadama dibune a miamiana,⁶ maika Sera, tauna na tauğomama Eibrahim ya vovo teyeteye be yawai isana bada. Be taumi değoda ami tautaugomama nam ko nairedi be yawasana didimanidima ko voiedina, taumi naumeki da Sera na sedama.

⁷ Be kauinama teneğinama nama taumi tautaugoma ami visavisarama mate koi nuatenağā, be ko rabe kauedina, baninama taudi nam ti rewapanana. Taudi mate yawasana kenakena nonoğinama tokare ta pağona maika taumi. Vutuna aubainama ko viviredina. Be değoda ibewa, taumi ami moiragima tokare Mamaitua e vaia yababena.

Piripiri ko dami porena

⁸ Vutuna aubainama taumi matabumi ko mia genuana be koi nuapağō vivira, be ko raunuatoi, ko raukivi vere be ko

ḡaubo munaḡana. ⁹ Be aitau gewagewa ḡaromie e voiena, nam gewagewae koi maesi, avedi. Be aitau da e kunuremina, nam ko kunura ḡare, avedi, baninama taumi Mamaitua ya vinemina da vere taudi ḡarodie ko voiedina, inam kedane tokare vere koi buderienā.

¹⁰ “Baninama deḡoda aitau yodi yawasana verene mieninama e ḡoena, bo yawasana veredima kitedima e ḡoena,

naumeki da tauna menanama e rabe kauena, be giu gewegewedima nam mudune e giuedi.

¹¹ Tauna gewagewa e gose poredi be vere e voiedina. Be tauna suba e wane da e wane guratena.

¹² Aitaūga vere tauvoiedima, Mamaitua taudi e raberabe kauedina, be adi moiragima tokare nam e vaia yababedi.

Be banaga aitaūga gewagewa tauvoiedima, Bada taudi e miamia tautauriedina.”

¹³ Deḡoda taumi vere voienama ko ḡoe guratena, tokare aitau e raukivi gewegewemi? ¹⁴ Be deḡoda vere koya voivoie be banaga a raukivi gewagewa yababemina, naumeki da nuemima e verena, inam kaua dosinama Mamaitua matane, be tauna tokare yaba veredima e utemina. Inam banegidima gewegewedima ḡarodie nam nuemima e rovo bo ko nairedi. ¹⁵ Be nuemima nopone Keriso ko paḡo da tauna vutuna ami Badama be ko vivirena. Be raḡan matabuna ko vokaukaua be ko miamiana, be raḡanine aitau ami waisumaḡama ei taravirena, taumi waiḡapa ko paribeena. Be uma kauidima vivire be voyaḡote ko voiedina.

¹⁶ Be taumi ami yawasanae raḡan matabuna Keriso ḡarone didimanae, be mate ami noḡotama didimanidie ko miana. Dabudine banaga ami yawanama didimanidima ta kitedi be waitupadeḡa banegidima tokare debedima ta subana.

¹⁷ Deḡoda gewagewa tà voivoiedi be piripiri tà banavina inam naumeki, dà kovoḡama tè paḡona. Be ya verena deḡoda Mamaitua na ḡoane vere tà voivoiedi be piripiri tà banavina, inam naumeki da tà dami poredina.

¹⁸ Keriso dà gewagewama aubainama piripiri ya bnavi be ya guri tenaḡana, be tokare nam e guri muṇaḡa. Inam kauine tauna yai doka nawedana Mamaitua ḡarone. Keriso tauna vutuna didimana baneginama, tauda gewagewa banegidama aubaidama tubuḡe ya gurina, be Arua na rewapanae Mamaitua tauna ya kawa midisuḡu munaḡena.

¹⁹ Be arue tauna ya naḡona arua dibure miemienidima ḡarodie be ya rauguguyana. ²⁰ Taudi vutudi boni Noa waga ya voivoiena raḡanine, taudi a mia be Mamaitua a rawarawa

ḡaiḡaiena. Be Mamaitua yawai raba nuetauna da taudi sibo nuedima a vitaredina, be taudi yaḡoro da a rawarawa ḡaiḡaiena. Vutuna aubainama Mamaitua banaga raubisaḡa sievinama 8, taudiḡa yai yawasanidi be nam upae ti monu be ti gurina. ²¹ Be uma upanama inam babataito ewai matairena. Vutuna yodi ewai yawasanima. Babataito inam nam tunidama miranama koḡaporenāma aubaina, ibewa da babataito baninama inam umanama: Mamaitua tāwai baḡāna da nopode dà noḡotāma e kawa didimanidi be nuadama e subana. Be inam kauinama tēwai baḡena, Mamaitua tokare e utedana, baninama Yesu Keriso gurie be ya midisūgu munaḡena aubainama.

²² Tauna ya naḡo marae be yodi Mamaitua kasaune e miamiana. Vutuna aubainama yodi anea be arua waire-wapanidima, be rewapanana ḡesaudima matabudi Keriso na rewapanama be na waibadama dibune ta miamiana.

4

Ami yawasanama ko vitaredi be Mamaitua na ḡoane ko miana

¹ Keriso tubuḡe yai nuatoitoina aubainama, raḡanine tauda piripiri tà banabanavidina, naumeki da sibo tēi nuabagibagi be tē dami poredina dà Badama Yesu maika. Baninama aitau da tubuḡe piripiri e banavidina na waisumaḡāma kana taiye, inam ewai maḡatarāna da tauna riukaua gewagewa ya gosedina, ² be na damonama yodi tauna na yawasanae nam uma dobunama yawasanidima tokare ei muriwatana munaḡedi. Ibewa da tauna yodi Mamaitua na ḡoane e miamiana. ³ Baninama taumi dobu na ḡoane, naumeki koyai nuavere ḡarovana. Inam taudi banaga nam waisumeḡidi taudi adi yawasanama, kitedima maika badara yabayababa, tegobua, kaniposa, tegobua soidima be taparoro kaikaiyovudima maika kokoitau rauduneedima.

⁴ Be yodi banaga nam waisumeḡidi taudi a base da taumi inam kauidima gewegewedima koya gosedina. Inam vutuna aubainama yodi taudi ḡaromie tawai menamenana. ⁵ Taudi tokare Mamaitua noḡone ta etarana. Tauna kaite e vovo kaukauana da tokare banaga yawayawasanidima, be guriguridima matabudi e etaredina. ⁶ Vutuna aubainama banaga guriguridima vari verenama a vaiena da taudi tubuḡe kovoḡa a paḡona, be arue ta yawasanana.

⁷ Yaba matabudi kaiteka adi raḡanima damone tà tavatava. Vutuna aubainama nam ko voia yabayababa, avedi, taumi ko mia genuana, koi noḡota kaua, yodibe ko moiragina. ⁸ Be yaba dosinama inam: Ami banagama ami

banagama koi nuapaño kauedina, baninama wainuapaño gewagewa toitoi e rupurupudina.⁹ Ami banagama ami vadae ta sağana nam ko momoduedi.¹⁰ Taumi tenatenağaga ami puyoma tabu be tabu Mamaitua na raukiviveree ya uteutemina. Inam puyodima ko rabe kauedi be inam puyodie ami banagama ko sagu kauedina.¹¹ Aitau da taurauguguya, naumeki da Mamaitua riunama sibo ya rauguguyena. Be aitau da tauwai kaisagu, naumeki da Mamaitua na rewapanae na banagama sibo ya sagudina. Inam kauidie Yesu Kerisoe Mamaitua tà kawakawa sağena dà voiama veredima aubaidima. Tauna vutuna ġarone, neneğara be rewapana ta kenakena nonoğana. Inam riukaua.

Keriso kana taiye değoda piripiri tà banavidina

¹² Yau banaga vavasağama, taugu è kataiena da taumi yodi raurubu be piripiri ġaromie ta kenakenana. Be inam piripiridie Mamaitua ami waisumağama e rarau rubudina. Be uma kauidima nam ko nuababağedi be ko riuna, “Uma yodi aba ġarogue e tubutubuğā.”¹³ Ibewa da koi nuaverena, baninama taumi Keriso na wainuatoitoima kowai nuatoitoi saguna, be rağanine Keriso ma neneğarina e verau mu-nağana, taumi tokare koi nuavere be ko mosarina.

¹⁴ Be değoda Keriso waimuriwatanenama aubainama banaga ta kunuremina, taumi naumeki da koi nuaverena, baninama Mamaitua Aruinama boruboruminama taumi ġaromie.¹⁵ Değoda taumi gewagewa ko voivoiedina maika rauvunuğā bo danene bo banaga adi giu bo adi voiama kowai badabada yababedi be damone piripiri ko banavidina, inam naumeki da ami kovoğama koya pagona.¹⁶ Be değoda Keriso kana taiye piripiri ko banavidina, nam ko tunimayağā. Taumi koi nuavere be Yesu isane Mamaitua ko kaisuğusuğuna.¹⁷ Etara rağaninama kaiteka e tavatavana da Mamaitua na damma ġarodie etara ei karena. Be değoda Mamaitua tauda tauwai sumağā e etare dokedana, naumeki da banaga aitauğā Mamaitua na varima verenama nam ti vovo teyeteyena, taudi nemanama? Taumi ko noğonoğotina taudi tokare ta yawasana, bo?¹⁸ Be

“Değoda didimana banegidima Mamaitua na yawasanama kedanama banavinama ġarodie e piripirina, naumeki da gewagewa banegidi bo banaga adi yawasanama barebaredim, taudi tokare nema inam yawasanama ta banavi bake? Nam teneteneğina!”

¹⁹ Vutuna aubainama taumi aitauğā Mamaitua na ġoane kowai nuatoitoina, taumi ami yawasanama Mamaitua ni-

mane ko boru, be voia veredima ko voiedina, baninama Mamaitua tauna tauwai tubuā patupatutunama.

5

Ekalesia babadidima adi raukurama

¹ Yodi yau giuma taumi ekalesia babadimima ġaromie yà boruna. Taugu mate ekalesia kana badama be Keriso na wainuatoitoima èi matematena. Be taugu mate tokare Keriso e maġatarana raġanine yau buderima boruboruminama e uteguna. ² Mamaitua Na Sipuma ko rabe kauedi. Nam aitau ima segesegerimina, ibewa da taumi nuemie koi rabaraba kauana, baninama inam vutuna Mamaitua na ġoanama. Be nam waigogo bo mane ko noġoti be koi rabaraba. Ibewa da taumi Mamaitua koi nuapaġoe be aubainama koi taunoyana. ³ Nam koi badabada gurata ġarodie, ibewa da voia veredima ko voiedi be ġaromie ta kitana. ⁴ Be sipu taurabedima adi badama e maġatarana raġanine, taumi tokare ami maesama boruboruminama e utemina, inam maesinama tokare nam e samoa.

⁵ Yarayaraga taumi ko ġaubo munaġa be babada adi waibadama dibune ko miana, baninama

“Mamaitua banaga raurau guyaguyaudima e biri dobgedina. Be banaga matabumi yà riuriuemina da aitau e ġaūġaubo munaġana, Mamaitua tauna tokare e raunuatoiena.”

⁶ Vutuna aubainama Mamaitua matane ko ġaubo munaġana. Be na ġoanama nama raġanine tauna tokare e kawa saġemina. ⁷ Ami nuaboyama matabudi Mamaitua nimane koi damidina, baninama tauna vutuna taurabemima.

⁸ Koi kita kaua be ko rabe munaġemina! Baninama kami tauma Diaboro e karakaravemina laion maika, e guda yarusimina aubainama. ⁹ Be piripiri raġandie ami waisumaġe ko midi da bagibaginaġa, be Diaboro ko riutuaġaiena, baninama ko noġoti da tauwai sumaġa dobu ġesaudie piripiri teneġidima nama ta banabanavidina.

¹⁰ Mamaitua yai aninana da yodi taumi raġan ġaubonaġa ko rautapa wainuatoitoina. Be nam koi nuaboya, baninama Mamaitua tauna raunuatoi baneginama aubainama, tauna Yesu Kerisoe ya vinemina da taumi tokare tauna mate ko mia nonoġana na kaba miama boruborume. Tauna tokare e kawa didimanima, be na raukiviveree tokare rewapani e utemi da taumi ami waisumaġe ko midi bagibagina, be tokare piripirie nam ko beku. ¹¹ Tauna vutuna ġarone rewapani e kenakena nonoġana. Inam riukaua.

Pita na giuma damonama

¹² Taugu uma letanama tuponama è girumina ġaromie, be Sailas turaguma patupatutunama tauna ya saguguna. Taugu è girumina ġaromie duğumima aubainama, be yài mağatarimi da taumi avedi da piripirie kowai nuatoitoina, be riukaua da Mamaitua na raukiviveree ko miamiana. Vutuna aubainama inam raukiviverene ko midi da bagibaginaġa.

¹³ Tauwai sumaġa matabudi uma Babilon nokane miemienidima tawai kaiwemina. Taudi mate Mamaitua ya vinedina maika taumi. Be natuguma* Mak tauna mate ewai kaiwemina. ¹⁴ Be wainuapaġoe koi kaiwa vivirana.

Matabumi aitauġa Kerisoe miemienima suba ġaromie e kenana.

* **5:13:** Mak tauna nam Pita natu ġomina. Ibewa da arue natuna.

Pita 2

leta aniwai rabuinama ya girumina

Pita na waikaiwama

¹ Taugu Saemon Pita, Yesu Keriso na apasolma be na taunoyama, uma letanama yà girugirumina taumi tauwai sumaḡa ġaromie. Yesu Keriso tauna vutuna tauda dà Mamaituama be dà Tauwai yawasanama, tauna vutuna taukawa didimanidama be matabuda waisumaḡa tenegínama ya utedana. Inam waisumeğínama tauna matane ya vere kauana.

² Tauna na raukivivere be na subama ġaromie sibo a maurana, baninama taumi Mamaitua be dà Badama Yesu koya katai kauedi be taudi mate ko miamia tenaḡana.

Mamaitua ya vinemina

³ Bada Yesu ya vinedana, aubainama yodi Yesu tè katai kaue be tauna mate tà miamia tenaḡana, vutuna aubainama rewapana be yawasana matabudi Arue ya utedana, da yodi tauda teneteneğínama da didimanae tà miana. ⁴ Be mate inam rewapanine tauna na saugama dosidima be veredima ya utedana da tokare tà mia nonoḡana Mamaitua maika. Be inam kedane dobu adi voiama gewegewedima kaite tè gosedina, inam vutudi a kawakawa gewagewadana.

⁵ Vutuna aubainama ko raurubu gurata da ami waisumaḡe vere ko voiena. Be vere murine Mamaitua ko katai kauena.

⁶ Be Mamaitua ko katai kauena murine, tokare ko rabe munaḡemina. Be rabemunaḡa murine inam kaigurata. Be kaigurata murine inam miakaua. ⁷ Be miakaua murine raukivivere. Be raukivivere murine wainuapaġo. ⁸ Deġoda inam yawasanidima ami waisumaḡe ta kena be ta morabana, inam raḡanine taumi tokare nam ko mia yababayaba, ibewa da taumi tokare dà Badama Yesu Keriso ko katai kauena. ⁹ Be deġoda aitau ġarone inam yawasanidima nam ta kena, inam nam i verena. Baninama Bada Yesu inam baneginama na gewagewama ya noḡonoḡota poredina. Be inam baneginama tauna matanama ya pota be nuanama ya koana, aubainama inam yawasanidima nam ima noḡonoḡotidina.

¹⁰ Yau bana, Mamaitua ya yokoemi be ya vinemina, vutuna aubainama yodi ko raurubu gurata da na ḡoanama ruvane nama ko miana, da banaga ta kitemi be ta kataie da taumi Mamaitua ya vinemina. Taumi deġoda inam yawasanidima ko voiedina, taumi tokare nam airaḡan ami waisumaḡe ko

beku. ¹¹ Inam rağanine taumi aubaimima Mamaitua tokare nuanama tabutabune mara matakedenama e kaiporena. Be taumi tokare dà Badama Tauwai yawasana na waiguyauma kenakena nonoğinama nopone ko sağana.

Riukaua kana matamatama

¹² Taumi inam riukauidima kaite koya kataiedi be Bada na riukaue ko midimidi bagibagina. Be yağoro taugu rağan matabuna uma yabedima yà riuriu wainoğotmina. ¹³ Taugu è noğotina inam ya verena da taugu yà miamiae inam yabedima rağan matabuna yà riuriu wainoğotmina, be muriğà da yà gurina. ¹⁴ Taugu è kataiena da taugu kaiteka yau rağanima e tavatavana da yà gurina, baninama dà Bada Yesu Keriso nama ya riueguna. ¹⁵ Vutuna aubainama taugu yà rara rubu guratana, baninama yà ġoeğöena da taumi uma giudima matabudi ko ragaudi da nuemie, be rağanine taugu yà gurina, taumi uma giudima kaite koya kataiedina.

¹⁶ Tauma kè riuemina da tauda dà Badama Yesu Keriso ma rewapanina tokare e verau munağana. Uma giudima tauma nam nuamaie kei tubuğidi be kama giuguemina. Ibewa da tauma vutuna matağomimai na borumama be na rewapanama kè kitana. ¹⁷ Inam rağanine Tamadama Mamaitua Yesu ya kawa sage be na borumama ya utena. Dabudine bona dosinama marae ya dobi be ya riuna, "Inam tauna taugu natuguma nuaguma e pağopağona, be taugu yàwai nuaverena tauna ġarone." ¹⁸ Be uma giudima rağanine tauma Yesu mate oya babaune kè miamia be bona marae be ya yovona bea ġomimaike kè vaiedina.

¹⁹ Uma kauinama yai kataimai be kè katai kauena da peroveta boni aba a giuguedina, inam matabudi riukaua. Vutuna aubainama taumi mate sibo peroveta adi giuma koyai sumağedi be koyai muriwatanedina, baninama inam giudima taumi nopomie maika kabe kodam dobu waikupikupine ti yanayana watanana naumeki da rağantotom, be rağantotom taurağarağan* e tavana be e yanayanana, nama tokare nopomie e yanana. Be taurağarağan tauna vutuna Yesu. ²⁰ Be mate ko noğoti da girugiruminama porane boni peroveta nam nuedie giu ti tubuğidi be ti giuguedina. ²¹ Be nam airağan banaga mabidie tiwai perovetana, ibewa da taudi Arua Babau yai dokedi be Mamaitua aba ya vatovatodina, giudima nama taudi a vatovatodina.

* **1:19:** 'Rağantotom' inam Yesu na kaba verauma be 'taurağarağan' tauna vutuna Yesu.

2

Tauwai katakatai kaikaiyovudima tokare kovoğe ta miana

¹ Be Peroveta ġesaudima kaikaiyovudima mate boni Israel nōpone a miamiana. Be teneġinama nama yodi tokare tauwai katakatai kaikaiyovudima nōpomie ta maġatara, be taudi moisiṛiġa waikatakatai kaikaiyovudie tokare ta boru waideġemina. Be Bada tauna vutuna ya kuvesidina, be tokare isanama ta boviena. Inam kedane taudime adi kovoġama tokare tunidie ta boruna be ta guri makaina. ² Be toitoi tokare adi ġoanama kauidima waitunimayamayaġidima tai muriwatanedi, be yawasana riuriukaunama tokare tai mirana. Inam raġanine banaga tokare giu gewegewedie riukaua kedanama tai giugiuena. ³ Inam tauwai katakataidima kaikaiyovudima tokare wai-gogo noġotinama ta paġo be taudi giu kaikaiyovudie ta raumanena. Inam banegidima Mamaitua boni ya siava wainonoġidina, be yodi taudi guri kenakena nonoġinama tawai rabena.

⁴ Baninama anea ko noġotidi, avedi da taudi marae miemienidima be raġanine gewagewa a voivoiena, Mamaitua yaġoro ya pore dobiġedina gienae. Be dabudine taudi yodi dom waitadiwanawanane ta miamiana, be kovoġa ta raberabena. ⁵ Be mate dobu poranama* ko noġoti. Mamaitua banaga gewegewedima nam i yawasanidina, ibewa da tauna kabaita ya riupore be inam dobunama yai monu porena. Be didimana taurauguguyenama Noa taunaġa yai yawasanina na vadama banegidima 7 mate. ⁶ Be mate Sodom be Gomora meagaidima ko noġotidi. Mamaitua inam meagaidima ya gabu gorudi da kavudiġa a kenana. Dabudine banaga yodi ta kita be ta kataie da gewagewa banegidima tokare ġarodie nama ta tubuġana. ⁷⁻⁸ Be Mamaitua Lot yai yawasanina, baninama Lot tauna didimana baneginama. Be tauna na banagama gewegewedima adi yawasanama miremiredima raġan patapatanama ya kitekitedi be ya vaivaledina raġanine, tauna ei nuaboya kauana.

⁹ Yodi tè katai kauena da Mamaitua waisumaġa banegidima adi raurubue tokare teneġinama ei yawasanidina. Be banaga nam waisumeġidi Mamaitua tokare etara na raġanie adi kovoġama e utedina. ¹⁰ Taudi aitauġa Bada na waibadama a riuriutuatuġaie, be tubuġidima na ġoanama miremiredima awai muriwatanedina, taudi tokare inam kovoġinama ta

* **2:5:** 'Dobu poranama' inam Adam na raġanie ya naġo da kabaita dosinama na raġanie.

banavina. Be inam tauwai katakataidima kaikaiyovudima taudi debedima ya tora kauana, be nopolima moraba ya moğavuna. Be mara taumiendima tawai diboğidi be ta kunukunuredina. ¹¹ Be anea taudi avedi da ai rewapanana kauana, nam inam banegidima gewegewedima maika, be nam airağan Bada matane mara taumiendima ti diboğidi bo ti kunuredi.

¹² Be inam banegidima taudi mara taumiendima adi rewapanama nam ti kataiedina, aubainama tawai diboğā be ta kunukunura yababayababana. Taudi a bua kaua be adi yawasanama musara adi yawasanama maika. Vutuna aubainama taudi tubuğā na ġoħne ta voivoia yababayababana. Taudi tokare guri ta kita saġena maika musara ta vunuġidi be tawai guridina nama. ¹³ Taudi banaga a voiedi be awai nuatoitoina maesinama, taudi mate tokare tai nuatoitoina. Taudi adi nuavere kauama inam avedi da suare, be taudi yaġoro ta kani posa, ta tego bua be voia waimatawarewaredima ta voivoiedina. Taudi taumi mate ko soisoi tenaġħana raġanine, taudime ta kawa saġesäge munaġedi be tawai guyaguyauna, baninama taumi adi giuma miremiredima kowai beavaiedina aubainama. ¹⁴ Be taudi waiwaivi tabu be tabu ta kita nuadiniedi be tawai kwinedina, be taudi raġon matabuna gewagewa ta voivoiedina, be nam airağan tima sipesiperena. Be banaga adi waismuġġama vogwaġegwaġedima ġarodie ta menamena ġororona da kabe adi ġoħnana ta voiedi. Be mate taudi waigogo na nu-auyaūyama debedima ya moğavu kauana. Inam nama banegidima Mamaitua tokare e mutu ririġidina. ¹⁵ Taudi keda didimaninama a gose pore be Beor natunama Beilam na voiama tawai muriwatanena. Beilam tauna na ġoħna kauama inam gewagewa e voie be damone maesa e paġona. ¹⁶ Be musara donki tauna nam giugiuna, be inam raġanine banaga maika ya giu ġoħma be peroveta Beilam na voia buabuae ya riutuāġaiena da tauna nam nama sibo ya voia.

¹⁷ Inam nama banegidima ġarodie tokare nam yawasana ta banabanavi. Taudi adi waikatakataima kavakavanama be nam baniboruboruna. Taudi inam watutu tiwatiwanama maika, bo taudi maika ġuva dobu e suma be sive e su-vesuve waibabarina nama. Taudi adi gabuma inam waitadiwanawana vavasaġinama Mamaitua ya vokaukaue be e kenakenana, ¹⁸ baninama taudi rauguyaguyau giudima nam bani biribiridi be ta giugiu yababedina aubainama. Taudi tubuğā adi ġoħnana miremiredima ta ġoeġoe kauedina. Be taudi ta ġoēgoena da tauwai sumaġa vaudima inam yawasanidima miremiredima a gosegosedina kabe ta voia munaġedi. Vutuna aubainama ta menamena ġororona da

taudi adi kwaroe kabe tauwai sumāgā vaudima ta tikonidi, be yawasana a gosegosedina kabe ta voia munağedi.¹⁹ Taudi ta giu ġarōğaroro be ta riuriuna, “Değoda taumi koi muri-watanemaina, taumi tokare ami ġoanama nama kauidima ko voiedina, be nam aba e tainuarağerağemi.” Be ibewa da inam tauwai katakataidima kaikaiyovudima taudi ġomidima guri aubainama tawai yaragana. Baninama dego yabanama ei bademina, taumi inam yabanama na yaragama koya tubuğana.²⁰ Be değoda banaga vari verenama a vaie da adi yawasanama a vitaredi be Yesu Keriso a kataieno, be murine değoda Keriso a mia tautaurie be yawasana miremiredima boni a voivoiedina ta voia munağedina, inam rağanine adi yawasanama a gewagewa vavasağana nam maika noğone, muriğā da ai sumāgana.²¹ Be verenama da inam banegidima didimana kedanama nam sibo a kataie. Inam ya verena da taudi kaite a vaie da a kataieno, be yodi yağoro da Mamaitua na riuvavasağana babaudima ta miamia tautauriedina, inam tauna Mamaitua matane ya gewagewa kauana.²² Be banaga giu uma a giuguedina inam a riu kauana, “Inam banegidima taudi maika dağadağası, taudi ta wağıro be wağırodima ta kanikani munağena.” Be mate taudi maika bawa. Banaga bawa natunatudima upae tawai sigu kauedina, be rağanine barabarae ta tavatavana, taudi ta munamunağana konokonoe topa aubainama.

3

Bada ya sauga da e verau munağana

¹ Yau bana, uma yodi yau letama aniwai rabuinama ġaromie yà girugirumina. Uma letedima rabui nopolie taumi aba kaite koya katakataieno, vutudi taugu yà riuwai noğota munağemina da taumi noğota veredima sibo debemie a kenana.² Taugu yà ġoeğöena da boni peroveta babaudima abağā a giuguedina, vutudi taumi ko noğotidina. Be mate dà Badama Tauwai yawasana abağā ya giuguedina mate ko noğotidina. Inam giudima vutudi boni apasol ġaromie a rauguguyedina.

³ Be yaba tenağā yà ġoeğöena da ko katai kauena inam uma, yodi rağan damodie tauwai diboğā ġesaudima ta mağatarana. Taudi riukaua tokare tai kwatekwateve be adi ġoanama kauidima miremiredima ta voiedina.⁴ Be inam rağanine taudi tokare tai taraviremi be ta riuna, “Yesu ya saugana da tokare e verau munağana, be yodi tauna dego, wa? Boni dobu ya tubutubuge naumeki da yodi nam aba i tubuğā rubuna, yaba matabuna teneğinama nama e kenakenana. Tauma tamatamamaima nama boni ai raba

rereğā da a gurina.”⁵ Be inam banegidima taudi inam kauidima boni a tubutubuğāna matabudi a boviedina, avedi da a kataiena da boni Mamaitua riune mara ya tubuğāna, be mate tauna riune upa kivine dobu ya mağatara be e kenakenana. Be taudi ta voivoia munağedina da taudi kabe nam ti katakataie.⁶ Be mate muriğā inam upanama teneğine Mamaitua dobu yai monuna.⁷ Be inam riunama teneğine Mamaitua ya riuna da mara be dobu tokare kaie e gabu gorudina, etara rağanine. Inam rağanine Bada banaga nam waisumeğidi tokare e kawa gewegewedina.

⁸ Be yau bana, uma ko noğoti, Bada ġarone modi 1 tausand inam maika rağan tenağā. Be rağan tenağā inam maika modi 1 tausand tauna ġarone.⁹ Bada tauna ya saugana da e verau munağāna, be yodi tauna nam verau aubainama imawai riuriu koana, banaga ġesaudima ta riuriuna maika. Ibewa da tauna ewai raba nuetauna, baninama e ġoeğōena da banaga matabudi sibo adi gewagewama a kuvesidina, be nam aitau sibo gienae ya na gó.¹⁰ Be Bada na kaba verauma rağaninama e verauna inam maika taudanedanene, tauda nam te kataiena airağan e verau. Inam rağanine gugura dosinama nopone mara tokare ta samoana. Be dobu nopone yaba matabudi tokare kaie e gabu gorudi be tai kavedina.

¹¹ Be yodi koya kataie da yaba matabudi tokare ta samoana. Vutuna aubainama taumi banaga nema maika kitemima sibo koya tubuğā? Taumi sibo banaga babau-mima, be Mamaitua na ġoanama ruvane nama sibo koya miana.¹² Be Bada na kaba verauma rağaninama taumi ko raberabe be Mamaitua na ġoanama ko voivoiedi. Inam kedane tauna na kaba verauma rağaninama tokare ko taitupona. Be inam rağanine mara tokare kaie e gabu gorudi be ta samoana. Inam rağanine dobu be nopone yaba matabudi tokare kai menane e gabu gorudi be ta nuagudaguda be tai kavedina.¹³ Be Bada na saugama ya boruna da tauna tokare mara vaudima be dobu vaunama e voiedina, inam dabudine tokare didimana banegidima ta miana. Vutuna yodi tà raberabena.

¹⁴ Be yau bana, taumi yodi kowai rabana aubainama ko raurubu gurata da yawasana miremiredima ġaromie nam Mamaitua e kitedi be ei wavumi, avedi, ibewa da subae tauna mate sibo koya mia tenağāna.

¹⁵ Be ko noğoti da Bada ewai rabanuetau be ewai rau-riemina da taumi ko kuvesa be ko yawasanana aubainama. Uma yabedima teneğidima turadama Pol Mamaitua na nu-ayauyae ġaromie ya giruma be ya giuedina.¹⁶ Inam nuayauyanama teneğine leta ġesaudima nopodie inam

giudima tauna ya giuedina. Inam letedima nopolie yaba ġesaudima ya girugirumidina a piripiri kauana, nam anikatakataiedi. Be banaga gewegewedima taudi Pol na giuma riuriukuidima ta vitaredi be kaiyovue ta rarauguguyena. Be teneġinama nama taudi Mamaitua na giuma ġesaudima girugiruminama porane ta vitaredi be kaiyovue ta rarauguguya yababena. Vutuna aubainama taudi adi damonama guri kenakena nonoġinama tokare ta banavina.

Pita na giuma damodamodima

¹⁷ Yau bana, inam kauidima yodi yà riuriu wainonoġimina da ko katai kauedina. Vutuna aubainama taumi yodi ko rabe kauemi da inam tauwai katakataidima kaikaiyovudima nam tai kedadoka waigewemi, avedi. Taumi kaite ami waisumäge ko midimidi bagibagina, be yodi tokare nam ko beku. ¹⁸ Tauda dà Badama tauwai yawasanidama Yesu Keriso na raukiviverema nopolie e moraba be tauna ko katai kauena.

Tauna vutuna ġarone neneġara yodi be nokoi, nama takena nonoġana. Inam riukaua!

Jon 1

leta pakanama ya girumina

Yawasana riunama

¹ Boni pakane yaba ya kenakenana inam yawasana riunama. Inam riunama vutuna tauma apasol beamiae kè vaiena, matamaie kè kita da kè kita yağe be nimamaie kè taikonina. ² Inam vutuna yawasana, be yawasaniana tauma ġaromiae ya mağatara be matamaie kè kitakitana, vutuna yodi kawai matemate be yawasana kenakena nonoġinama ġaromie ka rarauguguyena. Inam yawasaniana noġone Tamadama Mamaitua ġarone kenakenanama, vutuna yodi ġarode ya mağatarana. ³ Be tauma aba matamaie kè kitakita be beamiae kè vaivaiena, vutuna yodi ġaromie ka rarauguguyena da taumi mate sibo tèi rawateğeidana Tamadama be Natunama Yesu Keriso ġarodie.

⁴ Uma kauidima ka girugirumidina ġaromie da matabuda tài nuavere tenaġana aubainama.

Yanae tà naġona

⁵ Be tauma Mamaitua ġarone vari kè paġo be ġaromie ka rarauguguyena inam umanama: Mamaitua tauna yana, be tauna nōpone nam kupi ima kenakenana, ibewa. ⁶ Be tauda kupi yawasanidima tà voivoiedina, be yaġoro tà riuriuna da tauda Mamaitua mate tèi rawateğeidana, tauda inam banaga kaikaiyovudama, be nam riukaua ruvane tama naġonāġona. ⁷ Be deġoda yanae tà naġona, maika tauna yanae e miāmiana nama, inam raġanina tauda tokare dà banabanagama mate tài rawateğeida be tauna natunama Yesu kosinina dà gewagewama matabudi e koġa poredina.

⁸ Be deġoda tà riuna tauda nam gewagewa ġarode, tauda inam tħawwnejha kedaduka waigewadana, be riukaua nōpode nam ima kenakenana. ⁹ Be Mamaitua inam banaga waipatutuna be didimaninama, aubainama tauna tokare dà gewagewama matabudi e noġota poredi be dà yawasanama barebaredima mate e koġa poredina, deġoda dà gewagewama tà kuvesidina. ¹⁰ Baninama Mamaitua ya riuna da banaga matabuda gewagewa banegidama. Be deġoda tà riuna tauda nam gewagewa te voia rubuna, tauda inam Mamaitua tà riuriu waikaikaiyovuna, be tauna na riuma tauda nōpode nam ima kenakenana.

2

¹ Yau sedama,* taugu uma kauidima yà riuriuemina da taumi nam gewagewa ko voiedi. Be değoda gewagewa ko voiena, naumeki da banaga tenağà tauda dà tausaguma e miamiana. Tauna vutuna tauda muride e midi be aubaidama Tamadama ġarone e giugiuna. Tauna vutuna Yesu Keriso, didimana baneginama. ² Tauna vutuna ya rauepaiyeda be dà gewagewama aubainama tubugine ya tipana aubaidama, be nam taudağà, ibewa da dobu matabuna adi gewagewama mate aubainama, yodibe Mamaitua nuanama ya subana.

³ Be değoda Bada na riuvavasağama matabudi tà voteyeteyedina, inam tawai mağatara munağedana da tauda inam tauna ġarogaronama. ⁴ Be değoda tam aitau kwa riuna, “Taugu Mamaitua ġarónama” be na riuvavasağama nam kwa voteyeteyedi, tam inam banaga kaikaiyovumma be nam riukaua ruvane kuma miamiana. ⁵ Be değoda aitau Mamaitua na giúma e vovo teyeteyedina, tauna inam Mamaitua na wainuapağoma nöponama ya moğavuna. Be nema tà katai bake da tauda Mamaitua nöpone tà miamia? ⁶ Aitau e riuriuna da tauna Bada ġarónama, naumeki da Yesu nema ya nağonağó bakona, nama tauna e nağona.

Riuvavasağá vaunama

⁷ Yau banaga kauama, Bada Yesu ya riu vavasağedana da tauda dà banagama dà banagama sibo tèi nuapağöedina. Be inam riuvavasağinama nam riu vauna, ibewa da giunama teneğinama taumi noğone koya vaivaiena, vutuna yodi yà girugirumina. ⁸ Inam riuvavasağinama inam riu poranama, be you riu vaunama. Be inam riuvavasağinama inam riukaua, vutuna Keriso na yawasanae be taumi ami yawasanae ya mağatarana, baninama tadiwanawana ya vaikoakoa be riukaua yananama yodi nöpomie e yanayanana.

⁹ Aitau e riuriuna da tauna yanae e miamiana, be değoda turanama ġesau e gadogadoğaiena, tauna inam tadiwanawana nöponağà e nağonağona. ¹⁰ Be aitau turanama ġesau ewai nuapağöena, tauna inam yanae e nağonağona. Be inam baneginama ġarone nam aba gewagewanama ima kenakenana da tokare turanama ġesau ei beku. ¹¹ Be aitau turanama ġesau e gadogadoğaiena, tauna inam tadiwanawana nöponağà e nağonağó be e miamiana, baninama tauna matanama tadiwanawana ya suma tom be değó e nağonağona nam i kataiena.

* **2:1:** Riu ‘yau sedama’ inam nam na seda ġoma. Be ibewa da tauna banaga poranama aubainama nama e riuriuna.

¹² Yau sedama, taugu uma kauidima yà girugirumidina ġaromie, be ko kataie da Mamaitua ami gewagewama ya noğota poredina, baninama Keriso tauda aubaidama ya mariyawa be ya gurina.

¹³ Taumi dosi tautaugomimima, taugu uma kauidima yà girugirumidina ġaromie, baninama taumi Bada kaite koya kataieno, tauna vutuna boni pakane da yodi nama e miamiana.

Be taumi yarayaraga waisumeġimima, taugu uma kauidima yà girugirumidina ġaromie, baninama taumi Seitan koya vaisubana. Be taumi seda matabumi, taugu uma kauidima yà girugirumidina ġaromie, baninama taumi kaite Tamadama Mamaitua koya kataieno.

¹⁴ Be mate dosi tautaugomimima, taugu uma kauidima yà girugirumidina ġaromie, baninama taumi Bada kaite koya kataieno, tauna vutuna boni pakane da yodi nama e miamiana.

Be taumi yarayaraga waisumeġimima, taugu uma kauidima yà girugirumidina ġaromie, baninama taumi koyai rewapanana, be Mamaitua riunama nopomie e kenakenana na rewapanae taumi Seitan koya vaisubana.

Uma dobunama nam koi nuapaġoe

¹⁵ Uma dobunama be yaba matabudi nopone ta kenakenana nam koi nuapaġoedi. Be deġoda aitau uma dobunama ewai nuapaġoena, tauna inam Tamadama Mamaitua wainuapaġoenama nopone nam ima kenakenana. ¹⁶ Baninama yaba matabuna uma dobune tà kitedi be nuadama ta sorusorudina kitedima maika tubuġidama adi ġoanama, bo mata na ġoanama, bo banaga adi waiguyauma. Inam yabedima matabudi nam Tamadama marae ġarone be ti yovona, ibewa da taudi matabudi dobu ġaronama. ¹⁷ Uma dobunama be na ġoanama matabudi tokare ta samoana, be aitau Mamaitua na ġoanama e voivoiena, inam baneginama tokare e mia nonoġana.

Keriso tauwai ġavienama

¹⁸ Yau sedama, yodi inam raġan damodie ta tavatavana. Be boni taumi koya vaie da Keriso tauwai ġavienama e veraverena e tavana. Be Keriso tauwai ġavienama gesaudima toitoi kaiteka ta tavatavana. Inam kauidima tauda tawai kataidana da kaiteka raġan damonama e tavatavana. ¹⁹ Inam banegidima noğone tauda mate tèwai taparoro tenaġħana, be yodi a gosedana. Inam banegidima nam tauda dà banaga kaua, be deġoda taudi sibo tauda dà banagama, taudi tokare nam a gosedana. Tauda noğone taudi mate tè miamiana, be taudi a gosedana aubainama yodi tè kataie

da inam banegidima taudi nam tauwai sumaḡa damnama nopone tima miamiana. Be deḡoda ti ḡoena, tokare nam a goseda. ²⁰ Be taumi inam ibewa, baninama Banaga Babaunama kaite matabumi yai aiainimi, be riukaua koya kataiena. ²¹ Taugu ḡaromie yà girugirumana, nam ko noḡoti da taumi kabe riukaua nam ko katakataie, ibewa da taumi riukaua koya kataiena aubainama ḡaromie yà girugirumana. Be inam riukauinama nopone nam tokare kaiyovu tà banavi, ibewa. ²² Be yodi aitau kaikaiyovuna? Banaga aitau e riuriuna da Yesu tauna nam Tauwai yawasana, inam baneginama tauna vutuna banaga kaikaiyovunama, tauna vutuna Keriso tauwai ḡavienama, baninama tauna Tamadama be Natunama Yesu tauboviedima. ²³ Deḡoda aitau Mamaitua Natunama e bovibovienna, tauna nam tokare Tamanama e paḡo be mate ta mia tenaḡa. Be aitau Mamaitua Natunama ewai anine be e riuriuna da Yesu tauna Tauwai yawasana, inam baneginama tauna tokare Tamadama Mamaitua e paḡo be mate ta mia tenaḡana.

²⁴ Ko kita kaua da aba noḡone ai kataimi be koya vaivaiena, naumeiki da nopomie e kena nonoḡana. Deḡoda nopomie e kenana, taumi tokare natunama Yesu be Tamanama Mamaitua mate ko mia tenaḡana ²⁵ be yawasana kenakena nonoḡinama ko paḡona, inam vutuna tauna ya saugedana.

²⁶ Taugu uma yabedima yà girugirumidina ḡaromie da yà riu wainoḡotimina, baninama banaga ḡesaudima ta ḡoeḡoena da taumi tai doka waigewemina. ²⁷ Be taumi Arua Babau kaite koya paḡo be nopomie e miamiana. Vutuna aubainama yodi nam tauwai katakatai ḡesau koma ḡoeḡoena da sibo yai katakataimi. Baninama Arua Babau yaba matabudi ewai katakataimina, be aba tauna ewai katakataimina inam matabudi riukaua, be nam kaiyovu. Be Arua Babau aba yawai katakataimina, nama ruvane sibo raḡan matabuna Keriso ḡarone koya miana.

²⁸ Vutuna aubainama yau sedama, ko kaigurate da Yesu na yawasanae ko mia nonoḡana. Be tauna e maḡatarana raḡanine, tauda tokare ma raudebatorada tauna noḡone tà midina, be nam tà tunimayaḡa. ²⁹ Taumi koya kataiena da tauna didimana baneginama, be mate aitauḡa didimana ta voivoiedina, inam tauna na sedama.

3

Mamaitua na sedama

¹ Yodi ko kita da Mamaitua na wainuapaḡoma ya moraba kauana ḡarode, vutuna aubainama ya voieda da yodi na sedama tè tubuḡana. Riukaua da na seda ḡomama tauda!

Be aba aubainama dobu banegidima tauda nam ti kataieda, inam baninama taudi Mamaitua nam ti kataienā. ² Yau banaga kauama, tauda yodi Mamaitua na sedama tà miamiana, be nema tokare tà tubuğā bakona, yodi tauda nam te katai kauena. Be aba tè kataienā inam Bada e mağatarana rağanine tauda tokare tauna maika tà tubuğāna, baninama inam rağanine tauna tokare bani ġominama matade tà kitana. ³ Be aitau da Kerisoe inam noğotinama ġarone e kenakenana, tauna yawasana miremiredima nam ima voivoiedina, baninama Keriso mate tauna nam yawasana miremiredima i voiedina.

⁴ Aitaugā gewagewa ta voivoiedina, taudi tarawatu tawai mia kotova kauena. Baninama gewagewa inam tarawatu tauvagudagudanama. ⁵ Be taumi koya kataienā da Yesu ya mağatarana gewagewa noğota porenama aubainama. Be tauna nopone nam gewagewa ima kenakenana. ⁶ Be aitau tauna ġarone e miamiana, tauna nam gewagewa ima voivoiedina. Be aitaugā gewagewa tawai boruditina, taudi Yesu nam ti kitana, bo nam ti kataienā.

⁷ Yau sedama, ko kita kaua da nam aitau e boru waideğemi. Aitau da didimana e voivoiena, naumeki da tauna banaga didimaninama, Yesu didimaninama e miamiana maika. ⁸ Be aitau gewagewa e voivoiena, tauna inam Diaboro ġaronama, baninama Diaboro tauna boni pakane nama gewagewa ya voivoiena. Inam vutuna aubainama Mamaitua Natunama ya yovo be ya mağatarana da Diaboro na noyama e kawa gewegewedina. ⁹ Aitau Mamaitua ġarone ya tubuğā vitarana, tauna tokare nam gewagewa ei borudidi be kwa kita. Baninama tauna nopone Mamaitua yawasana ya boruna maika pesi. Tauna nam teneteneğina da gewagewa e voiedi, baninama tauna Mamaitua ġarone kaite ya tubuğā vitarana. ¹⁰ Tokare nema tà katai bake da değō taudi Mamaitua na seda, be değō taudi Diaboro na seda? Umanama tokare tà kataienā: Aitau da nam turanama imawai nuapağona, be nam yawasana didimanidima ima voivoiedina, tauna inam nam Mamaitua Natuna.

Turamma turamma nuamma e pağō

¹¹ Uma varinama vutuna noğone tè vaivaiena yodi ya riuemina, tauda sibo turadama turadama nuadama ya pağona. ¹² Be nam sibo Kein na yawasanama tè pağō. Tauna Diaboro ġaronama be tasinama yai gurina. Be aba sabine tasinama yai guri? Baninama Kein inam voia gewegewedima ya voivoiedina, be tasinama tauna voia didimanidima ya voivoiedina, aubainama tasinama yai gurina. ¹³ Yau banaga kauama, değoda dobu banegidima ta tuağaiemina, nam ko nuababağā.

¹⁴ Tauda turadama turadama nuadama e paḡopaḡona, be inam kedane tauda tè kataien da guri inam muride tè gose pore be yodi yawasana tè paḡona. Be aitau da nam imawai nuapaḡona, tauna inam gurinama e miamiana. ¹⁵ Be aitau da turanama e tuatuaḡaiena, tauna inam tauvunuḡa e miamiana. Be taumi koya kataien da tauvunuvunuḡa nōpone yawasana kenakena nonoḡinama nam ima kenakena rubuna. ¹⁶ Tauda yodi tokare Kerisoe wainuapaḡo tā kita be tā kataien, baninama Yesu tauda aubaidama ya mariyawa be ya gurina. Be tauda mate sibo dà yawasanama muride tè boru be dà banagama sibo tè sagudina, deḡoda guri tè banavi bo ibewa, inam matabuna naumeki. ¹⁷ Deḡoda aitau ḡarone taragai be turanama ḡesau ya kita da taragai e marumarabienna, be tauna nam i raunuatoie be i saguna, be tauna e riuriuna da Mamaitua ewai nuapaḡoena, inam nemanama?

¹⁸ Yau sedama, nam mududaḡa wainuapaḡo e riuriue, ibewa da voienama mate. Inam vutuna wainuapaḡo riuriukauinama. ¹⁹ Inam kedane tè kataie da tauda riukaua ḡarōgaronama, be tokare Mamaitua noḡone nuadama torane tā midina, ²⁰ avedi da nōpode tā noḡotə bekubekuna, be inam nam tā noḡoti. Mamaitua yaba matabudi ya kataiedina, vutuna aubainama tauna inam noḡotə bekubekudima nam ima siesievidina, be tauna wainuapaḡo banidima tā voiedina, vutuna e siesievidina.

²¹ Yau banaga kauama, nōpoda nam e vobekubeku, be nuadama torane Mamaitua noḡone tā midina, ²² be ḡarone aba tāi baḡena, tauna tokare e utedana, baninama tauda na riuvavasaḡama tā vovo teyeteyedi be yaba matabuna tā voivoiedina, inam raḡanine tauna nuanama tā taiverena. ²³ Be Mamaitua na riuvavasaḡama inam umanama: Tauna Natunama Yesu Keriso tāi sumaḡe, be turadama turadama nuadama e paḡona tauna ya riuriu vavasaḡedana nama. ²⁴ Taudi aitaugā na riuvavasaḡama ta vovo teyeteyena, taudi vutudi Keriso nōpone ta miamiana, be Keriso taudi nōpodie e miamiana. Tauna Aruinama ya utedana, aubainama tè katoi kauena da Keriso tauda nōpode e miamiana.

4

Arua ko kita kauedina

¹ Yau banaga kauama, banaga ḡesaudima ta riuriuna da taudi arua a paḡo be ta giugiuna, inam banegidima nam koi sumaḡedi, ibewa da noḡone ko kita kauedina, deḡoda taudi arua Mamaitua ḡarone a paḡo bo ibewa. Baninama peroveta kaikaiyovudima toitoi dobue ta naḡonaḡo bababarana. ² Be aitau da Mamaitua Aruinama ḡarone,

tauna tokare umanama ko kita be ko kataienā: Tauna aitau e riuriuna da Yesu Keriso tauna Mamaitua ġarone be ya yovo da yai rawabanaga ġomana, inam baneginama tauna Mamaitua Aruinama ġarone.³ Be aitau deġoda Yesu nam ei maġatari, inam baneginama tauna arua nam Mamaitua ġarone i paġona, ibewa, tauna inam Keriso tauwai ġavienama aruinama ya paġona. Nogone koya vaiena da Keriso tauwai ġavienama tokare e veraverauna e tavana. Tauna vutuna yodi dobue e naġonaġo bababarana.

⁴ Be yau sedama, taumi Mamaitua ġaroġaronama, aubainama uma banegidima koya vaisubedina, baninama Arua nopomie e miamiana, tauna yai rewapanā kauana, nam arua dobue e miamiana maika. ⁵ Taudi inam dobu ġaroġaronama aubainama, dobuġa kauidima ta giuedi be ta naġonaġona. Be dobu banegidima inam perovetedima kaikaiyovudima ta vaiedi be tawai muriwatanedina. ⁶ Be tauda inam Mamaitua ġaroġaronama, be aitauġa Mamaitua na seda ġomama, taudi dà giūma ta vaiedi be tawai muriwatanedina. Be aitauġa Mamaitua nam na seda, taudi dà giūma nam tima vaiedi be tima voivoiedina. Inam kauidie tauda tokare tà katai kaue da deġo tauna arua riuriukauina, be deġo tauna arua kaikaiyovuna.

Mamaitua tauna vutuna wainuapaġo

⁷ Yau banaga kauama, tauda turadama turadama nudama e paġona, baninama wainuapaġo inam Mamaitua ġarone be ya yovona. Be aitauġa tawai nuapaġona, taudi inam Mamaitua ġarone a tubuġa vitara be Mamaitua a katai kauena.⁸ Mamaitua tauna wainuapaġo. Vutuna aubainama aitau da nam imawai nuapaġona, tauna inam Mamaitua nam i kataienā.

⁹ Mamaitua na wainuapaġoma ġarode umanama yai maġatarina, tauna nuanuanama natunama tenaġa ġominama ya riupore yovoġena dobue, da yodi taune tauda yawasana ġarone tà paġo be tà miana. ¹⁰ Be Mamaitua na wainuapaġoma inam umanama: Nam tauda tei nuapaġo dokena, ibewa da tauna tauda yai nuapaġo dokeda be natunama ya riupore da aubaidama ya rauepaiyada be tubuġine ya tipedana dà gewagewa sabine, yodibe Mamaitua nuanama ya subana.

¹¹ Yau banaga kauama, Mamaitua kaite yai nuapaġoedana, aubainama tauda mate dà banabanagama sibo tèi nuapaġoedina. ¹² Nam aitau deġo mata ġomine Mamaitua i kita rubuna, be deġoda tauda turadama turadama nuadama e paġona, tauda inam Mamaitua nopode e miamiana. Be

tauna na wainuapaǵoma nopode ya moǵavuna, be yodi inam wainuapaǵonama parata boruborune ya tavana.

¹³ Tauna aruinama tauda ya utedana. Vutuna aubainama tè kataie da Mamaitua tauda nopode e miamiana, be tauda tauna nopone tà miamiana. ¹⁴ Tamadama Mamaitua Natunama ya riupore yovoǵena dobue da tauna dobu matabuna tauwai yawasaninama. Be tauna vutuna tauma kè kita be kawai matamatana. ¹⁵ Deǵoda banaga aitau e riuriuna da Yesu tauna riukaua Mamaitua Natunama, inam baneginama nopone Mamaitua e miamiana, be tauna Mamaitua nopone. ¹⁶ Be tauda tè kataie be tawai sumaǵena da Mamaitua ewai nuapaǵoedana.

Mamaitua tauna vutuna wainuapaǵo, be aitau wainuapaǵoe e miamiana, inam baneginama tauna Mamaitua nopone e miamiana, be Mamaitua inam baneginama nopone. ¹⁷ Inam kedane wainuapaǵo nopode e moraba be parata boruborune e tavana, inam raǵanine tauda tokare etara raǵanine nuadama torane tà midina be nam tà naira, baninama uma dobue tauda dà yawasanama Keriso na yawasanama maika.

¹⁸ Be wainuapaǵo banegidima taudi nam ma nairidi tima miamiana. Baninama raǵanine wainuapaǵo e moraba be parata boruborune e tavana, naira tokare e tauriena, be aitau ma nairina e miamiana, inam baninama tauna kovoǵa e nainairena. Vutuna aubainama deǵoda naira nama tà kitana, inam wainuapaǵonama nam i moraba be parata boruborune i tavana, ibewa. ¹⁹ Tauda tawai nuapaǵona, baninama Mamaitua noǵone yai nuapaǵo dokedana aubainama.

²⁰ Deǵoda aitau e riuriuna, “Taugu Mamaitua yàwai nuapaǵoena.” Be nuanama nopone turanama e gadogadoǵaiena, tauna inam banaga kaikaiyovunama. Uma kwa noǵoti: Turamma matame kwa kitakitana be nam kumawai nuapaǵoena, nema tokare Mamaitua kwai nuapaǵo bake? Baninama Mamaitua tam nam ku kita rubuna. ²¹ Be tauna umanama ya riu vavasaǵedana: Aitau da Mamaitua ewai nuapaǵoena, naumeki da dobue turanama mate ei nuapaǵoena.

5

Waisumage dobu yawasanidima tà vaisubedina

¹ Aitaugá tawai sumaǵana da Yesu tauna Tauwai yawasana, taudi inam Mamaitua natunatunama. Be aitaugá Tamadama tawai nuapaǵoena, naumeki da natunama mate tài nuapaǵoena. ² Deǵoda tauda Mamaitua tài nuapaǵoe be na riuma tà voteyeteyedina, inam raǵanine tokare

banaga ta kita be ta kataie da tauda Mamaitua na sedama mate tāwai nuapañoedina.³ Mamaitua wainuapañoenama inam umanama: Tauna na riuvavasağama tà vovo teyeteyedina. Be inam riuvavasağidima ġarode nam ti piripirina,⁴ baninama aitaugā Mamaitua ġarone a tubuğā vitarana, taudi inam dobu yawasanidima a vaisubedina, baninama adi waisumagāma debane.⁵ Aitau tokare dobu yawasanidima e vaisubedi? Tauna aitau ewai sumağana da Yesu tauna Mamaitua Natuğominama, tauna tokare dobu yawasanidima e vaisubedina.

⁶ Yesu Tauwai yawasana tauna ya yovona tauda ġarode. Be Arua Babau ġarode yai mağatarana da Yesu tauna riukaua Mamaitua Natuğominama, baninama tauna upae ya babaaito be korosie kosininama ya darorona. Be yodi nam upa taunağā tà noğoti, ibewa da kosina mate tà kita be tà kataie da Yesu tauna riukaua da Mamaitua Natuğominama ya gurina. Be inam kauidima Arua ewai mağataridina tauda ġarode. Be Arua aba ewai matematena, nam aitau e riuwai kaikaiyovu, baninama Arua tauna naumeki da riukaua. ⁷⁻⁸ Yodi tà kita da uma yabedima rabuiteğā; inam Arua, upa be kosina tawai matamatana da inam riukaua. Be taudi rabuiteğā ai anina tenağā da inam riukaua. ⁹ Be banaga ġoma adi kauama ta giuguedina tauda tāwai aninedina, be you, Mamaitua aba ġarode ya giuguedina inam a moraba guratana. Vutuna aubainama Mamaitua natunama varinama yawai matematena sibo tè pa gó be tēi sumağena.¹⁰ Aitauğā Mamaitua Natunama tawai sumağena, taudi nopolie Mamaitua riunama e kenakenana. Be aitaugā nam timawai sumağena, taudi Mamaitua ta riuriu waikaikaiyovuna, baninama tauna Natunama vari-nama yawai matematena taudi nam ti pa gó be ti sumağena.

¹¹ Be aba Mamaitua e giugueno inam umanama: Tauna yawasana kenakena nonoğinama ya utedana. Be inam yawasaninama tokare natunama Yesu ġarone tà banavina. ¹² Aitau Mamaitua Natunama Yesu ya pa gó be ġarone e miamiana, tauna inam yawasana ya banavina. Be aitau Mamaitua Natunama nam i pağona, tauna yawasana nam i pağona.

Jon na giuma damodamodima ya sivudina

¹³ Taumi aitaugā Mamaitua Natunama isanama kowai sumağena, ġaromie uma letanama yà girugirumina da sibo koya kataie da taumi kaite yawasana kenakena nonoğinama koya pağona. ¹⁴ Be değoda tauda na noğotama ruvane tài bağana, tauda tè katai kauena da tauna tokare bonadama e

paǵona. ¹⁵ Be tauna bonadama e paǵopaǵona, naumeki da aba ǵarone tewai baǵena inam kaitē paǵona.

¹⁶ Deǵoda ai turamma kuya kita be gewagewa e voivoiena, be nuanama e vitarena, naumeki inam gewagewanama nam guri kedanama ima watawatanina, naumeki da tauna aubainama kwa moiragai be Mamaitua ei yawasanina. Be deǵoda ai turamma gewagewama e voivoiena be nuanama nam e vitare, inam gewagewanama guri kedanama e watawatanina, inam tauna aubainama nam kwa moiragi. ¹⁷ Be yawasana barebaredima matabudi isedima inam gewagewa, be gewagewa ǵesaudima damodie guri nam tima kenakenana.

¹⁸ Tauda tē kataienā da aitau Mamaitua ǵarone ya tubuǵa vitarana, tauna nam gewagewa ima voivoiedina. Mamaitua inam baneginama e raberabe kauena, be Diaboro tokare nam tauna e taukonī yababe. ¹⁹ Tauda tē kataienā da tauda riukaua Mamaitua na sedama, be dobu banegidima taudi inam Diaboro na waibadae ta miamiana. ²⁰ Be mate tē kataienā da Mamaitua Natunama ya yovo be yai katakataidana da tauna aitau riuriukauinama vutuna tā kataienā. Be tauna vutuna riuriukauinama nopone tā miamiana. Be mate tauna Natunama riuriukauinama nopone tā miamiana, inam tauna Yesu Keriso, tauna vutuna Mamaitua riuriukauinama, be yawasana kenakena nonoǵinama.

²¹ Yau sedama, kokoitau nam ko rauduneedi, avedi!

Jon II

leta aniwai rabuinama ya girumina

¹ Taugu Jon, ekalesia adi badama uma letanama yà girugirumina tam waivimma Mamaitua ya vinevinemna* ñarome, be am sedama mate. Taugu riukaua yàwai nuapañoemina, be nam tauguña. Banaga matabudi aitaugña Bada na riukauama a katakataiena, taudi mate tawai nuapañoemina, ² Bada na riukauama nopode e kenakenana aubainama, tokare tauna mate tà mia nonoñana.

³ Mamaitua Tamadama be Natunama Yesu Keriso adi raunuatoi, adi raukivivere be adi subama tauda aitaugña riukaue be wainuapañoe tà miamiana, naumeki da ñarode ta kenana.

Riukaue be wainuapañoe tà miana

⁴ Taugu èi nuavere kauana rañanine yà kitana, be am sedama ñesaudima riukaua na ruvae nama a nañonañona, nema Tamadama ya riuriu vavasañedana nama.

⁵ Be tam waivimma, tam kuya kataiena da Bada Yesu ya riu vavasañedana da tauda dà banagama dà banagama tài nuapañedina. Be inam riuvavasañinama nam riu vauna, ibewa da giunama teneñinama tauda noñone tè vaivaiena, vutuna aubainama yodi yàwai bañamna da riunama ruvane nama tà miana. ⁶ Be wainuapañoe inam umanama: Mamaitua riunama tà voteyeteyedi be ruvane nama tà nañona. Be inam riuvavasañinama kaite koya vaiena, be yodi inam riunama ruvane nama ko nañona.

⁷ Be boruwaideña banegidima toitoi kaite dobu tawai yababina. Uma banegidima taudi nam tima waisumañana da Yesu Keriso tauna dobue ya dobi be yai rawabanaga ñomana. Inam banegidima taudi tauboru waideña be Keriso tauwai ñavienama. ⁸ Vutuna aubainama ko kita kauana, deñoda taumi inam banegidima koi muriwatanedina, taumi koya noyanoya guratana, damone tokare nam maesinama ko pañoe. ⁹ Aitaugña Keriso na waikatakataima a pañona, be taudi adi ñoñanama waikatakataidima mate ta rawarawa tegeidina, taudi nam nopodie Mamaitua ima miamiana, ibewa. Be deñoda aitau Keriso na waikatakataima e kaididi be e kaikai guratena, tauna inam Tamadama be Natunama Yesu tauna ñarone ta miamiana.

* **1:1:** Banaga toitoi ta noñonogoti da inam waivinama nam banaga ñoma, be agunai ekalesia.

¹⁰ Değoda aitau ġaromie e verau be nam Keriso na waikatakataima ruvane ei katakataimi, inam baneginama nam ko riu yağeyäge, be nam koi anine da ami vadae e mia, avedi. ¹¹ Aitau da inam nama banaginama e riu yağeyäge be ewai aninena, tauna inam baneginama na noyama gewagewanama e riuriu sagusaguna.

¹² Yaba toitoi sibo ġaromie è giuedina, be taugu nam ama ġoegoena da uma yabedima letae yà giuedi. Be nuaguma e riuriuna da baniġomiguma tokare yà verau be uma yabedima yà giuemina. Yodibe nuaguma tokare e suba be tài nuaverena.

¹³ Be tam waivimma turamma[†] uma Mamaitua ya vinevina, na sedama tawai kaiwemna.

[†] **1:13:** Gurik bonane ya riuna: ‘sister’. Uma bukanama nopone waivi inam tauna ekalesia ewai matairena.

Jon 3

leta aniwai rabuiteğanama ya girumina

¹ Taugu Jon, ekalesia adi badama uma letanama yà girumina tam turaguma Gaiyas ġarome. Taugu riukaua yàwai nuapaġoemna.

² Tura kaukauiguma, taugu aubaimma yà moimoiragina da tam tubuġimma verenama be yawayawasaninama sibo ya kenana aruimma maika. ³ Be dà banagama ġesaudima ġarogue a tava be ai variguna da tam Bada kuya katai kuae be na riukauama ruvane nama kwawai patutu kauana. Be am yawasanae raġon matabuna riukaua ruvane nama kwa miamiana, vutuna aubainama taugu yàwai nuavere kauana. ⁴ Taugu nam aba tenaġa tokare ei nuaveregu, be deġoda yau sedama Bada na riukauama ruvane nama ta miana, inam vutuna taugu yàwai nuavereena.

Gaiyas noya verenama ya voivoiena

⁵ Gaiyas turaguma, tam noya verenama kwa voivoiena dà banagama ġesaudima aubaidima, avedi da inam banegedima nam ku kataiedina, be yaġoro da kuya sagudina. ⁶ Inam banegidima taudi tam am wainuapaġoe, yaba matabuna kuya voivoiedina ekalesia matedie a giuedina. Verenama da tam inam banegidima adi vaġiae sibo kuya sagudina, nema Mamaitua e ġoeġoena nama. ⁷ Baninama taudi Yesu isanama aubainama ta vaġavaġai naġona, be adi vaġiae nam tima ġoeġoena da sagu banaga nam waisumeġidima ġarodie ta paġo. ⁸ Vutuna sabine tauda inam nama banegidima sibo dà vadae tèi aninedi be tè sagusagudina. Inam kauidie tauda taudi mate riukaua aubainama tà noya tenaġana.

⁹ Taugu leta è girumina Mamaitua na damma ġarodie, be Diotrepas tauname ya kawa saġe be waibada ya ġoeġoena aubainama, nam i aninemaina. ¹⁰ Be taugu ġaromie yà tavana raġanine, tauna nema ewai karakarakutu bakemaina, tokare patare yà giue be tà kataie da tauna nema maika kitana. Be nam inam yabediġa ima voivoiedina, be mate tauna tauwai sumaġa vaġavaġaidima nam sagudima ima ġoeġoena. Be mate Kuristen ġesaudima aitauġa waisagu ta ġoeġoena, e riutuaġaiedi be ekalesia nopone be e boruboru dobiġedina.

¹¹ Be tam turaguma Gaiyas inam nama yawasandima gewegewedima nam kwai tupotupoġanedi, ibewa da yawasana veredima vutudi kwai tupotupoġanedina. Aitau

da vere e voivoiedina, tauna Mamaitua ġaronama. Be aitau da gewagewa e voivoiedina, tauna Mamaitua nam i kataiena. ¹² Be Demetrias tauna na yawasanae Bada na riukauama ruvane e miamiana. Be inam vutuna ewai maġatarāna da tauna banaga verenama. Be yodi banaga matabuna tauna isanama ta kawakawa saġena, be taugu mate tauna yà kawakawa saġena. Be tam kuya kataiena da taugu aba yà giugiuena inam riukaua.

¹³ Yaba toitoi sibo ġarome è giuedina, be taugu nam ama goeġoe da uma yabedima letae yà giuedi. ¹⁴ Be nuaguma e riuriuna da baniġomiguma tokare yà verau be uma yabedima yà giuedina.

¹⁵ Suba ġarome naumeki da e kenana. Be dà banagama uma ġarogue tawai kaiwemna. Be taugu Jon mate, dà banagama inam ġarome kwa riuedina matabudi yàwai kaiwedina.

Jiud

leta ya girumina

¹ Taugu Jiud, Jeims tasinama be Yesu Keriso na taunoyama.

Taugu uma letanama yà girugirumina, taumi aitaugà Yesu Keriso e raberabe kauemina ġaromie, baninama Mamaitua ya vinemi be ewai nuapaġoemina.

² Mamaitua na raunuatoima, na subama be na wainuapaġoma maumauridima naumeki da ġaromie ta kenana.

Tauwai katakatai kaikaiyovudima ko kita kauedina

³ Yau banaga kauama, Bada yai yawasanidana, be taugu noġone è ġoe kaue da sibo leta è girumina inam kauinama aubainama. Be yodi è noġoti da yaba ġesau ġaromie yà giuena, inam umanama: Taumi Mamaitua vari verenama noġone ya ute wainonoġimi be koya vaivaiena, vutunaġa ko kaididi da bagibaginaġa, be nam aitau ami waisumaġe e boru waideġemi. ⁴ Baninama banaga kaikaiyovudima kaite moisirie a tava be matadama ta kitakita gorugorudina. Inam banegidima kaite Mamaitua ya sievidi be ta miamiana, tokare e kovoġidina. Taudi ta riuriuna da Mamaitua tauna raukivivere banaginama, vutuna aubainama gewagewa tà kaigurate be tokare dà gewagewama e noġota poredina. Be mate adi yawasanae dà Badama Yesu Keriso ta bovibovieno. Tauna vutuna tauda dà Badama riuriukauinama, be dobu matabuna ewai badena.

⁵ Taugu yodi yà ġoegħoena da Bada nema Israel banegidima Ijiptnopone be ya dobigeđina yà riuemina. Avedi da inam giunama taumi kaite koya kataiena, be taugu yaġoro yà riu wainoġotimina. Tauna riukaua da ya dobigeđina, be yaġoro da aitaugà nam tiwai sumaġana, muriġa yai guridina. ⁶ Be mate anea ġesaudima ko noġotidi, taudi Mamaitua waibada ya uteutedina, nam na ruvae nama ti miana, be adi kaba miama marae a gose be a yovo da gewagewa a voiedina. Vutuna aubainama Mamaitua tadiwanawanae ya rauseinidi be ta miamia watanana etara na raġanima dosinama aubainama. ⁷ Be mate meagħi Sodom, Gomora be diane meagħidima banegidima ko noġotidi. Taudi tubuġidima ai uta munaġedi be awai kawa badara yababayababana, maika waivi turanama waivi mate, be tauġoma turanama tauġoma mate. Taudi yodi kai matane tawai nuatoitoina, dabudine yodi tà kataie da kovoġa riukaua da gienae e kenakenana, kai karakarata nonoġinama.

⁸ Be teneğinama nama tauwai katakatai kaikaiyovudima yawasana gewegewedie ta miamiana, be moisirie a tavatava. Taudi adi raubonima tawai sumağedi, be adi wainua noğonoğotama kaikaiyovudie ta kawakawa sağe munağedina da taudi kabe banaga dosidi. Be taudime tubuğidima tawai miredi, be Keriso na waibadama tawai diboğι be ta riuriu tuatuağaiena. Be mate taudi mara banegidima tawai kwatekwatevedina. ⁹ Be anea Maikel ko noğoti. Tauna avedi da marae anea matabudi adi badama tori matane e midimidina, be yağoro nam aba gewagewanama i vato rubuna, Diaboro mate awai sağasağana rağanine, Mousis tubuğinama aubainama. Be tauna na riuma uma taunağι ya vatona, “Bada tam e riuriu tuağaiemna!” ¹⁰ Inam banegidima kaikaiyovudima taudi yaba banidima nam ti katai kauedi be ta kunukunura yababedina. Taudi adi noğotama maika musara. Vutuna aubainama taudi tubuğι taunağι na ġoanama ta noğotidi be tawai muriwatanedina. Be inam yabedima vutudi ta nawenawedina, tokare damone guri ta banavina. ¹¹ Inam banegidima taudi ta kita kauedina. Taudi tokare kovoğι ta banavina, baninama taudi Kein na yawasanama tawai muriwatanena, tauna tasinama ya vunuğina. Be taudi yaba matabuna ta voivoia yababayabena mane pağonama aubainama maika Beilam. Be mate taudi ta paripari viravirana Mamaitua ġarone maika Kora, be tokare tauna ei guridina.

¹² Rağanine taparoro na kanigogonama aubainama kowai rawateğeimina, inam banegidima waimata ravuğeidima ko kita kauedina. Taudi nopomie a verau be ta miamiana sibo a tunimayağana, be ġarodie nam tunimayağι ima ke-nakenana. Taudi sipu taurabedima nam veredi, baninama taudiğι kapodima ta noğonoğota guratena. Taudi dobu e ġuvağuvana maika değο kabe biga e dobi be ei kutuva, da ibewa. Be sive e suvesuve waidaberaridina. Taudi inam maika kai nam votevotedi, taudi adi votama na irima da sibo a votavotana, be nam tima votavotana. Taudi maika kabe kai i poki be i midimidi yababa. Be muriğι ma waramina e nuakamoğana rağanine, inam yodi rağan aniwai rabuinama ya guri munağana. ¹³ Taudi yawasana waideba subesubedi be miremiredima ta voivoiedina, maika egasie rabama dosinama e riğι be warabadinama egasi ewai mirana nama. Be taudi maika kipora waikupikupie ta nuakamoğι be ta manimanini yababana. Taudi adi gabuma tadiwanawana vavasağine Mamaitua kaita ya kawa nonoğι be e kenakenana, dabudine tokare tai nuatoitoi nonoğana.

¹⁴ Inok tauna kimta aniwai 7-nama Adam na damma no-

pone, tauna inam banegidima kaikaiyovudima aubaidima yai peroveta be ya riuna,

“Ko kitana, Bada e veraverauna anea babaudima toitoi nam anisiesievidi* mate

¹⁵ da banaga matabudi e etaredina.

Be banaga tenatenağāğā adi voia waigewama e kawa mağataridi be e etaredina.

Be mate inam banegidima gewegewedima Mamaitua ğarone a paripari viravira be a kunukunurana, aubainama tokare e etaredina.”

¹⁶ Inam banegidima taudi momodu, waisura wavy, be taudi tubuğā adi ġoanama tauwai muriwatanedima banegidima. Be taudi ta seğaseğara munağedina, be adi banagama ġesaudima ğarodie yaba vereveredima ta kitedi be giu ġaroğaroroe ta gwayegwayedina.

Ami waisumağe ko vadidi da bagibaginağā

¹⁷ Be taumi yau banaga kauama, dà Badama Yesu Keriso na apasolma abağā noğone a giuguedina, vutudi ko noğotidi.

¹⁸ Taudi umanama a giuna: Tokare rağān damone tauwai diboğā ta mağatara, be taudi Mamaitua ta mia tautauriena, be taudime adi ġoanama kauidima gewegewedima tai muriwatanedina. ¹⁹ Inam banegidima taudi waikawa dariğā tauwai tubuğidima. Taudi ta ġoeğöena inam adi noğotama e riuriuedina, ruvane nama ta miana. Taudi Arua Babau nopodie ibewa.

²⁰ Be taumi yau banaga kauama, ami waisumağe ko midi da bagibaginağā, be rağān matabuna Arua Babau na rewapanae ko moiragina. ²¹ Be Mamaitua na wainuapağoe ko mia, be yawasana kenakena nonoğinama koi rabena, inam vutuna Yesu Keriso na raunuatoie tokare e utemina.

²² Aitaüğā noğota bekubeku ta pağopağona, naumeki da ko raunuatoiedi be ko sagudina. ²³ Be ġesaudima kai matane a nağō be etara tawai rabena. Vutudi ko dobiğedi be koi yawasanidina. Be ġesaudima raunuatoie ko sagudina, be nam koi popo tenağā. Be ko kita kaua da adi mirama nam e taukonimi.

Kaisuğusuğu giudima

²⁴ Be Mamaitua tauna vutuna teneteneğinama da e rabe kauemina, be ami waisumağe tokare nam ko beku. Be na rağanima e tavana rağanine, tauna tokare teneteneğinama ma mosarimi e nawemina tauna neneğarinama nopone, be tokare nam ei wavumi da taumi banaga miremiremi.

²⁵ Riukaua da tauna taunağā vutuna Mamaitua, dà Tauwai

* **1:14:** Gurik bonane ya riuna: 1 tausand da 1 tausand

yawasanama, baninama tauna dà Badama Yesu Kerisoe yai yawasanidana. Yesu tauna vutuna guyau dosi vavasağinama ma borumina e miamiana be isanama tà kawa sağena. Be tauna na rewapanama ya moraba kaua be yaba matabudi ewai badedina. Tauna nama miemieninama, boni, yodi be tokare e mia nonoğana. Inam riukaua.

WAIMAĞATARA

¹ Uma bukanama nopone aba raġan ġaubonaġa tokare ta tubuġana, vutudi Mamaitua Yesu Keriso ġarone yai maġataridina da Yesu inam kauidima na banagama ei kataidina. Be Yesu Keriso inam kauidima tauda na taunoyama ġarode ewai maġataridina. Inam kauinama umanama ya tubuġana, Yesu Keriso na aneama ya riuporena na taunoyama Jon ġarone da inam giudima yai maġataridina. ² Be Jon uma kauidima matabudi ya kitedi be e riuri-uedana da Mamaitua riunama be aba Yesu Keriso yawai maġataridina, inam matabudi riukaua.

³ Uma kauidima raġan ġaubonaġa tokare ta tubuġana, vutuna aubainama nuavere taudi aitauġa uma waiperoveta giudima ta siesievidina. Be nuavere taudi aitauġa ta vaiedi be aba uma bukanama nopone ya girugirumina, taudi ta ragaudi da nuedie, be ta vovo teyeteyedina.

Jon na waikaiwama

⁴ Taugu Jon, uma letanama yà girugirumina meagai 7 nopolie ekalesia ko miamiana ġaromie, Eisia provins nopone. Mamaitua be Arua 7 adi raukiviverema be adi subama ġaromie e kenana. Mamaitua vutuna boni miemieninama, yodi e miamiana be tokare e verauna. Be Arua 7 taudi Mamaitua na kaba miama noġone ta midimidina. ⁵ Be Yesu Keriso mate na raukiviverema be na subama ġaromie e kenana. Tauna vutuna matamata patupatutunama, be tauna vutuna banaga guriguridima nopolie be ya midisuġu dokana. Be tauna vutuna dobue guyaguyau matabudi adi guyaua.

Be tauna vutuna ewai nuapaġoedana, be kosinine dà gewagewama ya koġa poredi be ya kuvesidana. ⁶ Be tauna na waiguyauma nopone ya birida be ya voieda da tauna na Mamaituama be Tamanama na pirisima tè tubuġana. Tauna ġarone boruma be rewapani e kena da e kena nonoġana. Inam riukaua!

⁷ Ko kitana, tauna ma giyouna e veraverauna. Be banaga matabudi tokare tauna ta kitana, be aitauġa tauna a tuparatuna, taudi mate tokare ta kitana. Be tauna e veraverauna aubainama, dobu banegidima matabudi nopolima ei poya be ta ġaba waisosorina. Nama tokare e tubuġana. Inam riukaua!

⁸ Bada Mamaitua, tauna vutuna boni miemieninama, yodi e miamiana be tokare e verauna. Be rewapani matabudi tauna ġarone ta kenakenana, be tauna umanama ya riuna,

“Taugu vutuna Alfa be Omega,* yaba matabuna pakane da damone vutuna taugu yà miamiana.”

Jon Keriso ya kitana

⁹ Taugu Jon tuaġemima taugu taumi mate Yesu tåwai sumaġena aubainama, na waiguyauma nopone tà miamiana. Vutuna aubainama tauda matabuda raukivigewagewa be wainuatoitoi tà banabanavidi be tà damidami pore-dina. Taugu Mamaitua na giuma be Yesu varinama è rarauguguyedina aubainama, banaga dibura bonabonane isanama ‘Patmos’, dabudi a boru naweguna. ¹⁰ Raġan Sande taugu Arua yai dokegu be murigue taugu bona dosinama è vaiena, bogigi bonanama dosinama maika. ¹¹ Be bona umanama ya riueguna, “Aba tam kwa kitekitedina, vutudi buka nopone kwa girumidi be kwa riupore nawedina uma meagai 7 nopolie ekalesia ta miamiana ġarodie, Meagai Epeses, Simena, Pegamum, Taiyatira, Sadis, Piladelpia be Laodisia.”

¹² Dabudine ei tautinamuri da banaga aitau ġarogue ya giugiuna kabe yà kita. Be ewai tautinamurina raġanine, kendoro kaidima goldie voivoiedima matabudi 7 è kitedina. ¹³ Be kendoro kaidima poudie taugu yaba kitanama banaga maika è kitana. Tauna gara daudaunama kaġaġorae dobidoċinama ya kotena. Be tadiwa goldie voivoienama nuakadanaġa ya pani verauġena. ¹⁴ Be deba vuvuġinama sипу vuvuġinama ġavoġavorinama bo giyou ġavoġavorinama maika. Be matanama kitanama kai menanama waimata kanikaninama maika. ¹⁵ Be kaġanama kitedima maika irama ta gabu be e monamonaunana maika. Be bonanama vaienama tapara yarataunama maika. ¹⁶ Be nimanama kasaune kipora 7 ya ragaragaudina. Be mudune kwatikwati menanama murine be karone gamgamdima ya dobina. Be noġonama ya yanayanana, suaratopu suara e rarararanana maika.

¹⁷ Be taugu tauna è kitakitana raġanine, taugu kaġone è bekuna maika kabe banaga gurigurina. Dabudine tauna nimanama kasaune ya taukonigu be ya riuna, “Nam kwa naira, taugu pakane be damone taugu vutuna yà miamiana. ¹⁸ Taugu vutuna yawayawasaniguma yà miamiana. Taugu è gurina be yodi è yawasana nonoġħana, be taugu guri be banaga guriguridima aruidima adi gabuma kiġidima taugu yà raberabedina. ¹⁹ Vutuna aubainama yaba matabudi kuya kitekitedina kwa girumidina, yaba yodi ta tubutubuġħana be tokare ta tubuġħana, matabudi kwa girumidina. ²⁰ Be kipora

* **1:8:** Gurik bonane ‘Alfa’ inam adi alfabetma pakanama, be ‘Omega’ inam adi alfabetma damonama.

7 nimaguma kasaune kuya kitedina, baninama inam meagai
7 ekalesiedima adi aneama, be kendoro kaidima 7 inam
vutudi meagai 7 ekalesiedima.

2

Eklesia Epeses nopone adi letama

1 “Uma letanama kwa girumi be e naġona Eklesia Epe-sesma adi aneama ġarone. Umanama kwa girumana:

Taugu vutuna nimaguma kasaune kipora 7 è ragaudi be kendoro kaidima 7 nopardiġa yà naġonaġona, yau giuma inam umanama:

2 Taugu ami voiama, ami noya guratama be yaba matabuna koya damidami poredina, matabudi è kataiedina. Be mate è kataiena da banaga gewegewedima adi voiama taumi koya riuriu tuaġaiedina. Be banaga aitauġa da ta riuriu munaġedina da taudi kabe apsol, be taumi koya raurubudi, be koya kita da taudi banaga kaikaiyovudima. 3 Be taumi koya kaigurate da piripiri matabudi koya damidami poredina taugu isaguma aubainama, be nam ko tunibadona.

4 Be yaba tenaġa ġaromie è kita be ya gewagewana, inam uma: Taumi noġone koyawai nuapaġoeguna, be yodi inam wainuapaġonama koya gosena. 5 Ko noġoti, boni koyawai nuapaġo gurateguna, be yodi ami wainuapaġoma e yovoyovo munaġana. Vutuna aubainama ami noġotama ko vitaredi, be noġone aba koya voivoiedina, vutudi ko voiedina. Deġoda taumi nam noġota vitara ko paġo, naumeki da taugu yà verau be ami kendoroma kainama na gabue midimidinama yà kai porena.*

6 Be yaba tenaġa è kita be matague ya verena inam uma: Banaga aitauġa taudi Nikolas tauwai muriwatanenama, adi voiama matabudi taumi ko tuatuaġaiedina, nama taugu mate yà tuatuaġaiedina. Baninama Nikolas tauna tauwai katakatai kaikaiyovunama.

7 Arua Babau aba eklesia ġarodie e giuguedina, taumi aitauġa beemima e kenakenana, koi beavaia kauana. Tauna aitau inam yabedima e vaisubedina, tauna tokare yai anine da yawasana kainama votanama paradaisie e kanina.

Eklesia Simena nopone adi letama

8 “Uma letanama kwa girumi be e naġona Eklesia Sime-nama adi aneama ġarone. Umanama kwa girumana:

* 2:5: Inam baninama tokare eklesia e kaiporena.

Taugu vutuna pakane da damone miemieniguma, nama yà miamiana, taugu è guri be è yawasana munaġana, yau giumentina inam umanama:

⁹ Taugu ami piripirima be ami waikaruwaġawaġama è kataiedina. Be ibewa da taumi inam waiguyau banegimima! Taugu è kataiena da taudi aitaugħa ta riuriu mu-naġgedina da taudi kabe Jius, be taudi vutudi taumi ġaromie tawai menamenana. Inam taudi nam Jius, ta kaikaiyovuna, taudi inam Seitan na banagama.[†] ¹⁰ Piripiri tokare ġaromie ta tubuġana, taumi nam ko naira! Yà riuriuemina da ġesäumima tokare Diaboro dibure e birimina raurubumima aubainama. Be dabudine taumi raukivigewagewa ko banavina raġan matabudi 10 nopolie. Deġoda tokare tai gurimina, be taumi koi patutu be ami waisumaġe ko midi bagibagina, taugu tokare ami maesama paiwaraga yà utemina, inam yawasana kenakena nonoġinama.

¹¹ Arua Babau aba ekalesia ġarodie e giuguedina, taumi aitaugħa beemima e kenakenana, koi beavaia kauana. Tauna aitau inam yabedima e vaisubedina, guri aniwai rabuinama tokare nam inam baneginama e taukon.

Ekalesia Pegamum nōpone adi letama

¹² “Uma letanama kwa girumi be e naġona Ekalesia Pega-mumma adi aneama ġarone. umanama kwa girumana:

Taugu vutuna kwatikwati menanama murine be karone gamgamdima ġarogue e kenakenana, yau giumentina inam umanama:

¹³ Taugu è kataiena taumi dego dabudine ko miamiana. Taumi Seitan na waibadae dabudine ko miamia. Be you, taumi yaġoro isague kowai patutuna, be nam ami waisumaġama koma gosegosena. Be Antipas yau matamatama patupatutunama ai gurina raġanine, taumi yaġoro ami waisumaġama ġarogue nam ko gosena. Inam kauinama ami meagaie Seitan na kaba miae ya tubuġana.

¹⁴ Be yaġoro yaba bisa ġaromie è kitedina nam ti verena. Taumi ami ekalesiama nōpone banaga bisa taudi Beilam aba yawai katakataina, vutudi tawai muri-watanedina. Tauna vutuna boni Balak yai katakatai da Balak Israel banegidima ya gwayedi, da taudi kani kokoitau ġarodie raurauobedima a kanikanidina, be awai soġa yababayababana. Inam kauidie taudi gewagewa a voivoiedina. ¹⁵ Be mate ġesäumima taumi Nikolas na waikatakataima kaikaiyovudima kowai muriwatanedina. ¹⁶ Vutuna aubainama taumi ami noġotama ko vitaredina. Deġoda ibewa, taugu ġaubaġa ġaromie yà verau

[†] 2:9: Gurik bonane ya riuna: Seitan na sinagogma

be mudugue kwatikwati gamgamne, inam banegidima ġarodie yà iġarana.

¹⁷ Arua Babau aba ekalesia ġarodie e giuguedina, taumi aitauġa beemima e kenakenana, koi beavaia kauana. Tauna aitau inam yabedima matabudi e vaisubedina, tauna tokare kani semosemonama isanama ‘Mana’ yà utena. Be mate yeku ġavoġavorinama yà utena, be yekunama bogane isa vaunama girugiruminama e kenakenana. Be inam isanama nam aitau i kataien, be aitau da inam yekunama e paġona, taunaġa inam isanama tokare e kataien.

Ekalesia Taiyatira nōpone adi letama

¹⁸ “Uma letanama kwa girumi be e naġona Ekalesia Taiyatira adi aneama ġorone. Umanama kwa girumana:

Mamaitua Natunama tauna vutuna matanama kitanama kai menanama waimatakanikaninama maika. Be kaġanama kitedima maika irama ta gabu be e mona-monaunana maika. Tauna na giuma inam umanama:

¹⁹ Taugu ami voiama matabudi è kataiedina. Be ami wainuapaġoma, ami waisumaġama, ami noyama be ami wainuabagibagima, matabudi è kataiedina. Be mate è kataien da taumi yodi ko noyanoya guratana, nam maika noġone nama.

²⁰ Be yaba uma ġaromie è kitana nam i verena. Taumi waivi Jesebel koya kita yababe be na ġoanama e voivoiedina. Inam waivinama tauname ya riuriu mu-naġenā da kabe tauna peroveta, be na waikatakataie tauna yau taunoyama ya biri waideġedi da tawai soġa yababayababana, be kani kokoitau ġarodie raurauobedima ta kanikanidina. ²¹ Taugu na raġanima toitoi è utena da na noġotama sibo ya vitaredina, be tauna ya tuaġaina. ²² Taugu inam waivinama tokare yà sida kauena, be aitauġa inam waivinama mate tawai soġa yababayababana, taudi tokare piripiri be nuaboya dosinama ta banavina, deġoda nuedima nam ta vitaredi.

²³ Taugu Jesebel na sedama yà guridi, be dabudine ekalesia matabudi ta kita be ta kataie da taugu vutuna banaga adi yawasanama nuapoudie be taurivatudie yà kitakita wairuvedina. Be taugu tokare taumi tenate-naġaġa ami voiama ruvedie nama yai maesimina. ²⁴ Be taugu yodi Taiyatira banegimima ġesauġimma yà riuemina. Taumi Jesebel na waikatakataima nam kowai muriwata-nena, aubainama Seitan na waikatakataima semosemodima nam ko kataiedina. Vutuna aubainama taugu nam ami vitama debane ġesau yà boru, ibewa, ²⁵ be ami

waisumaḡama ḡarogue vutuna ko kaididina naumeki da taugu yà verau munaḡana.

²⁶ Tauna aitau inam yabedima matabudi e vaisubedi be yau ḡoanama e voiedi da e raudamoena, tauna tokare rewapanana yà ute da banaga dobu matabuna nopone ei badedina. ²⁷ Be tauna diḡona irame voivoienama e paḡo be banaga ei badedina, be ei mia mutumutudina maika gurewa. ²⁸ Nema Tamaguma rewapanana ya uteuteguna, nama tauna yà utena. Be kipora tauraḡaraḡan mate tauna yà utena. ²⁹ Arua Babau aba ekalesia ḡarodie e giuguedina, taumi aitaugā beemima e kenakenana, koi beavaia kauana.

3

Ekalesia Sadis nopone adi letama

¹ “Uma letanama kwa girumi be e naḡona Ekalesia Sadisma adi aneama ḡarone. Umanama kwa girumana:

Taugu vutuna Mamaitua Aruinama 7 ḡarogue be kipora 7 yà ragaragaudina, yau giuma inam umanama:

Taugu ami voiama matabudi è kataiedina. Be banaga ta riuriuna da taumi kabe yawayawasanimi. Be ibewa da taumi inam koya gurina. ² Taugu ami voiama matabudi è kita wairovedi da yau Mamaituama matane, nam koma voivoia kauedina. Vutuna aubainama ko midisuḡu! Be tauwai sumağā be yawasana ḡesəudima ḡaubonaḡā ta gurina, ko voiedi da tai rewapanana. ³ Aba koya vaie be koya paḡopaḡona, vutuna ko noḡotidi da ko voteyeteyedi be ami noḡotama ko vitaredina. Be deḡoda taumi nam nuemima ko vitaredi be ko midisuḡu, taugu tokare yà verauna banaga danedanenena maika, be airaḡan ḡaromie yà verauna, taumi tokare nam ko kataie.

⁴ Be taumi Sadisma banaga raubisäga adi garama nam ti miredina. Be taudi tokare gara ḡavoḡavoridima yai kotedi, be taugu mate ka babarana, baninama taudi yaba matabuna ḡarone inam naumeki. ⁵ Be tauna aitau uma yabedima matabudi e vavai subedina, tauna tokare gara ḡavoḡavorinama yai kotena taudi maika. Be isanama yawasana bukanama nopone girugiruminama, nam tokare yà boa pore. Ibewa da Tamaguma be na aneama noḡodie tauna isanama yà kawa saḡena. ⁶ Arua Babau aba ekalesia ḡarodie e giuguedina, taumi aitaugā beemima e kenakenana, koi beavaia kauana.

Ekalesia Piladelpia nopone adi letama

⁷ “Uma letanama kwa girumi be e naḡona Ekalesia Piladelpiama adi aneama ḡarone. Umanama kwa girumana:

Uma giunama inam banaga Babaunama be riuriukauinama na giuma. Be tauna guyau Deivid na kiġima e kaikaididina. Be tauna matakeda e kaiporena, tokare nam aitau e gudu. Be tauna matakeda e guduna, tokare nam aitau e kaipore. Tauna na giuma inam umanama:

⁸ Ami voiama matabudi è kataiedina. Taugu matakeda è kaiporena taumi aubaimima, nam aitau tokare e gudu. Taugu è kataiena da ami rewapanama ya ġaubo kauana, be yaġoro yau giuma koya voteyeteyedina, be isaguma nam ko boviena. ⁹ Banaga aitaugħa ta riuriu munaġedina da taudi kabe Jius, be taudi inam nam Jius, ta kaikaiyovuna, taudi inam Seitan na banagama.* Taugu tokare taudi yà voiedi da ta verau be kaġa pakemie ta raudunena, dabudine ta kataie da taugu taumi yàwai nuapaġoemina.

¹⁰ Taumi nema è riuriu vavasaġmina, nama yaba matabuna koya dami poredi be koyawai raba nuetauna. Vutuna aubainama raġanine piripiri dobu matabuna ei verautatena banaga raurubudima aubainama, inam raġanine taugu tokare taumi yà midi ġaġarimina. ¹¹ Taugu raġan ġaubonaġa yà verauna. Vutuna aubainama aba koya paġopaqona, naumeiki da ko kaididi da bagibaginaġa. Yodibe ami maesama yawasana paiwaraganama tokare nam aitau e kaipore. ¹² Tauna aitau uma yabedima matabudi e vaisubedina, tauna tokare yà voie da yau Mamaituama na tempolma keritaunama e tubuġana. Be tauna inam tempolnama nam airaġan e dobi pore. Be taugu yau Mamaituama isanama, be yau Mamaituama na meagaima isanama tauvai suba bogane yà girumidina. Mamaitua na meagaima inam Jerusalem vaunama, vutuna marae Mamaitua ġarone be e yovona. Be taugu isaguma vaunama mate tauna bogane yà giumentina. ¹³ Arua Babau aba ekalesia ġarodie e giuguedina, taumi aitaugħa beemima e kenakenana, koi beavaia kauana.

Ekalesia Laodisia nopone adi letama

¹⁴ “Uma letanama kwa girumi be e naġona Ekalesia Lao-disiama adi aneama ġarone.

Taugu vutuna riukaua be matamata waipatutuguma, be riuriukauiguma. Taugu vutuna Mamaitua yaba yawai tubuġidina tauwai badedima.

¹⁵ Taugu ami voiama matabudi è kataiedina. Taumi nopolomima nam turutururuna be nam poyapoyana. Be taugu yà ġoegħoena da taumi yaba tenaġħa kavakava sibo koya paġona, tururu bo poya. ¹⁶ Be yodi taumi inam

* **3:9:** Gurik bonane ya riuna: Seitan na sinagogma

tururu be poya poune ko miamiana, vutuna aubainama taugu yà waġiro poremina.¹⁷ Taumi ko riuriuna da taumi waiguyau banegimima, be yaba toitoi koya ragaudi be nam aiyaba ġesaunama koma wanewanena. Be inam nam nama. Taumi nam ko katai munaġemina. Taugu yà riuriuemina da taumi waikayoreġaumima, wainuaiteitemima, be taumi waikaruwaġewaġemima, matapote potemima be kovekovemima.¹⁸ Be yodi taugu yà rauküremi be ko vaiena. Taugu yau goldma kaie gabugabu vuneġinama vutuna ġarogue ko gimerina. Yodibe taumi tokare koi guyauna. Be gara ġavogħavordi ma ġarogue ko ragaudi, be koyawai kovakovana ko sumemi be tunimayaġa ei kavena. Be matemima kana bunamama ko paġo da matemie ko boru be koi kita munaġana.¹⁹ Taugu aitaugħa yàwai nuapaġoedina, taudi adi gewagewama yài kataidi da ta kitana, be yà kwapudi da ta katabina. Vutuna aubainama ami noġotama ko vitaredi, be tauguġa yau kedama koi muriwatanena.

²⁰ Ko kita, taugu matakedae ē midi be yà rarau pewape-wana. Be deġoda aitau bonaguma e vaie be matakeda e kaiporena, taugu yà saġa be taugu tauna mate ka kani tenaġħana. ²¹ Tauna aitau uma yabedima matabudi e vaisubedina, tauna tokare rewapani yà ute da yau waibadae tauna taugu mate kai bada tenaġħana. Maika taugu yaba matabudi ē vaisubedi, be Tamaguma rewapani ya utegu da tauna mate kawai bada tenaġħana nama. ²² Arua Babau aba ekalesia ġarodie e giugiedina, taumi aitaugħa beemima e kenakenana, koi beavaia kauana.”

4

Guyau Mamaitua na kaba miama marae

¹ Inam kauidima muridie taugu yà kitana be marae matakeda kaikaiporenama ē kitana. Be bona dosinama noġone ē vaivaiena, bogiġi bonanama dosinama maika, yodi inam bonanama teneġinama ġarogue ya giugiuna ē vaiena. Tauna umanama ya riuna, “Kwa saġa uma dabudine, be tokare abaġa ta tubuġħana taugu yài kataimna.”² Be yai raġantenaġe, da Arua yai dokeguna, be taugu noġoguma yauwane dabudine guyau na kaba miama dosinama marae ya midimidina, be yaba ē kitana, be debane yaba kitanama maika banaga ya miamiana.³ Be aitau guyau na kaba miae ya miamiana kitanama yeku isedima jaspa be kanelian maika, a rawarawa namanamaridina. Be wari, kitanama yeku emorold maika guyau na kaba miama ya kwavivirona.⁴ Be guyau adi kaba miama ġesaudima matabudi 24, taudi

guyau na kaba miama dosinama a midi kwavivirona. Be inam gabudima debedie babada matabudi 24 a miamiana. Taudi adi garama ġavoġavoridima be paiwaraga goldie voivoiedima debedie a biridina.⁵ Be guyau na kaba miae keyama, parere be gugura a dobidoċina. Be guyau na kaba miama noġone kodam 7 a karakaratana, inam taudi Mamaitua Aruinama 7.⁶ Be mate guyau na kaba miama noġone egasi ya kenakenana. Be inam egasinama moimoiarinama kitanama garasi maika.

Be guyau na kaba miama poune be diane yaba yawayawasanidima matabudi 4 a miamiana. Be matedima tunidima matabudi ai moġavudina, karodie be tauridie.⁷ Be yaba yawayawasanidima kitedima inam umanama maika, tenaġa kitanama maka laion. Be wairabuinama kitanama maika kau tauġominama, be wairabuiteġanama tauna noġonama kitanama maika banaga. Be aniwai 4-nama kitanama kiu bonia e rovorovona maika.⁸ Be inam yabedima yawayawasanidima, be tenatenaġa mapedima matabudi 6. Be matedima inam tunidima matabuna ya moġavuna, mapedima dibudie mate. Taudi kupyida suara ta riuriuna,

“Bada Mamaitua, tauna vutuna wairewapanava vavasaġinama, be tauna babau, babau be babau vavasagiġinama.

Tauna vutuna boni miemieninama, yodi e miamiana, be tokare e tavana.”

Taudi nama ta riuriu watanana, be nam airaġan inam riunama tima gosegosena.

⁹ Be inam yabedima yawayawasanidima taudi neneġara, vivira be waikaiwa tauna aitau guyau na kaba miae e miamia nonoġana, vutuna ta uteutena. Be taudi nama ta voivoianra raġanine,¹⁰ babada matabudi 24 tuapikedie ta raupari, be tauna aitau guyau na kaba miae e miamia nonoġana ta rarau dune nonoġena. Be adi paiwaragama ta kaiporaġa be guyau na kaba miama noġone ta biridi be ta riuriuna,

¹¹ “Tam tauma ama Badama be ama Mamaituama, tam saġasāġa vavasaġimma aubainama, isamma ka kaisuġusuġuna.

Neneġara, vivira be rewapanava tam kwa ragaudina, bani-nama tam yaba matabuna am ġoanama ruvane nama kuyai tubuġidi, be ta miamiana.”

¹ Naumeiki da yà kitana, be tauna aitau guyau na kaba miae ya miamiana, nimanama kasaune buka ya kaikaididina. Be inam bukanama nöponama be taurinama matabuna girugiruminaġa, be bukanama boganama pusipusinama, be pusi matabudi 7. ² Be dabudine anea wairewapana vavasaġinama è kitana, be tauna bonanama dosine ya riuriuna, “Aitau verena be teneteneġina da inam pusidima e kaiporedi be buka e tapa be nöponama e kita?” ³ Be nam aitau marae bo dobue bo dobu dibune teneteneġina da tokare buka e kaipore be nöponama e kita.

⁴ Be taugu è ġaba da è ġaba guratana, baninama nam deġo aitau teneteneġina da sibo buka ya kaipore, bo nöponama ya kita. ⁵ Be dabudine waibabada nöpodie bada tenaġa ya riueguna, “Nam kwa ġaba! Baninama Juda damnama adi laionma guyau Deivid susukinama, be tauna inam tauvai suba. Tauna teneteneġinama da inam pusidima 7 e kaiporaga be buka e tapana.”

⁶ Dabudine taugu è kita da guyau na kaba miama poune Sipu Natunama ya midimidina. Be yaba yawayawasanidima matabudi 4, be babada matabudi inam sipunama natunama a midi kwavivirona. Be inam sipunama kitanama kabe tiwai guri, be tauna donanama 7 be matanama mate 7. Be mata 7 inam taudi Mamaitua Aruinama 7. Inam Aruidima 7 vutudi Mamaitua ya riuporaġana dobu matabuna nöpone. ⁷ Inam sipunama ya saġa da tauna aitau guyau na kaba miae ya miamiana nimanama kasaune, inam bukanama ya paġona. ⁸ Be tauna buka ya paġopaġona raġonine, dabudine yaba yawayawasanidima matabudi 4, be babada matabudi 24, taudi matabudi Sipu Natunama noġone tuapikedie a rauparina. Be taudi tenetenagħa yaba kitanama gita maika a ragaudina. Be redu goldie voivoiedima mate a ragaudina. Be inam redudima nöpodima piupiu a moġavuna, be inam piupiudima vutudi banaga babaudima adi moiragima. ⁹ Be taudi sare vaunama umanama a saresarena,

“Tam vutuna banaga veremma, be teneteneġimma da inam bukanama kwa paġo be pusidima kwa kaiporaġana. Baninama tam ai gurimna. Be tam dam da dam be bona da bona, dobu matabuna nöpone tam kosinime banaga kuya gimeridi

be kuya verauġedina Mamaitua ġarone.

¹⁰ Be tam am waiguyaue kuya biridi be kuya voiedi da taudi guyaguyau be pirisi a tubuġana, be ama Mamaituama aubainama ta noyanoyana.

Be taudi tokare dobu matabuna tai badena.”

¹¹ Dabudine è kita be anea toitoi bonedima è vaiedina. Be anea sievidima inam 1 tausand da 1 tausand, be 10 tausand

da 10 tausand.* Be taudi guyau na kaba miama be yaba yawayawasanidima be babada, a midi kwavivirodina,¹² be bonedima dosine umanama a riuna,

“Sipu natunama awai gurina, tauna vutuna banaga vere-nama,

be teneteneġinama da rewapania, waiguyau, nuauyauya, waibada, vivira, neneġara be kaisuġusuġu, naumeki da tauna e ragaudina.”

¹³ Dabudine è vaie da yaba matabudi marae, dobue, dobu dibune be egasie, matabudi a riuriuna,

“Tauna aitau guyau na kaba miae e miamiana, be Sipu Natunama mate ġarodie

kaisuġu, vivira, neneġara be rewapania, taudi naumeki da ġarodie ta kena nonoġana!”

¹⁴ Be inam raġanine yaba yawayawasanidima a riuna, “Inam riukaua!” Be babada tuapikedie a raupari be noġodie doġae a ravusedi be a rauduneena.

6

Sipu Natunama yodi pusi matabudi 7 e raukaiporagħana

¹ Taugu ēwai kita be Sipu Natunama pusi tenaġa buka bogane ya kaiporena. Dabudine yaba yawayawasanidima matabudi 4, be tenaġa bonanama parere maika, be ya riuna, “Kwa verau!” ² Dabudine yài kitana, be noġogue hosi ġavvoġavorinama è kitana. Be taugeruenama tauna kukuku ya kaikaididina, be paiwaraga a utena. Be tauna yai rewapania kauana, be ya naġona na ġaviamma vunuġa ririgidima aubainama.

³ Be Sipu Natunama pusi aniwai rabuinama buka bogane ya kaiporena. Dabudine è vaie da yaba yawayawasanidima aniwai rabuinama ya riuna, “Kwa verau!” ⁴ Dabudine hosi ġesaunama sabasabanama kai ragetinama maika ya dobina. Be taugeruenama rewapania a utena da suba dobue e kaipore be banaga e voiedi da tai kawa gurigurina. Be tauna kwatikwati dosinama a utena.

⁵ Be Sipu Natunama pusi aniwai rabuiteġanama buka bogane ya kaiporena. Dabudine è vaie da yaba yawayawasanidima aniwai rabuiteġanama ya riuna, “Kwa verau!” Be taugu yài kitana, be noġogue hosi dubanama è kitana. Be taugeruenama tauna nimane anisikere ya kaikaididina. ⁶ Be dabudine yaba è vaiena maika bona, yaba yawayawasanidima matabudi 4 poudie ya riuriuna, “Kwa voie da meiġara e tubuġana, be kwa voie da witi sumanama 1 kg na maesama

* **5:11:** Gurik bonane ya riuna: 10 tausand times 10 tausand and 1 tausand times 1 tausand. Inam baninama anea gumdima nam anisiesievi.

inam Denari tenaġa. Be witi isanama ‘Bali’ sumedima 3 kg adi maesama inam Denari tenaġa. Be anirau buka oerinama be waen nam kwa kawa gewegewedi!”

⁷ Be Sipu Natunama pusi aniwai 4-nama buka bogane ya kaiporena. Dabudine taugu è vaie da yaba yawayawasani-dima aniwai 4-nama ya riuna, “Kwa verau!” ⁸ Be taugu yài kitana, be noġogue hosi kurinama banaga gurigurinama tuninama maika è kitana. Be taugeruenama tauna isanama ‘Guri’, be banaga guriguridima aruidima inam hosinama murine maida yawai muriwatanena. Be Mamaitua rewapana taudi ya utedina da taudi dobu kawasusudima 4, be kawasusu tenaġa na ruvama nama,* banaga matabudi tai guridina. Taudi umanama yabedie tokare banaga tai guridina, taudi iġara, be meiġara be sida guriguri tai tubuġidi, be mate musara ġasiġasidima ta voiedi da banaga tai guridina.

⁹ Be Sipu Natunama pusi aniwai 5-nama buka bogane ya kaiporena. Dabudine yà kitana, be banaga patupatutudima Mamaitua riunama awai matematena aubainama, dobue ai guridina, be aruidima olta dibune a miamiana è kitedina. ¹⁰ Taudi bonedima dosine Mamaitua ġarone a riuna, “Tam Bada saġasaġa vavasaġimma, tam babaumma be riuriukauimma. Tauma uma dabudine kai raba ġaġa. Tam aba raġanine dobu banegidima kwa etaredi, be kosinimaima ġaranama kwa raubiwa?” ¹¹ Naumeki da taudi tenatenaġaġa gara ġavogħavoridima daudaudima a utedi be a riuedina da taudi ta tauwai raba guratana, naumeki da Mamaitua na nambama ya boruboruna ruvane, nama tauwai sumaġa gesaudima dobue tai guridina.

¹² Dabudine yài kitana, be Sipu Natunama pusi aniwai 6-nama buka bogane ya kaiporena. Inam raġanine yoyo dosinama ya tubuġana, be suara matanama yai kupikupi be ya dubana kaipou maika. Be nawaravi matabuna ya sabana, kosina maika. ¹³ Be kipora gunume a kuruva be dobue a yovona, maika sive dosinama niura e kwadiedi, be banidima pokidima ta rarau buririna maika. ¹⁴ Be gunuma ya nuanokunokuna, maika duya ta nokunokuna nama, be oya be bonabona matabudi a rauriana.

¹⁵ Inam raġanine dobu guyaguyaudima, be natunatudima, be tori matanama banegidima, be taragai banegidima, be babada wairewapanidima, be tauwai yaraga, be banaga yababa, matabudi a naġona oya babedie, be yeku dibudie gubae ai moisirina. ¹⁶ Be taudi oya be yeku a riuedina, “Ko beku be debamaie ko ravusemi be koi raugovemai, da tauna aitau guyau na kaba miae e miamiana nam e kitamai,

* **6:8:** Gurik bonane ya riuna: ‘One fourth’

be mate Sipu Natunama na medima nam tunimaie e tava!
¹⁷ Baninama taudi adi medima *raġaninama* dosinama yodi ya tavana, be nam aitau tokare e midi bodedi be teneteneġina.”

7

Mamaitua Israel banegidima sievinama 144 tausand ya pusidina

¹ Uma kauidima muridie taugu anea matabudi 4 è kite-dina, dobu kawasusudima matabudi 4, be inam kawasusuduie anea tenatenaġaġa a midimidina. Be taudi dobu sivedima matabudi 4 a kaikaidididina, da sive nam dobue bo egasie sibo ya manini munaġa, bo kai ya biti munaġedi.
² Be inam aneedima Mamaitua rewapania ya utedina da taudi dobu be egasi ta kawa gewegewedina. Be anea ġesau è kitana, tauna suara na kaba tavama yauwanine be ya saġasaġana. Be tauna Mamaitua miamia nonoġinama na pusima ya kaikaididina, be tauna bonanama dosine anea matabudi 4 ya riuedina, ³ “Dobu, egasi be kai nam ko kawa gewegewedi, noġone tauda dà Mamaituama na taunoyama noġodie pusi ta biri dokedina.”

⁴ Dabudine è vaie da Israel damnama banegidima matabudi 144 tausand a pusidina. Inam banegidima taudi,

⁵ Juda na dammanopone banaga matabudi 12 tausand. Ruben na dammanopone banaga matabudi 12 tausand. Ged na dammanopone banaga matabudi 12 tausand.

⁶ Asa na dammanopone banaga matabudi 12 tausand. Naftali na dammanopone banaga matabudi 12 tausand. Manase na dammanopone banaga matabudi 12 tausand

⁷ Simeon na dammanopone banaga matabudi 12 tausand. Livai na dammanopone banaga matabudi 12 tausand. Isaka na dammanopone banaga matabudi 12 tausand.

⁸ Sebulun na dammanopone banaga matabudi 12 tausand. Jousep na dammanopone banaga matabudi 12 tausand. Benjiman na dammanopone banaga matabudi 12 tausand.

Patara dosinama Mamaitua noġone a midimidina

⁹ Uma kauinama murine yài kitana, be Mamaitua na kaba miae ya miamiana, be Sipu Natunama tauna mate. Be taudi noġodie patara dosinama, nam anisiesievi, a midimidina. Be inam banegidima taudi dam da dam be bona da bona be dobu matabuna nopodie a tava be a midimidina. Be taudi matabudi ai garana, adi garama ġavvoġavoridima daudaudima be nimedie garamo rugurugudima a ragaragaudina. ¹⁰ Be taudi matabudi bonedima dosine a riuriuna, “Dà

Mamaituama na waiguyaue e miamiana, be Sipu Natunama, taudi vutudi Tauwai yawasana.”

¹¹ Be anea matabudi guyau na kaba miama be babada be yaba yawayawasanidima 4 a midimidi kwavivirodina, taudi matabudi tuapikedie a raupari be noġodie doġae a ravusedi be Mamaitua a raudunee ¹² be a riuna,

“Inam riukaua! Tam tauma ama Mamaituama, isamma ka kaisuġusuġuna.

Tam vutuna neneġara, nuauyauya, waikaiwa, vivira, waibada be rewapanġa ta kena nonoġana.

Inam riukaua!”

¹³ Dabudine babada 24 nopedie bada tenaġa taugu yai taraviregu, be ya riuna, “Uma banegidima gara ġavoġavoridima daudaudima kotekotedima kuya kataiena taudi aitau? Taudi deġo be a tava?” ¹⁴ Be taugu ē paribee be ē riuenā, “Bada, tam kuya kataiena, be nam taugu.” Dabudine tauna ya riueguna, “Inam banegidima taudi piripiri dosinama nopone be a tavana. Be adi garama Sipu Natunama kosinīne a koġedi da a ġavorana. ¹⁵ Vutuna aubainama taudi yodi Mamaitua na kaba miama noġone ta midimidina da tauna na tempolma nopone kupi da suara aubainama tai taunoyana. Be tauna aitau guyau na kaba miae e miamiana, vagurune ta miana. ¹⁶ Be taudi nam airaġan kani e kara munaġedi, be nam nuedima e raukasakasa, be nam suara e poyedi, be nam aiyaba e poya munaġedi. ¹⁷ Baninama Sipu Natunama guyau na kaba miama poune e miamiana, tauna vutuna taudi e rabedina, sipu taurabedima maika, be ei doka nawedina bigabigae be yawasana upanama ta tegona. Be taudi matasurudima matabuna Mamaitua tokare e samaġa poredina.”

8

Pusi aniwai 7-nama buka bogane ya kaiporena

¹ Dabudine yài kitana, be Sipu Natunama pusī aniwai 7-nama buka bogane ya kaiporena. Inam raġanine marae yaba matabudi ai nuatuġtuġu be daumora ya kenana raġan ġaubonaġa.* ² Be taugu anea 7 ē kitedina, Mamaitua noġone a midi be tenatenaġaġa bogigi ya uteutedina.

³ Be anea ġesaunama ya tava be olta diane ya midina, be tauna nimane piupiu anigabunama koukou goldie voivoienama ya kaikaididina. Tauna piupiu toitoi a utena da banaga babaudima matabudi adi moiragima mate Mamaitua ġarone sibo ya raupuyona olta goldie voivoienama debane. Inam oltanama guyau na kaba miama noġone ya midimidina. ⁴ Be piupiu basunama be banaga babaudima

* **8:1:** Gurik bonane ya riuna: Inam ‘about half an hour.’

adi moiragima matabudi anea nimane, be piupiu basunama moiragi mate a saġa a naġona Mamaitua ġarone.⁵ Dabudine anea olta debane kai karakaratinama ya ragaudi be piupiu anigabunama redunama yai moġavuna. Yodibe inam koukounama ya pore yovoġena dobue. Be inam raġanine keyama, parere, gugura be yoyo a tubuġana.

Anea bogigi 4 a suvedina

⁶ Dabudi anea 7 bogigi 7 a ragaragaudina, taudi a vovo kaukauana da bogigi ta suvedina.

⁷ Naumeki da noġone aneanama na bogigima ya suvesuvena raġanine, kusana rawarawatabudima yeku ġauġaubodima maika, be kai menanama kosina mate wairawategeidima a poraġa yovoġedina dobue. Be dobu kawasusudima matabudi 3, be kawasusu tenaġa na ruvama nama,[†] kai be mui gidegidevidima matabudi a kara gorudina.

⁸ Naumeki da anea aniwai rabuinama, tauna na bogigima ya suvesuvena raġanine, yaba maika oya dosinama ma rageragetina a pore yovoġena egasie. Be egasi kawasusudima 3, be kawasusu tenaġa na ruvama nama egasi matabuna yai rawakosinana. ⁹ Be musara matabudi inam dabudine a guri rovona, be waga mate a kawa gewegewedina.

¹⁰ Naumeki da anea aniwai rabuiteġanama, tauna na bogigima ya suvesuvena raġanine, kipora tenaġa dosinama gunume be ma rageragetina ya kuruva be ya yovona. Be dobu kawasusudima 3, be kawasusu tenaġa na ruvama nama upa matabudi, be bigabiga debedie ya ravusena. ¹¹ Be inam kiporinama isanama “Gora”. Be inam kawasusunama nopone upa matabudi ai ġora rovona, be banaga toitoi uma upanama ġorajoranama yai guridina.

¹² Naumeki da anea aniwai 4-nama, tauna na bogigima ya suvesuvena raġanine, suara kawasusudima 3, be yaba aiyaba dosinama suara kawasusunama tenaġa ya riġa be yai kupikupina. Be kauinama teneġinama nama nawaravi ġarone ya tubuġana. Be gunuma kawasusudima 3, be yaba aiyaba dosinama gunume kawasusu tenaġa ruvanama nama nopone kipora matabudi ya riġedi be ai kupikupina. Be suare 4 awasnama dobu yai kupikupina, be nam i yanana. Be teneġinama nama kupie, 4 awasnama nawaravi be kipora nam ti yanana.

¹³ Be yài kitana, be kiu bonia gunuma boganaġa ya rovorovona, be bonanama dosine umanama ya riuriuna, “O gewagewa, gewagewa! Gewagewa taudi aitauġa dobue ta

[†] 8:7: Vers 7 da 12 Gurik bonane ya riuna: ‘One third’

miamiana ġarodie ta tubuġana. Baninama anea rabuiteġa yaġoro tawai rabana da adi bogigima tokare ta suvedina.”

9

Bogigi aniwai 5-nama

¹ Naumeki da anea aniwai 5-nama, tauna na bogigima ya suvesuvena raġanine, taugu kipora è kitana gunume, be ya kuruva be ya yovona dobue. Be inam kiporinama tauna dom nam dibuboruboruna gudunama kiġinama a utena. ² Be tauna inam domnama gudunama ya kaikaiporena raġanine, kaibasu ya tavana kodara puyounama maika. Be inam kaibasunama ya saġasaġana, gunuma ya suma be suara matanama yai kupikupina.

³ Be inam kainama puyounama nopone kapau dosidima a rovo dobi be a yovona dobue. Be inam kapaudima taudi rewapana a paġona, tanagara adi rewapanama maika.

⁴ Inam kapaudima ya riuedina da taudi banaga aitaūga Maitua na pusima noġodie nam tima kenakenana, taudiġa ta karatidina. Be kai be mui matabudi nam sibo a kawa gewegewedi. ⁵ Be inam kapaudima nam rewapana ġarodie ima kenakena da banaga tai guridi, ibewa da ta raukivi gewagewa ġomedina nawaravi 5 nopolie. Be banaga inam myyanama ta sidana maika karipa banaga e karakaratidina myyanama maika. ⁶ Inam raġandie banaga tokare guri kedanama ta wanena, be tokare nam ta banavi. Taudi gurimakai ta ġoegoena, be tokare nam ta guri.

⁷ Be kapaudima kitedima hosi iġara aubainama tawai garedina maika. Taudi debedima yaba kitedima paiwaraga goldie voivoiedima maika a kotedina. Be noġodima kitedima banaga maika. ⁸ Be debavuvuġidima inam maika waiwaivi debavuvuġidima muridie ravuravusenama maika. Be mokedima inam laion mokanama maika. ⁹ Be nuakadedima kitedima inam aeyan maika. Be mapedima guguridima inam gunava dosinama e nuaraka be e gavagavasana maika.* ¹⁰ Be kapaudima ġiudima inam kitedima rikarikau ġiudima maika, be ġiudima isudie kea gamgamdima ta kenakenana. Be adi rewapanama ġiudie ta kenakenana da banaga ta raukivi gewegewedinha nawaravi 5 nopolie. ¹¹ Taudi adi guyuma inam dom nam dibuboruboruna aneanama, tauna ewai badedina. Be inam aneanama isanama Hibru bonane inam *Abadon*, be Gurik bonane inam *Apolion*. Inam isanama baninama inam “Tauraukivigewagewa.”

* **9:9:** Gurik bonane ya riuna: Be mapedima guguridima inam hosi toitoi be tureira toitoi ta sorudi, be iġara aubainama ta manimanina guguridima maika.

¹² Yodi gewagewa dokadokanama inam ya kovina. Be gewagewa rabui tawai rabana da tokare ta tubuġana.

Bogigi aniwai 6-nama

¹³ Naumeki da anea aniwai 6-nama, tauna na bogigma ya suvesuvena raġanine, olta goldie voivoienama donanama matabudi 4 Mamaitua noġone ya midimidina. Be è vaie da dona nopolie bona ya dobina. ¹⁴ Bona ya dobi be anea aniwai 6-nama bogigi ya paġopaġona ya riuena, “Upa dosinama isanama Yupretis, dabudine anea matabudi 4 panipanidima ta miamia. Be tam kwa naġo be kwa kuvesidina.” ¹⁵ Be inam aneedima taudi Mamaitua ya kawa nonoġidi be adi noyama raġaninama ya boru wainonoġina da airaġan adi noyama ta voienna, vutuna a raberabena. Be inam noyanama raġaninama na modima, na nawaravima, na raġanima be na awama yodi ya tavana. Be taudi adi noyama inam umanama: Dobu kawasusudima 3, be kawasusu tenaġa na ruvama nama inam aneedima banaga tai guridina. ¹⁶ Be tauiġara dabudine hosi ragane a gerugeruna sievidima taugu è vaiena inam 200 milion.

¹⁷ Hosi be taugeruedima taugu è kitedina, taudi kitedima maika umanama: Taudi nuakadedima anigudunama kitannama kai ragetinama maika, be kuridima vodubadubanama egasi maika be yawayawanama. Be hosi debedima kitedima laion debedima maika. Be gayedie kai menanama, kaibasu be yaba isanama ‘salfa’ a dobidoċina. ¹⁸ Be inam kovoġidima rabuiteġa, kai menanama, kaibasu be salfa, hosi gayedie a dobidoċina, vutudi dobu kawasusudima 3, be kawasusu tenaġa na ruvama nama banaga ai guri rovodina. ¹⁹ Be inam hosidima adi rewapanama mududie be ġiudie a kenakenana. Taudi ġiudie mate banaga ta raraukivi gewegewedina. Be ġiudima kitedima mota maika, be debabiribiridima.

²⁰ Be banaga ġesaudima taudi aitauġa inam kovoġidie nam ti gurigurina, taudi yaġoro nuedima nam ti vitaredina, be taudi adi voiama gewegewedima yaġoro ta voivoiedina. Be yaġoro penama be kokoitau ta rarau duneedina. Inam kokoitaudima goldie be siruva be aeyan, yekue be kaitupoe voivoiedima ta rarau duneedina. Avedi da kokoitau nam timawai kita, nam timawai beavaia bo tima babababarana. ²¹ Be inam banegidima taudi yaġoro ta rarau vunuġa, ta koikoi ginauri, tawai soġa yababayaba be ta danedanena, be nam nuedima tima vitavitatedina.

¹ Naumeki da anea ġesaunama wairewapana vavasaġinama marae be ya yovoyovona è kitana. Be tauna na garama inam giyou ya kotedina, be debane wari ya kwavivirona. Be noġonama kitanama suara maika, be kaġanama kitanama kodara menanama maika. ² Tauna nimane buka ġaubonama ya tapa be ya kaikaididina. Be tauna kaġanama kasaunama egasie yai vutuġana, be kaġanama seninama doġae yai vutuġana. ³ Be tauna bonanama dosine ya rasana maika laion. Tauna ya rasarasana raġanine, taugu parere matabudi ⁷ a giuna bonedima è vaiedina.

⁴ Be parere ⁷ a giugiuna taugu sibo adi giuma è girumina, be bona marae è vaiena umanama ya riueguna, “Inam pareredima ⁷ aba a giugiuena, kwa semodina, be nam kwa girumidi.”

⁵ Be anea è kita be egasie be doġae yawai vutuġana, tauna nimanama kasaunama ya kaisuġu marae, ⁶ be Mamaitua miamia nonoġinama, tauna vutuna mara, dobu be egasi, be nopolie yaba matabudi tauwai tubuġidima tauna isane ya sauga be ya riuna, “Raġan kaiteka ya kovina. ⁷ Be anea aniwai ⁷-nama na bogigima e suvesuvena raġanine, Mamaitua na ogama semosemonama e voie, be e raudamoena, boni na taunoyama peroveta ya riuriuedina maika.”

⁸ Dabudine bona tenegħinama marae è vaia munaġe be ġarogue umanama ya riuna, “Anea egasie be doġae waivutuġinama ġarone kwa naġo, be buka ġaubonama tapatapanama nimane e kenakenana kwa paġona.”

⁹ Naumeki da taugu è naġo anea ġarone, be èi baġana da buka ġaubonama sibo ya uteguna. Be tauna umanama ya riueguna, “Uma bukanama kwa paġo be kwa kanina, be mudume inam bukanama tokare dininama e verena, iwavi maika. Be kapomma tokare ei muyana.” ¹⁰ Naumeki da taugu anea nimane inam bukanama ġaubonama è paġo be è kanina. Be è kanikanina raġanine, mudugue dininama ya vere kauana, iwavi maika, be è kanikani rovona murine, kapoguma yai muyana. ¹¹ Be tauna umanama ya riueguna, “Tam am waiperovetama nam i kovina, yaġoro kwai perovetana, dam, dobu, bona be guyaguyau aubaidima.”

11

Matamata rabui

¹ Naumeki da Bada anirau ruva kainama ya utegu be ya riuna, “Kwa naġo be Mamaitua na tempolma be olta kwa ruvedina, be dabudine tauraudune mate kwa sievidina. ² Be gabura gana nopone tempol dianama kwa gose

porena, nam kwa ruva, baninama inam gabunama taugu eteni banegidima è utedina da taudi meagai babaunama* tokare ta vagudagudaguna nawaravi 42 nopolie. ³ Be taugu rewapania yau matamatama rabui yà utedi be taudi tai perovetana raḡan 1,260 nopolie, be adi garama inam sakibegi maika.”

⁴ Taudi vutudi olip kaidima rabui, be kodam kaidima rabui, taudi Bada noḡone ta midimidina, tauna vutuna dobu ewai badena.[†] ⁵ Be deḡoda aitau uma banegidima rabui raukivi gewegewedima e ḡoena, inam banegidima rabui tokare gayedie kai menedima ta dobi be adi ḡaviamà tai guridina. Uma kauine adi ḡaviamà matabudi tokare ta guri rovona. ⁶ Inam banegidima rabui ḡarodie rewapania e kenakenana da tawai perovetana raḡanine, taudi gunuma ta riutuaḡiae be kusana tokare nam e dobi. Be mate taudi rewapania ḡarodie e kenakenana da upa matabudi ta voiedi da kosina ta tubuḡana. Be taudi ta ḡoena, tokare teneginama da raḡan toitoi piripiri tabu be tabu tai tubuḡidi, be dobu banegidima ta kovoḡidina.

⁷ Be taudi adi noyama tawai kovina raḡanine, musara ḡasigasinama dom nam dibuboruborune, be e tava be inam perovetedima rabui ei ḡaviedi be ei guridina. ⁸ Be tubuḡidima tokare meagai dosinama nopolie kedae tai kenedina. Be inam meagainama dosinama isanama semosemonama inam “Sodom” be “Ijipt”. Matamata taudi adi Badama inam dabudine a tuparatuna. ⁹ Be raḡan rabuiteḡa be pomainama raḡanboiboi be e naḡo da suaratopu, banaga toitoi dam da dam, be bona da bona, be dobu matabuna nopolie inam banegidima tubuḡidima ta raubigedina. Be peroveta adi ḡaviamà banaga nam ti aninedina da inam perovetedima tubuḡidima ta dobodi. ¹⁰ Be dobu banegidima tai nuavere, ta mosari be adi banagama adi banagama mate tai kawa puyo vivirana, baninama inam perovetedima a gurina aubainama. Baninama inam perovetedima rabui banaga dobie a raraukivi gewegewedina.

¹¹ Be raḡan rabuiteḡa be pomainama raḡanboiboi be ya naḡo da suaratopu, be murine yawasana Aruinama Mamaitua ḡarone, be ya yovo da banegidima rabui nopolie ya saḡana. Be taudi a midisuḡu munāḡa be a midina. Taudi aitaugà inam banegidima rabui a kitekitedina, a naira kauana. ¹² Dabudine taudi bona dosinama marae a vaiena, inam banegidima rabui ḡarodie umanama ya riuna, “Ko saḡa

* **11:2:** Meagai babaunama inam Jerusalemma. † **11:4:** Uma tauna Mamaitua, be nam Seitan.

uma dabudine!” Be dabudine adi ġaviam a kitekitedi, be peroveta ma giyoudi a saġa a naġona marae.

¹³ Inam raġanine yoyo dosinama ya tubuġana. Be meagai kawasusudima matabudi 10, be kawasusu tenaġa na ruvama nama vada matabudi ya kawa gewegewedina. Be inam yoyonama nopone banaga 7 tausand a gurina, be aitaūga da a yawayawasanana, taudi a naira kaua be Mamaitua marae isanama a kawa saġena.

¹⁴ Yodi gewagewa aniwai rabuinama inam ya kovina. Be gewagewa aniwai rabuiteġanama ġaubaġonaġa e tubuġana.

Bogigi aniwai 7-nama

¹⁵ Naumeki da anea aniwai 7-nama, tauna na bogigima ya suvesuvena raġanine, bona dosidima marae ē vaiedina a riuna, “Tauda dà Mamaituama be na vinevinema Keriso, yodi dobu matabuna taudi ġarodima, be Keriso tauna vutuna ei bada nonoġana.”

¹⁶ Be babada 24 guyaguyau adi kaba miae a miamiana Mamaitua noġone, taudi tuapikedie a raupari be noġodie doġae a ravusedi be Mamaitua a raudunee ¹⁷ be a riuna, “Bada Mamaitua, tam wairewapano vavasaġimma, tam vutuna boni miemienimma be yodi kwa miamiana.

Tauma kawai kaiwemna, baninama tam am rewapanama dosinama yodi kuya paġo be waibada kuyai karena.

¹⁸ Noġone dobu banegidima nuedima yai medina, be yodi inam tam am medima raġaninama ya tavana.

Yodi raġon ya tavana da tam banaga guriguridima kwa etaredina,

be am taunoyama peroveta, be tauwai sumaqemma, be aitaūga isamma a vivivivirena, avedi da banaga ġaubaġabodi bo banaga dosidi,

taudi matabudi yodi adi maesama kwa utedina.

Be mate raġon ya tavana da dobu taukawa gewegewedima kwai guridina.”

¹⁹ Inam raġanine ya kitana be Mamaitua na tempolma marae a kaiporena. Be tempolnama nopone waianina bogesinama a kitana. Be dabudi keyama, parere be gugura a dobidoċina. Be yoyo be kaibitibiti kusana rawarawa tabutabunama mate a tubuġana.

12

Waivi be duragon

¹ Naumeki da mataira dosinama marae ya tubuġana umanama, waivi suara yai garaena be kaġanama dibune nawaravi ya kenakenana, be na paiwaraga debane kipora

matabudi 12. ² Tauna ya boga be wainatuna muyanama ya kawa guri be ya yakeyakeina.

³ Dabudine mataira ġesaunama marae ya tubuġana, inam umanama: Duragon dosi yababinama sabasabanama ya maġatarana. Be tauna debanama matabudi 7 be donanama matabudi 10, be paiwaraga 7 debane a kenakenana. ⁴ Be mara kawasusudima matabudi 3, be kawasu tenaġa na ruvama nama tauna ġiune kipora yai kati karodi be ya poraġa yovoġedina dobue. Be inam duragonnama waivi wainatuna ya tepetepena noġone ya midina, be yawai rabana da gomana sibo ya tubuġa be ya kanina.

⁵ Naumeki da waivi gomana tauġominama ya tikana. Be tauna vutuna tokare irame dīgona voivoienama e paġo be banaga dobu matabuna nopone ei badedina. Be waivi natunama a soru kwaya be a nawena Mamaitua deġo ya miamiae ġarone. ⁶ Be waivi naira ya naġona dobu kavakavane deġo Mamaitua gabu ya vovo kaukaue. Be dabudine waivinama a rabena raġan matabudi 1,260 nopolie.

⁷ Be inam raġanine iġara ya tubuġana marae. Maikel be na aneama be duragon na penamama mate ai kawa ġasiġasina. ⁸ Be duragon na penamama mate nam ti rewapanana aubainama, taudi yodi marae nam adi gabuma ima kenakenana. ⁹ Be inam duragonnama dosinama na penamama mate ai watabiġuġu yovoġedina dobue. Inam duragonnama tauna vutuna boni mota tawai isana Diaboro bo Seitan, be tauna dobu matabuna tauwai kedadoka waigewedima.

¹⁰ Be inam kauinama murine taugu bona dosinama marae ē vaie be umanama ya riuna,

“Yodi tauda dà Mamaituama na yawasanama, na rewapanama be na waiguyauma raġaninama ya tavana. Be mate Mamaitua na Kerisoma na waibadama raġaninama yodi ya tavana, baninama tauwai wavu Mamaitua noġone kupi da suara dà banagama yawai wavudina, be yodi tauna ai watabiġuġu nawena dobue. ¹¹ Be dà banagama taudi Sipu Natunama kosinine be adi rauguguye, duragon ai gwaġana. Be taudi adi yawasanama nam ti nuaboya guratedina, be guri nam ti nairena. ¹² Vutuna aubainama taumi mara be aitauġa nopolie ko miamiana, koi nuaverena! Be gewagewa vavasaġinama taumi dobu be egasi ġaromie, baninama Diaboro ġaromie ya yovona. Be Diaboro nuanama yai medi kauana, baninama tauna ya kataie da na raġanima kaiteka ya tupona.”

¹³ Raġanine duragon ya kita da tauna a pore dobigena dobue, inam waivinama gomana tauġominama tikitikanama ya kusira nawena. ¹⁴ Be inam waivinama kiu bonia

dosinama mapenama rabui a utena da tauna ya rovo be ya naġona dobu kavakavane, deġo na gabuma a vovo kaukauena dabudine. Be inam dabudine waivinama a rabena modi 3 be nawaravi 6,* be mota tokare nam inam dabudi e tava.

¹⁵ Vutuna aubainama mota gayanama ya sasaġi be upa gayane ya vurai dobiġe be upa dosinama yai tubuġi da kabe waivinama ei karue. ¹⁶ Be doġa gayanama ya nuaporaġa be upa inam duragonna ma ya vuravurai dobiġena ya tonoġina. Inam kauine doġa inam waivinama ya saguna. ¹⁷ Dabudine duragon nuanama yai medi kauana waivinama ġarone. Vutuna aubainama tauna ya naġo be iġara yai tubuġina waivi natunatunama ġesaudima ġarodie. Inam banegidima taudi Mamaitua na tarawatuma tawai muriwatane be Yesu riunama ta kaikaididina. ¹⁸ Naumeki da duragon gerese ya midina.

13

Musara ġasiġasinama egasie be e tavatavana

¹ Taugu yài kitana, be musara ġasiġasinama egasie be ya tavatavana è kitana. Be inam muserinama donanama matabudi 10, be debanama matabudi 7. Be donanama debedie, paiwaraga matabudi 10 a kenakenana. Be deba tenatenaġaġa noġodie isa a kenakenana, be inam isedima matabudi waidibogo giudima. ² Be inam muserinama è kitana, kitanama musara lepad maika. Be kaġanama kite-dima musara beya maika. Be mudunama kitanama maika laion. Be duragon na rewapanama be na waiguyauma be na waibadama dosinama matabudi inam muserinama ġasiġasinama ya utena.

³ Be inam muserinama ġasiġasinama debanama tenaġa kero ya paġona. Be inam keronama kitanama aniguriguri, be ya seġira munaġana. Vutuna aubainama dobu banegidima matabudi inam muserinama a base kaue be ai muriwatanena. ⁴ Be duragon tauna rewapanama musara ġasiġasinama ya utena. Vutuna aubainama banaga duragon be musara ġasiġasinama ġarodie a raudune be a riuriuna, “Musara ġasiġasinama ya saġa vavasaġana, be nam aitau tokare tauna mate tai kawa ġasiġası be teneteneġina.”

⁵ Be musara ġasiġasinama rewapanama a utena da rau-guyaguyau be waidibogo giudima e vatodina. Be mate rewapanama a utena da nawaravi 42 nopolie ei badana. ⁶ Be tauna na giue Mamaitua ei dibogina. Be Mamaitua na kaba miama be aitau da marae ta miamiana, matabudi

* **12:14:** Gurik bonane ya riuna: ‘Time, times and half a time’. Be Dawawa bonane inam umanama: ‘Raġan, raġandie be raġan nevanama’.

ei karakara kutuedi, be Mamaitua isanama mate e kawa gewagewana. ⁷ Be rewapanana a utena da tauwai sumaġa ei ġaviedi be ei gwaġedina. Be tauna rewapanana ġarone aubainama, tauna dam da dam, bona da bona, be dobu da dobu, banaga matabudi ei badedina. ⁸ Be dobu banegidima aitaūga isedima yawasana bukanama nopone nam tima kenakenana, taudi inam muserinama ġasiġasinama ġarone ta rauduneena. Be yawasana bukanama inam Sipu Natunama a vunuġi be awai gurina, tauna na bukama. Boni muriġa da dobu ya tubuġana, Mamaitua tauwai sumaġa isedima matabudi inam bukane ya girumidina.

⁹ Aitau da beemima ta kenakenana, koi bea vaiana. ¹⁰ Be aitau Mamaitua ya vinena da dibure ta nawena, naumeiki da e naġona. Be aitau Mamaitua ya vinena da ta raukwatikwatina, naumeiki da ta raukwatikwati be e gurina. Inam kauidima ta tubutubuġana raġanine, tauwai sumaġa naumeiki da adi waisumaġe ta midi bagibagi, be yaba matabudi ta dami poredina.

Musara ġasiġasinama ġesau doġa nopone be e tavatavana

¹¹ Dabudine taugu musara ġasiġasinama ġesau doġa nopone be ya tavatavana è kitana. Tauna donanama rabui sipu natunama maika, be na giumenti vaienama maika duragon. ¹² Be musara ġasiġasinama egasie tavatavanama na rewapanama matabuna uma muserinama doġae tavatavanama ya utena. Be uma muserinama dobue banaga matabudi ya gwayedi da taudi musara egasie tavatavanama a rauduneena. Inam muserinama vutuna debanama kero dosinama kitanama aniguriguri, be keronama ya seġira munaġana.

¹³⁻¹⁴ Be uma muserinama doġae tavatavanama tauna mataira dosidima musara egasie tavatavanama na rewapanae ya voivoiedina. Be mate ya voie da kai menanama marae be a yovoyovona dobue, be banaga inam matairidima a kitekitedina. Inam kedane tauna dobu banegidima ya biri waideġedina. Be mate tauna banaga ya riuedi da kokoitau ai tubuġina, kitanama musara egasie tavatavanama maika, tauna vutuna kwatikwatie ai gurina, be ya yawasana mu-naġana. ¹⁵ Be musara doġae tavatavanama tauna rewapanana a utena da inam kokoitaunama yavutu ya ute be giu yai karena. Be musara doġae tavatavanama umanama ya riuna, “Aitaūga inam kokoitaunama nam ta raudunee, inam banegidima gurie tà biridina.”

¹⁶ Be inam muserinama banaga matabudi, dosidi bo ġaġaqubodima, waiguyaudi bo waikaruwaġewaġedima, babada bo tauwai yaraga, taudi matabudi tokare ta segeridi

da nimedima kasaune bo noġodie mataira ta boruna.¹⁷ Inam raġanine aitauġa inam matairinama nam ta paġo, taudi tokare nam teneteneġina da aba ta gimara bo ta gimaredi. Be inam matairinama musara egasie tavatavanama tauna isanama, bo isanama nambinama.¹⁸ Taudi aitauġa nam nuauyauya ġarodie, taudi inam kauinama tokare nam ta kataie. Be nuauyauya banegidima, taudi tokare musara ġasiġasيناما na nambama ta sievi be ta kataien. Baninama inam nambinama tauna banaga na nambama. Be namba inam 666.

14

Sipu Natunama be na banagama 144 tausand

¹ Be taugu yài kita, da Sipu Natunama be banaga 144 tausand mate oya Saion debane a midimidina è kitedina. Be Sipu Natunama be Tamanama isedima inam banegidima noġodie a girumidina. ² Be dabudine bona marae è vaiena. Be inam bonanama vaienama tapara yarataunama, bo parere dosinama gugurinama maika. Be bona gugurinama vaienama maika tauwai gita kabe tiwai gita.

³ Be taudi guyau na kaba miama, be yaba yawayawasani-dima 4, be babada noġodie a midi be sare vaunama a riġariġana. Be nam aitau teneteneġina da inam sarenama e kataie. Be banaga 144 tausand dobue Bada ya kuvesidina, taudiġa inam sarenama a kataien. ⁴ Taudi nam waiwaivi ti taukonidina da sibo ai mira munaġedi, taudi inam matatapu. Inam banegidima vutudi banaga poudie Sipu Natunama kosinine ya kuvesa dokedina, taudi vutudi a raupuyoedina Mamaitua be Sipu Natunama ġarodie. Be Sipu Natunama dego dego ya naġonaġona, taudi tauna awai muriwatana. ⁵ Taudi nam airaġan ti kaiyovuna, be taudi ġarodie wavyu nam ima kenakenana.

Anea rabuiteġa

⁶ Be taugu yài kitana be anea ġesaunama gunuma pounaġa ya rovorovona è kitana. Be tauna dobu da dobu, dam da dam, bona da bona, be dobu matabuna nopone banaga miemienidima ġarodie vari verenama be kenakena nonoġinama ya rarauguguyena. ⁷ Be tauna bonanama dosine ya riuna, “Mamaitua ko naire be isanama ko kaisuġusuġuna, baninama tauna na etarama raġaninama yodi ya tavana. Tauna aitau mara, dobu, egasi be bigabiga tauwai tubuġidima, tauna vutuna ko rauduneena.”

⁸ Be anea aniwai rabuinama anea dokadokanama yai muriwatane be ya riuna, “Babilon meagainama dosinama yodi a kawa gewagewana. Baninama Babilon ya voie da

dobue banaga matabudi na badarama kedanama wairewapaninama ai muriwatanena. Be banaga matabudi inam badara waeninama a tegona.”

⁹ Be anea aniwai rabuiteġanama taudi yai muriwatanedi be bonanama dosine ya riuna, “Deġoda aitau musara ġasigasinama be kokoitau kitanama maika inam muserinama e rauduneedi, be na matairama noġone bo ni mane ta boruna,¹⁰ tauna mate tokare Mamaitua na medima keyekine e tegona. Mamaitua na medima inam maika waen wairewapana vavasaġinama, nam upa mate wairawateġeina. Be inam waeninama Mamaitua na medima keyekine ya ġinina. Be musara ġasigasinama na tauwai muriwatanama taudi inam waeninama ta tegona. Be anea babaudima be Sipu Natunama noġodie inam banegidima tokare kai be salfa karakarata watanine ta raukivi gewegewedina. ¹¹ Be dabudine basudima e saġa nonoġana. Be taudi aitauġa inam muserinama ġasigasinama be kokoitaunama ta rarau duneedina, bo aitauġa tauna isanama matairinama tunidie e kenakenana, taudi kupi da suara nam airaġan sipere ta banavi. ¹² Vutuna aubainama banaga babaudima aitauġa Mamaitua na riuvavasaġama tawai muriwatanena, taudi naumeki da adi waisumaġama Yesu ġarone, ta midi bagibagi be yaba matabudi ta dami poredina.

¹³ Dabudine bona marae è vaie be ya riuna, “Umanama kwa girumana. Yodi da nokoi ya naġona nuavere taudi aitauġa Yesu isane ta gurigurina.” Be Arua ya riuna, “Inam riukaua! Taudi ai nuatoitoi ġarovana, yodi ta siperena. Be taudi adi matairama inam voia veredima mate ta naġona marae.”

Sipi dobue ya porana

¹⁴ Be yài kitana, be giyou ġavoġavorinama è kitana, be debane banaga ya miamiāna kitanama banaga natunama maika. Be tauna paiwaraga goldie voivoienama debane ya boru, be nimane biriuko gamgamnama ya kaikaididina.

¹⁵ Be dabudine anea ġesaunama tempolnopone be ya dobi da bonanama dosine tauna aitau giyou debane ya miamiāna ya riuena, “Sipi dobue yodi ya porana, vutuna aubainama am biriukoma kwa kwadiena.” ¹⁶ Dabudine tauna aitau giyou debane ya miamiāna, na biriukoma dobue ya kwadie be yaba matabudi ya petodi be ya rawateġeteġeidina.

¹⁷ Be anea ġesaunama marae tempolnopone be ya dobina, tauna mate biriuko gamgamnama nimane ya kaikaididina.

¹⁸ Be anea ġesaunama kai menanama tauwai badena tauna oltae be ya dobi da bonanama dosine tauna aitau biriuko

gamgamnama ya kaikaididina ya riuena, “Dobue gureipi votedima a ġouna aubainama, am biriukoma kwa kwadie be matabudi kwa tomdina.”¹⁹ Dabudine anea na biriukoma dobue ya kwadie be gureipi matabudi ya petodi be ya rawateğegeidina. Yodibe gureipi matabudi anivabuyo gabunama dosine ya poraġa nawedina. Inam gabunama inam Mamaitua na medima gabunama e giuguenā. ²⁰ Be meagai diane ġavoe dabudine gureipi e vabuyodi be kosinidima tai dobina. Be kosinidima na morabama inam 1.5 mita, be kosininama ya daroro be ya dobi ya naġonā na dauma inam 1,600 stadia.*

15

Anea 7 kovoġa 7 mate

¹ Be mataira ġesaunama wainua basabasa vavasaġinama marae è kitana. Dabudine anea 7 be kovoġa damodamodima 7 a ragaragaudina. Inam kovoġidima muridie Mamaitua na medima e kovina.

² Be inam dabudine yaba kitanama maika egasi garasie voivoienama, be inam egasinama kai menanama mate wairawateğeinama è kitana. Be banaga aitauġa musara ġasigħasınama be kokoitaunama be isanama nambinama a vavai subedina, taudi inam egasinama diane a midimidina. Be Mamaitua yaba kitedima gita maika ya utedina. ³ Be taudi Mamaitua na taunoyama Mousis be Sipu Natunama adi sarema a riġana, be umanama a saresarena, “Bada Mamaitua wairewpana vavasaġimma, tam am voiama dosidima ka basebasedina.

Tam dobu matabuna adi guyauma, be am kedama matabudi didimanidima be riuriukauidima.

⁴ O Bada, aitau tokare nam e nairem? Banaga matabudi tokare tam isamma ta kawa saġena, baninama tamġa banaga babaumma.

Be banaga matabudi tokare ta verau ġarome be ta rauduneemna.

Baninama am voiama didimanidima a maġatarana aubainama.”

⁵ Uma kauidima muridie èi kita da marae tempol a kaiporena è kitana, be tempolnopone waianina kapenama ya kenakenana. ⁶ Be inam tempolnama nopone anea matabudi 7, be kovoġa 7 a ragaudi be a dobina. Taudi adi garama ġavogħavoridima waimatakanikanidima a kotedina, be adi garama bogane nam mira ġaubaonama anikitakita. Be taudi boritai goldie voivoienama nuakadediġa a pani

* **14:20:** ‘Stadia tenaġa’ inam 0.185 kilomita. (1,600 x 0.185 = 296 kilomita)

verauġedina. ⁷ Be yaba yawayawasanidima matabudi 4, be nopolie tenaġa anea tenatenaġa keyaka ya ute nawedina. Be inam keyekidima nopolie Mamaitua miamia nonoġinama na medima a moġavu be a kenakenana. ⁸ Inam raġanine Mamaitua na borumama, be na rewapanama basudima tempol nophonama ya moġavuna. Be nam aitau teneteneġina da inam tempolnama nophone sibo ya saġa, naumeki da anea 7 inam kovoġidima 7 sibo a ġini rovodina.

16

Mamaitua na medima keyekidima matabudi 7

¹ Naumeki da tempol nophone bona dosinama è vaiena, umanama anea 7 ġarodie ya riuriuna, “Ko naġo be Mamaitua na medima keyekidima 7 dobue ko ġini poraġana.”

² Naumeki be anea dokadokanama ya naġo be na keyakama dobue ya ġini pore yovoġena. Inam raġanine taudi aitauġa musara ġasiġasınama na matairama tunidie a kenakena be kokoitaunama a rarau duneena, taudi tunidie kerokero gewegewedima be waimuya vavasaġidima a tubuġana.

³ Naumeki be anea aniwai rabuinama na keyakama egasie ya ġini pore yovoġena. Inam raġanine egasi yai rawakosinana, banaga gurigurinama kosininama maika. Be yaba matabudi egasi nophone miemienidima a guri rovona.

⁴ Naumeki be anea aniwai rabuiteġanama na keyakama upae be bigabigae ya ġini pore yovoġena, be inam upedima matabudi ai rawakosinana. ⁵ Dabudine è vaie da anea upa taурabedima Bada ya riuena, “Tam banaga babaumma, tam nama miemienimma, be yodi kwa miamiana. Am etarama kuya voie kauena ⁶ da banaga kosina kuya utedi da ta tegona, baninama taudi tauwai sumaqemma be am perovetama a vunuġidi be kosinidima a daroro yababana aubainama. Vutuna biwanama taudi yodi kosina ta tegona.” ⁷ Dabudine è vaie da olta inam aneanama na giuma yai katitawa be ya riuna, “Inam riukaua Bada, tam Mamaitua wairewapanā vavasaġimma. Tam am etarama matabudi riukaua be a didimana kauana!”

⁸ Naumeki be anea aniwai 4-nama na keyakama suara matane ya ġini pore be dabudine suara rewapanā ya paġo be banaga kaie ya yeguridina. ⁹ Be suara poyanama dosine banaga ya yeguridina. Be Mamaitua inam kovoġidima yawai bagedina, vutuna aubainama banaga giu gewegewedie Mamaitua isanama a kawa gewagewana, be taudi adi noġotama nam ti vitaredi be Mamaitua isanama ti kawa saġena, ibewa.

¹⁰ Naumeki be anea aniwai 5-nama na keyakama musara ġasiġasınama na kaba miae ya ġini porena, be inam muserinama ġasiġasınama na waiguyauma matabuna yai tadiwanawana. Be banaga muya dosinama aubainama gadigidima a sanadididina. ¹¹ Be taudi muya be kero aubainama, giu gewegewedie Mamaitua marae isanama a kawa gewagewana. Be taudi adi noġotama nam ti vitaredi be voia gewegewedima ti gosedina, ibewa.

¹² Naumeki be anea aniwai 6-nama na keyakama upa dosinama isanama Yupretis nopone ya ġini porena. Be upa ya ġasara be suara na kaba tavama yauwanine guyaguyaudima adi kedama ya vokaukauena da taudi kedanaġa ta verauna aubainama. ¹³ Be taugu arua gewegewedima rabuiteġa è kitedina, kitedima maika tatakau. Tenaġa duragon gayane ya dobina, tenaġa musara ġasiġasınama gayane ya dobina, be tenaġa peroveta kaikaiyovunama gayane ya dobina. ¹⁴ Inam aruidima gewegewedima taudi penama, be taudi mataira dosidima tawai tubuġidina, inam taudi tokare ta naġo be dobu guyaguyaudima matabudi ta rawateġeidina iġora aubainama. Inam iġerinama Mamaitua wairewapana vavasaġinama na raġanima dosine tokare e tubuġana.

¹⁵ “Ko kita kauana, taugu tokare yà verauna banaga danedanenena maika. Nuavere tauna aitau nam ima kenakenana, tauna matanama ya kaya be na garama ya vokaukauedi be e miamiana. Tauna tokare nam ma kovakovana e naġo be e tunimayaġa.”

¹⁶ Naumeki da gabu Hibru bonane tawai isana *Amagedon*, dabudine guyaguyau matabudi a rawateġeidina.

¹⁷ Naumeki be anea aniwai 7-nama na keyakama gunume ya ġini porena, be tempol nopone guyau na kaba miae bona dosinama ya dobi be ya riuna, “Yodi ya kovina.”* ¹⁸ Inam raġanine keyama, parere be gugura a dobina, be yoyo dosinama ya tubuġana. Mamaitua dobue banaga yawai tubuġie da yodi, nam airaġan dego dobue inam nama yoyonama i tubuġa rubuna. Inam yoyonama ya moraba vavasaġana aubainama, ¹⁹ meagai dosinama Babilon yai miasena, be nevedima rabuiteġa a tubuġana. Be meagai ġesaudima dobu ġesaudie mate yai mia weiweidina. Nama ya tubuġana, baninama Mamaitua Babilon meagainama dosinama na gewagewama ya noġotidina, be Mamaitua na medima dosi vavasaġinama keyekinama Babilon ya ute da ya tegona. ²⁰ Dabudine bonabona matabudi a nuayaġotana, be oya a nuagunava be ai kavedina. ²¹ Be gunume kusana rawarawa tabutabudima a yovo be banaga debedie a ravusedina.

* **16:17:** Yodi kovoġa note ya giuguedina matabudi a kovina.

Be kusana rawarawa tabutabudima adi morabama yeku dosidima maika, be adi vitama 50 kg. Be inam kovoġinama aubainama banaga giu gewegewedie Mamaitua isanama a kawa gewagewana, baninama inam kovoġinama ya moraba vavasaġħana aubainama.

17

Babilon tauna vutuna waivi badabadara vavasaġinama

¹ Be inam aneedima matabudi 7, keyaka 7 ragaragaudima, be tenaġa ya verau ġarogue be ya riueguna, “Kwa verau be taugu waivi badabadara vavasaġinama na kovoġama yài kataimna. Tauna upa toitoi diedie e miamiana, ² be dobu guyaguyaudima tauna mate tawai soġa yababayababana. Be dobu banegidima tauna na waenma a tego, be badara ya kawa buedi be awai soġa yababayababana.”

³ Taugu arue anea yai doka naweguna dobu kavakavane. Be inam dabudine taugu waivi è kitana, tauna musara ġasigasınama be sabasabanama debane ya miamiana. Be inam muserinama tuninama matabuna isa a kenakenana, be inam isedima matabudi waidibogħa giudima. Be muserinama debanama matabudi 7, be donanama matabudi 10. ⁴ Be inam waivinama na garama gatugatunama be sabanama rawarawa keyekeyeminama. Tauna waisia goldie voivoiedima ya kotedi be a rawarawa keyekeyemidina. Be yeku maesidima dosidima, be posaru iġoti voivoienama ya kote kotedina, na waisiama aubainama. Be ni mane keyaka goldie voivoienama ya kaikaididina. Be voia waimatawarawara vavasaġedima be ya badabadarana miredima inam keyekinama nöponama a moġavuna. ⁵ Be waivinama noġone isa semosemonama a girumina. Be inam isanama inam umanama:

BABILON DOSIYABABINAMA, TAUNA INAM TORETORE
BANEGIDIMA MATABUDI, BE VOIA WAIMATAWAREWAREDIMA
DOBUE MATABUDI TINEDIMA

⁶ Be taugu è kita da inam waivinama banaga babaudima be Yesu tauwai matematenama kosinidie ya tego buana. Taugu inam waivinama è kita be è base kauena.

⁷ Dabudine anea ya riueguna, “Aba aubainama kwa base-base? Inam muserinama ġasigasınama, be debane waivi e gerugeruna, taudi adi kauama semosemodima yodi taugu yà giu yaġemna. Inam muserinama tauna vutuna debanama 7, be donanama 10. ⁸ Inam muserinama kuya kitakitana, tauna dokane ya miamiana, yodi ibewa be tokare dom nam dibuboruborune be e tavana. Be tauna tokare ta raukivi gewegewe be tai gurina. Boni muriġa da dobu ya tubuġħana, Mamaitua tauwai sumaġa isedima matabudi

yawasana bukane ya girumidina. Be dobu banegidima aitaūga isedima yawasana bukane nam tima kenakenana, taudi tokare inam muserinama ta kita be ta basena. Bani-nama inam muserinama tauna dokane ya miamiana, yodi ibewa be tokare e mağatarana.

⁹ “Tam değoda uma yabedima kataiedima kwa ġoena, naumeiki da tam nuauyauya kwa paġo be muriġa da kwa kataiedina, musara debedima 7 inam oya matabudi 7, be debedie inam waivinama e miamiana. Be mate inam guyaguyau matabudi 7. ¹⁰ Inam guyaguyaudima matabudi 7, be 5 a kovina, tenaġa yodi e miamiana, be tenaġa yaġoro nam i tavana. Be raġanine e tavana, tauna tokare e taumiana raġan ġaubonaġa. ¹¹ Be muserinama noġone ya miamiana be yodi ibewa, tauna vutuna guyaguyau 7 nopolie, be tauna guyau aniwai 8-nama ya tubuġana. Be tauna tokare ta raukivi gewegewe be tai gurina.

¹² “Be dona 10 kuya kitekedina, inam guyaguyau matabudi 10 be taudi adi waibadama yaġoro nam ti paġona. Be taudi tokare inam muserinama mate adi waibadama ta ragau tenaġedina guyaguyau maika. Be taudi awa tenaġa nophone ta rautapa waibadana. ¹³ Taudi adi noġotama tai tenaġe da adi rewapanama be adi waibadama matabudi inam muserinama ta utena. ¹⁴ Yodibe taudi Sipu Natunama be na banagama mate waiġaviedima tai karea. Be Sipu Natunama tokare na ġaviamo ei gwaġedina, baninama tauna vutuna babada matabudi adi Badama be guyaguyau matabudi adi Guyuma. Be Sipu Natunama na banagama aitaūga ya yokoedi be ya vinedi da tauwai muriwatana patupatutudima a tubuġana.”

¹⁵ Be anea ya riueguna, “Tam upa toitoi kuya kitedina, be diedie waivi badabadara vavasaġinama ya miamiana. Inam upedima inam banaga dobu da dobu, be dam da dam, be bona da bona, be banaga dobu matabuna nophone ewai matairena. ¹⁶ Be musara ġasiġasınama be dona 10 kuya kitedina, taudi inam waivinama badabadarinama tokare ta tuaġaiena. Taudi tokare ta raukivi gewegewe, be ma kovakovana ta gose porena. Be taudi tokare inam waivinama visiġonama ta kanidi be kaie ta gabu goruna. ¹⁷ Baninama Mamaitua na ogama taudi nopolie ya biridina da taudi tauna na ġoanama sibo a voie be a raudamoena. Vutuna aubainama taudi ai anina da adi rewapanama musara ġasiġasınama a utena da tauna ei badana, naumeiki da Mamaitua na ogama matabudi ta tubuġana. ¹⁸ Be inam waivinama kuya kitakitana, tauna vutuna meagai dosinama be dobu guyaguyaudima ewai badedina.”

18

Babilon ya nuarikarikana

¹ Uma kauidima muridie, anea ġesaunama marae be ya yovoyovona è kitana. Tauna na waibadama dosinama be neneğarinama dobu yai moğavuna. ² Be tauna bonanama wairewapanine ya riuna, “Babilon meagainama dosinama yodi a kawa gewagewana, riukaua a kawa gewagewana. Inam meagainama yodi penama adi meagaima ya tubuğana, be arua be kiu gewegewedi be miremiredima adi kaba miama. ³ Baninama Babilon ya voie da dobue banaga matabudi na badarama kedanama wairewapaninama ai muriwatanena. Be banaga matabudi inam badara waeninama a tegona, be Mamaitua nuanama yai medina. Be dobu guyaguyaudima tauna mate tawai soğā yababayababa. Be bisnis banegidima dobu matabuna nopone taudi rauguyaguyau yabedima matabudi Babilon ġarone a raugi-maredi be taudi manee ai guyauna.”

⁴ Dabudine taugu bona ġesaunama marae è vaie be ya riuna, “Taugu yau banagama, Babilon ko dobi pore, da tauna na gewagewama nam taumi e taukonimi, be na gewagewama kovoğinama taumi nam ko paġo. ⁵ Tauna na gewagewama kunututunama gunume ya tavana, be Mamaitua inam kauidima gewegewedima nuanama nam i koana. ⁶ Tauna aba ġaromie ya voivoiena, koi ġare munaġena. Tauna raġan bisa ya raukivi gewegewemina ruvanama nama, be debane koi poto da ko utena. Tauna noġone raukivigewagewa keyekinama ya utemina, aubainama taumi inam raukivigewagewa keyekidima koi rabui be tauna ko ute munaġena. ⁷ Tauna na waiguyauma neneğaridima ya rarau guyaguyauedi be ya kawakawa saġe munaġena, ruvane nama nuaboya be raukivigewagewa ko utena. Tauna nuanama nopone tauname ya kawa saġe be umanama ya riuriuna, ‘Taugu nam kaiyababa, taugu yà miamiana maika guyau, be nam airaġan tokare yà ġaba.’ ⁸ Vutuna aubainama tauna tokare raġan tenaġa nopone na kovoğama e banavidina. Na kovoğama inam guri, nuaboya, be kaniguri. Be tauna kaie ta gabu goruna, baninama Bada Mamaitua tauna vutuna wairewapanana vavasaġinama be tauetara kaua, tauna tokare Babilon kovoġa e utena.”

⁹ Dobu guyaguyaudima taudi inam waivinama mate tawai kawa badarana, be na waiguyaue taudi tawai guyauna. Be taudi inam meagainama e karakaratina basunama ta kitakitana raġanine, taudi tokare tai nuaboya gurata be ta ġabana. ¹⁰ Be taudi uma meagainama na kovoğama tokare ta kita be taudi naira madanie ta midi da ta ġabba be ta riuna,

“Aiyo, aiyo, tam Babilon meagai dosimma be wairewapana vavasağimma. Tam awa tenağə nopone be kovoğə gewagewa vavasağinama kuya banavina.”

11 Be dobue bisnis banegidima taudi tokare tauna tai nuaboye be ta ġabena, baninama yodi nam aitau da adi taragaima ġarodie e gimara. 12 Be adi taragaima inam:

- Yaba goldie be siruvae voivoiedima,
- yeku maesidima dosidima,
- posaru iğoti voivoiedima,
- gara ġavoğavoridima, gatugatudima, aveavedima, be sabesabedima,
- kai isanama gavi,
- elepent donane taragai voivoiedima,
- kai maesidima dosidima ġesaudima,
- yaba brons,* irama, be mabol† voivoiedima,
- ¹³ murağə ġabuğabudima,
- kani anitai dinidima yabedima,
- piupiu,
- tuni anitai ġabuğabudima taragaidima,
- waen be anirau buka oeridima,
- parawa be witi,
- musara kau be sipu,
- hosi be tureira,
- be banaga yawayawasanidima a raraugimaredina.

Inam yabedima matabudi yodi nam aitau da e gimara.

14 Inam rağanine bisnis banegidima tai sosori be ta riuna, “Aiyo Babilon, uma yabedima matabudi kuya ġoegoedina yodi ai kavena. Am borumama be am waiguyauma matabuna ta samoana, be nam airağə tokare kwa ragau munägedi.” 15 Be bisnis banegidima aitauğə inam purepuredimma Babilon ġarone a raraugimaredi, be ġarone awai guyauna, taudi yodi tokare Babilon na kovoğama ta kita be naira madanie ta midi¹⁶ da ta ġaba be ta riuna, “Aiyo, aiyo, tam Babilon meagai dosimma. Tam gara maesa donedima kuya kotekotedina. Am garama ġavoğavoridima, gatugatudima, sabesabedima be rawarawa keyekeyemidima gold maika. Be yeku maesa donedima be posaru iğoti voivoiedima mate kuya kotekotedina.” 17 Be awa tenağə nopone am waiguyaunama dosinama ya kovina.”

Inam rağanine egasie waga yabiyalidima taupağodima be aitauğə wagae a gerugeruna, waga taunoyedima be egasie waikaimo banegidima, taudi matabudi tokare madanie ta midina. 18 Be inam meagainama e karakaratina basunama

* 18:12: ‘Brons’ inam irama voyawayawanama. † 18:12: ‘Mabol’ inam yeku kitana verenama, be maesinama dosinama.

waga taugeruedima ta kitakitana raġanine, taudi tokare bonedima dosine ta riuna, "Nam aikeda deġo umanama meagainama dosinama ima kenakenana." ¹⁹ Be taudi tokare debedima ta kavudi da tai nuaboya gurata be ta ġaba be ta riuna, "Aiyo, aiyo, Babilon keu, tam meagai dosimma. Waga banegidima matabudi am waiguyaue taudi awai guyauna. Be tam awa tenaġa nopone gewagewa dosinama kuya banavina."

²⁰ Taumi mara banegimima, koi nuaverena. Banaga babaumima, be apasol be peroveta, taumi matabumi koi nuaverena, baninama Babilon nema taumi ya raraukivi gewagewa bakemina, nama Mamaitua yodi tauna ya raukivi gewegewena.

²¹ Dabudine anea wairewapana vavasaġināma yeku dosinama[‡] ya kaisuġu be egasie ma girigirina ya kiroġa pore nawe be ya riuna, "Uma yekunama nema e kiroġa pore bakena, nama meagai dosinama Babilon Mamaitua tokare e kiroġa porena, be nam airaġan tokare ta banavi munaġe. ²² Tam ġarome tokare nam gita bo turai bo bogigi tai digiri munaġedi be ko vaia rubudi, ibewa. Be nam airaġan tokare taragai tauvoiedima ġarome ta banavi munaġedi. Be yeku witi aniġiugudanama gugurinama nam ta vaia munaġe. ²³ Be kodam yananama nam airaġan nopome e yana munaġa. Be nam matakopa soidima ġarome ta tubuġa munaġa. Tam am bisnisma banegidima taudi boni dobu babadidima dosidima. Be tam am muraġe dobu banegidima matabudi kuyai doka waigewedina.

²⁴ Babilon nopone peroveta be Mamaitua na banagama kosinidima a banavidina. Be banaga matabudi dobue awai guridina kosinidima mate tauna nopone a banavidina."

19

Marae tawai nuaverena Babilon yai kavena aubainama

¹ Uma kauidima muridie patara dosinama marae bona-garedima ya saġasaġana e vaiena, taudi a riuriuna,
"Haleluya!"

Yawasana, boruma be rewapanan dà Mamaituama ġorone ta kenana, ² baninama tauna riukaue be didimanae banaga e kovokovoġidina. Tauna inam waivinama badabadarina-ma ya kovoġina, baninama tauna na badarama kana taiye dobue banaga matabudi yai miredina. Mamaitua na taunoyama kosinidima biwanama inam waivinama ya paġona." ³ Be taudi a yogo munaġa be a riuriuna,

[‡] **18:21:** Gurik bonane ya riuna: 'Millstone'. 'Millstone' inam witi aniġiugudanama.

“Haleluya! Tauna yodi e kara watana be basunama e saġa nonoġana.”

⁴ Be Mamaitua na kaba miae ya miamiana. Be dabudine babada 24 be yaba yawayawasanidima 4, taudi Mamaitua noġone doġae a raupari da a raudunee be a riuna, “Inam riukaua! Haleluya!” ⁵ Inam raġanine Mamaitua na kaba miae bona ya dobi be ya riuna, “Taumi Mamaitua na taunoyama banaga dosimi bo banaga yababa, matabumi Mamaitua ko vivivivirena, be yodi dà Mamaituama isanama ko kaisuġusuġuna!”

⁶ Dabudine patara dosinama bonagaredima ya saġasaġana è vaiena, maika tapara yarataunama be parere dosinama maika. Be taudi a yogo be a riuriuna,

“Haleluya!” Baninama tauda dà Badama Mamaitua wairewapano vavasaġinama ewai badana. ⁷ Matabuda tài nuavere be tà mosarina. Be tauna tà kaisuġusuġuna! Baninama yodi Sipu Natunama na wainaġima raġaninama ya tavana, be naġivau waivinama kaite ya vokaukaua be e miamiana. ⁸ Be naġivau waivinama naġi garedima ġavoġavoridima, waimatakanikanidima tauna a ute be ya kotedina. Be garedima bogedie nam mira. Gara ġavoġavoridima inam Mamaitua na banagama adi voiama didimanidima.

⁹ Naumeiki da anea ya riueguna, “Umanama kwa girumana: Nuavere taudi aitaugħa Sipu Natunama na wainaġima soine a kokonedi be a tavana.” Be mate anea ya riueguna, “Uma inam Mamaitua na giumenta riuriukaidima.”

¹⁰ Inam raġanine taugu anea noġone tuapikague è raupari da kabe tauna yà raudunee. Be tauna ya riutuaġġiegu be ya riuna, “Nam kwa rauduneegu, taugu inam taunoya ġoma maika tam bo am banagama aitaugħa Yesu isanama tawai matematena. Baninama aba ġarome yawai perovetaena, inam Yesu waimatematenama aubainama. Vutuna aubainama Mamaitua kwa rauduneena, nam taugu!”

Hosi ġavoġavorinama taugeruenama

¹¹ Inam raġanine taugu yà kitana, be mara ya nua-poraġana. Dabudine hosi ġavoġavorinama è kitana, be tauna aitau ragane ya gerugeruna isanama ‘Riukaua’ be ‘Waipatutu’. Tauna didimanae banaga e kaiviredi be ewai ġaviedina. ¹² Be tauna matanama kitedima kai remnama maika, be debane paiwaraga toitoi a kenakenana. Be tauna bogane isa girugiruminama. Be inam isanama nam aitau tenaġħa i kataiena be taunaġħa ya kataiena. ¹³ Be na garama kosinanopone waigayonama ya kotekotena, be inam baneginama isanama ġesu inam, ‘Mamaitua Riunama’. ¹⁴ Be tauiġara marae, taudi matabudi hosi

ġavoġavoridima ragedie a geru be tauna awai muriwatanena. Be taudi adi garama ġavoġavoridima a kotedina, be garedima bogedie nam mira.¹⁵ Be banaga na garama kosina no-pone waigayonama, tauna mudune kwatikwati menanama karone be taurine gamgamdima ya dobina. Be inam kwatikwatine tauna dobu banegidima ei ġaviedina. Be tauna tokare diġona irame voivoienama e paġo be banaga ei badedina. Tauna vutuna Mamaitua wairewapana vavasaġinama na medima gabune banaga e vabuyodina.¹⁶ Be tauna na garama bogane be muimuine isanama girugirumidima a kenakenana. Be isa inam umanama:

GUYAGUYAU ADI GUYAUMA BE BABADA ADI BADAMA

¹⁷ Be taugu anea suara matane ya midimidina è kitana. Be tauna bonanama dosine kiu matabudi gunume a rovorovona, ya yokoedi be ya riuedina, “Ko verau matabumi be koi rawateġeimi Mamaitua na soima dosinama aubainama.¹⁸ Be banaga visiġodima ko kanidina. Guyaguyau, torimatanama, babada dosidima, hosi be hosi taugeruedima, taunoya be banaga yababa, taudi matabudi visiġodima ko kanidina.”

¹⁹ Dabudine musara ġasiġasınama be dobu guyaguyaudima be adi tauiġarama taugu è kitedina. Taudi a rawateġeina iġara aubainama da sibo hosi ġavoġavorinama taugeruenama be na tauiġarama mate sibo ai ġaviedina.²⁰ Be you, hosi ġavoġavorinama na tauiġarama mate, musara ġasiġasınama be peroveta kaikaiyovunama a vunuġidi be a panidina. Inam perovetanama kaikaiyovunama, tauna vutuna musara ġasiġasınama isane mataira be voia dosidima ya voivoiedina. Be inam matairidie tauna banaga aitaugħa musara ġasiġasınama na matairama a paġopaqona, be kokoitaunama a rarau duneena, taudi yawai kedadoka waigewedina. Inam banegidima rabui yawayawasanidima kai be salfa karakarata watanine a poraġa nawedina.²¹ Be adi banagama gesaudima kwatikwatie ai guridina. Inam kwatikwatinama vutuna hosi taugeruenama mudune ya dobidobina. Be kiu matabudi banaga visiġodima a kani da a kani siauana.

20

Seitan dibure ya miana modi 1 tausand a kovina

¹ Dabudine taugu yài kitana, be anea marae ya dobi be ya yovoyovona è kitana. Be tauna dom nam dibuboruboruna kiġinama be seini dosinama nimane ya ragaudina.² Be tauna duragon ya vunuġi da ya pani be dom nam dibuboruborune ya boruna, naumeki da modi 1 tausand ta kovina. Inam

duracionnama tauna vutuna boni mota tawai isana Diaboro bo Seitan.³ Be anea dom nam dibuboruborune, dabudine duragon yai rokitom be ya pusitomna da duragon tokare nam teneteneğinā da banaga dobue ei kedadoka waigewa munağedi. Tauna dabudine e miana naumeki da modi 1 tausand ta kovina. Be murine duragon ta kuvesi be e taumiana rağan ġaubonağā.

⁴ Be guyau adi kaba miama be aitaúga debedie a mi-amiana, è kitedina, taudi rewapania a pağona da banaga ta etaredina. Be inam dabudine banaga aitaúga dobue gadodima a tomtomdina aruidima è kitedina. Taudi Yesu awai matemate be Mamaitua riunama a rarauguguyena aubainama gadodima a tomdina. Inam banegidima taudi musara ġasigasinama be kokoitaunama nam ti rauduneedina, be nam musara na matairama noğodie bo nimedie ti boruna. Taudi gurie be a midisuğu munağā be Keriso mate ai bada tenağāna, naumeki da modi 1 tausand a kovina. ⁵ Inam banegidima taudi gurie be ta midisuğu dokana. Be banaga guriguridima ġesaudima taudi nam ta midisuğu munağā, naumeki da modi 1 tausand ta kovina murine, taudi ta midisuğuna. ⁶ Nuavere be babau taudi aitaúga gurie be ta midisuğu dokana, baninama guri wairabuunama na rewapanama taudi ġarodie nam ima kenakenana. Be taudi tokare Mamaitua be Keriso adi pirisima ta tubuğāna be Keriso mate tai bada tenağāna, naumeki da modi 1 tausand ta kovina.

Seitan na kovoğama

⁷ Be modi 1 tausand ta kovina muridie, Seitan dibure ta kaiporena. ⁸ Inam rağanine tauna e nağona dobu matabuna nopodie, be banaga matabudi ei kedadoka waigewedi, be e rawateğeteğeidina iğara aubainama, inam vutuna 'Gog' be 'Magog'. Be banaga sievinama inam bubu egasi diane maika. ⁹ Taudi dobu matabuna nopone be a verau da Mamaitua na banagama adi ġaravuma a midi kwavivirona. Inam ġaravunama vutuna Mamaitua na meagaima ewai nuapağona. Be kai marae ya yovo be ġavia meagai a midimidi kwavivirona ya kara gorudina.

¹⁰ Be Diaboro tauna inam banegidima yawai kedadoka waigewedina, tauna a pore nawena kai be salfa karakarata wataninama nopone. Noğone inam dabudine musara ġasigasinama be peroveta kaikaiyovunama a pore nawedina. Be taudi kupi da suara dabudine tai nuatoitoi nonoğāna.

Mamaitua na etarama dosinama

¹¹ Dabudine taugu guyau na kaba miama dosinama ġavoğavorinama be banaga debane ya miamiana è kitana.

Be gunuma be dobu naira a samoana, be nam dego gabuti banavina da sibo ai moisiri.¹² Be dabudine banaga guriguridima matabudi è kitedina, babada dosidi be banaga yababayaba, matabudi guyau na kaba miama noġone a midimidina. Be Mamaitua na taunoyama buka a tapana. Be mate buka ġesaunama a tapana inam yawasana bukanama. Be guri banegidima adi voiama matabudi buka nopolie a girugirumidina ruvane ya etaredina.¹³ Be egasie guri kenekenedima matabudi egasi ya tavaitedina. Be guri banaga ya kaikaidididina ya raukai gosedina. Be mate banaga guriguridima aruidima adi gabuma, tauna banaga ya kaikaidididina ya raukai gosedina. Be taudi matabudi a tava, yodibe tenatenaġaġa adi voiama ruvane Mamaitua ya etaredina.¹⁴ Yodibe Guri be banaga guriguridima aruidima adi gabuma kai karakarata watanine taudi a pore nawedina. Kai karakarata wataninama inam vutuna guri aniwai rabuinama.¹⁵ Be aitau da isanama yawasana bukanama nopolie nam ta banavi, tauna kai karakarata wataninama nopolie ta pore nawena.

21

Jerusalem vaunama

¹ Naumeiki be taugu mara vaunama be dobu vaunama è kitedina, be mara dokanama be dobu dokanama ai kavena, be nam dego egasi.² Be taugu meagai babaunama, inam Jerusalem vaunama marae Mamaitua ġarone, be ya yovoyovona è kitana. Tauna naġivau maika a vokaukaue be ai sia yaġena na badama ta utena aubainama.

³ Inam raġanine taugu bona dosinama è vaiena guyau na kaba miae ya dobi be ya riuna, “Yodi Mamaitua banaga nopolie e miana, be tauna taudi mate ta mia tenaġana. Taudi tokare tauna na banagama, be tauna tokare taudi adi Mamaituama.”⁴ Be tauna tokare taudi matasurudima matabudi matedie e bunisa poredina. Inam raġanine tokare nam guri, nam nuaboya bo ġaba, be nam muya, baninama yaba matabuna dokane a tubutubuġana yodi ai kavena.”

⁵ Be tauna aitau guyau na kaba miae ya miamiana, tauna ya riuna, “Taġu yaba matabudi vaudima ya voivoiedina!” Be tauna ya riuna, “Uma yabedima kwa girumidina, baninama uma giudima taudi riukaua tokare ta tubuġana.”

⁶ Be dabudine tauna ya riueguna, “Yaba matabudi a tubuġa ya kovina. Taġu vutuna Alfa be Omega, yaba matabuna pakane da damone vutuna taġu ya miamiana. Tauna aitau nuanama e rarau kasakasana, taġu tokare yawasana watutunama ya ute be e tegona, be nam tokare ei maesi.”⁷ Tauna

aitau da piripiri matabudi e vaisubedina, tauna tokare inam yabedima veredima matabudi ei buderiedina. Be taugu tokare tauna na Mamaituama, be tauna taugu natuguma. ⁸ Be gewagewa banegidima aitaūga naira ya voiedi be taugu ta bovibovieguna, bo banaga nam waisumēgidi, bo banaga nopomiremiredima, bo taurau vunuūga, bo badara yababayababa banegidima, bo muraūga be ginauri tauvoiedima, bo kokoitau taurauduneedima, be tauwai kaikaiyovu matabudi adi gabuma tokare kai be salfa karakarata wataninama nopone ta naġona. Inam vutuna guri aniwi rabuinama.”

⁹ Be noġone, anea matabudi 7, kovoġa damodamodima keyekidima 7 a ragaragaudina, taudi nopolie anea tenaġa ya verau ġarogue be ya riueguna, “Kwa verau be taugu naġivau yài kataimna, Sipu Natunama na waivima.”

¹⁰ Inam raġanine tauna arue ya naweguna oya dosinama daudaunama debane. Be inam dabudine tauna meagai babaunama, Jerusalem marae Mamaitua ġarone, be ya yovoyovona yai kataiguna. ¹¹ Be Jerusalem boruminama ya rawarawa keyekeyemina Mamaitua boruminama maika, be yeku maesadonanama isanama Jaspa, maika tauna ya rawarawa namanamarina, be mate kitana topa moimoiarinama maika. ¹² Be inam meagainama na ganama daudaunama be bagibaginama ya midimidina. Be gana noppone inam matakededa matabudi 12 a kenakenana, be anea 12 inam matakededima a raberabedina. Be matakededa bogedie Israel damdima 12 isedima a kenakenana. ¹³ Matakededa 3 tavaia yauwanine a kenakenana, be matakededa 3 yavaraduba yauwanine a kenakenana, be matakededa 3 yavaragwae yauwanine a kenakenana, be matakededa 3 yovoia yauwanine a kenakenana. ¹⁴ Be meagai gananama tuetuedima matabudi 12 be bogedie Sipu Natunama na apasolma 12 isedima a kenakenana.

¹⁵ Be inam aneanama ġarogue ya giugiuna, tauna ni mane anirau ruva goldie voivoienama ya kaikaididina, inam meagainama be matakededima, be gananama e ruvedina aubainama. ¹⁶ Be meagai na tabatabama inam 12 tau sand stadia,* be na morabama be na dauma, matabudi teneġidima. ¹⁷ Be tauna gana ya ruvana na potopotoma inam 144 kubit,[†] inam ruvanama banaga adi kaba rauruvama, vutuna anea ya paġo be ya rauruvaena.

¹⁸ Be gana inam yeku isanama jaspae a voiena. Be meagai tauna goldie a voiena, be kitana garasi maika. ¹⁹ Be

* **21:16:** ‘Stadia tenaġa’ inam 0.185 kilomita. ($12,000 \times 0.185 = 2220$ kilomita)

† **21:17:** ‘Kubit tenaġa’ inam 0.45 mita. ($144 \times 0.45 = 64.8$ mita)

meagai gananama tuetuedima taudi matabudi 12. Be tuatua tenatenaġaġa adi yekue adi yekue a ragaudi be ai siedina. Be inam yekudima maesadonedima be waimata veraver-audima. Be yekudima isedima inam umanama: Tuatua 1 inam jaspa, 2 inam sapaiya, 3 inam aget, 4 inam emorold,²⁰ 5 inam sadonikis, 6 inam kanelian, 7 inam kirisolait, 8 inam beril, 9 inam topas, 10 inam kirisopres, 11 inam hayasin be 12 inam ametist.

²¹ Be iġot i dosidima matabudi 12 ai midiridi be iġotidima tenatenaġaġa bogedie matakeda ai tubuġidina. Be meagai kedanama inam goldie voivoienama, kitanama garasi maika.

²² Be taugu inam meagainama nōpone tempol nam e kitana, baninama Bada Mamaitua wairewapana vavasaġinama be Sipu Natunama, taudi vutudi inam meagainama na tempolma. ²³ Be inam meagaine nam suara bo nawaravi tima yanayanana, baninama Mamaitua boruminama taudi ewai yanedina, be Sipu Natunama vutuna taudi adi kodamma. ²⁴ Be inam dobune banaga matabudi taudi inam yanane ta babababara naġona. Be dobu guyaguyaудима adi waiguyauma inam meagaine ta verauġedina. ²⁵ Be inam meagainama matakededima nam airaġan tokare ta gududi, be inam dabudine nam airaġan tokare kupi kwa kita. ²⁶ Be dobu matabuna banegidima‡ adi waiguyauma taragaidima inam meagaine ta saġedina. ²⁷ Be yaba miremiredima, be banaga aitau yawasana miremiredima bo kaikaiyovudima ta voivoiedina, taudi nam uma meagaine ta saġa. Be taudi aitauġa isedima yawasana bukanama nōpone ta kenakenana, taudīga inam meagaine ta saġana. Be inam bukanama tauna Sipu Natunama na bukama.

22

Yawasana upanama dosinama

¹ Dabudine anea yawasana upanama dosinama yai katai-guna. Be inam upanama moimoiarinama Mamaitua be Sipu Natunama adi kaba miae ya dobi ² be meagai kedanama pounaġa ya naġonaġona. Be upa diane umaġo be noaġo yawasana kainama e midimidina. Be inam kainama nawaravi 12 nōpodie, nawaravi tenatenaġaġa e pata be e banibanna. Be kainama rugurugudima inam banaga dobu vaune miemienidima adi bunamama.

‡ **21:26:** Inam riukaua dobu banegidima. Be taudi dobu vaunama banegidima, vutuna aubainama taudi nam Mamaitua na ġavia, dobu poranama banegidima maika.

³ Dabudine nam aba gewegewedima tima kenakenana da Mamaitua ei ġaka. Be Mamaitua be Sipu Natunama adi kaba miama inam meagaine e kenakenana, be na taunoyama tauna ġarone ta noyana. ⁴ Be taudi tokare Mamaitua noġonama ta kitana, be tauna isanama taudi noġodie e kenana. ⁵ Be inam meagaine tokare nam airaġan kupy kwa kita, be banaga tokare nam kodam bo suara ta ġoe da sibo ai yanedi, baninama Bada Mamaitua taudi ewai yanedina. Be taudi tokare tai boda nonoġana.

⁶ Be dabudine anea ya riueguna, “Uma giudima riukaua tokare ta tubuġana. Peroveta aruidima adi Mamaituama, tauna vutuna Bada. Be yaba ġaubonaġa tokare ta tubuġana aubainama, Bada na aneama ya riuporena da na taunoyama ei kataidina.”

Yesu e verau munaġana

⁷ “Kowai kita, taugu ġaubonaġa yà verauna. Nuavere tauna aitau uma bukane waiperoveta giudima e kaidididi be ewai muriwatanedina.”

⁸ Taugu Jon, taugu vutuna uma yabedima è vaiedi be è kitedina. Be raġanine nama è vaie be è kitekitedina, taugu anea noġone tuapikague è raupari da kabe tauna yà raudunee, baninama tauna uma kauidima yai kataiguna aubainama. ⁹ Be tauna ya riutuaġiegu be ya riuna, “Nam kwa rauduneegu, taugu inam taunoya ġoma maika tam bo am banagama peroveta be aitauġa uma bukanama na giuma ta kaidididi be tawai muriwatanedina. Vutuna aubainama Mamaitua kwa rauduneena!”

¹⁰ Inam raġanine tauna ya riueguna, “Uma bukane waiperoveta giudima nam kwa nuatawed, baninama raġan kaiteka maida. ¹¹ Aitau da aba e voivoia waigewana, kwa gose da e voia kwasena. Be aitau da yawasana miremiredima e voivoiedina, kwa gose da e voia kwasena. Be aitau da didimana e voivoiedina, naumeki da didimana e voienna. Be aitau da banaga babaunama, naumeki da tauna inam yawasaninama e kaiguratena.”

¹² “Kowai kita, taugu ġaubonaġa yà verauna maesa mate. Be taugu banaga tenatenaġaġa adi voiama ruvedie nama adi maesama yà utedina. ¹³ Taugu vutuna Alfa be Omega, taugu vutuna noġone be murine, be yaba matabuna pakane da damone vutuna taugu yà miamiana.”

¹⁴ Nuavere taudi aitauġa adi garama a koġedina. Taudi tokare teneteneġinama da yawasana kainama ta kanina, be teneteneġinama da matakedae ta saġa be meagai nopone ta naġona. ¹⁵ Be banaga adi voiama daġdaġasi maika be muraġa be ginauri tauvoiedima, be badara yabayababa

banegidima, be taurau vunuġa, be kokoitau taurauduneedima, be aitaugā kaiyovu kedanama tauwai nuapaġoenama bo kaiyovu ta voivoiedina. Inam banegidima matabudi taudi tabune ta miana.

¹⁶ “Taugu Yesu, taugu vutuna yau aneama è riuporena ekalesia ġaromie da uma kauidima ko kataiedina. Taugu vutuna guyau Deivid waraminama be nabinabinama. Be taugu vutuna kipora tauraġaraġan yà yanayanana.”

¹⁷ Be Arua be naġivau waivinama ta riuriuna, “Kwa verau!” Be tauna aitau inam riunama e vaiena tauna mate e riuna, “Kwa verau!” Be aitau da nuanama e raukasakasana, naumeki da e verauna, be deġoda aitau e ġoena, yawasana upanama yà ute be e tegona, be nam tokare ei maesi.

¹⁸ Taumi aitaugā uma bukane waiperoveta giudima koya vaivailedina yà riuriu vavasaġemina, deġoda tam aitau giuditabu uma bukane kwa birisaġedina, naumeki da Mamaitua tokare kovoġa uma bukane a girugirumidina, vutudi tam e utemna. ¹⁹ Be deġoda tam aitau uma bukanamanopone waiperoveta giudima ta kenakenana kwa kaiporaġana, naumeki da Mamaitua tokare nama am sikerema yawasana kaine be meagai babaune e kaiporaġana. Inam kainama be meagainama vutudi uma bukanama nopone è giuguedina.

²⁰ Yesu tauna uma kauidima tauwai maġataridima, tauna e riuriuna, “Inam riukaua! Taugu ġaubonaġa yà veraver-auna.”

Naumeki Bada Yesu, kwa verau!

²¹ Bada Yesu na raukiviverema taumi Mamaitua na banagama ġaromie e kenana.

Inam riukaua!